

Holy Bible

Aionian Edition®

ભડ્લાઈ બાઇબિલ

Bhadrawahi Bible

AionianBible.org
The world's first Holy Bible untranslation
100% free to copy and print
also known as " The Purple Bible "

Holy Bible Aionian Edition ®

ભડ્લાઈ બાઇબિલ

Bhadrawahi Bible

Creative Commons Attribution ShareAlike 4.0 International, 2018-2025

Source text: eBible.org

Source version: 4/25/2025

Source copyright: Creative Commons Attribution ShareAlike 4.0

The Love Fellowship, 2020

Formatted by Speedata Publisher 5.1.9 (Pro) on 6/2/2025

100% Free to Copy and Print

TOR Anonymously

<https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

ભદ્રવાહી at AionianBible.org/Preface

The *Holy Bible Aionian Edition* ® is the world's first Bible *un-translation!* What is an *un-translation?* Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is *eternal*! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

ભદ્રવાહી at AionianBible.org/History

- 06/21/75 - Two boys, P. and J., wonder if Jesus saves all and pray.
- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 09/15/18 - Aionian Bible dedicated as J. and J. pray again.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as another J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 01/23/22 - Volunteers celebrate with pie and prayer.
- 02/14/22 - Strong's Concordance from Open Scriptures and STEPBible.
- 02/14/23 - Aionian Bible published on the TOR Network.
- 12/04/23 - Eleēsē added to the Aionian Glossary.
- 02/04/24 - 352 translations now available in 142 languages.
- 05/01/24 - 370 translations now available in 164 languages.
- 08/05/24 - 378 translations now available in 165 languages.
- 08/18/24 - Creative Commons Attribution 4.0 International, if source allows.
- 10/20/24 - Gospel Primer handout format.
- 11/24/24 - Progressive Web Application off-line format.
- 01/28/25 - All profits are given to CoolCup.org.
- 03/12/25 - 382 translations now available in 166 languages.
- 05/04/25 - 393 translations now available in 175 languages.
- 05/27/25 - 462 translations now available in 229 languages.

Table of Contents

NEW TESTAMENT

मत्ती	11
मरकुस	74
लूका	124
यूहन्ना	191
प्रेरितों के काम	242
रोमियो	308
1 कुरिन्थियों	337
2 कुरिन्थियों	367
गलातियों	386
इफिसियों	396
फिलिप्पियों	406
कुलुसिसियों	413
1 थिस्सलुनीकियों	419
2 थिस्सलुनीकियों	425
1 तीमुथियुस	429
2 तीमुथियुस	438
तीतुस	445
फिलेमोन	449
इब्रानियों	451
याकूब	473
1 पतरस	480
2 पतरस	490
1 यूहन्ना	497
2 यूहन्ना	504
3 यूहन्ना	506
यहूदा	508
प्रकाशित वाक्य	511

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



यीशु जोवं, “हे बाजी एन माफ़ करां एन न जानन् कि एना कुन लोरेम केरने।”

ते तैनेई तैसेरे लिगड़ा केरे लेइ पेरची छेडतां शर्त रख्यू ते एप्पू मासेइं बटां।

लूका 23:34

मत्ती

1 अब्राहमेरी औलादी मरां दाऊद राज़ो थियो, दाऊद राजेरे औलादी मरां यीशु
मसीह थियो। यीशु मसीहेरे दादे-पड़दादा केरां नंव्वा इना आन। 2 अब्राहमेरु
मटू इसहाक थियूं, इसहाकेरु याकूब, याकूबेरां मटूं यहूदा ते तैसेरे ढ्ला थिये।
3 यहूदा ते तामारेरां मटूं पेरेस ते जेरह थियां, पेरेसेरु मटू हेसोन, हेसोनेरु
एराम, 4 ते एरामेरु अम्मीनादाब, अम्मीनादाबेरु नहशोन, नहशोनेरु सलमोन,
5 ते सलमोन ते तैसेरी कुआन्श राहाबेरु मटू बोआज थियूं, ते बोआज ते तैसेरी
कुआन्श रूतरु ओबेद, ओबेदेरु यिशै, 6 ते यिशैरु मटू दाऊद राज़ो थियो,
दाऊद राजेरु मटू सुलैमान तैस कुआन्शी सेइं पैदा भोव, ज़ै पेइली ऊरिय्याहरी
कुआन्श थी। 7 सुलैमानेरु रहबाम, रहबामेरु अबिय्याह, अबिय्याहेरु आसा,
8 ते आसारु यहोशाफात, यहोशाफातेरु योराम, ते योरामेरे खानदानेरे मरां
उज्जिय्याह पैदा भोव। 9 उज्जिय्याहेरु योताम, योतामेरु आहाज, आहाजेरु
हिजकिय्याह, 10 ते हिजकिय्याहेरु मनश्शे, मनश्शेरु आमोन, आमोनेरु मटू
योशिय्याह थियूं 11 ते योशिय्याहेरां पोट्लडां यकुन्याह ते तैसेरे ढ्ला थिये,
ज़ैना गिरफ्तार भोइतां बाबेलेरी गुलैमी मां गानेरे वक्ते मां ज़र्मोरां थियां। 12
गिरफ्तार भोइतां बाबेलेरी गुलैमी मां गानेरे पत्ती यकुन्याहेरु शालतियेल ते
शालतियेलेरु जरुब्बाबेल, 13 ते जरुब्बाबेलेरु अबीहूद, अबीहूदेरु एलयाकीम,
एलयाकीमेरु अजोर, 14 ते अजोरेरु सादोक, सादोकेरु अखीम, अखीमेरु
एलीहूद 15 ते एलीहूदेरु एलीआजर, एलीआजारेरु मत्तान, मत्तानेरु याकूब,
16 ते याकूबेरु यूसुफ, ते यूसुफ मरियमरो मुन्श थियो, ते मरियमरु मटू यीशु
आए, ज़ैस जो मसीह ज़ोतन। 17 एन्चरे अब्राहमे करां दाऊद राजे तगर चेवधे
पीड़ी भोइ, ते दाऊद राजे करां यहूदी केरे गिरफ्तार भोइतां बाबेलेरी गुलैमी
मां गाने तगर चेवधे पीड़ी भोइ, ते गिरफ्तार भोइतां बाबेले मां गाने करां देइतां
यीशु मसीह तगर चेवधे पीड़ी भोइ। 18 यीशु मसीहेरु ज़र्म एन्चरे सेइं भोवं,
कि ज़ैखन तैसेरी अम्मा मरियमरी कुड़माइ यूसुफ नंव्वे एककी मैन्हु सेइं
भोरी थी, त तैन केरे ढ्ला भोने करां पेइले मरियम पवित्र आत्मारे शेक्ति सेइं
दोज़ींती भोइ। 19 तैसारो मुन्श यूसुफ ज़ै धर्मी मैन्हु थियो, तै तैस बदनाम
केरनि न थियो चातो। तैनी चुपचारे इन सोचू, कि मीं एस सेइं ढ्ला नईं
बनानो। 20 हेजू तै एन सोचने लोरो थियो, त प्रभुएरे एककी स्वर्गदूते तैस

सेइं सुपने मां एइतां ज़ोवं, “हे यूसुफ! तू ज़ै दाऊदेरे खानदाने मरां आस, तू मरियम अपनि कुआन्श बनाने करां न डर, किजोकि ज़ैन तैसारे पेटे मां आए तैन पवित्र आत्मारे तरफां आए। 21 तैस मटू भोनूए, ते तू तैसेरु नवं ‘यीशु’ रेखां, किजोकि तैए अपने लोकन तैन केरे पापन करां मुक्ति देलो।” 22 एन सब किछ एल्हेरेलेह भोवं, कि ज़ैना वचन प्रभुए यशायाह नेबेरे ज़िरिये ज़ोरे थिये पूरे भोए कि, 23 “हेरा, अक अडलाई कुई पेटे भारी भोली, ते तैस अक मटू भोलू, ते लोक तैस जो इम्मानुएल ज़ोतें” ज़ेरोरो मतलब ई आए, परमेश्वर असन सेइं साथी आए। 24 तैखन यूसुफ निडलारां बींझो त तैनी परमेश्वरे ख्वासदूतेरु ज़ोनू मन्नू, ते मरियमी सेइं इला बनाव ते अपने घरे आनी। 25 पन ज़ांतगर तैस मटू न भोवं तांतगर तै तैस सेइं साथी न झुल्लो ते ज़ैखन तैस मटू भोवं त यूसुफे तैस मट्टेरु नवं यीशु रख्खू।

2 हेरोदेस राजेरे ज़माने मां ज़ोइस यहूदिया इलाकेरे बैतलहम नगरे मां यीशु पैदा भोवं, त पूर्बें रां किछ जोष्टी लोक यरूशलेम नगरे मां आए। 2 ते तैना लोकन पुच्छने लगे, “यहूदी लोकां केरो राजो ज़ै ज़र्मोरोए तै कोड़ि आए? किजोकि असेईं पूरबे मां तैसेरो तारो लोरोए, ते आस तैस कां मथ्थो टेकने ओरेम।” 3 ज़ैखन हेरोदेस राजे ए गल शुनी, त हेरोदेस राजो ते कने यरूशलेम नगरेरे सारे लोक घबराए। 4 ते हेरोदेस, यहूदी लोकां केरे प्रथान याजक ते शास्त्री लोक अकोट्ठे केरतां तैन पुच्छने लगे, “मसीह कोड़ि पैदा भोरो लोड़े?” 5 तैनेईं तैस सेइं ज़ोवं, “यहूदिया इलाकेरे बैतलहम नगरे मां,” किजोकि (बड़े पैइले) मीका नेबे एन्नरे लिखोरुए, कि परमेश्वरे ज़ोवं, 6 “हे बैतलहम नगर, तू ज़ैन यहूदिया इलाके मां आस, यहूदियारे इलाकन मां तू बङू खास नगर आस, किजोकि तीं मरां अक एरो हाकिम निसेलो ज़ै मेरे लोक इस्साएलेरी रखवाली केरेलो” 7 ज़ैखन हेरोदेस राजे एन शुनू, त तैनी जोष्टी चुपचारे कुजेइतां तैन करां तारो निसनेरे ठीक वक्तेरे बारे मां पतो कियो। 8 ते तैनी जोष्टी एन ज़ोइतां बैतलहम नगरे जो भेजे, कि “गाथ, ते तैस बच्चेरे बारे मां रोड़ेच्चारे पतो केरा ते ज़ैखन तुसन पतो लगे, त (वापस एइतां) मीं भी पतो देइयथ ताके अवं भी तैस कां गेइतां मथ्थो टेकी।” 9 तैना जोष्टी (हेरोदेस) राजेरी गल शुन्तां (यरूशलेम नगरेरां) चले जे। ते अकदम तै तारो, ज़ै तैनेईं पूरबे मां लोरो थियो, तैन अग्री-अग्री चलो ते तैस घरेरे बा रुको

जैड़ी तैन मटू थियूं। 10 जैखन तैनेई तै तारो लव, त तैना बड़े खुश भोए।
 11 तैखन तैना घरे अन्तर जे ते तैन मटू तैसेरी अम्मा मरियमी कां लाव ते
 तैस मटू कां मथ्थो टेको। तैखन तैनेई अपने-अपने खजानेरे झोले खोलतां
 सोन्नू लोबान ते मुर्त तैस कां चाढू। 12 जोष्टी केरे तैटूं निसनेरां पत्ती, तैन
 सुपने मां ए बिस्तार मैल्लो कि वापस हेरोदेसे कां न गेइयथ। एल्हेरेलेड तैना
 वापस कोन्ची होरि बत्तां अपने मुलखे जो चले जे। 13 जोष्टी केरे गानेरां पत्ती,
 अचानक प्रभुएरो अक स्वर्गदूत यूसुफे सुपने मां मैल्लो ते ज्ञाने लगो, “उठ,
 बच्चो ते तैसेरी अम्मा नेइतां मिस मुलखे जो नश। ते मेरे ज्ञाने तगर तैड़ी
 रेइयां, किजोकि हेरोदेस राजो बच्चे तोप्तां मारने चाते।” 14 यूसुफ निडलारां
 उठो ते मटू ते तैसेरी अम्मा साथी नेइतां रातो-रात मिस मुलखे जो चलो जेव।
 15 हेरोदेसेरे मरने तगर यूसुफ तैड़ी राव, ताके प्रभुएरु तैन वचन पूरु भोए,
 जैन होशे नेबे लिखोरु थियूं, “मीं मिस मुलखे मरां अपनू मटू कुजाव।” 16
 जैखन हेरोदेसे जोष्टी केरे धोखे बैज़रो पतो लगो, त तैस बड़ी सरक आई। तैनी
 अपने मैन्हु भेज्तां, जैन गल्लां केरो पतो तैस जोष्टन करां मैल्लोरो थियो,
 तैनी बैतलहम नगरे ते तैसेरे आसेपासेरे इलाकन मां सिपाही भेज्तां सारां
 मट्ठां, जैना दूर्द सालां केरां या दूर्द सालन करां निकड़ां थियां मारां। 17 जैखन
 एन भोव, त तैखन तैन वचन पूरु भोवं, जैन यिर्याह नेबे ज्ञोरु थियूं। तैनी
 ज़ोवं, 18 “रामाह नगर मां बेड़ि लेरां ते मातमेरि आवाज़ शुनोई, राहेल अपने
 बच्चां केरे लेइ लेरां देने लोरी, तैसारो दिल ठंडो न भोए, किजोकि तैसेरे बच्चे
 मेरि जोरन।” 19 हेरोदेसेरी मौतारां पत्ती, जैखन यूसुफ मिस मुलखे मां थियो,
 त अचानक प्रभुएरो स्वर्गदूत तैस सुपने मां लेइहोव ते तैस सेइं ज्ञाने लगो,
 20 “उठ, बच्चो ते कने तैसेरी अम्मा साथी नेइतां इस्साएल मुलखे जो वापस
 चलो गा, किजोकि जैना लोक बच्चे मारने चाते थिये, तैना मेरि जोरेन।” 21
 फिरी यूसुफ निडलारां बींझो, ते बच्चो ते तैसेरी अम्मा साथी एन्तां इस्साएल
 मुलखे जो वापस अव। 22 पन जैखन यूसुफे एन शुनू कि अरखिलाउस अपने
 बाजी हेरोदेसेरी ठैरी यहूदिया इलाके पुड़ राज़ केरने लगोरो, त तै तैड़ी गाने
 करां डरो। एल्हेरेलेड जैखन यूसुफे सुपने मां परमेश्वरो बिस्तार मैल्लो, त तै
 गलील इलाके जो चलो जेव। 23 ते तैड़ी पुज़तां तै नासरत नंव्वेरे नगर मां राने

लगो, ताके तैन वचन पूरु भोए, जैन परमेशरे अपने नेबी केरे ज़िरिये ज़ोरो
थियूं। तैनेई ज़ोवं, “तैस जो नासरी ज़ोले।”

3 तैन दिहाड़न मां यूहन्ना नंब्वेरो मैन्हु, जै बपतिस्मो देनेबालो थियो, यहूदिया
इलाकेरे सुनसान ठैरी मां अव। तै लोकन ज़ैना तैस कां एइते थिये, तैन ई
प्रचार केरतो थियो, 2 “अपने पापन करां मनफिराथ, किजोकि स्वर्गें राज
नेडे ओरुए!” 3 ई तैए ज़ेसेरे बारे मां यशायाह नेबे एन ज़ोरु थियूं, “कोई
सुनसान ठैरी मां लोकन, जैना तैस कां गातन, तैन उच्ची आवाज़ी सेइं ज़ोलो
कि ‘तुसन कां प्रभु एजनेबालो आए, एल्हेरेलेइ तैसेरी बत तियार केरा ते कने
तैसेरेलेइ सड़कां सिद्धी केरा।’ (यानी, प्रभुएरे लेइ तुस अपने दिल साफ
केरा)” 4 यूहन्ना आम लिगड़ां लातो थियो जैना लिगड़ां ऊंटेरे बालन सेइं
बनोरां थियां। तै अपनि कमरी पुड़ चमड़ेरु मज़ बंधतो थियो। ते तै टिट्वां त
कने जंगलेरु माछी खातो थियो। 5 तैखन यरुशलेम नगरेरे बड़े लोक ते
यहूदिया इलाकेरे बड़े लोक ते यरदन दरियारे आसे-पासेरे इलाकन मरां लोक
यूहन्नारी गल्लां शुन्नेरे लेइ तैस कां एइते थिये। 6 ते तैनेई अपने पाप मेन्तां
यूहन्ना करां यरदन दरियाए मां बपतिस्मो नीयो। 7 पन ज़ैखन तैनी हेऱु कि
बड़े फरीसी ते सदूकी लोक बपतिस्मो नेनेरे लेइ तैस कां एजने लोरेन, त
तैनी तैन सेइं ज़ोवं, “तुस ज़ेहरीले सप्पेरे ज़ेरे बुरे आथ! तुसन केनि ज़ोवं
कि, एजनेबाले परमेशरेरे कोपे करां नश्शा? 8 सज़ाई करां बज्जनेरे लेइ तैना
कमां केरा, जैन सेइं पतो लगे तुसेई सच्चे पापन करां मन फिरावरोए। 9 ते
अपने-अपने दिले मां एन न सोचा कि ‘अब्राहम इश्शो बाजी आए’ (परमेशर
तुश्शी पाप सिर्फ एल्हेरेलेइ माफ़ न केरेलो कि तुस अब्राहमेरी औलाद आथ),
किजोकि अवं तुसन सेइं ज़ोताईं कि परमेशर इन घोड़न मरां भी अब्राहमेरे
लेइ औलाद पैदा केरि सकते! 10 ते हुन्ना त बुट्टां केरे ज़ीलन पुड़ परमेशरेरो
मैक्कु रख्खोरोए, एल्हेरेलेइ जै कोई तैस बुट्टरो ज़ेरो भोते, जै रोड़ो फल न दे,
तै कटनोए ते अग्गी मां छँडनोए। 11 अवं त तुसन पैनी सेइं बपतिस्मो देताईं
किजोकि तुसेई मनफिरोरोए, पन मसीह जै मेरे बाद एजनेबालोए, तै मीं केरां
भी महान आए। अवं त तैसेरो गुलाम भोनेरे काबल भी नई कि तैसेरे बूट
छुई। तै तुसन पवित्र आत्माई सेइं ते अग्गी सेइं बपतिस्मो देलो (जैना मन
फिरान, तैनन)। 12 तैसेरु छज्ज तैसेरे हथ्थे मां आए ते तै खलाड़ रोड़ेच्चारे

साफ केरेलो, तै गेहुं अपने कोठारे मां रखेलो, पन झाड़ी तैस अग्गी मां
फुकेलो ज़ै कधे न हिशें। (एलहेरेलेइ पापन करां मनफिराथ नईं त परमेश्वर
तुसन सज्जा देलो)” 13 तैस मौके यीशु गलील इलाके मरां यरदन दरियारे
बन्ने पुड़ यूहन्ना कां अव, ताके तैस करां बपतिस्मो ने। 14 पन यूहन्ना, यीशु
जो इन ज्ञोइतां रोकने लगो, “मीं तीं करां बपतिस्मो नीयोरो लोड़ते, फिरी
किजो तू मीं करां बपतिस्मो नेने ओरोस?” 15 पन यीशुए तैस ई जुवाब
दित्तो, “हुनी तू एन्हरे भोने दे, किजोकि एन्हरे केरतां अस तैन केरतम जैन
परमेश्वर चाते।” तैखन यूहन्ना तैसेरी गल मन्नी। 16 ते यीशु जैखन बपतिस्मो
नेइतां पैनी मरां बेझर अव, त तैस मौके हेरा अम्बर खुल्ली ज्ञोवं। ते तैनी
पवित्र आत्मा कबूतरेरी शकली मां एप्पू पुड़ इटी लाई। 17 ते तैखन हेरा
अम्बरे मरां ए आवाज़ आई (त यीशुए बारे मां ज्ञोवं), “एन मेरु ट्लारु मटू,
अवं एस पुड़ बड़ो खुश आई।”

4 तैल्ला पत्ती, पवित्र आत्मा यीशु सुनसान ठैरी मां नीयो, ताके शैतान तैसेरी
अज़मैइश केरे। 2 40 दिहाड़े ते 40 रातन किछ न खानेरां पत्ती तैस ढ्लुख
लग्गी। 3 त तैखन शैताने जैस जो अज़माने बालो भी ज़ोतन, तैस कां एइतां
ज्ञोवं, “अगर तू परमेश्वरु मटू आस, त इन घोड़न जो हुक्म देइतां साबत
केर, कि एना रोट्टी बनन् ताके तू खेइ सकस।” 4 यीशुए तैस जुवाब दित्तो,
“अवं न केरेलो किजोकि परमेश्वरेरी किताबी मां लिखोरुए, ‘मैन्हु सिर्फ रोट्टैइं
सेइं ज़ींतो न राए, बल्के तै हर गल मन्ने सेइं ज़ींतो राते, जै परमेश्वर ज़ोते।’”
5 फिरी शैताने तै पवित्र नगर यरुशलेमे मां नीयो ते मन्दरेरी उच्ची छ़म्पी पुड़
नेइतां खड़े कियो। 6 तैखन तैनी यीशु सेइं ज्ञोवं, “अगर तू हकीकि मां
परमेश्वरु मटू आस त इट्टां बिछ़ड़तां साबत केर, किजोकि पवित्रशास्त्रे मां
लिखोरुए, ‘तै तेरे लेइ अपने स्वर्गदूतन हुक्म देलो, ते तैना तीं अपने हथ्थन
मां ट्लाले, ताके तेरे पावन केन्वी घोड़न सेइं ठोकर न लगो।’” 7 यीशुए तैस
सेइं ज्ञोवं, “(नईं, अवं छाल न मारेलो, किजोकि) परमेश्वरेरी किताबी मां एन
भी लिखोरुए, ‘तू प्रभु अपने परमेश्वरे अज़मैइतां इन साबत केरनेरी कोशिश
न केर कि तै अपने वादे पूरे केरते या नईं।’” 8 तैखन शैताने, यीशु एककी बड़े
उच्चे पहाड़े पुड़ नीयो, ते तैड़ी दुनियारां सारां राज़जां ते तैन केरि धन दौलत
तैस हिराई। 9 तैखन तैनी यीशु सेइं ज्ञोवं, “अगर तू मीं कां मथ्थो टेकस ते

मेरी आराधना केरस, त अवं इन सब किछ तीं देलो।” 10 यीशुए तैस जो ज़ोवं, “हे शैतान! दूर भो, किजोकि परमेश्वरी किताबी मां लिखोरुए, ‘तू सिर्फ प्रभु अपने परमेश्वरे कां मथ्थो टेक ते तैसेरी आराधना केर!’” 11 तैखन शैतान तैस करां चलो जेव, ते अकदम किछ स्वर्गदूत यीशु कां एइतां तैसेरी सेवा केरने लगो। 12 एक्सां केन्वे यीशु जो ज़ोवं, कि यूहन्ना ज़ै बपतिस्मो देनेबालो थियो, कैद कियोरोए त यीशु यहूदिया इलाकेरां, गलील इलाके मां वापस अव। 13 ते नासरत नगर शैरतां कफरनहूम नगरे मां राने लगो, ज़ैन समुन्दरे बन्ने पुड आए, ज़ैडी जबूलून ते कने नप्ताली गोट्लेरे लोक राते थिये। 14 ताके तैन वचन ज़ैन यशायाह नेबे ज़ोरु थियूं पूरु भोए, तैनी ज़ोवं, 15 “ज़ैना लोक जबूलून ते नप्ताली गोत्रां केरे इलाके मां आन, ज़ैना गलील समुन्दरे नेडे यरदन दरियारे उस पार, गलील इलाके मां आन, ज़ैडी गैर यहूदी लोक भी रातन, 16 (तैना लोक) ज़ैना पापेरे आंधरे मां बिश्शोरेन, तैनेई बड्डी लौ लई। तै लौ तैन पुड चमकी ज़ैना हमेशारे मौतारे आंधरेरे मुलखे मां बिश्शोरेन।” 17 तेइसेरू देंतू यीशुए परमेश्वरी खबर लोकन शुनानेरी सेवा शुरु की। तैनी लोकन ज़ोवं, “अपने पापन करां मनफिराथ, किजोकि स्वर्गेँ राज़ नेडे ओरुए।” 18 एक्सां ज़ैखन यीशु गलील समुन्दरे बन्ने चलोरो थियो, त तैनी दूई मैन्हु लाए ज़ैना मेछळी ट्लानेबाले थिये। तैना मेछळी ट्लानेरे लेइ समुन्दरे मां ज़ाल छेड्डी राओरे थिये। तैन मरां एक्केरु नवं शमौन, ज़ैस जो पतरस भी ज़ोतन, ते तैसेरो ढ्ला ज़ेसेरू नवं अन्द्रियास थियूं। 19 यीशुए तैन सेइं ज़ोवं, “एज्जा मेरे चेले बना। अवं तुसन शिखालेलो कि केन्चरां होरे मैन्हु मेरे चेले बनानेन।” 20 तैना अकदम अपना ज़ालां छेडतां यीशु पत्ती चले जे। 21 ते तैना तैट्टां थोड़े ज़ेरे अग्गर जे, त यीशुए होरे दूई ढ्ला, यानी याकूब त कने तैसेरो ढ्ला यूहन्ना अपने बाजी जब्दी सेइं साथी किश्ती मां लाए। तैना किश्ती मां ज़ालां ठीक केरने लगोरे थिये। यीशुए तैना भी कुजाए (कि तैना तैसेरे चेले बनन्)। 22 ते तैना भी तैखने किश्ती ते अपने बाजी तैडी ज़ेरे छेडतां यीशु सेइं साथी चले जे। 23 तैल्ला पत्ती, यीशु सारे गलील इलाके मां हंठतो फिरतो राव। तै तैन केरे प्रार्थना घरन मां लोकन शिक्षा देतो राव ते परमेश्वरे राज़ज़ेरी खुशखबरी शुनातो राव। ते तै लोकां केरि हर किसमेरी बिमैरी ते कमज़ोरी दूर केरतो राव। 24 यीशुएरे बारे मां ई खबर

सारे सीरिया इलाके मां मुशूर भोइ जई। एसेरे वजाई सेइं, ज़ैडी कोन्ची तै जेव, तैडी लोक सेब्ही बिमारन ज़ैना हर किसमेरी बिमैरी ते तकलीफन मां फसोरे थिये, ते ज़ैन लोकन पुड़ भूतां केरो सायो थियो, ते ज़ैना मिरगरे रोगी थिये, ते ज़ैना अधरंगेरे रोगी थिये, तैना यीशु कां आने ते यीशुए तैना सारे बज़़गाए। 25 एसेरे वजाई सेइं मैन्हु केरि बड़ी भीड़ यीशु पत्ती चली। तैना लोक गलील, दिकापुलिस इलाकां केरे, यरुशलेम नगरे, यहूदिया इलाकेरे, ते यरदन दरियारे पैरीं पारेरे इलाकां केरां ओरे थिये।

5 यीशु तैना हछे लोक लेइतां एककी पहैड़ी पुड़ चलो जेव, ते जैखन तै शिखालनेरे लेइ बिश्शो त तैसेरे चेले तैस कां आए। 2 तैखन यीशु तैन लोकन शिक्षा देने लगो, 3 “परमेशर तैन लोकन बरकत देते, ज़ैना ज्ञानतन कि तैन परमेशरेरी ज़रूरते, किजोकि तै तैन पुड़ राज़ केरेलो। 4 परमेशर तैन लोकन बरकत देते, ज़ैना दुखी आन, किजोकि परमेशर तैन तस्सली देलो। 5 परमेशर तैन लोकन बरकत देते ज़ैना नम्र आन, किजोकि परमेशर तैन, तैना सैरी बरकतां देलो ज़ैन केरो तैनी वादो कियोरोए। 6 परमेशर तैन लोकन बरकत देते, ज़ैना परमेशरेरी नज़री मां रोड़ी गल्लां केरनेरी बड़ी इच्छा रखतन, (ज़ेन्हरे कोई ढलुखोरो खाने पीनेरी इच्छा रखते) तैन परमेशर अपनि मेझी पुड़ चलनेरे लेइ शक्ति देते। 7 परमेशर तैन लोकन बरकत देते, ज़ैना दया केरतन, किजोकि परमेशर भी तैन पुड़ दया केरेलो। 8 परमेशर तैन लोकन बरकत देते, ज़ैन केरे मन साफ आन, किजोकि तैन परमेशर दर्शन देलो। 9 परमेशर तैन लोकन बरकत देते, ज़ैना शैनतरां कम्मां केरतन, किजोकि तैन जो परमेशरेरे बच्चे ज़ोले। 10 परमेशर तैन लोकन बरकत देते, ज़ैना परमेशरेरी नज़री मां रोड़ि गल्लां केरनेरे वजाई सेइं सताए गातन, किजोकि परमेशर तैन पुड़ राज़ केरते।” 11 “परमेशर तुसन बरकत देलो, जैखन लोक तुसन मेरे चेलो भोनेरे वाजाई सेइं तुश्शी तुहीन केरन ते स्तान ते झूठ ज़ोइतां हर किसमेरी बुरी गल्लां तुश्शो बारे मां ज़ोन। 12 तैखन तुस खुशी रेड्यथ ते मघन भोइयथ, किजोकि परमेशरे ज़ैन इनाम स्वर्गे मां तुश्शे लेइ रख्खेरूए तैन बड़ू बड़ूए, किजोकि लोकेई बड़े पेइले तैना नबी भी एन्हरे सतोरे थिये।” 13 “तुस इस दुनियारे लोकां केरे लेइ लूनेरे ज़ेरे आथ, पन अगर लूनेरो स्वाद चेलि गाए, त फिरी दुबारां केन्चरे तैसेरो स्वाद वापस आनेले? फिरी तैन कोन्ची

कम्मेरु न राए, सुवाए बेइरोबं शासनेरां ते लोकां केरे पांवेहं सेइं ढ्लेन्चोनेरां।”

14 “तुस इस दुनियारे लोकां केरे लेइ लोअरे ज़ेरे आथ। ज़ैन नगर पहाड़े पुड़ बसते तैन कथे भी छेप्पी न सके। 15 लोक बलतो दीयो हेटी मां न रखन, पन तैस उच्ची ठैरी रखतन ताके घरेरे सैरी मैनन् लौ पुज्जे। 16 ते एन्हरे तुश्शी लौ मैन्हु केरे सामने एरी चमके, ताके तैना तुश्शां रोड़ां कम्मां हेरतां तुश्शे स्वर्गेरे बाजेरी तारीफ केरन।” 17 “एन न बुझाथ कि अवं मूसेरो कानून या नेबी केरे किताबन मां लिखोरी गल्लां रद केरने ओरोई। अवं तैन रद केरने नई बलके पूरी केरने ओरोई। 18 किजोकि अवं तुसन सेइं सच्च ज़ोताई, कि ज़ां तगर धरती त अम्बर खतम न भोए, तांतगर परमेशरेरे कानूने मरां अक मात्रा या बिंदी भी न टलेली, ज़ां तगर सब किछ लिखोरू पूरू न भोए। 19 एल्हेरेलेइ जै कोई इन निकडे करां निकडे हुक्मन मरां केन्ची एककी ज़ेरे ट्लोडते ते होरन भी एन्ने केरनू शिखालते, तै स्वर्गेरे राज्जे मां सेब्बन करां निकडो भोलो, पन जै तैन हुक्मन पुड़ अमल केरते ते होरन भी एन हुक्मन पुड़ चळनेरे बारे मां शिखालते त तै स्वर्गेरे राज्जे मां बङ्गो भोलो। 20 किजोकि अवं तुसन सेइं ज़ोताई कि ज़ां तगर तुस शास्त्री ते फरीसी लोकन करां रोड़े चारे कानूने न मन्नेले, तांतगर तुस स्वर्गेरे राज्जे मां दाखल न भोइ सकतथ।” 21 “तुसेई शुनेरू थियूं कि परमेशरे इश्शो दादे-पङ्ददादन सेइं ज़ोरू थियूं ‘खून नई केरनो, ते जै खून केरेलो त तैस आदालत सज्जा देली।’ 22 पन मेरु ज़ोनू एने कि जै कोई अपने ढ्लाए पुड़ क्रोध केरते, परमेशर तैसेरो इन्साफ केरेलो, ते जै कोई अपने ढ्लाए जो निकम्मो ज़ोते त तैस भी महासभा मां जुवाब देनो पेनोए, ते जै कोई अपने ढ्लाए जो ‘बेवकूफ’ ज़ोलो त परमेशर तैस नरकेरे अगारी सज्जा देलो। (Geenna g1067) 23 एल्हेरेलेइ अगर तू अपनि चळतल मन्दरे मां आनस, ते तैडी तीं याद एज्जे कि मीं अपने ढ्लाए सेइं किछ गिलोए। 24 त तू अपनि चळतल बलिदान चाढ़नेरि ठैरी पुड़ छेडतां पेइले अपने ढ्लाए सेइं मेल-मलाप केरां, फिरी अपनि चळतल चैढां। 25 अगर कोई मैन्हु तीं पुड़ दाओ केरतां तीं आदालती मां नेनो चाते, त तू बत्तां तैस सेइं मेल-मिलाप केरां न त तैनी तू हाकिमे कां खड़ो केरनोस, ते तैनी तू सिपैहीएरे हवाले केरनोस ते सिपैहिए तू कैद केरतां छँडनोस। 26 अवं तुसन सेइं सच्च ज़ोताई कि ज़ां तगर तू पाई-पाई न देलो त तांतगर तैटुं छुट्टी न सकेलो।” 27 “तुसेई शुनेरू थियूं,

कि ई हुक्म दित्तोरो थियो, ‘बदमाशी नई केरनि।’ 28 पन अवं तुसन इन भी ज़ोताई कि ज़ै कोई केन्ची कुआन्शी पुड़ गेन्दी नज़रां सेइं तकते, तैनी अपने दिले मां पेइली तैस सेइं बदमाशी केरि छँड्ही। 29 अगर तेरी देइनी अछ तीं पाप केरनेरे लेइ ठोकर खुवाए, त तैस केढतां शार, किजोकि तेरी पूरी जान नरके मां छँड्हे गाने करां तेरे लेइ एन्ने रोड़ाए कि तेरी जानी मरां अक अंग नाश भोए (Geenna g1067) 30 अगर तेरो देइनो हथ तीं पाप केरनेरे लेइ ठोकर खुवाए त तैस केटतां शार, किजोकि तेरी पूरी जान नरकेरी अग्गी मां गाने करां तेरे लेइ एन्ने रोड़ाए कि तेरी जानी मरां अक अंग नाश भोए।” (Geenna g1067) 31 “एन भी ज़ोरू थियूं, ‘ज़ै कोई अपनि कुआन्श शारे त एन ज़रुरीए कि फारख्ती लिखतां हावाले केरे।’ 32 पन अवं तुसन सेइं ज़ोताई, कि ज़ै कोई अपने कुआन्शी बदमैशरे अलावा होरि केन्ची गल्ली पुड़ फारख्ती दे, त तै तैस केरां बदमैशी केरवाते। ते ज़ै कोई तैस शैरोरी कुआन्शी सेइं डला बनाते, त तै भी तैस सेइं बदमाशी केरते।” 33 “तुसेई शुनोरू, कि ई हुक्म दित्तोरो थियो, ‘झूठी कसम नई केरनि, पन कसम प्रभुएरे लेइ पूरी केरथ।’ 34 पन अवं तुसन सेइं ज़ोताई कि कधे कसम न केरथ, न स्वर्गेशी, किजोकि तै परमेशरे तखत आए। 35 न ज़मीनारी किजोकि परमेशर तैड़ी पाव रखते, ते न यस्तलेम नगरेरी किजोकि तैन महा राजां केरु नगर आए। 36 ते न अपने दोग्गेशी कसम केरथ, किजोकि तुस अपनो अक बाल भी छित्तो या कालो न केरि सकतथ। 37 पन हांएरी ठैरी हाँ ते नाएरी ठैरी न ज़ोथ, किजोकि ज़ैन किछ एस करां जादे तैन बुरैई यानी शैतानेरे पासेरां आए।” 38 “तुसेई शुनोरूए, कि मूसेरे कानूने मां लिखोरूए, कि अछँछरे बदले अछ ते दंतेरे बदले दंत। 39 पन अवं तुसन सेइं ज़ोताई कि, बुरे मैन्हु करां बदलो न नेइयथ। अगर कोई तेरे देइनी खैखोड़ी पुड़ थप्पड़ बालो त तू बाएं पासो भी तैसेरे पासे रेख्खां। 40 ते अगर कोई मुकदमो केरतां तेरी कमीज़ नेनी चाए त तू कोट भी तैसेरे हवाले केरां। 41 ते अगर कोई सिपाई तीं भारे छूने अक मील नेने चाए त तू दूर्द मील गेइयां। 42 ज़ै कोई तीं करां किछ मग्गे, तैस दे। ते ज़ै कोई तीं करां ओधार मग्गे त तुत्तर न फिरेइयां।” 43 “तुसेई शुनोरूए, कि मूसेरे कानूने मां लिखोरूए, कि ‘अपने पड़ोसी सेइं अपनो ज़ेरो प्यार केरथ ते दुश्मने सेइं बैर रेखथ।’ 44 पन अवं तुसन सेइं ज़ोताई, कि अपने

दुश्मन सेइं प्यार केरा, ते ज़ैना तुसन सतातन तैन केरे लेइ प्रार्थना केरा। 45
ज़ैस सेइं तुस अपने स्वर्गेर बाजी केरे बच्चे बेनि सकतथ, ज़ै अपनो दिहाड़ो
अपने रोड़े लोकन पुड़ चमकाते ते बुरे लोकन पुड़ भी, ते धेर्मी लोकन पुड़
झ़ड़ी देते ते बुरे लोकन पुड़ भी। 46 किजोकि अगर तुस तैन्ने लोकन सेइं
प्यार केरथ ज़ैना तुसन सेइं प्यार केरतन त तुसन कुन इनाम मैलेलू? कुन
चुंगी धिन्ने बाले भी एन्ने न केरन?” 47 “ते अगर तुस सिर्फ अपने ढलान जो
नमस्कार ज़ोथ, त तुस होरन करां जादे कुन केरतथ? कुन गैर कौमां केरे
लोक ज़ैना परमेशरेरे कानूने न मनन् तैना भी एरु न केरन? 48 तुसन तैन
लोकन सेइं प्यार केरनेरी झ़रूरत आए, ज़ैना तुसन सेइं प्यार न केरन, एन्नरां
तुस सिद्ध भोले ज़ेन्चरे स्वर्ग मां रानेबालो तुश्शो बाजी सिद्ध आए।”

6 “खबरदार, तुस अपने रोड़ां कम्मा सिर्फ लोकन हिरानेरे लेइ न केरा, नई
त तुश्शो स्वर्गेरो बाजी तुसन कोई इनाम न देलो। 2 एल्हेरेलेइ ज़ैखन तू गरीब
मैन्हु दान देस, त तू दुंधूरो न बजेइयां, ज़ेन्चरे पाखंडी लोक प्रार्थना घरन मां ते
गेल्लन मां केरतन, ताके लोक तैन केरि तारीफ़ केरन। अवं तुसन सेइं सच्च
ज़ोताई कि ज़ैन इनाम तैन मैलनू थियूं तैन सिर्फ इन्ने, कि लोकेई तैन केरि
तारीफ़ की (परमेशरे करां तैनन् कोई इनाम न मैलेलो)। 3 पन ज़ैखन तू
गरीब मैन्हु दान देस, त केच्ची पतो न लोड़े लग्गोरो कि तीं कुन दित्तू। 4 ताके
तेरु दान छ़प्पोरु भोए, तैखन तेरो बाजी ज़ै छ़ेपतां तकते, तीं इनाम देलो।” 5
“ज़ैखन तू प्रार्थना केरस त पाखंडी लोकां केरो ज़ेरो न बेना, ज़ैना प्रार्थना
घरन मां ते सड़कां केरे मोड़न पुड़ खेड़ोइतां प्रार्थना केरनि सुखातन, ताके
लोक तैन तककन ते तैन केरि तारीफ़ केरन। अवं तुसन सेइं ज़ोताई कि ज़ैन
इनाम तैनन् मैल्लोरु लोड़तू थियूं तैन सिर्फ इन्ने, कि लोकेई तैन केरि तारीफ़
की (परमेशरे करां तैनन् कोई इनाम न मैलेलू)। 6 पन ज़ैखन तू प्रार्थना केरस
त अकैल्लो अपने कमरेरो अन्तर गा, ते दार बंद केरतां अपने परमेशरे कां ज़ै
लेइहोए न तैस कां प्रार्थना केरा। तैखन तुश्शो बाजी परमेशर ज़ै लेइहोए न,
ज़ै हर वक्त तीं तकतो राते तै तीं इनाम देलो। 7 प्रार्थना केरते बार, गैर कौमां
केरु ज़ेरु बकबक न केरां, किजोकि तैना समझातन कि तैन केरे बकबक
केरने सेइं तैन केरि प्रार्थना शुनी गाली। 8 तैन केरे ज़ेरे न बना, किजोकि
तुश्शो बाजी तुश्शो मगने करां पेइले तुश्शी झ़रूरतां ज़ानतो।” 9 “एल्हेरेलेइ

तुस एन्चरे प्रार्थना केरा, हे इश्शो बाजी, तू जै स्वर्गे मां आस, लोक तेरी आदर
 केरन किजोकि तू पवित्र परमेश्वर आस। 10 तू सेब्भी लोकन पुड़ ते चीज़न
 पुड़ राज़ केरस। तेरी मर्जी ज़ेन्चरे स्वर्गे मां पूरी भोचे, इस धेरती पुड़ भी
 भोए। 11 इश्शी रोज़ेरी रोट्टी अज़ असन दे। 12 ते ज़ेन्चरे अस जैना इश्शो
 खलाफ बुराई केरतन, तैन माफ़ केरतम, तेन्चरे तू भी इश्शी बुरैई माफ़ केर।
 13 अज़मैइशरे ज़िरिये असन पाप केरने न दे, पन बुरैई यानी शैताने करां
 बच्चेह्यां, (किजोकि राज़, शक्ति ते महिमा हमेशा तेरी भोती राए। आमीन।)
 14 “एल्हेरेलेइ अगर तुस लोकां केरे पाप माफ़ केरेले, त तुश्शो स्वर्गेरो बाजी
 भी तुश्शो पाप माफ़ केरेलो। 15 ते अगर तुस लोकां केरे पाप माफ़ न केरेले,
 त तुश्शो स्वर्गेरो बाजी भी तुश्शो पाप माफ़ न केरेलो।” 16 “ज़ैखन तुस बरत
 रखत, त पाखंडी लोकां केरु ज़ेरु अपनू तुत्तर न बगैरथ। तैना अपनू तुत्तर
 बिगाड़तन, ताके लोकन पतो लग्गे कि एनई अज़ बरत रख्खोरुए ते तैन केरि
 तारीफ केरन। अबं तुसन सेइं सच्च ज़ोताई कि जैन इनाम तैन मैलनू थियूं तैन
 मैल्ली जेव। 17 बल्के ज़ैखन तू बरत रखस त अपनू तुत्तर थोइयां ते दोग्गे
 तेल मेल्लां। 18 ताके लोक नई, पन तेरो स्वर्गेरो बाजी, जै लेइहोतोए न तै
 लाए कि तीं बरत रख्खोरुए तै तीं इनाम देलो।” 19 “एप्पू जेर्इ धरती पुड़
 दौलत अकोट्टी न केरा, जैडी कीडे खातन ते मौरचो लेगतां नाश केरते, ते चोर
 तुश्शू घर ट्लोडतां चोरी केरतन। 20 बल्के रोड़ु केरतां अपने लेइ स्वर्गे मां
 दौलत अकोट्टी केरा जैडी न कीडो लग्गे, ते न मोरचो लग्गे ते न चोर चोरी
 केरेले। 21 किजोकि जैडी तेरी दौलत भोली, तैडी तेरो दिल भी लगेलो।”
 22 “अछ जानेरे लेइ दीयेरी जेरि आए, एल्हेरेलेइ अगर तेरी अछ रोड़ी साफ
 आए, त तेरी सारी जान लौ भोली। 23 अगर तेरी अछ खराब आए, त सारी
 जानी मां आंधरू भोलू। बस अगर जै लौ तीं मां आए तै आंधरू बेनि गाए, त
 तैन केटू आंधरू भोलू!” 24 “कोई मैन्हु दूर्द मालिकां केरि सेवा एककी वक्ते
 मां न केरि सके। न त एककी सेइं दुश्मनी केरेलो ते होरि सेइं प्यार केरेलो, या
 एककेरो बेनतां रालो त होरि न सुखालो। तुस परमेश्वरेरी ते दौलतरी, दुइयां
 केरि सेवा न केरि सकतथ। 25 एल्हेरेलेइ अबं तुसन सेइं ज़ोताई, कि तुस
 अपने ज़िन्दगरी ज़रूरतां केरे लेइ फिक्र न केरा, कि तुस कुन खाले या कुन
 पीले, ते न अपने जानारी कि कुन लामेले। कुन प्राण रोट्टी करां ते जान लिगड़े

करां बेधतां नई!” २६ “अम्बरेरे चुड़ोल्लन हेरा! तैना न किछ बेन, ते न किछ कटून, ते न अकोटु केरतां रखन, फिरी भी तुश्शो स्वर्गेरो बाजी तैन खाने जो देते ते तैन केरि हेरगेश केरते। कुन तुश्शी कदर तैन करां जादे नई? २७ तुसन मां एरो कौन आए, जै फिक्र केरतां अपनि उमर अक घड़ी भी बधैई सकते?” २८ “ते लिगड़ेरे लेइ किजो फिक्र केरतथ? जंगले मां सोसनेरां फूँडू हेरा कि तैना केन्चरे बेडोतन, न तैना मेहनत केरन, ते न तैना लिगड़ां बनान। २९ फिर भी अवं तुसन सेइं ज़ोताई कि राजो सुलैमाने भी अपने सारे धन दौलतरे बावजूद भी तैन केरां ज़ेरां लिगड़ा न लां। ३० एलहेरेलेइ ज़ैखन परमेशर मैइदानेरो घास, जै अज़ आए ते कालां लौवने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड़ न देलो? ३१ एलहेरेलेइ तुस फिक्र केरतां एन न ज़ोइयथ, कि ‘कुन खामेले, या कुन पीमेले, या कुन लामेले?’ ३२ किजोकि गैर कौमां एन गल्लां केरि फिक्री मां रेइचन। ते तुश्शो स्वर्गेरो बाजी ज्ञानते, कि तुसन कोनां-कोनां चीजां केरि ज़रूरत आए। एलहेरेलेइ तुस कोन्ची चीज़री फिक्र न केरा। ३३ पन पेइले तुस अपने आपे परमेशरेरे राज़ेरे लेइ अर्पण केरा, ते तैन कम केरा ज़ैन परमेशरेरी नज़री मां रोड़ू भोते, त इना सैरी चीजां भी तुसन मैल्ली गैली। ३४ एलहेरेलेइ कालेरे बारे मां फिक्र न केरथ, किजोकि कालेरी दिहाड़ी अपने लेइ एप्पू फिक्र आनेली। अज़ेरे लेइ अज़ेरो दुख सुद्धोए।”

७ “केन्ची पुड़ दोष न लेइयथ, तुसन भी दोष न लगेलो। २ किजोकि जेन्चरे तुस होरि पुड़ दोष लाएले, तेन्चरे परमेशर भी तुश्शो इन्साफ केरेलो। जेन्चरे तुस होरि लोकन सेइं बर्ताव केरतथ, तेन्चरे परमेशर तुसन सेइं बर्ताव केरेलो।” ३ “तू अपने ढ्लाएरी एछळी मां कूड़ो किजो तकतां, पन तेरी एछळी मां त नग आए, ते तैसेरो तू खियाल भी न केरस? ४ ज़द तेरी एछळी मां नग आए, त तू कौस ऐशी सेइं अपने ढ्लाए जो ज़ोई सकतां कि, ‘एई, अवं तेरी एछळी मरां कूड़ो केट्टी!’ ५ हे पाखंडी! पेइले अपने एछळी मरां नग कढ, ते फिरी अपने ढ्लाएरी एछळी मरां रोड़े चारे तेकतां कूड़ो केट्टी सकतस।” ६ “ज़ैना लोक परमेशरेरु वचन शन्नू न चान, तैन न शुनाथ। अगर तुस एन्चरे केरेले, त पवित्र चीज़ कुतरन कां छङ्गनेरे बराबर ते कने मोती सूरन कां छङ्गनेरे बराबर भोले, कि तैना तैन पव्वन हैठ ड्लन्चन ते बेदलोइतां तुसन

पुङ् हमलो केरलो।” 7 “परमेश्वरे करां मग्गा, त तुसन दित्तू गालू। ते तोप्पा, त तुसन मैल्ली गालू। ते दार गुड़काथ, त तुश्शो लेइ खोल्लू गालू। 8 किजोकि जै कोई मगते तै हासिल केरते, ते जै कोई तोपते तैस मैल्ली गाते, ते जै कोई दार गुड़काते तै सेरेलेइ खोल्लू गालू। 9 तुसन मां एरो कौन आए, कि अगर तैसेरू मटू रोट्टी मग्गे, त तै तैस घोड़ दे? 10 या अगर मछळी मग्गे, त तैस सप दे? 11 ते तुस बुरे भोनेरे बावजूद भी अपने मटून रोड़ी चीज़ां देनी ज्ञानतथ, त तुश्शो स्वर्गेरो बाजी तुसन रोड़ी चीज़ां कि न देलो, जैना तैस करां मगतन? 12 ज़ेरु तुस चातथ कि लोक तुसन सेइं केरन, तुस भी तैन सेइं तेरहु केरा, किजोकि मूसेरे कानूनेरी त कने नेबी केरि लिखोरी शिक्षा ईए आए।” 13 “तुस परमेश्वरेरा राज्जे मां सिर्फ सुन्कड़े दारेरां बत्तां गेइ सकतथ। किजोकि तैन दार चौड़ू, ते तै बत बड़ी खुल्ली आए जै नाशेरे पासे गाचे, ते तैस बत्तां गानेबाले बड़े आन। 14 किजोकि तैन दार सोंकड़ू आए, ते तै बत असुखती आए, जै हमेशारे ज़िन्दगेरे पासे गाचे, ते तेरहां गानेबाले थोड़े आन।” 15 “झूठे नेबन करां खबरदार रेइयथ, जैना तुसन कां भैड्हां केरे रूपे मां एइतन पन असली मां तैना मारने बालां गिदां भोतन। 16 तुस तैन केरे कम्मन सेइं तैन पिशानेले, कुन लोक झ़ल्लन सैहिंयेरां दाछ़ कढतन ते करेरी सैहिंयेरां फैगू ट्लोड़तन? 17 एल्हेरेलेइ हर एककी रोड़े बुटे रोड़ो फल लगते, ते हर एककी बुरे बुटे बुरो फल लगते। 18 रोड़े बुटे बुरो फल न लग्गे, ते न बुरे बुटे रोड़ो फल लग्गे। 19 ते जैस बुटे रोड़ो फल न लग्गे तै केटतां अग्गी मां फुकतां छ़डतन, तेन्चरे झूठे नेबन भी सज्जा मैलेली। 20 बस्सा, तुस तैन केरे कम्मन सेइं तैन पिशानेले।” 21 “मींजो, ‘हे प्रभु, हे प्रभु,’ जोनेबाले सारे मैन्हु स्वर्गेरो राज्जे मां दाखल न भोले, पन जै, मेरे स्वर्गेरो बाजी केरे मेर्जी पुङ् च़लने बालोए तै ज़रूर दाखल भोले। 22 इन्साफेरे दिहाड़ी बड़े लोक मीं सेइं ज़ोले कि, ‘हे प्रभु, हे प्रभु,’ कुन असेई तेरे नंवे सेइं भविष्यिवाणी नई कियोरी? ते तेरे नंवे सेइं भूतां नई कढोरां ते तेरे नंवे सेइं बड़े चमत्कार नई हेरेवरे? 23 तैखन अवं तैन जो साफ ज़ोलो, ‘अवं तुसन कधे न जैनी, ओ बुरां कम्मां केरने बालाव, मेरे तुत्तर अगरां दूर भोथ।’” 24 “एल्हेरेलेइ जै मेरी गल्लां शुनते ते तैन पुङ् अमल केरते त तै तैस अक्लमन्द मैनेरो ज़ेरो भोलो, जैनी अपनू घर शफ़डी पुङ् बनेवरुए। 25 झ़ड़ी लग्गी ते हड़ाई आई ते अंधगुबारी भोइ ते तैस

घरे पुड़ पुज्जी, पन तैन घर न डुल्लू, किजोकि तैसेरी मुनीयाद पेककी शफ़ड़ी
पुड़ कढोरी थी। 26 पन ज़ै मेरी गल्लां शुनते ते तैन पुड़ अमल न केरे, त तै
तैस बेवकूफ मैनेरो ज़ेरोए भोलो, ज़ैनी अपनू घर रेती पुड़ बनेवरु थियूं। 27
झ़ैड़ी लग्गी ते हड़ाई आई अंधगुबारी भोइ ते तैस घरे कां पुज्जी ते तैन घर
डुल्ली ज़ोवं ते बरबाद भोवं।” 28 जैखन यीशुए एना सैरी गल्लां शुनेइतां
झैड़ी, त सारे लोक तैसेरी शिक्षा शुन्तां हैरान भोए। 29 किजोकि यीशु तैन
शास्त्री लोकां केरि ज़ेरि नई, बल्के अधिकारे सेइं शिक्षा देतो थियो।

8 जैखन तै पहैड़ी पुड़ां उन्ढो अव, त बड़े लोक तैस पत्पती चले। 2 तैखन
एककी कोढ़े यीशु कां ज़ैन्धु केरे भारे बिश्तां तैस कां मिन्नत केरतां ज़ोवं, “हे
प्रभु अगर तू चास त मेरु कोढ़ बज़्झोई सकतस।” 3 यीशुए तैस पुड़ हथ
रेखतां ज़ोवं, “अवं चाताई, तू बज़्झोस।” ते तै कोढ़ी तैखने साफ भोइ जेव।
4 यीशुए तैस सेइं ज़ोवं, “हेर, एस गल्लरे बारे मां केन्ची सेइं किछ न ज़ोइयां।
बल्के अपनो आप याजक हिरा। तैल्ला पत्ती, तू अपने बेज़ज्जोनेरे वजाई सेइं
च़ढ़तल चाढ़, ज़ेसेरे बारे मां मूसा नेबे कानूने मां हुक्म दित्तोरोए, ताके लोकन
पतो चले कि तू बेज़ज्जोरोस।” 5 जैखन यीशु कफरनहूम नगर मां अव त अक
रोमी सूबेदार ज़ै 100 सिपेहिन केरो अफसर थियो, तैनी यीशु कां एइतां
बिनती की। 6 “हे प्रभु, मेरो नौकर अधरंगोरो मरीज़ घरे बिमार भोरोए, तै
च़लनेरे काबल नई, ते तै बेड़ि तकलीफी मां आए।” 7 तैनी तैस सेइं ज़ोवं,
“अवं एज्जेलो ते तैस बज़्झोइलो।” 8 सूबेदार ज़ोने लगो, हे प्रभु अवं एस
काबल नई कि तू मेरे घरे मां एज्जी सकस; पन तू अगर सिर्फ ज़बाना सेइं
ज़ोस त मेरो नौकर बेज़ज्जोलो। 9 किजोकि अवं भी केन्चरे अधिकारे मां कम
केरताई, ते सिपाही मेरे अधीन आन, ते जैखन एककी जो ज़ोताई कि गा, त
तै गाते ते होरि जो ज़ोतां एई, त तै एइते, ते अपने सेवके जो ज़ोताई इन कम
केर त तै केरते। 10 यीशु एन शुन्तां हैरान रेइ जेव, ते एप्पू पत्ती चलने बाले
मैनन् सेइं ज़ोने लगो, “अवं तुसन सेइं स़व ज़ोताई, कि मीं इस्साएल मुलखे मां
इस गैर यहूदी मैनेरो ज़ेरो मैन्हु नई लोवरो ज़ै मीं पुड़ एत्रो विश्वास केरो।” 11
अवं तुसन सेइं ज़ोताई कि बड़े गैर कौमां केरे लोक पूर्बों ते पछमेरां एइतां
अब्राहमे, इसहाक ते याकूबे सेइं साथी परमेश्वरे राज़ज़ेरी धामी मां शामिल
भोले। 12 पन इस्साएली लोक बेइर आंधरे मां छ़ुट्टे गाले ज़ैड़ी तैना लेरां देते ते

दंत चापते राले। 13 ते यीशुए तैस सूबेदारे सेइं ज़ोवं, “धरे जो गा, ज़ेरो तेरो विश्वासे तेरे लेइ तेरहु भोलू” ते तैखने तैसेरो नौकर बेझ़ोइ जेव। 14 जैखन यीशु पतरसेरे धरे जेव, त तैनी हेरु, कि पतरसेरी शिखी बड़ो भुखारे, ते तै लेटोरी थी। 15 तैनी तैसारो हथ ट्लातो ते अकदम तैसारो भुखार उतरी जेव, ते तै खड़ी उटां तैसेरी सेवा केरने लग्गी। 16 जैखन ड्लोझ भोइ त लोकेई बड़े बिमार, ज़ैन पुड़ भूतां केरो सायो थियो तैस कां आने, ते तैनी तैना भूतां अपने वचने सेइं कढां, ते सारे बिमार बज़्झाए। 17 ताके यशायाह नेबेरी ज़ोरी तै गल पूरी भोए कि, “तैनी एप्पू इश्शी कमज़ोरी हटेइ ते इश्शी बिमैरी भी मुकेइ।” 18 यीशुए अपने चेव्रे पासन मैन्हु केरि भीड़ लेइतां अपने चेलन, गलील समुन्दरे पार गानेरो हुक्म दित्तो। 19 जैखन तैना पार गानेरी तियारी केरने लग्गे, त तैखन अक शास्त्री मैन्हु तैस कां एइतां ज़ोने लगो, “गुरु, तू ज़ेरहां भी गालो त अवं तीं पत्ती च्छलेलो।” 20 यीशुए तैस जो ज़ोवं, “लौई केरि कूढां, ते अम्बरेरे चुड़ोल्लू केरे आले भोतन, पन मैनेरे मटु यानी मीं कां कोई ठार नई ज़ैडी अवं झुल्ली सेक्खी।” 21 चेलन मरां एकके होरे तैस सेइं ज़ोवं, “हे प्रभु, मीं घरे गानेरी अज़ाज़त दे, मेरे बाजेरे मरनेरां बाद अवं तैस देबतां एज्जेलो ते फिरी तीं पत्ती च्छलेलो।” 22 यीशुए तैस जो ज़ोवं, “तू मेरो चेलो बन ते मीं पत्ती च्छल, ते ज़ैना लोक आत्मिक तरीके सेइं मरेन तैन अपने मैन्हु मरने बलगने दे।” 23 जैखन यीशु किश्ती मां च़ढो त तैसेरे चेले भी तैस सेइं साथी च्छले। 24 ते अचानक समुन्दरे मां अक बड़ो तूफान अव ते किश्ती छेलहेई सेइं छ़पने लग्गी ते यीशु तैस मां झुल्लोरो थियो। 25 तैखन चेलेई तै बींझेइतां तैस सेइं ज़ोवं, “हे प्रभु, असन बचा! अस त डुबने लोरेम!” 26 तैनी खड़े उट्हां तूफान त समुन्दर डांटो, तैखने तूफान रुकी जेव त समुन्दर बड़े शांत भोव। 27 लोक हैरान भोइतां ज़ोने लग्गे, “ए मैन्हु कौन आए कि तूफान त समुन्दर भी एसेरो हुक्म मन्तन!” 28 जैखन तै गलील समुन्दरेरे पार, गिरासेनी इलाके मां पुज़ो, त दूई मैन्हु ज़ैन पुड़ भूतां केरो सैयो थियो कब्रन मांमेईं यीशु कां मिलने आए। तैना एत्रे निगर थिये, कि कोई भी तैस बत्तां निस्सी न थियो बटतो। 29 तैना ज़ोरे-ज़ोरे चिन्डां मारने लग्गे ते ज़ोने लग्गे, हे परमेश्वरा मट्ठां, तीं असन सेइं कुन कम्मे? कुन तू वक्ते करां पेइले असन

नरके मां छढ़ने ओरोस? 30 तैन केरां दूर सूरां केरो अक बड़ो घान चरने लोरो
थियो। 31 भूतेई यीशु कां मिनत केरतां ज़ोवं, “अगर तू असन कढ़ने चातस
त उन सूरां केरे घाने मांजो भेजा।” 32 तैखन यीशुए ज़ोवं, “गाथ,” तैना भूतां
तैट्टां निस्तां तैन सूरां केरे घाने मां जेआं, ते सूरां केरो सारो घान उछङ्गतो-
उछङ्गतो डैल्ले मां गेहतां सारे सूर मेरि जे। 33 तैखन सूरां केरे चारनेबालई एन
हेरु, त तैना डेरि जे, ते तैनेई नगरेरे लोकन सेइं सारो बिस्तार दित्तो, ते ज़ैन
पुड़ भूतां केरो सैयो थियो तैन केरो हाल भी शुनाव। 34 तैस नगरेरे सारे लोक
यीशु सेइं मिलनेरे लेइ आए ते यीशु लेइतां लोक मिनत केरतां ज़ोने लग्गे,
इशो इलाके मरां चलो गा।

9 फिरी यीशु किश्ती मां चेढ़तां दरियाए पार जो जेव, ते अपने नगर मां
अव। 2 ते हेरा, किछ मैनेई अक अधरंगी मैन्हु खट्टी पुड़ छुइतां तैस कां
आनो, ज़ैखन यीशुए तैन केरो विश्वास हेरो, त तैस अधरंगी मैन्हु जो ज़ोवं,
“मट्टा, गा हिम्मत रख, तेरे पाप माफ़ भोए।” 3 एस गल्ली पुड़ किछ शास्त्री
एप्पू मांमेइं ज़ोने लग्गे, “ए त परमेश्वरेरी तुहीन केरते!” 4 यीशुए तैन केरि
मनेरी गल्लां बुझतां तैन जो ज़ोवं, “तुस अपने-अपने मने मां एन्वरां किजो
सोचने लग्गोरेथ? 5 एन ज़ोनू कुन सुखतुए कि गा ‘तेरे पाप माफ़ भोए,’ या
एन ज़ोनू कि ‘उठ, ते चल फिर?’ 6 पन अवं किछ केरनेबालोई, ज़ैस सेइं
तुसेई बुज्जनूए कि मैनेरे मट्टे (यानी मी) धेरती पुड़ लोकां केरे पाप माफ़
केरनेरो अधिकार आए।” तैखन तैनी तैस अधरंगी मैन्हु जो ज़ोवं, “अपनि
खट छुइतां अपने घरजो चलो जेव। 8 लोक एन हेरतां डेरि जे ते परमेश्वरी बड़याई केरने
लग्गे, कि ज़ैनी मैन्हु एत्रो अधिकार दित्तोरोए। 9 ज़ैखन यीशु तैट्टां अग्रोवं
चलो त तैनी अक मत्ती नंवरो मैन्हु, चुंगी नेनेबालो दफ्तरे मां बिश्शोरो लाव,
ते यीशुए तैस जो ज़ोवं, “तू मीं पत्ती चल।” तै तैखने यीशु पत्ती चलो। 10
ते ज़ैखन यीशु अपने चेलेरे घरे गेहतां रोट्टी खाने बिश्शो ज़ेसेरू नवं मत्ती
थियूं, त बड़े चुंगी नेनेबाले ते पापी मैन्हु भी आए ते यीशु त तैसेरे चेलन
सेइं साथी रोट्टी खाने बिश्शो। 11 ज़ैखन फरीसी लोकेई एन हेरु, त तैनेई
तैसेरे चेलन पुच्छू, “तुश्शो गुरु चुंगी धिन्ने बाले ते पैपी लोकन सेइं साथी
रोट्टी किजो खाते?” 12 एन शुन्तां यीशुए तैन मिसाल देहतां ज़ोवं, “सझर

लोकन डाक्टरेरी ज़रूरत न भोए, पन बिमारन भोचे।” 13 फिर भी तुस गेइतां
 एस गल्लरो मतलब कढा, “अवं बलिदान नई बल्के दया पसंद केरताई,
 किजोकि अवं धर्मी लोकन नई बल्के पापी लोकन कुजाने ओरोई।” 14
 तैखन यूहन्नारे चेले यीशु कां एइतां जोने लगे कि कुन वजा आए, कि अस ते
 फरीसी लोक त बरत रखतम, पन तेरे चेले किजो बरत न रखन? 15 यीशुए
 तैनन् जुवाब दित्तो, “ड्लाएरे दिहाड़े, ज़ैखन लाड़ो जैनी सेइं साथी राते, कुन
 जन शौग बनेइं सकतन? पन तैना दिहाड़े एज्जले, ज़ेइस लाड़ो तैन केरां
 अलग कियो गालो (यानी मारो गालो), तैखन तैना (अपने दुख्खेरे वजाई
 सेइं) बरत रख्खेले। 16 अवं तुसन अक होरि मिसाल देताई, नंवे लिगड़ेरी
 टलोई पुराने लिगड़े कोई न लाए। किजोकि नंवे लिगड़ेरी टलोई पुराने लिगड़े
 अपने पासे खिच्ची छङ्गेली। ते तैन पेइले केरां भी जादे छिन्दोलू। 17 ते नंवो
 दाढ़ारो रस पुरैनी मसकन मां न भरन, किजोकि मसकां फैट्टी गाचिन ते
 दाढ़ारो रस ज़ैया भोइ गाते ते मसकां भी कोन्ची कम्मेरी न रान। एल्हेरेलेइ
 नंवो दाढ़ारो रस नेव्वीं मसकी मां छङ्गतन ताके दुइये बरबाद न भोन।” 18
 यीशु एन गल्लां हेजू मसां जोने लोरो थियो, त प्रार्थना घरेरो अक प्रधान अव
 ते यीशु कां मथ्थो टेकतां जोने लगो, मेरी कुई मेरि जोरीए, “पन तू अगर
 एइतां तैस पुड़ हथ रख्खस त तै हन्ना ज़ीती भोइ गानीए।” 19 यीशु तैस सेइं
 साथी चळो जेव, ते चेले भी तैस सेइं साथी जे। 20 ते एरु भोवं कि अक
 कुआन्श भी थी, जैस 12 सालां केरि खून चळनेरी बिमारी थी। तैसां यीशु
 पत्पती एइतां तैसेरे चोगे सेइं हथ लाव। 21 किजोकि तै अपने दिले मां एन
 ज़ोती थी, कि अगर अवं यीशुएरे चोगे सेइं हथ लाएली त अवं बेज़ङ्गोइ गानीं।
 22 यीशुए बेदलोइतां तैस कुआन्शरे पासे तककू ते ज़ोवं, “हे कुईए, विश्वास
 रख, तेरे विश्वासे सेइं तू बेज़ङ्गोरस” ते तै तैखने बेज़ङ्गोइ जेर्ई। 23 ज़ैखन
 यीशु तैस प्रधानेरे घरे पुज़ो, त लोक नगारो बज़ाते ते लेरां देते लाए। 24
 तैखन यीशुए तैन लोकन सेइं ज़ोवं, “दूर भोथ, किजोकि कुई मरी नई, बल्के
 झुल्लोरीए।” एन शुन्तां तैना लोक हसने लगे। 25 पन ज़ैखन लोक तैटुं दूर
 कढे, त यीशुए अन्तर गेइतां कुइयरो हथ ट्लाव, त तै ज़ीती भोइ। 26 ते एस
 गल्लरी खबर सारे इलाके मां फैली जेर्ई। 27 ज़ैखन यीशु तैटुं अग्रोवं चळो, त
 दूई काने तैस पत्ती चिन्डां मारते जोने लगे, “हे दाऊदेरा मट्टुं असन पुड़ दया

केर!” 28 जैखन तै घरे अन्तर जेव, तै तैना काने तैस कां आए, ते यीशुए तैन सेइं जोवं, “कुन तुसन विश्वासे, कि अवं तुसन बज्झोई सकताई?” तैनेई जुवाब दित्तो “हाँ प्रभु, अस विश्वास केरतम, तू असन बज्झोइ सकतस।” 29 तैखन तैनी तैन केरि एछळन सेइं हथ लाव ते जोवं, “तुस विश्वास केरतथ कि अवं बज्झोई सकताई, अवं तुसन बज्झोइलो।” 30 ते तैना लहने लाए, ते यीशुए तैन रोडेच्चारे समझोइतां जोवं, “खबरदार जैन मीं तुश्शे लेइ कियूं तैसेरे बारे मां कोन्वी सेइं न जोइयथ!” 31 पन तैनेई बेइर गेइतां सारे मुलखे मां एस चमत्कारेरे बारे मां जोवं। 32 जैखन तैना बेइर च्चलोरेरे थिये, त लोकेई अक मैन्ह जै गल्लां न थियो केरि बटतो, किजोकि तैस पुड़ भूतेरो सैयो थियो, तै तैनेई यीशु कां आनो। 33 ते जैखन भूतेरो सैयो तैस मेरां कढो, त लट्टो गल्लां केरने लगो, लोक बड़े हैरान भोइजेइ ते जोने लगो, असेई एरो ज़ेरो माजरो इस्साएले मां पेइले कधे नई लाहोरो। 34 पन फरीसी लोक जोने लगो, “ए त भूतां केरे गुरेरी मद्दी सेइं भूतां कढते।” 35 यीशु त कने तैसेरे चेले गलील इलाकेरे डुलोंव्वन ते नगरन मां ते प्रार्थना घरन मां जे। ते तै शिक्षा देतो राव, ते परमेशरेरे राज्जेरी खुशखबरी शुनातो राव, ते लोकां केरि हर किसमेरी बिमारी ते कमज़ोरी दूर केरतो राव। 36 जैखन तैनी बड़े लोक लाए त तैस तैन लोकन पुड़ बड़ो तरस अव, किजोकि तैना तैन भैड़ुं केरे ज़ेरे थिये जैन केरो कोई पुहाल न भोए, तैन केरो बड़ो बुरो हाल थियो ते तैना टेपलोरे थिये। 37 तैखन यीशुए अपने चेलन सेइं जोवं, “पकोरी फसलरे ज़ेरे बड़े लोक तियार आन जैना परमेशरेरे वचने पुड़ विश्वास केरनू चातन, पन कम केरनेबाले थोड़े आन जैना तैन परमेशरे राज्जेरे बारे मां जोन। 38 एल्हेरेलेइ तुस फसलरे मालिके कां प्रार्थना केरा कि तै जादे कम केरनेबाले भेजे, कि तैना लोकन परमेशरेरे राज्जेरे बारे मां जोन।”

10 फिरी यीशुए अपने 12 चेले एप्पू कां कुजाए, ते तैन भूतां केरो सैयो कढनेरो ते हर बिमारी ते तकलीफ दूर केरनेरो अधिकार दित्तो। 2 12 प्रेरितां केरां नवां इना आन, शमौन जैस जो पतरस ज़ोतन ते तैसेरो ढला अन्द्रियास, जब्देरु मटू याकूब ते कने तैसेरो ढला यूहन्ना, 3 फिलिप्पुस, बरतुल्मै, थोमा, ते मत्ती चुंगी धिन्ने बालो, हलफईरु मटू याकूब, ते तदै। 4 शमौन कनानी, ते यहूदा इस्करियोती जैनी तै ढलुवेवरो भी थियो। 5 एन 12 यीशुए एन

जोइतां भेजे, “गैर कौमां केरे पासे न गेइयथ, ते कने सामरी लोकां केरे केन्ची
 नगर मां न गेइयथ। 6 बल्के इसाएलेरे घरानेरी हेरोरि भैहुन कां गेइयथ। 7
 ते च्छलते-च्छलते, एन ज़ोंते गेइयथ कि स्वर्गेरु राज़ नेडे ओरुए। 8 बिमारन
 बज्ज्ञेइयथ, मुड़दन ज़ींते केरथ, कोढ़ी केरु कोढ़ साफ केरथ, ते भूतां केरो
 सैयो केरथ, तुसन एन सब किछ मुफ्त मैलोरुए ते मुफ्त देइयथ। 9 ते साथी
 सोन्नू, चाँदी ते पेंझे न रेखथ। 10 ते न बत्तारे लेइ झोलो नेइयथ ते न टूई-टूई
 लिंगां, ते न बूट ते न सोटी, किजोकि मज्जदूर अपनि मज्जदूरारो हकदार
 भोते।” 11 “जैखन तुस केन्ची नगर या इलोव्वें मां गाथ त तुस एरे मैनेरो
 पतो केरथ, कि कौन अतबारेरे काबल? तैटुं ज़ां तगर गानेरो वक्त न एज्जे त
 तांतगर तैड़ी तैस्से कां रेइयथ। 12 ते घरे मां अन्तर गांते बार तैन जो शान्ति
 देइयथ।” 13 “अगर तैन घर तुश्शो काबल भोलू त शान्ति पुज्जेली, ते अगर
 तैन घर तुश्शो काबल न भोलू त तुश्शी शान्ति तुसन पुड़ वापस एज्जेली। 14
 ज़ै तुसन कबूल न केरे ते तुश्शी गल न मन्ने त तैस घरे या नगर मरां बेइरोवं
 गांते बार अपने पावां केरि धूड़ तैड़ी झैड़थ।” 15 “अवं तुसन सेइं सञ्च ज़ोताईं
 कि इन्साफेरे दिहाड़े तैस नगरेरो हाल सदोम ते अमोरा नगरां केरे हाले करां
 भी जादे बुरो भोलो।” 16 “हेरा, अवं तुसन भैहुं केरे गिदन मां भेजने लोरोईं,
 एल्हेरेलेइ तुस सप्पां केरे ज़ेरे हुशार ते कबूतरां केरे ज़ेरे सादे बेनथ। 17 मैनन्
 करां हुशार रेइयथ तैना तुसन ट्लेइतां सभान मां पैश केरेले ते प्रार्थना घरन
 मां तुसन कोडां केरि मार दुवाले। 18 ते तुसन मेरी वजाई सेइं गवर्नरन ते कने
 राज़न कां हाज़र केरेले, ताके तुस तैन मां ते गैर कौमन मां मेरे गवाह बन्थ।
 19 पन जैखन तैना ट्लुवेइतां हावाले केरेले, त तुस फिक्र न केरथ, कि अस
 कुन ज़ोमेले ते केन्चरे ज़ोमेले, किजोकि जैन किछ ज़ोनू भोलू तैखने अवं
 तुसन ज़ोइलो। 20 किजोकि ज़ोने बाले तुस नई, बल्के पवित्र आत्मा भोलो
 ज़ै तुश्शे स्वर्गेर बाजी परमेशरेरे तरफां आए।” 21 “द्ला, द्लाए ते बाजी मट्ठे
 मारनेरे लेइ सोंफेले, ते मट्ठुं अपने अम्मा बाजी केरे खलाफ भोइतां तैन
 माराले। 22 मेरे नंवेरो वजाई सेइं सब लोक तुसन सेइं बैर केरेले, पन ज़ै
 आखरी तगर बरदाशत केरेलो तैस्से मुक्ति मैलेली। 23 जैखन लोक तुसन
 एककी नगर मां सताले, त होरि नगर मांजो नेश्शी गेइयथ, अवं तुसन सेइं
 सञ्च ज़ोताईं कि एस करां पेइले तुस इसाएलेरे सैरी नगरन मां तुश्शू सफर

पूरू न भोलू, त अवं मैनेरु मट्ठु एज्जी गालू।” 24 “चेलो अपने गुरु करां बड्हो
न भोए, ते न नौकर अपने मालिके करां। 25 चेलेरे लेइ त एन्ने बङ्हुए कि
तै अपने गुरेरो ज़ेरो भोए, ते नौकरेरे लेइ एन्ने बङ्हुए कि तै अपने मालिकेरे
बराबर भोए, अगर तैनेई मालिके जो शैतान ज़ोवं, त तैसेरे घरेबालन जो केत्रू
ज़ोनौए!” 26 “तुस तैन करां न डेरथ, किजोकि कोई चीज़ छऱ्पोरी नई, जै
खोल्ली न गाली, ते कोई भेद छऱ्पोरो न रालो, बल्के सारो भेद बांदो भोलो।
27 जैन किछ अवं तुसन सेइं आंधेरे मां ज़ोताई, तुस तैन दीसां ज़ोइयथ, ते
जैन किछ तुश्शे कन्ने पत्र बल्हे सेइं शुनावं गाते, तुस लाए पुङ् गेइतां तैसेरो
प्रचार केरथ। 28 तुस तैन करां न डेरथ जैना जानी त मारतन, पन आत्मा न
मैरी बटन, परमेशरे करां डरा, जै आत्माई ते जानी दुझे नरके मां नाश केरि
बटते। (Geenna g1067) 29 कुन एककी सिकेरी दूर्घ चङ्गोली न बिकन? फिरी
भी तुश्शो बाजेरे मेरज़रे बगैर तैन मरां अक भी धेरती पुङ् न झोड़ी बटन।
30 परमेशर तुश्शे हर गल्लरी फिक्र केरते इड़ी तगर तुश्शे दोग्गेरे बाल भी
गन्नोरेन। 31 एल्हेरेलेइ डरा न, तुश्शी कदर बेड़ि चङ्गोलन करां भी बड़ी
जादे।” 32 “जैना लोक, मैन्हु केरे सामने मेरो इकरार केरतन कि तैना मेरे
चेलेन, त अवं भी अपने स्वर्गेरो बाजी केरे सामने तैन केरो इकरार केरेलो, कि
तैना मेरे चेलेन। 33 पन ज़ैना लोक, मैन्हु केरे सामने इन ज़ोने करां डरेले,
कि तैना मेरे चेलेन, त अवं भी तैन केरो अपने स्वर्गेरो बाजेरे सामने इन्कार
केरेलो, कि एना मेरे चेले नई।” 34 “इन न सैमझथ कि अवं धेरती पुङ्
एल्हेरेलेइ ओरोई लोक मेल मिलापे सेइं रान, पन मेरू एजनू लोकन एप्पू
मांमेइं लड़नेरी वजा भोइ, मेल मलाप नई। 35 अवं एल्हेरेलेइ ओरोई कि मट्ठे
बाजी करां ते कुइये अम्मा करां ते नुशी शिखी करां अलग केरि। 36 मैनेरे
दुश्मन त तैसेरे अपने घेरे लोक भोनेन।” 37 जै कोई अम्मा या बाजी मीं
करां जादे ट्लारे समझाते, तै मेरो चेलो बन्नेरे काबल नई ते जै कोई मट्ठे या
कुइये मीं करां जादे समझाते, तै भी मेरो चेलो बन्नेरे काबल नई। 38 जै
कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ
तियार नई, त तै भी मेरो चेलो बन्नेरे काबल नई। 39 जै कोई मरने करां
बचनेरे लेइ मेरो इन्कार केरेलो, त तैन हमेशारी ज़िन्दगी न मैलेली। पन जै
मीं पुङ् विश्वास केरनेरे वजाई सेइं अपने जान देनेरे लेइ भी तियार भोलो,

त तैस हमेशारी जिन्दगी मैलोली। 40 “जैना तुसन कबूल केरतन, तैना मीं कबूल केरतन, ज़ैना मीं कबूल केरतन, तैना सिर्फ मीं नई, पन तैना परमेशरे भी कबूल केरतन, ज़ैनी अवं इड़ी भेज़ोरोई।” 41 “जै नेबन, नबी सेमझतां कबूल केरेलो, परमेशर तैस नेबी केरे बराबर इनाम देलो, ते जै धर्मी मैन्हु धर्मी सेमझतां कबूल केरते, परमेशर तैस धर्मी बराबर इनाम देलो। 42 जै कोई इन निकड़न मरां एक्की मेरो चेलो बुझतां सिर्फ अक कटोरो ठंडू पानी पियालो, अवं तुसन सेइं सच ज़ोताई तैस पक्कू इनाम मैलनू आए।”

11 ज़ैखन यीशुए अपने 12 चेलन हुक्म दित्तो, त तै तैटुं चलो जेव, ताके चेलां केरे नगरन मां गेइतां शिक्षा दे ते प्रचार केरे। 2 यूहन्ना नेबे कैदखाने मां मसीहेरे कम्मां केरे बारे मां शुन्तां तैस कां अपने चेले इन पुच्छने भेजे। 3 “तैनी तैन सेइं ज़ोंव, एजनेबालो मसीह तू आस, ज़ेसेरे बारे मां परमेशरे वादो कियोरोए, या आस केन्ची होरि बलगम?” 4 यीशुए तैन जुवाब दित्तो, “ज़ैन किछ तुस शुन्तन ते लातथ तैन गेइतां यूहन्ना सेइं ज़ोथ। 5 कि काने लातन, ते टोन्टे चलतन, ते कोढ़ी केरु कोढ़ शुद्ध भोते, ते टोंऊने शुन्तन, ते मुड़दे ज़ींते भोतन, ते गरीबन खुशाखबरी शुनाई गातीए 6 परमेशर तैस बरकत देते, जै मीं पुड़ शक न केरे।” 7 ज़ैखन यूहन्नारे चेले तैटुं चले जे, त यीशु लोकन सेइं यूहन्नारे बारे मां ज़ोने लगो, “तुस सुनसान ठैरी कुन हेरने जोरे थिये? कुन हवाई सेइं हिलते निरैठरे डाले? 8 त फिरी होरु कुन हेरने जोरे थिये? माधां लिगड़ां लेइतां कोई? हेरा ज़ैन माधां लिगड़ां लेइतां भोतन तैना महलन मां रातन। 9 फिरी तुस कुन हेरने जोरे थिये? कुन कोई नेबी? हाँ पन अवं तुसन सेइं ज़ोताई कि नेबी करां भी बड़े हेरने जोरे थिये। 10 ई तैए यूहन्ना आए ज़ेसेरे बारे मां परमेशर पवित्रशास्त्रे मां ज़ोते, कि हेरा, ‘अवं अपने बिस्तार देनेबालो तीं अग्री भेजताई, जै तेरे लेइ बत तियार केरेलो।’”

11 अवं तुसन सेइं सच ज़ोताई, कि जै कुआन्शन करां ज़रमोरोए तैन मां यूहन्ना बपतिस्मो देनेबाले करां कोई बड़ो नई भोरो, पन जै स्वर्गेर राज़जे मां निकड़े करां निकड़ोए तै तैस करां भी बड़ोए। 12 यूहन्ना बपतिस्मो देनेबालेरे दिहाड़न करां अज़ तगर प्रचार भोइ रावरोए, ते स्वर्गेरु राज़ जलदी बधने लोरुए, पन बड़े निगर लोक तैस पुड़ हमलो केरतन। 13 सारे नेबी केरे लेख, ते मूसेरो कानून यूहन्ना तगर भविष्यिवाणी केरते राए। 14 अगर तुस चाथ ते

मन्नथ, एलियाह ज़ेसेरे बारे मां नेबेई ज़ोरू थियूं, कि तै एजनेबालो थियो तै ईए। 15 ज़ै कोई समझनू चाते, तै ध्याने सेइं शुने ते समझो। 16 “अवं इस ज़मानेरे लोकां केरि मिसाल केस सेइं देई, इना तैन मट्ठां केरे ज़ेरेन ज़ैना बज़ारन मां बिश्तां अपने दोसन सेइं शिकैयत केरतन, 17 कि असेई तुश्शे लेइ बाज़ो बज़ाव, ते तुस न नच्चे, ते असेई शौग कियो ते तुसेई छाती न पिट्ठी। 18 किजोकि यूहन्ना बपतिस्मो देनेबालो जादे तर बरत रखतो थियो, ते शराब न थियो पीतो, ते तैना तैस जो ज़ोतन कि एस पुड़ भूतेरो सैयो आए। 19 ते मैनेरु मट्ठू यानी अवं खातो पीतो अव, हेग, ते तैना ज़ोतन पेटू ते शराबी मैन्हु ते चुंगी नेनेबाले ते पापी लोकां केरो दोस्त, पन अक्लमन्द कैने तैसेरे कम्मेई सेइं पतो च्चलते।” 20 तैखन यीशु फिरी तैन नगरन मां गेइतां तैट्टेरे लोकन ड्झिड़कतां ज़ोने लगो, ज़ैन मां तैनी चमत्कार कियोरे थी, पन तैनेई अपने पापन करां मन न फिराव। 21 “हे खुराजीन नगरेरे लोकव! तुसन पुड़ अफसोस, हे बैतसैदा नगरेरे लोकव तुसन पुड़ अफसोस, कि ज़ैना चमत्कार तुसन मां किये, अगर एना चमत्कार सूर ते सैदा नगरन मां कियोरे भोथे, त तैन लोकेई केइसेरे देंतेरी टाट पलेटतां ते मांज़नी मां बिश्तां अपने पापन करां मनफिरावरो भोथो। 22 पन अवं तुसन सेइं ज़ोताई, कि इन्साफेरे दिहाड़े परमेशर, ज़ै सज़ा सूर ते सैदा नगरां केरे लोकन देलो, तुश्शी सज़ा तैस करां भी जादे भोली। 23 ते हे कफरनहूम नगरेरे लोकव, कुन तुस सोचतथ कि स्वर्णे मां तुश्शी आदर भोनीए! नई तुस त नरके गाले ज़ैड़ी पापी लोकन सज़ा मैलेली! किजोकि ज़ैना चमत्कार तुसन मां किये, अगर मीं एना सदोम नगरे मां कियोरे भोथे त सदोम नगर अज़ तगर भी भोनू थियूं। (Hades g86) 24 पन अवं तुसन ज़ोतां कि इन्साफेरे दिहाड़े परमेशर ज़ै सज़ा सदोम नगरेरे लोकन देलो, तुश्शी सज़ा तैस करां भी जादे भोली।” 25 तैखन यीशुए ज़ोवं, “हे बाजी, स्वर्ग ते धेरतरे प्रभु, अवं तेरु शुक्र केरतां कि तीं एना गल्लां अक्लमन्द ते समझादार लोकन करां छ़पेइतां रेख्खी ते तैन लोकन पुड़ बैंदी की, ज़ैना निक्के बच्चां केरे ज़ेरे आन। 26 हाँ, हे बाजी तीं एन्ने रोदू लगू। 27 “मेरे बाजेई सब किछ मेरे सुपुर्द कियोरुए; कोई होरो मट्ठे न ज़ाने, सिफ बाजी ज़ानते; कोई बाजी न ज़ाने सिफ मट्ठू ज़ानते, या तै मैन्हु बाजी ज़ानते जैस पुड़ मट्ठू बांदे केरने चाए। 28 “हे मेहनत केरनेबाले लोकव, ते भारे सेइं

थकोरे लोकव मीं कां एज्जा; अवं तुसन आराम देइलो। २९ मेरे अधीन एन्हरे भोथ ज़ेन्हरे दांत जूंए हैठ भोते, ते ज़ैन किछ अवं तुसन शिखालताई तैस शिख्खा, किजोकि अवं शरीफ आई ते दिलेरो नम्र आई ते तुश्शी जानी आराम मैलेलो। ३० ज़ै भार अवं तुसन देइलो तै पोल्लोए, तुस तैस आरामे सेइ छुई सकतथ।”

12 यीशु आरामेरे दिहाडे ऊडारन मांमेइं एककी बत्तां चलोरे थियो, ते तैसेरे चेलन ढ्लुख लग्गी, ते तैना शिल्लां ट्लोडतां खाने लग्गे। २ फरीसी लोकेई एन लेइतां यीशु सेइं ज़ोवं, “तक! तेरे चेले तैन कम केरने लोरेन ज़ैन आरामेरे दिहाडे केरनू जेइज़ नई।” ३ यीशुए तैन जुवाब दित्तो, “कुन तुसेई पवित्रशास्त्रे मां कधे नई पढ़ेरु कि ज़ेइस इश्शे पूर्वज दाऊद राज़ो त तैसेरे साथी ढ्लुखोरे थिये त तैनेई कुन कियेरु थियूं? ४ तै केन्हरे परमेश्वरे घरे मां जेव, ते ज़ैना चैढ़ोरी रोट्टी थी तैटुं एन्तां एपू भी खेइ, ते अपने सैथन भी दित्ती, ते तैनेई भी खेइ हालांकी तैना रोट्टी खैनी तैन केरे लेइ ज़ेइज थी, तैना सिर्फ याजक खेइ सकते थिये। ५ या तुसेई मूसेरो कानूने मां एन भी नई पढ़ेरु, कि याजक मन्दरे मां आरामेरे दिहाडेरी विधि न मन्ने पुड़ भी बेकसूर भोतन। ६ पन अवं तुसन सेइं ज़ोताई कि इडी तैए, ज़ै मन्दरे करां भी बहुए। ७ अगर तुस एल्हेरो मतलब ज़ानेथे कि, अवं बलिदान नई बल्के दया पसंद केरताई, त तुस बेकसूर कुसुरवार न बनाये। ८ किजोकि मैनेरु मटू यानी अवं आरामेरे दिहाडेरो भी प्रभु आई।” ९ यीशु तैटुं निस्तां तैन केरे प्रार्थना घरे मां जेव। १० तैडी अक मैन्हु थियो, ज़ेसेरो हथ शुक्कोरो थियो, तैनेई यीशु दोष लानेरे बहाने सेइं तैस पुच्छू, “कुन आरामेरे दिहाडे कोई बझानो जेइजे?” ११ तैनी तैन जो ज़ोवं, “तुसन मरां कौने, ज़ेसेरी अकके भैड भोए, ते तै आरामेरे दिहाडे गते माजो बिछ़े, त तुस कुन तैस तैटुं बेइर न कढेले? १२ मैनेरी कीमत त भैडी करां केत्री जादे! एल्हेरेलेइ आरामेरे दिहाडे रोदू कम केरनू जेइजे।” १३ तैखन यीशुए तैस मैन्हु जो ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो, ते अकदम तैसेरो हथ बेज़्झोव। १४ तैखन फरीसी लोक बेइर गेइतां तैसेरी खलाफ साज़िश केरने लग्गे, कि एस केन्हरे मारम? १५ इन बुझतां यीशु तैटुं चलो जेव। ते बड़े लोक तैस पत्ती चले, ते तैनी तैना सब बज़्झाए। १६ ते तैनी तैना खबरदार किये, कि मेरे बारे मां केन्वी सेइं

न ज्ञोइयथ। 17 ताके यशायाह नेबेरी ज्ञोरी तै गल पूरी भोएः 18 “हेरा ई मेरो सेवके ज़ै मीं चुनोरोए, ई मेरो ट्लारोए ज़ैस पुड़ मेरो दिल खुशो, अवं अपनि आत्मा तैस पुड़ छ़डेले, ते तै गैर कौमन मां गेइतां इन्साफेरी खबर शुनालो। 19 तै न लड़ाई केरेलो, ते न शौर, ते बज़ारन मां कोई तैसेरी आवाज़ न शुनेलो। 20 ते ए ढ्लेन्चोरे निरैठरे डाले न ट्लोडेलो, ते न बलतो दीयो हिशाहो ज़ां तगर इन्साफ भारी न भोए। 21 ते तैसेरे नंबे पुड़ गैर कौमां उमीद रेखेली।” 22 तैखन लोकेई अक मैन्ह यीशु कां आनो ज़ै कानो ते लट्टौ थियो ते तैस पुड़ भूतेरो सैयो थियो, तै तैनेई तैस कां आनो, तैनी तै ठीक कियो, ते तै लहने लगो ते गल्लां भी केरने लगो। 23 एन हेरतां लोक हैरान भोइतां ज़ोने लगे, “कुन एन दाऊदेऱ मदूप?” 24 पन फरीसी लोकेई एन शुन्तां ज़ोवं, “ए त भूतां केरे प्रधान शैतानेरी मद्दती सेइं भूतां केरो सैयो कढते।” 25 यीशुए तैन केरे मन्नां केरे खियाल ज़ैनतां तैन सेइं ज़ोवं, “ज़ैस राज्जे मां फूट पेचे, तैन राज बनोरू न रेइ सके, ते केन्वी नगर या खानदाने मां फूट पेचे, तैन भी बनोरू न राए। 26 अगर शैतान एप्पू अपने भूतां कढे, तै अपनो मुखालफ एप्पू भुओ, त फिरी तैसेरू राज केन्चरे बनोरू रेइ सकते? 27 अगर अवं शैतानेरी मद्दती सेइं भूतां केरो सैयो कढताई त तुश्शो अपने मैन्ह केरेसेरी मद्दती सेइं कढतन? तैन्ना तुश्शो हाकिम भोले। 28 पन अगर अवं परमेश्वरी आत्मारे मद्दती सेइं भूतां केरो सैयो कढताई त परमेश्वरू राज तुश्शे नेडे पुज़ोरुण। 29 या कोई मैन्ह केन्वी ज़ोरेबाले मैनरे घरेरे मां गेइतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैन्ह बेंधी न छ़ड्हे। तैखन तै तैस ज़ोरेबाले मैनरो माल लुट्टी सकते। 30 ज़ै मीं सेइं साथी नई तै मेरे खलाफे, ते ज़ै मीं सेइं साथी नई तै अकोट्टू न केरे तै इरां उरां बिट्लते। 31 एल्हेरेलेइ अवं तुसन सेइं ज़ोताई कि, मैन्ह केरे सारे पाप ते तुहीन माफ़ भोली, पन पवित्र आत्मारी तुहीन माफ़ न भोली। 32 ज़ै कोई मैनरे मट्टेरे खलाफ किछ ज़ोलो, त तैसेरो ए पाप माफ़ कियो गालो, पन ज़ै पवित्र आत्मारी तुहीन केरे, त तैस मैन्ह न इस दुनियाई मां माफ़ भोलू ते न एजने बैली दुनियाई मां माफ़ भोलू।” (aiōn g165) 33 “अगर बुट रोडे, त तैसेरे फल भी रोडो भोलो, अगर बुट बुरोए त तैसेरे फल भी बुरो भोलो, किजोकि बुट अपने फले सेइं पिशैनोते। 34 तुस जहरीले सपेरे बच्चां केरे बुरे

भोइतां रोड़ी गल केन्चरे ज़ोई सकतथ? किजोकि जैन दिले मां भोते तैन्हे
 ज़बानी पुढ़ एइते। 35 रोड़ो मैन्हु दिलेरे रोड़े खज़ाने मरां रोड़ी गल्लां कढते,
 ते बुरो मैन्हु बुरे दिलेरे बुरे खज़ाने मरां बुरी गल्लां कढते (दिल खज़ानेरो
 ज़ेरोए)। 36 अवं तुसन सेइं ज़ोतां, कि जैना-जैना निक्केमी गल्लां मैन्हु ज़ोले,
 इन्साफेरे दिहाड़े लोकन अपनि हर एककी तैस गल्लरो हिसाब देनो भोलो।
 37 किजोकि तू अपने गल्लई सेइं धर्मी ते अपने गल्लई सेइं दोषी भोलो।” 38
 इस पुढ़ किछ शास्त्री ते फरीसी लोकई तैस सेइं ज़ोवं, “हे गुरु अस तीं करां
 कोई निशान हेरनो चातम।” 39 तैनी तैन जुवाब दित्तो, “इस ज़मानेरे बुरे ते
 बदमाश लोक निशान हेरनो चातन, पन तैन योना नेबेरे निशानेरे अलावा होरो
 कोई निशान न दित्तो गालो। 40 ज़ेन्चरे योना नबी ट्लाई दिहाड़े ते ट्लाई
 रातन मेछ़लेरे पेटे मां राव, तेन्चरे मैनेरू मटू यानी अवं भी ट्लाई दिहाड़े ते
 ट्लाई रातन ज़मीनी मां रालो। 41 नीनवेरे लोक इन्साफेरे दिहाड़े इस ज़मानेरे
 लोकन सेइं साथी खड़े भोइतां एन दोषी बनाले, एल्हेरेलेड कि तैनेई योनारो
 प्रचार शुन्तां पापन करां मन फिराव, ते हेरा इड़ी तैए, ज़ै योना करां भी बड्होए,
 पन तुसेई पापन करां मन फिरानो न चाव। 42 दक्षिणेरी रानी इन्साफेरे दिहाड़े
 इस ज़मानेरे लोकन सेइं साथी खड़ी भोइतां दोषी बनाली, किजोकि तै बड़े
 दूरेसं सुलैमान राजेरु ज्ञान शुन्नेरे लेड ओरी थी, पन हेरा इड़ी तैए, ज़ै सुलैमाने
 करां भी बड्होए।” 43 “ज़ैखन केन्ची मैन्हु मरां भूतां केरो सैयो निसते, त तै
 अपने आरामेरे लेइ बेरान ठारां हंठते, पन ज़ैखन तैस ठार न मैल्ले। 44 तैखन
 ज़ोते, कि अवं वापस अपने तैस्से घरे मां गाताई ज़ैस मरां निसोरो आई, ते
 ज़ैखन तै वापस एइते, त तैस तैन घरे खाली, धोवेरु ते साफ सुथरु सज्जो-
 सज्जेवरु मैलते। 45 तैखन तैन गाते ते सत बुरां भूतां एप्पू सेइं साथी आनते,
 ते तैन सब तैस मां रहतन, ते तैस मैनेरो हाल पेइले हाले करां भी जादे बुरो
 केरतन, तेन्चरे इस ज़मानेरे बुरे लोकां केरो हाल भी एरो भोनोए।” 46 ज़ैखन
 तै मैनन् सेइं गल्लां केरने लोरो थियो, त तैसेरी अम्मा ते कने तैसेरे ढला खड़े
 थी, तैना तैस सेइं गल्लां केरनि चाते थियो। 47 केन्चे गेइतां तैस सेइं ज़ोवं,
 “बेइर तेरी अम्मा ते ढला खड़े आन, तैना तीं सेइं गल केरनि चातन।” 48 एन
 शुन्तां तैनी पतो देनेबाले जो ज़ोवं, “कौने मेरी अम्मा, ते कौन मेरे ढला?” 49
 ते अपने चेलां केरे पासे हथ अग्रोवं केरतां ज़ोवं, “हेरा मेरी अम्मा, ते मेरे ढला

इना आन। ५० किजोकि ज़ै कोई मेरे स्वगरे बाजेरी मर्जी पुड़ चलते तैए मेरो
द्ला ते मेरी बेइन्न, ते मेरी अम्मा आए।”

13 तैस दिहाड़े यीशु घरेरा निस्सो, ते गलील समुन्दरेरे बन्ने पुड़ गेइतां
बिश्शो। २ तैसेरे चेव्रे पासन लोकां केरि एत्री भीड़ अकोट्टी भोइ, ते तै एक्की
किश्ती मां चढ़ो ते बिश्शी जेव, ताके तै सेब्भी लोकन परमेश्वरी गल्लां केरि
शिक्षा देइ सके, ते सारे लोक बन्ने पुड़ खड़े राए। ३ तैखन तैनी तैन सेइं
कहैनी केरे तरीके सेइं बेड़ि गल्लां ज़ोई, “एक्सां अक बीज़ बेनेबालो बीज़
बेने जो जेव। ४ बीज़ बेते बार किछ बीज़ बत्तेरे ड्लेखी बिछू त चुडोल्लेई
एइतां तैन बीज़ चुनू। ५ किछ बीज़ घोड़नबाली ज़मीनी पुड़ बिछू, ज़ेड़ी तैस
दुग्धी मित्ती न मेलनेरे वजाई सेइं तैन लूशी उग्गू ते बूटो लगो। ६ पन ज़ैखन
दिहाड़ो निस्सो, त तै निकड़ो बूटो फुक्कोई जेव। ज़ील न छङ्गुनेरे वजाई सेइं
शुक्की जेव। ७ ते किछ बीज़ कंटां केरे झौल्लन मां बिछू। ज़ैखन तैड़ी बूटो
लगो, त कंटां केरे झौल्लेई भी बेड़ोइतां तै बूटो दवेइ छङ्गु। ८ पन ज़ैन रोड़ी
ज़मीनी मां बिछू, त तैस फल भी लगो केन्वी शौव गुणा केन्वी शठ गुणा, ते
केन्वी टली गुणा। ९ ज़ै कोई समझनू चाते, तै ध्याने सेइं शुने ते समझो।” १०
चेलई यीशु कां एइतां पुच्छू, “तू लोकन सेइं कहैनी केरे तरीके सेइं गल्लां
किजो केरतां?” ११ तैने जुवाब दित्तो, “तुसन त स्वगरे राज़ज़ेरे भेदां केरि
समझ दित्तोरीए” पन होरि लोकन नई। १२ किजोकि ज़ैस कां परमेश्वरी
मर्जी समझनेरी इच्छा आए, तैस परमेश्वर जादे समझ देलो। पन ज़ैस कां
परमेश्वरी मर्जी समझनेरी इच्छा नई, तैस केरां, थोड़ी ज़ेरि समझ, ज़ै तैस कां
आए, तै भी नी गाली। १३ अवं तैन सेइं एल्हेरेलोइ कहैन्न मां गल्लां केरतां,
कि तैन, तैना बार-बार शुनेले, पन मेरी गल न समझेले। १४ तैन केरे बारे
मां यशायाह नेबेरी भविष्यिवाणी पूरी भोतीए, “तुस कन्नेई सेइं त शुनेले
पन समझेले न, तुस एछळ्हन सेइं त लाएले पन पिशैनी न सकेले।” १५
“किजोकि एना लोकां केरे दिलन पुड़ चरभी भेरोरीए, ते एना कन्न सेइं उकड़ु
शुन्तन, ते एनेई अपनि एछळ्ही तुमोरिन, एरु न भोए कि तैना एछळ्हेई सेइं
लहन, ते कन्नेई सेइं शुन्न ते दिले सेइं समझन, ते मेरे पासे फिरन ते अवं तैन
बज़ङ्गोइं।” १६ “पन तुश्शी एछळ्ही धन आन, कि तुस लातथ ते तुश्शे कन्न धन
आन किजोकि तुस शुन्तन। १७ अवं तुसन सेइं सच्च ज़ोताई, कि बड़े नेबी ते

धेरमी लोकर्इ चाव कि ज़ैन गल्लां तुस हेरतथ तैना हेरन, पन न हेरी बेटि,
 ते ज़ैना गल्लां तुस शुन्तन शुन्न, पन न शुनी बेटि।” 18 “हुनी तुस बीज़
 बेनेबालेरी कहैनरो मतलब शुना। 19 बीज़ बेनेबालो तै आए, ज़ै परमेश्वरी
 गल्लां लोकन शुनाते। ज़ैना मैन्हु परमेश्वरी गल्लां शुन्तन, तैन मरां किछ
 लोक तैस बत्तेरे ज़ेरे आन, ज़ेडी बीज़ बिछड़ते। तैना त परमेश्वरी गल्लां
 शुन्तन, पन शैतान अकदम एइतां तैन मैन्हु केरे दिले मरां परमेश्वरी गल्लां
 केढ़ी छ़ड़ते। 20 ते ज़ैन घोड़नबाली ज़मीनी मां बेवं, एना तैना आन, ज़ैना
 खुशी सेइं वचन शुन्तन कबूल केरतन। 21 पन एप्पू मां ज़ील न रखनेरे वजाई
 सेइं तैन थोड़े दिहाड़ी केराए, ते ज़ैखन वचनेरे वजाई सेइं तैन पुढ़ मुसीबत या
 जुलम भोते त तैखने ठोकर खातन। 22 होरे किछ लोक ज़ैना परमेश्वरी
 गल्लां शुन्तन, तैना तैस कंटां केरे झौल्लां केरे ज़मीनेरे ज़ेरे आन। पन दुनियारो
 फिक्र ते दौलतरे वजाई सेइं धोखो खातन, ते तैना बेफल रेइ गाते। (aiōn
 g165) 23 ज़ैन रोड़ि ज़मीनी मां बेवं, एन तैना लोकन ज़ैना वचन शुन्तन ते
 समझतन, ते तैस फल भी लगते कोन्ची शौव गुणा कोन्ची शठ गुणा, ते
 केन्ची ट्लही गुणा।” 24 यीशुए तैन अक होरि मिसाल देइतां ज़ोवं, “स्वर्गेरु
 राज तैस मैनेरु ज़ेरुए ज़ैनी अपने ऊडारे मां रोड़ु बीज़ बेवं। 25 पन ज़ैखन
 लोक झुलोरो थिये, त तैसेरे दुश्मने एइतां तैसेरे ऊडारे मां गेहुं केरे बीज़े मांमेहं
 जंगली बीज़ बेवं। 26 ज़ैखन पट्लां ते शिल्लां लगां लगने त तै जंगली डाल
 भी साथी लग्गो। 27 मालिकेरे नौकरेर्इ एइतां तैस सेइं ज़ोवं, ‘हे मालिक, कुन
 तीं अपने ऊडारे मां रोड़ु बीज़ न थियूं बेवरु, फिरी जंगली तैस मां कोट्ठां
 अव?’ 28 तैनी तैन सेइं ज़ोवं, एन केन्ची दुश्मनेरु कम्मे, नौकरेर्इ पुच्छु कुन तू
 चातस, कि अस गेइतां तैन पुट्टी छ़डम? 29 पन तैनी ज़ोवं नन्ना, एरु न
 भोए कि तैस सेइं साथी तुस गेहुं भी पुटथ। 30 फसल लुन्ने तगर दुझ्ये
 साथी बेडोने देथ, ते लुनते बार अवं एप्पू लुन्ने बालन सेइं ज़ोइलो, कि पेइले
 जंगली बीज़ लुन्तां अग्गी मां फुकनेरे लेइ अकोट्ठु केरा, ते फिरी तुस गेहुं मेरे
 कोठारे मां जम्हां केरतां रख्खा।” 31 तैनी तैन अक होरि मिसाल देइतां ज़ोवं,
 “स्वर्गेरु राज शेरीएरे बीजेरु ज़ेरु आए, ज़ैन एकके मैने आनू ते अपने ऊडारे
 मां बेवं। 32 एन बीज़ सेब्भी बीज़न करां निक्कु भोते, पन ज़ैखन तैन बीज़
 बेव गाते, त तैन उगतां सारे निक्के-निक्के बुट्टन केरां बहु भोते। ते एरो बुट

बनते इड़ी तगर कि अम्बरेरां चुडोल्लू भी तैस पुढ़ विशतन।” 33 तैनी तैन अक होरि मिसाल देइतां ज़ोवं, “स्वर्गेरु राज्ञ अम्लटेरु ज़ेरुए, ज़ैन केन्ची कुआन्शां आनू ते हछे अटै मां मलाव ते सारू अटू खमीर बेनि ज़ोवं।” 34 एन सैरी गल्लां यीशुए तैन लोकन मिसाल देइतां शुनातो थियो, ते मिसाल देनेरे बगैर तै तैन किछ न थियो शुनातो। 35 ताके तैन वचन ज़ैन नेबे ज़ोवरो थियूं पूरू भोए, “अवं कहैनी केरे लेइ अपनि ज़बान खोल्लेलो, ते तैना गल्लां ज़ोइलो ज़ैना दुनिया बन्ने करां पेइली छेप्पोरी थी।” 36 तैखन यीशु लोकन करां अलग भोइतां घरजो अव, ते तैसेरे चेलेर्ई तैस कां एइतां ज़ोवं, “तू असन ऊडारे जंगली बीज़ेरी कहैनरो मतलब समझा।” 37 तैनी तैन जुवाब दित्तो, “रोदू बीज़ बेनेबालो मैनेरु मटूए। 38 ऊडार ई दुनियाए, ते रोदू बीज़ राज हासिल केरनेबाले लोक, ते जंगली बीज़ शैतानेरे लोक आन। 39 ते तै दुश्मन ज़ैनी तैन बेवरु थियूं तै शैताने, लुन्नेरो मतलब इस दुनियारो अन्त भोनोए, ते लुन्ने बाले स्वर्गदूतन। (aiōn g165) 40 ज़ेन्ज़रे जंगली बीज़ेरे ग्लेव अकोटु केरतां अग्गी मां फुकतन, तेन्चरे इस दुनियारो अन्त भोनोए। (aiōn g165) 41 मैनेरु मटू अपने स्वर्गदूतन भेजेलू, ते तैन केरे राज्जे मां ठोकरारी वजा ते बुरां कम्मां केरनेबालन अकोटु केरले। 42 ते तैन अगारे कुण्डे मां छ़डेले, ज़ैड़ी तैना लोक लेरां देते ते दंत चापते राले। 43 तेइस धर्मी लोक अपने बाजी केरे राज्जे मां दिहाड़े ज़ेरे चमकेले। ज़ै कोई समझनू चाते, तै ध्याने सेइं शुने ते समझो।” 44 “स्वर्गेरु राज्ञ तैस दौलतरु ज़ेरु ए, ज़ै एककी ऊडारे मां दबोरी थी, ज़ै एककी मैने तोप्पी, ते तैस मैल्ली भी, ते फिरी तैने छ़पेइतां छ़डी ते खुशी सेइं अपनू सब किछ बेचतां तैन ऊडार धिनु। 45 “स्वर्गेरु राज्ञ तैस बुपैरेरु ज़ेरुए, ज़ै कीमती मोती तोपतो थियो। 46 ज़ैखन तैस अक कीमती मोती मैल्लो, तैनी अपनू सब किछ बेचतां तै मोती धिनो। 47 “स्वर्गेरु राज्ञ तैस मेछ़ली ज़ालेरु ज़ेरुए, ज़ैन समुन्द्रे मां छ़डू ते तैस मां हर किसमेरी मेछ़ली लेगी। 48 ते ज़ैखन ज़ाल भेरोई ज़ोवं त झिरेइं ज़ाल खिचतां कनारे पुढ़ आनू, ते बिशतां रोड़ी-रोड़ी मेछ़ली टोकरन मां रेख्खी ते बुरी-बुरी मेछ़ली शैरी छ़डी। 49 दुनियारे अन्ते मां भी एरु भोनूए, स्वर्गदूतेर्ई एइतां दुष्ट लोक, धर्मी लोकन करां अलग केरनेन। (aiōn g165) 50 ते तैना अगारी भेठी मां छ़डनेन तैड़ी लेरां ते दंत चापने भोले। 51 “कुन तुसेर्ई एन सैरी गल्लां सेमझी?” तैनेर्ई ज़ोवं,

“हाँ” असेई सेमझी। ५२ फिरी यीशुए तैन सेइं ज़ोवं, “हर अक शास्त्री ज़ै स्वगेरे राज्ज़ेरो चेलो बनोरोए एक्की एरे मुकान मालिकेरो ज़ेरोहे, ज़ै अपने खज्जाने मरां नव्वीं ते पुरैनी चीज्जां कढते।” ५३ ज़ैखन यीशुए एना सब कहैनी शुनेई त तै तैटुं अग्रोवं चलो जेव। ५४ ते अपने नगर मां एइतां तैट्टेरे प्रार्थना घरे मां गेइतां शिक्षा देने लगो, ते लोक तैसेरी शिक्षा शुन्तां हैरान भोए ते ज़ोने लगो: “ए अक्ल बुधी ते एना चमत्कार एस कोटुं हासिल भोए। ५५ एन त तैस टलखानेरू मटू आए ते एसेरे अम्मारू नवं मरियम ते एसेरे ढलां केरू नवं याकूब, यूसुफ, शमौन ते कने यहूदा आन, ५६ ते एसेरी सब बेइनां इश्शे इड़ी रेइचन, फिरी एसमां ई काबलीत कोटुं आई?” ५७ एन्हरे तैन लोकेई इन्कार कियो। पन यीशुए तैन सेइं ज़ोवं, “नबी अपने नगर मां ते अपने घरेरे अलावा होरि कोन्ही ठारी बेइज्जत न भोए।” ५८ ते तैने तैड़ी तैन केरे विश्वास न केरनेरे वजाई सेइं जादे चमत्कार न हिराए।

14 ज़ोइस हेरोदेस ज़ै मुलखेरे चेवरोवं हिस्से पुड़ हकोमत केरतो थियो, तैनी यीशुएरे बारे मां शुनू। २ तैनी अपने नौकरन सेइं ज़ोवं, “ए यूहन्ना आए ज़ै बपतिस्मो देनेबालोए, ए मुड़दन मरां ज़ींतो भोरोए, एल्हेरेलेइ तै चमत्कार हिराते।” ३ किजोकि हेरोदेसे अपने ढलाए फिलिप्पुसेरी कुआन्श हेरोदियासेरी वजाई सेइं यूहन्ना ट्लेइतां बन्धोवरो ते कैदखाने मां छ़डोरो थियो। ४ किजोकि यूहन्ना हेरोदेस सेइं ज़ोरु थियूं, कि ए रखनी तेरे लेइ जेइज नई। ५ ते हेरोदेस तैस कत्ल केरनो चातो थियो, पन लोकन करां डरतो थियो, किजोकि लोक तैस नबी मन्ते थिये। ६ पन ज़ैखन हेरोदेसेरी ज़र्म दिहैड़ी आई, त हेरोदियासेरे कुइयां मेहमाना केरे सामने नेवतां हेरोदेस खुश कियोरो थियो। ७ एल्हेरेलेइ तैनी वादो कियोरो थियो, “कि ज़ैन किछ तू मगेली, अवं तीं तैन्ने देलो।” ८ तैसां अपने अम्मारे शिखालने पुड़ ज़ोवं, “मींजेर्ई यूहन्ना बपतिस्मो देनेबालेरी क्रोड़ी थाले मां मग।” ९ राजे बड़ो अफ्रसोस भोव, पन अपने मेहमाना केरे सामने ते कसम खानेरी वजाई सेइं हुक्म दितो कि देथ। १० ते तैनी कैदखाने मां लोक भेजतां यूहन्नारी क्रोड़ी कटाई। ११ ते तैसेरी क्रोड़ी थाले मां रेखतां कुइये कां दिती, ते तै अपनि अम्मा कां यिन्तां जेई। १२ तैखन तैसेरे चेले आए, ते तैनेई तैसेरी लाश नेइतां देबतां छ़डी ते गेइतां यीशुए पतो दितो। १३ ज़ैखन यीशुए एन शुनू, त तै किश्तरे जिरिये अकेन्ती ठारी जो चलो

जेव, ते लोक एन शुन्तां नगर नगरेरे पैदल तैस पत्ती चले जे। 14 जैखन यीशु किश्ती मरां ओस्सो त तैनी बडे लोक पतोरां इइते लाए, ते तैस तैन पुढे बडो तरस अव, ते तैनी तैन केरे बिमार लोक बज़ङ्गाए। 15 जैखन ड्लोङ्गा भोइ, त यीशुएरे चेलेई तैस कां इइतां ज़ोवं, “ई सुनसान ठार आए, त चिर भी बदू भोरु आए। ते एन लोकन भेजी छडे ते कोस्कोई ड्लोंव्वन मां गेइतां किछ खाने जो घिन्न।” 16 यीशुए तैन सेइं ज़ोवं, “एना भेजने ज़रुरी नई! तुस्से एन किछ खाने जो देथ।” 17 चेलेई तैस सेइं ज़ोवं, “झडी असन कां पंच रोटी ते दूर्द मेछळी केरे अलावा होरु किछ नई।” 18 तैनी ज़ोवं, “तैन इरां मीं कां आनां।” 19 तैखन यीशुए लोकन घासे पुढे उन्हे बिशनेरे लेइ ज़ोवं, ते पंच रोटी ते दूर्द मेछळी हथ्ये मां रेख्खी, ते अम्बरेरे पासे तेकतां शुक्र कियूं, ते रोटी ट्लोडी-ट्लोडी अपने चेलन कां दित्ती, ते चेलेई तैन लोकन दित्ती। 20 ते सारे मैन्हु खेइतां रेझ़ी जे। तैल्ला पत्ती, यीशुएरे चेलेई बचोरे टुकड़न सेइं 12 टोकरी भेरि। 21 रोटी खानेबाले लोकां केरि तैधात कुआन्शां ते बच्चां केरे अलावा कोई 5000 मडद थिये। 22 तैल्ला पत्ती, यीशुए अपने चेलन हुक्म दित्तो कि, तुस किश्ती मां चेढतां मीं केरां पेइले समुन्दरेरे उस पार जो गाथ ते अवं एन लोकन वापस भेजतां इइताई। 23 लोकन भेजनेरे पत्ती, यीशु तैटुं निस्तां नेडे एककी पहँडी पुढे प्रार्थना केरनेरे लेइ जेव। ते ड्लोङ्गी तै अकैल्लो थियो। 24 तैखन किश्ती बन्ने करां दूर पुज़ोरी थी, किजोकि एग्रोवरां बडी तेज़ हवा चलोरी थी। 25 ते लगभग झोज़्ज़ेरे चेवे बज़ेई जैखन हेजू आंधरु थियूं, यीशु समुन्दरेरे पैनी पुढे चेलतां अपने चेलन कां अव। 26 जैखन चेलेई यीशु समुन्दरे पुढे चलतो लाव त तैना डेरि जे, तैनेई बुझू, “ए भूत ओरोए,” ते डेरतां चिन्डां लग्गे मारने। 27 यीशुए तैखने तैन सेइं रोडेचारे गल्लां की ते ज़ोवं, “हिम्मत रख्खा डरा नन्ना, अवं आई।” 28 पतरसे तैस जुवाब दित्तो, “हे प्रभु अगर तू आस, त मीं भी हुक्म दे ते अवं भी पैनी पुढे चलतो तीं कां एज्जी।” 29 तैनी ज़ोवं, “एई!” तैखन पतरस किश्ती मरां ओस्तां यीशु कां गानेरे लेइ पैनी पुढे मेइं चलने लगो। 30 पन तेज़ हावी सेइं छेल्ली चलने लेगी ते तै डेरि जेव, ते डुबने लगो तैखन तैनी चिन्डां मैरतां ज़ोवं, “हे प्रभु मीं बच्चा।” 31 यीशुए लूशी अपने हथ्ये सेइं झाफ देइतां पतरस ट्लातो, ते तैस सेइं ज़ोवं, “हे घट भरोसे बाला तीं किजो शक की?” 32 जैखन तैना किश्ती

मां बिश्शो ते हवां रुकी जेर्दि। 33 तैखन जैना किश्ती मां बिश्शोरे थिये, त तैनेईं तैस कां मथ्थो टेको ते ज़ोने लग्गे, “तू सच्चे परमेश्वरु महूस।” 34 ज़ैखन तैना गलील समुन्द्र पार केरतां गन्नेसरत नंब्वेरे जगाई पुङ पुज्जो। 35 त तैट्टेरे लोकेई यीशु पिशानो ते आसेपासेरे इलाके मां खबर दिती, ते सारे बिमार तैस कां आने। 36 ते तैनेईं यीशु सेइं मिन्त केरते थिये कि, तैन तैसेरे लिगडन सेइं हुर्ने दे। ते ज़ेत्रेईं तैसेरे लिगडन सेइं हथ लाव तैना सब बेझ्झोए।

15 तैखन किछ फरीसी ते किछ शास्त्री लोक यरुशलेम नगरे मरां यीशु कां आए ते ज़ोने लग्गे। 2 “तेरे चेले बुजुर्गा केरि रसमरे खलाफ किजो चळतन, तैना रोट्टी खाने करां पेइले हथ न धोन?” 3 तैनी तैन जुवाब दितो, “तुस किजो अपने रसमन सेइं परमेश्वरो हुक्म ट्लोड़तथ? 4 किजोकि परमेश्वरे ज़ोर्सए, कि अपने हाज बव्वेरी इज्जत केरा, ते ज़ै कोई अपने हाज बव्वे जो बुरु ज़ोलो तै मारो गालो। 5 पन तुस ज़ोतथ, कि ज़ै कोई बाजी या अम्मा सेइं ज़ोए कि, मीं करां ज़ै किछ मद्दत तुसन मैल्ली सकती थी, तै पेइली बलिदान भोरीए, यानी परमेश्वरे जो चळतल चाढ़ोरीए 6 त तै अपने बाजी केरि इज्जत न केरे, एन्चरे तुस अपने रसमन सेइं परमेश्वरो हुक्म ट्लोड़तथ। 7 हे पाखंडी लोकव, यशायाह नेबे तुश्शे बारे मां ई भविष्यिवाणी ठीक कियोरीए, 8 एना लोक ऐशी सेइं त मेरी बड़ी तारीफ केरतन, पन एन केरे दिल मीं करां बड़े दूर आन। 9 एना लोक बेफैददी मेरी आराधना केरतन, किजोकि एना मैन्हु केरे हुक्मां केरि शिक्षा देतन।” 10 फिरी मैन्हु एप्पू कां कुजेइतां ज़ोवं, “शुना, ते समझा। 11 ज़ै चीज़ ऐशी मां गाचे तैस सेइं मैन्हु जुटो न भोए, पन ज़ैन तैसेरे ऐशी मरां बेइरों निस्ते, तैन्ने तैस जुटो केरते।” 12 तैखन चेलेई यीशु कां एइतां ज़ोवं, “कुन तू ज़ानतस कि फरीसी लोकेई ए गल शुन्तां ठोकर खाइ?” 13 तैनी जुवाब दितो, “ज़ै बुट मेरे स्वगरे बाजे नई लोरो तै ज़ीलना पुटतां छँडनोए। 14 तैन केरि परवाह न केरा, तैन काने बत हिराने बालेन, अगर अक कानो होरि काने बत हिराए, त तैन दुइये गढे मां बिछ़डेले।” 15 एन शुन्तां पतरसे ज़ोवं, “ए मिसाल असन समझा।” 16 यीशुए ज़ोवं, “कुन तुस हेजू भी बेसमझाथ?” 17 “कुन तुस न ज़ानथ, कि जैन किछ ऐशी मां गाते तैन पेटे मां गाते, ते फिरी पेटे मरां बेइर निस्ते? 18 पन जैन किछ मैनेरे अन्त्रेरां निस्ते, तैन दिले मरां निस्ते, तैन्ने मैन्हु जुठो केरते? 19 किजोकि बुरे

खियाल, कत्तल केरनो, अदूलाए देहने गलत कम केरनू बदमाशी, चोरी, झूठी
 गवाही देनी, ते तुहीन दिले मरां निसचे। 20 एन एरी गल्लन ज़ैना मैन्हु जुट्ठो
 केरचन, पन हथ धोने बगैर रोटी खाने सेइं मैन्हु जुट्ठो न भोए।” 21 यीशु तैटुं
 च्चलो जेव, ते सूर ते सैदारे आसेपासेरे इलाकेरे नेडे अव। 22 तैस इलाकेरी
 अक कनानी कुआन्श यीशु कां आई, ते चिन्डां मैरतां ज़ोने लग्गी, “हे प्रभु
 दाउदेगा मट्ठां, मीं पुड़ दया केर, मेरी कुइये पुड़ भूतेरो सैयोए, तैन भूत तैस
 बढ़ू सताते।” 23 पन यीशुए कोई जुवाब न दित्तो, तैसेरे चेले नेडे एइतां तैस
 कां मिनत केरने लग्गे, “एस भेज़, किजोकि ए चिन्डां मारचे ते इश्शो पीछो न
 छ़डे।” 24 तैनी जुवाब दित्तो, “अवं इसाएलेरी हेरोरि भैट्ठां केरे अलावा होरि
 कोन्ची कां नई भेज़ोरो।” 25 पन तै कुआन्श आई, ते तैस कां मथ्थो टेकतां
 ज़ोने लग्गी, “हे प्रभु मेरी मद्दत केर।” 26 तैनी जुवाब दित्तो, “बच्चां केरि
 रोटी नेइतां कुतरन देनी ठीक नई।” 27 तैसां ज़ोवं “सच्चे प्रभु, पन ज़ैन
 दुक्ढे मालिकेरी मेज़े पुडेरां बिछ़ुड़तन तैना कुतरां भी खातन।” 28 यीशुए
 तैस जुवाब दित्तो, “ए कुआन्श तेरो विश्वास बड़ोए, ज़ेरु तू चातिस तेरे लेइ
 तेरहु भोए” ते तैसारी कुई तैखने बेज़झोइ जेर्इ। 29 यीशु तैटुं निस्तां गलील
 समुन्दरेरे बन्ने पुड़ अव, तैखन तै एक्की पहाड़े पुड़ गेइतां बिश्शी जेव। 30 ते
 बड़े लोकां केरि भीड़ तैस कां आई, तैन लोकेर्इ एप्पू सेइं साथी टोंटे, काने,
 लट्टे, डोंडे ते होरे काई एरे ज़ेरे मैन्हु साथी आने, ते तैसेरे पावन कां छ़ुट्टे,
 ते तैनी तैना सब बज़्झाए। 31 ज़ैखन लोकेर्इ हेरु कि लट्टे गल्लां केरतन
 कमज़ोर तकड़े भोतन, टोंटे च्चलतन ते काने लातन तैना बड़े हैरान भोइ जे
 ते इसाएलेरे परमेश्वरी तारीफ केरने लग्गे। 32 यीशुए अपने चेले कुजेइतां
 तैन सेइं ज़ोवं, “मीं एन लोकन पुड़ बड़ो तरस एइते, एना मैन्हु ट्लेइ दिहैड़ी
 केरे देंते बराबर मीं सेइं साथिन, ते एन कां खाने जो किछ भी नई। अवं एन
 नियन्ने भेज़े न चैर्इ, कोस्कोई एरु न भोए कि एना बत्ती मां रेइ गान।” 33
 तैसेरे चेलेर्इ तैस जुवाब दित्तो “अस इस सुनसान ठैरी मां एत्रे लोकां केरे लेइ
 रोटी कोट्ठां आनम, ज़ैना सेब्बी केरे लेइ पूरी भोन?” 34 यीशुए पुच्छू, “तुसन
 कां केत्री रोटी आन?” तैनेर्इ ज़ोवं, “सत रोटिन ते किछ निककी मेछ़ली भी
 आन।” 35 तैखन तैनी लोकन ज़मीनी पुड़ बिशनेरे लेइ ज़ोवं। 36 ते यीशुए
 तैना सत रोटी ते मेछ़ली ट्लेड, ते परमेश्वरू शुक्र केरतां ट्लोडी, ते अपने

चेलन कां दित्ती ते चेलेई तैना मैनन् दित्ती। 37 सारे मैन्हु रोट्टी खेइतां रेज़जी
जे। तैल्ला पत्ती, यीशुएरे चेलेई मेछ़ली त कने रोट्टी केरे बज्ज़ोरे टुकड़न मरां
सत टोकरे भेरतां सल्लो। 38 रोट्टी खाने बालां केरि तैधात कुआन्शां ते बच्चां
केरे अलावा 4000 मङ्द थिये। 39 तैखन तैने तैना सब लोक भेजे ते एप्पू
किश्ती मां च्वेढतां मगदन इलाके जो च्वलो जेव।

16 किछ फरीसी ते किछ सदूकी लोक यीशु कां आए, “ते तैस अज़मानेरे
लेइ तैस सेइं ज़ोवं, असन कोई अम्बरेरो निशान हिरा।” 2 तैनी तैन जुवाब
दित्तो, “जैखन ड्लोङ्ग भोतीए त तुस ज़ोतथ कि मौसम रोडोए किजोकि
अम्बर लाले। 3 ते झेझां ज़ोतथ कि अज़ आँधी एजनीए किजोकि अम्बर लाले
ते बिदलारे, तुस अम्बर हेरतां अंदाज़ो लेइता ज़ोतथ, पन ज़मानेरो निशान न
पिशैनी सकतथ! 4 इस ज़मानेरे बुरे ते बदमाशी केरनेबाले लोक निशान
मगतन, पन तैन योना नेबेरे अलावा होरो कोई निशान न दित्तो गालो।” यीशु
तैन शैरतां च्वलो जेव। 5 ते यीशुएरे चेले समुन्दरे पार पुऱ्णी जे, पन तैनेई रोट्टी
साधी नेनी बिसरोरी थी। 6 यीशुए तैन सेइं ज़ोवं, “खबरदार फरीसी ते कने
सदूकी लोकां केरे खमीरे करां हुशार रेझयथ।” 7 तैना एप्पू मांमेइ गलबात
केरने लगे, “असेई रोट्टी नई आनोरी, एल्हेरेलेइ तै एरु ज़ोने लोरोए।” 8 एन
जैनां, यीशुए ज़ोवं, “हे घट विश्वेसव, तुस एप्पू मांमेइ किजो सोची राओरेथ,
कि असन कां रोट्टी नई? 9 कुन तुसन याद नई? ज़ताली मीं 5000 मैन्हु केरे
लेइ पंच रोट्टी ट्लोडतां दित्तोरी थी, त तुसेई बादे मां बज्ज़ोरी रोट्टी केरे केत्रे
टोकरे भेरतां सल्लोरे थिये? 10 ते तैन 4000 मैन्हु केरे लेइ सत रोट्टी ते टुकां
केरि केत्री टोकरी सैल्लोरी थी? 11 तुस की न समझथ, कि मीं तुसन रोट्टी
केरे लेइ न थियूं ज़ोरु? पन फरीसी ते कने सदूकी लोकां केरे खमीरे करां
हुशार रेझयथ।” 12 तैखन तैन केरि समझी मां अव, कि तैनी रोट्टी केरे लेइ
नई, बल्के फरीसी ते कने सदूकी लोकां केरे खमीर यानी शिक्षाई करां हुशार
रानेरे लेइ ज़ोरु थियूं। 13 जैखन यीशु कैसरिया फिलिप्पी इलाके मां अव, त
तैनी अपने चेलन पुऱ्णः “मैनेरु मटू कौने, लोक एस बारे मां कुन ज़ोतन?”
14 चेलेई ज़ोवं, “किछ ज़ोतन यूहन्ना बपतिस्मो देनेबालोए, किछ ज़ोतन
एलिय्याह, ते किछ ज़ोतन यिर्मयाह नबी ते किछ ज़ोतन नेबन मरां कोई अक
आए।” 15 यीशुए तैन पुऱ्णः “पन तुस मेरे बारे मां कुन सोचतथ कि अवं

कौन आई?” 16 शमैन पतरसे जुवाब दितो, “तू जींते परमेश्वरु मटू मसीह आस।” 17 यीशुए ज़ोवं, “ए शमैन योनारे मटूं तू धन आस, किजोकि ए गल मासे या खूने नई बल्के मेरे स्वगेरे बाजे तीं पुड़ बांदी कियोरीए। 18 ते अबं तीं सेइं ज़ोताई, तू पतरस आस ते अबं इस पक्के घोड़े पुड़ अपनि कलीसिया बनेइलो ते पातालेरां दारां तैस पुड़ अस्सर न केरि बटेलां। (Hadēs g86) 19 अबं अपने स्वगेरे राज्ज़ेरी चैबी तीं देइलो, ते ज़ैन किछ तुस ज़मीनी पुड़ बंधेले तैन स्वर्गे मां बेंधोलू, ते ज़ैन किछ तू ज़मीनी पुड़ खोल्लेलो तैन सब किछ स्वर्गे मां खुल्लेलू।” 20 तैखन यीशुए चेलन जो ज़ोवं, ए गल केन्ची सेइं न ज़ोइयथ कि अबं मसीह आई। 21 एसेरे बाद यीशुए अपने चेलन ज़ोने लगो कि, “तैसेरु यरुशलेम नगरे मां गानू ज़रुरीए ताके यहूदी लोकां केरे बुजुर्गन, प्रथान याजकन ते शास्त्री लोकां केरे हथेइं तै बड़ो दुःख झैल्ले, ते मारो गाए ते तै ट्लेइयोवं दिहाड़े फिरी ज़ींतो भोलो।” 22 पतरस तैस अलग नेइतां झिङ्कने लगो, “हे प्रभु, परमेश्वर न केरे, तीं सेइं एरु कथे न भोलू।” 23 यीशुए मुडतां पतरसे सेइं ज़ोवं, “हे शैतान, मीं करां दूर भो, तू मीं करां पाप करानेरी कोशिश कराने लोरोस। किजोकि तू ज़ेन्चरे परमेश्वर सोचते तेन्चरे नई बल्के ज़ेन्चरे मैन्हु सोचन तेन्चरे सोचतस।” 24 तैखन यीशुए अपने चेलन सेइं ज़ोवं, “अगर कोई मीं पत्ती एजनो चाते त तै अपने आपेरो इन्कार केरे, ते अपनू क्रूस छुइतां मीं पत्ती चले।” 25 “किजोकि ज़ै कोई अपनि जान बचानी चालो, त तै तैस गुवालो, ते ज़ै अपनि जान मेरे लेइ गुवालो, त तै तैस हासिल केरेलो। 26 अगर कोई सारी दुनिया हासिल केरे, ते अपने हमेशारे ज़िन्दगी गुवाए, त तैस कुन फैइदो भोलो? या मैन्हु हमेशारे ज़िन्दगरे बदले कुन देलो? 27 किजोकि ज़ैखन मैनेरु मटू अपने बाजेरी महिमाई मां अपने स्वर्गदूतन सेइं साथी एज्जेलू, तैखन तै हर केन्ची तैन केरे कियोरे कम्मां केरो फल देलो। 28 अबं तुसन सेइं सच ज़ोतई कि ज़ैना इड़ी खड़े आन, ज़ां तगर मैनेरे मटू अपने राज्जे मां एइते न लाएले, तांतगर न मरेलो।”

17 शेइ दिहाड़ना बाद, यीशु अपने चेले पतरस, याकूब त तैसेरे ढ़ला यूहन्ना सेइं साथी एककी पहाड़े पुड़ जेव, ज़ेड़ी कोई भी न थियो। 2 तैड़ी तैन केरे सामने तैसेरी शकल बेदलोई जेई, तैसेरु तुत्तर दिहाड़ेरु ज़ेरु चमकने लगू ते तैसेरां लिंगड़ां लोअरां ज़ेरां छित्तां भुआं। 3 तैखन तैनेई मूसा ते एलिय्याह

नबी यीशु सेइं गल्लां केरते लाए। 4 पतरसे यीशु सेइं ज़ोवं, “हे प्रभु इशू
 इड़ी रानू रोड़ूए, अगर तू चातस त आस ट्लाई डेरे बनाम, अक तेरे लेइ ते
 अक मूसेरे लेइ ते अक एलिय्याहेरे लेइ।” 5 तै ए गल ज़ोई राहोरो थियो,
 अक बड़ी चमकती बिदलार तैन पुड़ इटां रुकी, ते तैस बिदलारी मरां ई
 आवाज़ आई, “एन मेरु ट्लारु मटूर, ज़ैस पुड़ अवं खुश आई, एसेरी शुना।”
 6 चेले एन शुन्तां तुत्तेरे भारे बिछड़े ते बड़े डेरि जे। 7 पन यीशुए इटां तैन सेइं
 हथ लाव, ते ज़ोवं, “उठा, डरा नन्ना।” 8 ज़ैखन तैनेई चेन्ने पासन तक्कू, त
 यीशुएरे अलावा होरो कोई न लाव। 9 ज़ैखन तैना तैस पहाड़े पुड़ेरां उन्ढे ओरे
 थिये, त यीशुए तैन ई हुक्म दित्तो, ज़ैन किछ तुसेई लाहेस्सए, “ज़ां तगर मैनेरु
 मटू मुड़दन मरां ज़ींतू न भोए तांतगर केन्ची सेइं न ज़ोइयथ।” 10 तैसेरे चेलेई
 तैस पुच्छू, “शास्त्री किजो ज़ोतन कि मसीहेरे एजनेरां पेइले, एलिय्याह
 नेबेरु दुनियाई मां एजनू ज़रुरी आए?” 11 तैनी जुवाब दित्तो, “एलिय्याह
 ज़रुर एज्जेलो ते सब किछ बहाल केरेलो। 12 पन अवं तुसन सेइं ज़ोतई कि
 ‘एलिय्याह’ त पेइले ओरोए, पन लोकेई तै न पिशानो, पन ज़ैन चाऊ तैस सेइं
 तैन्ने कियूं एन्हरे मैनेरु मटू भी तैन केरे हथ्थन सेइं दुःख भोगेलो।” 13
 तैखन चेलेई बुझू कि असन सेइं यूहन्ना बपतिस्मो देनेबालेरे बारे मां ज़ोने
 लोरोए। 14 ज़ैखन तैना हछे मैन्ह केरि बड़ी भीड़ी कां पुज़े, त अक मैन्ह तैस
 कां अव, ते ज़ीधू केरे भारे बिश्तां ज़ोने लगो। 15 “हे प्रभु मेरे मटू पुड़ दया
 केर, तैस मिरगरी वजाई सेइं दौवरे इटतन, ते तैस बड़ो दुखे, ते बार-बार
 अग्गी मां ते बार-बार पैनी मांजो खिरकते। 16 मीं तैन तेरे चेलन कां आनोरु
 थियूं पन तैनेई तैन ठीक न केरि बटु।” 17 यीशुए ज़ोवं, “हे घट विश्वावैसव
 ते ढीठ लोकव, अवं केइस तगर तुसन सेइं साथी भोनोई, केइस तगर तुश्शी
 झैलतो रेइलो? तै मीं कां आनां।” 18 तैखन यीशुए तैन भूत झिङ्कू, ते तैस
 पुड़ां सैयो निस्सी जेव, ते तैन मटू तैखने ठीक भोइ ज़ोवं। 19 तैखन चेलेई
 अकैल्ले ज़ेरे यीशु कां गेइतां पुच्छू, “अस तैस मटू मरां भूतेरो सायो की न
 केढ़ी सके?” 20 तैनी तैन सेइं ज़ोवं, “अपने घट विश्वासेरे वजाई सेइं, अवं
 तुसन सेइं सच ज़ोताई, अगर तुश्शो विश्वास शेरीएरे ग्लेवे ज़ेत्रो भी भोए, त
 तुस उस पहाड़े जो ज़ोले कि, ‘इद्धुं निस्तां उड़ी गा,’ त तैन गालू, ते तुश्शे लेइ
 कोई भी गल असुखती न भोली। 21 पन इस किसमेरां भूतां प्रार्थना ते बरते

बगैर न निस्सन।” 22 जैखन तैना गलीले मां थी, त यीशुए तैन सेइं ज़ोवं, “मैनेरु मटू भी मैन्हु केरे हवाले कियूं गालू। 23 तैना तैस मारेले, ते तैन ट्लेइयोवं दिहाड़े फिरी ज़ींतो भोलू।” चेले एन शन्तां बड़े परेशान भोए। 24 जैखन तैना कफरनहूम नगर मां पुज़े, त प्रार्थना घरेरे लेइ चुंगी धिन्ने बाले पतरसे कां एइतां पुच्छू, “कुन तुश्शो गुरु प्रार्थना घरेरी चुंगी न दे?” 25 तैनी जुवाब दित्तो, “हाँ देते।” जैखन पतरस घरे मां पुज़ो त यीशुए तैसेरे पुछनेरे पेइले तैस सेइं ज़ोवं, “हे शमौन तू कुन समझतस? दुनियारे राजे कोन लोकन करां चुंगी धिन्तन अपने बच्वन करां या होरि लोकन करां?” 26 पतरसे तैस सेइं ज़ोवं, “होरन करां।” यीशुए तैस सेइं ज़ोवं, “त मटां बरी भोइ जेआं। 27 फिरी भी एल्हेरेलेइ कि अस तैन ठोकर न देम, तू समुन्दरे पुड़ गेइतां कंटो लेइतां मेछ़ली ट्लेइयां, ते ज़ै मछ़ली पेइली लगेली, तैसारु आशी खोल्लां, ते तीं अक सिकको मैलनोए, ते तै सिकको नेइतां मेरी ते अपनि चुंगी देइयां।”

18 तैखन चेले यीशु कां आए ते पुच्छने लगे, “स्वगरे राज्जे मां सेब्बन करां बड़ो कौने?” 2 तैनी अक निकड़ो बच्वो एप्पू कां कुजाव, ते मझाटे खड़ो कियो। 3 ते ज़ोने लगो, “अवं तुसन सेइं सच ज़ोताई, कि तुस अपनो आप बेदलतां निकड़े बच्वेरो ज़ेरे न बनथ, त तुस स्वगरे राज्जे मां कधी दाखल न भोले। 4 ज़ै कोई अपनो आप इस बच्वेरो ज़ेरो निकड़ो बनालो, त तै स्वगरे राज्जे मां बड़ो भोलो। 5 ते ज़ै कोई एरे ज़ेरे निकड़े बच्वे मेरे नंवे सेइं कबूल केरते, त तै मीं कबूल केरते।” 6 “ज़ै कोई इन निकड़न मरां ज़ैना मीं पुड़ विश्वास केरतन एककेरे लेइ ठोकर बने, त तैसेरेलेइ एन्ने रोडू आए कि बडे ढ्लाटेरो ढ्लेइटोल तैसेरे गल्ले उन्डो ढंडेइतां डुधे समुन्द्रे मां डोबतां छ़डोरो लोड़ते। 7 ठोकरां केरि वजाई सेइं दुनियाई पुड़ अफसोस! ठोकरां लेगनी त ज़रुरन पन, अफसोस तैस मैन्हु पुड़ ज़ेसेरी वजाई सेइं ठोकर लगतीए। 8 अगर तेरो हथ या तेरो पाव तेरे लेइ ठोकरारो ज़िरयो बनते, त तू तैस केटतां छ़ड, किजोकि तेरु टोंटु या कानू बेनतां ज़िन्दगी मां दाखल भोनू रोडूए, ते तेरे दुइये हथ पाव सथे भोने सेइं अगर तू हमेशारी अग्गी मां गास त तैल्ला केरतां तू टोंटो या कानो बेनतां रोड़ोस। (aiōnios g166) 9 अगर तेरी अछ़ तेरे लेइ ठोकरी वजा बनती, त तू तैस केढतां शैरी छ़ड, कानू भोइतां ज़िन्दगी मां दाखल भोनू तेरे लेइ रोडूए, कि दुइये एछ़छी भोने सेइं तू नरकेरी अग्गी मां

गास त तैल्ला रोड़ोस।” (Geenna g1067) 10 “हेरा इन निकके चेलन मरां तुस केन्वी घटिया न बुझा, अवं तुसन सेइं ज़ोताई कि तैन केरे स्वर्गदूत हर वक्त स्वर्गे मां मेरे बाजी केरे हज़ूरी मां रातन। 11 (किजोकि मैनेरु मटू यानी अवं हेरोरे लोकन बङ्गाने ओरोई।) 12 तुश्शो खियाल कुने? कि केसकोई कां 100 भैड्हां भोन, ते तैस मरां अक हेरोए, त कुन तै नड़ेनुवें भैड्हां ज़ैडी खतरो न भोए तैडी छेडतां, तैस हेरोरि न तोपेलो? 13 ते अगर एरु भोए, तैस तै मैल्ले, त अवं तुसन सेइं सच्च ज़ोताई कि तै तैना नड़ेनुवें केरे लेइ एत्री खुशी न मनालो, ते तैस एककी भैडारे लेइ जादे खुशी बनालो। 14 एन्नरे तुश्शो बाजी जै स्वर्गे मांए, तै एन न चाए कि एन निकन मरां भी कोई नाश न भोए।” 15 “अगर कोई मीं पुङ् विश्वास केरनेबालो ढला तीं सेइं बुराई केरते, त तू अकैल्ले मां तैस समझा, अगर तै तेरी गल शुने, त तीं तै वापस परमेशरे कां आनो। 16 अगर तै तेरी गल न शुने, त तू एप्पू सेइं साथी अक या दूर्द मैन्हु नेइयां, किजोकि मूसेरे कानूनेरे मुताबिक हर शिकैइतरी मां दूर्द या ट्लाई मैन्हु गवाह भोतन। 17 अगर तै तैन केरि भी न शुने, त तू कलीसियारे लोकन सेइं ज़ो, अगर तै कलीसियारे लोकां केरि भी न शुने, त तू तैस सेइं एरो बर्ताव केर ज़ेन्वरां तै गैर कौमरो भोए या चुंगी घिन्ने बालो भोए।” 18 “अवं तुसन सेइं सच्च ज़ोताई, ज़ैन किछ तुस ज़मीनी पुङ् बंधेले त समझा कि स्वर्गे पुङ् बंधोलू ते ज़ैन किछ तुस ज़मीनी पुङ् खोल्लेले त तैन स्वर्गे मां खुल्लेलू। 19 फिरी अवं तुसन सेइं सच्च ज़ोताई, कि अगर तुसन मरां दूर्द ज़ने धेरती पुङ् अक मन भोइतां कोन्वी मसलेरे हल कढनेरे लेइ परमेशरे करां जै स्वर्गे मां आए मद्दत मग्न, त तै तैन केरि मद्दत ज़रूर केरेलो। 20 किजोकि ज़ैडी दूर्द या ट्लाई मैन्हु, मेरे नव्वे सेइं परमेशरे करां मद्दत मग्नेरे लेइ अकोट्टे भोतन, अवं तैडी तैन केरि मद्दत केरनेरे लेइ तैन मां भोइताई।” 21 तैखन पतरसे यीशु कां एइतां पुच्छू, “प्रभु अगर कोई तीं पुङ् विश्वास केरनेबालो, मीं सेइं बुराई केरतो राए, त अवं केत्रे बार तैस माफ केरि? कुन सत बार?” 22 यीशुए जुवाब दित्तो, “अवं तीं सेइं इन न ज़ोई सत बार, बल्के सत्तरे सत्तर बार माफ करां (यानी लगातार माफ केरतू रानू।) 23 बस्सा अवं तुसन सेइं इन ज़ोताई, स्वर्गेरु राज तैस राज्जेरु ज़ेरु आए, ज़ैनी सोचू कि अवं अपने नौकरन करां हिसाब घिन्नी। 24 जैखन तै हिसाब घिन्ने लगो, त अक मैन्हु तैस कां हाजर

कियो, जै दश हजार सोन्नेरे सिक्कां केरे तोड़ां केरो कर्जदार थियो। 25 तैस कां कर्जो मुकाने जो किछ न थियूं राजे हुक्म दित्तो, एसेरे बाल बच्चे ते कुआन्श ते जैन किछ भी आए सब बेचतां कर्जो उसुल केरा। 26 पन तै नौकर ज़ोवले हथ केरतां मालिके कां मिनत केरतां जोने लगो, ‘मीं किछ मौको दे, ते अवं तेरो सारो कर्जो मुकालो।’ 27 मालिके तैस नौकरे पुड़ बड़ो तरस अव, ते तैनी तै छैड़ी दित्तो ते तैसेरो कर्जो भी माफ़ कियो।” 28 “पन जैखन तै नौकर तैटुं च्चलो जेव, त तैस अक एरो नौकर मैल्लो, जै तैसेरो साथी थियो, ते तैस तैनी 100 दीनार दित्तोरे थिये, तैनी तै गलेरां ट्लाव ते जोने लगो, ‘मेरो कर्जो कढ़ा’। 29 तैसेरो साथी नौकर तैसे कां मिनत केरने लगो, मीं किछ मौको दे ते अवं तेरो सारो कर्जो मुकालो। 30 पन तैनी तैसेरी अक गल भी न शुनी, ते तैनी तै ढेपतां छङ्गो कि ज़ां तगर कर्जो न देस तांतगर ढप्पोरो रा। 31 जैखन होरि नौकरेई एन शुनूं त तैना बड़े परेशान भोए, ते मालिके कां गेइतां सारो हाल शुनाव। 32 तैखन मालिके तै अपने नौकर कुजेइतां ज़ोवं, ‘ओ बेर्डमान नौकरा मीं तेरो सारो कर्जो माफ़ कियो, किजोकि तीं मीं कां छंदे कियोरे थिये। 33 कुन तेरे लेइ ज़रूरी न थियूं कि ज़ेन्हरे मीं तीं पुड़ दया केरतां तेरो कर्जो माफ़ कियो, तेन्हरे तू भी अपने सैथन पुड़ दया केरतां तैन केरो कर्जो माफ़ केरेथो?’ 34 मालिके सरक आई, ते तैनी तै नौकर सज़ा देनेबालां केरे हवाले कियो, कि ज़ां तगर मेरो सारो कर्जो न दे तांतगर ढप्पोरो भोए। 35 “एन्हरे अगर तुसन मरां हर कोई, तैस मैन्हु जै मीं पुड़ विश्वास केरते दिले सेइं माफ़ न केरे त मेरो स्वगरे बाजी यानी परमेशर भी तुसन सेइं एन्हरे पैश एज्जेलो।”

19 जैखन यीशुए एन गल्लां ज़ोई छैडी, त तै गलीले मरां गेइतां यरदन दरियोरे पार यहूदिया इलाके मां च्चलो अव। 2 बड़े लोक यीशु पत्ती च्चले जे, ते यीशुए तैना तैड़ी बज़्झाए। 3 तैखन फरीसी लोकेई यीशु कां एइतां तैस अज़मानेरे लेइ पुछ्छ, “कुन मैन्हु अपनि कुआन्श केन्ची भी वजाई सेइं फारखी देनी जेइजे?” 4 तैनी जुवाब दित्तो, “कुन तुसेर्ई नई पढ़ेरु कि जैने तैना बनां तैनी शुरू करां मड़द ते कुआन्श बनेवरां थियां। 5 ‘एल्हेरेलेइ मड़द अपने हाज बच्चे करां कनारे बिश्तां अपनि कुआन्शी सेइं साथी रालो, ते तैना दुइये अक जान भोलां।’ 6 एल्हेरेलेइ हुनी तैना परमेशरेरी नज़री मां दूर्झ नई,

पन अकके आन। एल्हेरेलेइ ज़ैना परमेश्वरे ज़ोड़ेरेन, तैनन् कोई मैन्हु अलग न केरे!” 7 तैनेर्इ तैस पुच्छू, “फिरी मूसे ए हुक्म किजो दित्तो कि फारख्ती लिखतां छैडी देथ?” 8 तैनी तैन सेइं ज़ोवं, “मूसे तुश्शे सखत दिलेरी वजाई सेइं अपनि कुआन्शन छँडनेरो हुक्म दितोरो थियो, पन शुरु करां एन न थियूं। 9 अवं तुसन सेइं सच्च ज़ोताई, कि ज़ै कोई अपनि कुआन्शी बदमैशरे अलावा कोन्ची होरि गल्ली पुड़ फारख्ती दे, ते तै केन्ची होरि सेइं डला बनाते, त तै (एप्प) बदमाशी केरते। ते ज़ै तैस शैरोरी कुआन्शी सेइं डला बनाते, त तै भी बदमाशी केरते।” 10 चेलेर्इ यीशु सेइं ज़ोवं, “अगर मङ्गद ते कुआन्शारे रिशतेरो ई हाले त डला न लोडे बनोरो।” 11 यीशुए तैन सेइं ज़ोवं, “ए गल सब कबूल न केरि बटन, सिर्फ तैना ज़ैन परमेश्वर ई काबलीत दित्तोरीए। 12 किछ त ज़मर्नेरे हिजडे भोतन ते किछन लोक बनातन, ते किछ एरे भी आन, कि ज़ैन स्वर्गेरे राज्जेरे लोइ डला न बनान, ते ज़ैना इना गल्लां सेमझी सकतन तैना समझन।” 13 तैखन लोकेर्इ बच्चे यीशु कां आने, कि तैन पुड़ हथ रेखतां प्रार्थना केरे, पन चेलेर्इ तैना लोक झिड़के। 14 यीशुए ज़ोवं, “बच्चे मां कां एजने देथ, तैन न ठाका, किजोकि स्वर्गरू राज एरां केरूए।” 15 ते तै बच्चन पुड़ हथ रेखतां तैटुं अग्रोवं चलो जेव। 16 हेरा, अक मैन्हु यीशु कां अव ते पुच्छने लगो, “हे गुरु अवं कुन भलू कम केरि, कि हमेशारी ज़िन्दगी हासिल केरि?” (aiōnios g166) 17 यीशुए तैस सेइं ज़ोवं, “तू मां भलैइये बारे मां किजो पुछतस? परमेश्वरेरे अलावा होरो कोई भी रोडो नई, पन अगर तू हमेशारी ज़िन्दगी हासिल केरनि चातस त हुक्म मनन।” 18 तैनी ज़ोवं, “कोन हुक्मन पुड़?” यीशुए ज़ोवं, “खून नई केरनो, बदमाशी नई केरनि, चोरी नई केरनि, झूठी गवाही नई देनी, 19 अपने हाज बच्चां केरि सेवा केर, अपने पड़ोसी सेइं अपने बराबर प्यार केर।” 20 तैनी जवाने जुवाब दित्तो, “एना सब हुक्म अवं बचपनेरो मन्तो ओरोई। हुनी मां मां को कमीए?” 21 यीशुए तैस सेइं ज़ोवं, “अगर तू सिद्ध भोनू चातस, त गा ज़ैन किछ तीं कां आए तैन बेच्तां गरीब मैनन् दे, तैखन तीं स्वर्ग मां खज़ानो मैलेलो। ते एइतां मां पत्ती चल।” 22 पन तैनी जवाने ए गल शुनी, त बड़ो उदास भोइतां चलो जेव, किजोकि तै बड़ो अमीर थियो। 23 तैखन यीशुए अपने चेलन सेइं ज़ोवं, “अवं तुसन सेइं सच्च ज़ोताई कि अमीर मैनेरु स्वर्गेरे राज्जे मां दाखल भोनू

मुशकले। 24 फिरी अबं तुसन सेइं ज़ोताईं, परमेशरेरे राज्जे मां अमीर मैनेरु दाखल भोने केरां ऊटेरु सांधनेरे पाए मरां निस्नू सुख्तू आए!” 25 एन शुन्तां चेलई हैरान भोइतां ज़ोवं, “फिरी कसेरी मुक्ति भोइ बटतीए।” 26 यीशुए तैन केरे पासे तेकतां ज़ोवं, “मैन् करां त एन न भोइ सके पन परमेशरे करां सब किछ भोइ बटते।” 27 एस पुड़ पतरस ज़ोने लगो, “हेर अस सब किछ शैरतां तीं पत्ती च्छलोरेम ते असन कुन मैलनूए?” 28 यीशुए तैन सेइं ज़ोवं, “अबं तुसन सेइं सच्च ज़ोताईं, कि नंचे दुनियाई मां ज़ैखन अबं मैनेरु मटू अपने महिमारे तखते पुड़ बिशेलू, त तुस भी मीं पत्ती च्छलने बाले 12 तखतन पुड़ बिश्तां इस्साएलेरे 12 गोत्रां केरो इन्साफ केरेले। 29 ते ज़ैनी केन्चे अपना घरां ते ढला या बेइन या हाज या बव या बच्चे या ऊडारां छङ्होरेन, तैस 100 गुणा फल मैलेलो, ते हमेशारी जिन्दगरी विरासत मैलेली। (aiōnios g166) 30 पन बडे मैन्हु ज़ैना हुन्ना पेइले आन, तैना बादे मां पत्रों भोनेन। त ज़ैना हुन्ना पत्रों आन, तैना बादे मां पेइले भोनेन।”

20 “स्वर्गेरु राज्ज तैस ज़िमदारेरु ज़ेरुए जै झोझां उटुतां ते अपने दाढ़री बागी मां मज़दूर कम्मे लाए। 2 तैनी अक दीनार रोज्ज मुजुरी देनेरे लेइ तैना बागी मां भेजे। 3 फिरी नौ बजेइं बेइर गेइतां तैनी बजारे मां काई लोक बेकार खडे लाए। 4 तैनी तैन सेइं ज़ोवं, ‘तुस भी मेरी बागी मां गाथ, ते ज़ैन किछ जेइज्ज भोलू अबं तुसन देलो।’ तैना कम्मे पुड़ जो जे। 5 फिरी तैनी दुपहरेईं ते ट्लेइ बज़न तगर एन्ने कियूं। 6 पंचे बजेइं तैनी बेइर निस्तां किछ होरे लोक भी खड़खडे लेइतां तैन पुच्छू, ‘तुस झोझेरे देंते किजो खेड़ोरेथ?’ तैनेई जुवाब दितो, ‘अस केन्चे कम्मे नई लोरे।’ 7 तैनी तैन सेइं ज़ोवं, ‘तुस भी मेरे बागी मां गाथ ते कम केरा।’” 8 “डलोझी तैनी बागरे मालिके अपने मुन्शी सेइं ज़ोवं कि, ‘पेइले लगोरे मज़दूर ते पत्ती कम्मे लगोरे मज़दूर सेब्भन अक-अक दीनार दिहाड़ी दे।’ 9 ज़ैना पंचे बजेइं ओरे थिये, तैन भी अक-अक दीनार पूरी दिहाड़ी मैल्ली। 10 ज़ैना मज़दूर झोझां कम्मे लगोरे थिये तैन केरि बारी आई त तैनेई सोचू कि असन जादे मैलनेन, पन तैन भी अक-अक दीनार मैल्लो। 11 ज़ैखन दिहाड़ी मैल्ली, त तैस मालिकेरे बारे मां तैना एपू मांमेई बुराई केरने लगे। 12 ‘पत्ती लोरे मज़दूरेईं सिर्फ अक धैन्टो कम कियोरुए, ते तीं तैन भी असन बराबर ज़ैनेई सैरी दिहाड़ी कम कियां मुजुरी दिती।’ 13 तैनी

तैन मरां एककी जुवाब दितो, ‘दोस्त मीं तीं सेइं कोई बेइन्साफी नई कियोरी,
 कुन मीं तीं सेइं अक दीनार दिहैङरी गल न थी कियोरी? 14 एल्हेरेलेइ ज़ै तेरी
 मज़दूरीए तै टला ते च्छ्लो गा, ए मेरी मर्जीए कि बादे मां लग्गोरे मज़दूर भी
 एत्रे देई। 15 कुन मीं ए अधिकार नई कि अपने माले मरां जैन चैई तैन केरि?
 तू मीं पुड़ एल्हेरेलेइ ज़लतस कि अवं खुल्ले दिले सेइं देने बालोई?’ 16
 एल्हेरेलेइ बड़े मैन्हु जैना हुन्ना पेइले आन, तैना बादे मां पत्रोवं भोनेन, ते जैना
 हुन्ना पत्रोवं आन, तैना बादे मां पेइले भोनेन।” 17 यरुशलेम नगरे जो गांते
 बार यीशुए अपने 12 चेलन अलग नेइतां तैन सेइं ज़ोवं, कि तैस सेइं कुन
 भोने बालूए। 18 “हेरा, अस यरुशलेम नगरे जो च्छ्लोरेम, मैनेरु मटू प्रधान
 याजकां ते शास्त्री लोकां केरे हवाले कियूं गालू, ते तैना तैस मारनेरे काबल
 ठैरेले। 19 तैस गैर कौमां केरे हवाले केरेले, तैना मैनेरे मटुरी यानी मेरी हासी
 बनाले, ते तैस कोड़े बाहेले, ते फिरी तैस कूसे पुड़ चाढ़ले, ते अवं टलेइयोवं
 दिहाड़े फिरी ज़ींतो भोलो।” 20 तैखन जब्दी नंव्वेरे मैनेरां मटुं केरि अम्मा
 अपने मटुन सेइं साथी यीशु कां आई, ते तैस कां मिनत केरने लाई ते तैस
 करां किछ मगने लग्गी। 21 तैने तैस पुच्छू, “तीं कुन लोड़ते?” तैसां ज़ोवं,
 “वचन दे, कि मेरां इन्ना मटुं तेरे राज्जे मरां अक तेरे देइने पासे त होरु तेरे
 बाएं पासे बिश्वन।” 22 पन यीशुए तैन सेइं ज़ोवं, “तुस न जानथ कि कुन
 मगने लग्गोरेथ! ज़ेन्चरे दुख अवं झ़लने बालोई, कुन तुस झ़ेल्ली सकतथ?
 तैनेई जुवाब दितो, हाँ झ़ेल्ली सकतम।” 23 तैनी तैन सेइं ज़ोवं, “तुस मेरे
 ज़ेरो दुख झ़ल्लेले, पन एन मेरु कम नई कि एककी देइने पासे ते होरि बाएं
 पासे बिशैली, ए ठार ज़ेसेरे लेइ मेरे बाजेरे तरफां रखोरीए तै तैसेरे लेइए।”
 24 एन शुन्तां होरि दश चेलेई तैन दूझ ढ्लान पुड़ नराज़ भोइ जे। 25 यीशुए
 अपने सारे चेले नेड़े कुजेइतां, तैन सेइं ज़ोवं, “होरि कौमां केरे प्रधान अपने
 लोकन पुड़ राज़ केरतन, ते तैन केरे मालिक तैन पुड़ अधिकार रखतन। 26
 पन तुसन मां एरु न लोड़े भोरु, बल्के तुसन मां जै बड़ो बन्नो चाते, तै सेब्भी
 केरो सेवक बने। 27 जै कोई तुसन मां प्रधान बन्नू चाए, तै सेब्भी केरो गुलाम
 बने, 28 ज़ेन्चरे कि मैनेरु मटू एल्हेरेलेइ नई ओरुए कि कोई तैसेरी सेवा केरे,
 बल्के एल्हेरेलेइ कि सेवा केरे, ते अपनि जान बड़े लोकां केरे छुटकारेरे लेइ
 दे।” 29 जैखन यीशु त तैसेरे चेले यरीहो नगरे मरां च्छ्लोरे थिये, त बड़े लोक

तैस पत्पती चले। 30 दूर्द काने बत्ती मां बिशोरे थिये, तैनेई एन शुनू कि यीशु
इस बत्तां चलोरोए, त तैना चिन्डां मारने लगे, “हे प्रभु दाऊदेरा मट्टां असन
पुड़ दया केर।” 31 लोक तैन झिङ्कने ते ज्ञाने लगे कि चुप राथ, पन तैना
मना चिन्डां मारने लगे, “हे प्रभु, दाऊदेरा मट्टां असन पुड़ दया केर।” 32
तैखन यीशु खेडोव ते तैन कुजेइतां पुच्छने लगे, “तुस कुन चातस अवं तुशे
लेइ केरि?” 33 तैन कानेई जुवाब दित्तो, “हे प्रभु अस चातम कि इश्शी
एछळन लौ एज्जो।” 34 यीशुए तैन पुड़ बड़ो तरस अव, ते तैनी तैन केरे
एछळन पुड़ हथ रख्खो ते तैना लहने लगे, ते दुझे काने यीशु पत्ती चले जे।

21 जैखन यीशु ते कने तैसेरे चेले यरुशलेम नगरे नेडे पुजे, त यीशुए
जैतून पहाड़े पुड़ बैतफगे मरां अपने दूर्द चेले एन ज्ञोइतां अग्रोवं भेजे। 2
“अपने सामने उस ड्लव्वे मां गाथ, ते तैड़ी पुजेले, त तुसन अक गधी बंधोरी
मैलनिये, ते तैस साथी तैसेरो बच्चो भी भोनोए, तैस खोलतां इड़ी मीं कां
आनां।” 3 अगर तुसन कोई पुच्छे, त तुस ज्ञोइयथ, कि प्रभुए एसेरी ज़रूरत
आए, ते तै लूशी तैस वापस भेजेलो। 4 इन सब किछ एलहेरेलेइ भोवं, कि
नेबे जैन वचन ज़ोरु थियू, तैन पूरु भोवं, 5 “सिय्योनेरे कुइये सेइ ज़ोथ, कि
तेरो राज्ञो तीं कां ओरोए, ते तै बड़ो हलीमी ते तै गैधी पुड़ चेढ़तां ओरोए,
बल्के गधेरे बच्चे पुड़।” 6 चेले चले जे ते ज़ेन्नरे यीशुए ज़ोरु थियू, तैनेई
तेन्नरे कियूं। 7 तैनेई तै गधी ते तैसारो बच्चो आनो, ते तैन पुड़ अपना लिगड़ां
छळां, ते यीशु तैस पुड़ चेढ़तां चलो। 8 बड़े लोकेई अपना लिगड़ां बत्ती मां
बिछां, ते किछेई बुट्टा केरे डाल केटतां बत्ती मांमेइ छळोरे थिये। 9 ते तैना
लोक जैना यीशु सेइ साथी अग्री-अग्री ते पत्ती-पत्ती चलोरे थिये, तैना नहरे
देते थिये, “दाऊदेरे मट्टेरी होशाना (तारीफ), धने तै, जै प्रभुएरे नंवे सेइ
एइते, स्वर्ग मां होशाना।” 10 जैखन यीशु यरुशलेम नगरे मां पुजो, त सारे
नगर मां हलचल मेचि जेर्द, ते लोक ज्ञाने लगे, “ए कौने?” 11 लोकेई ज़ोवं,
“ई गलीलेरे नासरत नगरेरो नबी यीशुए।” 12 यीशुए परमेश्वरे मन्दरेरे अंगने
मां गेइतां, जैना बुपारी बुपार केरते थिये सब तैट्टां कढे, तैनी सुनारां केरि
दुकान ते कबूतर बेच्चने बालां केरि ठारां ट्लोड़ी। 13 ते तैनी ज़ोवं, “लिखोरुए
कि मेरे मन्दरे जो प्रार्थना केरनेऱ घर ज्ञोले, पन तुसेई त ए डैकू केरो अहो
बनेवरोए।” 14 तैखन काने ते टोंटे मन्दरे मां यीशु कां आए, ते तैनी तैना सब

बज़्झाए। 15 पन ज़ैखन मन्दरेरे प्रधान याजक ते शास्त्री लोक एना कम्मां ज़ैना तैनी कियां, ते मटुन मन्दरे मां दाऊदेरी औलादरी होशाना (तारीफ) ज़ोते लाए, तैन बहु सरक आई। 16 ते तैस सेइं ज़ोने लगे, “तू शुन्ने लोरोस कि एना कुन ज़ोने लोरेन?” यीशुए तैन सेइं ज़ोवं, “हाँ अवं शुन्ने लोरोई, तुसेई कधे नई पढ़ेरु कि, ‘तीं मटुन ते दुद्ध पीते बच्चन करां भी तीं अपनि पूरी तारीफ कमाई?’” 17 तैखन तै तैन शैरतां नगरे बेझरोवं चळो जेव, ते बैतनिय्याह नगरे मां जेव ते तैडी रात गुज़ारी। 18 झोझां ज़ैखन यीशु नगरे मांजो वापस ओरो थियो, त तैस ढलुख लग्गी। 19 बत्तारे ढलेखी अक फ़ेगेरो बूट लाव ते तैस कां जेव, ते पट्टां केरे अलावा तैस पुड़ किछ न लाव, तैनेई तैस जो ज़ोवं, “कधे भी तीं पुड़ फल न लगेलो ते तैखने तै बुट शुक्की जेव।” (aiōn g165) 20 एन हेरतां चेले हैरान भोइतां पुछ्ने लगे, “ई फ़ेगेरो बुट अकदम केन्चरे शुक्की जोरोए?” 21 यीशुए जुवाब दित्तो, “अवं तुसन सेइं सच्च ज़ोताई कि अगर तुस विश्वास रखथ, ते शक न केरथ, ज़ैन फ़ेगेरे बुटे सेइं भोवं तैन तुस भी केरि सकतथ, बल्के उस पहाड़े जो ज़ोले कि इटुं उखड़तां समुन्द्रे मां गा, त तैने भोलू।” 22 अगर तुश्शो विश्वास पक्कोए त ज़ैन किछ तुस प्रार्थनाई मां मगेले, तैन तुसन मैल्ली गालू? 23 यीशु मन्दरे मां शिक्षा देने लोरो थियो, त प्रधान याजक, ते लोकां केरे बुजुर्गेई तैस पुच्छू, तू एन कम कसेरे अधिकारे सेइं केरतस? ते तीं एन कम कैनी दित्तोरोए?

24 यीशुए तैन जुवाब दित्तो, “अवं भी तुसन अक गल पुछताई, अगर तुस तैसेरो जुवाब देले, त अवं भी ज़ोइलो कि अवं एन कम कसेरे अधिकारे सेइं केरताई। 25 यूहन्नारो बपतिस्मो कोटुं थियो? स्वर्गेर तरफां थियो, या की इन्सानेरी तरफां थियो? तैना एप्पू मांमेइं गलबात केरने लगे, कि अगर अस ज़ोतम कि, स्वर्गेर तरफां थियो, त फिरी तैनी ज़ोनौए कि फिरी तुसेई तैसेरु याकीन की नई कियेरु? 26 पन अगर अस ज़ोतम कि, ‘इन्सानेरी तरफां थियो,’ त लोकां केरो भी डरे किजोकि लोक यूहन्ना नबी मन्ते थिये।” 27 एल्हेरेलेइ, तैनेई यीशुए जुवाब दित्तो, “अस किछ न ज़ानम।” तैनी भी तैन सेइं ज़ोवं, “अवं भी तुसन सेइं न ज़ोई कि अवं इन कम्मां कसेरे अधिकारे सेइं केरताई।” 28 पन तुस इस मिसालरे बारे मां कुन सोचतथ? केन्वी मैनेरां दूई मट्ठां थियां, तैनी बहु मट्ठे कां गेडतां ज़ोवं, “अज दाछरी बागी मां गा ते कम

केर।” 29 तैनी जुवाब दित्तो, “अवं न गई।” पन बादे मां पशतेइतां चलो जेव।

30 फिरी बाजे होरि मटु कां भी गेइतां एने ज़ोवं, तैनी जुवाब दित्तो, “अच्छा खरी गाताई।” पन जेव नन्ना। 31 “एन ठुने मरां केनि अपने बाजेरो हुक्म मन्नो?” तैनेई जुवाब दित्तो बडु हुक्म मन्नो, यीशुए तैन सेइं ज़ोवं, कि अवं तुसन सेइं सच्च ज़ोताई, कि चुंगी धिन्ने बाले ते बदचलन कुआन्शां तुसन करां पेइले परमेशरेरे राज मां दाखल भोली। 32 अवं इन ज़ोताई, यूहन्ना बपतिस्मो देनेबाले तुसन ज़ोवं, कि धार्मिकतारी ज़िन्दगी केन्चरां ज़ीनीए पन तुसेई तैसेरु विश्वास कियूं एन हेरतां भी तुसेई पापन करां मन न फिराव ते तैस पुड़ विश्वास न कियो। 33 अक होरि मिसाल शुना, एककी ज़मीनदारे अक दाढ़री बाग लाई ते तैसेरे चेव्रे पासन बाड़ दित्तो, ते दाढ़रो रस कढनेरे लेइ अक हौवज्ज बनावं, ते तैस बागरी हेरेगेश केरनेरे लेइ अक उच्ची कूड़ी बनाई ते फिरी तै काशत केरनेबालन ठेके पुड़ देइतां कोन्च दूर प्रदेशे जो चलो जेव। 34 ज़ैखन दाढ़ ट्लोडनेरो मौको अव त तैनी अपनो हिस्सो नेनेरे लेइ अपने नौकर तैन ठेकेदारन कां भेजे। 35 ते ठेकेदारेइं तैसेरे नौकर कोई झूसो कुटो कोई मारो ते केन्वी जेर्ह घोड़ेई दित्ती। 36 फिरी तैनी होरे नौकर भेजे ज़ैना पेइलन करां जादे थिये, पन ठेकेदारेइं तैन सेइं भी तेरहो ज़ेरो सलूख कियो। 37 आखर्कार तैनी अपनू मटू तैन कां भेजू, ते सोचू कि मेरे मटुरो त लिहाज़ केरेले। 38 “पन ज़ैखन ठेकेदारेइं तैसेरु मटू लाव, त तैना एपू मांमेइं मुशोरो केरने लगे, कि एज्जा एस सेवां मारम ते एसेरी बागी पुड़ कब्ज़ो केरम।” 39 “तैखन तैनेई तैन मटू ट्लाव ते बागारे बेद्दर शेरी छड्हु। 40 एल्हेरेलेइ ज़ैखन बागरो मालिक एपू एज्जेलो, त तैन ठेकेदारन सेइं केरो सलूख केरेलो?” 41 तैनेई जुवाब दित्तो, तै तैन बुरन, बुरे तरीके सेइं मैरतां बागरो ठेको होरि ठेकेदारन देलो, ज़ैना मौके पुड़ तैसेरो हिस्सो तैस देन। 42 यीशुए तैन सेइं ज़ोवं, “तुसेई पवित्रास्त्रे मां कधे नई पढ़ेरु, ज़ै घोड़ मिस्ट्रेई रद्दी कियोरो थियो, तैए कूनेरो घोड़ भोलो, एन कम परमेशरे कियोरुए, ते इश्शी नज़री मां एन आजीब आए?” 43 एल्हेरेलेइ अवं तुसन सेइं ज़ोताई, कि परमेशरेरु राज तुसन करां निव गालू, ते एरी कौमी कां दितू गालू जै वक्ते पुड़ तैस फल दे। 44 ते ज़ै कोई इस घोड़े पुड़ बिछुड़ेलो त तैसेरे टुकड़े-टुकड़े भोइ गाले, पन जै एस उन्ढो

बिछुड़ेलो त तैस पइतां छडेलो। 45 प्रधान याजक ते फरीसी लोकेर्द्य यीशुएरी
ए मसाल शुन्तां सेमझी जे, कि यीशु एन गल्लां इश्शो बारे मां ज़ोने लोरोए।
46 तैनेर्द्य यीशु ट्लानो चाव, पन लोकन करां डरते थिये किजोकि तैना यीशु
नबी मन्ते थिये।

22 यीशु फिरी मसाल देइतां ज़ोने लगो। 2 “स्वर्गेऱु राज़ एककी राज़ेरु
ज़ेरुए, ज़ैनी अपने मट्टोरे इला बनाव। 3 ते अपने नौकर भेजे कि तैना लोकन
ज़ैन जेर्द इलाएरी धाम बनोरी थी, तैन कुजान पन तैना न आए। 4 तैखन तैनी
अपने नौकर एन ज़ोइतां भेजे, कि ज़ैन जेर्द इलाएरी धाम बनेवरीए, तैन ज़ोथ,
रोट्टी बनोरीए ते मीं बडे-बडे जानवर कट्टोरन, ते सब किछ तियार भोरुए, ते
इलाएरी धामी मां शामल भोथ। 5 पन तैनेर्द्य ध्यान न दित्तू ते कोई परवाह न
की, कोई अपने ऊडारे मां च़लो जेव, ते कोई अपने कारोबारे मां लगो ते कोई
कोरां च़लो जेव। 6 किछेर्द्य तैसेरे नौकर ट्लेइतां तैन तैना बेइज़त किये, ते
जानां भी मैरी छङ्गे। 7 ज़ैखन राजे एन शुनू त राजे बड़ी सरक आई, ते तैनी
अपनि फौज भेजतां तैना कातली मैरी छङ्गे ते तैन केरां नगरां फुके। 8 तैखन
तैनी अपने नौकरन सेइं ज़ोव, इलाएरी धाम तियार आए, पन ज़ैन कुजोरे
थिये तैन एस काबल नई। 9 एल्हेरेलेइ तुस हर पासे गाथ ते ज़ेत्रे तुसन
मैलतन, तैना सब इरां कुजाथ। 10 तैखन तैना नौकर च़ले जे ते हर पासे
गेइतां ज़ेत्रे खरे बुरे तैन मैल्ले, सब अकोटु इलाए मां आने ते मेहमानेइं सेइं
घर भेरतां भोवं। 11 “ते राजो मेहमान सेइं मिलने अन्तर अव, त तैसेरी नज़र
एककी मैन्हु पुड़ पेर्द्य ज़ै इलाए मां इलेरां लिगड़ां लेइतां न थियो ओरो।” 12
राजे तैस पुच्छू, हे दोस्त, तू इलाएरे लिगड़न मां की नई ओरो? पन तैने किछ
न ज़ोवं। 13 “एस गल्ली पुड़ राजे अपने नौकरन सेइं ज़ोव, ‘एसेरे हथ पाव
बेंधतां बेझर आंधरे मां छङ्गा ज़ैड़ी ए लेरां देंतो राए, ते दंत चापतो राए।’ 14
किजोकि परमेशरे हमेशारे ज़िन्दगरे लेइ त बड़े कुजोरेन पन चुनोरे थोड़ेन।”
15 तैखन फरीसी लोक तैटुं च़ले जे, ते एप्पू मांमेइं मुशोरो केरने लगे एस
केन्वरे गल्लन मां फसाम। 16 एल्हेरेलेइ तैनेर्द्य अपने किछ चेले हेरोदेस राजेरे
लोकन सेइं साथी यीशु कां भेजे, ते तैनेर्द्य ज़ोव, “हे गुरु अस ज़ानतम कि तू
सच्चोस, ते परमेशरेरी बत सच्चैइं सेइं शिखालतस ते कोन्चेरी परवाह न
केरस किजोकि तू मैन्हु केरु तुतर हेरतां गल्लां न केरस। 17 एल्हेरेलेइ असन

जो, तू कुन सोचतस? महाराजे जो चुंगी देनी जेइजे की नई?" 18 यीशु तैन
 केरि चाल सेमझतां ज़ोवं, "हे पाखंडी लोकव मीं किजो अज़मातथ? 19 ज़ै
 सिको चुंगरे लेइ देतथ तैस मीं हिराथ, तैनेई अक दीनार तैस कां आनो। 20
 यीशुए तैन पुच्छू, इस पुड़ कसेरी शकल ते कसेरू नवं लिखोरुए?" 21
 तैनेई जुवाब दितो महाज़ेरु, तैखन तैनी तैन सेइं ज़ोवं, "ज़ैन महाराज़ेरुए
 तैन महारजे जो देथ, ते ज़ैन परमेशरे ए तैन परमेशरे जो देथ।" 22 तैना
 एन शुन्तां हैरन रेइजे, ते तैस तैड़ी छेडतां च़ले जे। 23 तैस्से दिहैड़ी किछ
 सदूकी लोक ज़ैना ज़ोते थिये कि मरनेरां बाद कोई ज़ींतो नई भोनो, तैनेई तैस
 पुच्छू, 24 "हे गुरु मूसे ज़ोरुए कि, 'अगर कोई मैन्हु बेऔलाद मेरि गाए, त
 तैसेरो ढला तैसेरी कुआन्शी सेइं ढला बनाए ताके अपने ढलाएरे लेइ औलाद
 पैदा केरे।' 25 इश्शे इड़ी सत ढला थिये, पेइले ढला बनेइतां मेरि जेव, तैस
 औलाद न थी तैनी अपनि कुआन्श अपने ढलाएरे लेइ छेह्ती दित्ती। 26 ए वजा
 आए तैसेरे दुइयोवं ते टलेइयोवं भी एन्चरे कियूं बल्के सत्ते ढलान सेइं एन्ने
 भोतू राऊं। 27 आखकरात तै कुआन्श भी मेरि जेर्ई। 28 हुनी ज़ो तै कुआन्श
 मुड़दन मरां ज़ींते भोनेरे दिहाड़े तैन सत्ते ढलान मरां कसेरी कुआन्श भोली?
 किजोकि तै सेब्ही केरि कुआन्श बनोरी थी।" 29 यीशुए तैन जुवाब दितो,
 "तुस न पवित्रशास्त्र ते न परमेशरेरी शक्ति ज़ानथ, ते एस्से वजाई सेइं तुस
 टेपलोरेथ। 30 किजोकि ज़ींते भोनेरां पत्ती तैना ढला न बनाले, पन तैना स्वर्गे
 मां परमेशरेरे स्वर्गदूतां केरे ज़ेरे भोनेन।" 31 "पन मुड़दन मरां ज़ींते भोनेरे
 बारे मां कुन तुसेई इन वचन नई पढ़ेरु ज़ैन परमेशर तुसन सेइं ज़ोवं, 32 'अवं
 अब्राहमेरो परमेशर, ते इसहाकेरो परमेशर ते याकूबेरो परमेशर आई?' तै
 मुवोरां केरो नई बल्के ज़ींतां केरो परमेशरे।" 33 लोक तैसेरी ए शिक्षा शुन्तां
 हैरन रेइजे। 34 ज़ैखन फरीसी लोकेई एन शुनू कि तैनी सदूकी केरू आशी
 बंद कियोरुए, त तैना तैस कां सब अकोट्टे भोए। 35 तैन मरां अक शास्त्री
 तैस अज़मानेरे लेइ यीशुए पुच्छू। 36 "हे गुरु, मूसेरे कानूने मां सेब्बन करां
 बड़ो हुक्म कौ आए?" 37 तैनी ज़ोवं, "तू परमेशरे अपने प्रभु सेइं अपने सारे
 दिले सेइं ते अपनि सैरी जानी सेइं ते अपनि सैरी अकली सेइं प्यार केरा। 38
 सेब्बन करां बड़ो ते खास हुक्म ईए। 39 एसेरो ज़ेरो ईए, 'अपने पड़ोसी
 सेइं अपने बराबर प्यार केर।' 40 इन्ना दूर्हु हुक्म मूसेरे कानून ते नेबी केरो

आधारे।” 41 जैखन फरीसी लोक भी तैड़ी जम्हां भोइजेइ, त यीशुए तैन पुच्छू। 42 “मसीहेरे बारे मां तुश्शो कुन खियाले, कि तैन केसेरु मट्टूए?” तैनेई जुवाब दित्तो, “दाऊदेऱु मट्टू।” 43 यीशुए तैन सेइं ज़ोवं, “फिरी दाऊद आत्माई मां तैस जो प्रभु किजो ज़ोते?” 44 “प्रभुए मेरे प्रभु सेइं ज़ोवं, मेरे देइने पासे विश ज़ां तगर अवं तेरे दुश्मन तेरे पावन हैठ न ढलेन्चर्ई। 45 बस्सा, अगर दाऊद तैस जो प्रभु ज़ोते त तैन तैसेरु मट्टू केन्चरे सेइं भोइ सकते?” 46 तैन मरां केन्चे भी एक्की गल्लरो जुवाब न देइ बटो। पन तैस वर्करे बाद फिरी कोन्ची तैस पुच्छनेरी हिम्मत न भोइ।

23 तैखन यीशुए बड़े लोकन सेइं ते अपने चेलन सेइं एन ज़ोवं। 2 “शास्त्री ते फरीसी लोक मूसेरो कानून समझाने बालेन। 3 एलहेरेलेइ जैन किछ तैना तुसन ज़ोतन तैन तुस केरा ते मेन्ना, पन तैन केरां ज़ेरां कम्मां न केरा, किजोकि तैना ज़ोने त ज़ोतन पन केरन नन्ना। 4 तैना अपने मेझीं सेइं कानून बनातन ज़ैना लोकां केरे लेइ मन्ने मुश्किल भोतन, पन एप्पू अपने कानूने मन्नेरी कोशिश भी न केरन। 5 तैना ज़ैन किछ केरतन सिर्फ मैनन् हिरानेरे लेइ केरतन, तैना अपने कुपाए ते पैखड़न पुड़ पवित्रशास्त्रेरे वचन लिखतां बहु-बहु जन्नां केरे ज़ेरे बन्धतन, ते अपने चोगन पुड़ लम्मो गुच्छा लातन (ताके लोक समझान तैना बड़े धर्मी आन)। 6 तैना धामन मां खास ठैरी बिशनू चातन, ते प्रार्थना घरे मां खास कुर्सन पुड़ बिशनू चातन। 7 ते तैना चातन कि लोक तैनन् जो बज़ारन मां नमस्कार ज़ोन, ते तैनन् जो गुरु ज़ोन। 8 पन तुस अपने आपे जो गुरु न जुवेइयथ, किजोकि तुश्शो अक्के गुरु आए, ते तुस सब ढलां केरे ज़ेरे बराबर आथ। 9 ते दुनियाई मां केन्ची जो (आत्मिक) बाजी न ज़ोइयथ, किजोकि तुश्शो अक्के बाजी आए ज़ै स्वर्गे मां आए। 10 ते न केन्ची जो मालिक जोइयथ किजोकि तुश्शो अक्के मालिके ज़ै मसीह आए। 11 पन ज़ै तुसन मां बहु भोनू चाते, त तै तुश्शो सेवक बने। 12 ते ज़ै कोई अपनो आप बहु बनानेरी कोशिश केरते, त तै निकड़ो बनाव गालो, ते ज़ै कोई अपनो आप निकड़ो बनाते त तै बहु बनाव गालो।” 13 तैखन यीशुए ज़ोवं, “हे पाखंडी शास्त्री ते फरीसी लोकव, तुसन पुड़ अफ्रसोस, किजोकि तुस स्वर्गेर राज्जे मां लोकन दाखल भोने न देथ, किजोकि न तुस एप्पू दाखल भोथ, ते न होरन दाखल भोने देथ। 14 हे पाखंडी शास्त्री ते फरीसी लोकव

तुसन पुड़ अफ़सोस, तुस विधवा कुआन्शां केरे घरन लुटथ, ते लोकन हिरानेरे लेइ लेम्मी-लेम्मी प्रार्थना केरतथ, तुसन जादे सज्जा मैलेली।” 15 “हे पाखंडी शास्त्री ते फरीसी लोकव, तुसन पुड़ अफ़सोस! तुस अक मैन्हु अपने धर्मे मां आन्नेरे लेइ बड़े दूर-दूर गातथ, ते जैखन तै तुश्शी शिक्षा मन्ते त तैस एपू करां दुगानो नरके मां गनेरे काबल बनातथ।” (Geenna g1067) 16 “हे बत हिराने बाले कानाव, तुसन पुड़ अफ़सोस, कि तुस ज़ोतथ कि अगर कोई मन्दरेरी कसम केरे त कोई हर्ज़ नई, पन अगर मन्दरेरे सोन्नेरी कसम केरे, त तैसेरी कसमारो पाबंद भोलो। 17 हे बेवकूफ ते कानाव, बडू कुन आए सोन्नू या मन्दर, ज़ेसेरी वजाई सेइं सोन्नू पवित्र समझू गाते?” 18 “तुस ज़ोतथ कि अगर कोई बलिदान चाढ़नेरे ठारारी कसम केरे, त कोई हर्ज़ नई, पन च़ाढ़ोरी चीज़री कसम केरे त तैसेरो पाबंद भोलो। 19 हे कानाव! बडू कुन आए, च़ाढ़ोरी चीज़ या बलिदान चाढ़नेरे ठार ज़ेसेरी वजाई सेइं च़ाढ़ोरी चीज़ पवित्र समझी गाचे? 20 अगर ज़ै कोई बलिदान चाढ़नेरे ठारारी कसम केरते, त तै सेब्ही च़ाढ़ोरी चीज़ां केरि कसम केरते। 21 ज़ै कोई मन्दरेरी कसम केरते त तै मन्दरे मां रानेबाले परमेशरेरी कसम केरते। 22 ते ज़ै कोई स्वर्गेरी कसम केरते, तै परमेशरेरे तखतेरी ते तैस पुड़ बिशने बालेरी कसम केरते।” 23 “हे पाखंडी शास्त्री ते फरीसी लोकव, तुसन पुड़ अफ़सोस, तुस पुतनेरो ते सोंफेरो ते ज़ीरो दशोवं हिस्सो त देतथ, पन मूसेरे कानूनेरी खास गल्लां ज़ेन्चरे इन्साफ केरनो, दया केरनि ते ईमानदार भोनू शारोरुए, ज़रुरी थियूं तुस एन भी केरते राथे ते तैन भी न शारेथे। 24 हे बत हिराने बाले कानाव! तुस मश्शो त छानतथ पन सध्थो ऊंट निगलतथ।” 25 “हे पाखंडी शास्त्री ते फरीसी लोकव, तुसन पुड़ अफ़सोस, तुस कटोरो ते कने थाली बेइरमेई खूब मांज़तथ पन अन्त्रमेई लालच ते बे सबरीए भेरतांए।” 26 “हे काने फरीसाव पेइले कटोरो ते थाली अन्त्रमेई मांज़ा, ते फिरी बेइरमेई भी साफ भोए।” 27 “हे पाखंडी शास्त्री ते फरीसी लोकव तुसन पुड़ अफ़सोस, तुस तैन कब्रां केरे ज़ेरेथ ज़ैन बेइरमेई त सफैदीए ते बेड़ि रोड़ी लेहीयोचन, पन अन्त्रमेई मुड़दां केरि हड्डी ते सब किसमेरी गेन्दगी सेइं भेरतन। 28 एन्चरे तुस बेइरमेई लोकन बड़े धर्मी लेइयोतथ, पन अन्त्रमेई दुनियारे पाखंडे ते अधर्मे सेइं भेरतथ।” 29 “हे पाखंडी शास्त्री ते फरीसी लोकव तुसन पुड़ अफ़सोस, किजोकि तुस

नेबी केरे आसथान सजातथ ते धेर्मी लोकां केरि कब्रां बनातथ। 30 ते ज़ोतथ कि, ‘अगर अस अपने दादे-पड़दादां केरे ज़माने मां भोये त नेबन मारने मां तैन केरु साथ न देये।’ 31 एन्वरे तुस एप्पू मन्तथ कि तुस नेबी केरे कल्ल केरनेबालां केरि औलादी मरां आथ। 32 हुनी तुस अपने दादे-पड़दादां केरे पापेरे घड़ो भरते राथ।” 33 “हे ज़हरीले सप्पां केरे ज़ेरे बच्चाव! तुस नरकेरी सजाई करां केन्वरे बच्चेले? (Geenna g1067) 34 एल्हेरेलेइ हेरा अवं नेबन ते अक्लमन्दन ते शास्त्री लोकन तुसन कां भेजताई, तुस तैन मरां किछन कल्ल केरेले, ते किछन कूसे पुड़ चाढ़ेले, ते किछन अपने प्रार्थना घरे मां कोड़ेइं सेइं बाले, ते नगरे-नगरे मां तैन मारनेरे लेइ तैन पत्ती लगगोरे राले। 35 एल्हेरेलेइ सारे धेर्मी केरो कल्ल जै इस धेरती पुड़ भोरोए, तैन केरि सज्जा तुसन पुड़ एज्जे, धर्मी हाबिलेरे कल्ले करां लेइतां, ते बिरिक्याहरे मटु जकर्याहरे कल्ले तगर जै तुसेई मन्दरेरे ते बलिदान केरनेरे ठारारे मझाटे मन्दरेरे अंगने मां कल्ल कियोरो थियो। 36 अवं तुसन सेइं सच्च ज़ोताई कि इस ज़मानेरे लोकन एना सैरी गल्लां केरे सज्जा मैलनी।” 37 फिरी यीशुए ज़ोवं, “हे यरुशलेम नगरेरे लोकव, हे यरुशलेम नगरेरे लोकव, तुसेई केत्रे नबी कल्ल किये जैना बड़े पेइले तुसन कां आए, ते जैना तुसन कां भेजे तुसेई तैन घोड़ेई बेई, मीं बड़े बार सोचू कि तेरे बच्चन अकोटु केरि ज़ेन्वरे कुकड़ी अपने बच्चन अपने फंगन हैठ रखचे पन तुस राजी न भोए। 38 हेरा तुश्शू घर तुश्शे लेइ बेरान भोइ गाते। 39 किजोकि अवं तुसन सेइं सच्च ज़ोताई, कि तुस मीं हुन्ना करां तैस दिहाड़े तगर कधे न लेई सकेले, ज़ांतगर मेरे बारे मां इन न ज़ोले, ‘तैसेरी तारीफ भोए जै प्रभुएरे अधिकारे सेइं एइते।’”

24 जैखन यीशु मन्दरे मरां निस्तां च्लोरो थियो, ते तैसेरे चेले तैस कां आए, ताके तैस मन्दरेरे रोड़े-रोड़े भवन हिरान। 2 तैनी तैन सेइं ज़ोवं, “कुन तुस एन सब किछ हेरने लोरेथ? अवं तुसन सेइं सच्च ज़ोताई कि इड़ी कोई घोड़े पुड़ घोड़ बाकी न रालो, जै बछोड़ो न गालो।” 3 जैखन तै जैतून पहाड़े पुड़ बिशोरो थियो, त तैसेरे चेले अलग ज़ेरे तैस कां एइतां तैस सेइं ज़ोने लगे, “असन ज़ो कि एन गल्लां केइस भोनिन? ते तेरे एजनेरो ते दुनियारो अन्त भोनेरो कुन निशान भोनोए?” (aiōn g165) 4 यीशुए तैन जुवाब दित्तो, “खबरदार राथ, कोई तुसन न टपलाए! 5 किजोकि बड़े मेरे नंके सेइं एजनेन ते तैनेई

जोनुए कि, ‘अवं मसीह आई,’ ते तैनेई बडे लोक टपलानेन। 6 तुस लड़ाई ते
 लड़ै केरि अफवाह शुनेले, खबरदार डेरथ नन्ना, किजोकि एन गल्लां ज़रुरी
 भोनिन, पन तैस वक्ते खातमों नई भोनो। 7 किजोकि कौमी पुड़ कौम, ते
 राज़जे पुड़ राज़ चढ़हाई केरेलू, ते ठारी-ठारी काल पेलो, ते भुंजल एज्जेले। 8
 मुसीबतां केरि शुरुआत भी एन्ने गल्लेई सेइं भोनीए। 9 तैखन जैना तुश्शे
 खलाफन तैना तुसन ट्लेइतां बड़ी सखत सज्जा देले, ते कत्ल केरेले, ते मीं पुड़
 विश्वास केरनेरे वजाई सेइं, सैरी कौमां केरे लोक तुसन सेइं बैर रखेले। 10
 तैखन बडे लोक मीं पुड़ विश्वास केरनो शारेले, एककी होरि ट्लुवाले, ते एप्पू
 मांमेइं भी बैर रखेले। 11 ते बडे झूठे नबी दुनियाई मां निसनेन ते बडे लोक
 टपलानेन। 12 अर्धम बधने सेइं बडे लोक एप्पू मांमेइं प्यार केरनो शारेले।
 13 पन ज़ै कोई आखरी दम्में तगर मीं पुड़ विश्वास केरेलो, त तैस्से मुक्ति
 मैलनीए। 14 ते परमेश्वरे राज़जेरी ई खुशखबरी दुनियारे हर पासे शुनाई
 गाली, ताके सैरी कौमां केरे लोकन मौको मैले कि तैना इस कबूल केरन,
 तैखन दुनियारो खातमों भोलो।” 15 “ज़ैखन तुस तैस उज़ड़ाने बाली भिट्टी
 चीज़ी, ज़ेसेरे बारे मां दानिय्येल नेबे ज़ोरु थियूं पवित्र ठैरी खड़ी लाएले, (त
 पढ़नेबालो भी समझे)। 16 कि जैना तैस मौके यहूदिया इलाके मां भोले तैना
 पहाड़न पुड़ जो नश्शन। 17 ते जैना लाए पुड़ भोन त तैना कोई चीज़ नेने
 अन्तर न एजन। 18 ते जै मैन्हु ऊड़े मां भोलो, त तै लिंगड़ां नेने अन्तर न
 एज्जो।” 19 तैन दिहाड़न मां जैना दोज़ींती त दुद्ध पियाती कुआन्श भोली, तैन
 केरे लेइ अफसोस! 20 “ते प्रार्थना केरा कि तुसन हिंवतडे या आरामेरी
 दिहाड़ी नश्शनू न पे। 21 किजोकि तेइस एत्री बड़ी मुसीबत भोली, ज़ेरि
 दुनियारे शुरु करां अज़ तगर नई ओरी, ते न कधी एज्जेली। 22 अगर तैन
 दिहाड़ां केरि तैथात घटेवरी न भोथी, त कोई प्राणी न थियो बच्चानो, पन
 चुनोरां केरे लेइ तैना दिहाड़े घटेवरेन। 23 अगर कोई तुसन सेइं ज़ोए कि,
 ‘तक्का, मसीह इड़ी आए! या उड़ी आए!’ त तुस विश्वास न केरथा।” 24
 “किजोकि झूठे मसीह ते झूठे नबी दुनियाई मां निसनेन, ते तैनेई निशान ते
 बड़े-बड़े चमत्कार हिरानेन, ते भोइसखे त चुनोरे लोक भी टेपलोनेन। 25 हेरा,
 मीं तुसन सैरी गल्लां भोनेरे पेइले ज़ोरिन। 26 अगर कोई तुसन सेइं ज़ोए कि,
 ‘हेरा तै जंगले मांए,’ त तुस बेइर न गेड्यथ; हेरा, तै घरे मांए,’ त तुस विश्वास

न केरथ।” 27 “किजोकि ज़ेन्चरे बिजली पूर्वें, पछमें तगर चमकतीए एन्चरे
मैनेरु मटू भी एज्जेलू।” 28 “जैड़ी ज़िग्ग भोते तैड़ी इल्लां जम्हां भोइचन।”
29 “तैन दिहाड़ा बाद दिहाड़ो कालो भोइ गालो, त चाँदनी लौ न देली,
त कने अम्बरें तारे बिछूङ्गे लगेले, त अम्बरेरी सैरी शेक्ति हिलेइ गेली।
30 तैखन मैनेरे मटुरो निशान अम्बरे मां लेइहोनोए, ते दुनियारी सैरी कौमां
छाती पिटूली, ते मैनेरु मटू अम्बरे मरां बिदलारी पुड़ बेड़ि शेक्ति ते महिमा
सेइं एइते लाएले। 31 ते तै अपने स्वर्गदूत ते नड़शिंगेरी बड़ी आवाज़ी सेइं
साथी भेज़ेलो, ते तैसेरे चुनोरे लोकन चेव्रे पासन अम्बरेरे एककी पासेरां होरि
पासे तगर सेभन जम्हां केरेले।” 32 “फ़ेगेरे बुटे करां ई सबक शिखा, ज़ेरे
तैसेरे डाल नर्म भोतन ते पट्लां निसतन त तुस बुझतथ कि गेर्मेरो मौसम
एजनेबालो आए। 33 एसेरो ज़ेरो, जैखन तुस एना गल्लां, जैना मीं ज़ोई, भोते
हेरेले, त तुस बुज़ज़ी छङ्गा कि मैनेरु मटू, यानी अवं बड़े नेड़े पुज़ज़ोरोई। 34
अवं तुसन सेइं सच ज़ोताई, कि ज़ां तगर एन सब किछ पूरु न भोए, तांतगर
एस पीड़रो खातमों न भोलो। 35 अम्बर ते धरती टेली गाली पन मेरी गल्लां
कधे न टेलेली।” 36 “मेरे वापस एजनेरे दिहाड़े बारे मां, या तैस वक्तेरे बारे
मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन् त कने
परमेशरेरु मटू यानी अवं भी न जैनी, पन सिफ़ मेरो बाजी परमेशर ज़ानते।
37 ज़ेन्चरे नहोरे ज़माने मां भोरु थियूं तेन्चरे मैनेरे मटुरे एजनेरे वक्ते भोनूए।
38 किजोकि तूफान एजने करां पेइले भी लोक खाते पीते थिये, ते इला भी
बनाते थिये, ते नहोरे किश्ती मां गाने तगर एन सब किछ भोतू राऊं। 39 तैन
पतो भी न थियो कि कुन भोने बालूए, इड़ी तगर कि तूफान अव ते तैनी सब
किछ रुड़ेइतां नेव, ते मैनेरे मटुरु यानी मेरु एजनू भी एरु भोनूए। 40 तैखन
ऊडरे मां दूर्घ मैन्हु कम केरते भोले ते अक नीयो गालो, ते दुद्योवं तैड़ी रालो।
41 ते दूर्घ कुआन्शां ढ़लाट पिती भोली त अक नी गाली ते होरि तैड़ी राली।
42 तुस बींझे राथ किजोकि तुस न ज़ानथ कि तुश्शो प्रभु केइस एजनोए। 43
पन याद रखा, अगर घरेरे मालिके पतो भोए कि चोर कताली एजनो, त तै
बींझे बिशेथो ते अपने घरे चोरी न भोने देथो। 44 एल्हेरेलेइ तुस भी तियार
राथ, किजोकि जैखन तुसन शक भी नई भोनी त मैनेरु मटू यानी अवं एज्जी
गानोई।” 45 “ईमानदार ते अक्लमन्द नौकर तैसेरो जेरोए, ज़ेसेरो मालिक

तैस अपने नौकरन पुढ़ पुछ्नो गन्ने रखे ताके तै तैन मौके पुढ़ रोटी दे, ते
फिरी दूर सफरे पुढ़ गाए।” 46 “तै नौकर धने ज़ेसेरो मालिक एइतां तैस करां
एरु ज़ेरु केरतो लाए।” 47 अवं तुसन सेइं सच ज़ोताई कि तै मालिक अपने
घरेरो सारो अधिकार तैसेरे सुपुर्द केरेलो। 48 “पन अगर तै बुरो नौकर अपने
दिले मां एन ज़ोए कि मेरे मालिकेरे एजने हेजू बड़ू चिरे। 49 ते अपने सैथन
मारने कुटने ते शरैपण सेइं खाए ते पीए। 50 त तैसेरो मालिक कोस्कोई एरी
दिहैड़ी एज्जे ज़ेइस तैस नौकरे उमीदे न भोए, ते तैसेरो मालिक वापस एज्जी
गाए। 51 ते मालिक तैस पक्की सज्जा देलो, ते तैसेरो हिस्सो पाखंडी लोकन
सेइं साथी भोलो, ज़ैडी लेरां देनी ते दंत चापने भोलो।”

25 तैखन यीशुए अपने चेलन सेइं ज़ोवं, ज़ैखन मैनेरु मटू यानी अवं वापस
एज्जेलो तैस मौके स्वर्गेरु राज़ तैन दश अड्लैर्ड कुइयां केरु ज़ेरु भोलू ज़ैना
अपनि मिसालां बैलतां लाडे सेइं मिलनेरे लेइ निस्सी। 2 तैन मां पंच बेवकूफ
थी, पन पंच अक्लमन्द थी। 3 ज़ैना बेवकूफ थी तैनेई मिसालां त नी, पन
होरो तेल साथी न नीयो। 4 “पन ज़ैना अक्लमन्द थी तैनेई मिसालां केरे
अलावा कुप्पन मां होरो तेल भी साथी नीयो।” 5 लाडे एजने चिर लग्गू ते
तैना सब बलगते-बलगते डिगरी लेइ देने, ते झुल्ली जेर्ड। 6 “अध्यी रात भोइ
त शौर मची कि लाडे ओरोए, ते तैस सेइं मिलनेरे लेइ एज्जा। 7 तैखन सैरी
अड्लैर्ड कुइयां बींझी, ते अपनि-अपनि मिसालां ठीक केरने लेगि। 8 बेवकूफ
कुइयेर्ड अक्लमन्द अड्लैर्ड कुइयन सेइं ज़ोवं, ‘अपने तेले मरां थोड़ो ज़ेरो तेल
असन भी देथ, किजोकि इश्शी मिसालां हिश्शने लोरिन।’ 9 पन अक्लमन्देई
जुवाब दित्तो, ‘असन कां एत्रो तेल नई, कि इश्शे लेइ ते तुश्शे लेइ पूरो भोए,
तुस एरु केरा कि बेच्नेबालन करां आनां।’ 10 ज़ैखन तैना तेल घिन्ने चेलोरि
थी त तैत्रे मां लाडे पुज्जी जेव, ते ज़ैना तियार थी, तैना लाडे सेइं साथी अन्तर
ड्लाएरे घरे मां चेलि जेर्ड, ते दार बंद केरतां छँडू। 11 बादे मां तैना होरि
अड्लैर्ड कुइयां भी वापस पुज्जी ते लाडे जो ज़ोने लेगि, ‘प्रभु! प्रभु!’ इश्शे लेइ
दार खोल्ल। 12 पन तैनी जुवाब दित्तो, ‘अवं तुसन सेइं सच ज़ोताई, अवं
तुसन न ज़ैनी।’ 13 एल्हेरेलेइ खबरदार राथ, किजोकि तुस मेरे वापस एजनेरे
दिहाड़ेरे बारे मां न ज़ानथ।” 14 ज़ैखन मैनेरु मटू यानी अवं वापस एज्जेलो त
स्वर्गेरु राज़ तैस मैनेरो ज़ेरु भोनूए, ज़ै दूर मुलखे जेव, तैनी अपने नौकर

कुजाए ते सारी दौलत तैन दित्ती, ते तैन ज़ोवं एस दौलती सेइं होरि भी कमाई केरा। 15 “तैनी एककी पंच तोडे दिते होरि दूई तोडे दिते, ते एककी अकके तोडो दित्तो, हर एककी तैसेरे काबलीतरे मुताबिक दित्ते, ते एप्पू होरि मुलखे जो चलो जेव।” 16 ज़ैस नौकरे पंच तोडे मैल्लोरे थिये, तैनी गेइतां कारोबार केरतां पंच तोडे होरे कमाए। 17 एन्वरे ज़ैस नौकरे दूई तोडे मैल्लोरे, तैनी दूई होरे कमाए। 18 पन ज़ैस नौकरे अक तोडो मैल्लोरे थियो, तैनी मित्ती घेड़तां मालिकेरी रकम छुपेइतां छ़डी। 19 बडे चिरेरां पत्ती तैसेरो मालिक वापस अव, ते नौकरन सेइं हिसाब केरने लगो कि तैनेई तैन तोडां केरु कुन कियूं। 20 “ज़ैस नौकरे पंच तोडे मैल्लोरे थिये, तैनी गेइतां पंच होरे तोडे हाजर कमाए ते ज़ोने लगो, ‘हे मालिक तीं पंच तोडे दित्तोरे, ते हेर मीं पंच तोडे होरे कमाए।’ 21 मालिके तैस सेइं ज़ोवं, ‘शाबाश ईमानदार नौकरा तीं थोडी ज़ेरि रकमी पुड़ इमानदेरी सेइं कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो।’” 22 ते ज़ैस दूई तोडे मैल्लोरे थिये, तै भी अव ते ज़ोने लगो, “हे मालिक तीं मीं दूई तोडे दित्तोरे थिये, ते हेर मीं दूई तोडे होरे कमाए।” 23 मालिके तैस सेइं ज़ोवं, “शाबाश ईमानदार नौकरा तीं थोडी ज़ेरि रकमी पुड़ इमानदेरी सेइं कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो।” 24 ते ज़ैस अक तोडो मैल्लोरे थियो, तै भी हाजर भोव ते ज़ोने लगो, “हे मालिक अवं जानतो थियो तू बङ्गो सखत मैन्हु आस, तू तैस मैनेरो ज़ेरोस ज़ैनी ऊडरे मां फसल नई बेवरी ते तै तैटुं फसल कटते।” 25 एल्हेरेलेझ अवं डरो कि अगर अवं तेरी दौलत हिरेझलो त तू मीं सजा देलो, तांए तेरी दौलत मीं ज़मीनी मां देबतां छ़डी, हेर, “तेरी दौलत ई आए।” 26 तैसेरे मालिके जुवाब दित्तो, हे दुष्ट ते निकम्मे नौकरा अगर तीं पतो थियो, कि अवं तैस मैनेरो ज़ेरोई ज़ैनी ज़ैस ऊडरे मां नई बेवरू त तैटुं कटते। 27 त तीं एन लोडूतू थियूं कियोरु, कि मेरी दौलत शौकारां केरे हवाले केरस, तैखन अवं वापस एइतां अपनि दौलत सूते समेत उसुल केरेथो। 28 हुनी एन केरा कि एस करां तै तोडो नेइतां तैस देथ ज़ैस कां दश तोडेन। 29 एल्हेरेलेझ ज़ैस कां परमेश्वरी मर्जी समझनेरी इच्छा आए, तैस परमेश्वर जादे समझा देलो। पन ज़ैस कां परमेश्वरी मर्जी समझनेरी इच्छा नई, तैस केरां, थोडी ज़ेरि

समझ जै तैस कां आए, तै भी नी गाली। 30 ते एस निकम्मे नौकरे आंधेरे मां
 छङ्गा, जैडी ए लेरां देंतो ते दंत चापतो राए। 31 जैखन मैनेरु मटू यानी अवं,
 अपने महिमा मां अपने स्वर्गदूतन सेइं साथी एज्जेलो त अपने महिमारे तखते
 पुड़ बिश्तां लोकन पुड़ राज्ञ केरेलो। 32 सैरी कौमां मीं कां अकोट्टी भोली, ते
 धर्मी लोक बुरे लोकन करां अलग किये गानेन, जेन्नरे पुहाल भैडुन, छेल्लन
 मरां अलग केरते। 33 ते अवं धर्मी लोकन सेइं जैना मेरे देइने पासे भोले,
 ते बुरे लोकन जैना मेरे बांए पासे भोले। 34 तैखन राज्ञो यानी अवं अपने
 देइने पासेरे लोकन सेइं ज़ोलो, “एज्जा मेरे बाजेरे धन लोकव इन राज्ञ, जैन
 दुनियारे शुरु मां तुशें लेइ तियार कियोरुण। 35 किजोकि अवं नियन्नो थियो,
 ते तुसेई मीं रोट्टी खुवाई, अवं ट्रिलिशोरो थियो, ते तुसेई मीं पानी पियांव अवं
 परदेशी थियो, ते तुसेई अवं अपने घरे मां कुजाव। 36 अवं नग्गो थियो, ते
 तुसेई मीं लिगडां दित्तां, ते अवं बिमार थियो, ते तुसेई मेरी हेरगेश की अवं कैद
 थियो, ते तुस मीं मिलने आए।” 37 तैखन तैना धर्मी मैनन् ज़ोलो, “हे प्रभु
 असेई कैखन तू नियन्नो लाव, ते असेई तीं रोट्टी खुवाई या तू ट्रिलिशोरो थियो,
 ते असेई तीं पानी पियांव।” 38 असेई कैखन परदेशी सेमझतां तू अपने घरे
 मां रख्खो, या तू नग्गो थियो, ते असेई तीं लिगडां दित्तां? 39 ते अस कताली
 तीं बिमार या कैद लेइतां तीं सेइं मिलने आए? 40 तैखन राज्ञो यानी अवं
 जुवाब देलो, “कि अवं तुसन सेइं सच्च ज़ोताई कि जैखन तुसेई इन लोकन
 सेइं जैनेई मीं पुड़ विश्वास कियो एककी सेहं भी एरो बर्ताव कियो त एन बुझा
 कि एन तुसेई मीं सेइं कियूं।” 41 तैखन तै बांए पासे बालन सेइं ज़ोलो, “हे
 लानती लोकव मेरे तुत्तरे अगरां तैस हमेशारी बैलती अग्गी मांजो गाथ, जै
 परमेशरे, शैतान त कने शैतानेरे दूतां केरे लेइ तियार कियोरीए। (aiōnios
 g166) 42 एल्फेरेलेइ जैखन अवं नियन्नो थियो, ते तुसेई मीं रोट्टी न खुवाई
 अवं ट्रिलिशोरो थियो, ते तुसेई मीं पानी न पियांव। 43 अवं परदेशी थियो, ते
 तुसेई अवं अपने घरे मां रख्खो, अवं नग्गो थियो, ते तुसेई मीं लिगडां न
 दित्तां, ते अवं बिमार ते कैद थियो, ते तुस मीं सेइं मिलने न आए।” 44 तैखन
 तैना लोक भी जोले, “हे प्रभु असेई कताली तू नियन्नो या ते ट्रिलिशोरो
 या परदेशी ते नग्गो या बिमार या कैद लाव ते असेई तेरी सेवा न की?”
 45 तैखन अवं अपने बांए पासेरे लोकन जुवाब देलो, “अवं तुसन सेइं सच्च

ज्ञोतार्दि कि ज़ैखन तुसेर्दि मेरे इन निकड़े करां निकड़े लोकन पुड़ ज़ैना मीं पुड
विश्वास केरतन एककी सेइं भी एरो ज़ेरो बर्ताव कियो त एन बुझा कि एन
मीएं सेइं कियूं। 46 एल्हेरेलेइ एन लोकन हमेशारे लेइ सज्जा भोली, पन धर्मी
लोकन हमेशारी ज़िन्दगी मैलेली।” (aiōnios g166)

26 ज़ैखन यीशुए एन गल्लां की, त तै अपने चेलन सेइं ज़ोने लगो। 2
“तुसन पत्तोए कि दूई दिहैड़ना बाद फ़सह तिहरे, ते मैनेरु मटू कूसे पुड
चाढ़नेरे लेइ टलुवाव गाए।” 3 तैखन प्रधान याजक ते कोमरे बुजुर्ग कैफा
महायाजकेरे अंगने मां अकोटु भोए। 4 ते तैनेई सल्लाह की, कि यीशु धोखे
सेइं टलेइतां मेरी छ़डम। 5 पन तैना ज़ोते थी, कि फ़सह तिहारेरे मैके पुड
नई, एरु न भोए कि लोक हंगामो केरन। 6 तैस मैके यीशु बैतनिय्याह डलव्वे
मां शमैन कोढ़ेरो घरे मां थियो। 7 ते अक कुआन्श शंखमरमरी भांडे मां इत्र
घिन्तां यीशु कां आई, तैखन तै रोट्टी खानेरे लेइ बिशोरो थियो, त तैसेरे दोग्गे
पुड तै इत्र उलटाव। 8 चेले एन लेइतां बड़े नाराज़ भोए ते ज़ोने लगे, “कि ए
किजो बराबर कियो?” 9 अगर ए बेच्चोरो भोथो, त बड़ी कीमत मैलनी थी, ज़ै
गरीबन बेन्टां देथे। 10 यीशुए एन शुन्तां तैन सेइं ज़ोवं, “तुस एस कुआन्शी
किजो तंग केरने लोरेथ? एसां त मीं सेइं रोटू कियोरुए। 11 गरीब त हमेशा
तुसन सेइं साथी भोनेन, पन अवं तुसन सेइं साथी हमेशा नई भोनो। 12 तैसां
मेरी जानी पुड़ ज़ै ई इत्र उलटावरोए, तैसां मेरे दबनेरे लेइ कियोरु। 13 अवं
तुसन सेइं सच ज़ोतार्दि, कि सैरी दुनियाई मां ज़ैड़ी भी खुशखबरी शुनाई
गाली, तैड़ी तैसेरी यादगैरी मां एस गल्लरे बारे मां भी ज़ोवं गालू।” 14 फिरी
12 चेलन मरां अक ज़ेसेरु नवं यहूदा इस्कारियोती थियूं प्रधान याजकन कां
जेव ते ज़ोवं। 15 “अगर अवं यीशु तुसन टलुवेइं, त तुस मीं कुन देले? तैनेई
तैस टलाही चैंदरे सिके दितो। 16 ते तै तेइसेरो तै ठीक मैके बलगने लगो कि
यीशु केन्चरे सेइं टलुवाए।” 17 “अखमीरी रोट्टरे तिहारेरी पेइली दिहाड़ी चेले
यीशु कां एइतां पुच्छने लगे कि, तू फ़सह तिहारेरी रोट्टी कोड़ि खानी चातस,
ताके अस गेइतां तियारी केरम?” 18 तैनी ज़ोवं, “नगर मां अक फलानो
मैनूए, ते तुस तैस कां गाथ ते तैस ज़ोथ, कि गुरु ज़ोने लगोरोए, मेरो वक्त
नेड़े पुज़ोरोए ते अवं अपने चेलन सेइं साथी फ़सह तेरे घरे मां मनेइलो।”
19 बस्सा ज़ेरो यीशुए अपने चेलन हुक्म दित्तोरो थियो, तैनेई तेन्चरे फ़सह

तिहारेरी रोट्टी तियार की। 20 जैखन ड्लोङ्गा भोइ त यीशु 12 चेलन सेइं साथी रोट्टी खाने बिश्शो। 21 ते रोट्टी खांते बार यीशुए तैन सेइं ज़ोवं, “अवं तुसन सेइं सच्च ज़ोताई कि तुसन मरां अक मीं ट्लुवालो।” 22 “एन शुन्तां तैना सारे चेले उदास भोए, तैना बैरी-बैरी सेइं तैस पुच्छने लगो, हे प्रभु कुन अवं त नई?” 23 तैनी जुवाब दित्तो, “ज़ैनी मीं सेइं साथी थैली मां हथ छँडोरोए, तैए मीं ट्लुवालो। 24 मैनेरे मट्टेरे लेइ त ज़ेरु तैसेरे बारे मां लिखोरुए तैस सेइं तेरहु कियूं गाते, पन अफसोस तैस मैन्हु पुड़ ज़ेसेरी वजाई सेइं तैन ट्लुवाव जेव, तैसेरेलेइ एन्ने रोडू थियूं कि तै ज़र्मोरो न भोथो। 25 तैखन ट्लुवानेबालो यहूदा ज़ोने लगो, हे गुरु अवं त नई? तैनी तैस सेइं ज़ोवं, तीं एप्पू ज़ोवं।” 26 खांते बार यीशुए रोट्टी ट्लाती, ते बरकत मेगतां ट्लोडी, ते चेलन कां देइतां ज़ोवं यांथ खाथ ई मेरी जाने। 27 फिरी यीशुए दाढ़ेरे रसेरो कटोरो ट्लातो, ते परमेशरेरु शुक्र केरतां चेलन कां दित्तो ते ज़ोवं, “यांथ तुस सब इस मरां पीया। 28 किजोकि ई मेरे नंवे करारे मां मेरो तै ख्ने जै बड़ां केरे पापां केरि मैफारे लेइ दित्तो गाते। 29 अवं तुसन सेइं ज़ोताई, कि अवं दाढ़ारो ई रस फिरी कधे न पियेलो ज़ां तगर परमेशरेरे राज्जे मां तुसन सेइं साथी नंवो न पीं।” 30 तैल्ला पत्ती, यीशु त कने तैसेरे चेले परमेशरेरु भजन ज़ोडतां, यरुशलेम नगरेरे बेइर ज़ैतून नंवेरे पहैड़ी पुड़ चली जे। 31 तैखन यीशुए तैन सेइं ज़ोवं, “तुस अज़े राती मेरी वजाई सेइं ठोकर खाले, किजोकि लिखोरुए, ‘अवं पुहाले मारेलो ते धनेरी भैड़ुं तितर-बितर भोली।’ 32 पन अवं ज़ींतो भोइतां तुसन करां पेइले गलील इलाके मां गेइलो।” 33 पतरसे तैस सेइं ज़ोवं, “अगर सारे तेरी वजाई सेइं ठोकर खान त खान, पन अवं तेरे बारे मां कधी ठोकर न खेइलो।” 34 यीशुए तैस सेइं ज़ोवं, “अवं तुसन सेइं सच्च ज़ोताई कि अज़ राती कुकड़ बांग देने करां पेइले तू मेरो ट्लाई बार इन्कार केरेलो।” 35 पन पतरसे ज़ोवं, “अगर तीं साथी मीं मरनू भी पे, त तांभी अवं तेरो इन्कार न केरेलो ते सैरी चेलोई भी एन्ने ज़ोवं।” 36 तैखन यीशु अपने चेलन सेइं साथी एककी ठैरी पुज़ो, ज़ैस ठारारु नवं गतसमनी थियूं, ते तै अपने चेलन सेइं ज़ोने लगो, तुस इड़ी बिश्शा, ते तांतगर अवं उड़ी अगर गेइतां प्रार्थना केरताई। 37 तैनी पतरसे ते जेब्देरां दुइये मट्टुं साथी नियां, ते तैड़ी तै बड़े परेशान भोने त कने घबराने लगो। 38 फिरी यीशु तैन

सेइं, इस दुखेरे वजाई सेइं मेरे प्राण निसने लोरेन इडी बिश्शोरे राथ ते बींझो राथ। 39 फिरी थोड़ो ज़ेरे अगर गेइतां तल्ले मां मथ्थो टेकतां खिरको ते प्रार्थना की, “हे बाजी अगर भोइसखे त ई कटोरो मीं करां टेली गाए, फिरी भी जैन अवं चाताई तैन नई बल्के जैन तू चातस तैन्ने भोए।” 40 फिरी तै चेलन कां वापस अव ते तैना झुलोरे लाए, ते तैने पतरसे सेइं ज़ोवं, “कुन तुस अक घड़ी भी मीं सेइं साथी बींझो न बिश्शी सके?” 41 बींझो बिश्शा ते प्रार्थना केरते राथ ताके तुस अज़मैइशी मां न राथ, आत्मा त तियारे पन जान कमज़ोरे। 42 यीशुए फिरी जेव, ते ई प्रार्थना की, “हे मेरे बाजी ई दुख्खेरो कटोरो मेरे पीने बगैर टेली न सखे, त तेरी मर्जी पूरी भोए।” 43 तैखन तै चेलन कां एइतां तैना फिरी झुलोरे लाए, किजोकि तैन केरि एछळी ओंडले सेइं गिरकी भोरी थी। 44 तै तैन तैड़ी छेडतां चलो जेव, ते फिरी तैए प्रार्थना केरने लगो ज़ै पेइली कियोरी थी। 45 तैसेरां बाद तै चेलन कां वापस अव, ते तैन सेइं ज़ोने लगो, “हुनी झुलोरे राथ ते आराम केरा, हेरा तै मौको नेड़े पुज़ोरोए, ते मैनेरु मटू पापी लोकां केरे हवाले कियूं गाते। 46 उठा, चलम। हेरा! मीं ट्लुवानेबालो नेड़े पुज़जी जोरोए!” 47 तै एना गल्लां ज़ोने लोरो थियो, त यहूदा ज़ै 12 चेलन मरां थियो तैड़ी पुज़ो, तैस सेइं साथी बड़े मैन्हु थिये जैना तलवारां ते लट्ठां धिन्तां औरे थिये तैना प्रधान याजकन ते कौमरे बुजुर्ग लोकेई भेज़ोरे थिये। 48 तैसेरे ट्लुवांने बाले तैन ई निशान दित्तोरो थियो, कि जैस अवं फुम्मड़ी देइलो त तैए, ते तुस तैस ट्लेइयथ। 49 ते तैखन यहूदा, यीशु कां एइतां ज़ोवं, हे गुरु नमस्कार, ते एइतां तैस फुम्मड़ी दित्ती। 50 यीशुए तैस सेइं ज़ोवं, हे मेरे दोस्ता जैस कम्मेरे लेइ तू ओरोस तैन कम केर, तैखन लोकेई एगरोइतां यीशु पुड़ हथ रखे ते ट्लाव। 51 यीशुएरे सैथन मरां एकके अपनि तलवार कढी, ते महायाजकेरे नौकरे पुड़ बाई ते तैसेरो कन्न कटो। 52 तैखन यीशुए तैस जो ज़ोवं, तलवारी मियांने मां रख किजोकि जैना तलवार चलातन तैना तलवारी सेइं मारे गाले। 53 “कुन तू न ज़ानस अवं अपने बाजी करां मिनत केरि सकताई तै हुन्ना स्वर्गदूतां केरि 12 फौवजां बल्के तैस करां भी जादे भेजते। 54 पन फिरी तैना पवित्रशास्त्रेरी गल्लां केन्चरे पूरी भोनिन जैन केरु पूरु भोनू ज़रूरीए?” 55 तैखन यीशुए तैन हछे लोकन सेइं ज़ोवं, “अवं कुन कोई डैकू आई ते तुस मींजो डांग सोटे ते

तलवारां ट्लेइतां मीं ट्लाने ओरेथ? अवं त रोऱ्ज मन्दरे मां बिश्तां शिक्षा देतो
 थियो ते तैखन तुसेई अवं नई ट्लातोरो? 56 पन एन सब किछ एल्हेरेलेइ
 भोवं, कि पवित्र बचने मां नेवी केरि लिखोरी गल्लां पूरी भोन, तैखन सारे चेले
 तैस तैडी छेडतां च्छ्ले जे।” 57 ते यीशु ट्लानेबाले तैस महायाजक कैफा कां
 घिन्तां जे, जैडी तैना शास्त्री ते बुजुर्ग अकोटु भोरे थिये। 58 ते पतरस भी
 दूरेसां देतो पतपती तैस महायाजकेरे अंगनेरे तगर जेव, ते तैडी पेरहेदारन सेइं
 साथी बिश्तां यीशुएरो अन्त लोरो थियो हेरने कि कुन केरतन। 59 प्रधान
 याजक ते कने सारी महासभा यीशुएरे खलाफ गवाही तोपनेरी कोशिश केरि
 राओरे थिये, कि जैस सेइं यीशु कत्त्व कियो गाए। 60 पन कोई गवाह न
 मैल्लो, हालांकी बडे झूठे गवाह भी पैश भोए, आखर्कार दूई गवाह पैश भोए।
 61 ते ज्ञोने लग्गे, एनी ज्ञोरु कि “अवं परमेशरेरु घर डोलतां ट्लेइ दिहाड़न
 मां फिरी खडू केरि सकताई।” 62 तैखन महायाजक खडो भोइतां यीशु
 पुच्छने लगो, “कुन तू कोई जुवाब न देस, इना लोक तेरे खलाफ कुन गवाही
 देतन?” 63 पन यीशु चुप राव, “तैखन महायाजक फिरी पुच्छने लगो, तीं
 जींते परमेशरेरी कसम भोए कि असन ज्ञो, कि तू परमेशरेरु मटू मसीह
 आस? 64 यीशुए जुवाब दित्तो, तीं एप्पू ज्ञोई छडू ते हुनी अवं भी ज्ञोताई कि
 अज्ञेरे बाद तुस मैनेरे मटू परमेशरेरे देइने पासे बिश्शोरे लाएले, ते अम्बरे पुड
 बिदलारी मां एइते लाएले।” 65 तैखन महायाजके अपना लिगडां छिंदा, ते
 ज्ञोने लगो, एनी परमेशरेरी तुहीन कियोरीए हुनी असन केन्ची गवाहेरी ज़रूरत
 नई, तुसेई हुन्ना एसेरु झूठ शुनेरु। 66 तुशी कुन राईए? तैनेई जुवाब दित्तो
 ए कतलेरे काबल आए? 67 तैखन तैनेई तैसेरे तुतरे पुड थुकू ते तैस घुसेइं ते
 होरेई थप्पड़ मैरतां ज्ञोवं। 68 “हे मसीह अगर तू नबी आस त भविष्यिवाणी
 केर ते ज्ञो, तीं केनि बाहोरिए?” 69 पतरस बेइर अंगने मां बिश्शोरो थियो, ते
 अक नौकरानी तैस कां आई ते ज्ञोने लग्गी कि तू भी यीशु गलीली सेइं साथी
 थियो। 70 तैनी सेब्भी केरे सामने इन्कार कियो ते ज्ञोवं, “मीं नई पतो तू
 कुन लोरिस ज्ञोने? 71 तैखन पतरस बेइर फाटकेरे पासे जेव, त अक होरि
 नौकरानी तैस लेइतां तैन सेइं जैन तैडी थी ज्ञोने लाई, ई मैन्हु भी नासरतेरे
 यीशु सेइं साथी थियो।” 72 पन तैनी सेब्भी केरे सामने कसम केरतां इन्कार
 कियो, ते ज्ञोवं, अवं एस मैन्हु सैइयां न जैनी। 73 थोडे चिरेरां पत्ती तैना लोक

जैना तैड़ी खड़खड़े थिये, पतरसे कां आए ते ज़ोने लगे, सच्चे तू भी तैन्ने मरां
अक आस, किजोकि तेरी बोली सेइं बुझोते कि तू तैसेरो साथिस। 74 तैखन
तै तैस जो गैर्ड देइतां ज़ोने लगो, ते कसम केरतां ज़ोने लगो, “अवं एस मैन्हु
सैइयां न ज़ैनी।” तैखन कुकड़े बांग दित्ती। 75 पतरसे तैखन यीशुएरी तै गल
याद आई, ज़ै तैनी ज़ोरी थी कि कुकड़ेरे बांग देने करां पेइले तू टलेइ बार मेरो
इन्कार केरेलो, ते पतरस बेइर गेइतां हुस्बुकैइ-हुस्बुकैइ लेरां देने लगो।

27 झेझा भोंते सारे लोक ते प्रधान याजक, ते कौमरे बुजुर्गई मुशोरो कियो
कि यीशुएरे कल्ल केरनेरो फैसलो कियो। 2 ते यीशु बेंधतां नीयो, ते रोमी
गवर्नर पिलातुसे कां नीयो। 3 जैखन यहूदा जैनी यीशु ट्लुवेवरो थियो तैस
एसास भोव, कि यीशु मुर्जम बनोरोए त तैनी बड़ु पशतावं, ते तैना चैंदरे
ट्लही सिक्के प्रधान याजक ते बुजुर्गन कां वापस आने। 4 ते ज़ोने लगो,
“मीं पाप कियो, कि अक बेकसूर मैन्हु, मारने लेइ ट्लुवाव,” ते तैना ज़ोने
लगे, “असन कुने? तू ज़ान ते तेऱु कम ज़ानो।” 5 तैखन यहूदा तैना सिक्के
मन्दरेरे अंगने मां शैरतां छँडे, ते तैटां गेइतां अपने आपे फांसी दित्ती। 6
प्रधान याजकेई तैना सिक्के सल्ले, ते ज़ोने लगे, “इन सिक्के इश्शो कानूनेरे
मुताबिक मन्दरेरे खजाने मां रखने जेइज़ नई, किजोकि ए कोन्ची मैन्हु मारनेरी
कीमते।” 7 एल्हेलेइ तैनेई मुशोरो केरतां तैस रकमी सेइं कुम्हारे करां अक
ऊडार घिन्नू, ताके परदेशी केरे लेइ कब्रास्तान बनावं गाए। 8 तांए त अज़
तगर भी तैस ऊडारे जो खूनेरू ऊडार ज़ोतन। 9 तैखन तै गल पूरी भोइ ज़ै
यिर्म्याह नेबे ज़ोरी थी, कि तैनेई तैसेरी पूरी कीमत चैंदरे ट्लही सिक्के निये,
ए कीमत इसाएलेरे लोकेई कियोरी थी। 10 ते तैन चैंदरे ट्लही सिक्केइं सेइं
कुम्हारेरू ऊडार घिन्ने जो दिते जेन्चरे प्रभुए मीं हुक्म दित्तोरो थियो। 11
जैखन यीशु हाकिमेरे तुतरे अगर खड़े थियो, ते हाकिम तैस पुच्छू, “तू यहूदी
केरो राजोस?” यीशुए जुवाब दित्तो, “तू एप्पू ज़ोने लोरोस।” 12 ते जैखन
प्रधान याजक ते बुजुर्ग तैस पुड़ इलजाम लाने लोरे थिये त यीशुए कोई जुवाब
न दित्तो। 13 तैखन पिलातुसे यीशु सेइं ज़ोवं, “हेर एना तेरे खलाफ केत्री
गवाहैई लोरेन देने तू शुन्तस की नई।” 14 पन यीशुए तैस एककी गल्लारो
भी जुवाब न दित्तो; ते इडी तगर कि हाकिम बड़ो हैरान भोइ जेव। 15 ते
हाकिमेरो अक दस्तूर थियो, कि फ़सह तिहारेरे मौके पुड़ अक कैदी जैस

लोक चाते थिये तैस हथरां छडतो थियो। 16 तैस मौके तैन केरो अक बड़ो
 मुशूर कैदी थियो, ज़ेसेरु नवं बरअब्बा थियुं। 17 ज़ैखन तैना लोक पिलातुसे
 कां जम्हां भोए, त पिलातुसे तैन पुच्छू, “तुस कुन चातथ, अवं केस हथरां
 छेड्ही? बरअब्बा कि यीशु जैस जो मसीह ज़ोतन?” 18 किजोकि तै ज़ानतो
 थियो, कि तैनेई सिर्फ जलनी सेइं तै ट्लुवोरोए। 19 ज़ैखन तै आदालतरी
 तखते पुड़ बिशोरो थियो, त तैसेरी कुआन्शां तैस जो समाद भेज़ोरो थियो,
 “कि तू एस रोड़े मैनेरे बारे मां किछ न करां, किजोकि मीं अज़ राती एसेरी
 वजाई सेइं सुपने मां बड़ो दुःख भोरोए।” 20 पन प्रधान याजकेई ते बुजुर्ग
 लोकेई लोक बमकाए, कि तैना पिलातुसे करां बरअब्बा हथरां छडन ते यीशु
 मारन। 21 ज़ैखन हाकिमे तैन लोकन पुच्छू, “कि तुस एन दुईन मरां केस
 चातथ, अवं तैस हथरां छेड्ही,” तैन लोकेई ज़ोवं, “बरअब्बा।” 22 पिलातुसे
 तैन पुच्छू, “फिरी अवं यीशु जैस जो मसीह ज़ोतन तैस सेइं कुन केरि?” सब
 लोक ज़ोने लग्गे “एस कूसे पुड़ चाढ़ा!” 23 हाकिमे ज़ोवं किजो? “एनी कुन
 बुराई कियोरीए? पन तैना मना ज़ोरे-ज़ोरे ज़ोने लग्गे कि एस कूसे पुड़ चाढ़ा!”
 24 ज़ैखन पिलातुसे हेरु कि किछ भी बन्ने बालू नई बल्के उलटो फसाद
 भोने बालोए, त तैनी पानी मेगतां तैन मैन्हु केरे सामने हथ धोए ते ज़ोवं,
 “कि अवं एस एक्की धेर्मी मैनेरे खूने करां बरी भोइताई, तुसे ज़ाना।” 25 ते
 सारे लोकेई जुवाब दित्तो, “एसेरो खून असन पुड़ ते इश्शी औलादी पुड़
 भोए।” 26 तैखन पिलातुसे बरअब्बा हथरां छडो, ते यीशुए कोड़े बावैहीतां
 तैन केरे हवाले कियो, ताके तैना तैस कूसे पुड़ चाढ़न। 27 ते तैखन हाकिमेरे
 सिपैहीयेइं यीशु महलेरे अंगने मां नेइतां सारे फौजेरे सिपाही यीशुएरे चुफुरतां
 जम्हां भोए। 28 तैनेई तैसेरां लिंगड़ां खोल्लां ते तैस अक लाल रंगेरो चोगे,
 लुवाव। 29 फिरी कंटां केरु ताज तैसेरे दोगे पुड़ रख्खू, ते तैसेरे देइने हथ्ये
 मां अक निरैठरी लैठ दित्ती, ते तैस कां मथ्थो टेकतां तैसेरी हासी बनाने लग्गे,
 ते ज़ोने लग्गे, “हे यहूदी केरे राजा नमस्कार।” 30 तैना तैस पुड़ थुकते ते
 सोटी सेइं तैसेरे दोगे पुड़ बाते थिये। 31 ज़ैखन तैनेई तैसेरो मज़ाक बनाव, त
 तैसेरो चोगे खोल्लो, ते फिरी तैस तैसेरां लिंगड़ां लुवां ते तैटुं चले, ताके तैस
 कूसे पुड़ चाढ़न। 32 ज़ैखन तैना तैटुं चलोरे थिये, त तैन शमौन कुरेनी नंब्वेरो
 अक मैन्हु मैल्लो, तैन लोकेई तै ट्लातो ताके यीशुएरु कूस छुइतां चलाए।

33 ते यीशु गुलगुता नंव्येरी ठैरी पुजे, ज़ेसेरो मतलबे खोपडारी ठार। 34 तैडी तैनेई यीशु दाढ़ारो रस ते टलिठो रस मिलेइतां पीने जेर्ई दित्तो, पन तैनी पीनी न चाव। 35 ज़ैखन तैनेई यीशु कूर्से पुड़ चाढो त शर्त रेखतां चिट्ठी छेडतां तैसेरां लिंगडां भी एप्पू मांमेझं बंटा। 36 ते तैडी बिश्तां तैसेरो पैरहो केरने लग्गे। 37 ते तैनेई तैसेरो जुर्म एककी पेखडी पुड़ लिखतां तैसेरे दोगे करां बा लाई ज़ैस पुड़ एन लिखोरु थियूं “ई यहूदी केरो राजो यीशु आए” 38 तैखन तैस सेझं साथी दूर्ध डैकू भी कूर्से पुड़ चाढे, अक यीशुपरे देइने पासे, ते होरो बांए पासे। 39 तैटुंग गानेबाले सारे लोक दोग हिलेइतां गाते थिये ते तैसेरी तुहीन केरते थिये। 40 ते ज़ोते थी इस मन्दरे डोलने बाला ते ट्लेझ दिहङ्गन मां बनाने बाला, अपनो आप त बचा, “अगर तू परमेश्वरु मटू आस त एस कूर्से पुडरां उन्ठो ओस!” 41 एन्चरे प्रधान याजक ते शास्त्री ते बुजुर्ग भी तैसेरी हासी बनाते थिये, ते ज़ोते थिये। 42 “एनी होरे बचाए पन अपनो आप न बच्चेह बठो, ‘ई त इसाएलेरो राजो आए’ अगर हुन्ना भी तू कूर्से पुडरां उन्ठो ओस्स, त अस तीं पुड़ विश्वास केरतम। 43 एसेरो भरोसो परमेश्वरे पुडे, अगर तै एस चाते त एस बचाए, किजोकि एनी ज़ोरु थियूं ‘अवं परमेश्वरु मटू आई’” 44 ते दूर्ध डैकू भी ज़ैना तैस सेझं साथी कूर्से पुड़ चाढ़ेरे थिये, तैना भी तैसेरी तुहीन केरते थिये। 45 दीसेरे 12 बज्जेर्ई सारे मुल्खे मां आंधरु भोवं ते ट्लेझ बज्जन तगर रावं। 46 ते ट्लेझ बाजां केरे लगभग यीशुए बडे ज़ोरे सेझं ज़ोवं, “एली, एली लमा शबक्कनी?” ज़ेसेरो मतलबे, “हे मेरे परमेश्वर, हे मेरे परमेश्वर, तीं अवं किजो शारो?” 47 ज़ैना लोक तैडी खड़खडे थिये, तैन मरां किछ शुन्तां एन ज़ोने लग्गे, कि ए त एलिय्याह फुकारने लोरोए। 48 तैखन अक मैन्हु देवडतां जेव, ते अक गलास पैनी मां डोबतां ते निरैठरे सोटी पुड़ टकेइतां पीनेरे लेझ तैसेरे ऐशी सेझं हुरावं। 49 किछ ज़ोने लग्गे, “बलगा हुनी हेरतम, कि एलिय्याह एस बचाने एझ्ते कि नई!” 50 ते यीशुए फिरी ज़ोरे सेझं चिन्ड मारी ते प्राण दित्ते। 51 तैखन मन्दरेरो पड़दो बां देंता बुन तगर फेटतां दूर्ध टुकडे भोइ जे, ते पहाडां ते सारी ज़मीन हीलने लग्गी। 52 कब्रां खुल्ली जेर्ई, ते बडे पवित्र लोक ज़ैना मौतरी निडला मां झुलोरे थिये, जींते भोइ जे। 53 ते कब्रन मरां निस्तां जींते भोनेरां पत्ती पवित्र नगर मां दाखल भोए, ते तैडी बडे होरि लोकेई भी लाए। 54 तैखन तैनी सूबेदारे ते तैसेरे सैथ्रेई जैन यीशुएरी

निगरानी केरने लोरे थियो, भुंजल गांतो हेरो, त तैना डेरि जे, ते ज़ोने लग्गे,
 “सच्चे एन परमेशरेरु मटू थियूं!” ५५ तैड़ी बेड़ि कुआन्शां ज़ैना गलील इलाके
 मरां यीशु सेइं साथी तैसेरी सेवा केरती तैस पत्ती ओरी थी, ते दूरों तकने
 लोरी थी। ५६ तैन मां मरियम मगदलीनी ते याकूब त योसेसेरी अम्मा मरियम
 ते जब्देरे मटुं केरि अम्मा साथी थी। ५७ ज़ैखन ड्लोझ भोइ त अरिमतियाहरो
 अक अमीर यूसुफ नंव्वेरो मैन्हु ज़ै एप्पू भी यीशुएरो चेलो थियो अव। ५८ तैनी
 पिलातुसे कां गेइतां यीशुएरी लाश मगी, ते पिलातुसे लाश देनेरो हुक्म दित्तो।
 ५९ यूसुफे लाश नेइतां एक्की रोड़ि ज़ेरि च्चादरी मां पलैटी। ६० ते तै लाश
 एक्की नव्वीं कब्री मां जै शफ़ड़ी मां घड़ोरी थी रख्खी, ते तैस कब्री आग्रोरां
 अक बह्नो घोड़े तैस उबरो छ़ह्नो। ६१ ते मगदलीन ड्लव्वेरी मरियम ते होरि
 मरियम तैड़ी तैस कब्रारे सामने बिशोरी थी ज़ैस मां यीशुएरी लाश रखोरि थी।
 ६२ होरसां तियैरारे दिहाड़े बाद यहूदी केरे आरामेरे दिहाड़े प्रधान याजक ते
 फरीसी लोक मिलतां पिलातुसे कां पुज़े। ६३ ते ज़ोने लग्गे महाराज़ असन
 यादे कि तैनी धोखे बाज़े अपने ज़ींते सांसेइं ज़ोरु थियूं, “अवं मरनेरे ट्लेइ
 दिहाड़ां बाद फिरी ज़ींतो भोनोई। ६४ एल्हेरेलेइ हुक्म दे ताके ट्लाई दिहाड़न
 तगर कब्री पुड़े पेरहो दित्तो गाए, कि एरु न भोए कि तैसेरे चेले एइतां तैसेरी
 लाश च़ोरन, ते लोकन सेइं ज़ोन कि तै मुड़दन मरां ज़ींतो भोरोए, ए धोखो
 पेइले धोखे करां भी जादे बुरो भोलो।” ६५ पिलातुसे जुवाब दित्तो, “तुसन कां
 पेरहो देनेबाले आन, गाथ ज़ेत्रू भोइसखे पेरहो देथ।” ६६ तैखन तैनेई गेइतां
 घोड़े पुड़े मोहर लाई, ते कब्रारे पेरहे लेइ पेरहेदार रख्खे।

२८ आरामेरे दिहाड़े बाद हफतेरे पेइले दिहाड़े ट्लेकड़ोते-ट्लेकड़ोते
 मगदलीन ड्लंव्वेरी मरियम ते होरि मरियम ज़ैड़ी यीशुएरी लाश कब्री मां
 रख्खोरी थी, हेरने एई। २ ते हेरा अक बड़ो भुंजल अव, किजोकि परमेशरेरो
 अक स्वर्गदूत स्वर्गों ओरो थियो, ते तैस कब्री अगरां घोड़े उन्ढो बिछोड़तां
 तैस पुड़े बिशी जेव। ३ तैसेरी शकल सूरत दिहाड़ेरी ज़ेरि रोड़ी थी, ते तैसेरां
 लिगड़ां हींवेरां ज़ेरां छित्तां सुफैद थियां। ४ पेरहेदार डेरतां थर-थर कम्बने लग्गे
 ते ज़ेरे मुड़दे भोए। ५ स्वर्गदूते कुआन्शन सेइं ज़ोवं, “उरा नन्ना, अवं ज़ानताई
 कि तुस यीशुए तोपने लोरिथ, ज़ै कूसे पुड़े चाढ़ोरोए। ६ तै इड़ी नई बल्के
 ज़ेन्चरे तैनी ज़ोरु थियूं, तै ज़ींतो भोरोए, एज्जा तै ठार हेरा, ज़ैड़ी प्रभु थियो।

7 ते जल्दी गेइतां तैसेरे चेलन पतो देथ, कि तै मुळदन मरां जाँतो भोरोए, ते
 तुसन करां पेइलो गलीले मां गाते, ते तुसेई तै लहनोए हेरा मीं तुसन एन
 ज़ोरुए।” 8 तैखन तैना कुआन्शां डेरतां भी ते खुशी सेइं भी कब्री मरां बेझर
 एई, ते दौवड़ती-दौवड़ती जेई ताके चेलन पतो देन। 9 तैखन यीशु तैन मैल्लो,
 ते तैनी ज़ोवं तुसन शान्ति मैल्लो, ते तैनेई तैसेरे पाव बंते, ते तैस कां मथ्थो
 टेको। 10 तैखन यीशुए तैन ज़ोवं, डरा न ते गाथ ते मेरे चेलन सेइं ज़ोथ कि
 गलीले मांजो गान, तैना मीं तैड़ी लाएले। 11 हेजू तैना कुआन्शां बत्तां थी कि
 जैना चेलन खबर देने चलोरी थी, त पेरहेदारन मरां किछ नगर मां जे ते प्रधान
 याजकन सेइं सारो बिस्तार शुनाव। 12 जैखन महायाजकेई बुजुर्गन सेइं
 मिलतां मुशोरो कियो, ते तैनेई ई फैसलो कियो कि सिपेहिन बडे पेइंसे देन,
 कि तैना ई गल केन्ची सेइं न ज़ोन, कि कब्र केन्चरे खाली भोइ। 13 तैनेई
 पेहरेदारन एन ज़ोवं, कि तुस एन ज़ोइयथ, कि जैखन अस राती झुल्लोरे थिये
 त तैसेरे चेले आए ते तैनेई तैसेरी लाश नी। 14 अगर ए गल गुवनरि तगर
 पुजेली त अस तैस एप्पू समझामेले त तुसन कोई परेशानी न भोली। 15 ते
 सिपैहेई पेइंसे नीए ते जेन्चरे तैनेई ज़ोरु थियूं तेन्चरे कमाव, ते अज़ तगर ए
 गल यहूदन मां मुशूरे। 16 11 चेले गलीले मां जे, ते तैस पहाडे पुड अकोट्टे
 भोए ज़ेडी गानेरे बारे मां यीशुए तैन ज़ोवरु थियूं। 17 जैखन तैनेई यीशु
 लाव त तैस कां मथ्थो टेको, ते किछन हेजू भी शक थी, कि तै ज़ींतो वापस
 ओरोए। 18 तैखन यीशु तैन केरे नेडे एइतां ज़ोवं, “धेरतरो ते स्वर्गरो सारो
 अधिकार मीं दित्तोरोए। 19 एल्हेरेलेइ तुस गाथ ते सैरी कौमां केरे लोकन चेले
 बनाथ, ते तैन बाजी, ते मट्टेरे, ते पवित्र आत्मारे नंके सेइं बपतिस्मो देथ। 20
 ते तैन तैना सब हुक्म मन्ने शिखाला जैना मीं तुसन दित्तोरेन, ते हेरा, अवं
 दुनियारे आखरी तगर हमेशा तुसन सेइं साथी आई।” (aiōn g165)

મરકુસ

1 ઈ યીશુ મસીહેરે બારે માં ખુશખેબારારી શુરુઆત આએ, જૈન પરમેશરેરૂ મધૂ આએ। 2 (બડે પેઇલે) યશાયાહ નેબે અપનિ કિતાબી માં લિખોરું થિયું કિ, (પરમેશરે અપને મધૂ સેઇં જોવં,) “શુન, અવ અપનો બિસ્તાર દેનેબાલો તીં કેરાં પેઇલે ભેજેલો।” “તૈ તીં કેરાં પેઇલો ગેઝીતાં તેરે લેઝ બત તિયાર કેરેલો। (યાની, લોકાં કેરે દિલ પરમેશરે લેઝ તિયાર કેરેલો)” 3 “તૈ બિસ્તાર દેનેબાલો સુનસાન ઠૈરી માં લોકન, જૈના તૈસ કાં ગાલે, તૈન હક દેઝિતાં જોલો કિ ‘તુસન કાં પ્રભુ એજનેબાલો આએ, એલહેરેલેઝ તુસ તૈસેરેલેઝ બત તિયાર કેરા ત કને તૈસેરેલેઝ સઙ્કાં સિદ્ધી કેરા।’ (યાની, પ્રભુએરે લેઝ તુસ અપને દિલ સાફ કેરા)” 4 જેન્ચરાં લિખોરું થિયું, અક બિસ્તાર દેનેબાલો અવ। તૈસ મૈનેરું નવં યૂહન્ના થિયું। લોક તૈસ જો બપતિસ્મો દેનેબાલો ભી જોતે થિયે। તૈ યહૂદિયા ઇલાકેરે સુનસાન ઠૈરી માં અવ। તૈડી તૈ લોકન પરમેશરેરી ગલ્લાં શુનાતો થિયો કિ, “તુસ અપને પાપન કરાં મનફિરાથ, ત કને બપતિસ્મો નેથ, તાકે પરમેશર તુશે પાપ માફ કેરે।” 5 યહૂદિયા ઇલાકેરે બડે લોક ત યસ્થલેમ નગરેર રાનેબાલન મરાં બડે લોક યૂહન્નારી ગલ્લાં શુન્નેરે લેઝ સુનસાન ઠૈરી માં તૈસ કાં આએ। તૈન લોકેઈ અપને પાપ મેન્તાં યૂહન્ના કરાં યરદન દરિયાએ માં બપતિસ્મો નીયો। 6 યૂહન્ના આમ લિગડાં લાતો થિયો જૈના લિગડાં ઊંટેરે બાલન સેઇં બનોરાં થિયાં। તૈ અપનિ કમરી પુડુ ચમડેરુ મજા બંધતો થિયો। તૈ તૈ ટિટાં ત કને જંગલેરુ માછી ખાતો થિયો। 7 તૈ લોકન શુનાતો થિયો કિ, “કોઈ અક, જૈ મીં કેરાં ભી મહાન આએ, મેરે બાદ એજનેબાલોએ। અવ ત તૈસેરો ગુલામ ભોનેરે કાબલ ભી નર્દી કિ લિકતાં તૈસેરે બૂટેરે તસમે ખોલ્લી। 8 અવ ત તુસન પૈની સેઇં બપતિસ્મો દેતાઈં, પન તૈ તુસન પવિત્ર આત્મા સેઇં બપતિસ્મો દેલો” 9 તૈલ્લા પત્તી, તૈન દિહાડન માં એરુ ભોવં કિ યીશુ ગલીલ ઇલાકેરે નાસરત નગરેરાં યૂહન્ના કાં અવ। તૈની યૂહન્ના કરાં યરદન દરિયાએ માં બપતિસ્મો નીયો। 10 જૈખન યીશુ બપતિસ્મો નેઝિતાં પૈની મરાં બેદ્ર અવ, ત તૈની અમ્બર ખુલતૂ ત પવિત્ર આત્મા કબૂતરેરી શકલી માં તૈસ પુડુ એત્તો લાવ। 11 તૈખન પરમેશરે સ્વર્ગોરાં યીશુ સેઇં જોવં, “તૂ મેરુ ટ્લારુ મધૂ આસ, અવ તીં પુડુ બડો ખુશ આઈ।” 12 તૈલ્લા પત્તી, અકદમ પવિત્ર આત્મા યીશુ સુનસાન ઠૈરી જો ભેજો। 13 સુનસાન ઠૈરી માં 40 દિહાડન તગર શૈતાને યીશુ અજ્ઞમાવ। ત

तैड़ी यीशु जंगली जानवरन साथी थियो। तैखन परमेश्वरे स्वर्गदूत यीशु कां
 एइतां तैसेरी सेवा केरने लगो। 14 किछ वक्तेरां बाद, यूहन्ना नबी कैद कियो
 जेव। तैल्ला बाद, यीशु गलील इलाके मां जेव। तैड़ी तै लोकन परमेश्वरे
 राज़ज़ेरे बारे मां खुशखबरी शुनाने लगो। 15 तैनी ज़ोवं कि, “ठीक वक्त
 ओरोए त कने परमेश्वरेरु राज़ नेड़े ओरुए! एल्हेरेलेङ, तुस अपने पापन करां
 मनफिराथ ते इस खुशखेबरी पुङ् विश्वास केरा।” 16 एक्सां, ज़ैखन यीशु
 गलील नव्वेरे समुन्दरे बन्ने च्चलोरो थियो, तैखन तैनी दूर्ध मैन्हु शमौन त
 तैसेरो ढला अन्द्रियास लाए, ज़ैना मेछ़ली ट्लानेबाले थिये। तैना मेछ़ली
 ट्लानेरे लेङ् समुन्दरे मां ज़ाल छेह्ही राओरे थिये। 17 यीशुए तैन सेइं ज़ोवं,
 “एज्जा मेरे चेले बना। अवं तुसन शिखालेलो कि केन्द्रां होरे मैन्हु मेरे चेले
 बनानेन।” 18 अकदम तैना अपना जालां छेडतां यीशु पत्ती च्चले जे। 19
 ज़ैखन तैना थोड़े ज़ेरे अगर जे, त यीशुए याकूब त कने तैसेरो ढला यूहन्ना
 लाए। तैना दुइये जेव्वेरां मटुं थियां। तैना किश्ती मां जालां ठीक केरने लगोरे
 थिए। 20 अकदम यीशुए तैना अपने चेले बनानेरे लेङ् कुजाए। तैना दुइये,
 अपने बाजी जब्दी किश्ती मां मज़दूरन सेइं साथी छेडतां, यीशु सेइं साथी च्चले
 जे। 21 तैल्ला पत्ती, यीशु त तैसेरे चेले तैटुं कफरनहूम नगरे मां जे। आरामेरे
 दिहाङ्गे, अकदम यीशु तैन केरे प्रार्थना घरे मां जेव। तैड़ी तै परमेश्वरी गल्लां
 तैन लोकन शुनाने लगो। 22 तैना यीशुएरी शिक्षा शुन्तां हैरान भोए, किजोकि
 तैनी शास्त्री लोकां केरि ज़ेरि शिक्षा न दिती, पन तै अधिकारे सेइं शिक्षा देह
 राओरो थियो। 23 ज़ैखन यीशु तैड़ी थियो, त तैन केरे प्रार्थना घरे मां अक
 मैन्हु थियो, ज़ैस पुङ् भूतेरो सायो थियो। 24 अचानक तैनी मैने चिन्डां मेरतां
 ज़ोवं, “हे नासरत नगरोरो यीशु! तीं सेइं असन कुन कम? कुन तू असन नाश
 केरनेरे लेङ् ओरोस? अवं जानताई कि तू कौन आस, तू परमेश्वरे पवित्र मटू
 आस!” 25 पन यीशुए तैस भूते झिङ्गिकतां ज़ोवं, “चुप रा, एस मैन्हु मरां
 निस्सी गा!” 26 तैखन भूते तै मैन्हु इलेडेइतां त ज़ेरे सेइं चिन्डां मेरतां तैस
 मैन्हु मरां निस्सी जेव। 27 एन हेरतां सारे लोक बड़े हैरान भोए। तैना एप्पू
 मांमेइं गलबात केरतां एक्की होरि पुछ्ने लगे कि, “ए कुन गल आए! ए त
 अक नंवी शिक्षा आए ज़ैस मां अधिकार आए! तै त भूतन भी अधिकारे सेइं
 हुक्म देते ते तैना भी तैसेरो हुक्म मन्तन।” 28 अकदम यीशुएरे बारे मां ए

गल गलील इलाकेरे आसेपासेरे सेब्ही ठैरन मां फैली जेर्द। 29 तैना अकदम प्रार्थना घरे मरां निस्तां, याकूब त कने यूहन्ना सेइं साथी शमौन त अन्द्रियासेरे घरे जे। 30 शमौनेरी शिखी भुखारे थियो ते तै लेटोरी थी। अकदम तैनेर्द तैसारे बारे मां यीशु सेइं ज़ोवं कि ऊ बिमार आए। 31 यीशुए तैस कां गेइतां तैसारो हथ टलेइतां खडी की। अकदम तैसारो भुखार ठीक भोव। ते तै तैन केरि सेवा केरने लग्गी। 32 इलोइ़ी ज़ैखन दिहाड़ो दुब्बो, त लोक सारे बिमार मैन्हु त कने जैन मैनन् पुड़ भूतेरो सायो थियो तैना यीशु कां आन्ने लग्गे, ताके तै तैनन् बज्ज्ञाए। 33 तैस नगरेरे बड़े लोक तैस घरेरे दारे पुड़ अकोटु भोए। 34 यीशुए बड़े मैन्हु बज्ज्ञाए, जैना बड़े किसमां केरि बिमैन सेइं दुखी थिये। त तैनी बड़े मैनन् मरां भूतां केरो सायो कड्हो। पन यीशुए भूतन किछ ज़ोने न दिच्चू किजोकि तैना यीशु पिशानतां थियां (कि एन परमेश्वरू मटू आए)। 35 एग्री दिहाड़ी, झोज्ज्ञां-झोज्ज्ञां दिहाड़ो निस्ने केरां बड़े पेइले, यीशु उठतां बेइर एक्की सुनसान ठैरी मां जेव। तैड़ी तै प्रार्थना केरने लगो। 36 पन थोड़े छिरेरां बाद, शमौन त तैसेरे साथी, यीशु तोपने जे। 37 ज़ैखन तैनन् तै मैल्लो, त तैनेर्द यीशुए सेइं ज़ोवं, “(वापस डुलाव्वें मां एई,) सारे लोक तीं तोप्पी राओरेन!” 38 पन यीशुए तैन सेइं ज़ोवं, “एज्जा, अस होरि केन्ची आसेपासेरे डुलोव्वन मां गाम, ताके अवं तैन लोकन भी परमेश्वरी गल्लां शुनेर्द। किजोकि अवं एस्से कम्मेरे लेइ दुनियाई मां ओरोई!” 39 तैल्हेरेलेइ यीशु गलील इलाकेरे सारे डुलोव्वन मां गेइतां, तैन केरे प्रार्थना घरन मां लोकन परमेश्वरी गल्लां शुनातो राव ते बड़े लोकन मरां भूतां केरो सायो कढतो राव। 40 तैल्ला पत्ती, एक्सां अक कोढी मैन्हु यीशु कां अव। तैनी मैने यीशुएरे सामने ज़ैन्धु केरे भारे बिश्तां तैस कां मिन्त केरतां तैस सेइं ज़ोवं, “अगर तू चास, त मीं बज्ज्ञोई सकतस। (महरबानी केरतां मीं बज्ज्ञाए।)” 41 यीशुए तैस मैन्हु पुड़ तरस खाव। यीशुए अपनो हथ अग्रोवं कियो त तैस कोढी मैन्हु सेइं हथ लेइतां ज़ोवं, “अवं चाताई, तू बज्ज्ञोस।” 42 अकदम तै कोढी बज्ज्ञोई जेव। 43 तैखन यीशुए तै मैन्हु समझेइतां लूशी भेजो। 44 त तैनी तैस सेइं ज़ोवं, “हेर, एस गल्लरे बारे मां केन्ची सेइं किछ न जोइयां। (तू यरूशलेम नगरेरे मन्दरे मां गा), त कने अपने आपे याजके हिरा। तैल्ला पत्ती, तू अपने बेज्ज्ञोनेरे वजाई सेइं घाढतल घाढ, ज़ेसेरे बारे मां मूसा नेबे कानूने मां

हुक्म दित्तोरोए, ताके लोकन पतो चले कि तू बेज़ोरोस।” 45 पन तै मैन्हु बेइर गेइतां एस गल्लारे बारे मां लोकन बङ्‌डू शुनाने लगो ते इडी तगर फैलाने लगो कि यीशु फिरी बांदे नगरे मां न गेइ सको, पन बेइर सुनसान ठैरन मां राव ते चेव्रे पासां केरे लोक तैस कां एइते राए।

2 किछ दिहाड़ा बाद, यीशु फिरी कफरनहूम नगरे मां जेव। तैटौरे मैनेई शुनू कि तै तैडी एककी घरे मां आए। 2 अकदम बडे मैन्हु तैस घरे मां अकोटे भोए। तैडी ठार न राई, इडी तगर कि दारे केरां बेइर भी ठार न थी। यीशु तैन लोकन परमेश्वरी गल्लां शुनाने लगो। 3 तैखन किछ मैन्हु एककी अधरंगी मैन्हु छुइतां यीशु कां आए। चेव्रे मैनेई तै अधरंगी मैन्हु खट्टी पुड़्यु छुइतां आनोरो थियो। 4 मैन्हु केरि भीड़े वजाई सेइं, तैना यीशुएरे नेडे न पुज्जी सके। एल्हेरलेइ तैनेई तैस घरेरी छत जैस मां यीशु थियो पुट्टी छड्डी। तैल्ला बाद, तैनेई तै खट ओसाली जैस पुड़्यु अधरंगी मैन्हु थियो। 5 यीशुए तैन केरो विश्वास हेरतां अधरंगी मैन्हु सेइं ज्ञोवं, “हे मट्टा, तेरे पाप माफ़ भोए।” 6 तैखन शास्त्री लोकन मरां किछ मैन्हु जैना तैडी थिये, अपने-अपने मने मां सोचने लगे कि, 7 “ए मैन्हु एन्चरां किजो ज़ोते? ए त परमेश्वरी तुहीन केरते। परमेश्वरे अलावा कौन पाप माफ़ केरि सकते?” 8 अकदम यीशुए जैनी छड्डू कि तैना अपने-अपने मने मां कुन सोचने लग्गोरेन। एल्हेरलेइ तैनी तैन सेइं ज्ञोवं, “तुस अपने-अपने मने मां एन्चरां किजो सोचने लग्गोरेथ? 9 एस अधरंगी मैन्हु सेइं कुन ज्ञोनू सुख्तू आए? एन ज्ञोनू कि ‘तेरे पाप माफ़ भोए,’ या एन ज्ञोनू कि ‘उठ, अपनि खट छुइतां चल फिर?’ 10 अवं किछ केरनेबालोई, जैस सेइं तुसेई बुज्ज़नूए कि मैनरे मट्टे (यानी मीं) धेरती पुड़्यु लोकां केरे पाप माफ़ केरनेरो अधिकार आए!” फिरी तैनी तैस अधरंगी मैनरे पासे मुड़तां तैस सेइं ज्ञोवं, 11 “अवं तीं सेइं ज्ञोतई, उठ, अपनि खट छुइतां अपने घरजो गा!” 12 अकदम तै खड़ो उठो ते अपनि खट छुइतां सारे मैन्हु केरे सामने निस्तां चलो जेव। एस वजाई सेइं सारे मैन्हु हैरान भोए, त परमेश्वरी बड़याई केरतां ज्ञोने लगे, “असेई एरु ज़ेरु कथी नई लावरु!” 13 तैल्ला पत्ती, यीशु तैटूं निस्तां फिरी गलील समुन्दरेरे बन्ने जेव। तैखन मैन्हु केरि सारी भीड़ तैस कां आई। तै तैन लोकन परमेश्वरी गल्लां केरि शिक्षा देने लगो। 14 समुन्दरेरे बन्ने गाते-गाते, यीशुए लेवी नंवेरे मैन्हु लाव, जैन हलफईसेरु मट्टू थियूं। तै मैन्हु चुंगी

नेनेरे दफ्तरे मां कम केरतो थियो। तैखन यीशुए तैस सेइं ज़ोवं, “मीं पत्ती एई, ते मेरो चेलो बन।” अकदम लेवी उठो त यीशु पत्ती चलो। 15 बादे मां, यीशु त तैसेरे चेले लेवेरे घरे मां रोटी खाने बिश्शो। तैखन बड़े चुंगी नेनेबाले त होऐ पापी मैन्हु (लोक तैन केरे बारे मां सोचते थिये कि एना पापिन।) भी यीशु त तैसेरे चेलन सेइं साथी रोटी खाने बिश्शो, किजोकि एन केरे ज़ेरे बड़े लोक यीशु पत्ती चलते थिये। 16 ज़ैखन किछ शास्त्री लोकेई त कने फरीसी लोकेई हेरु कि यीशु पापी मैनन् त चुंगी नेनेबालन सेइं साथी रोटी खाने लग्गोरोए, तैखन तैनेई यीशुएरे चेलन सेइं ज़ोवं, “तै चुंगी नेनेबालन त पैपन सेइं साथी किजो खाते पीते?” 17 यीशुए तैन केरि गल शुन्तां तैन मिसाल देइतां जुवाब दित्तो, “सझर लोकन डाक्टरेरी ज़रूरत न पे, पन बिमार मैनन् ज़रूरत पेचे। तेन्ज़रां, अवं तैन मैन्हु केरे लेइ नई ओरोई ज़ैना अपने आपे धर्मी समझतन, पन पापी मैनन् कुजाने ओरोई, ताके तैना अपने पापन केरां मन फिरान।” 18 यूहन्नारे चेले त कने फरीसी लोक बरत रखते थिये, पन यीशुएरे चेले बरत न थिये रखते। किछ लोकेई यीशु कां एइतां तैस पुच्छू, “यूहन्नारे चेले ते फरीसी लोकां केरे चेले बरत रखतन, पन तेरे चेले बरत की न रखन?” 19 यीशुए तैनन् जुवाब दित्तो, “इलाएरे दिहाड़े, ज़ैखन लाड़ो जैनी सेइं साथी राते, कुन तैना बरत रेख्खी सकतन? (बिलकुल नई) तैल्हेरेलेइ, ज़ांतगर लाड़ो तैन सेइं साथी राते, तांतगर तैना बरत न रेख्खी सकन। (किजोकि तैना खुशी आन।)

20 मेरे चेले भी तैन केरे ज़ेरे आन, किजोकि अवं तैन सेइं साथी आई। पन तैना दिहाड़े एज्जले, ज़ैखन लाड़ो तैन केरां अलग कियो गालो (यानी मारो गालो), तैस मौके तैना (अपने दुख्खेरे वजाई सेइं) बरत रख्खेले।” 21 “अवं तुसन अक होरि मिसाल देताई, नंवे लिगड़ेरी टलोई पुराने लिगड़े कोई न लाए। अगर कोई एन्चरां केरे, त धोनेरे पत्ती नंवे लिगड़ेरी टलोई पुराने लिगड़े अपने पासे खिच्ची छङ्गेली। त तैन पेइले केरां भी जादे छिन्दोलू। 22 तेन्ज़रे कोई भी पुरैनी मसकन मां नंवे दाढ़रो रस न रखे, किजोकि दाढ़रो रस अम्लो भोइतां फुलते बार मसकन छिन्दी छङ्गेलो। दाढ़रे रस त कने मसकां, एना दुइये बरबाद भोइ गाले। एल्हेरेलेइ नंवे दाढ़रे रस हमेशा नंवे मसकन मां रख्खोरो लोड़े, ताके मसकन न छिन्दे।” 23 एककी आरामेरे दिहाड़े, यीशु त कने तैसेरे चेले बत्ती मांमेइं चलने लग्गेरे थिये, जै गेंवां केरे ऊडारन मांमेइं

थी। च्छलते-च्छलते तैसेरे चेले गेंवां केरे किछ शिल्लां ट्लोडतां खाने लगे। 24
 पन किछ फरीसी लोकेई तैन हेरतां यीशु सेइं ज़ोवं, “तक! एना आरामेरे
 दिहाडे तैन कम किजो केरतन, जैन मूसेरे कानूनेरे मुताबिक जेइज नई?”
 25 यीशुए तैन सेइं ज़ोवं, “कुन तुसेई परमेशरेरी किताबी मां एन कधी नई
 पढ़ोरुए कि (बडे पेइले) दाऊद राजे कुन कियूं, जैखन तैस त तैसेरे सैथन
 ढलुख लगी त तैनन् रोट्री ज़रूरत थी? 26 तुसन पतोए कि दाऊद राजे
 परमेशरेरे घरे मां गेइतां, अवियातार नंवेरे महायाजक करां खाने जो रोटी
 मग्गी। दाऊदे तै रोटी खाइ, जै परमेशरे जो चङ्गोरी थी। कानूनेरे मुताबिक
 याजक केरे अलावा होरि केन्ची तैना रोटी खानेरी अज़ाज़त नई थी। पन
 दाऊदे अपने सैथन भी रोटी दित्ती त तैनेई भी तैना रोटी खेइ? (पन फिरी भी
 परमेशरे दाऊदे पुड़ दोष न लाव।)” 27 तैखन यीशुए तैन फरीसी लोकन सेइं
 ज़ोवं, “परमेशरे आरामेरी दिहाडी लोकन मद्दत केरनेरे लेइ बनोरीए, न कि
 आरामेरे दिहाडेरे कानून मन्नेरे लेइ तैनी लोक रँगे। 28 एल्हेरेलेइ, मैनेरू मटू
 यानी अवं आरामेरे दिहाडेरो भी प्रभु आई।”

3 तैल्ला पत्ती, यीशु एककी प्रार्थना घरे मां जेव। तैडी अक मैन्हु थियो, जेसेरो
 हथ शुक्कोरे थियो। 2 तैडी किछ फरीसी लोक भी थिये, जैना यीशु पुड़
 इलज़ाम लानो चाते थिये। एल्हेरेलेइ तैना यीशु ध्याने सेइं हेरने लगोरे थिये
 कि आरामेरे दिहाडे तै तैस मैन्हु बज़्जाते की नई। 3 तैखन यीशुए शुक्कोरे
 हथ्थेबाले मैन्हु सेइं ज़ोवं, “मझाटे खड़े भो।” (तै तै मैन्हु खड़ो भोव।) 4 त
 यीशुए तैन लोकन पुच्छू, “आरामेरे दिहाडे कुन केरनू जेइजे, मैनेरू भलू केरनू
 या बुरू केरनू, मैनेरी जान बचानी या मारनी?” पन तैना चुप राए। 5 त तैनी
 सरकी सेइं तैन केरे चेत्रे पासन तक्कू, पन तैन केरे सखत दिलेरी वजाई सेइं
 उदास भोव। तैखन तैनी तैस मैन्हु सेइं ज़ोवं, “अपनो हथ अग्रोवं केर।”
 तैनी मैने अपनो हथ अग्रोवं कियो। त अकदम तैसेरो हथ बेज़ज़ोव। 6 तैखन
 फरीसी लोक प्रार्थना घरे मरां बेझर जे। अकदम तैना हेरोदेस राजेरे लोकन
 सेइं साथी यीशुएरे खलाफ साज़िश केरने लगे कि यीशुएरो कोस तरीके सेइं
 कल्ल केरम। 7 तैल्ला पत्ती, यीशु अपने चेलन सेइं साथी गलील समुन्दरेरे
 पासे जेव। मैन्हु केरि बड़ी भीड़ तैस पत्ती चली। गलील त यहूदिया इलाकां
 केरे लोक तैस कां आए। 8 यरुशलेम नगरेरे लोक, इदूमिया इलाकेरे लोक ते

यरदन दरियारे पारेरे लोक त कने सूर त सैदारे आसेपासेरे लोक भी तैस कां ओरे थिये। तैना सब यीशु कां आए, किजोकि तैनेई यीशुएरे सारे चमत्कारेरे कम्मां केरे बारे मां शुनोरु थियूं जैना तै केरतो थियो। 9 यीशुए बड़े लोक हथ लेइतां बज्झावरे थिये, एल्हेरेलेइ होरे बड़े लोक जैना बड़े बिमार थिये, तैना तैस सेइं हथ लानेरे लेइ तैस पुड़ बिछुड़ी गाते थिये, ताके तैना भी बेज्झोन। मैन्हु केरि भीड़ बड़ी जादे थी। एल्हेरेलेइ यीशुए अपने चेलन सेइं ज़ोवं, “मेरे लेइ अक किश्ती तियार केरा, ताके एना लोक मीं ढुलेन्ही न सकन।” 11 त जैन लोकन पुड़ भूतां केरो सायो थियो, तैना भी यीशु लेइतां तैसेरे पावन पुड़ बिछुड़ी गाते थिए। तैना भी ज़ोरे-ज़ोरे सेइं ज़ोते थिए कि, “तू परमेश्वरू मटू आस।” 12 यीशुए तैन भूतन सखत हुक्म दित्तो कि, “मेरे बारे मां लोकन न ज़ोथ कि अवं कौन आई।” 13 तैल्ला पत्ती, यीशु एककी पहाड़े पुड़ चढ़ो। जैना मैनन् तै अपने चेले बनानो चातो थियो, तैना एप्पू कां कुजाए। तैना तैस कां आए। 14 यीशुए तैन मरां 12 मडद चुने, ते तैन प्रेरित नवं दित्त कि तैना तैस सेइं साथी-साथी रान, ताके तै तैन लोकन खुशखबरी शुनाने भेज़े। 15 यीशुए तैनन्, लोकां केरि बिमैरी बज्झाने त कने मैनन् मरां भूतां केरो सायो कढनेरो अधिकार दित्तो। 16 तैना 12 मैन्हु केरां नंवां इना थियां: शमौन ज़ेसेरू नवं यीशुए पतरस रखू, 17 याकूब त तैसेरो ढला यूहन्ना, एना दुइये जेब्देरां मटूं थियां, त यीशुए एन दुइयां केरु नवं बुअनरगिस रखू, मतलब कि, गुडनेरां मटूं। 18 त अन्द्रियास, फिलिप्पुस, बरतुल्मै, मत्ती, थोमा, याकूब जैन हलफईसेरू मटू थियूं, त तदै, शमौन जै पेइले रोमी सरकारारे खलाफ यहूदी लोकां केरि आज़ैदेरे लेइ लड़नेबालो थियो। 19 त कने यहूदा इस्करियोती जैनी बादे मां यीशु धोखे सेइं ट्लुवाव। 20 तैल्ला पत्ती यीशु कफरनहूम नगरेरे एककी घरे मां जेव। किरी मैन्हु केरि भीड़ तैस घरे मां अकोट्टी भोइ, कि यीशु त तैसेरे चेलन रोट्टी खानेरे लेइ भी मौको न मैल्लो। 21 जैखन यीशुएरे रिश्तेदरेर्ई एन शुनू, त तैना तैस ट्लेइतां अपने घरे वापस आन्नेरे लेइ जे, किजोकि तैना ज़ोने लगगोरे थिये कि तैसेरो दिमाग ठीकाने नई। 22 किछ शास्त्री लोक, जैना यरुशलेम नगरेरां ओरे थिये, तैना लोकन सेइं ज़ोई राओरे थिये कि, “यीशु मां शैतान आए।” त एन भी ज़ोई राओरे थिये कि, “ते भूतां केरे प्रथानेरी शेंकि सेइं लोकन मरां भूतां केरो सायो कढते।” 23 एल्हेरेलेइ

यीशुए तैना नेडे कुजाए ते तैन मिसाल देइतां ज्ञोने लगो, “शैतान केन्वरां अपने भूतन लोकन मरां केही सकते? 24 अगर एककी राज्जेरे लोक अपने राज्जेरे खलाफ लड़ाई केरन, त तैन राज्ज बनोरु न रेझ सके। 25 अगर केन्वरा टब्बरेरे लोक अपने टब्बरेरे खलाफ लड़ाई केरन, त तैन टब्बर भी बनोरु न रेझ सके। 26 तेन्वरे, शैतान भी अगर एप्पू अपने भूतां केरे खलाफ लड़ाई केरे, त तै केन्वरां बनोरो रेझ सकते? तैसेरो त बिलकुल खातमों भोइ गालो। 27 अवं होरि मिसाल देताई, कोई मैन्हु केन्वी ज़ोरेबाले मैनेरे घरेरे मां गेझतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैन्हु बेंधी न छङ्गे। तैखन तै तैस ज़ोरेबाले मैनेरो माल लुट्टी सकते। अवं भी शैतानेरे भूतां केरो सायो लोकन मरां केही सकतां। (शैतान तैस ज़ोरेबाले मैनेरो ज़ेरोए)

28 अवं तुसन सेहं सच्च ज़ोताई कि मैन्हु केरे सारे किसमां केरे पाप त कने परमेशरेरी तुहीन, ज़ै तैना केरतन, अगर तैना मन फिरान त परमेशर तैन माफ केरेलो। 29 पन जै कोई पवित्र आत्मारी तुहीन केरे, त तैस कधी भी परमेशर माफ न केरेलो। पन तै मैन्हु हमेशारे पापेरो दोषी बेनि गालो।” (aiōn g165, aiōnios g166) 30 यीशुए एन्वरां ज़ोवं किजोकि तैना यीशुएरे बारे मां एन ज़ोते थिये कि तैस पुड़ भूतेरो सायो आए। 31 तैखन यीशुएरी अम्मा त कने तैसेरे ढला तैडी आए। तैना घरेरे बेदर खडे भोइतां तैस जो बिस्तार भेजो। 32 तैना घरेरे अन्तर न गेझ सके किजोकि मैन्हु केरि भीड़ यीशुएरे चेव्रे पासन बिश्शोरी थी। एल्हेरेलेह तैन लोकेई यीशु सेहं ज़ोवं, “तक, तेरी अम्मा त तेरे ढला बेदर खडे आन। तैना तीं सेहं मिलनू चातन।” 33 पन यीशुए तैनन् जुवाब दित्तो, “अवं तुसन ज़ोताई मेरी अम्मा त कने मेरे ढला कौन आन!” 34 तैखन यीशुए तैन लोकां केरे पासे तेकतां ज़ोवं, ज़ैना तैसेरे चेव्रे पासन बिश्शोरे थिये, “तक्का, मेरी अम्मा त कने मेरे ढला इना आन। 35 किजोकि जै कोई परमेशरेरी मेज़री पुड़ चलते, तैए मेरो ढला, मेरी बेइन ते मेरी अम्मा आए।”

4 तैल्ला पत्ती, यीशु फिरी गलील समुन्दरेरे बन्ने लोकन शिक्षा देने लगो। मैन्हु केरि एत्री भीड़ तैस कां अकोट्टी भोइ। यीशु समुन्दरे मां एककी किश्ती मां चढ़ो ते बिश्शी जेव, ताके तै सेढभी लोकन परमेशरेरी गल्लां केरि शिक्षा देझ सके। मैन्हु केरि सारी भीड़ तैसेरी गल्लां शुन्तां समुन्दरेरे बन्ने पुड़ खडी राई। 2 यीशुए तैनन् बेडि गल्लां मिसालन मां ज़ोई। तैनी शिक्षा देइतां तैन

लोकन सेइं ज्ञोवं, ३ “ई कहानी शुना! एकसां अक बीज़ बेनेबालो बीज़ बेने
 जो जेव। ४ बीज़ बेते बार किछ बीज़ बत्तेरे ड्लेखी बिछू त चुड़ोल्लोई एइतां
 तैन बीज़ चुनू। ५ किछ बीज़ घोड़नबाली ज़मीनी पुड़ बिछू, ज़ेड़ी तैस दुग्धी
 मित्ती न मेलनेरे वजाई सेइं तैन लूशी उगू त बूटो लगो। ६ पन ज़ैखन दिहाड़ो
 निस्सो, त तै निकड़ो बूटो फुक्कोई जेव। ते ज़ील न छड़ुनेरे वजाई सेइं शुक्की
 जेव। ७ होरु किछ बीज़ कंटां केरे झैल्लन मां बिछू। ज़ैखन तैड़ी बूटो लगो,
 त कंटां केरे झैल्लोई बेड़ोइतां तै बूटो दबेइ छड़ो, त तैनी बुटे फल न दित्तो। ८
 पन किछ बीज़ रोड़ी ज़मीनी पुड़ बिछू, त तैन उगू त बेडोवं त फलदार
 भोवं। तैन मरां केन्वी बीज़े ट्लही गुणा फल दित्तो, त केन्वी बीज़े शठ गुणा,
 त केन्वे शौव गुणा।” ९ ए मिसाल शुनानेरे बाद, यीशुए लोकन सेइं ज्ञोवं, “ज़ै
 कोई समझनू चाते, तै ध्याने सेइं शुने त समझो।” १० तैल्ला पत्ती, ज़ैखन
 यीशु मैन्हु केरि भीड़ी करां अलग थियो, त तैखन तैसेरे सैथर्इ त कने तैसेरे
 १२ चेलेर्इ यीशु तैस मिसालेरे बारे मां पुच्छू। ११ यीशुए तैन सेइं ज्ञोवं, “अवं
 तुसन परमेशरेरे राज़ज़ेरो भेद समझोईलो। पन होरि लोकां केरे लेइ मिसालन
 मां ज्ञोवं गाते। १२ ताके ज़ेन्वरां परमेशरेरी किताबी मां लिखोरुए तेन्वरां भोए
 कि, ‘ज़ैन अवं केरतई, तैन तैना बार-बार हेरेले, पन तैना तैसेरो मतलब न
 बुझ़ोले। ज़ैन अवं ज़ोतई, तैन तैना बार-बार शुनेले, पन मेरी गल न समझ़ोले।
 एरु न भोए कि तैना अपने पापन करां मन फिरान त तैन केरे पाप माफ़ किये
 गान।’” १३ तैल्ला पत्ती, यीशुए तैन सेइं ज्ञोवं, “कुन तुसेई तै मिसाल न
 समझी? अगर तुस तैस मिसाली न समझथ, त फिरी होरि सब मिसालां
 केन्वरां समझोले? १४ अवं तुसन तै मिसाल समझताई। बीज़ बेनेबालो तै
 आए, ज़ै परमेशरेरी गल्लां लोकन शुनाते। १५ ज़ैना मैन्हु परमेशरेरी गल्लां
 शुन्तन, तैन मरां किछ लोक तैस बत्तेरे ज़ेरे आन, ज़ेड़ी बीज़ बिछूड़ते। तैना त
 परमेशरेरी गल्लां शुन्तन, पन शैतान अकदम एइतां तैन मैन्हु केरे दिले मरां
 परमेशरेरी गल्लां केढ़ी छ़ड़ते। १६ किछ होरे लोक, ज़ैना परमेशरेरी गल्लां
 शुन्तन, तैना तैस घोड़नबैली ज़मीनेरे ज़ेरे आन। तैना परमेशरेरी गल्लां शुन्तन
 त खुशी सेइं तैन कबूल भी केरतन। १७ पन ज़ेन्वरां निकड़ो बूटो घोड़नबैली
 ज़मीनी मां मित्ती घट भोनेरे वजाई सेइं लूशी लगते, तेन्वरां एना मैन्हु भी
 भोतन। तैना मजबूत विश्वास न रखन। एल्हेरेलेइ तैना थोड़े दिहाड़न तगर

विश्वास रखतन। पन ज़ैखन परमेशरेरी गल्लां केरे मुताबिक च्छलनेरे वजाई सेइं तैन पुड मुसीबतां एच्चन त कने ज़ैखन लोकन केरां सताए गातन, तैखन तैना अकदम अपने विश्वास छेडतां ठोकर खातन। 18 होरे किछ लोक, ज़ैना परमेशरेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। तैना परमेशरेरी गल्लां त शुन्तन, 19 पन तैना इस दुनियारी फिक्र केरतन, त कने दौलतरे वजाई सेइं धोखो खातन, त तैना बड़े चीज़ां केरु लालच केरतन। एसेरे वजाई सेइं तैना परमेशरेरी गल्लां बिसरी छङ्गतन त तैन गल्लन पुड न च्छलन। (aiōn g165) 20 पन किछ लोक, ज़ैना परमेशरेरी गल्लां शुन्तन त कने तैन पुड च्छलतन, तैना तैस रोड़ी ज़मीनेरे ज़ेरे आन। तैना परमेशरेरी गल्लां शुन्तन त कबूल भी केरतन त फल देतन, मतलब की तैना परमेशरेरी गल्लां केरे मुताबिक ज़िन्दगी ज़ीतन। कोई टलही गुणा, कोई शठ गुणा त कोई शौव गुणा फल देतन।” 21 तैल्ला पत्ती, यीशुए मैन्हु केरि भीड़ी सेइं ज़ोवं, “कोई बलतो दीयो एन्तां हेटी मां या खट्टी हठ न रख्खे। पन केन्ची उच्ची ठैरी पुड रख्खो गाते। (ताके सारे घरे लौ भोए।) 22 कोई गल छ़प्पोरी न राली, पन सैरी गल्लां बेंटी भोली, ते न कोई भेद छ़प्पोरो रालो, पन सारो भेद बांदो भोलो। 23 ज़ै कोई समझनू चाते, तै ध्याने सेइं शुने त समझो!” 24 तैल्ला पत्ती, यीशुए मैन्हु केरि भीड़ी सेइं ज़ोवं, “होशियार राथ कि अवं तुसन कुन शिक्षा देइ राओरोई। मेरी शिक्षाई शुन्तां, ज़ेत्री तुस मेरी गल मन्नेले तेत्री परमेशर तुसन समझ देलो। हाँ, परमेशर तुश्शी समझ होरि भी बधालो। 25 किजोकि जैस कां परमेशरेरी मर्जी समझनेरी इच्छा आए, तैस परमेशर जादे समझ देलो। पन जैस कां परमेशरेरी मर्जी समझनेरी इच्छा नई, तैस केरां, थोड़ी ज़ेरि समझ, ज़ै तैस कां आए, तै भी नी गाली।” 26 तैल्ला पत्ती, यीशुए मैन्हु केरि भीड़ी सेइं ज़ोवं, “परमेशरेरु राज एरु ज़ेरु आए, कि अक मैन्हु ज़मीनी पुड बीज़ बेते। 27 तै मैन्हु हर राती झुलते त दीसां बीँझते। तैन बीज़ उगने लगोरुए त बडोने लगोरुए, पन तैस पतो न चले कि तैन केन्चरां भोते। 28 केन्चरी मद्दतरे बगैर ज़मीन एप्पू फल आन्चे। पेइले मुन्केरे निस्तन, बादे मां शिल्लां निस्तन, तैल्ला पत्ती शिल्लन ग्लेव लगतन। 29 आखरी मां, ज़ैखन ग्लेव पेककी गातन, तैखन अकदम तै मैन्हु कटाई केरनेरे लेइ मैन्हु भेजते, किजोकि कटाईरो वक्त ओरो भोते।” 30 तैल्ला पत्ती, यीशुए मैन्हु

केरि भीढ़ी सेइं ज़ोवं, “अस परमेशरेरु राज्ज़ेरी मिसाल कोस चीज़ी सेइं देह सकतम? कोस मिसाली सेइं अस तैस समझेइ सकतम? 31 परमेशरेरु राज्ञे शेरीएरे बीज़ेरु ज़ेरु आए (ज़ै शेरीयो इस्त्राएले मां भोते)। ज़ैखन तैन बीज़ ज़मीनी मां बेव गाते, तैन सारे बीज़न केरां निकड़ू भोते। 32 पन ज़ैखन तैन बीज़ बेव गाते, तै उगतां सारे निकके-निकके बुट्टन केरां बहु भोते। तैसेरी एत्री बेहु डेलड़ी निस्चन, कि अम्बरेरां चुड़ोल्ली तैसेरी छावी मां अपने आले बनेइ सकतन।” 33 एन्ज़रां बेड़ि मिसालां ज़ोइतां, यीशु तैन लोकन परमेशरेरी गल्लां शुनातो थियो, ज़ेत्रू तैना शुनी सकते थिये। 34 तै हमेशा मिसाल देइतां परमेशरेरे राज्ज़ेरे बारे मां तैन सेइं ज़ोतो थियो। पन ज़ैखन मैन्हु केरि भीढ़ी मरां यीशु त तैसेरे चेले अलग बिश्ते थिये, तैखन यीशु अपने चेलन सेइं सैरी मिसालां केरो मतलब समझोतो थियो। 35 तैस दिहाड़ेरे बादे मां, ज़ैखन ड्लोझ्झ भोइ, यीशुए अपने चेलन सेइं ज़ोवं, “एज्जा, अस गलील समुन्दरे पार च्छलम।” 36 तैल्हेरेलेइ मैन्हु केरि भीढ़ छेडतां तैना तैस किश्ती मां च़ढ़े ज़ैस मां यीशु पेइलो थियो, त तैना तैट्टां च्छले जे। होरि किछ किश्ती मां भी लोक तैन सेइं साथी जे। 37 ज़ैखन तैना समुन्दर पार केरने लगोरे थिये, तैखन अक बहु तूफान च्छलो, त छेल्ली एड़ी तगर पुज्जी कि किश्ती पैनी सेइं भेरोई जेर्द। 38 पन यीशु किश्तेरी पेत्री पासे, शेराहने पुड़ क्रोड़ी रेखतां झुल्लोरो थियो। तैखन तैसेरे चेलेर्द तै बींझेइतां तैस सेइं ज़ोवं, “हे गुरु, कुन तीं फिक्र नई, अस त मरने बालेम!” 39 तैखन यीशुए उठतां तूफान डांटो, त समुन्दरे सेइं ज़ोवं, “शान्त रा, रुकी गा!” अकदम तूफान रुकी जेव त समुन्दर शान्त भोव। 40 तैखन यीशुए अपने चेलन सेइं ज़ोवं, “तुस किजो डरतथ? कुन तुसन हेजू भी मीं पुड़ विश्वास नई?” 41 पन तैना बड़े डेरि जे त एपू मांमेहुं ज़ोने लगे, “ए मैन्हु कौन आए कि तूफान त समुन्दर भी एसेरो हुक्म मन्तन!”

5 यीशु त तैसेरे चेले गलील समुन्दरे पार, गिरासेनी इलाके मां पुज्जे। 2 ज़ैखन यीशु किश्ती पुड़ेरां ओस्सो, त तैखन अक मैन्हु, ज़ैस पुड़ भूतां केरो सायो थियो, कब्रन मांमेहुं यीशु कां मिलने अव। 3 तै मैन्हु कब्रस्ताने मां रातो थियो। (तै मैन्हु बड़ो खतरनाक थियो।) कोई तैस शंगली सेइं भी न बेंधी सकतो थियो। 4 किजोकि (पेइले बड़े बार) लोकेर्द तैसेरे हथ पाव शंगलन

सेइं बंधोरे थियो। पन हर बार तै हथ्थां केरि शंगलां ट्लोड़तो थियो त पब्वा
 केरि शंगलां केरे टुकड़े-टुकड़े केरतो थियो। कोई तैस कैबू न केरि सकतो
 थियो। ५ तै हमेशा रात-दिहाड़ी कब्रस्ताने मां त कने पहैड़न पुडमेइं हन्ठतो
 थियो त चिन्डां मारतो थियो, त अपने आपे घोड़न सेइं ज़ख्मी केरतो थियो।
 ६ जैखन तैनी मैने यीशु दूरेरां लाव, त तै दौड़तां यीशु कां अव ते तैस कां
 मथ्थो टेको। ७ यीशुए भूते सेइं ज़ोवं, “हे भूता, एस मैन्हु मरां निस्सी गा!”
 तैनी भूते ज़ोरे सेइं चिन्डां मेरतां ज़ोवं, “हे यीशु, परमप्रधान परमेशरेगा मठा,
 मीं तीं सेइं कुन कम? अवं तीं परमेशरेरी कसम देताई, मीं दुख न दे।” ९
 एल्हेरेलेइ यीशुए तैस पुच्छू, “तेरु कुन नवं आए?” तैनी यीशु सेइं ज़ोवं, “मेरु
 नवं फौज आए, किजोकि अस बड़े आम।” १० तैखन तैनी यीशु कां बड़ी
 मिन्नत की, “इस इलाके मरां असन बेइर न भेज़।” ११ तैड़ी पहैड़ी पुड़ सूरां
 केरो अक बड़ो घान चेरी राहोरो थियो। १२ तैल्हेरेलेइ तैन भूतेई यीशु कां
 मिन्नत की, “महरबानी केरतां असन उन सूरन मां भेजी दे ताके अस उन मां
 गाम!” १३ तैखन यीशुए तैनन् सूरन मां गानेरी अज़ाज़त दित्ती, त तैना भूतां
 तैस मैन्हु मरां निस्तां सूरन मां जेआं। तैखन सूरां केरो घान, ज़ैस मां लगभग
 दूर्ध हज़ार सूर थिये, टिब्बे पुड़ेरां बिछड़तां अकदम समुन्दरे मां डुबतां मेरि जे।
 १४ जैखन सूरां केरे चारनेबालई एन हेरु, त तैना डेरि जे। तैनेई तैटूं नेशतां
 नगरी मां त कने आसेपासेरे ड्लोंव्वन मां ए खबर शुनाई। तैल्हेरेलेइ लोक
 एप्पू हेरनेरे लेइ तैड़ी आए। १५ जैखन नगरेरे लोक यीशु कां पुज्जे, त तैस
 मैन्हु, ज़ैस मां पेइले भूतां केरि फौजेरो सायो थियो, हुनी लिगड़ां लग्गोरे त
 कने होशी मां लेइतां डेरि जे। १६ जैनेई तैना गल्लां पेइले लेवरी थी, तैनेई तैस
 मैनेरे बारे मां जैस पुड़ भूतेरो सायो थियो त कने तैन सूरां केरे बारे मां पूरो
 हाल लोकन शुनाव। १७ तैना यीशु कां मिन्नत केरतां ज़ोने लग्गे कि, “इश्शे
 इलाके मरां चेलि गा!” १८ जैखन यीशु वापस गानेरे लेइ किश्ती मां च़ढ़ने
 लगे, त तैनी मैने जैस मां पेइले भूतां केरो सायो थियो, यीशु कां मिन्नत की
 कि, “मीं एप्पू सेइं साथी चलने दे।” १९ पन यीशुए तै एप्पू सेइं साथी चलने
 न दित्तो। पन तैनी तैस सेइं ज़ोवं, “अपने घरे जो गा त कने अपने लोकन सेइं
 जो, कि प्रभु परमेशरे तीं पुड़ दया केरतां तेरे लेइ केन्त्रू बहू कम कियोरुए।”
 २० एल्हेरेलेइ तै मैन्हु गेइतां दिकापुलिस इलाके मां लोकन शुनाने लगो कि

यीशुए मेरे लेइ केनू बहु कम कियोरुए। सारे लोक ए गल शुन्तां हैरान भोइ
 जे। 21 तैल्ला पत्ती, यीशु फिरी किश्ती मां गलील समुन्दरे इस पासे वापस
 अव, त मैन्हु केरि बड़ी भीड़ तैस कां अकोट्ठी भोइ। यीशु समुन्दरे बन्ने पुड़
 थियो। 22 तैखन याईर नंव्वेरो मैन्हु तैड़ी अव, जै यहूदी लोकां केरे प्रार्थना
 घरेरे प्रधान्म मरां अक थियो। जैखन तैनी यीशु लाव, त तैसेरे पावन पेव। 23
 तैनी एन ज्ञोइतां यीशुए सेइं बड़ी मिन्नत की, “मेरी निकड़ी कुई मरनेबाली
 आए। तू मीं सेइं साथी इहतां तैस पुड़ अपनो हथ रख, ताके तै बेझ़गोए ते
 ज़ींती राए।” 24 एल्हेरेलेइ यीशु तैस सेइं साथी तैसेरे घरे जेव। मैन्हु केरि
 अक बड़ी भीड़ यीशु पत्ती चली, इड़ी तगर कि लोक यीशु पुड़ बिछ़ड़ते थिये।
 25 तैस भीड़ी मां अक कुआन्श भी थी, जैस 12 सालां केरि खून चलनेरी
 बिमारी थी। 26 तैसां बड़े बेइदन केरां बड़ो दुख झाल्लो। बिमारी ठीक भोनेरे
 लेइ तैसां अपने सब पेंइसे खेच्ची दित्ते, पन तैस कोई फैइदो न भोव। पन तै
 होरि भी जादे बिमार भोइ जेई। 27 तै यीशुएरे बारे मां शुन्तां अपने दिले मां
 ज़ोती थी, “अगर अवं सिर्फ तैसेरे लिगड़े सेइं हथ लाएली, त अवं बेझ़गोई
 गाली।” एल्हेरेलेइ तै मैन्हु केरि भीड़ी मां यीशुएरे पत्रेवरां आई ते तैसेरे लिगड़े
 सेइं हथ लाव। 29 जैखन तैसां यीशुएरे लिगड़े सेइं हथ लाव, त अकदम
 तैसेरो खून चलनेरी बिमारी बेझ़गोई। तैसां अपनि जानी मां बुज़झू कि अवं तैस
 बिमारी केरां बेझ़गोरी आई। 30 यीशुए अकदम बुज़झू कि मीं मरां शक्ति
 निस्सोरीए। एल्हेरेलेइ तैनी मैन्हु केरि भीड़ी मां चेव्रे पासन मुड़तां लोकन
 पुच्छू, “मेरे लिगड़े सेइं केनि हथ लाव?” 31 तैसेरे चेलेई तैस सेइं ज़ोवं,
 “तू हेरतस कि मैन्हु केरि भीड़ तीं पुड़ बिछ़ड़ने लगोरी, फिर भी तू किजो
 पुछ़तस कि ‘केनि मीं सेइं हथ लाव?’” 32 पन यीशु तैस हेरनेरे लेइ, जैनी
 एरु कियोरु थियूं चेव्रे पासन तकने लगो। 33 तैखन तै कुआन्श डरती ते
 थर्कती थी, किजोकि तै ज़ानती थी कि तेसां मूसेरो कानून ट्लोड़रोए। तै
 अगर आई ते यीशुएरे पावन पुड़ बिछ़ड़तां, तैस सेइं सैरी गल्लां सच-सच
 ज़ोने लगगी। 34 पन यीशुए तैस सेइं ज़ोवं, “हे कुईए, तेरे विश्वासे, जै तीं मीं
 पुड़ रख्खोरो, तैनी तू बज़़ाई। खुशी सेइं घरजो गा, ते हुनी तू एस बिमारी
 केरां बेची जेई।” 35 ज़ताली यीशु ई गल मसां ज़ोई राओरो थियो, तैखन
 प्रार्थना घरेरे लीडरेरे घरेरां किछ मैनेई इहतां तैस सेइं ज़ोवं, “तेरी कुई मेरि

जोरीए, हुनी गुरु किजो तकलीफ देतस?” ३६ पन यीशुए तैन केरि गल न शुन्तां प्रार्थना घरेरे लीडरे सेइं ज़ोवं, “न डर। सिफ मीं पुड़ विश्वास रख।” ३७ यीशु ते याईर च्छलने लगे, पन यीशुए पतरस, याकूब ते तैसेरो ढला यूहन्नारे अलावा, होरो कोई एप्पू सेइं साथी एजने न दितो। ३८ प्रार्थना घरेरे लीडरेरे घरे मां पुज्जां यीशुए हल्लो मच्चोरो लाव ते कने लोक बड़े लेरां देते त शोग केरते लाए। ३९ तैखन यीशुए घरे मां गेइतां तैन सेइं ज़ोवं, “तुस किजो रोलो मच्चातथ त लेरां देतथ? कुई मर्री नई, पन झुल्लोरीए।” ४० जैखन तैन लोकेई एन शुनू, त तैना तैसेरो मज़ाक बनाने लगे, किजोकि तैना ज्ञानते थिये कि कुई मेरि जोरीए। तैखन यीशुए सारे मैन्हु तैटुं केढतां, सिफ कुईअरे हाज-बव त कने अपने ट्लाई चेलन सेइं साथी कमरेरे अन्तर जेव, ज़ेडी कुई पेत्री थी। ४१ तैखन यीशुए कुईएरो हथ ट्लेइतां तैस सेइं अपनि भाषाई मां ज़ोवं, “तलीता कूमी!” ज़ेसेरो मतलब कि, “हे निकड़ी कुईए, अवं तीं सेइं ज़ोतई, खड़ी उठ!” ४२ अकदम कुई उठतां च्छलने फिरने लगी, किजोकि तै कुई १२ सालां केरि थी। एन हेरतां तैना बड़े हैरान भोए। ४३ पन यीशुए तैन हुक्म देइतां ज़ोवं कि, “ए गल केन्ची सेइं न ज़ोइयथ। एस कुईए किछ खाने जो देथ।”

६ तैल्ला पत्ती, यीशु तैटुं निस्तां अपने नगर नासरते जो जेव। तैसेरे चेले तैस सेइं साथी च्छले। २ आरामेरे दिहाडे, यीशु तैन केरे प्रार्थना घरे मां गेइतां तैन लोकन परमेश्वरी गल्लां केरि शिक्षा देने लगो। तैसेरी शिक्षा शुन्तां बड़े लोक हैरान भोए ते एक्की होरि पुछ्ने लगे, “एनी मैने एना गल्लां कोटुं शिख्खी? एस एत्री अक्ल कोटुं आई? एस एत्रे चमत्कार केरनेरी शक्ति कोटुं मैल्ली!” ३ ए त ट्लखान आए, जैन मरियमारू मटू आए। ए त याकूब, योसेस, यहूदा, ते शामौनेरो ढला आए! एसेरी बेइनां भी इश्शे इडी रेइचना!” एल्हेरेलेइ तैनेई यीशुएरो इन्कार कियो। ४ तैखन यीशुए तैन लोकन अक कहावत ज़ोई, “नबी बेइरीए लोकन मां इज्जतदार भोलो, पन अपने नगरेरे लोकन केरां ते कने अपने रिश्तेदारन केरां त कने अपने घरेबालन मां बेइज्जत भोलो।” ५ तैन लोकेई यीशु पुड़ विश्वास न केरनेरे वजाई सेइं, तैनी तैस नगरी मां सिफ थोड़े ज़ेरे बिमार मैनन् पुड़ हथ रेखतां तैना बज्ज्ञाए, तैन केरे अलावा होरो कोई चमत्कार न केरि सको। ६ यीशु नासरत नगरेरे लोकां केरो अविश्वास

हेरतां हैरान भोव। तैल्ला पत्ती, तै अपने चेलन सेइं साथी चेव्रे पासन केरे ड्लोंब्वन मां परमेशरेरी गल्लां केरि शिक्षा देतो राव। 7 तैल्ला पत्ती, यीशुए अपने 12 चेले एप्पू कां कुजेइतां, तैन दूई-दूई केरतां भेज्ने लगो। भेज्ने केरां पेइले, तैनी अपने चेलन, लोकन मरां भूतां केरो सायो कढनेरो अधिकार दित्तो। 8 ते तैनी तैन हुक्म दित्तो, “बत्तां चलते-चलते सोटेरे अलावा होरु किछ न नेइयथ। न रोट्टी न झोलो त कने बेट्वे मां पेंझेसे भी न नेइयथ। 9 पन बूट लेइयथ, पन दूई-दूई कुरते न लेइयथ। 10 जैखन तुस केन्वी ड्लोंब्वे मां गाथ, अगर कोई अपने घरे बिश्नेरेलेइ तुसन कुजाए, त तैससे घरे मां बिश्शथ, जांतगर तैस ड्लोंब्वेरां न निस्सथ। 11 अगर केन्वी ड्लोंब्वेरे लोक तुसन कबूल न केरन त कने तुश्शी गल्लां न शुनन्, त तैटुं चलते-चलते तुस अपने पावां केरि धूड़ झेड़ी छेड्हथ ताके तैन केरे खलाफ गवाही भोए। (अवं तुसन सेइं सच ज़ोतई कि परमेशरेरे आदालतरे दिहाड़े बुरे लोकन सज्जा देलो, जैना सदोम त कने अमोरा नगरन मां रहते थिये। पन जैना लोक तुश्शी गल्लां न शुनेले, तैस नगरेरे लोकन परमेशर बड़ी जादे सज्जा देलो))” 12 यीशुएरो हुक्म शुन्नेरे बाद, तैनेई तैटुं निस्तां बड़े नगरन मां गेइतां लोकन परमेशरेरी गल्लां शुनेई कि, “तुस अपने पापन करां मनफिराथ।” 13 ते तैनेई बड़े लोकन मरां भूतां केरो सायो भी कहु, त कने बड़े बिमार मैनन् पुड़ तेल लेइतां बज्ज्ञाए। 14 हेरोदेस राजे भी यीशुएरे बारे मां शुनू किजोकि यीशुएरु नंव मुशूर भोरु थियूं। तैनी यीशुएरे बारे मां ज़ोवं कि, “शायद, यूहन्ना, जै बपतिस्मो देनेबालो थियो, मुड्दन मरां ज़ींतो भोरोए। एल्हेरेलेइ, तै एना चमत्कार केरि सकते।” 15 होरेई मैनेई यीशुएरे बारे मां ज़ोवं कि, “शायद, तै मैन्हु एलिय्याह नबी आए!” पन किछ होरेई मैनेई ज़ोवं कि, “तै त पराने ज़मानेरे परमेशरेरी गल्लां ज़ोनेबालां केरो ज़ेरो अक नबी आए!” 16 पन हेरोदेस राजे लोकां केरि गल्लां शुन्तां ज़ोवं कि, “तै मैन्हु त यूहन्ना आए, ज़ेसेरी क्रोड़ी मीं कटेव्री थी। तै मुड्दन मरां ज़ींतो भोरो आए!” 17 हेरोदेस राजे एन्चरां सोचू किजोकि थोड़े दिहाड़ना पेइले, तैनी एप्पू अपने सिपाही भेज्तां यूहन्ना कैद केरतां छहुरो थियो। तैनी अपने ढुला फिलिप्पुसेरी लाडी हेरोदियासेरी वर्जाई सेइं एन्चरां कियोरु थियूं, जैस सेइं तैनी डुला बनोरो थियो। 18 एल्हेरेलेइ, यूहन्ना हेरोदेस राजे सेइं बार-बार ज़ोतो थियो कि, “तीं अपने ढुलाएरी लाडी सेइं डुला बनानो

जेइंज़ नर्दृ।” 19 तैल्हेरेलेइ हेरोदियास रानी यूहन्ना सेइं दुश्मनी रखती थी ते तैस कत्तल केरनो चाती थी। पन तै तेन्वरां न केरि सकती थी, 20 किजोकि हेरोदेस राजे पतो थियो कि यूहन्ना अक धर्मी ते पवित्र मैन्हु थियो। तैल्हेरेलेइ, हेरोदेस राजो तैसेरी बड़ी इज्जत केरतो थियो त कैदखाने मां हेरोदियास रैनी केरां बच्चेइतां रखतो थियो। त तै यूहन्नारी गल्लां शुन्तां बड़ो डरतो थियो, पन तैसेरी गल्लां खुशी सेइं शुन्तो भी थियो। 21 आखकरार यूहन्ना मारनेरो ठीक मौको मैल्लो। हेरोदेस राजे अपने ज़रमेरी दिहाड़ी मां अक धाम रख्खी। तैस धामी मां तैनी अपने बड़े खास अफसरन, त कने फौजी अफसरन, त कने गलील इलाकेरे बड़े-बड़े मैन्हु कुजाए। 22 तैखन हेरोदियास रैनेरी कुई तैस कमरे मां आई, ज़ेडी तैना बिश्शोरे थिये। त तैसां तैडी नेच्चतां हेरोदेस राजो त कने तैसेरे मेहमान खुश किये। तैखन राजे कुईए सेइं ज़ोवं, “ज़ैन तू चास मीं केरां मग, अवं तीं देलो।” 23 त राजे तैस कुईए सेइं कसम भी खाइ कि, “ज़ैन किछ तू मीं केरां मगली, अवं तीं देलो, इडी तगर कि अवं अपनू अथ्थू राजे भी देलो।” 24 तैल्हेरेलेइ तैस कुइयां बेइर गेइतां, अपनि अम्मा पुच्छू, “अवं हेरोदेस राजे केरां कुन मेग्गी?” तैखन तैसेरी अम्मा ज़ोवं, “यूहन्ना बपतिस्मो देनेबालेरी क्रोड़ी मग।” 25 अकदम तै कुई अन्तर राजे कां आई त तैस कां मिन्नत की, “अवं चाताई कि, तू यूहन्ना बपतिस्मो देनेबालेरी क्रोड़ी केटां एक्की थाले मां हुन्ना आन।” 26 तैसेरी गल शुन्तां राजो बड़ो दुखी भोव, पन अपनि कसमेरे वजाई सेइं त कने अपने मेहमानां केरे वजाई सेइं तैने इन्कार केरनो न चाव। 27 तैल्हेरेलेइ, तैनी अकदम एक्की सिपाही हुक्म दित्तो कि, “यूहन्नारी क्रोड़ी केटां आन।” 28 सिपाही कैदखाने मां गेइतां यूहन्नारी क्रोड़ी कट्टाई, त एक्की थाले मां रेखतां आनी त कुईए कां दित्ती। त कुइयां गेइतां अपनि अम्मा कां दित्ती। 29 ए गल शुन्तां यूहन्नारे चेले तैडी आए, त तैसेरी लाश नेइतां कब्री मां देब्बी छँड्ही। 30 परमेश्वरी गल्लां लोकन शुनानेरे पत्ती, यीशुएरे प्रेरित तैस कां वापस आए, ज़ैना तैनी भेज़ेरे थिये। ज़ैन किछ तैनेई लोकन सेइं कियोरु ते शिक्षा दित्तोरी थी, तैन सारी गल्लां यीशु सेइं शुनाई। 31 बड़े लोक यीशु त कने तैसेरे चेलन कां एइते गाते थिये। एस वजाई सेइं, तैनन् रोट्टी खानेरे लेइ भी मौको न थियो मैल्लोरो। तैल्हेरेलेइ यीशुए अपने चेलन सेइं ज़ोवं, “मीं सेइं साथी केन्ची अकेन्ची ठैरी एज्जा, त

थोड़ो ज़ेरो आराम केरा।” 32 एल्हेरेलेइ तैना किश्ती मां चेढ़तां, अकेन्ती ठैरी च्वेलि जे। 33 पन बड़े लोकेई यीशु त तैसेरे चेले गाते लेइतां पिशानी छऱ्हे कि तैना कोरां च्चलोरेन। तैल्हेरेलेइ, सारे नगरेरे मैन्हु पैदल दौड़तां तैन केरां पेइले तैड़ी पुज्जतां अकोट्हे भोए। 34 ज़ैखन यीशु किश्ती पुड़ेरां ओस्सो, त तैनी मैन्हु केरि अक बड़ी भीड़ लेइतां तैन पुड़ तरस खाव, किजोकि तैना मैन्हु तैन भैड़ां केरे ज़ेरे थिये, ज़ैन केरो कोई पुहाल न भोए। तैखन यीशु तैन लोकन परमेश्वरे राज़जेरे बारे मां बेड़ि गल्लां केरि शिक्षा देने लगो। 35 ज़ैखन दिहाड़ी डुबने लगोरी थी, त यीशुएरे चेलेई तैस कां एइतां ज़ोवं, “ई सुनसान ठार आए, ते च्चिर भी बड़ु भोरु आए। 36 एन मैन् भेज़, ताके एना चेव्रे पासां केरे बेस्तन त कने ड्लोंव्वन मां गेइतां अपने लेइ खाने जो रोटी घिन्न।” 37 पन यीशुए तैनन् जुवाव दित्तो कि, “तुस्से एन खाने जो रोटी देथ।” पन तैनेई तैस सेइं ज़ोवं, “कुन अस दूर्ध शौव दिहाड़ी केरि कमाई सेइं रोटी घिन्तां एन मैन् खुवाम? एन न भोइ सके!” 38 एल्हेरेलेइ, यीशुए तैन सेइं ज़ोवं, “तुसन कां केत्री रोटी आन? गेइतां हेरा।” पतो केरनेरे पत्ती, तैनेई यीशु सेइं ज़ोवं कि, “पंच रोटी त कने दूर्ध मेछ़ली आन।” 39 तैखन यीशुए अपने चेलन हुक्म दित्तो कि, “सारे मैन्हु नीले घासे पुड़ बिशाला।” 40 एल्हेरेलेइ तैना मैन्हु शौव-शौव त कने पज़ां-पज़ां केरि हुन्डी मां बिश्शी जे। 41 तैखन यीशुए अपने हथ्थे मां पंच रोटी ते दूर्ध मेछ़ली ट्लेइ, त अम्बरेरे पासे तेकतां शुक्र कियूं। तैल्ला पत्ती, यीशु तैना रोटी ट्लोड़तां चेलन कां देते जेव कि लोकन खाने जो देन। तेन्चरां दूर्ध मेछ़ली भी तैन सारे लोकन बेंटी दित्ती। 42 ते सारे मैन्हु खेइतां रेझ़ी जे। 43 तैल्ला पत्ती, यीशुएरे चेलेई बेच्चोरी रोटी त कने मेछ़ली केरे टुकड़न सेइं 12 टोकरी भेरि। 44 ज़ैनेई रोटी त मेछ़ली खेइ, तैन मां 5000 मढ़ थिये। 45 तैल्ला पत्ती, यीशुए अपने चेलन हुक्म दित्तो कि, “तुस किश्ती मां चेढ़तां मीं केरां पेइले समुन्दरेरे उस पार बैतसैदा नगरे जो च्चली गाथ, ज़ांतगर अवं एन लोकन न भेजी।” त तैना तैद्वां जे। 46 लोकन भेज़नेरे पत्ती, यीशु तैद्वां निस्तां नेडे एककी पहैड़ी पुड़ प्रार्थना केरनेरे लेइ जेव। 47 ज़ैखन ड्लोझ भोइ, त तै किश्ती, ज़ैस मां यीशुएरे चेले थिये, समुन्दरेरे मझाटे थी, त यीशु अकैल्लो ज़मीनी पुड़ थियो। 48 तैनी हेरु कि तैसेरे चेले किश्ती मां च्चेप्प देइ-देइ परेशान भोने लगोरेन, किजोकि

एग्रोवरां बड़ी तेज़ हवा चलोरी थी। लगभग द्वैज्ञोरे चेव्रे बजेई जैखन हेजू
 आंधरू थियूं यीशु समुन्दरेरे पैनी पुड़ चेलतां अपने चेलन कां अव। तै तैन
 केरां अग्रोवं निसू चातो थियो। 49 पन जैखन तैनेई यीशु समुन्दरेरे पैनी पुड़
 चलतो लाव, त तैनेई सोचो कि तै भूत आए। तैल्हेरेलेइ, तैनेई चिन्डां मैरी, 50
 किजोकि तैना सारे तैस हेरतां बड़े डेरि जोरे थिये। पन तैनी अकदम तैन सेइं
 गल्लां की ते ज़ोवं, “हिम्मत रखा! अव आई। डरा न!” 51 तैखन तै तैन केरि
 किश्ती मां च़ढ़ो, ते तूफान चलनो बन्ध भोइ जेव। तैखन चेले बड़े हैरान भोए,
 52 किजोकि तैनेई न थियूं समझोरु कि यीशु केन्वरां रोट्टी त कने मेढ़ली
 बधोरी थी, पन तैन केरे मन बेसमझ भोरे थिये। 53 तैल्ला पत्ती, यीशु त
 तैसेरे चेले गलील समुन्दर पार केरतां गन्नेसरत नव्वेरे जगाई पुड़ पुज्जे।
 तैड़ी तैनेई किनारे पुड़ किश्ती बेंधतां रख्खी। 54 जैखन तैना किश्ती पुड़ेरां
 ओस्से, त तैटुरे लोकेई यीशु पिशैनी छ़ड़ो। 55 एल्हेरेलेइ, तैनेई सारे इलाके
 मां गेइतां लोकन खबर शुनाई कि यीशु ओरोए। ज़ेडी-ज़ेडी लोकेई शुनू कि
 यीशु ओरोए, तैड़ी लोकेई बिमार मैन्हु खट्टी पुड़ छुइतां यीशु कां आन्ने लगे,
 ताके तै तैन् बज्जाए। 56 ज़ेडी कोन्वी ड्लोंब्वन मां, नगरन या बेस्तन मां
 यीशु गातो थियो, तैड़ी लोक बिमार मैन्हु बज्जारन मां यीशु कां एन्तां रखते
 थिये। तैना यीशु सेइं मिन्त केरते थिये कि, तैन सिर्फ तैसेरे लिगड़े सेइं हुरने
 देन। ज़ेत्रे बिमार मैन्हु यीशु सेइं हथ लाते थिये, तैना सारे बेज्जोते थिये।

7 एककि दिहाड़े किछ फरीसी लोक त कने शास्त्री लोकन मरां किछ लोक,
 जैना यस्शलेम नगरेरां ओरे थिये यीशुए कां अकोट्टे भोए। 2 ते तैनेई हेरु
 कि यीशुएरे किछ चेले रीति रुवाज़ेरे खलाफ अधोए हथ्थन सेइं रोट्टी खेइ
 राओरेन। 3 किजोकि फरीसी लोक त कने सारे यहूदी लोक, जांतगर हथ न
 धोन तांतगर रोट्टी न खाते थिये। अपने बुजुर्गा केरि परमपरा चलानेरे लेइ तैना
 एन्वरां केरते थिये। 4 जैखन तैना बज्जारेरां घरे एइते थिये, जांतगर तैना
 निहान न देन तांतगर रोट्टी न थिये खाते। होरे भी बड़े रीति रुवाज़ थिये,
 जैना तैन केरे बुजुर्गन केरां ओरे थिये, ज़ेन्वरां कटोरे, घड़े, ट्लामेरां भांडां
 रुवाज़ेरे मुताबिक धोना। 5 एल्हेरेलेइ फरीसी लोकेई त कने शास्त्री लोकेई
 यीशु पुच्छ, “तेरे चेले इश्शे बुजुर्गा केरि परमपरा पुड़ की न चलन? पन
 तैना रुवाज़ेरे खलाफ अधोए हथ्थन सेइं रोट्टी खातन!” 6 तैखन यीशुए तैन

सेइं ज़ोवं, “बड़े पेइले यशायाह नेबे तुश्शे ज़ेरे पाखंडी केरे बारे मां ठीक भविष्यिवाणी कियोरीए कि परमेशरे ज़ोवं, ‘एना लोक ऐशी सेइं त मेरी बड़ी तारीफ केरतन, पन एन केरे दिल मीं केरां बड़े दूर आन। 7 एना बेफाइटी मेरी आराधना (पूजा) केरतन, किजोकि एना त मैन्हु केरि बनोरी परमपरान, परमेशरेरे हुक्मां केरे ज़ेरे लोकन शिक्षा देतन।’” 8 तैखन यीशुए तैन सेइं ज़ोवं, “तुस भी तैन लोकां केरे ज़ेरे आथ, ज़ैना परमेशरेरे हुक्मन टेलतां मैन्हु केरि बनोरी परमपरान मन्तन, ज़ेन्हरां घड़े त कने कटोरे रुवाज़ेरे मुताबिक धोने, त कने एसेरे ज़ेरे होरे भी बड़े रुवाज़न मन्तथ।” 9 फिरी तैनी तैन सेइं ज़ोवं, “तुस केत्रू गलत केरतथ, कि अपने रीति-रुवाज़ मन्नेरे लेइ परमेशरेरे हुक्म ट्लोड़तथ। 10 किजोकि मूसा नेबे ज़ोरुए कि, परमेशरे सारी मैनन् ई हुक्म दित्तो कि, ‘तू अपने हाज बव्वेरी केरि इज्जत केर। त ज़ै कोई अपने हाज बव्वे जो बुर ज़ोलो, तै ज़रूर मारो गालो।’ 11 पन तुस ज़ोतथ कि अगर कोई मैन्हु अपने हाज बव्वे सेइं सिर्फ एन ज़ोए, तैन बड़ु आए कि, ‘मीं करां ज़ै किछ मद्दत तुसन मैल्ली सकती थी, तै पेइली बलिदान भोरीए, यानी परमेशरे जो च़ढ़तल च़ाढ़ोरीए। एलहेरेलेइ, अब तुसन किछ न देइ सकी।’ 12 एरी शिक्षा देइतां तुस लोकन तैन केरे हाज बव्वां केरि किछ मद्दत केरने न देथ। 13 एन्हरां तुस अपनि परमपरा च़लानेरे लेइ, परमेशरेरी गल्लां टेली छ़ड़तथ। एरी ज़ेरि तुस होरि भी बेड़ि गलत परमपरा मन्ते ओरेथ।” 14 तैखन यीशुए फिरी सारे लोक एप्पू कां कुजेइतां तैन सेइं ज़ोवं, “तुस सारे लोक, मेरी गल ध्याने सेइं शुना ते समझा। 15 एरी कोई चीज़ नई ज़ै बेइरें मैन्नेरे अन्तर गेइतां तैस जुट्टो केरे। पन ज़ैना बुरी चीज़ां मैन्नेरे अन्त्रां, यानी तैसेरे दिले मरां बेइर निस्चन, तैन्नां तैस जुट्टो केरचन। 16 अगर कोई समझनो चाते, त तै ध्याने सेइं शुने!” 17 बादे मां, यीशु मैन्हु केरि भीड़ी मरां घरे जो जेव। तैखन तैसेरे चेलेई तैस मिसालारे मतलबेरे बारे मां तैस पुच्छू। 18 तैनी तैन सेइं ज़ोवं, “होरि मैन्हु केरे ज़ेरे कुन तुस भी न समझथ? कुन तुस न समझथ कि ज़ै चीज़ बेइरां मैन्नेरे अन्तर गाचे, तै तैस जुट्टो न केरि सके? 19 किजोकि तै तैसेरे दिले मां नई, पन तैसेरे पेटे मां गाचे ते बादे मां पेटे मरां निस्सी गाचे!” एन ज़ोइतां यीशुए समझावं कि खानेरी चीज़ कोई भी असन जुट्टो न केरे। 20 तैखन तैनी अपने चेलन सेइं ज़ोवं, “जैन मैन्नेरे अन्त्रें निस्ते,

तैने परमेश्वरी नज़री मां मैन्हु जुटो केरते, 21 किजोकि मैनेरे अन्त्रेरा, यानी मैनेरे दिले मरा बुरे खियाल, बदमाशी, चोरी, कत्ल केरनो, 22 अड्लाए देइने गलत कम केरनू लालच, दुष्ट कम केरनू बेझमानी, बदचलन, जलन, तुहीन, घमण्ड, ते बेवकूफी एच्चन। 23 एना सैरी बुरी गल्लां मैनेरे अन्त्रेरा, यानी दिले मरा निस्तां मैन्हु जुटो केरचन।” 24 तैल्ला पत्ती, यीशु तैटुं निस्तां सूर त सैदा नगरेरे आसेपासेरे इलाकेरे नेडे अव। ते तैडी तै एककी घरे मां जेव। ते तै चातो थियो कि कोई न ज़ैनी सके कि अव इडी आई। पन तै छेष्पी न सको। 25 तैडी अक कुआन्श थी, ज़ेसेरी निकडी कुईए पुड़ भूतेरो सायो थियो। तै यीशुए बारे मां शुन्तां अकदम तैडी आई ते तैसेरे पावन पुड़ पेर्ह। 26 त तै कुआन्श गैर कौमरी थी ते सुरुफिनिकी इलाकेरी थी। तैसां यीशु सेइं मिन्त की कि, “मेरी कुईए पुडेरां भूतेरो सायो केढ़ी देश।” 27 पन यीशुए तैस सेइं ज़ोवं, “पेइले बच्चन रज्जने दे, किजोकि बच्चां केरि रोट्टी नेइतां कुतरन जो देनी ठीक नई!” 28 तैसां जुवाब दित्तो, “सच्चे, प्रभु! पन कुतरां भी मेजे हेठोरां बच्चां केरि रोट्टन मरा बिछ़ड़ेरे टुकड़े खातन।” 29 तैखन यीशुए तैस सेइं ज़ोवं, “मीं पुड़ तीं एत्रो विश्वास रख्खोरोए, एल्हेरेलेइ तू आरामे सेइं घरे जो गा। तेरी कुईए मरा भूतेरो सायो निस्सी जोरोए।” 30 तैसां कुआन्शां तैटुं अपने घरे वापस इइतां हेरू कि कुई खट्टी पुड़ आरामे सेइं झुल्लोरी थी, त भूतेरो सायो तैस मरा निस्सी जोरो थियो। 31 यीशु फिरी अपने चेलन सेइं साथी सूर त सैदारे नगरेरे इलाकन मरा निस्तां, दिकापुलिस इलाके मांमेइं भोइतां गलील समुन्दरेरे नेडे पुज़जो। 32 तैडी किछ लोकई अक टोन्नो मैन्हु, ज़ै खेख्खो भी थियो, यीशु कां एन्तां तैस सेइं मिन्त की कि, “तू अपनो हथ एस पुड़ रख कि ए मैन्हु बेज़ज्जोए।” 33 यीशुए मैन्हु केरि भीडी मरा तै मैन्हु अलग नीयो। तैखन तैनी अपनि एंगलोई तैस मैनेरे कन्न मां छेढ़ी, त अपनि एंगलोई सेइं थुक तैस मैनेरी ज़िभ्भी सेइं लावं। 34 तैल्ला पत्ती, यीशु अम्बरेरे पासे तेकतां ओशा छँडो, त तैस मैन्हु सेइं अपनि (इब्रानी) भाषाई मां ज़ोवं, “इप्फत्तह!” ज़ेसेरो मतलब “खुल्ली गा!” 35 अकदम तै रोड़ेचारे शुने लगो ते तैसेरी ज़िभ भी ठीक भोइ जेई, ते तै साफ-साफ गल्लां केरने लगो। 36 तैखन यीशुए तैन मैनन् हुक्म दित्तो कि, “ए गल केन्ची सेइं न ज़ोइयथ।” पन जेत्रू जादे यीशुए तैनन् हुक्म दित्तोरो थियो, तेत्रू जादे तैना होरि लोकन ए गल

शुनाने लग्गे। 37 यीशुएरे चमत्कारेरां कम्मां केरे वजाई सेइं, तैना बडे हैरान भोइतां ज़ोने लग्गे, “कमाल आए! यीशुए ज़ैन किछ भी कियूं सब किछ रोडू कियोरुप! तै टोव्हन शुन्नेरी ते लट्ठन गल्लां केरनेरी शक्ति देते।”

8 तैन दिहाड़न मां एरु भोव कि, मैन्हु केरि बड़ी भीड़ यीशु कां फिरी अकोट्ठी भोइ। तैन कां किछ खाने जो न थियूं। तैखन यीशुए अपने चेले एप्पू कां कुजेइतां तैन सेइं ज़ोवं, 2 “मीं एन मैन्हु केरि भीड़ी पुड़ तरस इइते, किजोकि एना ट्लेइ दिहाड़ां केरे देते मीं सेइं साथी आन, ते एन कां खाने जो किछ नई राओरु। 3 अगर अवं एन ढलुख्खोरे घरे जो भेजी, त चळते-चळते बत्ती मां थेकतां रेइ गानेन, किजोकि एन मरां कोई-कोई दूररां भी आन।” 4 तैसेरे चेलेई तैस जुवाब दित्तो, “इडी सुनसान ठैरी एन मैनन् जो एत्री रोट्टी कोट्ठां आनम कि एन मैन्हु रेज़तां खान?” 5 तैखन यीशुए तैन पुच्छू, “तुसन कां केत्री रोट्टी आन?” तैनेई जुवाब दित्तो, “सत रोट्टी आन।” 6 तैखन यीशुए मैन्हु केरि भीड़ेर पासे मुड़तां तैन जो हुक्म दित्तो कि, “ज़मीनी पुड़ बिश्शी गाथ।” तैखन तैनी तैन सत रोट्टी ट्लेइतां परमेशरेरु शुक्र केरतां ट्लोडी, ते अपने चेलन कां देते जेव कि तैना लोकन खाने जो देन। ते चेलेई मैनन् रोट्टी दित्ती। 7 तैन कां थोड़ी ज़ेरि निक्की मेछ़ली भी थी। यीशुए मेछ़ली केरे लेइ भी परमेशरेरु शुक्र केरतां अपने चेलन सेइं ज़ोवं, “इना भी लोकन खाने जो देथ।” तेन्वरां तैसेरे चेलेई कियूं। 8 तैना सारे मैन्हु रोट्टी खेइतां रेज़ज़ी जे। तैल्ला पत्ती, यीशुएरे चेलेई मेछ़ली त कने रोट्टी केरे बच्चोरे टुकड़न मरां सत टोकरे भेरतां सल्ले। 9 तैडी लगभग 4000 मड़द थिये। लोकन रोट्टी खुवानेरे पत्ती यीशुए मैन्हु भेजी दित्तो। 10 तैखन तै अकदम अपने चेलन सेइं साथी किश्ती मां चेढ़तां दलमनूता इलाके जो चळलो जेव। 11 फिरी किछ फरीसी लोक यीशु कां एइतां तैस सेइं बेंस केरने लग्गे। तैना तैस अज़मानेरे लेइ तैस पुछ्ने लग्गे, “असन अम्बरेरां कोई निशान हिरा।” 12 ज़ैखन यीशुए एन शुनू, त तैनी अक बड़ो ओशा छेड़तां ज़ोवं, “इस ज़मानेरे लोक मीं केरां किजो निशान मगतन! अवं तुसन सेइं सच ज़ोतई कि इस ज़मानेरे लोकन, यानी तुसन अवं कोई भी निशान न हिरेई।” 13 तैल्ला पत्ती, यीशु तैन लोकन छेड़तां, फिरी किश्ती मां चढ़ो ते गलील समुन्दरेरे पार चळलो जेव। 14 ज़ैखन यीशुएरे वेले किश्ती मां चढे, त तैना एप्पू सेइं साथी रोट्टी नेनी बिसरी जे।

किश्ती मां तैन कां अकके रोट्टी थी। 15 जैखन तैना समुन्दरे पार केरि राओरे थिये, त यीशुए तैन समझावं कि, “खबरदार! फरीसी लोकां केरे खर्मीरे बारे मां ते कने हेरोदेस राजेरे खर्मीरे बारे मां होशियार रेहयथ।” 16 चेले यीशुएरी गल गलत सेमझातां एप्पू मांमेइं गलबात केरने लगे कि, “असन कां त रोट्टी नई, एल्हेरेलेइ यीशुए एन्चरां ज़ोवं।” 17 तैखन यीशुए तैन केरि गल ज़ेनतां, तैन सेइं ज़ोवं, “तुस एप्पू मांमेइं एन्चरां किजो सोची राओरेथ कि असन कां रोट्टी नई? कुन तुस हेजू भी मेरी गल न समझी ते कने न बुझी? कुन तुशे मन बेसमझ भोइ जोरेन? 18 कुन तुसन एछळी भोइतां भी न लेइहोए? ते कन भोइतां भी न शुनोए? कुन तुसन याद नई? 19 ज़ताली 5000 मैन्हु केरे लेइ पंच रोट्टी ट्लोडतां दित्तोरी थी, त तुसेई बादे मां बच्चोरी रोट्टी केरे केत्रे टोकरे भेरतां सल्लोरे थिये?” तैनेई तैस जुवाब दित्तो, “बारहे टोकरे।” 20 तैखन तैनी तैन पुच्छू, “ज़ताली मीं 4000 मैन्हु केरे लेइ सत रोट्टी ट्लोडतां दित्तोरी थी, त तुसेई रोट्टी केरे केत्रे टोकरे भेरतां सल्लोरे थिये?” तैनेई तैस जुवाब दित्तो, “सत टोकरे।” 21 तैखन तैनी तैन पुच्छू, “कुन तुसन हेजू भी समझ न आई?” 22 तैल्ला पत्ती, यीशु त तैसेरे चेले बैतसैदा नगरे मां आए। लोकेई अक कानो मैन्हु यीशु कां आनो ते तैस कां मिन्नत की कि, “एस मैन्हु सेइं हथ लाथ ताके ए बेझ़ोए।” 23 तैखन यीशुए तैस काने मैनेरो हथ ट्लेइतां ड्लोंवे केरां बेइर नीयो। तैखन तैनी तैस काने मैनेरी एछळन पुड़ थुकतां, तैस पुड़ हथ रखे, ते तैस पुच्छू, “कुन तू किछ लातस?” 24 तैखन तैनी मैने उबरे तेकतां ज़ोवं, “हाँ, अवं मैनन् हेरी सकतई, तैना मीं चलते बुट्टां केरे ज़ेरे लेइहोतन।” 25 तैखन यीशुए दुइयोवं हटे तैसेरी एछळन पुड़ हथ रखे। तै कानो ध्याने सेइं लाने लगो। तैसेरी एछळी ठीक भोइ जेई, त तै सब किछ साफ-साफ हेरने लगो। 26 तैल्ला पत्ती, यीशुए तै मैन्हु एन ज़ोइतां घरे जो भेजो, “तू इस ड्लोंवे मां पाव भी न रेखां (ते कने ई गल केन्ची सेइं न ज़ोइयां।)” 27 तैल्ला पत्ती, यीशु ते तैसेरे चेले बैतसैदा नगरे मरां निस्तां कैसरिया-फिलिप्पी नंवेरे नगरेरे ड्लोंवन मां चेलि जे। बत्तां चलते-चलते यीशुए अपने चेलन पुच्छू, “जैखन लोक मेरे बारे मां गल्लां केरतन, त तैना मेरे बारे मां कुन ज़ोतन कि अवं कौन आई?” 28 तैसेरे चेलेई जुवाब दित्तो, “किछ ज़ोतन कि तू यूहन्ना आस, जै बपतिस्मो देनेबालो थियो, पन किछ

होरे मैन्हु ज़ोतन कि तू एलियाह आस, ज़ै नबी थियो, पन किछ होरे मैन्हु एन भी ज़ोतन कि तू परमेश्वरी गल्लां ज़ोनेबालन मरां अक मैन्हु आस।” 29 तैखन यीशुए अपने चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू मसीह आस।” 30 त यीशुए तैनन् समझावं कि, “मेरे बारे मां ई गल केन्ची सेइं न ज़ोइयथ।” 31 तैखन यीशु अपने चेलन शिक्षा देनो लगो कि, “मैनेरे मट्टेरे लेइ, यानी मेरे लेइ एन ज़रुरी आए कि मीं बडे दुख झाल्लनेन। यहूदी लोकां केरे बुजुर्गन, प्रधान याजकन, त कने शास्त्री लोकन केरां अवं निकम्मो समझो गानोईं त मारो गानोईं। पन ट्लेइ दिहाड्ना पत्ती अवं फिरी ज़ींतो भोनोईं।” 32 यीशुए एना गल्लां तैन सेइं साफ-साफ ज़ोई। तैखन पतरस तैस अलग नेइतां डांटने लगो, “मसीह न मरे।” 33 पन यीशुए मुडतां अपने बाकी चेलां केरे पासे तक्कू, ते पतरसे सेइं झिड़केइतां ज़ोवं, “हे शैतान, मीं करां दूर भो! (मतलब एन्चरां न सोच! शैतान तीं करां एन्चरां जुवाते) मीं केरां दूर भोइ गा। तू परमेश्वरी गल्लन पुड नई, पन मैन्हु केरि गल्लन पुड मन लातस।” 34 तैखन यीशुए अपने चेले त कने मैन्हु केरि भीड़ एप्पू कां कुजेइतां सेब्बन सेइं ज़ोवं, “तुस अगर मेरे चेलो बनू चातथ, त तुस अपने आपेरो इन्कार केरा त कने तुस अपनू क्रूस छुइतां मीं पत्ती चला। 35 किजोकि ज़ै कोई अपनि ज़िन्दगी बचानी चाते, त तै हमेशारी ज़िन्दगी गुवालो। पन ज़ै कोई मेरे वजाई सेइं त कने मेरे बारे मां खुशखबरी होरि लोकन शुनानेरी वजाई सेइं अपनि ज़िन्दगी गुवाते, यानी बलिदान केरते, त तै तैस बचालो, यानी हमेशारी ज़िन्दगी हासिल केरेलो। 36 मैन्हु अगर सारी दुनियाई हासिल केरे त अपनि हमेशारी ज़िन्दगी गुवाए, त तैस फिरी कुन फैइदो भोलो? 37 मैन्हु अगर अपनि हमेशारी ज़िन्दगी गुवालो, त गुवानेरे पत्ती तै कुन देइतां तैस वापस घिन्नी सकते? 38 अज़ज़ेरे ज़मानेरे लोक परमेश्वरे करां दूरन त कने पापी आन। एस ज़माने मां, अगर कोई मैन्हु मीं केरां त कने मेरी गल्लन केरां शरमाते, त मैनेरु मटू भी, यानी अवं भी तैस केरां शरमालो। ज़ेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो।”

9 तैखन यीशुए तैन सेइं ज़ोवं, “अवं तुसन सेइं सन्न ज़ोतई कि ज़ैना इड़ी खड़े आन, तैन मरां किछ मैन्हु ऐरे आन कि ज़ांतगर तैना परमेश्वरे राज़ज़ेरी

शक्ति न हेरेले, तांतगर तैना न मरेले।” २ शेइ दिहाड़ना बाट, यीशु अपने चेले पतरस, याकूब त कने यूहन्ना सेइं साथी एककी पहाड़े पुड़ चढ़ो, ज़ेड़ी कोई भी न थियो। तैड़ी तैन केरे सामने यीशुएरी शकल बेदलोई जेर्द। ३ तैसेरां लिगड़ां हियूंवेरां ज़ेरां बड़ां चमकने लग्गां कि एत्रे छित्तां भुआं कि धेरती पुड कोई भी लिगड़ां धोनेबालो एरां ज़ेरां छित्तां न केरि सके। ४ तैखन तैड़ी मूसा नबी त कने एलिय्याह भी यीशु सेइं साथी लेइहोए। ते तैना यीशु सेइं गल्लां केरने लग्गे। ५ जैखन पतरसे एन हेरु, त तैनी यीशु सेइं ज़ोवं, “हे गुरु, इश्शू इड़ी रानू रोड़ु आए! एल्हेरेलेइ, अस ट्लाई डेरे बनाम, अक तेरे लेइ, अक मूसेरे लेइ, त कने अक एलिय्याहेरे लेइ।” ६ पतरसे एन्चरां एल्हेरेलेइ ज़ोवं किजोकि तैस पतो न थियो कि कुन ज़ोई, किजोकि तै त कने होरे दूर्द चेले भी बड़े डेरि जोरे थिये। ७ तैखन तैड़ी तैन पुड़ बिदलार आई ते तैस बिदलारी मरां परमेशरेरी आवाज़ आई, “एन मेरु ट्लारु मटू आए। ध्याने सेइं एसेरी गल शुना!” ८ अकदम, जैखन यीशुएरे चेलेई चेवे पासन तक्कू, त यीशुएरे अलावा तैड़ी तैन कोई भी न लेइहोव। ९ पहाड़े पुड़ेरां ओस्ते-ओस्ते यीशुए अपने चेलन हुक्म दित्तो कि, “जांतगर मैनेरु मटू, यानी अवं, मेरतां ज़ींतो न भोई, तांतगर जैन किछ तुसेई पहाड़े पुड़ लावरूए, तैन केन्ची सेइं न ज़ोइयथा।” १० तैनेई तैन केन्ची सेइं न ज़ोवं, ते तैना एप्पू मांमेई गलबात केरने लग्गे कि, “मेरतां ज़ींतो भोनेरो कुन मतलब भोइ सकते।” ११ तैखन तैनेई यीशुए पुच्छू, “शास्त्री लोक किजो ज़ोतन कि मसीहेरे एजनेरां पेइले एलिय्याह नेबेरु दुनियाई मां एजनू ज़रूरी आए?” १२ यीशुए तैन जुवाब दित्तो, “ते तै सच्ची गल आए कि मसीहेरे एजने केरां पेइले एलिय्याह एजतां सैरी गल्लां ठीक केरनिन। पन परमेशरेरी किताबी मां मैनेरे मट्टेरे बारे मां, यानी मेरे बारे मां एन किजो लिखोरूए कि, ‘मीं बड़े दुख झ़ल्लनेन त लोक मीं निकम्मो समझेले?’ १३ पन अवं तुसन सेइं ज़ोतई कि ‘एलिय्याह’ त पेइले ओरोए, (यूहन्ना, एलिय्याहेरे जगाई अव) त जेन्चरां तैसेरे बारे मां परमेशरेरी किताबी मां लिखोरू थियूं, तेन्चरां तैनेई तैस सेइं कियूं, यानी जेन्चरां तैना चाते थिये, तेन्चरां तैनेई तैस सेइं बुरु कियूं।” १४ तैल्ला पत्ती, यीशु त तैसेरे ट्लाई चेले पहाड़े पुड़ेरां ओस्तां, होरि चेलन कां पुज़जे, जैना बुन थिये। तैड़ी एजतां यीशुए तैन चेलन केरे चेवे पासन मैन्हु केरि बड़ी भीड़ लाई। शास्त्री

तैन चेलन सेइं बेंस केरि राओरे थिये। 15 यीशु लेइतां सारे लोक बड़े हैरान भोए। तैना तैसेरे पासे दौड़तां आए ते तैस जो नमस्कार कियूं। 16 तैखन यीशुए तैन पुच्छू, “मेरे चेलन सेइं कुन बेंस केरि राओरेथ?” 17 मैन्हु केरि भीड़ी मरां एककी मैने यीशु जुवाब दित्तो, “हे उस्ताद, मीं अपनू मटू तीं कां आनेरु थियूं, ताके तैन ठीक भोए। किजोकि तैस पुड़ भूतेरो सायो आए, ते तैस गल केरने न दे। 18 कोन्ची भी ठैरी तैन भूत मेरे मटू ट्लाते, ते ज़मीनी पुड़ बिछोड़ते। तैखन तैसेरे ऐशी मरां शैम्फ एच्ये ते तैन दंत कटते ते ठठमुकर भोइ गाते। मीं तेरे चेलन सेइं ज़ोरु थियूं कि, ‘मेरे मटू पुड़ेरां भूतेरो सायो केढ़ी देथ!’ पन तैना केढ़ी न सके!” 19 एन गल्लां शुन्तां यीशुए तैन जुवाब दित्तो, “हे गैर विश्वासी मैनाव! अवं केइस तगर तुसन सेइं साथी रालो? त केइस तगर अवं तुश्शो अविश्वास झैल्ललो? तैस मटू मीं कां आनां!” 20 तैखन तैनेई तैन मटू यीशु कां आनू। ज़ैखन तैनी भूते यीशु लाव, त तैनी अकदम तैन मटू मरोड़ू, ते मटू तल्ले बिछ्डू। ते तैसेरी ऐशी मरां शैम्फ निस्ने लग्गी त तैन ड्लेडने लग्गू। 21 यीशुए तैसेरे बाजी पुच्छू, “एसेरी ए हालत केइसेरी देंती आए?” तैसेरे बाजे ज़ोवं, “बचपनेरी देंती। 22 एस मारनेरे लेइ एन भूत बड़े बार कधी अग्गी मां ते कधी पैनी मां बिछोड़तू राते, पन अगर तू किछ केरि सकतस, त असन पुड़ तरस खेइतां इश्शी मद्दत केरा!” 23 यीशुए तैस मटूरे बाजी सेइं ज़ोवं, “तू ए को गल केरतस! अगर तू विश्वास केरस, त एन भोइ सकते। किजोकि मीं पुड़ विश्वास केरनेबालां केरे लेइ सब किछ भोइ सकते।” 24 तैस मटूरे बाजे अकदम ज़ोरे सेइं लेरां देइतां ज़ोवं, “हे प्रभु, अवं विश्वास केरतई, मेरी मद्दत केर कि अवं शक न केरि।” 25 ज़ैखन यीशुए हेरु कि बड़े लोक दौड़तां अकोट्टे भोने लग्गोरेन, त तैनी भूत एन ज़ोइतां डांटू “हे भूता, जै एस मटू टोब्नू त लटू बनातस। अवं तीं हुक्म देताईं, एस मटू मरां निस्सी गा, ते एसमां फिरी कधी भी न एज्जां!” 26 तैखन तैनी भूते चिन्डां मारी त तैन मटू मरोड़ू, फिरी तैन तैस मटू मरां निस्सी जेव। त मटू मरु ज़ेरु भोइ ज़ोवं, इडी तगर कि बड़े लोक ज़ोने लग्गे कि मटू मेरि ज़ोवं। 27 पन यीशुए मटूरो हथ ट्लेइतां खड़ कियूं। ते मटू ठीक भोइतां खड़ भोवं। 28 तैल्ला पत्ती, यीशु ते तैसेरे चेले घरे जो जे। ज़ैखन तै अकैल्लो थियो तैखन तैसेरे चेलेई तैस पुच्छू, “अस तैस मटू मरां भूतेरो सायो की न केढ़ी सके?”

29 यीशुए तैन सेइं ज्ञोवं, “बगैर प्रार्थनारे (त कने बगैर वरत रखनेरे) अलावा, होरि केन्ची तरीके सेइं, तुस एरे ज़ेरे भूतेरो सायो न केहुी सकतथ।” 30 तैल्ला पत्ती, यीशु त तैसेरे चेले तैटुं निस्तां गलील इलाके मांमेइं चेलि राओरे थिये। यीशु न चातो थियो कि कोई तैसेरे बारे मां ज्ञाने कि तै तैड़ी ओरोए, 31 किजोकि तैखन तै अपने चेलन शिक्षा देतो ते तैन सेइं ज्ञोतो थियो कि, “मेरे दुश्मनेई मैनेरु मटू, यानी अवं कैद केरनोई। त तैनेई अवं मारनोई, पन मारनेरां ट्लेइयोवं दिहाड़े अवं मुडदन मरां फिरी ज़ींतो भोनोई।” 32 पन यीशुएरी ए गल चेलां केरि समझी मां न आई, ते तैना एस गल्लारो मतलब पुछ्ने केरां भी डरते थिये। 33 तैल्ला पत्ती, यीशु ते तैसेरे चेले कफरनहूम नगरे मां आए। तैना तैड़ी एककी घरे मां जे। तैखन यीशुए अपने चेलन पुच्छू, “बत्तां चलते-चलते तुस एप्पू मांमेइं कोस गल्लारे बारे मां बेंस केरि राओरे थिये?” 34 तैना सब शरमेइतां चुप राए, किजोकि तैनेई बत्तां एप्पू मांमेइं एसेरे बारे मां बेंस कियोरी थी कि असन मां बड्हो मैन्हु कौन आए। 35 तैखन यीशुए तल्ले बिश्तां अपने 12 चेले कुजाए ते तैन सेइं ज्ञोवं, “अगर कोई परमेश्वरी नज़री मां बड्हो बन्नू चाते, त तै सेब्धन केरां निकड़ो बने, ते कने सेब्धभी मैन्हु केरो सेवक बने।” 36 तैखन यीशुए अक निकड़ो बच्चो हथ्थन मां ट्लेइतां, तैन केरे मझाटे खड़ो कियो। तैनी तै बच्चो अपने कुम्मे मां रेखतां अपने चेलन सेइं ज्ञोवं, 37 “जैना लोक मीं सेइं प्यार केरनेरे वजाई सेइं एरे ज़ेरे बच्चन मरां अक भी कबूल केरतन, तैना मीं कबूल केरतन। जैना मीं कबूल केरतन, तैना सिफ मीं नई, पन तैना परमेश्वरे भी कबूल केरतन, ज़ैनी अवं इड़ी भेज़ोरोई।” 38 तैखन यूहन्ने यीशु सेइं ज्ञोवं, “हे गुरु, असेई अक मैन्हु लाव, जै तेरु नंव घिन्तां लोकन मरां भूतेरो सायो केहुी राओरो थियो। एल्हेरेलेई, असेई तै मैन्हु ठाको, किजोकि तै असन सेइं साथी तीं पत्ती नई चले।” 39 पन यीशुए जुवाब दित्तो, “तैस न ठाका, किजोकि अगर कोई मेरे नंव घिन्तां चमत्कारेरां कम्मां केरे, त तै मेरे बारे मां लूशी बुरी गल्लां न ज़ोए। 40 किजोकि जैना इश्शे खलाफ कम न केरन, तैना इश्शे पासेन। 41 अगर कोई मेरे नंवे सेइं तुश्शी मद्दत केरे, अक गिलास पानी भी तुसन पियाए, कि मसीहेरे आथ, त अवं तुसन सेइं सच्च ज़ोतां कि तै मैन्हु परमेश्वरे केरां अपनो फल ज़रूर हासिल केरेलो। 42 “जै कोई इन निकड़े बच्चन मरां जैना मीं पुढ़ विश्वास केरतन,

केन्ची भी पाप करवाए, त तैस मैनेरे लेइ एन रोड़ु आए कि ढलाटेरो अक बहु
द्लेइटोल तैसेरे गल्ले सेइं बेंधतां समुन्द्रे मां शारो गाए। 43 अगर तेरो हथ तीं
पाप केरनेरे लेइ ठोकर खुवाए, त तैस केट्टी छङ। किजोकि तेरे लेइ दूर्ह हथ
भोंते सांते सज्जा मैलनेरे लेइ नरकेरी अग्गी मां गाने केरां एन रोड़ु आए, कि तू
डोण्डो भोइतां हमेशारी ज़िन्दगी मां दाखल भोस। किजोकि नरकेरी अग
कधी भी न हिश्शो। (Geenna g1067) 44 तैड़ी तैन केरे कीड़े, ज़ैना तैन खातन
न मरन ते कने अग भी न हिश्शो। 45 त अगर तेरो पाव तीं पाप केरनेरे लेइ
ठोकर खुवाए, त तैस केट्टी छङ। किजोकि तेरे लेइ दूर्ह पाव भोंते सांते सज्जा
मैलनेरे लेइ नरकेरी अग्गी मां गाने केरां एन रोड़ु आए, कि तू टोंटो भोइतां
हमेशारी ज़िन्दगी मां दाखल भोस। किजोकि नरकेरी अग कधी भी न हिश्शो।
(Geenna g1067) 46 तैड़ी तैन केरे कीड़े, यानी ज़ैना तैन खातन न मरन त
अग भी न हिश्शो। 47 अगर तेरी अछ़ तीं पाप केरनेरे लेइ ठोकर खुवाए, त
तैस केट्टी छङ। किजोकि तेरे लेइ दूर्ह एछ़छी भोंते सांते नरकेरी अग्गी मां छङ्हे
गाने केरां एन रोड़ु आए, कि एककी अछ़छी सेइं तू परमेशरेरे राज्जे मां दाखल
भोस। (Geenna g1067) 48 नरके मां तैन केरे कीड़े, ज़ैना तैन खातन न मरन
त अग भी न हिश्शो। 49 जेन्वरां हर बलिदाने मां लून छङ्हनू ज़रूरी आए,
तेन्वरां परमेशर हर एककी मैनेरी अज़मैश घिन्लो, ज़ै बड़ी दुखे बाली भोनी
आए, जेन्वरां कि अग्गी मांमेइं निसनूए। 50 लून त रोड़ु आए, पन अगर
लूनेरो स्वाद चेलि गाए, त फिरी दुबारां केन्वरे तैसेरो स्वाद वापस आनेले?
तेन्वरां तुस भी एप्पू मां लून रखा, यानी परमेशरेरो हुक्म मन्ना, त एप्पू मांमेइं
मेल मिलापे सेइं राथ।”

10 तैल्ला पत्ती, यीशु त तैसेरे चेले तैट्टां उठतां यहूदिया इलाके मां आए, त
फिरी यरदन दरियारे उस पार चले जे। तैड़ी मैन्हु केरि भीड़ फिरी तैस कां
अकोट्टी भोइ। त तै अपने रीतरे मुताबिक तैन फिरी शिक्षा देने लगो। 2 तैखन
फरीसी लोकेई यीशु कां एइतां तैस अज़मानेरे लेइ तैस पुच्छू, “कुन एन जेइज
आए कि मड़द अपनि कुआन्शी फारख्ती दे?” 3 पन यीशुए तैनन् पुच्छू,
“बड़े पेइले मूसा नेबे तुसन कुन केरनेरो हुक्म दित्तोरो थियो?” 4 तैखन तैनेई
यीशुए जुवाब दित्तो, “मूसे मड़दे अज़ाज़त दित्तोरीए कि तै लिखतां फारख्ती
दे।” 5 तैखन यीशुए तैनन् जुवाब दित्तो, “तुश्शे सखत दिलेरी वजाई सेइं,

मूसे तुशो लेइ ए हुक्म दित्तोरो थियो। ६ पन दुनियारी शुरुआती मां, जैखन
 परमेशरे मैन्हु केरि रङ्गना की, तैखन तैनी तैना मङ्गद ते कुआन्श बनोरेन। ७
 एल्हेरेलेइ, ड्लाएरे पत्ती मङ्गद अपने हाज-बव्वे केरां अलग भोइतां अपनि
 कुआन्शी सेइं साथी रालो, ८ ते तैना दुझ्ये अक्के जान भोले।” तैल्ला पत्ती
 यीशुए ज़ोवं, “एल्हेरेलेइ तैना हुनी परमेशरेरी नज़री मां दूर्झ नई, पन तैना
 अक्के आन। ९ एल्हेरेलेइ ज़ैना परमेशरे ज़ोड़ोरेन, तैनन् कोई मैन्हु अलग
 न केरे।” १० बादे मां, जैखन यीशु ते तैसेरे चेले घरे मां थिये, तैखन तैसेरे
 चेलेर्इ फारख्खी देनेरे बारे मां तैस फिरी पुच्छू। ११ यीशुए तैन सेइं ज़ोवं, “ज़ै
 कोई अपनि कुआन्शी फारख्खी देहतां होरो ड्ला बनाए, त तै तैस पेइली
 कुआन्शारे खलाफ बदमाशी केरते। १२ त अगर कुआन्श अपने मङ्गदे छेडतां
 होरो ड्ला बनाए, त तै अपने पेइले मङ्गदेरे खलाफ बदमाशी केरचे।” १३
 तैल्ला पत्ती, किछ लोक अपने निक्के बच्चन यीशु कां आन्ने लगे ताके तै
 तैन पुङ्ह हथ रेखतां आशिर्वाद दे, पन तैसेरे चेलेर्इ तैना लोक डांटे। १४ यीशुए
 एन हेरतां सेरकोइतां अपने चेलन सेइं ज़ोवं, “निक्के बच्चन मीं कां एजने
 देथ, तैनन् न ठाका, किजोकि परमेशरेरु राज्ञ एरे ज़ेरे लोकां केरे लेइ आए।
 १५ अवं तुसन सेइं सच्च ज़ोतर्इ कि ज़ै कोई परमेशरेरे राज्ञे निकडे बच्चेरु ज़ेरु
 कबूल न केरे, त तै परमेशरेरे राज्ञे मां कधी भी दाखल न भोइ सके।” १६
 तैखन यीशुए तैना बच्चे कुम्मे मां रेखां, तैन पुङ्ह हथ रेखतां तैनन् आशिर्वाद
 दित्तो। १७ तैल्ला पत्ती, जैखन यीशु त तैसेरे चेले घरेरां बेइर निस्तां बत्तां
 चेलि राओरे थिये, ते अक मैन्हु यीशु कां दौड़तो अव। तैनी तैस कां मथ्थो
 टेकतां तैस पुच्छू, “हे रोडे गुरु, हमेशारी जिन्दगी हासिल केरनेरे लेइ अवं कुन
 केरि?” (aiōnios g166) १८ पन यीशुए तैस पुच्छू, “किजो तू मींजो रोडू
 ज़ोतस? परमेशरेरे अलावा होरो कोई भी रोडो नई। १९ तू त परमेशरेरे हुक्मन
 ज़ानतस, यानी ‘खून न केरा, बदमाशी न केरा, चोरी न केरा, झूठी गवाही न
 देथ, धोखो न देथ, अपने हाज-बव्वां केरि इज्जत केरा।’” २० पन तैनी मैने
 यीशु जुवाब दित्तो, “हे गुरु, एना सब हुक्म अवं बचपनेरो मन्तो ओरोई।” २१
 तैखन यीशुए तैस तेकतां तैस सेइं प्यार कियो, त तैस सेइं ज़ोवं, “तीं मां
 एककी गल्लारी कमी आए। गा, ज़ैन किछ तीं कां आए तैन बेचतां गरीब मैनन्
 दे, तैखन तीं स्वर्गे मां खजानो मैलेलो। तैल्ला पत्ती, एडतां मेरो चेलो बना, त

अपनू क्रूस छुइतां मीं पत्ती चल।” 22 यीशुएरी ए गल शुन्तां तैस मैनेरु तुत्तर ट्लक्कू, त तै बड़ो दुखी भोइतां चलो जेव, किजोकि तै बड़ो अमीर थियो त तै अपनो धन छुडने न चातो थियो। 23 तैखन यीशुए चेव्रे पासन अपने चेलन तेकतां तैन सेइं ज़ोवं, “अमीर मैन्हु केरु परमेश्वरे राज्जे मां दाखल भोनू बडू मुश्किल आए।” 24 यीशुएरे चेले तैसेरी गल्लां शुन्तां हैरान भोए। पन यीशुए फिरी तैन सेइं ज़ोवं, “हे मट्ठाव, ज़ैना धने पुड़ भरोसो रखतन, तैन केरे लेइ परमेश्वरे राज्जे मां दाखल भोनू बडू मुश्किल आए! 25 परमेश्वरे राज्जे मां अमीर मैनेरु दाखल भोने केरां ऊटेरु सांधनेरे पाए मरां निस्नू सुख्कू आए!” 26 तैखन तैना बडे हैरान भोइतां एप्पू मांमेइं ज़ोने लगो, “अगर अमीर मैनेरे लेइ मुक्ति हासिल केरनि नमुमकिन आए, त फिरी केसेरी मुक्ति भोइ सकचे?” 27 यीशुए तैन केरे पासे तेकतां ज़ोवं, “मैन्हु अपने आपे न बङ्गेइ सकन, यानी मुक्ति हासिल न केरि सकन, पन परमेश्वर एन केरि सकते, किजोकि परमेश्वर सब किछ केरि सकते।” 28 तैखन पतरस यीशु सेइं ज़ोने लगो, “तक, अस त सब किछ छेडतां तीं पत्ती चलोरेम! असन कुन इनाम मैलेलू?” 29 यीशुए अपने चेलन सेइं ज़ोवं, “अवं तुसन सेइं सच ज़ोतई कि, ज़ैनई मेरे लेइ त कने मेरे बारे मां खुशखबरी होरे लोकन शुनानेरे लेइ अपने घर या ढला या बेइन या हाज या बव या बच्चे या ऊडारां शारोरन, 30 तैनन् इस दुनियाई मां शौव गुणा मैलेलू। तैना धरन, ढलान, बेइनन, हेर्वयन, बच्चन त कने ऊडारां हासिल केरेले। लोक भी तैनन् सताले, पन एजनेबाली दुनियाई मां परमेश्वर तैनन् हमेशारी ज़िन्दगी देलो। (aiōn g165, aiōnios g166)

31 पन बडे मैन्हु ज़ैना हुन्ना पेइले आन, तैना बादे मां पत्रोवं भोनेन। त ज़ैना हुन्ना पत्रोवं आन, तैना बादे मां पेइले भोनेन।” 32 तैल्ला पत्ती, यीशु त तैसेरे चेले ते किछ लोक यरुशलेम नगरे जो चलते-चलते, तैना हेजू बत्तां थिये। यीशु तैन केरे अग्री-अग्री पासे चेलि राओरो थियो। ते तैसेरे चेले हैरान भोए त होरे लोक डरते-डरते तैस पत्ती चली राओरे थिये। तैखन यीशु अपने 12 चेलन बत्ती मरां अलग नेइतां फिरी तैन सेइं तैना गल्लां ज़ोने लगो, ज़ैना तैस सेइं भोनेबैली थी। 33 तैनी ज़ोवं, “शुना, अस सारे यरुशलेम नगरे जो गेइ राओरेम। तैड़ी मैनेरु मटू (यानी अवं) प्रधान याजकन त कने शास्त्री लोकन केरां कैद कियो गानोई, त तैना मीं मारनेरो हुक्म देले त गैर यहूदी लोकां केरे

हवाले केरले। ३४ त होरि कौमां केरे लोक मेरो मज्जाक बनाले, त मीं पुङ्
थुकेले, त मीं कोडे मारेले, त तैना मीं मैरी छँडेले, पन टलेइ दिहाड़ना पत्ती
अवं मुङ्डन मरां फिरी झींतो भोलो।” ३५ तैखन याकूब त यूहन्ना, जैना जब्दी
नंवरे मैनेरां मट्ठां थियां, यीशुएरे नेडे एइतां तैस सेइं ज़ोने लग्गे, “हे गुरु, अस
चातम कि जैन किछ अस तीं केरां मग्गम, तैन तू असन देइयथ।” ३६ यीशुए
तैन पुङ्छू, “तुसन कुन लोड़ते, जैन अवं तुसन देई?” ३७ तैनेई तैस सेइं ज़ोवं,
“असन एन दे कि जैखन तू महिमा सेइं साथी राज्ञ केरेलो, तैखन तीं सेइं
साथी राज्ञ केरनेरे लेइ असन मरां अक तेरे देइने पासे त होरो तेरे बाएं पासे
राज्ञगेद्दी पुङ् बिश्शो।” ३८ पन यीशुए तैन सेइं ज़ोवं, “तुस न ज्ञानथ कि
तुस कुन मग्गने लग्गोरेथ! ज़ेन्चरे दुख अवं झ़लने बालोई, कुन तुस झ़ोल्ली
सकतथ? ज़ेन्चरे अवं मारनोई कुन तुस भी मारे गानेरे लेइ तियारथ?” ३९
तैनेई तैस जुवाब दित्तो, “हाँ, अस एन केरि सकतमा!” एल्हेरेलेइ, यीशुए तैन
सेइं ज़ोवं, “सच्चे, ज़ेन्चरे अवं दुख झ़लने बालोई, तेन्चरे तुस झ़ल्लेले?
ज़ेन्चरे अवं मारनोई तेन्चरे तुस मारे गाले। ४० पन तै ठार जैन केरे लेइ पेइले
तियारी कियोरीए, तैन छेड़तां होरे केन्ची अपने देइने पासे त कने अपने बाएं
पासे राज्ञगेद्दी पुङ् बिशालनू मेरू कम नई।” ४१ एन शुन्तां यीशुएरे बाकी दश
चेले याकूब त कने यूहन्ना सेइं नराज्ञ भोड़ जे। ४२ तैखन यीशुए अपने सारे
चेले नेडे कुजेइतां, तैन सेइं ज़ोवं, “तुसन पतोए कि जैना होरि कौमां केरे
लोकां केरे राज्ञ केरनेबाले समझे गातन, तैना अपने लोकन पुङ् राज्ञ केरतन।
तैन मरां जैना बडु अफसर आन, तैना अपने लोकन पुङ् हकोमत चलातन।
४३ पन तुसन मां एरी ज़ेरि गल न लोडे, पन जै कोई तुसन मां बडु बन्नू चाए,
त तै निकड़ो बेनतां तुश्शो सेवक बने। ४४ त जै कोई तुसन मां प्रधान मैन्हु
बन्नू चाए, त तै सारे मैन्हु केरो सेवक बने। ४५ किजोकि मैनेरू मटू, यानी अवं
एस दुनियाई मां एल्हेरेलेइ नई ओरो कि कोई मेरी सेवा केरे, पन एल्हेरेलेइ
ओरोई कि अवं होरि लोकां केरि सेवा केरि त कने बड़े लोकां केरे लेइ अपनि
जान बलिदान केरि, ताके तैन अपने पापां केरे सज्जाई केरां छुटकारो मैल्ले।”
४६ तैल्ला पत्ती, यीशु त तैसेरे चेले यरीहो नगरे मां पुज्जे। बादे मां, जैखन तैना
मैन्हु केरि बड़ी भीड़ी सेइं साथी यरीहो नगरी मरां निस्सी राओरे थिये, त
तैखन बरतिमाई नंवरे कानो भिखारी सङ्केरे डलेखी बिश्तां भीख मेग्गी

रा ओरो थियो। तैसेरे बाजी केरु नंव तिमार्ड थियूं। 47 ज़ैखन तैनी शुनू कि नासरत नगरेरो यीशु इलमेइं निस्सी रा ओरोए, त तै भिखारी ज़ोरे सेइं ज़ोने लगो, “हे यीशु, दाऊद राजेरा मट्ठा! मीं पुड़ दया केर!” 48 त बड़े लोकेर्ड तै डांटो कि, “चुप रा!” पन तै पेइले केरां जादे चिन्डां मारने लगो, “हे दाऊद राजेरा मट्ठा, मीं पुड़ दया केर!” 49 तैखन यीशुए रुकतां लोकन सेइं ज़ोवं, “तुस तैस इरां कुजाथ्।” लोकेर्ड तै कानो कुजेइतां तैस सेइं ज़ोवं, “हिम्मत रख! उठ! यीशु तीं एप्पू कां कुजाने लगोरेन।” 50 तै अपनि चादर शैरतां लूशी उठो, ते यीशु कां अव। 51 तैखन यीशुए तैस पुच्छू, “तीं कुन लोड़ते कि अवं तेरे लेइ केरि?” काने मैने जुवाब दितो, “हे गुरु, अवं लानू चातार्ड।” 52 तैखन यीशुए तैस सेइं ज़ोवं, “तू गा। तीं मीं पुड़ विश्वास कियूं एल्हेरेलेइ अवं तीं बज्ज़ातार्ड।” अकदम तै लाने लगो त कने यीशु पत्ती चलो।

11 ज़ैखन यीशु तैसेरे चेले यरुशलेम नगरेरे नेडे आए, त तैखन ज़ैतून नंवेरे पहाड़ेरे नेडे, बैतफगे त कने बैतनिय्याह ड्लोव्वन कां पुज़जो। तैखन यीशुए अपने चेलन मरां दुइयन सेइं एन ज़ोइतां पेइले भेजे कि, 2 “अपने सामनेबाले ड्लोव्वे मां गाथ। तैड़ी पुज़ते तुसन अक गैधेरो बच्चो बधोरो मैलेलो, ज़ैस पुड़ कधी कोई नई चढ़ोरो। तैस खोलतां इड़ी मीं कां आनां। 3 अगर तुसन कोई पुच्छे, ‘किजो एन केरने लगोरेथ?’ तैस सेइं ज़ोइयथ, ‘प्रभुए एसेरी ज़रूरत आए।’ तै अकदम गधेरे बच्चे तुसन सेइं साथी इड़ी भेजेलो।” 4 तैना दूई चेले तैस ड्लोव्वे मां जो। तैड़ी गैधेरो बच्चो एकके घरेरे दारे बेइर बंधोरो लाव, तैना तैस खोलने लगो। 5 ज़ैना तैड़ी खड़े थिये, तैन मरां किछ मैनेई तैन पुच्छू, “एन कुन केरने लगोरेथ, गधेरे बच्चे किजो खोलने लगोरेथ?” 6 ज़ेन्वरां यीशुए अपने चेलन सेइं ज़ोरु थियूं, तेन्वरां तैनेई तैन मैनन् सेइं ज़ोवं। तैखन तैन मैनेई चेले तैटां गाने दित्ते। 7 यीशुएरे चेलई बच्चो यीशु कां एन्तां यीशुए तैस पुड़ बिशालनेरे लेइ, तैस पुड़ अपने लिगड़ां छँड्हो। त यीशु तैस पुड़ बिश्शो (तैना यरुशलेम नगरेरे पासे जो चलने लगो)। 8 तैखन बड़े लोकेर्ड (तैसेरी इज्ज़त केरनेरे लेई) अपना लिगड़ां बत्ती मां बिछां त कने किछ मैनेई पट्टलनबाली डैलड़ी एन्तां बत्ती मां बिछेई। 9 ज़ैना यीशुएरे अग्री-अग्री त कने पत्ती-पत्ती चलने लगोरे थिये, तैना खुशी सेइं ज़ोरे सेइं ज़ोने लगो, “होशाना! (परमेश्वरी तारीफ़ भोए) परमेश्वर तैस

बरकत दे, जै प्रभु-परमेश्वरे अधिकारे सेइं साथी एज्जी राओरोए!” 10
 “परमेश्वर तीं आशिर्वाद दे, जैखन तू इशो पड़दादे दाऊदेऱु राज्ञेरु राज्‌
 केरे! परमेश्वरी होशाना (तारीफ) भोए, जै उच्चे स्वर्गे मां आए!” 11 तैल्ला
 पत्ती, तैन लोकन सेइं साथी, यीशु यरूशलेम नगरी मां पुज्जां मन्दरे मां जेव।
 यीशु मन्दरे मां चेव्रे पासन तक्कू कि जैन तैडी भोइ राओरु थियूं। तै अपने
 12 चेलन सेइं साथी नगरे मरां निस्तां, राती बिशनेरे लेइ बैतनिय्याह ड्लोंव्वे
 जो वापस च्चलो जेव, किजोकि ड्लोझ्झ भोइ जोरी थी। 12 त एग्री दिहाडी,
 जैखन यीशु त तैसेरे चेले बैतनिय्याह ड्लोंव्वेरां निस्तां यरूशलेम नगरे जो
 वापस एज्जी राओरे थिये, तैखन यीशुए ढ्लुख लाग्गी। 13 तै दूरेरां फ्रेगेरो
 अक नीलो बुट लेइतां तैसेरे नेडे जेव कि खाने जो शायद तैस मां किछ मैल्ले।
 पन, जैखन तै बुटे कां जेव, त तैडी पट्टां केरे अलावा तैस किछ न मैल्लू,
 किजोकि तै फल्लेरो मौसम न थियो। 14 तैखन यीशुए तैस बुटे फिटकार
 देइतां तैस सेइं जोवं, “हुन्नेरे पत्ती, तीं मां कोई फल कथी न लगलो!” त
 तैसेरे चेले एन शुनी राओरे थिये। (aiōn g165) 15 तैल्ला पत्ती, तैना फिरी
 यरूशलेम नगरे मां पुज्जे, त यीशु मन्दरेरे अंगने मां जेव। तैडी लोक जानवरां
 केरु त कने मन्दरे मां चाढ़नेरु सामान थिन्नेरु त कने बेचनेरो कारोबार केरि
 राओरे थिये। यीशु तैन बेइर कढने लगो, ते तैनी तैडी पेंझ्से बदलनेबालन
 केरे मेज़न त कने कबूतर बेचनेबालन केरि कुर्सी उलटेइ दित्ती। 16 त मन्दरेरी
 ठैरी मां केन्ची बेचनेरे लेइ कोई चीज एन्तां चलने न दित्तू। 17 तैखन यीशुए
 तैन लोकन शिक्षा देइतां जोवं, “परमेश्वरी किताबी मां एस मन्दरेरे बारे मां
 एन लिखोरुए कि परमेश्वरे जोवं, मेरु मन्दर सैरी कौमां केरे लोकां केरे लेइ
 प्रार्थनारू घर भोलू! पन तुस लोकेई इन मन्दर डैकू केरो अछो बनोरोए।” 18
 एन शुन्तां प्रधान याजक त कने शास्त्री लोक यीशु कत्तल केरनेरो मौको
 तोपने लग्गे। पन तैना यीशु केरां डरते थिये, किजोकि सारे लोक तैसेरी
 शिक्षाई शुन्तां हैरान भोते थिये। 19 जैखन ड्लोझ्झ भोइ, त यीशु त तैसेरे चेले
 (रात गुजारनेरे लेइ) नगरेरां बेइर चेलि जे। 20 एग्री दिहाडी, झोज्ज्वां यीशु त
 तैसेरे चेले तैट्वां यरूशलेम नगरे जो च्चले त तैनेई तै फ्रेगेरो बुट लाव, जैस
 यीशुए पेइले फिटकार दित्तोरो थियो। तै बुट ज़ीलन तगर शुक्की जोरो थियो।
 21 पतरसे तै गल याद आई कि यीशुए एस बुटे फिटकार दित्तोरो थियो, त

तैनी यीशु सेइं ज़ोवं, “हे गुरु, तक! ए फ़ेगेरो बुट ज़ैस तीं फिटकार दित्तोरो थियो, शुक्की जोरोए! (एन केन्वरां भोवं)” 22 यीशुए अपने चेलन जुवाब दित्तो, “तुस परमेशरे पुड़ विश्वास रखा। 23 अवं तुसन सेइं सच ज़ोताई कि ज़ै कोई एस पहाड़े सेइं जोए, ‘तू उखड़तां समुन्द्रे मां बिछ़ड़ी गा,’ त एन्वरां ज़ोइतां अपने दिले मां शक न केरे, पन विश्वास केरे कि ‘ज़ैन अवं ज़ोताई तैन भोइ गालू,’ त तैसेरेलेइ तैन्ने भोलू। 24 एल्हेरेलेइ अवं तुसन सेइं ज़ोताई कि, ज़ैखन तुस प्रार्थना केरतां परमेशरे केरां ज़ैन भी मगेले, त विश्वास केरा कि तुसन तैन ज़रुर मैल्ली गालू, तैखन परमेशरे केरां तैन तुसन दित्तू गालू। 25 ते ज़ैखन कधी तुस खड़े भोइतां परमेशरे कां प्रार्थना केरतथ, त अगार तुसन केन्वी सेइं गिलो भोए, त पेइले तुस तैस माफ़ केरा, ताके तुश्शो स्वर्गेरो बाजी भी तुश्शो पाप माफ़ केरे। 26 अगार तुस होरि लोकन माफ़ न केरथ, त तुश्शो बाजी परमेशर भी, ज़ै स्वर्गे मां आए, तुश्शो पाप माफ़ न केरेलो।” 27 तैल्ला पत्ती, यीशु त तैसेरे चेले फिरी यरूशलेम नगरे मां आए। ज़ैखन यीशु मन्ददेरे अंगने मांमेइं हंठने लगोरो थियो, त तैखन प्रधान याजक त कने शास्त्री त कने यहूदी लोकां केरे बुजुर्ग तैस कां आए, त तैस सवाल पुछ़ने लगे, 28 “तू एन कम्मां कोस अधिकारे सेइं केरतस, त कने एन कम्मां केरनेरो तीं केनि अधिकार दित्तोरोए?” 29 पन यीशुए तैन सेइं ज़ोवं, “अवं भी तुसन अक सवाल पुछताई। मीं तैसेरो जुवाब देथ, तैखन अवं भी तुसन ज़ोलो कि अवं एन कम्मां कोस अधिकारे सेइं केरताई। 30 मीं जुवाब देथ। यूहन्ना ज़ै बपतिस्मो देनेबालो थियो, तैस बपतिस्मो देनेरो अधिकार कोट्ठां मैल्लो, परमेशरी तरफां मैल्लो या मैन्हु केरि तरफां?” 31 तैखन तैना एप्पू मांमेइं गलबात केरने लगे कि, “अगर अस ज़ोम कि, ‘परमेशरी तरफां मैल्लो,’ त एनी पुछनौए कि, ‘फिरी तुसेई तैसेरो विश्वास की न कियो?’ 32 पन अस एन भी नई ज़ोई सकम कि, ‘यूहन्ना अधिकार, मैन्हु केरि तरफां मैल्लो,’ किजोकि असन लोकां केरो डर आए कि तैना असन पुड़ क्रोध केरले, किजोकि सारे लोक समझते थिये कि सच्चे यूहन्ना नबी आए।” 33 एल्हेरेलेइ तैनेई यीशु एन जुवाब दित्तो कि, “असन नई पतो।” यीशुए तैन सेइं ज़ोवं, “अवं भी तुसन सेइं न ज़ोई कि अवं एन कम्मां कोस अधिकारे सेइं केरताई।”

12 तैल्ला पत्ती, यीशु यहूदी लोकां केरे लीडरन सेइं मिसालन मां गल्लां केरने लगो, “एक्सां, एक्की मैने दाढ़ी बाग लाई, ते बागारे चेव्रे पासन बाड़ दित्तो, त दाढ़ारो रस कठनेरे लेइ कुण्ड बनावं, ते तैनी तैस बागारी रखवाली केरनेरे लेइ अक उच्ची कूड़ी बनाई। तैल्ला पत्ती, तै मैन्हु तैस बागारो ठेको किछ ज़मीनदारन देइतां होरि मुल्खे जो च्चलो जेव। 2 ज़ैखन फल्लोरो मौसम अव, त तैनी ज़मीनदारन कां अक नौकर भेजो कि ज़मीनदारन केरां दाढ़ारे बागारे फल्लां केरो अपनो हिस्सो आने। 3 पन ज़ैखन तै नौकर बागी मां पुज़्जो, त तैन किसानई तै ट्लेइतां मट्ठो त खाली हथ्थेइं वापस भेजो। 4 ज़ैखन बागारे मालिके शुनू कि तैनेई एन कुन कियूं त तैनी होरो अक नौकर फिरी भेजो। पन तैनेई तैसेरो भी दोग बन्नो ते तैसेरी बेज़ती केरतां भेजो दित्तो। 5 फिरी तैनी मालिके होरो अक नौकर तैन कां भेजो। तैनेई तै भी मैरी छँट्ठो। तैखन तैनी होरे जादे नौकर भेजो। तैन मरां तैनेई किछ मट्ठे, ते किछ मारे। 6 तैस मालिके कां अक्के रेवरो थियो, ज़ैन तैसेरू ट्लारू मटू थियूं। आखरी मां, तैनी तै भी तैन कां एन सोचतां भेजू कि तैना मेरे मट्टोरी इज्ज़त केरले। 7 पन ज़ैखन मालिकेरू मटू तैन कां अव, त तैन किसानई एप्पू मांमेइं ज़ोवं, ‘ए त एस बागारो वारिस आए। एज्जा, अस एस भी मैरी छँट्ठुम, तैखन एसेरी जेइदात इश्शी भोनी।’ 8 एल्हेरेलेइ, तैनेई तै ट्लेइतां मैरी छँट्ठो, ते बागारे बेझर शेरी छँट्ठो।” 9 तैखन यीशुए तैन मैनन् पुच्छू, “हुनी बागारो मालिक तैन ज़मीनदारन सेइं कुन केरेलो? अवं ज़ोतई कि तैनी कुन केरनू तै एइतां तैन किसानां केरो नाश केरेलो, ते बागारो ठेको होरि केन्ची ज़मीनदारन देलो!” 10 “कुन तुसेई पवित्रशास्त्रे मां मसीहेरे बारे मां ई गल नई पढ़ोरी? तैस मां लिखोरुए कि, ‘जै धोड़ राज़-मिस्ट्रेई निकम्मो ठहरेवरो थियो, तै मकानेरो खास धोड़ बेनि जेव। 11 एन प्रभु परमेश्वरी तरफां एन्चरां भोव, ते कने इश्शी नज़री मां ए हैरान भोनेरी गल आए!’” 12 ज़ैखन यहूदी लोकां केरे लीडरेई एन शुनू, त तैनेई सेमझी छँट्ठु कि यीशुए ई मिसाल इश्शो खलाफ ज़ोरीए। एल्हेरेलेइ, तैना सेरकोए। त तैनेई यीशु कैद केरनू चाव। पन तैना लोकन केरां डरे, एल्हेरेलेइ तैस छेडतां चेलि जे। 13 तैल्ला पत्ती, यहूदी लोकां केरे लीडरेई यीशु कां किछ फरीसी लोक त कने हेरोदेस राज़ेरे लोक भेजे, ताके तैना यीशुए अपनि गल्लन मां फसान। 14 तैनेई यीशु कां एइतां तैस

सेइं जोवं, “हे गुरु, अस ज्ञानतम कि तू सच्चो आस, त केन्चेरी परवाह न केरस, किजोकि तू सारे मैनन् बराबर समझातस, त तू परमेशरेरी गल्लां लोकन सच्चाई सेइं शुनातस। एल्हेरेलेइ असन ज़ो, कुन रोम-मुल्खेरे महाराजे जो चुंगी देनी जेइज़ आए कि नई? 15 अस देम या न देम?” यीशुए तैन केरु पाखंड ज़ेनतां तैन सेइं जोवं, “मीं किजो अज्ञातथ? अक सिक्को (टीनार) मीं कां आनां कि अवं तैस हेरी।” 16 तैनेई आनो, तैखन यीशुए तैन पुच्छू, “इस सिक्के पुढ़ केसेरी शकल त केसेरु नवं आए?” तैनेई जुवाब दित्तो, “महाराज़ेरु आए।” 17 यीशुए तैन सेइं जोवं, “जैन महाराज़ेरु आए तैन बड़े राजे देथ, ते जैन परमेशरेरु आए तैन परमेशरे देथ।” जैखन फरीसी लोकेई ते कने हेरोदेस राजेरे लोकेई एन शुनू, त तैखन तैना बड़े हैरान भोए। 18 तैल्ला पत्ती, सदूकी लोक यीशु कां आए। तैना ज़ोतन मुड़दे ज़ींते न भोन। त तैनेई यीशु पुच्छू, 19 “हे गुरु, बड़े पेइले मूसे असन जो कानूने मां लिखोरु थियूं कि अगर कोई मैन्हु बेऔलाद मेरि गाए त तैसेरी कुआन्श रेइ गाए, त तैसेरो ढला तैसेरी लैड़ी सेइं डला बनाए, त अपने ढलाएरे लेइ औलाद पैदा केरे, ताके तैसेरी खानदानी राए। 20 सत ढला थिये। पेइलो ढला ढला बनेइतां बेऔलाद मेरि जेव। 21 तैखन दुइयोवं ढलाए तैस कुआन्शी सेइं डला बनाव। तै भी बेऔलाद मेरि जेव। तेच्चरां टलेइयोवं ढलाए भी कियूं। 22 त सते ढलाएई तैस कुआन्शी सेइं एककेरे पत्ती एकके डला कियो, पन औलाद न भोइ। सैरेन पत्ती तै कुआन्श भी मेरि जेई। 23 एल्हेरेलेइ, परमेशर लोक मुड़दन मरां ज़ींते केरनेरे पत्ती, यानी जैखन लोक ज़ींते भोले, त तैखन तै कुआन्श तैन सत्तन मरां केसेरी लाड़ी भोली? किजोकि तै इड़ी धेरती पुड़ सत्तां केरि लाड़ी भोरी थी।” 24 यीशुए तैन सेइं जोवं, “तुश्शी सोच केत्री गलत आए! कुन तुसन पतो किजो? किजोकि तुस पवित्रशास्त्रे मां लिखोरी गल्लन त कने परमेशरेरी शक्ति न ज्ञानथ! 25 तुसेई जै कहानी ज़ोई, तैस मां तै कुआन्श तैन सत्तन मरां केन्चेरी लाड़ी नई भोनी, किजोकि जैखन लोक मुड़दन मरां ज़ींते भोले, त तैखन कोई केन्ची सेइं डला न बनालो, पन तैना स्वर्गे मां परमेशरेरे स्वर्गदूतां केरे जेरे भोले, जैना डला न बनान। 26 मुड़दां केरे ज़ींतो भोनेरे बारे मां, कुन तुसेई मूसेरी किताबी मां एन नई पढ़ोरु जैखन मूसे बलतू झैल्ल लाव, तैखन (यानी अब्राहम, इसहाक त याकूब मरनेरे बड़े सालना पत्ती)

परमेशरे मूसा सेइं ज़ोवं, ‘अवं अब्राहमेरो परमेशर, ते इसहाकेरो परमेशर, ते याकूबेरो परमेशर आई?’ 27 परमेशर मुङ्दां केरो परमेशर नई, पन ज़ीतां केरो परमेशर आए, एल्हेरेलेइ तुश्शी सोच बिलकुल गलत आए।” 28 तैखन शास्त्री लोकन मरां एककी मैने एजतां यीशु ते सदूकी लोकां केरि गलबात शुनी। तैस पतो च्छ्लो कि यीशुए तैनन् ठीक जुवाब दित्तो, ते तैनी यीशु कां एइतां तैस पुच्छू, “परमेशरेरे सारे हुक्मन मरां बड़ो खास हुक्म को आए?” 29 यीशुए तैस जुवाब दित्तो, “सारे हुक्मन मरां बड़ो खास हुक्म ई आए, ज़ेन्न्वरां परमेशरेरी किताबी मां लिखोरुए कि, ‘हे इसाएल्टेरे लोकव शुना, प्रभु इश्शो परमेशर, अकके प्रभु आए, 30 एल्हेरेलेइ प्रभु अपने परमेशरे सेइं तुस अपने सारे दिले सेइं, त अपनि सैरी जानी सेइं, त अपनि सैरी अकली सेइं, त अपनि सैरी ताकती सेइं प्यार केरा।’ ए बड़ो खास हुक्म आए। 31 तैसेरो ज़ेरो दुइयोवं बड़ो खास हुक्म ई भी आए कि, ‘तू अपने पेड़ोसन सेइं अपने बराबर प्यार केरा।’ एन दूर्ध हुक्मन केरां होरो कोई भी बड़ो हुक्म नई।” 32 तैखन शास्त्री मैन्हु यीशु सेइं ज़ोवं, “हे गुरु, तीं बड़ू ठीक ज़ोवं! त तीं सऱ्ह ज़ोवं कि परमेशर अकके आए, ते तैसेरे अलावा होरो कोई नई। 33 त असेई परमेशरे सेइं अपने सारे दिले सेइं, ते अपनि सैरी जानी सेइं, ते अपनि सैरी अकली सेइं, त अपनि सैरी ताकती सेइं प्यार कियोरो लोड़े। ते कने असेई अपने पेड़ोसन सेइं अपने बराबर प्यार कियोरो लोड़े। जानवरां केरु बलिदान केरनू या होरि चीजां केरि चढ़तल चाढ़ने करां भी बेधतां, एना दुइये हुक्मन मन्ने परमेशरे लेइ बड़े खास आन!” 34 ज़ैखन यीशुए हेरु कि तैनी अकली सेइं जुवाब दित्तो, त तैनी तैस सेइं ज़ोवं, “तू परमेशरेरे राज्जे मां दाखल भोने करां दूर नई।” ते तैल्ला पत्ती, केन्ची यीशु किछ पुछ्नेरी हिम्मत न भोइ। 35 मन्दरे मां शिक्षा देते बार यीशुए लोकन अक सवाल पुछ्णे, “शास्त्री किजो ज़ोतन कि जै मसीह आए, तै दाऊद-राजेरी औलादी मरां भोलो? 36 बड़े पेहले दाऊद राजे एप्प पवित्र आत्मारे शक्ति सेइं एन्चरां ज़ोरु थियूं कि, प्रभु परमेशरे मेरे प्रभु मसीहे सेइं ज़ोवं, ‘तू मेरे देइने पासे बिश, ज़ांतगर कि अवं तेरे दुश्मन बिलकुल न हारेई।’ 37 दाऊद राजे त एप्प मसीहेरे बारे मां एन ज़ोवं कि ‘तै मेरो प्रभु आए,’ फिरी मसीह तैसेरू मटू केन्चरां भोइ सकते?” त मैन्हु केरि भीड़ यीशुएरी गल्लां खुशी सेइं शुन्ती थी। 38 यीशुए शिक्षा देते

बार लोकन सेइं ज़ोवं, “शास्त्री लोकन करां खबरदार राथ, जैना लम्मे-लम्मे चोले लेइतां हन्ठनू चातन, ताके लोक समझन कि तैना बड़े धर्मी आन, त तैना चातन कि बजारन मां लोक असन बड़ी इज़्जती सेइं नमस्कार केरन। 39 त कने प्रार्थना घरन मां बड़े खास मैन्हु केरे लेइ रख्खोरी कुर्सी पुड़ बिशनू चातन, त धामन मां भी गेइतां बड़े खास मैन्हु केरे लेइ रख्खोरी कुर्सी पुड़ बिशनू चातन। 40 तैना विधवां केरे घरन लुटतन त कने होरि मैनन् हिरानेरे लेइ लेम्मी-लेम्मी प्रार्थना केरतन, ताके लोक समझन कि तैना बड़े धर्मी आन। परमेशर तैनन् बड़ी जादे सज्जा देलो!” 41 लोकन शिक्षा देनेरे पत्ती, यीशु मन्दरेरे दान-पेट्टेरे सामने बिशतां एन तकने लग्गोरो थियो कि, लोक दान-पेट्टी मां केन्चरां पेंइसे छङ्गतन। बड़े मैनेई, जैना अमीर थिये, तैड़ी इतां तैस मां बड़े पेंइसे छङ्गने लग्गोरे थिये। 42 तैखन अक गरीब विधवां इतां दूर्घ सिकके छङ्गे, जैन केरि कीमत बड़ी घट थी। 43 जैखन यीशुए तैन हेरू, तैनी अपने चेले एप्पू कां कुजेइतां तैन सेइं ज़ोवं, “अवं तुसन सेइं सच्च ज़ोराई कि मन्दरेरे दान-पेट्टी मां पेंइसे छङ्गनेबालन मरां, एस गरीब विधवां तैन सारे मैनन् करां जादे छङ्गुरेन। 44 किजोकि तैन सैरेई अपने जादे पेंइसन मरां थोड़े ज़ेरे छङ्गे, पन ए विधवा त बड़ी गरीबी आए, फिरी भी तैसां सब किछ जैन तैस कां थियूं छेड़ी दित्तू, यानी अपनि ज़रूरतरे लेइ रख्खोरे पेंइसे भी छेड़ी दित्ते!”

13 जैखन यीशु त तैसेरे चेले मन्दरे मरां निस्सी राओरे थिये, तैखन तैसेरे चेलन मरां एकके तैस सेइं ज़ोवं, “हे गुरु, इड़ी हेर! केत्रे बड़े-बड़े घोड़न सेइं बनोरी दिवारां कने केत्रू रोड़े भवन आए!” 2 यीशुए तैन सेइं ज़ोवं, “हुन्ना त तुस एना बड़े-बड़े घोड़न सेइं बनोरे भवनन लातथ, पन एककी दिहाड़े इड़ी घोड़े पुड़ घोड़ भी न रालो, यानी सब नाश भोइ गालू!” 3 तैल्ला पत्ती, यीशु जैतून नव्वेरे पहैड़ी पुड़ चढ़ता पार मन्दरेरे सामने बिशशो। तैखन पतरस, याकूब, यूहन्ना ते अन्द्रियास यीशु कां अलग गेइतां तैस केरां पुछने लगो, 4 “असन ज़ो कि एना गल्लां केइस भोनिन? तैन दिहाड़ी केरो कुन निशान आए, जैखन एना सब गल्लां पूरी भोनिन?” 5 तैखन यीशु तैन सेइं ज़ोने लगो, “खबरदार राथ कि कोई तुसन धोखो न दे। 6 किजोकि बड़े मैन्हु मेरे नंवे सेइं इतां ज़ोले कि, ‘अवं मसीह आई।’ ते तैना बड़े मैन्हु धोखो देले। 7 जैखन तुस लड़ाई ते कने लड़ाइयां केरि अफवाह शुनेले, त तुस घबरेइयथ न,

किजोकि लड़ाइयां केरु भोनू ज़रुरी आए, पन एस दुनियारो अन्त अकदम न भोलो। 8 किजोकि एककी ज़ातारे लोक होरि कौमरे लोकां केरे खलाफ लड़ाई केरले, त अक मुलख होरि मुल्खेरे खलाफ लड़ाई केरेलो। हर ठैरी भुंजल एज्जले, त काल पेलो। एन सब त सिर्फ मुसीबतां केरि शुरुआत आए। 9 “पन तुस अपने बारे मां खबरदार राथ, किजोकि लोक तुसन सभां केरे हवाले केरले, प्रार्थना घरन मां नेइतां महुले, त तुस मेरे वजाई सेइं गवर्नरन ते कने राज्जन कां खड़े किये गाले, ताके तुस तैन केरे सामने मेरे गवाह भोथ। 10 पन इस युगेरो अन्त भोनेरे पेइले एरु भोनू ज़रुरी आए कि परमेश्वरे राज्जेरे बारे मां खुशखबरी सैरी कौमां केरे लोकन शुनेर्ई गाए।” 11 ज़ैखन लोक तुसन नेइतां आदालतां केरे हवाले केरले, त पेइले फिक्र न केरथ त न सोचथ कि अस कुन ज़ोमेले, पन ज़ैन किछ परमेश्वर तुसन तैस घड़ी ज़ोनेरे लेइ ज़ोवं गालू, तैन्ने ज़ोइयथ। किजोकि ज़ोनेबाले तुस नई, पन पवित्र आत्मा तुशे ज़िरिये ज़ोलो। 12 ढला (ज़ै मीं पुड़ विश्वास न केरे, तै) अपने ढलाए मरानेरे लेर्ई हवाले केरेलो। त बाजी भी अपने मट्टे तेन्वरां हवाले केरेलो, ते बच्चे अपने हाज-बव्वेरे खलाफ भोइतां तैनन् मैरी छडेले। 13 मीं पुड़ विश्वास केरनेरे वजाई सेइं सारे लोक तुसन सेइं नफरत केरले, पन ज़ै मरने तगर विश्वासे मां बनोरो रालो, तैस परमेश्वर मुक्ति देलो। 14 तैल्ला पत्ती, यीशुए तैन सेइं ज़ोवं, “बड़ी बुरी गंदी चीज़, ज़ै नाश केरचे, एजनेबाली आए। तै भिट्टी चीज़ तैस जगाई पुड़ खड़ी भोली, ज़ेड़ी तैसारू खड़ू भोनू जेइज़ नई। बड़े पेइले दानिय्येल नेबे तैस चीज़ेरे बारे मां ज़ोरु थियूं। (ज़ै कोई एन पढ़े, तै ए गल समझे।) ज़ैखन तुस तै चीज़ी तैड़ी खड़ी लाएले, त तैखन ज़ैना लोक यहूदिया इलाके मां रातन, तैना बचनेरे लेइ पहाड़न पुड़ नेश्शी गान। 15 ते अगर कोई मैन्हु अपने घरेरे छते पुड़ भोलो, त तै अकदम तैटुं नेश्शी गाए, ते अपने घरेरां किछ नेने अन्तर न गाए (ताके वक्त बरबाद न भोए)। 16 ते अगर कोई मैन्हु ऊडरे मां कम केरि राओरो भोलो, त तै भी अकदम तैटुं नेश्शी गाए। तै अपना लिगड़ां भी नेनेरे लेइ पत्रोवं न एज्जे। 17 तैन दिहाड़न मां जैना दोजींती त दुद्ध पियाती कुआन्शां भोली, तैन केरे लेइ अफसोस! (किजोकि तैन केरे लेइ बड़ी मुश्किल भोली।) 18 ते तुस प्रार्थना केरा कि एन हियूंतडेरे दिहाड़न मां न भोए। 19 किजोकि तैन दिहाड़न मां

लोकन बड़ी मुसीबत भोली, कि दुनितयारी शुरुआती केरां देंती जैन परमेश्वरे
 बनोरीए, अज़ तगर एरी मुसीबत नई ओरी। ते एरी ज़ेरि मुसीबत फिरी कधी
 न भोली।” 20 “अगर प्रभु परमेश्वर तैन मुसीबतेरी दिहाड़न न घटाए, त कोई
 मैन्हु भी न बच्चलो। पन परमेश्वर अपने चुनोरे लोकां केरे वजाई सेइं तैन
 दिहाड़न घटालो। 21 तैस मुसीबतेरे दिहाड़न मां, अगर कोई तुसन सेइं ज्ञोए
 कि, ‘तक्का, मसीह इड़ी आए!’ या ‘तक्का, उड़ी आए!’ त विश्वास न केरथ।
 22 किजोकि झूठे मसीह ते कने झूठे नबी एज्जले। तैना लोकन धोखो देनेरे
 लेइ निशान ते कने चमत्कारेरां कम्मां हिराले, कि अगर भोइ सके, त तैना
 परमेश्वरेरे चुनोरे लोकन भी धोखो देले। 23 एल्हेरेलेइ, तुस होशियार राथ!
 हेरा, मीं तुसन सैरी गल्लां भोनेरे पेइले ही ज़ोरिन।” 24 तैल्ला पत्ती, यीशुए
 तैन सेइं ज़ोवं, “तैन दिहाड़न मां, तैस मुसीबतेरे वक्तेरे पत्ती, ‘दिहाड़ो कालो
 भोइ गालो, त चाँदनी लौ न देली, 25 त अम्बरेरां तारे बिछङ्गने लग्गेले, त
 अम्बरेरी सैरी शेक्कि हिल्लेली।” 26 “तैखन लोक मैनेरे मटू (यानी मीं) बड़ी
 शेक्कि त कने बड़ी महिमा सेइं साथी धेरती पुड़ जो बिदलारी मां एजते हेरेले।
 27 तैखन अवं अपने स्वर्गदूतन सारी दुनियाई मां भेज्जतां धेरतारे हर पासेरां
 अपने चुनोरे लोकन अकोट्टे केरेलो।” 28 तैल्ला पत्ती, यीशुए तैन सेइं ज़ोवं,
 “फेगेरे बुटेरे मिसाले केरां अक सबक शिख्खा! जैखन तैसेरी डैलड़ी नरम
 भोइतां, त नंवां पट्टां निस्ने लगतन, ते तुस बुज़झी छङ्गतथ कि गर्मेरो मौसम
 एजनेबालो आए। 29 एसेरो ज़ेरो, जैखन तुस एना गल्लां, जैना मीं जोई, भोते
 हेरेले, त तुस बुज़झी छङ्गा कि मैनेरू मटू, यानी अवं बड़े नेड़े पुज़ज़ोरोई। 30
 अवं तुसन सेइं सच ज़ोतई कि ज़ांतगर एना सैरी गल्लां न भोली, तांतगर एना
 लोक, जैना हुन्ना ज़ीतेन, तैना न मरेले। 31 अम्बर त कने धरती टेली गाली,
 पन मेरी गल्लां कधी न टेलेली।” 32 तैल्ला पत्ती, यीशुए तैन सेइं ज़ोवं, “मेरे
 वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि तै
 कताली भोलो, स्वर्गेर स्वर्गदूते भी न ज़ानन् त परमेश्वरेरू मटू यानी अवं भी न
 ज़ैनी, पन सिर्फ मेरो बाजी परमेश्वर ज़ानतो। 33 एल्हेरेलेइ, मेरे वापस एजनेरे
 लेइ हमेशा तियार राथ, ते प्रार्थना केरते राथ, किजोकि तुस न ज़ानथ कि तै
 वक्त कताली एज्जलो। 34 मैनेरे मटूरू, यानी मेरू वापस एजनू तैस मैनेरू ज़ेरू
 आए, जै अपनू घर छेड़तां होरे मुल्खे जो गाते। गाने केरां पेइले, तै अपने

नौकरन कुजेइतां अपने घेरी रखवाली केरनेरो अधिकार देते, ते हर एककी अपनू-अपनू कम देते, त दारे पुड़ रखवाली केरनेरे लेइ संत्री बींझो रानेरो हुक्म भी देते, किजोकि तै कधी भी वापस एज्जी सकते।” 35 “एसेरे ज़ेरे, तुस भी हमेशा मेरे वापस एजनेरे लेइ तियार राथ, किजोकि तुस न ज्ञानथ कि घेरेरो मालिक यानी अवं कताली वापस एज्जेलो। शायद डुलोझी या एध्धी राती या कुकड़ेरे बांग देनेरे मौके या झोज़झां। 36 एल्हेरेलेइ तियार राथ! एरु न भोए कि अवं अचानक इइतां लेई कि तुस तियार नई। 37 जैन अवं तुसन सेइं ज़ोतई, तैन्ने सारे मैनन् सेइं भी ज़ोतई कि, ‘हमेशा तियार राथ!’”

14 फ़सहेऱ तिहार त कने अखमीरी रोट्टारू तिहार दूई दिहाड़न पत्ती एजनेबालां थियां। प्रधान याजक त कने शास्त्री मौको तोपने लगोरे थिये कि अस यीशु केन्वरां चुपचारे ट्लाम ते तैस मैरी छ्डुम। 2 पन तैनेई एप्पू मांमेइं ज़ोवं कि, “अस तिहारेरे दिहाड़न मां यीशुए कैद न केरम, किजोकि तैन दिहाड़न मां बड़े लोक चेव्रे पासन भोतन, ते एरु न भोए कि यीशुएरे कैद भोनेरे वजाई सेइं लोकन मां दंगोफसाद भोइ गाए।” 3 यीशु बैतनिय्याह ड्लोंक्वे मां शमौन नंक्वेरे मैनेरे घेरे मा थियो, जैस पेइले कोढ़ेरो रोग थियो। ज़ैखन यीशु तैड़ी रोट्टी खेइ राओरो थियो, त तैखन अक कुआन्श संगमरमरे सेइं बनोरे भाडे मां इत्र एन्तां यीशु कां आई, ज़े बड़ो कीमती थियो त कने जैस जो जटामासी ज़ोतन। तैसां तै इत्र बोतल ट्लोड़तां खोल्ली ते यीशुएरी इज्जत केरनेरे लेइ तैसेरे दोगो पुड़ इत्र उलटव। 4 पन किछ मैन्हु, जैना तैड़ी खड़े थिये, तैस कुआन्शी हेरतां अपने दिले मां सेरकोइतां एप्पू मांमेइं ज़ोने लगे, “ए कुआन्श किजो एस बड़ी कीमतारो इत्र ज़ाया केरचे? 5 ए इत्र त एककी सालेरी मज़दूरारे पेइसन केरां भी जादे भाए मां बेचतां, ते तैना पेइसे गरीब मैनन् देइ सकती थी!” ते तैना सेरकोइतां तैस सेइं डांटने लगे। 6 पन यीशुए तैन सेइं ज़ोवं, “एस छेड़ी देथ! एस किजो तंग केरतथ? एसां त मीं सेइं भलाई कियोरीए। 7 गरीब मैन्हु त हमेशा तुसन सेइं साथी रातन। ज़ैखन भी तुस चाथ, तैखन तैन सेइं भलाई केरि सकतथ, पन अवं तुसन सेइं साथी हमेशा न रालो। 8 जैन किछ ए कुआन्श केरि सकती थी, तैन एसां कियूं। एसां मेरी जानी पुड़ खुशबूदार तेल लेइतां मेरे मरनेरां पेइली मेरी जान दबनेरे लेई तियार कियोरीए। 9 अवं तुसन सेइं सच ज़ोतई कि सैरी दुनियाई

मां ज़ेडी कोन्ची मेरे बारे मां खुशखबरी लोकन शुनाई गाली, तैडी जैन कम एसां मीं सेइं कियोरुए तैन भी एसेरी यादी मां ज़ोवं गालू।” 10 तैल्ला पत्ती, यहूदा इस्कियोती, जै 12 चेलन मरां अक थियो, प्रधान याजकन कां जेव कि तै यीशु टलुवानेरे लेइ तैन केरि मद्दत केरे। 11 एन शुन्तां तैना बड़े खुश भोए, ते तैसेरे मद्दतरे लेइ तैनेई चैदेरे रुपेइये देनेरो वादो कियो। एल्हेरेलेइ, तै ठीक मौके बलगने लगो कि यीशु केन्चरां सेइं टलुवाए। 12 अखमीरी रोट्टारे तिहारेरी पेइली दिहाड़ी, ज़ैखन लोक फ़सहेरे तिहारेरे गबड़े बलिदान केरते थिये, तैखन यीशुएरे चेलेई तैस पुच्छू, “तू कोड़ि चातस कि अस गेइतां तेरे लेइ फ़सह तिहारेरी रोट्टी तियार केरम?” 13 तैखन यीशुए अपने दूर्घ चेले एन ज़ोइतां भेजे, “यरुशलेम नगरे मां गाथ, ते अक मैन्हु तुसन पैनेरो घड़ो छुवोरो मैलेलो, तैस पत्ती-पत्ती गेइयथ। 14 ते तै ज़ैस घरे मां गालो, तैस घरेरे मालिके सेइं तुस एन ज़ोइयथ कि, इश्शे गुरे ज़ोवरुए कि, ‘मेरे लेइ तियार कियोरो मेहमान कमरो कोड़ि आए, ज़ेडी अवं अपने चेलन सेइं साथी फ़सह तिहारेरी रोट्टी खेइ?’ 15 तैखन घरेरो मालिक तुसन दुझ्योवं छती पुड़, तियार कियोरो, अक बढ़ो कमरो हिरालो। तैडी इश्शे लेइ रोट्टी तियार केरथ।” 16 ते चेले तैटुं निस्तां नगरे मां आए, त ज़ेन्चरां यीशुए तैन सेइं ज़ोरु थियूं, तेन्चरां तैनेई लावं। ते तैनेई फ़सह तिहारेरी रोट्टी तियार की। 17 ज़ैखन डलोङ्ग भोइ, त यीशु अपने 12 चेलन सेइं साथी मेहमान कमरे मां अव। 18 ज़ैखन तैना बिश्तां रोट्टी खेइ राओरे थिये, त यीशुए तैन सेइं ज़ोवं, “अवं तुसन सेइं सच ज़ोतई कि तुसन मरां अक, जै मीं सेइं साथी रोट्टी खेइ राओरोए, मीं धोखे सेइं टलुवालो।” 19 एन शुन्तां तैना सारे चेले उदास भोए, ते तैना अक-अक केरतां यीशु सेइं पुछ्ने लगे, “कुन अवं आई? कुन अवं आई?” 20 यीशुए तैन सेइं ज़ोवं, “तै तुसन बारहन मरां अक आए, जै मीं सेइं साथी बिश्तां इश्शी एककी थैली मां रोट्टी खेइ राओरोए। 21 ज़ेन्चरां मैनेरु मटू यानी मेरे बारे मां परमेश्वरी किताबी मां लिखोरुए, तेन्चरां अवं मारो गानोई। अफसोस! (किजोकि तैस मैन्हु बड़ी सज़ा मैल्लनीए एजने बालीए) ज़ेसेरे वजाई सेइं मैनेरु मटू यानी अवं टलुवाव गानोई! अगर तै मैन्हु ज़रमोरो न भोथो, त तैसेरे लेई तैन भलू थियूं।” 22 ज़ैखन यीशु त तैसेरे चेले फ़सहेरी रोट्टी खेइ राओरे थिये, यीशुए अक रोट्टी टलेइतां परमेश्वरु शुक्र केरतां टलोडी। तैल्ला पत्ती,

तैनी तै अपने चेलन दित्ती, ते तैन सेइं ज़ोवं, “ट्लाथ ते खाथ। ई मेरो जिसम आए।” 23 फिरी यीशुए दाढ़ारे रस्सेरो कटोरो ट्लेइतां परमेशरेऱु शुक्र कियूं। तैल्ला पत्ती, तैनी तै अपने चेलन दित्तो, ते तैनेई सैरेई पियो। 24 तैखन तैनी तैन सेइं ज़ोवं, “ए दाढ़ारे रस मेरो खून आए, ज़ै परमेशर त कने लोकां केरे मझाटे नव्वों करार बनाते, ज़ै बडे लोकां केरे मैफारे लेइ बगाव गालो। 25 अब तुसन सेइं सच्च ज़ोतई कि अब दाढ़ारो रस तैस दिहाड़ी तगर फिरी कधी न पीलो, ज़ांतगर परमेशरेरे राज्जे मां अब नंव्वो दाढ़ारे रस पीं। 26 तैल्ला पत्ती, यीशु त कने तैसेरे चेले परमेशरेऱु भजन ज़ोइतां, यरुशलेम नगरेरे बेइर ज़ैतून नंव्वेरे पहैड़ी पुड़ चले जे।” 27 तैखन यीशुए अपने चेलन सेइं ज़ोवं, “तुस सारे मीं छेडतां नश्शेले, किजोकि परमेशरेरी किताबी मां लिखोरु कि, ‘अब पुहाले मैरेलो ते तैसेरी भैड्हां इरां उरां नेश्शी गाली।’ 28 पन अब मेरतां मुडदन मरां फिरी ज़ींतो भोनोई। तैल्ला पत्ती, अब तुसन केरां पेइले गलील इलाके जो गालो त तैड़ी तुस मीं लाएले।” 29 तैखन पतरसे यीशु सेइं ज़ोवं, “अगर सारे तीं छेडतां नश्शेले त नश्शन, पन अब कथे न नेश्शेलो।” 30 यीशुए पतरसे सेइं ज़ोवं, “अब तीं सेइं सच्च ज़ोतई कि अज़्जेरी राती कुकडेरे दूर्घ बार बांग देने केरां पेइले, तू ट्लाई बार मेरो इन्कार केरेलो कि तू मीं न जानस।” 31 पन पतरसे मना ज़ोरे सेइं यीशु सेइं ज़ोने लगो, “अगर मीं तीं सेइं साथी मरनू भी पे, त किरी भी अब तेरो इन्कार कधी न केरेलो।” एन्वरां होरि चेलेई भी ज़ोवं। 32 तैल्ला पत्ती, यीशु ते तैसेरे चेले गतसमनी नंव्वेरे एककी बागी मां जे, ते तैड़ी यीशुए अपने किछ चेलन सेइं ज़ोवं, “इडी बिश्शोरे राथ, ज़ां तगर अब प्रार्थना न केरि।” 33 फिरी यीशुए पतरस ते याकूब ते यूहन्ना एप्पू सेइं साथी बागी मां अगगर निये, ते तैड़ी तै बडे परेशान भोने ते कने घबराने लगो। 34 ते तैखन यीशुए तैन सेइं ज़ोवं, “मेरो दिल बडो उदास आए, इडी तगर कि अब मरनेबालोई। तुस इडी बलगा, ते बींझे राथ।” 35 फिरी तै बागी मां थोडो जेरे अगगर गेइतां, तल्ले मां ज़ैन्धु केरे भारे बिश्तां प्रार्थना केरने लगो कि अगर भोइ सके त ए दुख्खेरी घड़ी मीं पुडेरां टेली गाए। 36 ते तैनी प्रार्थनाई मां एन ज़ोवं, “बैपू! हे मेरे बाजी, तुसन केरां सब किछ भोइ सकते। एस दुख्खेरो कटोरो मीं केरां दूर केरा। फिरी भी ज़ैन अब चाताई तैन नई, पन ज़ैन तुस चातथ तैन्ने भोए।” 37 फिरी तै अपने ट्लाई चेलन कां वापस

अब, त तैना झुल्लोरे मैल्ले, ते तैनी तैना बींझाए, त तैनी शमौन-पतरसे सेइं
ज़ोवं, “हे शमौन, कुन तू झुल्लोरोस? कुन तू अक घड़ी भी बींझो न रेइ
सकस?” 38 तैखन यीशुए तैन सैरेन सेइं ज़ोवं, “बींझो ते प्रार्थना केरते राथ
ताके तुस अज़मैइशी मां न पेथ। तुस त अज़मैइश रोकनी चातथ, पन तुसन
कां रोकनेरी ताकत नईं।” 39 ते यीशु फिरी अपने चेलन केरां थोड़े दूर च्छलो
जेव, त ज़ैना गल्लां तैनी पेइले ज़ोइतां प्रार्थना कियोरी थी, तैन्नां गल्लां दुबारां
ज़ोइतां प्रार्थना की। 40 ते फिरी वापस एइतां हेरु कि तैना चेले झुल्लोरेन,
किजोकि तैन एत्री निङ्ली थी, कि तैन केरि एछळी भी न थी लोरी खुलने।
ज़ैखन यीशुए तैना बींझाए, त तैना शरमाने लगे कि यीशुए कुन जुवाब देम!
41 फिरी ट्लेइयोवं बार गेइतां यीशुए प्रार्थना की ते वापस एइतां फिरी तैन
सेइं ज़ोवं, “कुन तुस हेजू झुल्लोरेथ! बड़ु आए! हुनी घड़ी एज्जी जोरी! हेरा,
मैनेरु मटू (यानी अवं) पापी मैन्हु केरे हथ्थन मां ट्लुवेइयोव गानोई। 42 उठा,
च्छलम। हेरा! मीं ट्लुवानेबालो नेडे पुज्जी जोरो!” 43 यीशु एन्ने ज़ोई राओरो
थियो कि अकदम यहूदा ज़ै 12 चेलन मरां अक थियो, एप्पू सेइं साथी मैन्हु
केरि अक बड़ी भीड़ एन्तां तैड़ी पुज्जी जेव, ज़ैन कां तलवारां ते डंडे थिये।
तैना प्रधान याजक ते शास्त्री लोक ते कने यहूदी लोकां केरे बुजुर्गा केरि
तरफां यीशु कैद केरनेरे लेइ भेज़ोरे थिये। 44 यीशुएरो ट्लुवानेबालो यहूदा
तैड़ी पुज्जने केरां पेइले, तैन मैनन् जो निशान दित्तोरो थियो कि ज़ैस अवं
फुम्मड़ी देलो तैए यीशु आए, तैस ट्लेइतां ध्याने सेइं नेइयथ। 45 ज़ैखन
यहूदा ते मैन्हु केरि भीड़ बागी मां आई, त तैनी अकदम यीशु सेइं ज़ोवं, “हे
रब्बी (गुरु)” ते तैस फुम्मड़ी दित्ती। 46 तैखन तैनेई यीशु ट्लेइतां कैद कियो।
47 यीशुएरे चेलन मरां, ज़ैना तैसेरे नेडे खडे थिये, एकके अपनि तलवारे सेइं
महायाजकेरे एककी नौकरे पुड़ चलाई त तैसेरो अक कन केट्टी छङ्गो। 48
यीशुए तैन मैनन् सेइं ज़ोवं, “कुन तुस मीं डैकू समझतां ट्लानेरे लेइ तलवारां
ते डंडे घिन्तां ओरेथ? 49 अवं त हर दिहाड़ी मन्दरे मां तुसन सेइं साथी रेइतां
परमेशरेरे बारे मां लोकन शिक्षा देतो थियो, पन तैखन तुसेई अवं न ट्लाव।
पन एन एल्हेरेलेइ भोने लगेरु कि पवित्रशास्त्रे मां मेरे बारे मां ज़ैना गल्लां
लिखोरिन तैना पूरी भोन।” 50 तैखन यीशुएरे सारे चेले तैस छेडतां नेशी जे।
51 ते अक जवान ज़ैनी अपनि नग्गी जानी पुड़ अक लिगड़ पलेट्टेरु थियुं, यीशु

पत्ती चलो। ते भीड़ी मरां किछ मैनेई तै ट्लाव। 52 पन तै तैन केरे हथ्थन मां
 अपनू लिगड़ छेडतां नग्गो नेश्शी जेव। 53 तैल्ला पत्ती, मैन्हु केरि भीड़ां
 यीशु महायाजकेरे घरे मां नीयो। ते सारे प्रधान याजक ते कने बुजुर्ग त कने
 शास्त्री यीशुएरु इमतिहान नेनेरे लेइ महायाजके सेइं साथी तैड़ी अकोट्ठे
 भोए। 54 यीशु त कने मैन्हु केरि भीड़ी केरा दूर-दूर रेइतां पतरस तैन पत्ती-
 पत्ती महायाजकेरे महलेरे अंगने तगर पुज्जी जेव। ते तैड़ी तै महायाजकेरे
 पैरदारे सेइं साथी बिश्तां अग तपने लगो। 55 मेहलेरे अन्तर, प्रधान याजक त
 कने सारी महासभा यीशुएरे खलाफ गवाही तोपनेरी कोशिश केरि राओरे
 थिये, ताके तैना तैस मैरी सकन, पन तैनन् किछ न मैल्लू। 56 किजोकि बड़े
 मैन्हु यीशु पुड़ झूठी गवाही देने लगोरे थिये, पन तैन केरि गवाही अक्कां ज़ेरि
 न थी। 57 आखरी मां किछ मैनेई उठतां तैसेरे खलाफ ई झूठी गवाही दित्ती
 कि, 58 “असेई एस केरां एन ज़ोते शुनेरु कि, ‘अवं मैन्हु केरू बनोरु एस
 मन्दरे बिछोडतां ट्लेइ दिहाड़न मां होरु मन्दर बनालो, ज़ैन मैन्हु केरू बनोरु न
 भोलू।’” 59 पन एन ज़ोइतां भी तैन केरि गवाही अक्कां ज़ेरि न निस्सी। 60
 तैखन महायाजके आदालतेरे मझाटे खड़े भोइतां यीशु पुच्छू, “एना लोक
 तेरे खलाफ गवाही देतन, कुन तू कोई जुवाब नई देस?” 61 पन यीशु चुप
 राव, ते किछ जुवाब न दित्तो। तैखन महायाजके तैस फिरी पुच्छू, “कुन
 तू परमेश्वरे मटू मसीह आस?” 62 यीशुए ज़ोवं, “हाँ, अवं तै आई। ते
 ज़ेन्चरां परमेश्वरी किताबी मां लिखोरु कि ‘तुस सारे लोक, मैनेरु मटू (यानी
 मी) सर्वशक्तिमान परमेश्वरी देइने पासे बिश्शोरे त अम्बरे मरां बिदलारे सेइं
 साथी धेरती पुड़ एजते हेरेलो।’” 63 तैखन महायाजके सेरकोइतां, अपना
 चोगो छिन्दतां आदालतेरे मैनन् सेइं ज़ोवं, “हुनी असन होरि केन्चेरी गवाहेरी
 ज़रूरत नई! 64 तुसेई एप्पू परमेश्वरी तुहीन शुनी! ते तुस एसेरो कुन फैसलो
 केरतथ?” तैखन तैनेई सारे मैनेई ज़ोवं कि, “ए मैन्हु दोषी आए किजोकि
 एनी परमेश्वरी तुहीन की, एल्हेरेलेइ, एस मौतरी सज्जा दे।” 65 तैखन तैन
 मरां किछ मैन्हु, तैसेरी बेज़ती केरनेरे लेइ, तैस पुड़ थुकने लगे। ते किछ मैन्हु
 तैसेरी एछछी लिगड़े सेइं ढेकतां तैस मुक्केई बाने लगे ते तैस सेइं ज़ोने लगे,
 “भविष्यवाणी केर कि केनि तीं बाई!” ते नौकरेई भी तैस ट्लेइतां थप्पड़
 बाए। 66 जैखन पतरस, महायाजकेरे महलेरे अंगने मां थियो, त महायाजकेरे

नौकरेनन मरां अक कुआन्श तैडी आई। ६७ तैसां पतरस अग तपतो लाव। ते तै कुआन्श पतरस तेकतां तैस सेइं ज़ोने लग्गी, “तू भी एस नासरत नगरेरो यीशु सेइं साथी थियो।” ६८ पन पतरसे यीशुएरो इन्कार कियो ते ज़ोवं, “अवं न ज़ैनी ते न सेमझी कि तू कुन लगोरिस ज़ोने।” फिरी तै तैटुं बेझर डेवढी मां जेव। तैखन कुकडे बांग दित्ती। ६९ ज़ैखन तैसां नौकरेनां फिरी पतरस लव, त तै तैन सेइं, ज़ैना नेडे खडे थिये, ज़ोने लग्गी, “ए मैन्हु तैसेरे चेलन मरां अक आए!” ७० पन पतरसे फिरी यीशुएरो इन्कार कियो। थोड़े निरे बाद, ज़ैना पतरसेरे नेडे खडे थिये, तैनेई तैस सेइं ज़ोवं, “पक्को तू भी तैसेरे चेलन मरां अक आस, किजोकि तू गलील इलाकेरो मैन्हु भी आस।” ७१ तैखन पतरस कसम केरतां ज़ोने लगो, “मीं फिटकार लग्गे, अगर अवं झूठ ज़ोई कि अवं एस मैन्हु ज़ानतो भोई, ज़ेसेरे बारे मां तुस गल्लां केरने लग्गोरेथ!” ७२ तैखन अकदम दुइयोवं बार कुकडे बांग दित्ती। ज़ै गल यीशुए पतरसे सेइं पेइली ज़ोरी थी, तै गल तैस याद आई कि, “कुकडेरे दूँ बार बांग देने केरां पेइले तू ट्लाई बार मेरो इन्कार केरेलो कि तू मीं न ज़ानस।” तैखन तैनी बड़ी लेरां दित्ती, किजोकि तैनी यीशुएरो इन्कार केरनेरे वजाई सेइं बडो दुखी भोव।

15 झेज़झ भोंते, अकदम प्रधान याजकेई, ते यहूदी लोकां केरे बुजुर्गई, ते कने शास्त्री लोकेई ते कने सारे महासभारे मैनेई यीशुएरे खलाफ सलाह केरतां तै बन्धाव ते तैटुं नेइतां रोमी गवर्नर पिलातुसेरे हवाले कियो। २ पिलातुसे यीशु पुच्छू, “कुन तू यहूदी लोकां केरो राजो आस?” यीशुए तैस जुवाब दित्तो, “तू एप्पू ज़ोई राओरोस।” ३ तैखन प्रधान याजक तैस पुङ बेड़ि गल्लां केरो झूठो इलजाम लेइ राओरे थिये। पन यीशुए किछ न ज़ोवं। ४ पिलातुसे तैस फिरी पुच्छू, “तू किछ भी जुवाब की न देस? हेर, एना लोक तीं पुङ केत्री गल्लां केरो इलजाम लेइ राओरेन!” ५ हांलाकि यीशुएरी किछ भी गलती न थी, तैनी किछ जुवाब न दित्तो, इडी तगर कि पिलातुस बड़े हैरान भोव। ६ हर साल फ़सह तिहारेरे वर्के पुङ यहूदी लोकां केरे लेइ केन्वी एककी कैदी, जैस तैना लोक चाते थिये तैस पिलातुस छेड़ी देतो थियो। ७ तैन दिहाड़न बरअब्बा नंवेरो अक मैन्हु किछ दंगेफसाद केरनेबालन सेइं साथी कैदखाने मां थियो, ज़ैनेई दंगेफसादे मां कत्ल कियोरो थियो। ८ तैखन मैन्हु केरि भीड़ पिलातुसे कां गेइतां मिन्नत केरने लग्गी कि, “ज़ैन तू इश्शो लेइ हर

साल केरतो ओरोस तैन्ने केर।” 9 पन पिलातुसे तैनन् पुच्छू, “तुस कुन चातथ कि अवं तुश्शो लेइ यहूदी केरे राजे यानी तुश्शो राजे छेह्ही देई?” 10 पिलातुसे लोकन एन्नरा पुच्छू, किजोकि तै ज्ञानतो थियो कि प्रधान याजक यीशु पुड़ ज़लतन तांए तैनेई तै ट्लुवोरोए। 11 पन प्रधान याजकेई लोक बमकाए, ताके पिलातुस तैन केरे लेइ यीशुएरे बदले बरअब्बा छेह्ही दे। 12 एन शुन्तां पिलातुसे लोकन फिरी पुच्छू, “अगर अवं बरब्बे छेह्ही देई, त ज़ैस तुस यहूदी लोकां केरो राजो ज़ोतथ, तैसेरू अवं कुन केरि?” 13 तैना पिलातुसे सेइं फिरी शोर केरतां ज़ोने लगे कि, “एस कूसे पुड़ चाढ़!” 14 पिलातुसे तैनन् पुच्छू, “किजो ए कूसे पुड़ चाढ़नो, एनी कुन बुराई कियोरीए?” पन तैना लोक पेइले केरां जादे शोर केरने लगे कि, “एस कूसे पुड़ चाढ़!” 15 तैखन पिलातुसे लोक खुश केरनेरे इरादे सेइं, बरअब्बा तैन केरे लेइ छह्ही दित्तो, ते यीशु कोडे लुवेइतां सिपेही केरे हवाले कियो कि तैना यीशु कूसे पुड़ चाढ़न। 16 तैखन सिपाही यीशुए पिलातुसेरे महलेरे अंगने मां नेइ जे, ज़ैस जो प्रीटोरियम ज़ोतन। ते तैनेई सारी रोमी पलटन कुजेइतां आनी। 17 तैखन तैनेई यीशुएरो मज़ाक बनानेरे लेइ तैसेरां लिगड़ां खोल्लां, ते तैस लाल रंगरो चोलो लुवाव ते कने कंटां केरु ताज बनेइतां तैसेरे दोग्गे पुड़ रख्खू। 18 ते एन ज़ोने लगे कि, “हे यहूदी केरा राजा, नमस्कार!” 19 तैना यीशुएरे दोग्गे पुड़ अककेरे पत्ती अक केरतां सोटी सेइं बाने लगे, ते तैसेरी बेज़ती केरनेरे लेइ तैस पुड़ थुकने लगे, ते मज़ाक बनानेरे लेइ तैसेरे अगर ज़ैन्धु केरे भारे बिश्तां तैस नमस्कार केरते राए। 20 तैसेरो मज़ाक बनानेरे पत्ती, तैनेई तैस पुड़ेरां लाल रंगरो चोगो खोलतां तैसेरां लिगड़ां लुवां। तैखन तैना यीशु कूसे पुड़ चाढ़नेरे लेइ यरुशलेमेरे नगरे केरां बेझर नीयो। 21 ज़ताली तैना तैदुं चेलि राओरे थिये, त तैखन शमौन नंव्वेरो मैन्हु इलोंव्वेरां तैलमेइं एज्जी राओरो थियो। तै मैन्हु कुरेनी नंव्वेरे नगरेरां ओरो थियो ते तै सिकन्दर ते कने रुफुसेरो बाजी थियो। तैखन सिपाहेई शमौन मजबूर कियो कि तै यीशुएरे लेइ तैसेरी कूसे छुइतां चले। 22 ते तैनेई यीशु गुलगुता नंव्वेरी ठैरी पुड़ आनो, ज़ेसेरो मतलब “खोपड़ारी ठार” आए। 23 फिरी किछ लोकेई मुर्द नंव्वेरी दवाई, दाछ़रे रस्से मां मिलेइतां यीशु पीने जो दित्ती, पन तैनी तैसेरो इन्कार केरतां न पी। 24 तैखन तैनेई यीशु कूसे पुड़ चाढ़ो ते तैसेरां लिगड़ां केरे लेइ पेरची

छँड्ही कि तैसेरां लिगड़ां केस मैलतन। तैल्ला पत्ती, तैनेई तैसेरां लिगड़ां बेन्टी छँड्हां। 25 ज़ैखन तैनेई तै क्रूसे पुड़ चाढ़ो, तैखन झोज़झोरे नौ बज़्ज़ोरे थिये। 26 ते एककी फेट्टी पुड़ तैसेरी सजारी वजा लिखतां तैसेरे क्रोड़ी केरां बां लेइ छँड्ही। तैस मां लिखोरु थियूं कि, “ए यहूदी लोकां केरो राजो आए।” 27 सिपाहेई यीशु सेइं साथी होरे दूर्ध डैकू भी, अक तैसेरे देइने पासे ते अक तैसेरे बाएं पासे अलग-अलग क्रूसन पुड़ चाढ़े। 28 तैखन परमेश्वरी किताबी मां लिखोरी गल पूरी भोइ। तैस मां मसीहेरे बारे मां एरु लिखोरु थियूं कि, “ते पापी मैन्हु केरे साथी गनो गालो।” 29 तैखन बत्तां चलनेबालन मरां किछ मैन्हु अपनि क्रोड़ी हिलेइ-हिलेइतां ते कने एन ज़ोइतां तैसेरी तुहीन केरते थिये कि, “वाह! वाह! मन्दर बिछोड़नेबालो, त कने ट्लेइ दिहाड़न मां बनानेबालो।” 30 अगर तू शक्तिशाली आस त क्रूसे पुड़ेरां ओस्तां अपने आपे बच्चा!” 31 एन्हरां प्रधान याजक भी शास्त्री लोकन सेइं साथी तैसेरो मज़ाक बनेइ राओरे थिये, त तैना एपू मांमेइं ज़ोते थिये कि, “एनी होरे मैन्हु त बच्चाए, पन अपने आपे बचेइ न सको। 32 ए ज़ोरो थियो कि ‘अवं इस्माएल लोकां केरो राजो आई, यानी मसीह आई,’ अगर ए गल सच आए त हुन्ना क्रूसे पुड़ेरां ओस्से, ताके अस हेरतां विश्वास केरम कि ए इश्शो राजो आए।” त दूर्ध डैकू, ज़ैना तैस सेइं साथी क्रूसे पुड़ चाढ़ोरे थिये, तैनेई भी तैसेरी बेज़ती की। 33 दीसारे बारे बज़ेई सारे मुल्खे मां आंधरु भोवं, ते ट्लेइ बज़न तगर रावं। 34 ट्लेइ बज़ेई यीशुए बड़ी ज़ोरे सेइं अपनि बोली मां ज़ोवं कि, “इलोई, इलोई, लमा शबक्तनी!” ज़ेसेरु मतलब, “हे मेरे परमेश्वर, हे मेरे परमेश्वर, तीं किजो अवं छेड़ी दित्तो!” 35 तैखन ज़ैना तैड़ी नेड़े खड़े थिये, तैन मरां किछ मैनेई एन शुन्तां गलत सेमझतां एपू मांमेइं ज़ोवं, “हेरा, ए मैन्हु एलिय्याहे जो मद्दत केरनेरे लेइ कुर्जेई राओरोए।” 36 तैखन तैन मरां एककी मैने दौड़तां स्पन्जे (ज़ै पेनेरी ज़ेरि चीज़ चूसी सकचे) खट्टे दाढ़ारे रस्से मां दुबेइतां डांगी पुड़ रेखतां यीशु जो चुसावं त ज़ोवं, “बलगा, हेरम, एलिय्याह एस क्रूसे पुड़ेरां उसालने एजते कि नई।” 37 तैखन यीशुए बड़े ज़ोरे सेइं आवाज देइतां प्राण दित्ते। 38 ते तैखन मोट्टो पर्दों, जै मन्दरे मां लोरो थियो, बां देंता बुन तगर फेटतां दूर्ध टुकड़े भोइ जे। 39 ज़ैखन फौजी-अफसर, जै यीशुएरे सामने खड़ो थियो, यीश एन्हरां ज़ोरे सेइं आवाज देइतां प्राण देंतो लाव, तैखन तैनी ज़ोवं,

“सच्चे, ए मैन्हु परमेशरेरु मटू थियूं!” 40 किछु कुआन्शां भी दूररां एन हेरी राओरी थी। तैन मां मगदलीन नगरेरी मरियम, निकड़ो याकूब ते योसेसेरी अम्मा मरियम, त कने सलोमी भी थी। 41 ज़ैखन यीशु गलील इलाके मां थियो, त तैखन एना कुआन्शां तैस पत्ती-पत्ती चेलती थी त तैसेरी सेवा केरती थी। त तैड़ी होरि भी बड़ी कुआन्शां थी, ज़ैना तैस सेइं साथी गलील इलाके मरां यरुशलेम नगरे मां ओरी थी। 42 ज़ैखन इलोझ्झ भोइ, ते एल्हेरेलेइ कि तै तिहारेरी दिहाड़ी थी, यानी आरामेरे दिहाड़ेरे पेइली दिहाड़ी ज़ैखन लोक आरामेरी दिहाड़ेरे लेइ तियार भोते थिये, त तैखन 43 अरिमतियाह नगररो रानेबालो यूसुफ नंवरो मैन्हु तैड़ी अव, ज़ै यहूदी लोकां केरे बड़े आदालतेरे खास मैनन् मरां अक थियो। तै एप्पू भी परमेशरेरे राज्जे बलगने लोरो थियो। तै मैन्हु हिम्मत केरतां गवर्नर पिलातुसे कां जेव ते यीशुएरी लाश मग्गी, ताके तै तैस दबनेरे लेइ ने। 44 तैखन पिलातुस हैरान भोव कि केन्चरां तै एत्री लूशी मेरि जेव। त तैनी फौजी-अफसर कुजेइतां पुऱ्हू, “कुन तै मेरि जोरोए?” 45 ज़ैखन तैनी फौजी-अफसरे केरां हाल ज़ानो कि यीशु सच्चे मेरि जेव, त तैनी यूसुफे लाश नेनेरी अज़ाज़त दित्ती। 46 तैखन यूसुफे अक कीमती लिगड़ घिन्हू ते यीशुएरी लाश कूसे पुड़ेरां ओसैलतां यहूदी लोकां केरि रसमेरे मुताबिक तैस लिगड़े मां पलेटां एक्की कब्री मां छेड़ी, ज़ै पहैड़ी पुड़ एक्की घोड़े मां घड़ोरी थी। त तैस कब्रेरे बेइर दारे पुड़ अक बड़े घोड़ घिसेइतां छङ्हो। 47 मगदलीन इलव्वेरी मरियम, ते योसेसेरी अम्मा मरियम, एना दुझ्ये हेरी राओरी थी कि यीशुएरी लाश कोड़ि रखतन।

16 होरसां इलोझ्झी, ज़ैखन आरामेरी दिहाड़ी खतम भोरी थी, त तैखन मगदलीन इलंव्वेरी मरियम, त कने याकूबेरी अम्मा मरियम, त कने सलोमी, एन सेब्बेई रोड़ी मुशकी बालो तेल आनो, ताके यहूदी लोकां केरि रसमेरे मुताबिक यीशुएरी लाशी पुड़ तेल लान। 2 हफ्तेरे पेइले दिहाड़े झेझङ्गां-झेझङ्गां, ज़ैखन मसा दिहाड़ो निस्सी राओरो थियो, त तैना कब्री कां जेर्इ ज़ैस मां यीशुएरी लाश रखोरि थी। 3 तैखन तैना एप्पू मांमेइं ज़ोती थी, “इश्शे लेइ कब्रेरे दारे पुड़ेरां घोड़ कौन गिसालो?” 4 किजोकि तै घोड़ बड़ो बड़ो थियो। पन तैड़ी पुज़नेरे बाट, तैनेई कब्रेरे पासे उब्री तक्कू त हेरु कि घोड़ पेइलो कब्रेरे दारे पुड़ेरां गिस्सोरो थियो। 5 तैनेई कब्रेरे अन्तर गेइतां अक जवान लाव

ते तैना बेड़ि हैरान भोइ जेर्द। तैस छित्तां लिगडां लेगोरां थियां, ते तैडी तैन केरे सिध्धे पासे बिश्शोरो थियो। 6 तैनी जवाने तैन सेइं ज़ोवं, “डरा न, अवं ज्ञानताई कि तुस नासरत नगरेरे यीशु तोप्पी राओरिथ, जै क्रूसे पुड़ चाढ़रो थियो। तै मुडदन मरां ज़ींतो भोरोए। तै इडी नई। हेरा, ई तैए ठार आए, ज़ेडी तैसेरी लाश रख्खोरी थी। 7 पन तुस गेइतां तैसेरे चेलन सेइं त कने पतरसे सेइं भी ज़ोइथ कि यीशु तुसन करां पेइलो गलील इलाके जो गालो। ज़ेन्नरां तैनी पेइलू तुसन सेइं ज़ोरु थियूं, तेन्नरां तुस तैस तैडी लाले।” 8 तैना कुआन्शां कब्री मरां बेइर निस्तां तैटां नेश्शी जेर्द, किजोकि तैनन् थर्क लगोरी त घेबरोरी थी। बत्तां तैनेर्द केन्ची सेइं किछ न ज़ोवं, किजोकि तैना डेर्ग थी। 9

(note: The most reliable and earliest manuscripts do not include Mark

16:9-20.) हफ्तेरे पेइले दिहाडे झेझ्झा भोते, यीशु मुडदन मरां ज़ींतो भोइतां पेइले मगदलीन नगरेरी मरियमी लेइहोव, जैस मरां तैनी पेइलां सत भूतां केरो सायो कहुओरो थियो। 10 मरियमां यीशु लानेरे पत्ती, गेइतां तैसेरे चेलन खबर दित्ती, जैना यीशुएरे लेइ शोग केरने लगोरे ते कने लेरां देने लगोरे थिये। 11 पन जैखन तैनेर्द तैसारी गल शुनी कि यीशु फिरी ज़ींतो भोरोए ते तैसां लेवरोए, त तैनेर्द तैसारी गल्ली पुड़ याकीन न कियूं। 12 तैल्ला पत्ती, यीशु अपने चेलन मरां दूर्घ चेलन होरि रूपे मां लेइहोव, जैखन तैना (यरूशलेम) नगरेरां अपने ड्लोंच्वे जो च़लोरे थिये। 13 तैखन तैनेर्द भी नगरे वापस एजतां यीशुएरे होरे चेलन खबर दित्ती, पन तैनेर्द तैन केरि गल्लारो भी विश्वास न कियो। 14 तैल्ला पत्ती, यीशु अपने 11 चेलन भी लेइहोव, जैखन तैना रोट्टी खेइ राओरे थिये। त तैन केरे अविश्वास त कने सखत दिलेरे वजाई सेइं यीशुए तैना डांटे, किजोकि तैनेर्द तैन केरो विश्वास न कियो, जैनेर्द यीशु ज़ींतो भोनेरे पत्ती तै लेवरो थियो। 15 यीशुए अपने चेलन ज़ोवं, “तुस सैरी दुनियाई मां गेइतां सारे लोकन मेरे बारे मां खुशखबरी शुनाथ। 16 जै कोई मीं पुड़ विश्वास केरे ते बपतिस्मो ने, तैस पापां केरि सजाई करां मुक्ति मैलेली। पन जै कोई विश्वास न केरे, तैस अपने पापां केरि सजां मैलेली। 17 जैना मीं पुड़ विश्वास केरतन, तैना एरां चमत्कारेरां कम्मां (निशाना) केरले कि तैना मेरे नंचे सेइं लोकन मरां भूतां केरो सायो कढेले, ते नंब्वी-नंब्वी बोली केरले। 18 ते अगर तैना जेहरीले सप्पन ट्लाले त कने जेहरीली चीज भी पीले, तांभी तैनन् किछ

नुकसान न भोलो। ते ज़ैखन तैना बिमारन पुड़ हथ रख्खेले, ते तैना बेज़़ोइ
गाले।” 19 यीशु अपने चेलन सेइं गल्लां केरनेरां पत्ती, परमेशरे तै स्वर्गे जो
नीयो। ते यीशु परमेशरेरे देहने पासे राजगेही पुड़ बिश्शी जेव। 20 ते यीशुरे
चेलई बेइर हर जगाई गेइतां लोकन खुशखबरी शुनाने लग्गे। ते प्रभु तैन सेइं
साथी कम केरतो राव। तैना चमत्कारेरां कम्मां (निशानन) केरे ज़िरिये, जैना
साथी-साथी भोतां थियां, प्रभु साबत केरतो राव कि तैन केरि गल्लां सच्च
आन। आमीन।

लूका

1 जनाब थियुफिलुस, बड़े लोकेई तैना गल्लां हेरी जैना प्रभु-यीशुए कियोरी थी, ज़ैखन तै असन सेइं साथी थियो, ज़ेइसेरां तैनी अपनू सेवारू कम शुरू कियोरू थियूं। तैन मैनेई होरि मैनन् यीशुएरे बारे मां शिक्षा देइतां परमेशरेरी सेवा की। बड़े मैनेई तैन केरि गल्लां शुन्तां यीशुएरे बारे मां इश्शे लेइ इतिहासेरी किताब लिखी। 3 मीं एप्पू तैन सैरी गल्लां केरि बड़े रोड़ेचारे छानबीन की। एल्हेरेलेइ, मीं एन रोदू लग्गू, कि अवं भी तुश्शे लेइ तैन गल्लां केरे बारे मां ठीक डंगे सेइं इतिहासेरी किताब लिखी। 4 अवं चाताई कि तीं पतो लग्गे कि यीशुएरे बारे मां तैन गल्लां सज्जी आन, जैन केरे बारे मां तुसन शिक्षा मैल्लोरी थी। 5 यहूदिया इलाके मां, ज़ैखन हेरोदेस राज़ो राज़ केरतो थियो, त तैखन जकर्याह नंव्वेरो अक यहूदी याजक थियो। तै मैन्हु याजकां केरे टोली मां अविय्याह नंव्वेरो टोली मरां थियो। तैसेरी कुआन्शारू नंव एलीशिबा थियूं। एलीशिबा हारूनेरे खानदेनी मरां थी, (हारून इसाएल लोकां केरो पेइलो याजक थियो)। 6 तैना दुइये प्रभु-परमेशरेरी नज़री मां धर्मी थियां ते कने परमेशरेरे सारे कानून ते सारे हुक्मन पुड़ बेइलज़ाम च्चलनेबालां थियां। 7 पन तैन केरि कोई औलाद न थी, किजोकि एलीशिबा बाँझा थी, ते तैना दुइये बुढ़ां थियां। 8 एककी फेरे, जकर्याही टोली यरूशलेम नगरेरे मन्दरे मां सेवारू कम केरि राओरे थी, तैखन तै प्रभु परमेशरेरी हज़ूरी मां अपनू याजकेरू कम लोगोरा थियो केरने। 9 याजकां केरे रीतरे मुताबिक तैनेई परची छेड़तां जकर्याह चुनो कि तै प्रभु-परमेशरेरे मन्दरे मां गेइतां गुग्गल बाले। 10 जैखन तै गुग्गल बालने लोरो थियो, त तैखन मैन्हु केरि सारी भीड़ मन्दरेरे बेझर प्रार्थना केरि राओरी थी। 11 तैखन अचानक प्रभु-परमेशरेरो अक स्वर्गदूत गुग्गल बालनेरी ठारारे देइने पासे खड़े भोइतां जकर्याह लेइहोव। 12 जैखन जकर्याहि स्वर्गदूत लाव, त तै धेमरोव ते बड़ो डेरि जेव। 13 पन स्वर्गदूते तैस सेइं ज़ोवं, ‘हे जकर्याह, न डर! जैखन तीं प्रार्थना की, त परमेशरे तेरी प्रार्थना शुनी। एल्हेरेलेइ, तेरी कुआन्श एलीशिबाई मटू भोनूए, ते तू तैसेरू नंव यूहन्ना रेख्खां। 14 तैसेरे ज़र्म भोने सेइं तू बड़ो खुश भोलो। त बड़े लोक भी खुश भोले। 15 तै प्रभु-परमेशरेरी नज़री मां महान भोलो, ते तैनी कोन्ची भी किसमेरी नश्शे बाले चीज़ त कने शराब कथे न लोड़े पियोरी, ते तै अपनि

अम्मारे पेटे मां भोते वक्तरां परमेशरेरी पवित्र आत्मारी शक्ति सेइं भरपूर भोलो। 16 तै इसाएली लोकन मरां बडे लोक परमेशरेरे पासे ज़ै तैन केरो प्रभु परमेशरे वापस तैस कां आनेलो, ज़ैना अपने पापां केरि वजाई सेइं परमेशरे करां दूर भोरे थिये। 17 ते तै एरो मैन्हु भोलो ज़ैस पुड़ एलिय्याहरी आत्मा ते कने शक्ति भोली। तै परमेशरेरी बत तियार केरेलो, तैस अग्री-अग्री चलेलो ताके हाज बव्वां केरो दिल औलादरे पासे ते परमेशर न मन्नेबाले लोकन धेर्मी लोकां केरे बत्तां केरे पासे बदलेलो, ताके ज़ैखन प्रभु एज्जे त लोक तियार भोन।” 18 जकयहि स्वर्गदूते पुच्छू, “अवं केन्नरे मेन्नी एन असन सेइं भोनाए, अवं त बुढोइं ते मेरी कुआन्श भी बुढी भोरीए।” 19 स्वर्गदूते जुवाब दित्तो, “अवं जिब्राइल आई अवं परमेशरे कां खड़ो भोताई, अवं एल्हेरेलेइ भेज़ोरोई, कि अवं तीं सेइं गल केरि ते तीं ए खुशखबरी शुनेई। 20 ते हेर जां तगर एना गल्लां पूरी न भोन तेरी ज़बान बंद भोली, ते तू गल न केरि सकेलो किजोकि तीं मेरी गल्लां केरु याकीन नई कियेरु ज़ैना अपने वक्ते पुड़ पूरी भोनिन।” 21 ते ज़ैखन जकर्याहि ते स्वर्गदूत मन्दरे मां गल्लां लोरे थिये केरने त लोक मन्दरेरे बेझर अंगने मां जकयहि बलगने लोरे थिये, तैना बडे हैरान भोइजेइ कि जकयहि मन्दरे मां एत्रू चिर किजो लाव। 22 ज़ैखन तै बेझर निस्सो, त तै कुजी न बटो ते तैन लोकेई बुझी छङ्गू, कि एनी मन्दरे मां किछ दर्शन लाहेरुए किजोकि तै इशारो केरतो थियो, पन कुजी न थियो बटो। 23 ज़ेइस युश्शलेम नगरेरे मन्दरे मां जकर्याहरु एककी हफतेरे याजकेरी सेवारु कम पूरु भोवं, त तै अपने घरे जो चलो जेव। 24 किछ वक्तरां बाद तैसेरी कुआन्श एलीशिबा दोज़ींतीए भोइ, ते तै पंच महीन्न तगर बेझर लोकन मां न जेर्ई। तैसां ज़ोवं, 25 “प्रभुए मीं पुड़ दया केरतां केन्व्र महान कम कियूं ते अवं दोज़ींती भोइ, ते ज़ैस गल्लरे वाजाई सेइं लोक मीं घटिया समझते थिये, तै गल दूर की।” 26 एलीशिबारे दोज़ींती भोनेरे शेइयोवं महीने जिब्राइल स्वर्गदूत परमेशरेरी तरफां गलील इलाकेरे नासरत नगरे मां, 27 एककी अड्लैई कुझ्ये कां भेज़ो। तैसारी कुडमाइ दाऊदेरे खानदाने मरां एककी मड़दे सेइं भोरी थी ज़ेसेरु नवं यूसुफ थियूं, ते तैस कुड्यरु नवं मरियम थियूं। 28 स्वर्गदूते तैस कां एइतां ज़ोवं, “आनन्द ते ज़ींत तेरी भोए, तीं पुड़ परमेशरेरी बड़ी दया भोरीए, प्रभु तीं सेइं साथिये!” 29 मरियम स्वर्गदूतेरी गल शुन्तां परेशान

भोइतां सोचने लगी एन केरहु नमस्कारे? 30 स्वर्गदूते तैस सेइं ज़ोव “हे
 मरियम, डर न, किजोकि परमेश्वरो तीं पुड़ बड़ो अनुग्रह भोरोए। 31 तू
 दोज़ीती भोली तीं अक मटू भोलू, ते तू तैसेरु नवं यीशु रेखां। 32 तैन महान
 भोलू ते तैस जो परमप्रधान परमेश्वरु मटू ज़ोले, ते परमेश्वर तैसेरे पूर्वज
 दाउद राजेक ज़ेरो राजो बनालो। 33 ते तै याकूबेरे खानदाने पुड़ हमेशा राज
 केरेलो, ते तैसेरु राज कथे खतम न भोलू!” (aiōn g165) 34 मरियमा स्वर्गदूते
 पुच्छू, “एन केन्नरे भोइ सकते? अवं त अडलाई आई।” 35 स्वर्गदूते जुवाब
 दित्तो, “पवित्र आत्मा तीं पुड़ उतरेलो, ते परमप्रधान परमेश्वरी शक्ति तीं पुड़
 सैयो केरेली एल्हेरेलेइ तै बच्चो जै ज़र्मएलो तै पवित्र भोलो तैस जो परमेश्वरे
 मटू ज़ोले। 36 ते हेर तेरी रिशतेदार एलीशिबाई भी बुढ़े बारे मटू भोने बालूए
 तैस जो लोक बाँझ ज़ोते थिये, तैस दोज़ीती शा महीने भोरेन। 37 किजोकि
 परमेश्वरे लेइ किछ भी नमुकिन नई।” 38 मरियमा स्वर्गदूते जुवाब दित्तो,
 “अवं परमेश्वरी सेवा केरती जैन तीं ज़ोरूए तैन भोए।” तैखन स्वर्गदूत तैस
 करां चलो जेव। 39 किछ दिहाड़न पत्ती मरियम तियार भोइतां यहूदियारे
 इलाकेरे एककी पहाड़ी नगरे मां जेर्ई। 40 ते जकर्याहरे घरे मां गेइतां एलीशिबा
 जो नमस्कार कियूं। 41 जैखन एलीशिबा मरियमारु नमस्कार शुनू त बच्चो
 तैसारे पेटे मां उछङ्गने लगो ते एलीशिबा पवित्र आत्माई सेइं भेरोई जेर्ई।
 42 ते बड़े ज़ोरे सेइं ज़ोने लगी, “तू कुआन्शन मां धन आस ते जै बच्चो तीं
 ज़ानोए तै भी धने! 43 ते मेरे लेइ बड़ी इज़्जतरी गल आए कि, मेरे प्रभुएरी
 अम्मा मीं कां आई! 44 किजोकि हेर ज़ेरि तेरे नमस्कारेरी आवाज़ मीं शुनी
 त बच्चे खुशी सेइं मेरे पेटे मां छालां लगो मारने। 45 तू धन आस तीं तैन
 गल्लन पुड़ विश्वास कियो जैना प्रभुए तीं सेइं ज़ोई कि, तैना पूरी भोली।”
 46 ते मरियमा ज़ोव, “अवं प्रभुएरी तारीफ केरती। 47 ते मेरी आत्मा मेरे
 मुक्ति देनेबाले परमेश्वरे सेइं खुशी भोइ। 48 किजोकि तैनी अपनि सेवा केरने
 बैलरी गिरोरी हालती पुड़ नज़र की, अज़ेरां देइतां हर ज़मानेरे लोक मींजो धन
 ज़ोले। 49 किजोकि परमेश्वरे मेरे लेइ बड़ां-बड़ां कम्मां कियोरन ते तैसेरु नवं
 पवित्र भोए। 50 तैसेरी दया तैस करां डरने बालन पुड़ पीड़ी-पीड़ी तगर राचे।
 51 तैनी अपने शक्ति सेइं बड़ां-बड़ां कम्मां कियोरन तैनी घमण्डी तितर-
 बितर किये। 52 तैनी राजे राज केरने करां रोके, ते तैनी नम्र लोकन आदर

दित्ती। ५३ तैनी नियन्ते रोड़ी-रोड़ी चीज़ेइं सेइं रज्जांने ते धन दौलती बाले
 खाली हथेइं भेज़े। ५४ तैनी अपने वादे ज़ैना तैनी इश्शे दादन-पड़दादन सेइं
 कियोरे थिये याद किये, तैनी अपनि सेवा केरनेबाले इस्साएली लोकां केरि
 मद्दत की, ५५ तैनी हमेशारे लेइ अब्राहमे पुङ् ते तैसेरी औलादी पुङ् दया केरनि
 याद रख्खी।” (aiōn g165) ५६ मरियम कोई ट्लाई महीन्न तगर एलीशिबा
 सेइं साथी राई ते फिरी अपने घरजो आई। ५७ एलीशिबारो गल्हे विश्नेरो
 वक्त एज्जी अव ते तैस मटू भोवं। ५८ तैसारे आसेपासेरे रिश्तेदारेइं एन शुनू
 कि परमेश्वरे तैस पुङ् बड़ी दया कियोरिये ते तैस सेइं साथी खुशी मनाई। ५९
 अठोवं दिहाड़े तैना मटुरो खतनो केरने आए, ते तैना तैसेरु नवं तैसेरे बाजी
 केरे नव्वे पुङ् जकर्याह रखनू चाते थिये। ६० पन तैसेरी अम्मा ज़ोने लगी,
 “नई एसेरु नवं यूहन्ना भोलू।” ६१ किछ तैस जो ज़ोने लगे, “तुश्शी खानदेनी
 मां कोई भी एस नव्वेरो नई।” ६२ तैखन तैन लोकेई जकर्याहरे पासे इशारे
 सेइं पुच्छू कि तू मटुरु नवं कुन रखनू चातस? ६३ ते तैनी पटारी मगी ते तैस
 पुङ् लिखू, “एसेरु नवं यूहन्ना आए,” ते सब लोक हैरान रेइजे। ६४ तैखने
 तैसेरी ज़िभ खुल्ली ते जकर्याह गल्लां लगो केरने ते परमेश्वरेरी तारीफ केरने
 लगो। ६५ ते आसे-पासेरे लोक एस तमाशे हेरतां हैरान रेइजे, ते यहूदियारे
 इलाकेरे एककी पहाड़ी नगर मां एस गल्लरी चरचा भोने लगी। ६६ ते शुन्ने
 बाले अपने-अपने मन्न मां सोचते थिये, “एन मटू बटू भोइतां केरहु भोनूए?”
 किजोकि परमेश्वरी शक्ति अज़्जेरी देंतीं एस सेइं साथीए? ६७ तैखन तैसेरो
 बाजी जकर्याह पवित्र आत्माई सेइं भेरोवं ते भविष्यिवाणी केरने लगो। ६८
 “प्रभु इस्साएलेरो परमेश्वर धन भोए, किजोकि तैनी एइतां अपने लोकन मुक्ति
 दित्तोरिये। ६९ ते तैसेरे दास दाऊदेरे घराने मरां इश्शे लेइ अक मुक्ति देनेबालो
 भेज़ोरोए। ७० (बड़े पेइले ज़ेन्चरे पवित्र नेबी केरे ज़िरिये ज़ोरु थियूं ज़ैन शुरू
 करां देंते ओरुए।) (aiōn g165) ७१ असां अपने दुश्मन करां ते बैर रखने बालन
 करां मुक्ति हासिल केरम। ७२ ते तै इश्शे दादे पड़दादन पुङ् दया केरे ते अपनो
 पवित्र करार याद केर। ७३ तै करार जै तीं इश्शे पूर्वज अब्राहमे सेइं कियोरो
 थियो। ७४ कि तै असन हिम्मत देलो, कि असां अपने दुश्मन करां बगैर
 केन्ची भी डरे सेइं बेंची सखम। ७५ ते अपनि ज़िन्दगी तैस सोंफम ते सारी
 ज़िन्दगी पवित्रेइ ते धार्मिकता जींम। ७६ ते हे बच्चां तू नबी भोलो किजोकि तू

परमेशरेरे अग्री-अग्री चेलतां लोकन तियार केरेलो कि परमेशर एजनोए। 77

तै अपने लोकन तैन केरे पाप माफ़ केरनेरे ज़िरिये मुक्तरे बारे मां ज्ञान देलो।

78 ते इश्शे परमेशरेरी दया एरी भोली ज़ेन्नरे दिहाड़ो लौ देते तेन्वरे मसीह स्वर्गेरां एज्जेलो। 79 ताके तैन केरे लेइ ज़ैना पापे मां ज़ीतन ते हमेशारे मौतरे खतरे मां रातन लौ दे, ते तै असन बत हिराए ताके अस सुखे सेइं ज़िन्दगी ज़ींग।” 80 तैन मटू यानी यूहन्ना बेडोतो जेव ते आत्माई मां बद्धतो जेव ते इसाएलेरे लोकन प्रचार केरने तगर सुनसान ठैरन मां राव।

2 तैन दिहैड़न मां रोम मुलखेरे महाराजे औगुस्तुसे इलान कियूं कि, दुनियारे सारे मैन्हु केरि गिनती की गाए। 2 ए पेइली मैन्हु केरि गिनती थी, ज़ै सीरिया इलाकेरे गवर्नर किवरिनियुसेरे वक्ते मां भोइ। 3 ते सारे लोक, मैन्हु केरि गिनतरे लेइ नवं लिखाने अपने-अपने पूर्वजां केरे नगर जो चले जे। 4 यूसुफ भी गलील इलाकेरे नगर नासरते मरां यहूदिया इलाके मां दाऊदेरे नगर बैतलहम मांजो चलो, किजोकि तै दाऊद राज़ेरे खानदाने मरां थियो। 5 ताके तैड़ी मरियमी सेइं साथी ज़ैस सेइं तैसेरी कुड़माइ भोरी थी ते तै दोज़ींती थी नवं लिखाए। 6 तैन केरे तैड़ी रेइतां तैसारे गल्हे बिशनेरो वक्त अव। 7 ते तैस पेइलू मटू भोवं ते तैसां तैन फैल्हड़ी मां पलेटां खुरली मां रख्खू किजोकि तैन धर्मशाली मां कोन्च ठार न थी मैल्लोरी। 8 किछ पुहाल राती एक्की ड्लबड़े मां गब्बां केरो पैरहो केरते थिये। 9 ते परमेशरेरो स्वर्गदूत तैन कां बांदो भोव ते परमेशरेरी महिमारी लौ तैन केरे चेवे पासन बलने लगी ते तैना बड़े डेरि जे। 10 तैखन स्वर्गदूते तैन जो ज़ोवं, “डरा नन्ना, किजोकि अवं तुसन अक बड़ी खुशखबरी शुनाने ओरोई, ज़ै खुशी सैरी लोकां केरे लेइ भोली। 11 अज़ बैतलहमे मां ज़ैन दाऊद राज़ेरु नगर थियूं, तुश्शे लेइ अक मुक्ति देनेबालो ज़रमोरोए यानी यीशु मसीह प्रभु। 12 तैसेरो तुश्शे लेइ ए निशान भोलो कि तुसन अक मटू फैल्हड़ी मां पलैट्टू गाल्हरे बेइर खुरली मां मैलेलू।” 13 ते अकदम तैस स्वर्गदूते सेइं होरे भी स्वर्गदूत बांदे भोए ते तैना परमेशरेरी तारीफ केरने लगे ते एन ज़ोने लगे, 14 “स्वर्गे मां परमेशरेरी महिमा भोए, ते ज़मीनी पुड़ तैन मैनन् शान्ति मैल्ले, ज़ैन पुड़ परमेशर खुशो।” 15 ज़ैखन स्वर्गदूत पुहालां केरे सामने वापस स्वर्गे मांजो चले जे। पुहाल एप्पू मांमेइं ज़ोने लगे, “एज्जा अस बैतलहम नगरे मां गाम ज़ै बिस्तार प्रभुए असन

दित्तोरोए तैस हेरम।” 16 एल्हेरेलेइ तैना लूशी तैटुं च्चले जे ते तैड़ी पुजे ते सच्चे तैड़ी मरियम, यूसुफ ते निकड़ो बच्चो फैल्हड़ी मां पलेट्वोरो गोरु केरि गाल्हरे बेदर खुरली मां मैल्लो। 17 ते पुहाल एन हेरतां जै गल तैन एस बच्चेरे बारे मां ज़ोरी थी सेष्भन सेइं ज़ोने लगे। 18 पुहालां केरि गल्लां शुन्तां सारे लोक हैरान रेझो। 19 पन मरियम सैरी गल्लां अपने दिले मां रेखतां सोचने लगी। 20 ते पुहालन ज़ेन्चरे तैनी स्वर्गदूते ज़ोरु थियूं तैनेई अपनि एछछेई तैन सब किछ लेइतां परमेश्वरेरी तारीफ़ केरते वापस घरजो च्चले जे। 21 अठोवं दिहाड़े ज़ेइस तैसेरो खतनो केरनेरो वक्त अव त तैसेरु नवं यीशु रख्खू। एन तैन नवं आए, जैन स्वर्गदूते मरियमारे दोज़ींतीए भोने करां पेइले रख्खेरु थियूं। 22 जैखन मूसेरे कानूनेरे मुताबिक तैसेरे शुच्चे भोनेरे दिहाड़े पूरे भोए, त यूसुफे ते मरियमा यीशु यरूशलेम नगरे मांजो नीयो ताके तैस प्रभुए कां अर्पण केरन। 23 ज़ेन्चरे प्रभुएरे कानूने मां लिखोरुए, “सारां पेइलां मटुं परमेश्वरे लेइ पवित्र भोलां।” 24 ज़ेन्चरे प्रभुएरे कानूने मां लिखोरुए कि, “अक जोड़ी गुधू केरि या कबूतरेरे दूर्ध बच्चे बलिदानेरे लेइ आन।” 25 तैस वक्ते यरूशलेम नगरे मां अक मैन्हु थियो, तैसेरु नवं शमौन थियूं तै बड़ो धर्म ते भक्त मैन्हु थियो, तै मसीह बलगने लोरो थियो, कि तै एज्जेलो ते इस्माएली लोकन शान्ति देलो, ते तैस पुड़ पवित्र आत्मा थियो। 26 पवित्र आत्मा तैस पुड़ बांदू कियूं, कि ज़ां तगर तू प्रभुएरे मसीह न लाएलो तांतगर न मरेलो। 27 तैस दिहाड़े शमौन पवित्र आत्मा च्चलाव, तै आत्मिक शेक्कि सेइं मन्दरे मां अव तैखन यीशु भी तैसेरे अम्मा बाजेई अन्तर आनोरो थियो, कि तैसेरेलेइ मूसेरे कानूनेरे मुताबिक कमाम। 28 त शमौने बच्चो कुम्मे मां ट्लातो ते परमेश्वरेरी तारीफ़ केरने लगो। 29 “हे प्रभु तीं जै अपनो वादो कियोरोए अपने दासे आनन्दे सेइं मरने दे। 30 किजोकि मीं अपने एछछेई सेइं मुक्कि देनेबालो लाव, जै तीं सैरी लोकां केरे लेइ भेजोरोए। 31 जै तीं सैरी कौमां केरे सामने तियार कियोरोए। 32 तै, परमेश्वर गैर कौमन पुड़ बांदो केरनेरे लेइ लौ आए, ते इस्माएली लोकां केरे लेइ अक बड़ी महिमा भोए।” 33 यीशुएरे अम्मा बाजी शमौनेरी एना गल्लां शुन्तां हक्के-बक्के भोए। 34 तैखन शमौने तैन बरकत दित्ती, ते तैसेरी अम्मा मरियम सेइं ज़ोवं, “हेरा, इन मटू एल्हेरेलेइ ठहरावरो, कि इस्माएले मां बड़े लोकां केरे लेइ नाश भोनेरी ते मुक्कि मैलनेरी

वजा भोए, तै परमेश्वरी तरफां अक निशान आए पन बड़े लोक तैसेरे खलाफ भोले। 35 ताके बड़े दिलां केरे खियाल खुल्ली गान ते तीं बड़ो दुःख भोनोए ज़ेन्चरे तलवार कट्टीए।” 36 तैड़ी अक कुआन्श थी ज़ै नबिन थी, तैसारू नवं हन्नाह थियूं, अशेरे खानदाने मरां अक मैन्हु ज़ेसेरू नवं फनूएल थियूं हन्नाह तैसेरी कुई थी तै बड़ी बुढ़ी थी तै अपने इलाहेरां बाद सत साल अपने मुन्शे सेइं साथी रहोरी थी। 37 तै विधवा थी तैसारी उमर चूरासी साल थी तै मन्दरे मरां न थी गाती ते रात दिहैड़ी प्रार्थना ते कने बरतां रखती ते परमेश्वरी आराधना केरती रहती थी। 38 तैखन तै भी तैड़ी एइतां परमेश्वरु शुक्र केरने लगी ते बच्चेरे बारे मां तैन सेभन सेइं गल्लां लाई केरने, ज़ैना बलगने लोरे थिये कि परमेश्वरे यरुशलेम नगरेरे लोकन छुटानेरे लेइ मसीह भेज्नोए। 39 ज़ैखन मरियम ते यूसुफे मूसेरे कानूनेरे मुताबिक यीशुएरो खतनो कियो, त तैना गलील इलाके मरां अपने नगर नासरते मांजो जे। 40 तैन मटू बडोतू जेवं ते अक्लमन्द भोतू जेवं किजोकि परमेश्वरो तैस पुड़ बड़ो अनुग्रह थियो। 41 यीशुएरे अम्मा बाजी हर साल फ़सह तिहारेरी दिहाड़ी बनाने यरुशलेम नगरे मां गाते थिये। 42 ज़ैखन यीशु 12 सालां केरो भोव त तैना रीतरे मुताबिक यरुशलेम नगरे मां जे। 43 ज़ैखन तिहार बीतू त यीशुएरे अम्मा बाजी वापस घरजो आए त यीशु यरुशलेम नगरे मां रेइ जेव ते तैसेरे अम्मा बाजी कोई पतो न थियो। 44 तैनेई बुझू कि यीशु होरि मैनन् सेइं साथी अग्रोवं जोरोए, तैना अपने रिश्तेदारन ते ज़ान पिशानी बालन मां तोपने लगे। 45 ज़ैखन तैन यीशु न मैल्लो त तैना वापस तोपते-तोपते यरुशलेम नगरे मां पुज़े। 46 द्लेइयोवं दिहाड़े तैन यीशु मन्दरेरे अंगने मां बुजुर्ग लोकन सेइं गलबात केरतो ते तैन सेइं सवाल जुवाब केरतो मैल्लो। 47 ज़ैना लोक तैसेरी गल्लां शुन्ने लोरे थिये तैना यीशुएरी गल्लां शुन्नां हैरान रेइजे। 48 ज़ैखन तैसेरे हाज बव्वेई यीशु लाव त तैना हैरान रेइजे ते ज़ोने लगे, “मट्ठां तीं असन सेइं एन कुन कमाव? तेरे हाज बवं तीं तोपते-तोपते परेशान भोइ जे।” 49 यीशु तैन सेइं ज़ोवं तुस मीं किजो तोपने लगोरो थिये? “तुसन पतो नई कि मीं अपने बाजेरे घरे मां रानू ज़रुरी थियूं?” 50 पन तैन तैना गल्लां केरि समझ न आई कि, एन केरो कुन मतलब आए। 51 तैखन तै अपने अम्मा बाजी सेइं साथी नासरत नगरे मां अव ते अपने अम्मा बाजी कां राव ते मरियमा एना सैरी

गल्लां अपने दिले मां रेख्वी। ५२ यीशु अक्ली मां भी ते कदे मां भी बेडोतो
जेव ते परमेशरेरी ते इन्सानेरी कृपाई मां बद्धतो जेव।

३ तिबिरियुस महाराजेरे हुकुमतरे परनोहूँ साले मां जेइस पुन्तियुस पिलातुस
यहूदिया इलाकेरो गवर्नर थियो, ते गलीलेरे इलाके मां हेरोदेस गवर्नर थियो,
तैसेरो ढ्ला फिलिप्पुस इतरैया ते त्रखोनीतिस इलाकां केरो गवर्नर थियो,
लिसानियास, अबिलेन इलाकेरो गवर्नर थियो। २ तैस वक्ते हन्ना ते कैफा
महायाजक थिये, तेइस परमेशरे जकर्याहरे मट्टे यूहन्ना सेइं गल्लां की। जैन
सुनसान ठैरी मां रातू थियूं। ३ ते यूहन्ना यरदन दरियारे आसेपासेरे इलाकन
मां गेइतां ई प्रचार केरने लगो, कि अपने पापन करां मनफिराथ, ते बपतिस्मो
नेथ ताके परमेशर तुश्शे पाप माफ़ केरे। ४ जेन्नरे यशायाह नेबेरी किताबी मां
लिखोरुए, “सुनसान ठैरी मां फुकारने बालेरी आवाज एइचे कि, ‘प्रभुएरी बत
बनाथ ते तैसेरी बत्तां पैठ्यी केरा।’” ५ “डुधी ठारां सैरी भेरोई गैनिन, हर अक
पहाड़ ते चौदू बछोड़नोए ते जैना ट्लेढी बत्तन तैना सिधी केरनिन जैना उन्धी
उबरिन तैना पैठ्यी केरनिन। ६ ते सब लोक तैस हेरेले, जै परमेशरे तैन मुक्ति
देने भेजोरोए।” ७ ते यूहन्ना तैन लोकन सेइं ज्ञोव, जैना जथन मां तैस करां
बपतिस्मो नेने ओरे थिये, “तुस जेहरीले सप्पेरे जेरे बुरे आथ! तुसन केनि
ज्ञोवं कि, एजनेबाले परमेशरेरे कोपे करां नश्शा? ८ बस्सा, सज्जाई करां
बचनेरे लेइ तैना कम्मां केरा, जैन सेइं पतो लगो तुसेई सञ्च्चे पापन करां
मन फिरावरोए। ते अपने-अपने मने मां एन न ज्ञोथ कि, अब्राहम जेन्नरे
इश्शो बाजीए, किजोकि अवं तुसन सेइं ज्ञोताई कि परमेशर इन घोड़न मरां
अब्राहमेरे लेइ औलाद पैदा केरि सकते। ९ ते हुन्ना त बुट्टां केरे जीलन पुड
परमेशरेरो मैक्कु रख्खोरोए, एल्हेरेलेइ जै कोई तैस बुट्टो जेरो भोते, जै रोडो
फल न दे, तै कटनोए ते अग्गी मां छडनोए।” १० लोकेर्ई तैस पुच्छू, “फिरी
असां परमेशरेरी सज्जाई करां केन्नरे बच्म?” ११ यूहन्ना तैन सेइं ज्ञोवं, “जैस
कां दूई कुरतेन त अक कुरतो तैस देथ जैस कां अक भी नई ते जैस कां रोट्टी
आए त तै भी रोट्टी बंटे जैन कां नई।” १२ ते धड़त नेनेबाले भी बपतिस्मो नेने
ओरे थिये तैनेर्ई तैस पुच्छू, “हे गुरु जी असां कुन केरम?” १३ तैनी तैन सेइं
ज्ञोवं, “जैन तुश्शे लेइ सरकारी कानूनेरे हिसाबे सेइं रख्खोरुए तैस करां जादे
धड़त न नेइयथ।” १४ ते तैखन होरि सिपाहीएइं भी तैस पुच्छू, “असां कुन

केरम?” यूहन्ना तैन सेइं ज्ञोवं, “केन्ची पुङ् ज्ञुलम केरतां बेहक न नेइयथ, ते न केन्ची पुङ् झूठो दोष लेइयथ, पन अपनि तनखुवाही पुङ् गुजारो केरथ।”

15 तैखन लोक इंतजारे मां थिये कि, मसीह जल्दी एजनोए, ते सब लोक अपने दिले मां यूहन्नारे बारे मां सोचते थिये कि ज़ै ओरोए तै मसीह आए या नई? 16 त यूहन्ना तैन जुवाबे मां तैन सेइं ज्ञोवं, “अवं त तुसन पैनी सेइं बपतिस्मो देताई पन ज़ै मीं करां महाने तै एजनेबालो आए। अवं तैसेरो गुलाम बेनतां तैसेरी जुट्टी केरे तसमे भी खोलनेरे काबल नई। तै तुसन पवित्र आत्माई ते अग्मी सेइं बपतिस्मो देलो। 17 तैसेरु छज्ज तैसेरे हथ्ये मां आए ते तै खलाड़ रोडेच्चारे साफ केरेलो, ते गेहुं अपने कोठारे मां रखेलो पन झाड़ी तैस अग्मी मां फुकेलो ज़ै कधी हिशनेरी न भोली।” 18 बस्सा तै बड़े रोडेच्चारे लोकन समझोइतां परमेश्वरी खुशखबरी शुनातो राव। 19 हेरोदेस चेवरोवं मुलखे पुङ् राज़ केरतो थियो। यूहन्ना तै झिड़कावरो थियो, कि हेरोदेस अपने ढला फिलिप्पुसेरी कुआन्श हेरोदियास ज़ै थी तैस सेइं ढला कियोरो थियो, ते होरां भी बड़ां बुरां कम्मां कियोरां थियां। 20 हेरोदेस एन सेष्भन करां जादे बुरु कम कियूं कि यूहन्ना कैद केरतां छड्हो। 21 जैखन सब लोक बपतिस्मो नेने लोरे थिये त यीशुए भी बपतिस्मो नीयो, ते जैखन तै प्रार्थना लोरो थियो केरने, त एरु भोवं कि स्वर्ग खुल्ली जेवं। 22 ते पवित्र आत्मा कबूतरेरी शकली मां यीशु पुङ् उत्रो ते अम्बरे मरां ई आवाज़ अई, “तू मेरु ट्लारु मटू आस, अवं तीं पुङ् बड़ो खुश आई।” 23 जैखन यीशुए अपने सेवारु कम शुरु कियूं त तैसेरी उमर 30 साल थी (ज़ेन्चरे समझू गातू थियूं) एन यूसुफेरु मटूए, ते तैन एलेरु 24 एली मत्तातेरु ते तैन लेवेरु ते तैन मलकेरो ते तैन यन्नेएरो ते तैन यूसुफेरु मटू थियूं, 25 ते तैन मत्तित्याहेरु ते तैन आमोसेरो ते तैन नहूमेरु ते तैन असल्याहेरु ते तैन नगर्इएरु मटू थियूं। 26 ते तैन मत्तातेरो ते तै मत्तित्याहेरु ते तैन शिमीएरु ते तैन योसेखेरु ते तैन योदाहेरु मटू थियूं। 27 ते तैन यूहन्नारु ते तैन रेसारु ते तै जरुब्बाबेलेरु ते तैन शालतियेलेरु ते तैन नेरेरु मटू थियूं। 28 ते तैन मलकीएरु ते तैन अद्वीयेरु ते तैन कोसामेरु ते तैन एलमदामेरु ते तैन एरेरु मटू थियूं। 29 ते तैन येशूएरु ते तैन एलीएजेरेसु ते तैन योरीमेरु ते तैन मत्तातेरु ते तैन लेवेरु मटू थियूं। 30 ते तैन शमौनेरु ते तैन यहूदेरु ते तैन यूसुफेरो ते तैन योननेरु ते तैन एलयाकीमेरु मटू थियूं। 31

ते तैन मलोआहेरु ते तैन मिन्नाहेरो ते तैन मत्ततेरो ते तैन नातानेरो ते तैन दाऊदेरु मटू थियूं। 32 ते तैन यिशैएरो ते तैन ओबेदेरो ते तैन बोआजेरो ते तैन सलमोनेरो ते तैन नहशोनेरु मटू थियूं। 33 ते तैन अम्मीनादाबेरु ते तैन अरनेरु ते तै हेस्सोनेरु ते तैन पेरेसेरु ते तैन यहूदेरु मटू थियूं। 34 ते तैन याकूबेरु ते तैन इस्हाकेरो ते तैन अब्राहमेरु ते तैन तेरहेरो ते तैन नाहोरेरु मटू थियूं। 35 ते तैन सरुगेरो ते तैन रऊएरो ते तैन पेलेगेरो ते तैन एबेरेरु ते तैन शिलहेरु मटू थियूं। 36 ते तैन केनानेरु ते तैन अरफक्षदेरो ते तैन शेमेरो ते तैन नूहेरो ते तैन लेमेकेरु मटू थियूं। 37 ते तैन मथूशिलहेरु ते तैन हनोकेरो ते तैन यिरिदेरु ते तैन महललेलेरु ते तैन केनानेरु मटू थियूं। 38 ते तैन एनोशेरु ते तैन शेतेरु ते तैन आदमेरो ते तैन परमेशरेरु मटू थियूं।

4 फिरी यीशु पवित्र आत्मा सेइं भरपूर भोइतां यरदन दरियाए मरां वापस अव त 40 दिहाडे पवित्र आत्मारे चलाने सेइं सुनसान ठैरी जो चलो जेव। 2 तैन 40 दिहाड़न मां शैतान तैस अज़मातो राव, तैन दिहैड़न मां तैनी किछ न खाव पीवं ते ज़ैखन तैना दिहाडे पूरे भोए त तैस ढलुख लग्गी। 3 शैताने तैस जो ज़ोवं, “अगर तू परमेशरेरु मटू आस त इन घोड़न जो ज़ो कि एना रोट्टी बन्न।” 4 यीशु तैस जुवाब दित्तो, “पवित्रशास्त्रे मां लिखोरुए, ‘मैन्हु सिर्फ रोट्टेइ सेइं ज़ींतो न राए।’” 5 फिरी शैताने यीशु एककी उच्चे पहाडे पुड़ घिन्तां जेव ते तैटां एककी पले मां तैस तैड़ी दुनियारां सारां राज़जां हिरां। 6 ते तैनी यीशु सेइं ज़ोवं, “एन सब किछ मेरे अधिकारे मां आए, ते एसेरी सारी धन दौलत अवं तीं देलो एन मेरे स्पुर्दे। अवं ज़ैस चाताईं तैस देइ सकताई। 7 बस अगर तू मीं कां मथ्थो टेकस त एन सब किछ तेरु भोलू।” 8 यीशुए तैस जुवाब दित्तो, “पवित्रशास्त्रे मां लिखोरुए, ‘तू सिर्फ अपने प्रभु परमेशरे कां मथ्थो टेकतां ते सिर्फ तैसेरी भक्ति केरां।’” 9 ते तैनी यीशु यरूशलेम नगरेरे मन्दरेरी उच्ची छ़म्पी पुड़ नेइतां खड़ो कियो ते तैस सेइं ज़ोवं, “अगर तू परमेशरेरु मटू आस त अपनो आप इटां उन्डो बछोड़। 10 किजोकि पवित्रशास्त्रे मां लिखोरुए, ‘तै तेरे लेइ अपने स्वर्गदूतन ज़ोलो ते तैना तेरी हफाज़त केरेलो।’ 11 ते ‘तैना तीं अपने हथ्थन पुड़ छूले ताके एरु न भोए कि तेरे पावन घोड़न सेइं ठोकर लग्गे।’” 12 यीशु तैस जुवाब दित्तो, “पवित्रशास्त्रे मां इन भी लिखोरुए तू अपने प्रभु परमेशरेरी

अज्ञमैदृश न केरां।” 13 ज़ैखन शैताने तैसेरी बड़े तरीकेर्द्द अज्ञमैदृश की, त किछु चिरेरां बाद तैस करां चलो जेव। 14 फिरी यीशु पवित्र आत्मारी शेक्ति सेइं भरपूर भोइतां गलील इलाके मां वापस अव, ते सारे इलाके मां तैसेरी मुशूरी भोइजेइ। 15 यीशु तैन केरे प्रार्थना घरन मां शिक्षा देतो राव, ते सब लोक तैसेरी तारीफ केरते थिये। 16 फिरी तै नासरत नगर मां वापस अव ज़ैड़ी तै पलोरो थियो। अपने रीतरे मुताबिक आरामेरे दिहाड़े तै प्रार्थना घरे मां जेव ते वचन पढ़नेरे लेइ खड़ो भोव। 17 ते तैस यशायाह नेबेरी किताब दित्ती ते तैनी खोलतां तैन वचन कदू ज़ैड़ी लिखेरु थियूं कि, 18 “प्रभुएरी आत्मा मीं पुड़े, एलहेरेलोइ कि तैनी गरीबन खुशखबरी शुनानेरे लेइ मेरु अभिषेक कियोरुए, तैनी अवं भेजोरोई कि कैदन हथरां छेड़ु (ज़ैना शैतानेरे कब्जे मां आन) ते कांना केरि एछळ्हन ठीक भोनेरी खबर शुनेर्द, ते जैन पुड़ जुलम भोते तैन लोकन आज्ञाद केरि। 19 ते तैस वक्तेरु एलान केरि ज़ेइस परमेशर लोकन पुड़ दया केरेलो।” 20 फिरी तैनी तै किताब बंद केरतां सेवके कां वापस देइतां बिश्शी जेव। ज़ेत्रे प्रार्थना घरे मां थिये सब तैसेरां तकते थिये। 21 ते तै तैन सेइं ज़ोने लगो, “अज्ञ पवित्रशास्त्रेरु तैन वचन तुश्शे सामने पूरु भोवं।” 22 ते सब तैसेरी तारीफ केरने लगे, ते तैसेरी गल्लन पुड़ बड़ो अनुग्रह थियो, ज़ैना गल्लां तैसेरे ऐशेरां निसती थी, ते लोक हैरान भोइतां ज़ोने लगे, “कुन एन यूसुफेरु मटू नई?” 23 यीशु तैन सेइं ज़ोने लगो, “ए कहावत तुस मीं पुड़ जुरुर ज़ोले, ‘कि हे बेर्द जी अपनो आप त ठीक केर, ज़ैन किछु असेई कफरनहूम नगर मां केरतू शुनेरुए, तैन इड़ी अपने नगरे मां भी केर।’” 24 ते तैनी इन भी ज़ोवं, “अवं तुसन सेइं सच ज़ोताई, कि कोई नबी अपने मुलखे मां कबूल न कियो गाए। 25 अवं तुसन सेइं सच ज़ोताई कि एलिय्याह नेबेरे वक्ते मां ज़ैखन साड़े ट्लाई साल अम्बर बंद भोवं (यानी झाड़ी न भोइ) ते इड़ी तगर कि सैरी मुलखे मां बड़ो काल पेर्द जेव ते तैस वक्ते बेड़ि विधवा कुआन्शां इस्साएले मुलखे मां थी। 26 पन एलिय्याह नबी, तैन मरां केन्ची कां नई पन सैदा नगरेरे नेड़े सारफत नगर मां एककी विधवा कां भेजो, ज़ै यहूदी न थी। 27 ते एलीशा नेबेरे ज़माने मां इस्साएलेरे मुलखे मां बड़े कोढ़ी थिये पन तैन मरां कोई भी कोढ़े करां साफ न थियो भोरो, पन सिर्फ अक सीरियारो रानेबालो नामान कोढ़े करां साफ भोरो थियो, ज़ै गैर कौमी मरां थियो।” 28

ज़ेक्रे लोक प्रार्थना घरे मां थिये एना गल्लां शुन्तां सरकी सेइं लाल-लाल भोइ
 जे। 29 ते खडे उटुतां तैस नगर करां बेझर निस्से ते तै तैस पहाडेरी चौटी पुड
 घिन्तां जे जैस पुड तैन केरु नगर आबाद थियूं ताके तैस तैटुं उन्हे बछोड़तां
 मारन। 30 पन यीशु तैन मरां निस्तां चलो जेव। 31 फिरी तै गलील इलाकेरे
 कफरनहूम नगरे मांजो जेव। ते आरामेरे दिहाडे तैन शिक्षा देने लगोरो थियो।
 32 ते लोक तैसेरी शिक्षा शुन्तां हैरान रहते थिये किजोकि तैसेरी शिक्षा बडे
 अधिकारे सेइं थी। 33 प्रार्थना घरे मां अक मैन्हु थियो, जैस पुड भूतोरो सायो
 थियो। तै बडे ज़ोरे सेइं चिन्डां मारने लगो। 34 “हे नासरत नगरेरे यीशु! असन
 तीं सेइं कुन कम? कुन तू असन नाश केरनेरे लेइ ओरोस? अवं ज्ञानताई कि
 तू कौन आस, तू परमेशरेरु पवित्र मटू आस!” 35 यीशुए तैस झिङ्क देइतां
 ज़ोवं, “चुप रा, एस मैन्हु मरां निस्सी गा!” तैखन भूते तै मैन्हु ज़मीनी पुड
 शैरी दित्तो, ते तैस मरां निस्सी जेव। 36 एन हेरतां सारे लोक बडे हैरान भोए
 ते एप्पू मांमेइं ज़ोने लगे, “ए कुन गल आए! तै अधिकारे ते शक्ति सेइं भूतन
 हुक्म देते ते तैना तैस मरां निस्सी गातन।” 37 ते सारे मुलखेरे मां चेवे पासन
 तैसेरी खबर फैली जेई। 38 फिरी तै प्रार्थना घरे मरां उटुतां शमौनेरे घरे जेव ते
 शमौनेरी शिखी बडो भुखार थियो, ते लोकेई तैसारे बारे मां यीशु सेइं ज़ोवं।
 39 तै खडो भोइतां तैसारे पासे फिरो ते बिमारी झिङ्की, ते तैसारो सारो
 भुखार उतरी जेव ते तै खडी भोइ, ते तैन केरि सेवा केरने लगी। 40 ज़ैखन
 दिहाडी लाई ढुबने त लोकेई तैना सब लोक जैन मां किसमां-किसमां केरि
 बिमैरी थी तैस कां आने, ते यीशुए तैन पुड हथ रेखतां तैना सब बज़्जाए। 41
 भूतां भी चिन्डां मारतां थियां, ते ज़ोतां थियां, “तू परमेशरेरु मटूस!” ते बडे
 लोकन मरां भूतां केरो सैयो निस्सी जेव, ते तै तैन झिङ्कतो थियो, ते तैन
 गल भी न थियो देतो केरने, किजोकि तैना भूतां ज्ञानतां थियां कि ए मसीह
 आए। 42 ज़ैखन झेङ्ग भोइ त यीशु उटुतां बेझर एककी सुनसान ठैरी मां
 जेव, ते पतोरां सारे लोक तैस तोपते-तोपते तैस कां पुजे ते रोकने लगे कि
 तू असन करां न गा। 43 पन यीशुए तैन सेइं ज़ोवं, “मीं होरि नगरन मां
 भी परमेशरेरे राज्जेरी खुशखबरी शुनानी ज़रूरीए किजोकि अवं एल्हेरेलेइ
 भेज़ोरोई।” 44 ते तै यहुदिया इलाकेरे प्रार्थना घरन मां प्रचार केरतो राव।

5 एककी दिहाड़े यीशु गन्नेसरतेरे समुन्द्रे बन्ने पुड़ खेड़ोरो थियो, ते बड़े
 लोक तैस कां करां परमेशरेरु वचन शुन्नेरे लेइ तै उन्हे बिछङ्गी गाते थिये। 2
 तैनी दूर्ह किश्ती बन्ने लेगोरी लई, ते मेढ़ली ट्लानेबाले किश्ती ड्लेखी छेडतां
 अपना ज्ञालां धोने लग्गोरो थिये। 3 यीशु एककी किश्ती मां चढ़ो ते किश्तरे
 मालिके शमौने सेइं ज्ञोने लगो, तुस किश्ती इट्ठां बन्ने पुड़ेरां नेहतां थोड़ी दूर
 लाथ। फिरी यीशु किश्ती मां बिश्तां तैन लोकन उपदेश देने लगो। 4 ज़ैखन
 तैनी लोकन शिक्षा दित्ती तै शमौने सेइं ज्ञोने लगो, “तुस किश्ती डुग्घी ठैरी
 च्चलाथ ते मेढ़ली ट्लानेरे लेइ ज्ञाल छडा।” 5 शमौने जुवाब दित्तो, “हे गुरु,
 असेई सैरी राती तरले कियेरेन ते अक मछ़ली भी नई ट्लेड्योरी, पन असां
 तेरे ज्ञोने सेइं ज्ञाल छडतम।” 6 आखकार पतरस ते तैसेरे सैथई ज्ञालां छैडी
 दित्तां ते एत्री मेढ़ली लेगि, कि ज्ञालां छिन्दोइतां मेढ़ली बेझरोवं निस्सने लेगि।
 7 तैखन तैनेई अपने सैथन जो ज़ैना होरि किश्ती पुड़ थिए, इशारो कियो कि
 एज्जा इश्शी मद्दत केरा, ते तैना भी आए ते किश्ती मेढ़लेई सेइं एत्री भेरोई
 जेर्ह कि किश्ती डुबने लगी। 8 शमौन पतरस एन हेरतां यीशुएरे पावन पुड़
 पेइतां ज्ञोने लगे, “हे प्रभु, अवं पापी मैन्हु आई तू मीं करां दूर भो!” 9 गल ए
 थी कि तै तैसेरे साथी एत्री मेढ़ली लेइतां हैरान भोइ जोरे थिये। 10 तेरहो
 हाल जेब्देरे मटां केरो यानी याकूब त कने यूहन्नारो भी थियो, ज़ैना शमौने
 सेइं साथी थिये, यीशुए शमौने सेइं ज़ोवं, “डर नन्हा अज़्जेरे बाद तू मेढ़ली
 ट्लाने बालो नई, बल्के मैनन् अकोटु केरतां मेरे चेले बनानेबालो भोलो।” 11
 तैनेई किश्ती ड्लेखी एन्तां लेई, ते अपनू सब किछ छेडतां यीशु पत्ती च़ले
 जे। 12 ज़ैखन यीशु एककी नगर मां थियो, ते एरु भोवं कि तैड़ी अक मैन्हु
 थियो, ज़ेसेरे सैरी जानी कोढ थियूं, तैनी यीशु लाव, ते तै ज़ैन्धु केरे भारे
 बिश्तां तैस कां मिन्नत केरतां ज्ञोने लगो, “हे प्रभु तू चास त मेरु कोढ बज़्झोई
 सकतस।” 13 यीशुए अपनो हथ तैस पुड़ रख्खो ते ज़ोवं, “अवं चाताई, तू
 बज़्झोस।” ते तैखने तैसेरु कोढ साफ भोइ जोवं। 14 तैखन यीशुए तैस मैन्हु
 हुक्म दित्तो, “हेर, एसेरे बारे मां केन्ची सेइं किछ न ज़ोइयां। बल्के अपनो
 आपे याजके हिरा। तैल्ला पत्ती, तू अपने बेज़्झोनेरे वजाई सेइं च़ढ़तल चाढ़,
 ज़ेसेरे बारे मां मूसा नेबे कानूने मां हुक्म दित्तोरोए। ताके लोकन पतो च़ले कि
 तू बेज़्झोरोस।” 15 पन यीशुएरे बारे मां सेब्बन पतो लगो ते लोक द्वेरां

देंते एजने लगे ताके यीशुएरी गल्लां शुन्न कने अपनि बिमैरन करां बेझोन।

16 पन यीशु जादे केरतां सुनसान ठैरी चलो गातो थियो, ते प्रार्थना केरतो रातो थियो। 17 एककी दिहैड़ी एरु भोवं कि यीशु शिक्षा देने लग्गोरो थियो, ते तैखन किछ फरीसी ते शास्त्री लोक ज्ञोते थिये, तैना गलील इलाके ते यहौदियारे सैरी इलाकन मरां यरुशलेम नगरे मां ओरे थिये; ते परमेश्वरी शक्ति यीशु सेइं साथी थी, ते बिमार बेझङ्गोइतां गाते थिये। 18 किछ मैनेई अक अधरंगी मैन्हु खट्टी पुढ़ छुइतां आनोरोए थियो, ते तैना कोशिश लगे केरने कि एस अन्तर नेइतां यीशु कां पुज़ाम। 19 पन अन्तर एत्री तंगी थी कि तैना अन्तर न गेइ सके फिरी तैनेई तैस घेरी छत पुट्टी जैस घरे मां यीशु थियो, ते खट्टां सने तै अधरंगी मैन्हु अन्तर यीशुएरे तुतरे अगर ओसालो। 20 यीशु तैन केरो विश्वास हेरतां ज्ञोवं, “हे दोस्त तेरे पाप माफ़ भोए।” 21 शास्त्री ते फरीसी लोक सोचने लगे, “ए कौन मैन्हु आए, जै परमेश्वरी तुहीन केरते, परमेश्वरेरे अलावा कौन पाप माफ़ केरि सकते?” 22 यीशुए तैन केरि गल्लां बुझी ते तैन जुवाब दित्तो, “तुस अपने-अपने मने मां एन्चरां किजो सोचने लग्गोरेथ? 23 कुन ज्ञोनू सुखतुए, ‘तेरे पाप माफ़ भोए,’ या एन ज्ञोनू ‘उठ, ते चल फिर?’ 24 पन तुसन पतो लगे, मैनेरे मट्टे ज़मीनी पुढ़ पाप माफ़ केरनेरो अधिकारे,” फिरी यीशुए तैस बिमारे जो ज्ञोवं, “अपनि खट सल्ल ते घरजो चलो गा।” 25 तै अधरंगी बिमार मैन्हु सेब्बी केरे सामने ते खडे उठो ते जैस खट्टी पुड़ तै झ्लालतो थियो, अपने दोग्गे पुड़ छुइतां परमेश्वरी बड़याई केरतो-केरतो घरजो चलो जेव। 26 तैना सारे लोक हैरान राए ते परमेश्वरी तारीफ़ केरने लगे ते कने ज्ञोने लगे, “ए त असेई अज़ नव्वीं गल लाई।” 27 एना गल्लां बीतनेरां बाद यीशु तैट्टुं निस्सो, ते एककी चुंगी घिन्ने बाले कां च़ले जेव, तैसेरु नवं लेवी थियूं। ते तै चुंगी नेनेबाले दफ्तरे मां बिश्शोरो लाव, ते यीशुए तैस जो ज्ञोवं, “तू मीं पत्ती चल ते मेरो चेलो बन।” 28 तै तैखने यीशु पत्ती चलो जेव। 29 ते फिरी लेवी यीशुएरे लेइ अपने घरे अक बड़ी धाम दित्ती। ते तैड़ी चुंगी नेनेबाले ते होरे भी बड़े लोक थिये जैना तैस सेइं साथी रोट्टी खाने बिश्शे। 30 फरीसी लोक ते शास्त्री यीशुएरे चेलन सेइं ज्ञोने लगे, “तुस चुंगी नेनेबालन ते पापी लोकन सेइं साथी किजो खातथ पीतथ?” 31 यीशुए तैन सेइं ज्ञोवं, “बिमारन डाक्टरेरी ज़रूरत भोचे, न कि सङ्ग्रह लोकन।

32 अवं धर्मी लोकन नई, पन पापी लोकन कुजाने ओरोई कि, तैना अपने पापन करां मन फिरान।” 33 तैना लोक यीशु सेइं ज़ोने लगे, “यूहन्नारे चेले त बरत रखतन ते प्रार्थना भी केरतन ते एन्नरे फरीसी लोक भी केरतन, पन तेरे चेले त खातन पीतन?” 34 यीशुए तैनन् जुवाब दित्तो, “इलाएरे दिहाड़े, कुन लाडो साथी भोंते सांते जन बरत रेखी सकतथ? 35 पन तैना दिहाड़े एज्जले, ज़ैखन लाडो तैन केरां अलग कियो गालो (यानी मारो गालो)। तैन दिहैड़न मां तैना (अपने दुख्खेरे वजाई सेइं) बरत रख्खेले।” 36 फिरी यीशु तैन अक होरि मसाल दित्ती, “पुराने लिगड़े पुड़ नंबे लिगड़ेरी टलोई कोई न लाए, नता तै टलोई तैस मरां होरू भी छिंदेली, ते कने पुराने सेइं तै मिले भी नन्ना। 37 नंबो दाढ़ारो रस पुरैनी मसकी मां कोई न छड़े, नन्ना त नंबे दाढ़ारो रस सेइं मसक भी फैटी गाचे, ते दाढ़ारो रस भी डुल्ली गाते, ते तै मसक भी बरबाद भोचे। 38 किजोकि नंबो दाढ़ारो रस नब्बीं मसकन मां भरोरो लोड़ते। 39 कोई मैन्हु पुरानो दाढ़ारो रस पीतां नब्बों न पीनो चाए, किजोकि तै ज़ोते कि पुरानो दाढ़ारो रस जादे रोड़ोए।”

6 एककी फेरे यीशु त तैसेरे चेले आरामेरे दिहाड़े ऊडारन मांमेइं एककी बत्तां च्चलेरे थिये, ते तैसेरे चेले शिल्लां हथेइं सेइं प्रोडतां खाने लगे। 2 एन लेइतां किछ फरीसी लोकेर्ई तैन सेइं ज़ोवं, “तुस एन कम किजो लोरेथ केरने, ज़ैन आरामेरे दिहाड़े केरनू जेइज़ नई?” 3 यीशुए तैन जुवाब दित्तो, “कुन तुसेईं पवित्रशास्त्रे मां कथै नई पढ़ेरु कि ज़ैइस इश्शो पूर्वज दाऊद राज़ों त तैसेरे साथी ढलुखेरे थिये त तैनेईं कुन कियेरु थियूं? 4 तैनेईं केन्वरे परमेशरेरे घरे मां गेइतां चैढ़ोरी रोटी खोरी थी, ते अपने सैथन भी दित्तोरी थी। तैना रोटी खैनी सिर्फ याजकां केरे लेइ जेइज़ थी।” 5 फिरी तैने तैन सेइं ज़ोवं, “मैनेरु मटू, यानी अवं आरामेरे दिहाड़ेरो भी प्रभु आई।” 6 एककी बार यीशु प्रार्थना घरे मां गेइतां उपदेश शुनेई राहोरो थियो, ते तैइस भी आरामेरी दिहाड़ी थी तैड़ी अक मैन्हु थियो, ज़ेसेरो देइनो हथ शुक्कोरो थियो। 7 शास्त्री त फरीसी लोक यीशुएरी ताके मां थिये कि अगर यीशु आरामेरे दिहाड़े केन्वी बझालो त असन इलज़ाम लानेरो मौको मैलनोए। 8 पन यीशु तैन केरे बारे मां सेमझी जेव, यीशुए तैस शुक्कोरे हथ्थेबाले मैन्हु सेइं ज़ोवं, “मझाटे खड़े भो।” तै खड़ो भोव। 9 तैखन यीशु तैन सेइं ज़ोवं, “अवं तुसन पुछ्तां कि आरामेरे

दिहाड़े भलाई केरनि रोड़ीए या बुराई केरनि रोड़ीए, मैनेरी जान बचानी या मारनी?” 10 ते तैनी चेत्रे पासना तैन केरां तक्कू ते तैस मैन्हु जो ज़ोवं, “अपनो हथ हिरा।” तैनी मैने अपनो हथ अग्रोवं कियो। त अकदम तैसेरो हथ बेज़झोव। 11 पन याजकन त फरीसन बड़ी सरक अई तैना एप्पू मांमेइं बेंस केरने लगे, कि असां यीशुए सेइं कुन केरम? 12 तेइस एरु भोवं कि यीशु प्रार्थना केरनेरे लेइ एककी पहाड़े पुड़ चढ़ो, ते सैरी राती परमेशरे कां प्रार्थना केरतो राव। 13 ज़ैखन ट्लेकड़ोने लगू त तैनी अपने चेले एप्पू कां कुजाए ते तैन मरां 12 प्रेरित चुने। 14 अक शमौन ज़ैस जो पतरस भी ज़ोते थिये तैसेरो ढला अन्द्रियास, याकूब, यूहन्ना, फिलिप्पुस, बरतुल्मै, 15 मत्ती, थोमा, हलफर्ईरु मटू याकूब, ते शमौन ज़ैस जो जेलोतेस ज़ोतन। 16 ते याकूबेरु मटू यहूदा ते यहूदा इस्करियोती जै तैसेरो ढलुवांने बालो बनो। 17 तैखन यीशु तैन सेइं साथी चौरस ठैरी मां खड़ो भोव, ते तैसेरे चेले भी तैड़ी अकोटु भोए ते सारे यहूदिया ते यरुशलेम नगरन त कने सूर ते सैदारे आसेपासेरे लोक समुन्दरेरे बन्नेरे बड़े लोक जैना तैड़ी थिये। 18 एन लोक यीशु करां ज्ञान शुन्ने ते अपनि-अपनि बिमैरी तैस कां बझांने ओरे थिये, ते जैन लोकन पुड़ भूतां केरे सैये सेइं दुखे मां थिये तैना भी बेज़झोइ जे। 19 सब लोक तैस सेइं हथ लांनेरी कोशिश केरते थिये किजोकि तैस मां शक्ति थी जैस सेइं तैना बेज़झोते थिये। 20 तैखन यीशु अपने चेलां केरे तकने लगो ते ज़ोने लगो, “परमेशर तुसन बरकत देलो जैना नमरथ, किजोकि स्वर्गेरु राज तुश्शू आए। 21 परमेशर तुसन बरकत देलो जैना ढलुखोरेथ, किजोकि तुस रजनेथ, परमेशर तुसन बरकत देलो जैना अज़ लेरां देतथ, किजोकि तुसेई हसनुए।” 22 “परमेशर तुसन बरकत देलो, ज़ैखन मैनेरे मटू, यानी मेरे चेलो भोनेरे वाजाई सेइं लोक तुश्शी तुहीन केरन, ते तुसन भाईचारे करां कनारे छँडेले, ते तुसन बेइज़त केरेले, ते तुश्शू नवं केट्टी छँडेले।” 23 “तैस दिहाड़े खुशी भोइतां उछङ्घथ, किजोकि हेरा तुश्शे लेइ स्वर्गे मां बड़ू इनामे। तैन केरे दादे-पङ्घदादे नेबन सेइं भी एरो ज़ेरो बर्ताव केरते थिये।” 24 “पन अफ्रसोस! तुसन पुड़ जैना दौलतमन्दथ, किजोकि तुसन सब किछ मैलेरुए। 25 अफ्रसोस! तुसन पुड़, जैन तुस चाते थिये, तुसन तैन मैल्लू, किजोकि तुस नियन्ने भोले, अफ्रसोस! तुसन पुड़ जैना अज़ हसतथ किजोकि तुस शोग

केरेले ते लेरां देलो। 26 पन अफ़सोस! तुसन पुड़ जैखन लोक तुसन जो भलू ज़ोन, किजोकि तुश्शे दादे-पड़दादई भी झूठे नेबन सेइं एरो बर्ताव कियोरो थियो।” 27 “अवं तुसन शुन्नेबालन सेइं ज़ोताई कि अपने दुश्मन सेइं प्यार केरा। ज़ैना तुसन सेइं बैर रखतन तैन केरु भलू केरा। 28 ज़ैना तुसन जो बुरु ज़ोतन तुस तैन केरे लेइ बरकत मग्गा, ज़ैन तुसन बेइज़त केरन तुस तैन केरे लेइ प्रार्थना केरा। 29 अगर कोई तुश्शे एककी खैखोड़ी पुड़ थप्पड़ बाहे त होरो पासो भी तैसेरे पासे रखा, ते अगर कोई तुश्शू कोट नेते त कमीज़ भी तैस देथ। 30 ज़ै कोई तीं करां किछ मग्गे त तैस देथ अगर कोई तेरो सबाब नेते तैस करां वापस न मग्गा। 31 ते ज़ेन्वरे तुस चातथ कि लोक तुसन सेइं केरन तेन्वरे तुस भी तैन सेइं तेरहु केरा। 32 अगर तुस तैन्ने सेइं प्यार केरथ ज़ैना तुसन सेइं प्यार केरतन त तुश्शू कुन एवसाने? किजोकि पापी लोक भी अपने प्यार केरनेबालन सेइं प्यार केरतन। 33 अगर तुस तैन केरु भलू केरतथ ज़ैना तुश्शू भलू केरतन त तुश्शू कुन एवसाने? किजोकि पापी लोक भी अपने प्यार केरनेबालन सेइं प्यार केरतन। 34 अगर तुस तैन्ने ओधार देतथ ज़ैन करां तुसन वापस भी मैलनेरी उमीदे, त परमेश्वर तुश्शी बड़याई किजो केरे? किजोकि बुरे लोक भी अपने प्यार केरनेबालन पेंइसे देतन ताके तैन करां वापस मैलन। 35 पन तुस अपने दुश्मन सेइं प्यार केरा ते तैन केरु भलू केरा, ओधार देइयथ पन तैन करां वापस मैलनेरी उमीद न रेखथ, एल्हेरो स्वर्गे मां तुश्शे लेइ अक बड़ो फले, किजोकि तुस परमप्रधान परमेश्वरे बच्चे भोले, किजोकि तै परमेश्वर न मन्ने बालन पुड़ ते ज़ालमन पुड़ भी दया केरते। 36 जेरो दया दिल तुश्शो बाजी तेरहे दया दिल तुस भी भोथ।” 37 “दोष न लाथ, तुसन पुड़ भी दोष न लव गालो, निन्दा न केरा, तुश्शी भी निन्दा न की गाली, तुस होरन माफ़ केरेले त तुसन भी माफ़ कियूं गालू। 38 तुस होरि किछ देले त तुसन भी किछ दित्तू गालू तुश्शू बरकतरु भांड ज़ेन्वरे अन्नेरी हाटी हिलेइतां देतां तैन भी तेन्वरे ज़ैस हैटी सेइं तुस होरि केरे लेइ मिनतथ तैस्से सेइं तुश्शे लेइ भी मिनेले।” 39 यीशुए तैन अक मिसाल शुनाई, “कुन कानो होरि काने बत हेरई सकते? तैना त दुझ्ये गढे मां बिछड़ेले? 40 चेलो अपने गुरु करां बछुो न भोए पन हर एककी गल्ली मां ज़ैखन सब शिखेलो त अपने गुरेरो जेरो भोलो। 41 तू अपने ढलाएरी एछछी मां कूड़ो किजो

तकतस, पन तेरी एछळी मां त नग आए, ते तैसेरो तू खियाल भी न केरस?

42 तू अपने ढ्लाए केन्जरे ज़ोई सकतस कि, ‘तेरी एछळी मरां कूड़ो केढी?’ हे पाखंडी पेड़ले अपनि एछळी मरां नग कढ़ फिरी अपने ढ्लाएरी एछळी मरां कूड़ो केढी सकतस।” 43 “किजोकि केन्ची भी रोड़े बुटे बुरो फल न लगे ते न केन्ची बुरे बुटे रोड़ो फल लगे। 44 हर बुट अपने फले सेइं पिशैनोते। किजोकि न झ़लन सेइं फैगू लगन ते न झ़ल्लन सेइं दाढ़ लगे। 45 रोड़ो मैन्हु अपने दिलेरे रोड़े खज़ाने मरां रोड़ी चीज़ां कढ़ते ते बुरो मैन्हु अपने दिलेरे बुरे खज़ाने मरां बुरी चीज़ां कढ़ते किजोकि ज़ैन दिले मां भरेऱ भोते तैन्ने ज़बानी पुड़ एइते।” 46 “ज़ैखन तुस मेरे ज़ोने पुड़ अमल न केरथ त मींजो, ‘हे प्रभु, हे प्रभु,’ किजो ज़ोतथ? 47 ज़ै मीं कां एइते ते मेरी गल्लां शुन्तां तैन पुड़ अमल केरते त अवं तुसन सेइं ज़ोताई कि तै केसेरो ज़ेरो भोलो? 48 तै तैस मैनेरो ज़ेरोए ज़ैनी अपनू घर डुग्धी खाइ केढतां पेककी ठैरी घर बनावं ज़ैखन हडाई आई त तैस घरे किछ न भोवं, किजोकि तैसेरी मुनीयाद पेककी ठैरी थी। 49 पन ज़ै मेरी गल्लां शुन्तां तैन पुड़ अमल न केरे त तै तैस मैनेरो ज़ेरोए, ज़ैनी अपनू घर रेती पुड़ बनाव ते ज़ैखन हडाई आई त तैन घर डुल्ली जेवं ते तब्बा भोइ जेवं।”

7 ज़ैखन तैनी लोकन एपनी सब गल्लां शुनेई छैडी, त तै कफरनहूम नगर मां अव। 2 तैड़ी केन्ची सूबेदारेरो अक ट्लारो सेवक बिमार थियो ते मरने बालो थियो। 3 तैनी यीशुएरी मुशूरी शुन्तां यहूदी केरे किछ बुजुर्ग तैस कां मिनत केरनेरे लेइ भेज़े, कि तै एइतां मेरो सेवक बज़्झाए। 4 तैना यीशु कां आए ते तैस कां मिनत केरने लगे, “तै इस काबले, कि तू तैसेरेलेइ इन केरस। 5 किजोकि ते इश्शी कौमी सेइं बड़ी हमदरदी रखते, ते इश्श प्रार्थना घर तैनी बनेवरुए।” 6 यीशु तैन सेइं साथी-साथी च़लो जेव, पन ज़ैखन तैस घरे नेड़े पुज़ो त सूबेदारे होरि दोस्तन सेइं समाद भेज़ो कि, “प्रभु तकलीफ न केर, किजोकि अवं एस काबल नई कि तू मेरे घरे मां एज्जी सखत। 7 एस्से वजाई सेइं अवं भी अपनो आप तीं कां एजनेरे काबल न सेमझी बल्के अपनि ज़बानी सेइं ज़ोस त मेरो नौकर बेज़्झोइ सकतो। 8 तै मैन्हु ज़ोने लगो कि अवं भी केन्चरे अधिकारे मां कम केरताई, ते सिपाही मेरे अधीन आन, ते ज़ैखन एककी जो ज़ोतां कि ‘गा,’ त तै गाते, ते होरि जो ज़ोतां एई, त तै ‘एइते,’ ते

अपने सेवके जो ज़ोताईं, ‘इन कम केर,’ त तै केरते।” 9 यीशु एन शुन्तां हैरान रेइ जेव, ते पत्रोवं लोकां केरे पासे लगो तकने ज़ैना तैस पत्पती ओरे थिये तैन जो ज़ोने लगो, “कि अवं तुसन सेइं सच्र ज़ोताईं कि मीं इस्वाएल मुलखे मां इस गैर यहूदी मैनेरो ज़ेरो मैन्हु नई लोवरो ज़ै मीं पुड़ एत्रो विश्वास केरे।” 10 ते ज़ैना लोक यीशु कां भेज़ोरे थिये वापस ज़ैखन घरे आए त तै सेवक बेज़झोरो लव। 11 थोड़े चिरेरां पत्ती एरु भोवं कि यीशु नाईन नव्वेरे नगर मां चलो जेव, ते तैसेरे चेले ते होरे भी बड़े लोक तैन सेइं साथी थिये। 12 ज़ैखन तैना नगरेरे फाटके पुड़ नेड़े पुज़े, त हेरतन, कि अक मुड़दो बेझर जो चलतेवरोए, ते तैन अपनि अम्मारु अकके मटू थियूं ते नगरेरे बड़े लोक तैस विधवा कुआन्शी सेइं साथी थिये। 13 एन लेइतां प्रभुए बड़ो तरस अव, ते तैस जो ज़ोवं, “लेरां न दे।” 14 फिरी यीशु नेड़े इटां शिड़ी सेइं हथ लाव, ते छूनेबाले रुके, ते यीशुए ज़ोवं, “ए जवान, अवं तीं सेइं ज़ोतां, खड़ो उठा!” 15 तैखन मुड़दो उठो, ते गल्लां लगो केरने, ते यीशुए तै तैसेरी अम्मा सोंफतां छङू। 16 इन हेरतां सब लोक डेरि जे, ते परमेशरेरी तारीफ़ केरने लगे, “अक महान नबी असन मां ओरोए, ते परमेशरे अपने लोकन पुड़ अपनि सिधी नज़र रखोरीए। 17 एस्से गल्लरी वजाई सेइं ए खबर यहूदियारे ते आसेपासेरे सेब्बी मुलखन मां फैली जेर्दा।” 18 ते यूहन्ना तैसेरे चेलेर्दे एन सैरी गल्लां केरि खबर दित्ती। 19 तैखन यूहन्ना एन शुन्तां दूर्द चेले कुजेइतां यीशु कां पुच्छने भेज़े कि, “एजनेबालो तू आस, या असां होरि बलगम?” 20 तैनेर्दे यीशु कां इटां पुच्छू, “असां यूहन्ना बपतिस्मो देनेबाले तीं कां पुच्छने भेज़ोरेम, कि एजनेबालो तू आस, या असां होरि बलगम?” 21 तैखन यीशुए बड़े लोक बिमैरन ते तकलीफ़, ते भूतन करां छुटाए, ते बड़े काने लोकन एछङ्हन लौ दित्ती। 22 यीशु तैन ज़ोवं, “ज़ैन किछ तुसेर्दे लाहेरूए ते शुनेरूए गेइतां यूहन्ना सेइं ज़ोथ, कि काने लातन, ते टोंटे चलतन, ते कोढ़ी केरू कोढ़ साफ भोते, ते टोंऊने शुन्तन, ते मुड़दे ज़ींते भोतन, ते गरीबन खुशखबरी शुनाई गाचे। 23 परमेशर तैस बरकत देते, ज़ै मीं पुड़ शक न केरे।” 24 ज़ैखन यूहन्नारे बिस्तार देनेबाले लोक वापस चले जे, त यीशु यूहन्नारे बारे मां गवाही देने लगो, “तुस जंगले मां कुन हेरने जोरे थिये? कुन हवाई सेइं हिलते निरैठरे डाल? 25 त फिरी तुस होरु कुन हेरने जोरे थिये? कुन रोड़ां लग्गोरां लिगड़न

बालो मैन्हु? हेरा, ज़ैना मगां लिगडां लाने बाले मैन्हु, ते ज़ैना एश केरनेबाले
 लोक भोतन। तैना राज महलन मां रातन, 26 त फिरी तुस होरु कुन हेरने
 जोरे थिये? कुन कोई नबी? हाँ, अवं तुसन सेइं ज़ोताई, नेबी करां बहु। 27 ए
 तैए, ज़ेसरे बारे मां लिखोरुए, ‘हेर, अवं अपनो बिस्तार देनेबालो तीं अग्री-
 अग्री भेजताई, ज़ै तेरी बत अग्रोवं तियार केरेलो।’” 28 यीशुए ज़ोवं, “अवं
 तुसन सेइं सच्च ज़ोताई, कि ज़ै कुआन्शन करां ज़रमोरोए, तैन मां यूहन्ना
 बपतिस्मो देनेबाले करां बहु कोई नई। पन ज़ै परमेशरेरे राज्जे मां निकडोए,
 तै यूहन्ना करां बहुओए।” 29 ज़ैखन तैन लोकेई एन गल्लां शुनी त धड़त
 नेनेबालेई भी यूहन्ना बपतिस्मो देनेबाले करां बपतिस्मो नेइतां परमेशर धर्म
 मन्नो। 30 पन फरीसी लोकेई ते शास्त्री लोकेई तैस करां बपतिस्मो न नेइतां
 परमेशरेरी मर्जी अपने बारे मां टाली। 31 “बस्सा, अवं इस ज़मानेरे लोकां
 केरि मिसाल केस सेइं देई, तैना केसरे ज़ेरेन? 32 तैना तैन मट्ठां केरे ज़ेरेन
 ज़ैना बज़ारे मां बिशोरां एककी होरि जो हक देइतां ज़ोतन, ‘असेई तुश्शे लेइ
 बेंशोई बज़ाइ, ते तुस न नच्चे, असेई शौग मनाव, पन तुसेई लेरां न दित्ती!’
 33 किजोकि यूहन्ना बपतिस्मो देनेबालो न रोट्टी खांतो अव, न शराब पीतो
 अव, ते तुस ज़ोतथ, कि एस पुड़ भूतेरो सैयो आए। 34 मैनेरु मट्ठू खातू पीतू
 अव, ते तुस ज़ोतथ, ‘हेरा, तै पेटू ते शराबी मैन्हु, कने धड़त नेनेबाले ते पापी
 लोकां केरो दोस्ता।’ 35 पन अक्ल अपने सेब्भी मट्ठुन करां जादे सच्ची साबत
 भोइ।” 36 फिरी केन्चे फरीसे यीशु कां मिनत की, कि मीं सेइं साथी रोट्टी
 खा, बस्सा, तै तैस सेइं साथी तैसरे घरे जेव, ते तैस सेइं साथी रोट्टी खाने
 लगो। 37 त हेरा, अक बदचलन कुआन्श ज़ै तैस नगरेरी थी एन बुझतां कि
 यीशु फरीसरे घरे रोट्टी खाने बिशोरोए, संगमरमरेरे एककी भांडे मां इत्र आनो।
 38 ते यीशुएरे पावन कां नेडे लेरां देंती खड़ी भोइ, ते तैसरे पाव एंखेइं सेइं
 सेले ते अपने दोग्गेरे बालेई सेइं पोछ्ने लगी ते तैसरे पावन फुम्मडी देने लगी
 कने पावन पुड़ इत्र लाव। 39 जैनी फरीसे यीशु कुजोरो थियो, तैनी एन
 लाव, त ज़ोने लगो, “अगर ए मैन्हु नबी भोथो त बुझेथो कि ज़ै कुआन्श तैस
 कांए तै कौने ते ए केरि कुआन्शो? किजोकि ए बदचलने।” 40 यीशु तैसरे
 इन खियाल ज़ैनतां तैस सेइं ज़ोवं, “हे शमान, मीं तीं सेइं किछ ज़ोनूए।”
 फरीसे ज़ोवं, “हे गुरु जो।” 41 यीशुए तैस सेइं मिसाल देइतां ज़ोवं “केन्ची

शोहुकारेरो केन्ची दूई ज़न्न कां कर्ज़ो थियो, एककी कां 500 दीनार, ते होरि कां 50 दीनार थिये। 42 ज़ैखन तैन कां देने जो किछ न राऊं, त तैनी शोहोकरे दुइने कर्ज़ो माफ़ कमाव। बस्सा, कौन तैन मरां जादे शोहुकारे सेइं प्यार केरेलो?” 43 शमौने जुवाब दित्तो, “मेरे समझी सेइं त ज़ेसेरो जादे कर्ज़ो माफ़ कियो।” यीशुए ज़ोवं, “तीं ठीक फैसलो कियो।” 44 यीशु तैस कुआन्शरे पासे तेकतां शमौने ज़ोवं, “कुन तू इस कुआन्शरां तकतस? अब तेरे घेरे अब, तीं मीं (रीतरे मुताबिक) पव धोने जो पानी न दिनू, पन इसां मेरे पाव एंखेइं सेइं पव धोए ते अपने दोग्गेरे बालेईं सेइं पौँछे।” 45 तीं मीं (रीतरे मुताबिक) फुमड़ी न दित्ती, पन एसां ज़ैखनेरो अब इड़ी ओरोईं मेरे पवन फुमड़ी देनी न उडैई। 46 तीं मेरे दोग्गे पुड़ तेल न मल्लो, पन एसां मेरे पावन पुड़ इत्र मल्लो। 47 “एल्हेरेलेइ अब तीं सेइं ज़ोताईं कि, एसारे जादे पाप ज़ैना एसां कियोरे थिये, माफ़ भोए, किजोकि एसां जादे प्यार कियो, पन ज़ेसेरे थोड़े पाप माफ़ भोतन तै थोड़ो प्यार केरते।” 48 यीशुए तैस कुआन्शी जो ज़ोवं, “गा तेरे पाप माफ़ भोए।” 49 एस गल्ली पुड़ ज़ैना तैस सेइं साथी रोट्टी खांने बिश्शोरे थिये, अपने-अपने मने मां सोचने लगे, “ए कौने ज़ै पाप भी माफ़ केरते, पाप त सिर्फ़ परमेशर माफ़ केरते?” 50 पन यीशुए तैस कुआन्शी सेइं ज़ोवं, “परमेशरे तू एल्हेरेलेइ बचाई कि तीं मीं पुड़ विश्वास कियो, हुनी तू खुशी सेइं गा।”

8 थोड़े चिरेरां बाद एरु भोवं यीशु अपने तैन 12 चेलेन सेइं साथी नगर-नगर ते ड़लवें-ड़लवें हंठतो ते प्रचार केरतो राव, ते परमेशरे राज़जेरी खुशखबरी शुनातो राव। 2 किछ कुआन्शां भी तैन सेइं साथी थी, ज़ैन मरां भूतां केरो सैयो कढ़ोरो थियो। ते ज़ैन केरि बिमैरी दूर भोरी थी, तैना केरां नंवां इना आन, मरियम जै मगदलीन ड़लवेंरी राने बाली थी, जैस पुड़ां सत भूतां केरो सैयो कढ़ोरो थियो, 3 हेरोदेस राज़ेरे भण्डारी खोजेरी कुआन्श योअन्ना ते सूसन्नाह ते होरि भी काई कुआन्शां थी ज़ैना अपनि जेइदात देइतां यीशु ते तैसेरे चेलां केरि सेवा केरती थी। 4 फिरी ज़ैखन बड़े लोक तैस कां अकोटु भोए, जैस मां नगरां-नगरां केरे लोक तैस कां एइते थिये। यीशुए तैन मिसाल देइतां ज़ोवं। 5 “एकसां अक बीज़ बेनेबालो बीज़ बेने जो जेव। बीज़ बेते बार किछ बीज़ बत्तेरे ड़लेखी बिछू ते अन्बेरे चुडोल्लोई एइतां तैन बीज़ चुनू। 6

ते किछ बीज घोड़नबाली ज़मीनी पुढ़ बिछूँ, ते लगू पन जल्दी शुककी जेव,
 एल्हेरेलेइ कि तैस पानी न मैल्लू। 7 किछ बीज कंटां केरे झैल्लन मां बिछूँ।
 जैखन तैड़ी बूटो लगो, त कंटां केरे झैल्लेर्ड भी बेडोइतां तै बूटो दबेइ छऱ्हो। 8
 ते किछ बीज रोड़ी ज़मीनी मां बिछूँ, ते लगू ते शौव गुणा फल लगो,” एन
 शुनेइतां तैनी तैन सेइं उच्ची आवाज़ी मां ज़ोवं, “ज़ै कोई समझनू चाते, तै
 ध्याने सेइं शुने ते समझो।” 9 तैसेरे चेलेइ तैस पुच्छू, “एस मिसालरो कुन
 मतलबे?” 10 यीशुए तैन ज़ोवं, “तुसन परमेश्वरे राज़जेरे भेटां केरि समझ
 दित्तोरीए, पन अवं होरि लोकन मिसाल देइतां ज़ोताई, ‘तैन तैना बार-बार
 शुनेले, पन मेरी गल न समझेलो।’ 11 “एस मिसालरो ई मतलबे, कि बीज
 परमेश्वरू वचने। 12 ज़ैना मैन्हु परमेश्वरी गल्लां शुन्तन, तैन मरां किछ लोक
 तैस बत्तेरे ज़ेरे आन, ज़ैडी बीज बिछू़ते। तैना त परमेश्वरी गल्लां शुन्तन, पन
 शैतान अकदम एइतां तैन मैन्हु केरे दिले मरां तैन वचन धिंनी गाते, कि एरु न
 भोए कि तैना विश्वास केरन ते तैन मुक्ति मैल्ले। 13 ते घोड़नबाले ज़मीनी मां
 बेवरू बीज तैने, ज़ैना वचन शुन्तां खुशी सेइं मन्तन पन ज़ील न छऱ्हने सेइं
 तैना थोड़े चिरे तगर विश्वास रखतन ते अज़मैइशरे मौके मुड़ी गातन। 14 ते
 ज़ैन झैल्लन मां बीज झाड़ू तैना इना आन, ज़ैना वचन शुन्तन, पन अग्रोवं
 चेलतां फिक्र ते दौलत ते ज़िन्दगरो एशो-अशरती मां फेसी गातन ते तैन केरो
 फल न पक्के। 15 पन रोड़ी ज़मीनी पुड़ेरूए बीज तैन्न, ज़ैना वचन शुन्तन ते
 अमल भी केरतन, ते रोड़ेचारे दिले मां बसातन ते सबरी सेइं फल भी लगते।
 16 “कोई दीयो बैलतां केन्ची भांडे हैठ ओड़कतां न रखे, ते न खट्टी हैठ रखे
 बल्के उच्ची ठैरी रखतन ताके दीयो अन्तर एजने बालन लौ दे। 17 किजोकि
 कोई एरी चीज़ छ़पोरी नई, ज़ै बांदी नई भोनी, ते कोई भेद छ़पोतो न रालो,
 पन सारो भेद बांदो भोलो। 18 बस्सा हुशार राथ, कि तुस केन्चरे शुन्तथ?
 ज़ैस कां परमेश्वरी मर्जी समझनेरी इच्छा आए, तैस परमेश्वर जादे समझ
 देलो। पन ज़ैस कां परमेश्वरी मर्जी समझनेरी इच्छा नई, तैस केरां थोड़ी ज़ेरि
 समझ, ज़ै तैस कां आए, तै भी नी गाली।” 19 फिरी तैसेरी अम्मा ते तैसेरे
 ढ़ला तैस कां आए, पन हछे मैन्हु केरि वजाई सेइं तैस कां न पुजी सके। 20
 ते यीशुए पतो दित्तो, “तेरी अम्मा ते तेरे ढ़ला बेद्दर खड़े आन ते तैना तीं सेइं
 गल केरनि चातन।” 21 यीशुए तैन जुवाब दित्तो, “मेरी अम्मा ते मेरे ढ़ला इना

आन ज़ैना परमेश्वरेरु वचन शुन्तन ते तैस पुड़ अमल भी केरतन।” 22 फिरी
 एककी दिहाड़े एरु भोवं, कि यीशुए अपने चेलन सेइं ज़ोवं, “एज्जा, समुन्दरे
 पार गाम ते तैना किश्ती मां चेढतां समुन्दरे पार चळे जे।” 23 पन ज़ैखन
 किश्ती च्छलोरी थी, त यीशुए झुली जेव ते समुन्दरे पुड़ बड़ो तूफान अव, ते
 किश्ती पैनी सेइं भेरोने लागी, ते तैन खतरो भोइ जेव। 24 चेलई तै बींझेइतां
 तैस सेइं ज़ोवं, “हे गुरु, असां मेरि गातम यीशु खड़े उठो ते हवाई जो ते पैनी
 जो ज़ोवं, रुकी गाथ ते तूफान रुकी जेव।” 25 यीशुए अपने चेलन सेइं ज़ोवं,
 “तुश्शो विश्वास कोरां जेव?” तैना डेरि जे ते हैरान भोइतां एप्पू मांमेइं ज़ोने
 लगे, “ए कौने! ए हवाई त पैनी भी हुक्म देते ते तैना एसेरो हुक्म मन्तन।”
 26 फिरी तैना गिरासेनी इलाके मां पुजे, ज़ै गलील समुन्द्रे सामने पारे। 27
 ज़ैखन तै बन्ने पुड़ ओस्सो, त तैस नगरेरो अक मैन्हु मैल्लो जैस पुड़ भूतां
 केरो सायो थियो, ते तै बड़े दिहाड़े केरो देंतो न लिंगड़ां लातो ते न घरे रातो
 थियो, बल्के कब्रन मां रातो थियो। 28 तैनी मैने यीशु लाव ते चिन्डां लगो
 मारने, ते तैसेरे सामने झुकतां ज़ोरे सेइं ज़ोने लगो, “हे यीशु परमप्रधान
 परमेश्वरा मट्टुं! तीं मीं सेइं कुन कम्मे? अवं तीं कां मिनत केरताई मीं दुख न
 दे!” 29 किजोकि यीशु तैस भूते तैस मैन्हु मरां निसनेरो हुक्म देने लोरो
 थियो, एल्हेरेलेइ तै बड़े बुरे तरीके सेइं ट्लेइतां रखोरो थियो, ते लोक तैस
 कैबू केरनेरे लेइ अग्री भी रसन ते शंगलन सेइं बेंधतां रखते थिये, ते तै तैन भी
 ट्लोइतो थियो, ते भूत तैस मैन्हु जंगले मां नेतू थियूं। 30 यीशुए तैस पुच्छू,
 “तेरु कुन नवं आए?” तैनी ज़ोवं “मेरु नंव फौज आए,” किजोकि तैस मां
 बड़ां भूतां थियां। 31 ते तैनेई तैस कां मिन्नत की, “असन अथाह कुण्डे मां
 गानेरो हुक्म न दे।” (Abyssos g12) 32 तैड़ी पहैड़ी पुड़ अक सूरां केरो बड़ो
 घान थियो, ते तैनेई तैस कां मिनत की, “असन एन मां गाने दे ते यीशुए गाने
 दित्तां।” 33 ते तैना भूतां तैस मैन्हु मरां निस्तां तैन सूरन मां चेलि जेआं, ते
 सूरां केरो सारो घान उत्रेई उन्डे छालां मैरतां समुन्दरे मां डुबतां मेरि जेव। 34
 सूरां केरे चारनेबाले एन हेरतां नेश्शी जे, ते नगर मां ते ड्लोंव्वन मां एस
 गल्लरी खबर शुनाई। 35 लोक तै तमाशो हेरने आए, ते यीशु कां जैस मैन्हु
 मरां भूतां केरि फौजरो सैयो निसोरो थियो, तैनी लिंगड़ां लां ते होशी मां एइतां
 यीशु कां बिश्शोरो लाव ते डेरि जे। 36 जैनेई तैना गल्लां पेइले लेवरी थी,

तैनेहि ज़ोवं, इस मैन्हु पुड़ भूतां केरो सैयो थियो ते ए केन्चरे बेज़्झोव। 37 ते
 गिरासेनियों इलाके मां चेत्रे पासां केरे लोक यीशु कां मिनत केरने लगो, कि
 इटां चलो गा, किजोकि तैना बड़े डरे थिये, ते यीशु किश्ती मां विश्तां वापस
 चलो जेव। 38 पन ज़ैस मैन्हु मरां भूतां निस्सोरां थियां तै यीशु कां मिनत
 केरतां ज़ोने लगो, मीं एप्पू सेइं साथी रख पन यीशुए तै भेजो ते ज़ोवं। 39
 “अपने घरे चलो गा ते लोकन सेइं ज़ो, कि प्रभु परमेशरे तीं पुड़ दया केरतां
 तेरे लेइ केत्रू बहू कम कियोरुए। तैखन तै चलो जेव ते सारे नगर मां एस
 गल्लारो प्रचार केरने लगो, कि यीशुए मेरे लेइ केत्रू बहू कम कियोरुए।” 40
 ज़ैखन यीशु वापस एज्जी राहोरो थियो, ते लोक बड़े खुशी सेइं तैस सेइं मिले,
 किजोकि तैना सब तैस बलगते थिये। 41 ते हेरा याईर नव्वेंरो अक मैन्हु ज़ै
 प्रार्थना घरेरो अक प्रधान थियो, यीशु कां अव ते तैसेरे पावन पुड़ पेइतां मिनत
 केरने लगो, “तू मेरे घरे चला।” 42 किजोकि तैसेरी अकके कुई ज़ै 12 सालां
 केरि थी, तै मरनेबाली थी। ते ज़ैखन यीशु चलोरो थियो, त लोक तैस उन्डे
 बिछ़डते थिये। 43 ते अक कुआन्श भी थी, ज़ैस 12 सालां केरि खून चलनेरी
 बिमारी थी। ते तैसां अपनो सारो ज़िन्दगरो पेंइसो हकीमन कां अल्लाज़ेरे लेइ
 खर्च कियोरो थियो, ते तै केन्चरे हथ्थे ठीक न भोइ। 44 तै कुआन्श यीशु
 पतोरां एइतां तैसेरे चोगे सेइं हुरी, त अकदम तैसेरी खून चलनेरी बिमारी
 बेज़्झोई। 45 यीशुए ज़ोवं, “मेरे लिगड़े सेइं केनि हथ लाव?” ज़ैखन सब
 लोक इन्कार केरने लगे, त पतरसे ते तैसेरे सैथेहि ज़ोवं, “ए गुरु, लोक तीं
 ढ़लांग्ने ते तीं उन्डे बिछ़डने लोरेन।” 46 पन यीशु ज़ोवं, “केन्चे मीं सेइं हथ
 लोरोए किजोकि मीं पतो लगो कि मीं मरां शक्ति निसोरिए।” 47 तैखन तैस
 कुआन्शां हेरु, कि अवं छेष्पी न बेटि, त तै डरती-डरती सामने अई ते यीशुएरे
 पावन पुड़ बिछ़डतां सैरी लोकां केरे सामने ज़ोने लगी, मीं तीं सेइं हथ लोरोए,
 ते ज़ेरो मीं हथ लोरोए अवं अकदम बेज़्झोरी। 48 यीशुए तैस कुआन्शी ज़ोवं,
 “हे कुईए, तेरे विश्वासे तू बज़्झाई ते खुशी सेइं चली गा।” 49 यीशु एन हेजू
 ज़ोंतो थियो, त प्रार्थना घरेरे प्रधानेरे तैटां केन्चे मैने एइतां ज़ोवं, “तेरी कुई
 मेरि जेवरिए, हुनी गुरु तकलीफ न दे।” 50 पन यीशु एन शुन्तां जुवाब दित्तो,
 “न डर। सिर्फ मीं पुड़ विश्वास रख कुई बेंगी गानीए।” 51 ज़ैखन तै तैस घरे
 मां जेव, त तैनी पतरस यूहन्ना ते याकूब ते कुइयरे हाज बव्वेरे अलावा होरो

कोई अन्तर एजने न दित्तो। ५२ सब लोक तैस कुइयरे लेइ लेरां देते थिये, पन यीशुए ज़ोवं, “लेरां न देथ, ए कुई मूओरी नई बल्के झुलोरोए।” ५३ लोक एन शुन्तां हसने लगे, किजोकि तैना ज्ञानते थिये कुई मेरि जेवरिए। ५४ पन यीशुए तैस कुइयरो हथ ट्लाव ते ज़ोवं, “कुइये खड़ी उठ!” ५५ ते तैसारे प्राण वापस आए ते तै लूशी खड़ी भोइ, ते यीशुए तैन ज़ोवं, एस कुइये किछ खाने जो देथ। ५६ तैस कुइयरे हाज बव हैरान रेइजे, पन तैनी तैन सेइं समझेइतां ज़ोवं, जैन किछ इड़ी भोवं एन केन्वी सेइं न ज़ोइयथ।

९ यीशुए अपने १२ चेले एप्पू कां कुजाए ते तैन शक्ति ते अधिकार दित्तो कि सैरी भूतन कढन ते बिमैरी दूर केरन। २ ते यीशुए तैना परमेशरेरे राज़ज़ेरो प्रचार केरनेरे लेइ ते बिमार बज़्झानेरे लेइ भेजे। ३ तैनी तैन सेइं ज़ोवं, “बत्तां जो किछ न नेइयथ, न सोटी न झोलो न रोट्टी न पेंइसे ते न दुइयोवं लिगड़ा। ४ ज़ैस घरे मां गाथ त तैड़ी बिश्शी रेइयथ ज़ां तगर तुस तैस नगरे मरां न गाथ। ५ ते ज़ैस नगरेरे लोक तुसन कबूल न केरन त तैस नगर मरां गांते बार अपने पांवां केरि धूड़ ठुड़कथ, ताके तैन पुड़ गवाही भोए।” ६ बस्सा, तैना च्छले जे, ते ड्लोब्वें-ड्लोब्वें गेइतां परमेशरेरी खुशखबरी शुनाते, ते लोकन बिमैरन करां बज़्झाते च्छले जे। ७ मुलखेरो च़ेवरोवं हिस्से पुड़ हेरोदेस राज़ो राज़ केरतो थियो, तै एन सब शुन्तां डेरि जेव। किजोकि किछ ज़ोते थिये यूहन्ना मुड़दन मरां ज़ींतो भोरोए। ८ ते किछ ज़ोते थिये एलिय्याह लेइहोरोए, ते किछ ज़ोते थिये नेबन मरां कोई ज़ींतो भोरोए। ९ पन हेरोदेस ज़ोवं, “यूहन्नारी क्रोड़ी त मीं कट्टेव्री थी, पन ए कौन आए, ज़ेसेरे बारे मां एरी ज़ेरि गल्लां शुन्ने मां एजने लोरिन?” ते हेरोदेस यीशु हेरनेरी इच्छा की। १० फिरी प्रेरितेइ वापस एइतां जैन किछ कियेरु थियूं यीशु सेइं शुनावं, ते यीशु तैन अलग नेइतां बैतसैदा नव्वेरे नगर मां च्छलो जेव। ११ ते बड़े लोक तैस पत्ती च्छले, ते यीशु बड़े खुशी सेइं तैन सेइं मिलो। ते तैन सेइं परमेशरेरे राज़ज़ेरी गल्लां केरने लगो, ते जैना बिमार ठीक भोनू चाते थिये, तैनी तैना बज़्झाए। १२ ज़ैखन दिहाड़ी डुबने लगी त तैन १२ चेलेई यीशु सेइं ज़ोवं, “एन लोकन भेज़ी छ़ड एना कोस्कोई ड्लोब्वन मां गेइतां बिशन ते रोट्टारो इंतज़ाम केरन। किजोकि असां गैर आबाद ठैरी आम।” १३ तैनी तैन सेइं ज़ोवं, “तुस्से एन किछ खाने जो देथ।” तैनेई ज़ोवं, “असन कां पंच रोट्टी ते दूई मेछलीन करां जादे किछ भी

नई, पन असां गेइतां एन जेर्दि रोटी मुल्ले घिन्तां आनतम, त इन भोइ बटते।”

14 (किजोकि तैन लगभग 5000 मङ्द थिये।) यीशुए अपने चेलन सेइं ज़ोवं, “एन लोकन 50-50 मैन्हु केरि हुन्डी मां बिशाला।” 15 ते चेलेर्दि तैन्ने कियू ते तैना तेन्नरे बिशाले। 16 तैखन तैनी तैना पंच रोटी ते दूर्द मेछली नी, ते अम्बरेरां तेकतां शुक्र कियू, फिरी तैनी तैना रोटी टलोडी ते चेलन कां दित्ती, कि तैन बिशालोरे लोकन खांने जो देन। 17 सारे मैन्हु खेइतां रेज़ज़ी जे। तैल्ला पत्ती, यीशुएरे चेलेर्दि बच्चोरे टुकडन सेइं 12 टोकरी भेरि। 18 एककी बार यीशु अकैल्लो प्रार्थना केरने लोरे थियो, ते चेले भी तैस सेइं थिये। यीशुए तैन पुच्छ, “कि लोक मींजो कुन ज़ोतन?” 19 चेलेर्दि जुवाब दित्तो, “किछ ज़ोतन यूहन्ना बपतिस्मो देनेबालो, ते किछ ज़ोतन एलियाह, ते किछ ज़ोतन नेबन मरां कोई अक ज़ींतो भोरोए।” 20 तैखन यीशुए चेलन पुच्छ, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू परमेश्वरो मसीह आसा।” 21 तैखन तैनी तैन खबरदार केरतां ज़ोवं, “कि ए गल केन्ची सेइं न ज़ोइयथ।” 22 यीशुए ज़ोवं, “मैनेरे मट्टोरे लेइ ज़रूरी आए, कि तै बडो दुःख झैल्ले, यहूदी लोकां केरे बुजुर्गन, प्रधान याजकन, ते शास्त्री तैस घटिया सेमझतां मारेले, ते तै ट्लेइयोवं दिहाडे फिरी ज़ींतो भोलो।” 23 फिरी यीशुए तैन सेब्भन ज़ोवं, “अगर कोई मीं पत्ती एजनो चाए, त अपने आपेरो इन्कार केरे, ते रोज़ अपनू कूस छूए ते मीं पत्ती चळे। 24 किजोकि जै कोई अपनि जान बचानी चाते तै तैस गुवालो, पन जै मेरे लेइ अपनि जान गुवालो तै तैस बचालो। 25 मैन्हु अगर सारी दुनिया हासिल केरे, ते अपनि जानरो नुकसान केरे, या अपनो आप गुवाए, त तैस कुन फैइदो? 26 किजोकि अगर कोई मैन्हु मीं करां त कने मेरी गल्लन करां शरमाते, त मैनेरू मट्टू यानी अवं भी तैस केरां शरमालो। ज़ेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो।” 27 “अवं तुसन सेइं सच ज़ोतई कि जैना इडी खडे आन, तैन मरां किछ मैन्हु ऐरे आन कि ज़ांतगर तैना परमेश्वरे राज्जेरी शक्ति न हेरेले, तांतगर तैना न मरेले।” 28 एन गल्लां केरे लगभग अठ दिहाडना बाद पतरस, ते यूहन्ना ते याकूब साथी नेइतां एककी पहाडे पुङ् प्रार्थना केरने चळे जे। 29 ते जैखन यीशु प्रार्थना लोरो थियो केरने, त तैसेरी

शकल बेदलोई जेर्ड, ते तैसेरां लिगडां लोअरां ज़ेरां चमकने लगो। 30 ते हेरा, मूसा, ते एलिय्याह, इन्ना दूर्द मङ्द तैस सेइं गल्लां केरने लगे। 31 इन्ना महिमा सेइं साथी लेइहोए, ते तैसेरे मरनेरी गलबात केरने लोरे थिये, जैन किछ यरुशलेम नगरे मां भोनेबालू थियूं। 32 पन पतरस ते तैसेरे सैथी केरि एछळी निढ़ली सेइं गिरकी भोरी थी, जैखन तैना बींझे, त तैनेई तैसेरी महिमा ते तैना दूर्द मङ्द भी लाए, जैना तैस सेइं साथी खडे थिये। 33 जैखन तैना तैस करां चले, त पतरसे यीशु सेइं ज़ोवं, “हे गुरु, इशू इडी रानू रोडोए, कि असां ट्लाई डेरे बनाम, अक तेरे लेइ, ते अक मूसेरे लेइ, ते एलिय्याहरे लेइ।” तैस पतो न थियो, कि तै कुन लोरोए ज़ोने। 34 तै इन ज़ोई राओरो थियो, तैना पुड बिदलार घिरी जेर्ड, ते जैखन तैन केरे चेव्रे पासन बिदलारी घिरी त तैना डेरि जे। 35 तैखन तैस बिदलारी मरां अक आवाज्ञ अई, “एन मेरू ट्लारू मटू आए। ध्याने सेइं एसेरी गल शुना!” 36 ते तैस आवाज्ञी सेइं साथी तैनेई यीशु अकैल्लो लाव, ते तैना चुप राए ते जैन किछ लाहेरू थियूं, तैन केन्ची सेइं न ज़ोवं। 37 होरसां एरु भोवं कि जैखन तैना पहाडे पुडेरां उन्डे ओरे थिये, त बडे मैन्हु केरि भीड तैन कां आई। 38 ते हेरा, एक्की मैने तैन लोकन मरां बडे ज़ोरे सेइं हक देइतां ज़ोवं, “ए गुरु अवं तीं कां ज़ोवले हथ केरतां कि मेरे मटु पुड दया केर; तैन मेरू अक्के मटूए। 39 ते हेर, अक भूत तैस अपने कब्जे मां केरते, ते तैन अकदम चिन्डां मारते, ते कम्बने लगते, ते तैसेरे ऐशेरां शैमफ निसचे, ते भूत तैस बडे बुरे तरीके सेइं ज़ख्मी केरतां शारते। 40 ते मीं तेरे चेलन कां बिनती कियोरी थी, कि तैस कढन, पन तैना न केढी सके।” 41 यीशुए जुवाब दिचो, “हे विश्वास न केरने बालाव ते ढीठ लोकव, अवं केइस तगर तुसन सेइं साथी रेइलो ते तुश्शी झैल्लेलो? अपने मटु इडी आन।” 42 तै मसां ओरो थियो, त भूते तैन मटू मुरोडतां शारू, पन यीशुए भूत झिड़कतां कङ्क, ते तैन मटू बज्ज़ोइतां तैसेरे बाजेरे हवाले कियूं। 43 ते सब लोक परमेश्वरी बेडि कुदरती हेरतां हैरान रेइजे, ते जैखन सब लोक तैन कम्मां जैन यीशु केरतो थियो हैरान रहते थिये। त तैनी अपने चेलन सेइं ज़ोवं। 44 “मेरी इन गल्लां रोडेचारे शुना किजोकि मैनेरू मटू मैन्हु केरे हवाले भोने बालूए।” 45 पन यीशुएरी ए गल चेलां केरि समझी मां न आई, किजोकि तैन करां ए गल छुपोरी थी। कि तैन न समझन, ते चेले एस बरे मां यीशु पुच्छने

करां डरते भी थिये। 46 फिरी चेलन एप्पू मांमेंडं बड़ी बेंस भोइ, कि असन मां बहु कौन आए? 47 यीशु तैन केरि दिलेरी गल्लां बुझतां निकड़ो बच्चो आनो ते तै एप्पू कां खड़ु कियूं। 48 ते अपने चेलन सेइं ज़ोवं, “जै इस बच्चे मेरे नंबे सेइं कबूल केरते, ते मीं कबूल केरते, ते जै मीं कबूल केरते, तै मेरे भेजने बाले कबूल केरते। किजोकि जै तुसन मां निकड़े करां निकड़ोए तै सेब्बन करां बहुए।” 49 तैखन यूहन्ना यीशु सेइं ज़ोवं, “ए गुरु, असेई अक मैन्हु तेरे नंबे सेइं भूतां केरो सैयो कढतो लाव, ते असेई तैस ठाकू किजोकि तै असन सेइं साथी मिलतां तीं पत्ती न चले।” 50 पन यीशुए जुवाब दित्तो, “तैस न ठाका, किजोकि जै तुश्रो खलाफ नई तै तुश्शो पासे।” 51 जैखन यीशुएरे उबरे नेनेरे दिहाड़े पूरे भोने पुड़ थी तै तैनी पक्के चारे यरुशलेम नगरेरे पासे गानेरो खियाल कियो। 52 ते एप्पू करां अग्री-अग्री किछ बिस्तार देनेबाले लोक भेजे। ते लोक सामरी लोकां केरे एककी ड्लोव्वें मां जे ताके यीशुएरे एजनेरी ठार तियारी केरन। 53 पन लोकेई तै एजने न दित्तो, किजोकि तै यरुशलेम नगरे जो चलोरो थियो। 54 एन हेरतां तैसेरे चेले याकूब ते यूहन्ना ज़ोने लगे, “हे प्रभु, कुन तू चातस, कि अस हुक्म देम, अम्बरेरां अग बखेनतां एन लोकन भस्म केरे?” 55 पन तैनी बेदलोइतां तक्कू, ते तैना झिड़के (ते ज़ोवं, “तुस न ज्ञानथ कि तुस कौस आत्मारे आथ। 56 किजोकि मैनेऱु मटू लोकां केरे प्राणन नाश केरने लेइ नई बल्के बचाने ओरोए)” तैखन तैना होरि ड्लोव्वेरे पासे चले जे। 57 जैखन तैना बत्तां चलोरे थिये, त केन्वे तैस सेइं ज़ोवं, “तू जैड़ी-जैड़ी भी गालो, अवं तीं पत्ती चलेलो।” 58 यीशुए तैस सेइं ज़ोवं, “लौई केरि कूढां ते अम्बरेरे चुड़ोल्लू केरे आले भोतन, पन मैनेरे मटु यानी मीं कां कोई ठार नई जैड़ी अवं झुल्ली सेक्खी।” 59 फिरी यीशु एककी होरि जो ज़ोवं, “मीं पत्ती चल,” पन तैनी मैने ज़ोवं, “हे प्रभु मीं घरे गानेरी अज्ञाज्ञत दे, मेरे बाजेरे मरनेरां बाद अवं तैस देबतां एजजेलो ते फिरी तीं पत्ती चलेलो।” 60 यीशुए तैस जो ज़ोवं, “जैना लोक आत्मिक तरीके सेइं मरेन तैन अपने मैन्हु मरने बलगने दे, पन तू गा ते परमेश्वरे राज्जेरे बारे मां लोकन मां प्रचार केर।” 61 एकके होरे भी ज़ोवं, “ए प्रभु अवं तीं पत्ती चलेलो, पन पेइले मीं भेज कि अवं अपने घरेबालन जोई।” 62 यीशुए तैस सेइं ज़ोवं, “जै

कोई हल्ली पुड़ हथ रेखतां पत्रोवं फिरतां तकते, तै परमेशरेरे राज़ज़ेरे काबल
नई।”

10 ते इन गल्लां केरे बाद प्रभुए 70 होरे चेले ठहराए, कि तै जैस-जैस नगर
ते ठैरी तैनी एप्पू गानेरे बारे मां सोचोरू थियूं, तैड़ी दूझ-दूझ मैन्हु एप्पू अग्री
भेज़े। 2 ते तैनी तैन सेइं ज़ोवं, “पकोरी फसलरे ज़ेरे बड़े लोक तियार आन
जैना परमेशरेरे वचने पुड़ विश्वास केरनू चातन, पन कम केरनेबाले थोड़े आन
जैना तैन परमेशरे राज़ज़ेरे बारे मां ज़ोन। एल्हेरेलेइ तुस फसलरे मालिके कां
प्रार्थना केरा कि तै जादे कम केरनेबाले भेज़े, कि तैना लोकन परमेशरेरे
राज़ज़ेरे बारे मां ज़ोन।” 3 गाथ, अवं तुसन भैड़ुं केरे ज़ेरे गिदन मां भेज़ताई।
4 एप्पू सेइं साथी न बेट्वे, न झोलो, न बूट नेइयथ, ते न बत्तां केन्ची जो
नमस्कार ज़ोइयथ। 5 ज़ेसेरे घरे मां गाथ त पेइले ज़ोथ कि, “इस घरे मां
शान्ति भोए।” 6 अगर तैड़ी एरे लोक जैना परमेशरेरी शान्ति चातन तैड़ी
रहते भोलो, त तुश्शी शान्ति तैस पुड़ राली, नई त तुश्शी शान्ति तुसन पुड़
एज़ेली। 7 तैस्से घरे मां राथ, ते ज़ैन किछ तैन करां मैल्ले, तैने खाथ-पीथ
किजोकि मज़दूर अपनि मज़दूरारो हकदार भोते, घरे-घरे न गेइयथ। 8 ते जैस
नगर मां गाथ, ते तैटुरे लोक तुसन अपने घरे मां नेन, त ज़ैन किछ तुश्शे
सामने रख्खू गाए तैने खाथ। 9 तैटुरे बिमारन बज़्ज़ाथ, ते तैन सेइं ज़ोथ,
“परमेशरेरू राज़ नेड़े ओरूए।” 10 पन जैस नगर मां गाथ, ते तैटुरे लोक
तुसन कबूल न केरन, त तैटुरे बज़ारन मां गेइतां ज़ोथ। 11 “कि तुश्शी नगरेरी
धूड़ भी इश्शे पावन सेइं ज़ै लगोरीए अस तुश्शे सामने ठुड़कतम ते फिरी
भी बुझा कि परमेशरेरू राज़ तुश्शो नेड़े पुज़ेरूए।” 12 अवं तुसन सेइं सञ्च
ज़ोताई, तैस दिहाड़े तैस नगरेरी हालत सदोम नगरेरी हालत झैल्लनेरे काबल
भोली। 13 “हे खुराजीन! तीं पुड़ अफसोस! हे बैतसैदा तीं पुड़ अफसोस!
कि एना चमत्कार मीं तुसन इड़ी हिराए अगर मीं एना कम्मां सूर ते सैदा मां
हरेवरां भोथां, त तैन लोकेर्ई केइसेरे देंते टाट पलेटतां ते दोग्गे पुड़ मांज़न
छेड़तां पापन करां मनफिरावरो भोथो। 14 पन फिरी भी इन्साफेरे दिहाड़े
तुश्शो हाल सूर ते सैदारे हाले करां जादे बुरो भोलो। 15 ते हे कफरनहूम
नगरेरे लोकव, कुन तुस सोचतथ कि स्वर्णे मां तुश्शी आदर भोनीए! ई तुस
त नरके गाले जैड़ी पैपी लोकन सज़ा मैलेली! (Hadेस 986) 16 जै तुश्शी

शुन्ते, तै मेरी शुन्ते जै तुसन घटिया समझते तै मीं घटिया समझते, तै जै मीं
 घटिया समझते तै मेरे भेजने बाले घटिया समझते।” 17 तैना सतर चेले
 खुशी सेइं वापस आए, ते जोने लगे, “हे प्रभु तेरे नव्वे सेइं भूतां भी इश्शो
 हुक्म मन्तन।” 18 तैनी तैन सेइं ज़ोवं, “मीं शैतान एन्वरे बिछड़तो लाव
 जेन्वरे चढ़क अम्बरेरां पेचे। 19 हेरा, मीं तुसन सप्पन ते बिच्चन डुलेच्चनेरो, ते
 दुश्मनेरी (शैतानेरी) सैरी शेक्कि पुड़ अधिकारे दित्तोरोए, ते केन्वी चीज़ी सेइं
 तुसन नुकसान न भोलो। 20 फिरी भी तुस इस गल्ली सेइं खुशी न भोइयथ
 कि भूतां तुश्शो हुक्म मेनचन, पन इस गल्ली सेइं खुश भोइयथ कि तुश्शू नवं
 स्वर्मां मां लिखोरूण।” 21 तैखन यीशु पवित्र आत्मा सेइं मघन भोवं, ते जोने
 लगो, “हे बाजी, स्वर्गेर त धेरतरे प्रभु, अवं तेरु शुक्र केरताई, कि तीं इना
 गल्लां, अक्लमन्द ते समझदारन करां छपेइतां रेख्वी, ते बच्चन पुड़ बेटी की,
 हाँ, हे बाजी, किजोकि तेरी खुशी एस्से मां थी। 22 सैरी चीज़ां मेरे बाजेरी
 तरफां मेरे सुपुर्द कियोरिन, कोई होरो मट्ठे न जाने, सिर्फ बाजी ज़ानते; कोई
 बाजी न जाने सिर्फ मट्ठू ज़ानते, या तै मैन्हु बाजी ज़ानते जैस पुड़ मट्ठू बांदो
 केरने चाए।” 23 तैखन तैनी अपने चेलां केरे पासे फिरो अकैल्ले मां ज़ोवं,
 “धन आन तैना एछळी ज़ैना एना गल्लां हेरचन ज़ैना गल्लां तुस लातथ, 24
 किजोकि अवं तुसन सेइं ज़ोतां, कि बड़े नेबन ते राजां केरि खुवैइश थी, कि
 एना गल्लां हेरन, ज़ैना तुसेई लेई, पन न लेई सके, ते एना गल्लां शुन्त ज़ैना
 तुस शुन्तथ पन न शुनी बेटि।” 25 एकसां यीशु लोकन शिक्षा देने लोरो
 थियो, ते हेरा, अक शास्त्री खड़ो भोव, ते इन ज़ोइतां तैस अज़माने लगो,
 “ए गुरु, हमेशारी ज़िन्दगी हासिल केरनेरे लेइ अवं कुन केरि?” (aiōnios
 g166) 26 तैनी तैस जुवाब दित्तो, “मूसेरे कानूने मां कुन लिखोरूण? तू केन्वरे
 समझतस?” 27 तैनी जुवाब दित्तो, “तू प्रभु अपने परमेशरे सेइं अपने सारे
 दिले, सैरी जानी सेइं, ते अपनि सैरी ताकती सेइं ते अपनि सैरी अक्ल सेइं
 प्यार रख, ते अपने पड़ोसी सेइं अपने बराबर प्यार केर।” 28 तैनी तैस सेइं
 ज़ोवं, “तीं ठीक जुवाब दित्तो एन्ने केर, फिरी तीं हमेशारी ज़िन्दगी मैलेली।”
 29 पन तैनी अपनो आप धर्मी ठहरानेरे लेइ यीशु पुच्छू, “फिरी मेरो पड़ोसी
 कौनेत?” 30 यीशुए तैस मिसाल देइतां जुवाब दित्तो, “अक मैन्हु यस्शलेम
 नगरेरां यरीहो नगरे जो चलोरो थियो, ते तै डैकेइं तैस पुड़ हमलो कियो, ते

जैन किछ तैस कां थियूं नेव। ते तैसेरां लिगडां खोल्लां, ते मारो कुट्टो ते
ज़ख्मी केरतां अधमरो बनेइतां तैडी ज़ेरे छ़डतां च़ले जे। 31 ते एरु भोवं कि,
अक याजक तैस बत्तां चलोरो थियो, तैनी तै लव ते थरकतो तैसेरी मद्दत
केरने बगैर ड्लखमेइं निस्सो। 32 एन्वरे अक मन्दरे मां कम केरनेबालो लेवी
भी निस्सो, ते तैस लेइतां तै भी ड्लखमेइं निस्सो। 33 फिरी अक सामरी
मुसाफर भी तैस बत्तां निस्सो, ते तैस लेइतां तैस बडो तरस अव। 34 ते तै
तैस कां जेव, ते तैसेरे ज़खमन तेल मल्लो ते दाढ़ोरो रस लाव, ते तैसेरे
ज़खमन पट्टी बंधी ते अपने गथे पुड़ चेढतां एककी धर्मशाली मां तैसेरी सेवा
की। 35 होरसां तैनी दूर्घ दीनार केढतां धर्मशालरे मालिके कां दित्ते, ते ज़ोवं,
‘एसेरी हेरगेश करां अगर जादे लगेले त अवं वैपसी पुड़ देलो।’ 36 तेरे
समझी मां एन ट्लेइन मरां कौन तैसेरो पढोसीए ज़ै डैकेइं ट्लातोरो थियो?”
37 तैनी जुवाब दित्तो, “जैनी तैस पुड़ दया की।” यीशुए तैस सेइं ज़ोवं, “गा,
तू भी एरु केर।” 38 फिरी ज़ैखन यीशु त कने तैसेरे चेले गेइ रावरे थियो, त
तैना एककी ड्लव्वें मां जे, ते मार्था नव्वेरी एककी कुआन्शां यीशु अपने घरे
नीयो। 39 ते मरियम नव्वेरी तैसेरी अक बेइन थी, तै यीशुएरे पावन कां बिश्तां
तैसेरी गल्लां शुनती थी। 40 पन मार्था किछ खास चीज़ बनेइ रावरी थी, ते
यीशु कां आई ते ज़ोने लगी, “हे प्रभु तुसन ज़रां भी खियाल नई कि, मेरी
बेइनां अवं कम केरनेरे लेइ अवं अकैल्ली छ़डोरी? ते एस ज़ोथ, तै मेरी मद्दत
केरे।” 41 प्रभुए तैस जुवाब दित्तो, “मार्था, हे मार्था, तू बेडि गल्लां केरे फिक्र
केरतिस, 42 पन अक गल ज़रूरीए, मरियमा तै रोडो हिस्सो चुनोरोए, ज़ै तैस
करां कोई न नेइ सके।”

11 फिरी यीशु एककी ठैरी प्रार्थना लोरे थियो केरने। ते ज़ैखन तैनी प्रार्थना
की, तैसेरे चेलन मरां एकके ज़ोवं, “हे प्रभु, ज़ेन्वरे यूहन्ना अपने चेलन
प्रार्थना केरनि शिखालोरिये तेन्वरे तू भी असन शिखाल।” 2 यीशुए तैन सेइं
ज़ोवं, “ज़ैखन तुस प्रार्थना केरथ, त एन ज़ोइयथ, हे बाजी, लोक तेरी आदर
केरन किजोकि तू पवित्र परमेश्वर आस। ते तेरु राज एज्जो।” 3 ‘इश्शी रोज़ेरी
रोट्टी असन दे। 4 इश्शो पाप माफ केर, किजोकि अस भी जैना इश्शे खलाफ
बुराई केरतन, तैन माफ केरतम। अज़मैइशेरे ज़िरिये असन पाप केरने न दे।’”
5 फिरी यीशुए तैन सेइं ज़ोवं, “फर्ज केरा तुसन मरां केन्वरो अक दोस्त एध्यी

राती अपने दोस्ते ज़ोए, ‘तू मीं टलाई रोट्टी दे। 6 किजोकि मेरो अक दोस्त
 बड़े दूरेरां हंठतो मेरे कां ओरोए, ते मेरे कां रोट्टी नई, कि अवं तैस रोट्टी देइ
 सेखी।’ 7 ते तै तैसेरो दोस्त अत्रां जुवाब दे, मीं दुःख ने दे, हुनी त दार बंदे, मीं
 कां मेरे बच्चे झुलोरेन, ते अवं तीं रोट्टी न देइ सेखी। 8 अवं तुसन सेइं ज़ोताईं
 कि, अगर तै तैसेरो दोस्ते ते तैस रोट्टी न दे, त तैसेरो दोस्तेरे बार-बार मिनत
 केरने सेइं ज़रूर तैस रोट्टी देलो ते ज़ेत्री रोट्टी केरि तैस ज़रूरत भोली देलो। 9
 ते अवं तुसन सेइं ज़ोताईं, मग्गा त तुसन दित्तू गालू। ते तोप्पा, त तुसन
 मैल्ली गालू। ते दार गुड़काथ, त तुश्शे लेइ खोल्लू गालू। 10 किजोकि ज़ै
 कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई
 दार गुड़काते त तैसेरेलेइ खोल्लू गाते। 11 तुसन मरां कौन ज़ेरो बाजी एरो
 भोए, कि ज़ैखन तैसेरू मटू रोट्टी मग्गे त तैस घोड़ दे? या मछ़ली मग्गे, ते तै
 सप दे? 12 या ठूल मग्गे त तैस बिच्छू दे? 13 ते तुस बुरे भोनेरे बावजूद भी
 अपने मटुन रोड़ी चीज़ां देनी ज्ञानतथ त तुश्शो स्वर्गेरो बाजी तैन, ज़ैना तैस
 करां मगतन पवित्र आत्मा किना देलो।” 14 फिरी तैनी एककी लट्टे मरां
 भूतेरो सैयो कढो, ज़ैखन भूतेरो सैयो निस्सो, त तै लट्टो गल्लां लगो केरने, ते
 लोक हैरान रेइजे। 15 पन तैन मरां किछ मैनेई ज़ोवं, “ए त भूतां केरे गुरु
 शैतानेरे मद्दती सेइं भूतां कढतो।” 16 ते किछेर्ई अज़मानेरे लेइ तैस करां कोई
 अक अम्बरेरो निशान मग्गो। 17 पन यीशुए तैन केरे मन्नां केरे खियाल
 ज़ैनतां तैन सेइं ज़ोवं, “ज़ैस-ज़ैस राज़जे मां फूट पेचे, तैन राज़ बनोरु न राए,
 ते ज़ैस खानदाने मां फूट पेचे, तैन भी बनोरु न राए। 18 अगर शैतान अपनि
 खलाफत एप्पु केरे, त फिरी तैसेरू राज़ केन्चरे रेइ सकते? फिरी तुस केन्चरे
 ज़ोतथ कि अवं शैतानेरे मद्दती सेइं भूतां कढताई। 19 अगर अवं शैतानेरी
 मद्दती सेइं भूतां कढताई त तुश्शी औलाद कसेरे मद्दती सेइं कढती? तैना
 तुश्शो फैसलो केरनेबाले हाकिम भोले। 20 पन अगर अवं परमेश्वरेरे शेक्ति
 सेइं भूतां कढताई त परमेश्वरू राज़ तुश्शे नेड़े पुजोरुए। 21 ज़ैखन कोई
 ज़ोरेबाले मैन्हु अपने घरेरो पैरहो केरते, त तैसेरू सब किछ बंचेरु रहते। 22
 पन ज़ैखन तैस करां कोई निगर मैन्हु तैस पुड़ हमलो केरते त तैस अपने
 कब्जे मां केरतां तैसेरे सारे हथियार धिनी गाते ज़ैस पुड़ तैसेरो भरोसो थियो,
 ते तैसेरी सारी जेइदाद लटी गाते। 23 ज़ै मीं सेइं साथी नई तै मेरे मुखालफे,

ते ज़ै मीं सेइं साथी अकोटू न केरे ते तै खिलारते। 24 “ज़ैखन केन्ची मैनु मरां भूत निसते त तैन शुक्कोरो ठैरन मां आराम तोपते ते ज़ैखन तैस तै आराम न मैल्ले त ज़ोते कि अवं वापस तैस्से घरे मां गालो ज़ैटुं अवं निसोरोई। 25 ते तैखन तैन भूत वापस एइतां तैन घर साफ सुथरु रोटू लाते। 26 तैखन तै एप्पू सेइं साथी सत होरां भूतां साथी घिन्तां तैस मां अन्तर गेइतां बिशशतन, ते तैस मैनेरो हाल पेइले हाले करां जादे बुरो भोते।” 27 ज़ैखन यीशु इना गल्लां ज़ोने लगगोरो थियो, त भीड़ी मरां अक कुआन्श जोरे सेइं ज़ोने लगी, “धने तै कुआन्श ज़ैसां तीं ज़र्म दितू ते तू पालो।” 28 पन यीशुए ज़ोवं, “हाँ, पन धन आन तैना लोक जैना परमेशरेरु वचन शुन्तन ते तैस पुड़ अमल केरतन।” 29 ज़ैखन हछे लोक भोने लगे त यीशु ज़ोवं, “इस ज़मानेरे लोक बुरेन, तैना निशान तोपतन, पन योनेरे निशानेरे अलावा एन होरो कोई निशान न दित्तो गालो। 30 किजोकि ज़ेन्वरे योना नबी नीनवेरे लोकन जो निशान बनो तेन्वरे मैनेरु मटू भी इस ज़मानेरे लोकां केरे लेइ निशान बनेलू। 31 पन दक्षिणेरी रानी आदालतरे दिहाड़े इस ज़मानेरे लोकन दोषी बनाली, किजोकि तै बड़े दूरेसं सुलैमानेरे ज्ञानेरे बारे मां शुन्तां ओरी थी। ते इडी हेरा सुलैमाने करां भी बड्होए। 32 नीनवेरे लोक आदालतरे दिहाड़े इस ज़मानेरे लोकन सेइं साथी खड़े भोइतां मुर्जम बनाले। किजोकि तैनेई योनारे प्रचारे सेइं पापन करां मनफिरावरो थियो, पन इडी हेरा तै आए, ज़ै योना करां भी बड्होए। 33 “कोई मैनु हीयो बैलतां भांडे हैठ या ओड़कतां न छड़े, बल्के उच्ची ठैरी रखतन ताके अन्तर एजने बालन लौ भोए। 34 अछ जानेरे लेइ दीयेरी ज़ेरि आए, अगर तेरी अछ रोड़ीए, त तेरी जानी मां भी लौए, ते अगर तेरी अछछे बुरीए त तेरी जान भी आंधरीए। 35 एल्हेरेलेइ खबरदार रेइयां, कोस्कोई एरु न भोए कि ज़ै लौ तीं मां आए तै आंधरु न भोए। 36 अगर तेरी जानी मां लौए, त तैसेरो कोई भी हिस्सो आंधरो न भोए, त सब एरु भोलू, ज़ैखन दीयो चमकतां लौ देते।” 37 ज़ैखन तै एना गल्लां ज़ोने लोरो थियो, त केन्चे फरीसे यीशु कां मिनत की, कि मीं सेइं साथी रोट्टी खा, ते यीशु तैसेरे घरे जेव ते तैसेरे कां गेइतां रोट्टी खाने बिशशो। 38 फरीसी लोक एन हेरतां हैरान भोव, कि ए बगैर हथ-पाव धोने रोट्टी खाने बिशशी जेव। 39 पन प्रभुए फरीसी सेइं ज़ोवं, “हे फरीसाव तुस कटोरो, ते थाली बेइरमेई त बड़ी साफ केरतथ, पन

तुश्रो अन्तर जुलम ते लालच भेरतांए। 40 हे बेअक्लाव, जैनी बेरीयोवं हिस्सो
 बनावरोए, तैनी आंट्लेइयों हिस्सो नई बनेरो? 41 बस्सा एन्त्री चीज़ दान
 केरा, त हेरा, सब किछ तुश्रो लेइ साफ भोइ गालू। 42 पन हे फरीसाव,
 तुसन पुड़ अफसोस! तुस पुतनेरो ते ज़ीररो ते कने सेब्जारो दशोवं हिस्सो
 देतथ, पन तुस इन्साफ केरने करां त परमेश्वरे य्यारे करां दूर रातथ, लोडतू
 थियूं कि दशोवं हेसे सेइं साथी इन भी केरेथे। 43 हे फरीसाव, तुसन पुड़
 अफसोस! तुस लोक चातथ कि प्रार्थना घरन मां तुसन एग्री कुर्सन पुड़
 बिशालन ते बज्ञारन मां लोक तुसन कां झुकतां नमस्कार केरन। 44 पन हे
 फरीसाव तुसन पुड़ अफसोस! तुस तैन छेपोरी कब्रां केरे ज़ेरेथ, जैन पुड़
 लोक च्चलतन, पन तैन पतो न भोए।” 45 तैखन शास्त्री मरां एकके तैस
 जुवाव दितो, “हे गुरु एना गल्लां ज्ञोइतां तू इश्शी तुहीन लोरोस केरने।” 46
 यीशुए ज़ोवं, “हे शास्त्री लोकव, तुसन पुड़ अफसोस! तुस मैनन् पुड़ त
 एत्रो भारो लदतथ जै छुनो असुखतो भोते ते पन एप्पू अपने कानूने मन्नेरी
 कोशिश भी न केरन। 47 तुसन पुड़ अफसोस! तुस नेबी केरि कब्रां बनतथ ते
 तुश्रो दादे-पड़दादेई तैना मारोरे थिये। 48 बस्सा, तुस शहातथ कि तुस अपने
 दादे-पड़दादां केरे कम्मां केरि पूरी तैइद केरतथ, किजोकि तैनेई त नबी कत्ल
 कमाए ते तुस तैन नेबी केरि कब्रां बनातथ। 49 एल्हेरेलेइ प्रभु परमेश्वरी
 अक्लां ज़ोवं, नबी त प्रेरित तैन कां भेज़नेन तैना तैन मरां किछ कत्ल केरेले ते
 किछन सताले। 50 बस्सा ई कौम सारे नेबी केरे खूनेरे जै दुनियारे शुरु करां
 देंतो बगेवरोए ज़िमेवार भोली। 51 हाबिलेरे खूने करां देंतो ते जकर्याहरे कत्ले
 तगर जै तुसेई मन्दरेरे ते बलिदान केरनेरे ठारारे मझाटे मन्दरेरे अंगने मां कत्ल
 कियोरो थियो। अवं ज़ोताई कि ए कौम तैन केरे खूनेरी ज़िमेवार भोली। 52
 पन हे फरीसाव तुसन पुड़ अफसोस! तुसेई शास्त्री लोकेई चाबी त अपने
 कब्जे मां रख्खी, पन तुस एप्पू भी दाखल न भोए ते जैना दाखल भोनू चाते
 थिये तैना भी रोके।” 53 जैखन यीशु तैट्टां निस्सी जेव त शास्त्री ते फरीसी
 लोकेई तै घेरो ते सरकरे मारे चेव्रे पासना बडे असुखते सवाल पुच्छने लगे।
 54 ताके यीशुएरे जबा एरी गल निस्से जैस सेइं लोक तैस पुड़ गलती लांन।

12 एत्रे मां हजारेई मैन्हु अकोटु भोइ जे, ते एककी होरि उन्हे खिरकते थिये
 त यीशुए सेब्भन करां पेइले अपने चेलन खडे भोइतां ज़ोवं, “फरीसी लोकां

केरे पाखंडेरे खमीरे यानी तैन केरे रीति रुवाज्ञन करां हुशार रेइयथ। 2 कोई
 चीज़ ओढ़कोरी नई ज़ै बांदी न भोए, ते न कोई चीज़ छ़पोरीए ज़ै ज़ानी न
 गाए। 3 एल्हेरेलेइ ज़ैना गल्लां तुसेई आंधरे मां ज़ोरिन तैना गल्लां लोई
 मां शुनोनिन, ते ज़ैना गल्लां तुसेई अन्तर ज़ोरिन तैन केरु एलान लाए पुड
 भोनौए। 4 “दोस्तव अवं तुसन सेइं सच्च ज़ोताई कि तैन करां न डेरथ ज़ैना
 जानी नुकसान पुज्ञातन तैसेरे बाद तैना किछ न केरि बटन। 5 पन अवं तुसन
 सेइं सच्च ज़ोताई कि केस करां डर्ल लोडते, जैस जानी मारनेरे बाद तैसेरी
 आत्माई नरके मां छ़डनेरो अधिकारे, हाँ अवं तुसन सेइं सच्च ज़ोताई कि तैस
 करां डरा। (Geenna g1067) 6 कुन टूर्झ पेंइसन मां पंच च़डोली न बिकन? पन
 परमेश्वर तैन मरां केन्ची भी न बिसरे। 7 बल्के तुश्शे दोग्गेरे सारे बाल गनरेन
 डरा नन्ना तुस त काई चुड़ालन करां भी जादे कीमती आथ। 8 “अवं तुसन
 ज़ोताई कि ज़ै कोई मैन्हु केरे सामने मेरो इकरार केरेलो, त अवं मैनेरु मटू भी
 परमेश्वरेरे स्वर्गदूतां केरे सामने इकरार केरेलो। 9 पन ज़ै मैन्हु केरे सामने मेरो
 इन्कार केरेलो त तैसेरो इन्कार परमेश्वरेरे स्वर्गदूतां केरे सामने कियो गालो।
 10 “ज़ैना लोक मैनेरे मटूरे खलाफ किछ ज़ोले तै तैस माफ केरेलो पन ज़ै
 पवित्र आत्मारी तुहीन केरेलो तैस माफ न केरेलो। 11 “ज़ैखन तैना तुसन
 प्रार्थना घरन मां ते बड़े-बड़े ते अधिकैरन कां नेले त फिक्र न केरथ कि अस
 कुन ज़ोम ते केन्चरे जुवाब देम। 12 किजोकि पवित्र आत्मा तुसन तैस वक्ते
 ज़ोलो कि तुसेई कुन ज़ोनौए।” 13 फिरी भीड़ी मरां केन्चे एक्के यीशु सेइं
 ज़ोवं, “हे गुरु जी मेरे ढ़लाए जो ज़ो, कि इश्शे बाजी केरि जेइदाती मरां मेरो
 हिस्सो मेरे हवाले केरे।” 14 यीशुए तैस जुवाब दित्तो, “अवं केनि तुश्शो
 हाकिम या बंटने बालो बनेवरोइं?” 15 ते यीशुए तैन सेइं ज़ोवं, “हर किसमेरे
 लालचे करां दूर भोइयथ ते न केन्चरी जेइदाद केन्चरी जानी करां जादे भोए।”
 16 तैखन यीशुए तैन अक मिसाल शुनाई, “केन्ची अमीरेरे ज़मीनी मां बड़ी
 फसल बनी। 17 तै अपने दिले मां सोचतां ज़ोने लगो, कि अवं कुन केरि, मीं
 कां ठारे नई कि ज़ैड़ी अवं अन्न रेख्खी सेखी? 18 तैखन तैनी ज़ोवं कि, ‘अवं
 अक कम केरताई, अपने पुराने कोठार पुटतां होरे बड़े कोठार बनेइ ते अपनू
 सारू अन्न तैस मां रखेलो। 19 फिरी मीं अपने आपे सेइं ज़ोनौए कि, मीं कां
 त बड़े सालन तगर अन्न जम्हां भोरूए, मेरी जान आरामे सेइं खा ते एश

केर।’ 20 पन परमेशरे तैस मैन्हु जो ज़ोवं, ‘हे बेवकूफ अज़े राती तू मरेलो,
ते ज़ैन किछ तीं अपने लेइ जम्हां केरतां रखेरुए तैन केसेरु भोलू?’ 21
एल्लेरेलेइ ज़ै अपने लेइ दौलत जम्हां केरते, पन परमेशरेरी नज़री मां तै अमीर
न भोए एसेरो भी एरो हाल भोनोए।” 22 तैखन यीशुए अपने चेलन सेइं
ज़ोवं, एल्लेरेलेइ तुस न अपने जिन्दगरी ज़रुरतरे लेइ फिक्र केरा, कि तुस कुन
खाले, ते न अपने जानारी कि कुन लामेले। 23 किजोकि प्राण रोट्टी करां ते
जान लिगड़े करां बेधतां भोते। 24 कांवां केरां तक्का, तैना न बेन ते न कटन
ते न तैन कां गुदाम या कोठार भोन, तांभी परमेशर तैन खाने जो देते ते तुस
त चुड़ोलन करां भी जादे कीमती आथ। 25 तुसन मां एरो कौन आए, ज़ै
फिक्र केरतां अपनि उमर अक घड़ी भी बधैर्इ सकते? 26 बस्सा, ज़ैखन तुस
ए अक निकड़ी ज़ेरि गल भी न केरि बटथ, त बाकी बेड़ी चीज़ां केरि फिक्र
किजो केरथ? 27 सोसनेरे फूडू केरे तक्का कि तैना केन्चरे बेडोतन? तैना न
मेहनत केरन ते न कत्तन, फिरी भी अवं तुसन सेइं ज़ोताई कि राज़ो सुलैमाने
भी अपने सारे धन दौलतरे बावजूद भी तैन केरां ज़ेरां लिगड़ा न लां। 28
बस्सा ज़ैखन परमेशरे मैइदानेरो घास, ज़ै अज़ आए ते कालां लौवंने मां
फुकनोए, एरी खूबसूरती देते, त हे घट विश्वासे बाले लोकव, कुन तै तुसन
लिगड़ न देलो? 29 ते एस फिक्रे मां न रेइयथ, कुन खामेले, या कुन पीमेले,
या कुन लामेले, ते न शक केरथ। 30 किजोकि दुनियारी सैरी कौमां एस्से
फिक्रे मां लेगेरी रेइचन, पन तुश्शो बाजी ज़ानते, कि तुसन कोनां-कोनां
चीज़ां केरि ज़रुरत आए। 31 पेइले परमेशरेरे राज़ेरे तलाश केरा, फिरी तुसन
एना सैरी चीज़ां मैल्ली गैली। 32 “तुस भैडुं केरे निकड़े केन्चरे ज़ेरेथ, तुस
कोन्ची गल्लरे लेइ न डरा, किजोकि तुश्शो बाजेरी खुशी एस्से मां आए, कि तै
तुसन राज़ दे। 33 अपनू घरबार बेचतां धर्मरथ देथ, ते एप्पू जो अक बेटुवो
बनाथ, ज़ै पुरानो न भोए, स्वर्गे मां दौलत जम्हां केरा ज़ै कधे न मुक्के, ज़ैडी
न चोर पुज़े ते न कीड़े खाए। 34 किजोकि ज़ैडी तेरी दौलत भोली, तैडी तेरो
दिल भी लगेलो। 35 “सेवा केरनेरे लेइ रोड़ेचारे कमर बेंद्रुतां तियार भोथ, ते
तुश्शे दीये सैरी राती बलते रान। 36 तुस मेरे एजनेरे लेड एन्चरे तियार राथ,
ज़ेन्चरे मैन्हु केरे अपने मालिके, ज़ै ड्लाएरे धामी मरां वापस एजने बलगतन,
कि जैखन तै एज्जे ते दार गुड़कान त अस दार खोल्लम। 37 तैना नौकर धन

आन ज़ैना अपने मालिकेरे वापस एजने पुड़ बींझो मैलतन, अवं तुसन सेइं सच्च ज़ोताई, कि तै एप्पू तैन रोड़ेचारे नौकरन लिगड़ां लेइतां तियार लाएलो, ते मालिक तैन सेइं खुश भोइतां एप्पू सेइं साथी रोटी खाने बिशालेलो ते तैन केरि सेवा केरेलो। 38 अगर मालिक एध्थी राती या झोड़ेरेपार एइतां अपने नौकरन बींझो लाए त तैन नौकरां केरे लेइ केत्री रोड़ी गल्ले। 39 पन याद रखा, अगर घरेरे मालिके, च्होर एजनेरो पतो भोए त तै बींझो राथो ते अपने घरे च्होरी न देथो भोने। 40 बस्सा, तुस भी मेरे वापस एजनेरे लेइ तियार राथ, मैनेरु मटू यानी अवं तैस वक्ते एज्जेलो ज़ेइस तुसन खियाल भी न भोलो।” 41 पतरसे पुच्छू, “हे प्रभु ज़ै मिसाल तीं शुनाई तै सिर्फ इश्शे लेइए या सेब्ही केरे लेइए?” 42 प्रभुए ज़ोवं, “कौने ईमानदार अक्लमन्द नौकर ज़ेसेरो मालिक तैस अपने नौकरन पुड़ मुन्शी रखे ताके तैन केरि खूराक ठीक मौके पुड़ रोड़ेचारे बंटतो राए? 43 तै नौकर धने कि ज़ेसेरो मालिक एज्जे ते मालिक तैस रोड़ेचारे कम केरतू लाए। 44 अवं तुसन सेइं सच्च ज़ोताई कि तै अपने सारे घरबारेरी हेरगैशरो अधिकार तैसेरे सुपुर्द केरेलो। 45 पन अगर तै नौकर अपने दिले मां ज़ोए कि मेरे मालिके एजने हेजू बदू च्चिरे ते होरि नौकरन ते नौकरेनन मार थाड़ केरनि शुरू केरे ते खेइ पीतां नशे मां मसत भोइ गाए। 46 ते तैस नौकरेरो मालिक केन्ची एरे दिहाड़े एज्जे ज़ेइस तैस नौकरे एजनेरो पतो न भोए ते तै मालिक एज्जी गाए त तैस नौकरेरे टुकड़े-टुकड़े केरतां ते तैसेरी हालत बेइमाना केरि ज़ेरि भोली। 47 हर तै नौकर जै जानते कि तैसेरे मालिकेरी कुन मर्जी आए, कि तै कुन केरे, मगर तै अपने आपे कम केरनेरे लेइ तियार न केरे ते अपने मालिकेरी मर्जी पूरी न केरे तैस पक्की मार बज़नीए। 48 पन अगर कोई नौकरे ज़ैस नई पतो कि मेरे मालिकेरी कुन मर्जी, कि अवं कुन केरि, ते तैन केरे ज़ैस सेइं तैस सजा मैल्ले, त तैस घट सज्जा मैलेली।” 49 यीशुए ज़ोवं, “अवं धेरती पुड़ अग लाने ओरोई ते अगर अग लगोरी भोथी त रोड़ु थियूं। 50 पन मीं बड़े जलदी दुःख झौल्लनोए, ते अवं बड़ो परेशानई ज़ां तगर दुख न झौल्ली। 51 कुन तुस एन सोचतथ कि अवं धेरती पुड़ मेल कराने लेइ ओरोई? नई! अवं तुसन सेइं ज़ोताई, कि अलग केरने ओरोई। 52 अज़्जेरे बाद अगर एक्की घरे मां पंच मैन्हु भोले त तैना एप्पू मांमेइं बेंटोले, ट्लाई जैना मीं पुड़ विश्वास न केरन तैना दुड्यां केरे

खलाफ भोले, ते दूर्द, ट्लेइयां केरे खलाफ भोले। 53 बाजी मट्टेरे खलाफ भोलो ते मटू बाजेरे खलाफ भोलू हैई कुइयरे खलाफ ते कुई हैईयरे खलाफ ते शिख नुशारे ते नुश शिखारे खलाफ भोनीए।” 54 फिरी यीशुए बड़े मैनन् मां ज़ोवं, “कि ज़ैखन तुस बिदलार डुबते पासेरां चलती लातथ त तुस ज़ोतथ कि झ़ड़ी एजने बालीए ते तैन्ने भोते। 55 ते दक्षिणेरे पासेरां हवा चली त तुस ज़ोतथ अम्बरेरो हाल हेरतां मौसमेरो अंदाज़ो केरनो ज्ञानतथ, पन इन न जैनी बटथ कि, परमेश्वर कुन चाते? 56 “तुस एप्पू फैसलो केरा कि, तुश्शे लेइ कुन रोड़ाए। 58 ज़ैखन तू लीडरे सेइं साथी हाकिमे कां गाथ त बत्ते मां तैस सेइं फैसलो की न केरस, एरु न भोए तै तीं हाकिमे कां ने ते हाकिम सिपाहीएरे हवाले केरे, ते तू कैद भोइ गास। 59 अवं तुसन सेइं ज़ोताई कि जां तगर तू पाई-पाई न देले त तांतगर तैटुं छुट्टी न सकेलो।”

13 तैस मौके किछ लोक तैड़ी आए, तैना यीशु सेइं तैन गलील इलाकेरे लोकां केरे बारे मां ज़ोने लगे, ज़ैन केरो खून, रोमेरे गवर्नर पिलातुसे मन्दरे मां जानवरां केरे बलिदाने सेइं साथी मलेवरो थियो। 2 यीशुए तैन जुवाब दित्तो, “कुन तुस एन समझतथ कि तैन गलीलेरे लोकां केरो एत्रो बुरो हाल एल्हेरेलेइ भोवं, कि तैना बाकी गलीलेरे लोकन करां जादे पापी थिये? 3 अवं तुसन सेइं ज़ोताई कि, अगर तुस भी पापन करां मन न फिराले त सब एन्हरे नाश भोनेथ। 4 या कुन तैना अठारे ज़न्हे ज़ैन उन्ढो शीलोहरो गुम्मट बिछ़ड़ेरो थियो, ते तैना सब तैस हैठ मेरि जे, ते तैना यरूशलेम नगरेरे होरि लोकन करां पापी थिये? 5 अवं तुसन सेइं सच ज़ोताई, कि नई बल्के अगर तुस भी पापन करां मन न फिराले त तुस सब एन्हरे नाश भोइ गानेथ।” 6 तैसरां बाद यीशुए तैन अक मिसाल देइतां ज़ोवं, “केन्चे मैने अपनि बागी मां अक फ्रेगेरो बुट लोरो थियो, ते तैस बुटे पुड़ हर साल फल तोपने अव पन तैस फल न मैल्लो। 7 तैखन तैनी बागबने सेइं ज़ोवं, ‘हेर अवं ट्लाई सालां केरो देंतो इस फ्रेगेरे बुटे पुड़ फल लोरोई तोपने, पन अज़ तगर एस पुड़ फल न मैल्लो एस केट्टी छड़ एनी किजो रोड़ी ठार चिकतां रखोरीए?’ 8 पन तैनी तैस जुवाब देइतां ज़ोवं, मीं निदतां एसेरे चेत्रे पासन खाद छडनियें। 9 अगर फिरी भी फल न लगो त फिरी केट्टी देनोए।” 10 एककी आरामेरे दिहाड़े यीशु प्रार्थना

घरे मां शिक्षा देने लोरो थियो। 11 हेरा, तैड़ी अक कुआन्श थी ज़ैस अठारे सालां केरि देंती भूतेरे सैइयेरे वजाई सेइं कुबड़ी भोरी थी। तै सिधी न थी भोइ बटती। 12 यीशुए तै कुबड़ी कुआन्श लाई त एप्पू कां कुजाई ते ज़ोवं, “हे कुआन्श, तू अपनि तकलीफी करां छुटी जेर्ई।” 13 ते यीशुए तैस कुआन्शी पुड़ हथ रखे ते तै लूशी बेझङ्गोइं ते परमेशरेरी तारीफ केरने लगी। 14 पन प्रार्थना घरेरो प्रधान यीशु पुड़ नराज़ भोव कि, एनी ए कुआन्श, आरामेरे दिहाडे किजो बज़्झाई ते ज़ोने लगो, “हफते मां शा दिहाडे कम काज़ केरनेरे लेइ आन, ते तैने मां कोई बज़्झावरो भी लोड़चे, ते आरामेरी दिहैड़ी न।” 15 प्रभु यीशुए तैस जुवाब दित्तो, “ए पाखंडी लोकव कुन तुस आरामेरी दिहाड़ी अपने दांत या गथे खोलतां तैन पानी पियाने न नेथ? 16 त कुन एन रोड़ू न भोव कि ज़ै कुआन्श बेझङ्गोइ तै अब्राहमेरे खानदाने मरां ए, ज़ै अठारे सालां केरि देंती शैताने गुलैमी मां रखोरि थी त आरामेरे दिहाडे ए कुआन्श छुटानी न थी?” 17 ज़ैखन यीशुए एना गल्लां ज़ोई त तैसेरे खलाफ ज़ोने बाले सेब्भी केरि बेइज़ती भोइ, ते सारे लोक यीशुए ज़ैना महिमारां कम्मां अपने हथेइं कियोरां थियां खुशी मनाने लगे। 18 तैखन यीशु तैन सेइं ज़ोने लगो, “परमेशरेरु राज़ कौस चीज़री ज़ेरुए अवं केस सेइं ज़ोई? 19 तन शेरीएरे बीज़ेरु ज़ेरु आए, ज़ैन एककी मैने एन्तां अपनि बागी मां बेव, पन ज़ैखन तैन बीज़ बेव गाते, तै उगातां सारे निकके-निकके बुट्टन केरां बड्हो भोते। ते अम्बरेरां चुड़ोल्लू भी तैस पुड़ बिशने लगां।” 20 यीशुए फिरी ज़ोवं, “अवं परमेशरेरे राज़ज़ेरी मसाल केस सेइं देई? 21 तैन खमीरेरु ज़ेरुए, ज़ैन केन्ची कुआन्शां आनू, ते हछे अट्टे मां मलाव ते सारू अट्टू खमीर बेनि ज़ोवं।” 22 यीशु अपने चेलन सेइं साथी यरूशलेम नगरे मांमेइं गांते बार नगरन मां ते डुलोंवन मां शिक्षा देंतो चलोरो थियो। 23 केन्चे यीशु पुच्छू, “हे प्रभु कुन थोड़े ज़ेरे लोक हमेशारी सजाई करां बचेले?” यीशु तैन सेइं ज़ोवं। 24 “परमेशरेरे राज़जे मां सुन्कडे दारेरां बत्तां गानेरी कोशिश केरा, किजोकि अवं तुसन सेइं ज़ोताई कि बडे लोक अन्तर गानेरी कोशिश केरेले पन न गेइ सकेले। 25 ज़ैखन घरेरो मालिक एककी बार दार बंद केरि छडते, त तुस बेइर खड़ खड़ दार गुड़काते, ते बिनती केरते राथ कि, ‘हे प्रभु इश्शे लेइ दार खोल्ल,’ ते तै तुसन जुवाब देते कि अवं तुसन न जैनी तुस कौन आथ ते

कोटुं ओरेथ? 26 तैखन तुस ज़ोले कि, ‘असेर्ह तीं सेइं साथी खोरी पियोरी नई, ते तीं इश्शे अंगने मां असन शिक्षा नई दित्तोरी।’ 27 पन तै तुसन सेइं ज़ोलो, ‘अवं तुसन न ज़ैनी तुस कौन आथ, ते कोटुं ओरेथ हे बेइमानव मीं करां दूर भोथ।’ 28 ज़ैखन तुस अब्राहम, इसहाक ते याकूब ते सब नेबन परमेश्वरे राज़ज़े मां सामने लाएले ते अपनो आप बेइरोवं कढते लाएले, त लेरां देते ते दंत च्चापते राले। 29 लोक पूर्वां ते पछमेरां ते उत्तर ते दक्षिणेरे देंते यानी दुनियारे सारे लोकन मरां लोक परमेश्वरे राज़ज़ेरी धामी मां एइते लाएले। 30 ते हेरा किछ एरेन कि ज़ैना पेइले आन, तैना पत्रोवं भोनेन ते ज़ैना पत्रोवं आन, तैना पेइले भोनेन।” 31 तैखने किछ फरीसी लोक यीशु कां आए ते ज़ोने लगे, “इटुं निस ते च्चलो गा, किजोकि हेरोदेस तीं मारने चाते।” 32 पन यीशुए तैन ज़ोवं, तैस मैन्ह सेइं ज़ै लोई अरो ज़ेरो आए, गेइतां तैस सेइं ज़ोथ कि, “अवं अज़ ते कालां भूतां केरो सैयो कढने ते बिमारन बज़्झांनेरु कम केरने लोरोई ते एन कम ट्लेइ दिहाड़न मां मीं पूरु केरनौ। 33 बस्सा मीं अज़ ते कालां ते ट्लेइदी मीं सफर केरनौए, किजोकि नबी सिर्फ यरूशलेम नगरे मां मारे गाले। 34 “हे यरूशलेमे नगरेरे लोकव, हे यरूशलेमे नगरेरे लोकव, तुसेर्ह केत्रे नबी कत्ल किये, ज़ैना बड़े पेइले तुसन कां आए, ते ज़ैना तुसन कां भेज़े तैन घोड़ेई बेर्ह, मीं केही फेरेर्ह सोचू कि तेरे बच्चन अकोटु केरि ज़ेन्चरे कुकड़ी अपने बच्चन अपने फंगन हैठ रखचे, पन तुस राज़ी न भोए। 35 हेरा तुश्शू घर तुश्शो लेइ छङ्गु गाते, ते अवं तुसन सेइं ज़ोताई कि तुस मीं केन्ची तरीके भी न लेर्ह सकेले, ज़ांतगर तुसन एन ज़ोनेरो मौको न एज्जेलो, धने तै ज़ै प्रभुएरे नंवे सेइं एइते।”

14 यीशु फिरी आरामेरे दिहाड़े एककी फरीसेरे घरे रोट्टी खाने जेव त बड़े फरीसी लोक ध्याने सेइं लोरे थिये तकने, ताके तैसेरी कोई गलती ट्लान। 2 तैड़ी अक बिमार मैन्ह थियो ज़ेसेरी ज़ंधां पैखड़ी शोजती थी ते पस-पाक च्चलती थी, तै तैड़ी बिशोरे थियो। 3 यीशुए शास्त्री ते फरीसी लोकन पुच्छू, “कि आरामेरे दिहाड़े कानूनेरे मुताबिक कोई बज़्झानो जेइज़े की नई?” 4 तैना चुप राए, तैखन यीशुए तैस बिमारे पुड़ अपनो हथ रख्खो ते तै बज़्झाव, ते घरजो भेज़ो। 5 ते फरीसन सेइं ज़ोवं, “तुसन मरां एरो कौने, ज़ेसेरु मढू या दांत खड़े मां खिरके ते आरामेरी दिहाड़ी भोए, ते तैस तैटुं बेदर न कढे?” 6

ते तैन लोकेई यीशुएरी गल्लां केरो जुवाब न देइ बटो। 7 ज़ैखन यीशुए हेरु
 कि, ज़ैना लोक धाम ज़ोइतां रोट्टी खाने कुजोरेन केन्चरे खास लोकां केरि ठार
 चुनतन, तैनी तैन अक मिसाल दित्ती। 8 “ज़ैखन तुसन कोई ड्लाएरी धामी
 मां कुजाए। ज़ै तैनेई खास मैन्हु केरे लेइ ठार रख्खोरी भोए, तुस तैड़ी न
 बिशशथ, भोइ सकते कि होरो कोई तुसन करां जादे खास मैन्हु कुजेवरो
 भोए। 9 ते तुसन दुइये ज़न्न कुजाने बालो तुसन कां एइतां ज़ोए, ए ठार होरि
 केरे लेइ ते तुसन शरमेइतां खड़े उठनू पे, ते सेब्भन करां पत्र बिशनू पे। 10
 ज़ैखन भी कोई तुसन धाम ज़ोइतां कुजाए त सेब्भन करां पत्र बिशा, ताके
 ज़ैखन तेरो कुजाने बालो एज्जे ते ज़ोए, ‘दोस्त, अगर एइतां खास ठैरी बिश,’
 ते तैन लोकां केरे सामने तेरी केत्री बड़याई भोनीए। 11 किजोकि ज़ै कोई
 अपनो आप बड़ो बनालो त तै निकड़ो बनाव गालो ते ज़ै कोई अपनो आप
 निकड़ो बनालो त तै बड़ो बनाव गालो।” 12 फिरी यीशुए, तैस फरीसी मैन्हु
 सेइं ज़ैनी तै कुजोरो थियो ज़ोवं, “ज़ैखन तुस दिसेरी या रातरी धामी मां मैनन्
 कुजाथ, त अपने दोस्तन या ड्लान रिशतेदारन या अपने अमीर पड़ोसन न
 कुजेइयथ। किजोकि तैना भी तीं कुजेइतां तेरु एवसान मुकेइ छडेले। 13
 बल्के ज़ैखन तुस धाम देथ त टोटे, कानो, गरीब गुरबे, परदेशी कुजेइयथ। 14
 ते परमेश्वर तुसन बरकत देलो, किजोकि तैन कां किछ भी नई ज़ैस सेइं तैना
 तुशू एवसान मुकेइ बटन, ते तेरे एस एवसानेरो फल धेर्मी लोकन ज़ीते भोने
 सेइं साथी फैसलेरी दिहैड़ी मैलेलो।” 15 ड्लाहनन् मरां एकके एन गल्लां
 शुन्तां यीशु सेइं ज़ोवं, “परमेशररे राज्जेरी धामी मां खाने बालो धन भोलो।”
 16 यीशुए तैस जुवाब दित्तो, “केन्चे मैने अक बड़ी धाम दित्ती ते बड़े लोक
 कुजाए। 17 ज़ैखन रोट्टी खानेरो वक्त अव त तैनी अपनो नौकर भेजो कि तैन
 लोकन ज़ैन जो ड्लाएरी धाम बनोरी थी, ‘एज्जा, रोट्टी बनोरोए।’ 18 पन
 धामी बालेई सेब्भेई मिलतां एतराज़ कियो ते पेइले मैने ज़ोवं, ‘मीं ऊडार
 घिनेऱु आए, मीं तैस हेरने गानूए ते अवं तीं कां मिनत केरतां कि मीं राने दे।’
 19 त होरो ज़ोने लगो, ‘मीं पंच हल्लां दांत घिन्नोरेन ते अवं तैन लाने परखने
 चलोरोई। अवं तीं कां मिनत केरतां कि मीं राने दे।’ 20 अक होरो मैन्हु लगो
 ज़ोने, ‘मीं ड्ला बनावरोए, एलहेरेलेइ अवं न एज्जी बेटि।’ 21 तैखन नौकरे
 वापस एइतां एन सैरी गल्लां अपने मालिके शुनेई, त मालिके बड़ी सरक

अर्द्ध, तैनी अपने नौकरे जो ज़ोवं, ‘इस नगर मां गा ते लेंगे लुथे, गरीब गुरबे नगो, नियन्ने भत्ते, टोटे, कानो इरां कुजा।’ 22 नौकरे ज़ोवं, ‘हे मालिक ज़ैन तीं ज़ोवं, मीं तैन्ने कमाव, पन फिरी भी ठार खाली आए।’ 23 मालिके नौकरे सेइं ज़ोवं, ‘बत्तारे आसे पासे ऊडारन मांमेइं गा ते लोक मजबूर केरतां आन, ताके मेरु घर भेरतां भोए। 24 किजोकि अवं तीं सेइं ज़ोतार्दि कि ज़ैन लोक पेइले कुजेवरे थिये, यानी खास ठैरारे लेइ कुजेवरे थिये, तैन मरां कोई भी मेरी धामी मां रोटी न खेइ सकेलो।’” 25 बड़े लोक यीशु पत्ती च्छ्लोरे थिये, यीशुए पत्रोवं तककू ते ज़ोवं। 26 “अगर कोई मीं कां एज्जे, ते अपने अम्मा बाजी, कुआन्श, बच्चन, ढलान ते बेइन्न ते अपने जानी करां जादे प्यार मीं सेइं न केरे त तै मेरो चेलो न भोइ सके। 27 ते ज़ै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नई, त तै मेरो चेलो न भोइसखे। 28 तुसन मरां एरो कोई भोए, ज़ै गुम्मट बनानू चाए, ते पेइले बिश्तां हिसाब न केरे, कि पूरो केरनेरे लेइ मीं कां ख़र्चो आए कि नई। 29 कधे एरु न भोए कि खाइ कटनेरे बाद तैस बनेइ न सके ते तकने बाले हसते रान। 30 ‘ते ज़ोन एनी मैने बनानू त शुरू कियूं, पन बनेइ न बटो।’ 31 या फर्ज केरा कि कोई राज़ो होरि राजे सेइं लड़ाई केरनेरे लेइ सोची राहोरो भोए त कुन पेइले एन न सोचे कि 10000 फौजी जवानन् सेइं अवं 20000 फौजी जवावन सेइं तैसेरो मुकाबलो केरि सकतां कि नई? 32 अगर तै मुकाबलो न केरि सखे त तैस फौजी सेइं ज़ै दूरे, मैन्हु भेज्यतां तैस सेइं सल्लारी मिनत केरेलो। 33 एन्चरे अगर ज़ै कोई तुसन मरां अपनू सब किछ न छँडे त मेरो चेलो न भोइसखे। 34 “लून रोड़ी चीजे, पन अगर लूनेरो लूनार मुकी गाए त तैन कोस सेइं लूने बनाव गालू? 35 लोक तैस बेइरोवं शेरी देले, ज़ै कोई समझनू चाते, तै ध्याने सेइं शुने ते समझे।”

15 बड़े लोक धड़त घिन्ने बाले ते पापी लोक यीशु कां एइतां तैसेरी गल्लां शुन्ने लोरे थिये। 2 फरीसी ते शास्त्री लोक शिकयत केरतां ज़ोने लगे, “कि ए मैन्हु पापी लोकन सेइं तालमेल रखते, ते तैन सेइं साथी खाते पीते।” 3 यीशुए तैन अक मिसाल देइतां ज़ोवं। 4 “तुसन मां एरो कोई आए ज़ैस कां 100 भैड़ां भोन ते तैन मरां अक हेरोए ते 99 भैड़ां तैड़ी ज़ेरे जंगले मां छेड़तां तोपने न गाए, ज़ां तगर तैस मैल्लोरी नई? 5 ते ज़ैखन ते तैस मैल्ले त

खुशी सेइं कंधे पुड़ छुइतां आने। 6 ते अपने घरे एइतां अपने दोस्तन ते
 भियालन कुजेइतां ज्ञोए कि, ‘अज़ मीं सेइं साथी खुशी मनाथ, किजोकि अज़
 मेरी हेरोरि भैड मैलोरीए।’ 7 अवं तुसन सेइं ज्ञोताई कि, एन्हरे 99 धर्मी
 ज़ैनेई पेइले अपने पापन करां मनफिरावरो तैन करां जादे जैखन अक पापी,
 पापन करां मन फिराते स्वर्गे मां बड़ी खुशी बनाई गाचे। 8 “कुन एरी भी
 कोई कुआन्श भोली जैस कां चैदरे दश सिके भोन ते अक हेरोए ते तै दीयो
 बैलतां घरे अन्तर धूनी न दे, ते ज्ञां तगर मैल्ले न तांतगर तोप्ती न राए? 9
 ते तोपनेरे बाद अपने पड़ोसन ते अपनि सेहेलन कुजेइतां एन न ज्ञोए कि,
 ‘एज्जा मीं सेइं साथी खुशी मनाथ किजोकि अज़ मेरो हेरोरो सिको मैलोरोए।’
 10 बस्सा, अवं तुसन सेइं ज्ञोताई कि एककी पैपेरे, पापन करां मन फिराने
 सेइं परमेशरे स्वर्गदूतां केरे सामने बड़ी खुशी मनाई गाचे।” 11 यीशु फिरी
 होरि मिसाल दित्ती, “केन्वी मैनेरां दूई मटुं थियां। 12 तैन मरां निकडे मटु
 अपने बच्चे सेइं ज्ञोवं, ‘हे बाजी जेइदाती मां जै मेरो हिस्सो बनते तै मीं दे।’
 तैनी दुइने हिस्सो बेटां दित्तो। 13 थोडे दिहैड़ना पत्ती निकडे मटु अपनू सब
 किछ जेइदात होरि मुलखे जो नी, ते बुरे कम्मन मां लुटाई। 14 जैखन तैनी
 सब किछ मुकेइ छङ्गू त तैस मुलखे मां बड़ो काल पेव, ते तैस कां खाने जो
 किछ न राऊं। 15 तैखन तै तैस मुलखेरे एककी रानेबाले कां कम तोपने
 पुज्जो। तैनी तै अपने ऊडारन मां सूर चारनेरे कम्मे लाव। 16 तैड़ी तै बड़ो
 ढलुखोरो थियो, तै तैन खाने मां राजी थियो जैन सूर खाते थिये, किजोकि
 तैस केन्वे किछ खाने जो न दित्तू। 17 तैखन तैस समझ आई ते ज्ञोने लगो,
 ‘मेरे बाजी केरे मज़दूर रेजातां रोटी खातन, पन अवं इड़ी फाके लोरोई मरने।
 18 मीं खडे उठतां अपने बाजी कां गानूए ते तैस सेइं ज्ञोनूए हे बाजी अवं
 परमेशरेरी नज़री मां ते तुश्शी नज़री मां पापी आई। 19 हुनी अवं एस काबल
 त नई, कि तुश्शू मटू भोइ, पन मीं भी अपने मज़दूर मां रखा।” 20 “बस्सा,
 तैनी तै मुलख शारो ते वापस अपने बाजी कां चलो, ते हेजू तै बडे दूरे थियो,
 ते तैसेरे बाजे तै लाव ते तैसेरे बाजी तैस पुड़ बड़ो तरस अव, ते तै दौवड़तो
 अपने मटु कां जेव, ते तैन गले लाव ते बड़ो खुशी भोव। 21 मटु अपने बाजी
 सेइं ज्ञोवं, ‘ए बाजी अवं परमेशरेरी नज़री मां ते तुश्शी नज़री मां पापी आई।
 हुनी अवं एस काबल त नई कि, अपने आपे जो तुश्शू मटू जोई।’ 22 पन

बाजे अपने नौकरन सेइं ज़ोवं, ‘लूश केरा ते सेब्बन करां पेइले रोड़ां लिगड़ां
एस मटु लुवाथ, ते एसेरे हथ्ये आंवठी ते पावन बूट लुवाथ। 23 ते अक
जानवर मारो ते बड़ी धाम बनेइतां बड़ी खुशी मनाई। 24 किजोकि मेरु मटू
जैन ज़ेन्चरे मेरि जोरु थियूं, अज ज़ींतू भोरुए, हेरोरु थियो, ते मैलोरुए।’
बस्सा तैना खुशी मनाने लगे।” 25 “तेइस बड़ू मटू जैन ऊडरे मां कम केरतां
घरजो ओरु थियूं ज़ैखन तै घरे नेडे पुजो त तैनी गीतां केरि त नचनेरी शौर
शुनी। 26 तैनी अक नौकर कुजाव ते तैस पुच्छू, ‘ए शौर कीजई लोरी भोने?’
27 नौकरे तैस सेइं ज़ोवं, ‘तेरो निकडो ढला वापस घरे ओरोए ते तेरे बाजे
अक जानवर मैरतां धाम बनोरीए, किजोकि तै ठीक ठाक घरे पुज़ोरोए।’ 28
पन तैस मैनेरु बड़ू मटू नाराज़ भोवं ते अन्तर घरे मां भी न लगो एजने, पन
तैसेरो बाजी बेझर अव, ते तैस मिठानेरी कोशिश की, कि घरे अन्तर एज्जे।
29 बडे मटु अपने बाजी सेइं ज़ोवं, ‘हेरा अवं केत्रे सालां केरि देंती तुश्शी सेवा
केरने लोरोई, ते कधे तुश्शो हुक्म नई मोडोरो ते तुसरोई कधे कोई छेड़ू नई
दित्तोरोए कि अवं भी अपने दोस्तन सेइं खुशी मनई। 30 पन ज़ैखन तुश्शू
निकड़ू मटू अपनू सब किछ लुटेडतां वापस अव, त तैसेरेलेइ जानवर मारो ते
अक बड़ी धाम बनाई।’ 31 तैसेरो बाजी ज़ोने लगो, ‘मेरा मटूं तू त मीं कां
आस ते ज़ैन किछ मीं कांए तैन सब तेरुए। 32 पन असरोई खुशी मनानी ज़रुरी
थी किजोकि तेरो ए निकडो ढला ज़ै ज़ेन्चरे मेरि जोरो थियो, अज ज़ींतो
भोरोए, हेरोरो थियो ते अज़ मैलोरोए।”

16 फिरी यीशुए अपने चेलन अक होरि मिसाल दित्ती कि, “केन्ची अमीरेरो
अक मुन्शी थियो, लोकेर्ह तैसेरी शकैइत तैसेरे मालिके सेइं लाई कि, ए
तेरो माल बरबाद केरने लोरोए। 2 मालिके तै कुजाव ते ज़ोवं, ‘एन कुने
जैन अवं तेरे बारे मां शुने लोरोई? सारो हिसाब-किताबे मां अज़ेरां बाद तू
मेरो मुन्शी नई रालो।’ 3 मुन्शे अपने दिले मां सोचू मेरो मालिक मेरे कम्मे
करां मीं कढने लोरोए, मीं मज़दूरी भी न केरोए ते शमरिमारे भीख भी न
मैगगोए। 4 ‘अवं ज़ानताई कि, मीं कुन केरनूए इट्टां कढनेरे बाद मीं लोक
खुशी सेइं अपने घरे मां कबूल केरतन।’ 5 बस्सा तैनी अपने मालिकेरो अक
कर्जदार तोपते, पेइले एककी पुच्छू तीं कां मेरे मालिकेरे केत्रे रुपेइयेन? 6
तैनी जुवाब दित्तो, जैतूनेरे तेलेरे 100 पींपां केरि कीमते, तैनी ज़ोवं इना रां

तेरां काकलां, ते विश्तां 50 पींपे बना। 7 फिरी तैनी मुन्शे होरि सेइं ज़ोवं, ‘तीं कां केत्रो कज़ोए?’ तैनी ज़ोवं, ‘गेहुं केरि 100 बोरी,’ तैनी ज़ोवं, ‘यां काकलां ते विश्तां 80 लिखी।’ 8 मालिके तैस बेर्डमान मुन्शेरी तारीफ की, एल्हेरेलेइ कि तैनी बेड़ि च्छलैकी सेइं कम कियेरु थियूं। किजोकि इस दुनियारे लोक अपने लोकन सेइं सौदो केरनो परमेश्वरे लोकन करां बड़े हुशारी सेइं केरतन। (aiōn g165) 9 अवं तुसन सेइं जोताई कि दौलत खर्च केरतां इस दुनियारे लोकन दोस्त बनाथ, तुसन मरनेरां बाद हमेशारू घर मैलनूए। (aiōnios g166)

10 ज़ै थोड़े ज़ेरे मां इमानदेरी सेइं रहते ते हछे मां भी ईमानदार रहते। ज़ै थोड़े करां थोड़े मां भी बेइमाने तै हछछे मां भी बेइमाने। 11 बस्सा अगर तुस बेइमानेरे धन दौलती मां ईमानदार न भोए, त अपनि सङ्घी दौलत ज़ै स्वर्ग मां आए, कौन तुशो हवाले केरेलो? 12 अगर तुसेर्ई होरि केरे माले मां ईमानदार न भोए, त ज़ै तुशो अपनो माले कौन तुसन देलो? 13 कोई नौकर दूर्द मालिकां केरि सेवा एक्की वक्ते मां न केरि सके। न त एक्की सेइं दुश्मनी केरेलो ते होरि सेइं प्यार केरेलो, या एक्केरो बेनतां रालो त होरि न सुखालो। तुस परमेश्वरी ते दौलतरी, दुइयां केरि सेवा न केरि सकतथ।” 14 तैखन फरीसी लोक ज़ैना दौलतरे लालची थिये, एन गल्लां शुन्तां यीशुएरी हासी बनाने लगे। 15 यीशु तैन जो ज़ोवं, “तुस तैना आथ ज़ैना लोकन मां अपनो आप बड़ो धर्मी हिरातन। पन परमेश्वर तुशो दिलेरी हालत ज़ानते किजोकि ज़ै चीज़ लोकां केरे लेह बड़ी बड़ीए ते तै परमेश्वरी नज़री मां भिट्टी आए।” 16 “मूसेरे कानून ते नेबी केरि गल्लां यूहन्ना बपतिस्मो देनेबाले तगर रेइ, ते फिरी परमेश्वरे राज्जेरी खुशखबरी शुनाने लगे ते हर कोई तैस मां दाखल भोनेरी बड़ी कोशिश केरने लगोरेन। 17 पन धरती अम्बर टेली गालू पन परमेश्वरे कानूने मरां अक बिंदी भी न मिटेली। 18 ज़ै कोई अपनि कुआन्श शैरतां होरि सेइं ड्ला बनाते तै तैस सेइं बदमाशी केरते ते ज़ै शैरोरी कुआन्शी सेइं ड्ला बनाते तै भी बदमाशी केरते।” 19 “अक मैन्हु बड़ो अमीर थियो, ते तै बैंगनी लिगड़ां लातो थियो, ते बड़ां माघो लिगड़ां लातो थियो। ते रोज़ एश अशरती मां मसत रातो थियो। 20 अक बड़ो गरीब मैन्हु ज़ेसेरू नवं लाज़र थियूं, तैसेरे दारे कां एन्तां रखोरो थियो, तैसेरी सारी जान खेराड़ेइं सेइं भेरतां थी। 21 तै चातो थियो, कि अमीर मैनेरे टुकेइं सेइं अपनू पेट भेरि, पन तैड़ी

कुतरां एइतां थियां ते तैना तैसरां खेरडां भी च्छटतां थियां। 22 फिरी एरु भोवं कि तै गरीब लाज़र मेरि जेव स्वर्गदूतेईं तै छुइतां अब्राहमे कां पुज़व, ते अमीर मैन्हु भी मेरि जेव ते तै दैब्बी छहुणो। 23 जैखन तैनी पातालेरे दुखे मां अपनि एछळी घैड़ी? त दूरेरां तैनी अब्राहम ते तैस कां नेडे लाज़र लाव। (Hadēs g86)

24 तै चिन्डां मैरतां ज़ोने लगो, ‘ए बाजी अब्राहम मीं पुड़ दया केर, एस लाज़रे भेज ते ए अपनि अंगलोई पैनी सेइं सेलतां मेरे ज़िभी पुड़ लाए, किजोकि अवं अग्गी मां तड़फने लोरोई।’ 25 पन अब्राहमे ज़ोवं, ‘मटुं याद केर तीं त अपनि जवेनी मां सब रोड़ी चीज़ां मैल्ली ते इस लाज़रे सिर्फ बुरी चीज़ां मैल्ली, पन ए हुन्ना इड़ी आरामे मांए ते तू तकलीफी मां आस। 26 ते एन गल्लां केरे अलावा इश्शे ते तुश्शे मझाटे अक बड़ी खाईए, ताके ज़ै कोई पार गानू चाए न गेइ सखे ते ज़ै वार एजनू चाए न एज्जी सखे।’ 27 तैनी मैने ज़ोवं, ए बाजी अब्राहम, अवं ज़ोवले हथ केरतां ज़ोताई कि, तू लाज़रे दुनियाई मां मेरे बाजी केरे घेरे भेज। 28 तैड़ी मेरे पंच ढला आन ते तै तैन हदायत दे कि, एरु न भोए ते तैना भी इस अग्गी मां एजन। 29 पन अब्राहमे तैस ज़ोवं, ‘तैन केरि हदायतरे लेइ तैन कां मूसेरो कानूने ते नेबी केरि किताबां त आन तैना तैन शुनन् ते मनन्।’ 30 तैनी मैने ज़ोवं, ‘नई ए बाजी अब्राहम अगर कोई मुड़दन मरां ज़ींतो भोइतां गाए त तैना ज़रूर पापन करां मन फिराले।’ 31 पन अब्राहम तैस सेइं ज़ोवं, ‘अगर तैना मूसेरी ते नेबी केरि न शुनी ते अगर कोई मुड़दन मरां ज़ींतो भोइतां गाए त तैना तैसेऱू भी याकीन न केरेले।’”

17 फिरी तैनी अपने चेलन सेइं ज़ोवं, “एन न भोइसखे कि लोकन ठोकर न लगो, पन अफसोस तैस मैन्हु पुड़ ज़ै होरि केरे लेइ ठोकर बनते। 2 तैसेरेलेइ त एन्ने रोड़ु थियूं, कि ढलाटेरो ढलेइटोल तैसेरे गल्ले उन्ढो छेडतां ते समुन्द्रे मां शैरतां छहुणो गाथो, ताके तै होरि जो ज़ैना विश्वासे मां कमज़ोरन ठोकर न बने। 3 बस्सा हुशार राथ तुस कुन केरतथ, अगर तुश्शो विश्वासी ढला पाप केरते त तैस समझाथ ते अगर तै पापन करां मन फिराए त तैस माफ़ केरा। 4 अगर तै एककी दिहैड़ी मां तेरो सत्ते बार तेरो पाप केरे त अगर तै सत्ते फेरेई तीं कां एइतां माफ़ी मगो त तू सत्ते फेरेई तैस माफ़ केरां।” 5 प्रेरितेई प्रभु सेइं ज़ोवं, “हे प्रभु, इश्शी मद्दत केर कि अस होरे भी मज़बूती सेइं विश्वास केरमा।” 6 प्रभु यीशुए ज़ोवं, “अगर तुश्शो विश्वास सिवलारे गलेवे बराबर भी

भोलो त तुस तूतेरे बुटे जो ज़ोई सकतथ इट्टां उखड़ ते समुन्द्रे मां लग त
 तै तुश्शो हुक्म मनेलो। 7 “तुसन मां एरो कौन आए, ज़ेसेरो नौकर ऊडारां
 बेंतो भोए या गोरु चारतो भोए ते ज़ैखन तै ऊडारे मरां घरे एज्जे त तैसेरो
 मालिक तैस ज़ोए कि, ‘लूशी बिश्श ते रोट्टी खा।’ 8 या एन न ज़ोए कि मेरी
 रोट्टी तियार केरथ ते ज़ां तगर अवं खेड़ पीं नन्ना ते ज़ां तगर अवं रेझ़ी नन्ना
 तू मेरी सेवा केरतो राए, तैल्ला पत्ती तू भी खा? 9 कुन तै एल्हेरेलेइ नौकरेरु
 अहसान केरेलो कि, तीं तैन कियूं ज़ैन तीं केरनेरे लेइ ज़ोवरु थियूं? 10 एन्हरे
 ज़ैखन तुस एन सब केरेले ज़ैस केरनेरो तुसन हुक्म दित्तोरो थियो, त ज़ोथ
 कि, ‘असां निकम्मे नौकर आम? असेई तैने कियूं ज़ैन केरनू चाते थिये।’”
 11 एककी फेरे यीशु त कने तैसेरे चेले यरुशलेम नगरेरे पासे चलोरे थिये। तैना
 सामरिया ते गलीले इलाके मांमेइं चलोरे थिये। 12 ज़ैखन तैना एककी इलव्वें
 मां पुज्जने बाले थिये त तैड़ी दश कोढ़ी मैल्ले ज़ैना दूर खेड़ोरे थिये। 13 तैनेईं
 बड़े ज़ोरे सेइं ज़ोवं, “हे यीशु, हे प्रभु, असन पुड़ दया केर।” 14 यीशुए तैन
 लेइतां ज़ोवं, “यरुशलेम नगरेरे मन्दरे मां गाथ ते अपनो आप याजकन हिराथ,
 ते सच्चे एरु भोवं कि गाते बार बत्तां तैन केरु कोढ़ साफ भोइ जेवं।” 15 पन
 तैन मरां अक कोढ़ी अपनू कोढ़ हेरतां कि, तैसेरु कोढ़ साफ भोरोए खुशी
 भोइतां बड़े ज़ोरे सेइं परमेशरेरी तारीफ केरतो वापस यीशु कां अव 16 ते
 यीशुएरे पावन पुड़ दोग रेखतां शुक्र लगो केरने। ए मैन्हु सामरी थियो। 17
 यीशुए तैस पुच्छू, “कुन तैन दश कोढ़ी केरु कोढ़ साफ नई भोवरु? फिरी
 तैना कोरां जे? 18 कुन एस गैर यहूदी मैनेरे अलावा तैन होरन एत्री हिम्मत
 न अई, कि गेइतां परमेशरेरी महिमा केरम?” 19 तैखन यीशुए तैस ज़ोवं,
 “खड़ो उठ ते चलो गा तीं मीं पुड़ विश्वास कियो तांए तू बेझ़ोरोस।” 20
 फरीसी लोक यीशु पुच्छने लगे, “कि परमेशरेरु राज केइस एजनौए? यीशुए
 तैन जुवाब दित्तो कि परमेशरेरु राज एरु नई कि कोई तैस लेई बटे। 21 ते
 ज़ोन कि हेरा इड़ी या उड़ीए एन्हरे नई बल्के परमेशरेरु राज तुश्शे मझाटे।”
 22 यीशुए अपने चेलन सेइं ज़ोवं, “तै दिहाड़ी भी एजनीए कि, ज़ेइस तुस
 परमेशरेरी दिहैड़न मरां अक दिहाड़ी हेरनेरी इच्छा रखेले, ज़ेइस मैनेरु मट्टु
 यानी अवं वापस एजनोई, पन तुस न लेई बटेले। 23 लोक तुसन सेइं ज़ोले
 कि, ‘हेरा, मसीह इड़ीए,’ या ‘उड़ीए या हेरा तै इड़ीए!’ पन तुस तैरां न गेइयथ

ते न तैन पत्ती न च्छेलथ। 24 किजोकि जेन्वरे बिजली अम्बरे मरां चेमकतां
एककी पासेरां होरि पासे च्छली गाचे, तेन्वरे मैनेरु मटू यानी अवं तैस दिहैड़ी
बांदो भोलो। 25 पन ज़रुरीए कि तै पेइले दुःख झैल्ले ते इस ज़मानेरे लोक
तैस घटिया समझन। 26 ते ज़ेरु इश्शे पूर्वज नूहेरे ज़माने मां भोरु थियूं तेरहु
मैनेरे मटोरे ज़माने मां भी भोलु। 27 तेइस भी लोक खाते पीते थिये ते डला
भोंते रहते थिये। ते ज़ां तगर नूह किश्ती मां न थियो जोरो तांतगर सब किछ
भोतु राव। ते फिरी तूफान अव ते सब किछ खतम भोइ जेवं। 28 ते ज़ेरु
इश्शे पूर्वज लूतेरे ज़माने मां भोरु थियूं, कि लोक खाते पीते थिये बुपार केरते,
बागां लाते ते घरां बनाने मां मघन थिये। 29 पन ज़ैस दिहैड़ी लूत सदोम नगरे
मरां बेझर निस्सो त पत्रोवं अम्बरेरां गंधकेरी अग बैखतां सब किछ खतम केरि
छँडू। 30 ते मैनेरे मटू यानी मेरु वापस एजनू भी अचानक भोलू। 31 “तैस
दिहैड़ी जै लाए पुड़ भोलो त तैसेरो माल सबाब अगर घरे मां भोलो त तैस नेने
तै अन्तर न एज्जे, ते जै ऊडारे मां भोलो तै भी वापस न गाए। 32 लूतेरी
कुआन्शी सेइं कुन भोवं याद रख्खा। 33 जै अपनि जान बचानेरी कोशिश
केरेलो तै तैस गुवालो, ते जै तैस गुवालो तै तैस बचालो। 34 अवं तुसन सेइं
ज़ोताई कि तैस राती दूँई मैन्हु एककी खट्टी पुड़ झुल्लोरे भोले, ते अक नीयो
गालो, ते दुइयोवं तैड़ी रालो। 35 दूँई कुआन्शां हिट्लाट पट्टी भोली त अक
नेनीए ते अक तैड़ी छँडनियें। 36 दूँई मैन्हु ऊडारे मां भोले त अक नेनोए ते
अक तैड़ी छँडनोए।” 37 एन शुन्तां तैनेई यीशुए पुऱ्हू, “हे प्रभु असन सेइं
ज़ो, एन कोड़ि भोलू?” यीशुए तैन ज़ोवं, “जैड़ी ज़िंग भोते तैड़ी इल्लां जम्हां
भोइचन।”

18 यीशु अपने चेलन अक मिसाल देइतां ज़ोवं, कि हिम्मत हारनेरे बगैर
प्रार्थना केरती रावरी लोडे। 2 “एककी नगर मां अक हाकिम रातो थियो। तै न
परमेशरे करां डरतो थियो, ते न कोन्ची मैनेरी परवाह केरतो थियो। 3 तैस
नगर मां अक विधवा कुआन्श रहती थी जै तैस हाकिमे कां एइती रहती थी,
ते तैस कां मिनत केरती रहती थी कि, मेरो इन्साफ केरतां मीं मेरे दुश्मने करां
छुटा। 4 पेइले त तैनी एत्रो खियाल न कियो पन ज़ैखन ए हिसाब चळतो
राव, त तैनी अपने मने मां ज़ोवं, ‘अवं न परमेशरे करां डेरि ते न मैनेरी परवाह
केरि। 5 पन ए विधवा कुआन्श मीं परेशान केरती रावे, एल्हेरेलेइ अवं एसारो

इन्साफ केरेलो, नईं त एसां अवं बडो ज़लील केरनोई।” ६ तैखन प्रभु यीशुए
 ज़ोवं, “शुना ए बेईमान हाकिम कुन लोरोए ज़ोने। ७ बस कुन परमेश्वर अपने
 चुनोरे लोकां केरो फैसलो केरने मां चिर लालो, ज़ैना रात दिहैडी फरयाद
 केरते रातन? ८ अवं ज़ोताई, कि तै तैन केरो फैसलो केरेलो ते लूशी केरेलो।
 पन फिरी भी ज़ेहस मैनेरु मटू यानी अवं एज्जेलो त कुन लोक मां पुड हेजू
 तगर विश्वास केरते भोलो?” ९ यीशुए किछ एरे लोकन अक मिसाल दित्ती
 कि, ज़ैन अपनो आपे बडो धर्मी समझाते थिये ते होरन किछ न थिये बुझते।
 १० “दूर्व मैन्हु प्रार्थना केरने मन्दरे मां जे अक फरीसी मैन्हु थियो, ते होरो धड़त
 (टेक्स) घिन्ने बालो थियो। ११ फरीसी मैन्हु खडो भोइतां प्रार्थना केरने ते
 अपने बारे मां सोचने लगो, कि हे परमेश्वर अवं तेरु शुक्र केरताई, अवं होरि
 मैन्हु केरो ज़ेरो नईं ज़ैना डैकू, अर्थर्मी, बदमाशी केरनेबाले, ते इस धड़त
 नेने बालेरो ज़ेरोई नईं, १२ अवं हफते मां दूर्व बार बरत रखताई, ते अपनि
 कमैईयरो दशोवं हिस्सो तींजो देताई। १३ “पन तै धड़त नेनेबालो जै दूर
 खड़खडो थियो, तैनी एत्रू भी न केरि बटु, कि अम्बरेरे पासे तक्के बल्के छाती
 पिटृतां ज़ोने लगो, ‘हे परमेश्वर मां पैपी पुड़ दया केरतां माफ केर!’ १४ अवं
 तुसन सेइं सच ज़ोताई, ए धड़न नेनेबाले मैन्हु तैस फरीसी मैन्हु करां धर्मी
 निस्तां अपने घरजो जेव। किजोकि जै कोई अपनो आप बड्डो बनालो तै
 निकडो बनाव गालो ते जै अपनो आप निकडो बनालो तै बड्डो बनाव गालो।”
 १५ फिरी किछ लोक निक्के बच्चन यीशु कां आने लगे ताके यीशु तैन पुड
 हथ रेखतां बरकत दे। चेलई तैन लाव त तैन धमकाए ते ठाकू। १६ पन यीशुए
 बच्चे एप्प कां कुजाए ते चेलन सेइं ज़ोवं, “बच्चन मां कां एजने देथ एन न
 ठाका, किजोकि परमेश्वरे राज एरां ज़ेरां केरुए। १७ अवं तुसन सेइं सच
 ज़ोताई, जै कोई परमेश्वरे राज मां गानेरे लेइ अपनो आप निक्के बच्चन
 बराबर न बनाए, तांतगर परमेश्वरे राज्जे मां दाखल न भोइसखे।” १८ केन्ची
 यहूदी मैने यीशुए पुच्छू, “हे रोडे गुरु हमेशारी जिन्दगी हासिल केरनेरे लेइ अवं
 कुन केरि?” (aiōnios g166) १९ यीशु जुवाब दित्तो, “तू मांजो रोडू किजो
 ज़ोतस? परमेश्वरे अलावा होरो कोई भी रोडो नई। २० तू त परमेश्वरे हुक्मन
 ज़ानतस, यानी ‘खून न केरा, बदमाशी न केरा, चोरी न केरा, झूठी गवाही न
 देथ, धोखो न देथ, अपने हाज-बच्चां केरि इज्जत केरा।’” २१ तैनी मैने ज़ोवं,

“एना सब हुक्म अवं बचपनेरो मन्तो ओरोई।” 22 जैखन यीशुए एन शुन्तां ज़ोवं, “तीं मां एककी गल्लारी कमी आए, तू ज़ैन किछ तीं कां आए, तैन बेव्रतां गरीब मैनन् दे, तैखन तीं स्वर्गे मां खज़ानो मैलेलो। ते एइतां मीं पत्ती च्चल।” 23 ए गल शुन्तां तै बड़ो उदास भोइ जेव किजोकि तै बड़ो अमीर थियो। 24 यीशुए तैस हेरतां ज़ोवं, “अमीरां केरु परमेशरेरे राज़जे मां दाखल भोनू केन्त्रु आसुखतुए। 25 परमेशरेरे राज़जे मां अमीर मैनेरु दाखल भोने केरां ऊंटेरु सांधनेरे पाए मरां निस्नू सुख्तू आए।” 26 जैनेर्ई ए गल शुनी त तैना पुच्छने लगे, “फिरी कसेरी मुक्ति भोइ सख्चे।” 27 यीशुए जुवाब दित्तो, “मैनन् करां त एन न भोइ सके पन परमेशरे करां सब किछ भोइ बटे�।” 28 पतरसे यीशु सेइं ज़ोवं, “हेर असां त सब किछ छेडतां तीं पत्ती च्चलोरेम।” 29 यीशु तैन सेइं ज़ोवं, “अवं तुसन सच्च ज़ोताई, कि एरो कोई नई ज़ैनी परमेशरेरे राज़जेरे लेइ अपनू घर या कुआन्श ते हाज या बव, ढला या बच्चे शारेरे भोन। 30 तैस इस दुनियाई मां बदू जादे, ते एजने बैली दुनियाई मां हमेशारी ज़िन्दगी मैलनीए।” (*aiōn* g165, *aiōnios* g166) 31 यीशुए अपने 12 चेले एप्पू सेइं साथी निये ते तैन ज़ोने लगो, हेरा, “अस यरूशलेम नगरे जो च्चलोरेम ते नेबेर्ई जैन किछ मैनेरे मट्टेरे बारे मां लिखोरूए तैन पूरु भोलू। 32 तै गैर कौमां केरे हथ्थे देनोए, ते तैना तैसेरो मज़ाक बनाले ते तैस बे इज़ज़त केरेले ते तैसेरे तुतेरे पुड़ थुकनूए। 33 तैस कोडे मारेले ते तैस मैरी छडेले पन तै ट्लेइयों दिहाडे फिरी ज़ींतो भोलो।” 34 तैनेर्ई ए गल न सेमझी बटी ते यीशुएरी एस गल्लरो मतलब तैन करां छऱ्पोरो राव। 35 ते एरु भोवं कि जैखन तैना यरीहो नगरेरे नेडे पुज़जे त अक कानो मैन्हु बत्तारे ट्लेखी बिशोरो भीख मगतो थियो। 36 जैखन तैनी हछे मैन्हु केरि छैड शुनी त तै पुच्छने लगो, “ए कोलहेरी शौर लोरी भोने?” 37 लोकेर्ई तैस ज़ोवं, “यीशु नासरी कोस्कोई च्चलरोए।” 38 तै चिन्डां मैरतां ज़ोने लगो, “हे यीशु नासरी दाऊदेरा मट्टुं मीं पुड़ दया केर।” 39 यीशुए सेइं साथी च्चलने बाले लोक तैस काने मैन्हु छिड़कने ते ज़ोने लगो, चुप रा, पन तै मना जादे ज़ोरे-ज़ोरे चिन्डां मैरतां ज़ोने लगो, “हे यीशु नासरी दाऊदेरे मट्टुं मीं पुड़ दया केर।” 40 यीशु खेड़ोव ते हुक्म दित्तो, एस मीं कां आनां जैखन तै तैस कां अव त यीशुए तैस पुच्छू। 41 जो, “अवं तेरे लेइ कुन केरि?” तैनी काने मैने ज़ोवं, “हे प्रभु अवं चाताई

कि अपनि एछल्हैं सेइं लेर्ड बेटि।” 42 यीशुए तैस सेइं ज़ोवं, “बेज़ज़ोईं गा तेरे विश्वासे तू बज़्जावरिस।” 43 तै तैखने बेज़ज़ोव ते लहने लगो ते परमेश्वरी तारीफ केरतो यीशु पत्ती च्छ्लो जेव। एन हेरतां सब लोक परमेश्वरी तारीफ केरने लगे।

19 यीशु यरीहो नगरे मांमेइं निस्तां च्छ्लोरे थियो। 2 तैड़ी अक मैन्हु थियो, ज़ेसेरु नवं जक्कर्इ थियूं, तै धड़त घिन्ने बालां केरो अफसर थियो, तै बड़ो अमीर थियो। 3 तैस यीशु हेरनेरो चाऊ थियो, पन तैसेरु कद छोटू थियूं, तांए तै हछे मैनन् मरां लेर्इ न थियो बटतो। 4 एल्हेरेलेइ तै देवड़तां अगर जेव ते फ्रेगेरे बुट्टे उबरो गुस्सो किजोकि ज़ैखन यीशु एज्जे त तै तैस रोड़ेच्छारे लेर्इ सके। 5 ज़ैखन यीशु तैस ठैरी पुजो त तैनी उबरु तेकतां ज़ोवं, “जक्कर्इ लूशी उन्ढो ओस, किजोकि अज मीं तेरे घरे ट्लाहन चारेई एजनूए।” 6 जक्कर्इ तैखने उन्ढो ओस्सो ते यीशु बेड़ि खुशी सेइं अपने घरे नीयो। 7 एन हेरतां सब लोक शकैइत केरतां ज़ोने लाए, “कि यीशु त एक्की पैपी मैनेरो मेहमान बनोरोए।” 8 जक्कर्इ रोट्टी खांते बारे खड़ो भोइतां प्रभु सेइं ज़ोने लगो, “हे प्रभु यीशु तक अवं अपनि अध्धी जेइदात कंगालन देताई, अगर केन्चेरु किछ खोरु भोलू त तैस च्छेरे हिस्से वापस देइलो।” 9 तैखन यीशुए तैस सेइं ज़ोवं, “अज इस घरे मां मुक्ति ओरिए, एल्हेरेलेइ इन भी पूर्वज अब्राहमेरु अक मट्टूए। 10 किजोकि मैनेरु मटू यानी अवं होरि लोकन हमेशारी सज़ाई करां मुक्ति देने एवरोई।” 11 ज़ैखन लोक यीशुएरी गल्लां शुन्ने लग्गोरो थिये त तैनी तैन अक मिसाल देइतां ज़ोवं, किजोकि तैना यरुशलेम नगरेरे नेड़े पुज़ोरे थिये ते लोकां केरो खियाल थियो परमेश्वरु राज लूशी एजनू आए। 12 तैनी तैन ज़ोवं, “अक बड़ो अमीर मैन्हु होरि मुलखे मां च्छ्लो, ताके तैस मुलखेरो मेंत्रो ओदो घिन्तां वापस एज्जे। 13 तैनी अपने सेवादारन मरां दश ज़न्हे कुजाए, ते तैन दश मोहरां देइतां ज़ोवं, ‘भेरे वापस एजने तगर इस पेंइसे सेइं कारोबार केरथ।’ 14 पन तैस ठैरी लोक तैस सेइं नफरत केरते थिये, तैनेई किछ लोक भेजतां तैस जो बिस्तार भेजो, कि अस न चाम ए मैन्हु असन पुड़ राज केरो।” 15 “ज़ैखन तै हुकुमतरो ओदो हासिल केरतां वापस अव त तैनी अपने सेवादारे जो समाद भेजो। ज़ैना तैनी कारोबारेरे लेइ पेंइसे दित्तोरे थिये ताके सेब्मी केरो पतो केरे कि केनि केत्रु कियेरु आए। 16 पेइले

मैने एइतां ज़ोवं, ‘हे मालिक मीं तेरी दश अश्रेफेइं सेइं दश होरि कमैई।’

17 तैनी तैस सेइं ज़ोवं, ‘तीं दश अश्रेफेइं सेइं इमानदेरी सेइं कम कियूं गा
तीं दश नगरन पुड़ अधिकार दित्तो गाते।’ 18 दुइयोवं मैने एइतां ज़ोवं, ‘हे
मालिक मीं तेरी पंच अश्रेफेइं सेइं पंच होरि कमैई।’ 19 तैनी तैस सेइं भी
ज़ोवं, ‘तीं भी पंच नगरन पुड़ अधिकार दित्तो गाते।’ 20 तैखन एककी मैने
एइतां ज़ोवं, ‘हे मालिक इना रेइ तेरी अश्रेफी मीं एन रुमाले मां बेंधतां रखोरि
थी।’ 21 किजोकि तू सखत मैनूस ते अवं तीं करां डरतो थियो। किजोकि तू
तै चीज़ ज़ै तीं न भोए रखोरि तू तैस भी नेतस ते जैन न भोए बेवरु तू तैन भी
लुनतस। 22 तैनी तैस सेइं ज़ोवं, ‘हे दुष्ट नौकरा अवं तेरी गल्लईं सेइं तींए
मुर्जम बनताइं। ज़द तीं पतो थियो, कि अवं बड़ो सखत मैन्हु आई, ते ज़ै चीज़
मीं नई रखोरि अवं तैस भी सलहतां ते जैन नई बेवरु अवं तैन भी लुनतां। 23
फिरी तीं मेरे रूपैइये केन्ची कां किजो नई रखोरे ताके अवं वापस एइतां तैस
करां सूते समेत उसुल केरेथो?’ 24 तैखन तैनी तैन सेइं ज़ोवं, ‘जैन तैड़ी
खड़खड़े थिये एस करां एन अश्रेफी एन्तां उस देथ जैस कां दश अश्रेफीन।’

25 तैना ज़ोने लगे हे मालिक एस कां पेहली दश अश्रेफीन! 26 तैनी तैन
जुवाब दित्तो, अवं तुसन सेइं ज़ोताई कि, ‘जैस कां परमेशरेरी मर्जी समझनेरी
खुवाइश आए, तैस परमेशर जादे समझ देलो। पन जैस कां परमेशरेरी मर्जी
समझनेरी खुवाइश नई, तैस केरां, थोड़ी ज़ेरि समझ ज़ै तैस कां आए, तै भी
नी गाली।’ 27 पन मेरे इन दुश्मन जैन मीं न थिये सुखाते कि, ए असन पुड़
राज केरे एन इरां आनां ते मेरे सामने एन मैरी छड़ा।” 28 एना गल्लां ज़ोइतां
यीशु अपने चेलन सेइं साथी अग्रोवं जेव कि यरुशलेम नगरे मां गाए। 29
ज़ैखन तैना ज़ैतूनेरे पहाड़े बैतफगे ते बैतनियाह मां पुजे त यीशुए दूई चेले
एन ज़ोइतां अग्रोवं भेजे। 30 “तुस सामने उस ड्लव्हें मां गाथ ते तैड़ी तुसन
अक गधेरो बच्चो बन्धोरो मैलनोए। जैस पुड़ अज़ तगर कोई नई चढ़ोरो तैस
खोलतां इड़ी मीं कां आनां। 31 ते अगर तुसन कोई पुच्छे, कि तुस एस किजो
लोरेथ खोलने त तुस ज़ोइयथ, कि प्रभुए एसेरी ज़रूरत आए।” 32 अग्रोवं
गानेबाले चेलेई तैने कियूं जैन यीशुए जोरु थियूं। 33 ज़ैखन तैना गधेरो बच्चे
खोलने लगोरो थिये त तैसेरो मालिक तैन पुच्छने लगो, “तुस एस बच्चे
किजो लोरेथ खोलने?” 34 तैनेई जुवाब दित्तो, “प्रभुए एसेरी ज़रूरते।” 35

तैनईं तै बच्चो खोलतां यीशु कां आनो, ते यीशुए तैस पुङ अपना लिगड़ां
छेडतां तैस पुङ चेढतां चलो जेव। 36 ज़ैखन तैना चलोरे थिये त लोकेईं
अपना लिगड़ां बत्ती मां बिछां। 37 ज़ैखन तैना यरुशलेम नगरे नेड़ पुजे त
ज़ैट्टुं बत ज़ैतून पहाड़े पुडेरां उन्दी गातीए तैड़ी सारे चेलेईं एना चमत्कार
हेरतां ते खुशी भोइतां परमेशरेरी तारीफ केरने लगे कि, 38 “धने तै राजो जै
परमेशरे नव्वे सेइं इटे! ते स्वर्गे मां महिमा ते अम्बरे मां शान्ति भोए।” 39
तैन मैनन् मां किछ फरीसी लोक भी थिये। तैना यीशु सेइं ज़ोने लगे, “हे गुरु
अपने चेलन ज़ो कि चुप केरन।” 40 यीशुए तैन जुवाब दित्तो, “अवं तुसन
ज़ोताईं, अगर एना लोक चुप केरन त इना घोड़ ज़ोरे सेइं परमेशरेरी तारीफ
केरेले।” 41 यरुशलेम नगरे मां पुज्जतां यीशु यरुशलेम नगररो हाल हेरतां
तैस लेरां छुटी। 42 ते ज़ोने लगो, “अगर तुस सिर्फ इस दिहैडरे बारे मां
ज़ानते भोथे, जै तुसन शैन्तरे पासे नेती! पन ई गल हुना तुश्शे एछळ्हन करां
छपोरीए। 43 तीं तैना दिहाडे हेरने पेनेन ज़ेइस तेरे दुश्मन तेरे चेव्रे पासन
मोरचो बेंधतां ते तीं घेरो देले, ते हर पासेरां तीं पुङ घोड़े पुङ घोड़
बाकी न रालो। किजोकि ज़ेइस परमेशर तुसन बचानेरे लेइ ओरो थियो तुसेईं
न पिशानो।” 45 तैखन तै मन्दरे मां जेव ते तैड़ी तैने बुपारी ते गाक बेझरोवं
कढने शुरु किये। 46 तैनी तैन सेइं ज़ोबं, “पवित्रशास्त्रे मां लिखोरुए ‘मेरु
मन्दर प्रार्थनारू घर भोलू’ पन तुसेईं त डैकू केरो अड्हो बनेइतां रखबोरोए।”
47 ते तै तैस पवित्र दहैडी मन्दरे मां शिक्षा देतो थियो, पन प्रधान याजक ते
शास्त्री लोकेईं यीशु मारनेरी कोशिश मां लग्गोरो थिये। 48 पन तैन एन
केरनेरो मौको न थियो मैलतो, किजोकि सारे लोक यीशुएरी गल्लां शुन्नेरे लेइ
चेव्रे पासन बिश्शोरे रहते थिये।

20 एककी दिहाडे ज़ैखन यीशु मन्दरे मां शिक्षा लोरो थियो देने, ते तैन
खुशखबरी लोरो थियो शुनाने त प्रधान याजक ते शास्त्री ते यहूदी बुजुर्ग
यीशु कां पुजे। 2 ते तैना ज़ोने लगे, “तू एन सैरी गल्लां कसेरे अधिकारे
सेइं केरतस या तीं ए अधिकारे केनि दित्तोरोए?” 3 यीशु तैन जुवाब दित्तो,
“अवं भी तुसन अक गल पुछताई, मीं ज़ोथ। 4 यूहन्नारो बपतिस्मो स्वर्गेरे
तरफां थियो या मैन्हु केरे तरफां थियो?” 5 तैना एप्पू मांमेइं बेस केरने लगे,

“कि अगर अस ज़ोम, ‘स्वर्गेर तरफां थियो,’ त तै पुछेलो कि, ‘फिरी तुसेई याकीन की नई कियेस?’ 6 पन अगर अस ज़ोम कि, ‘मैन्हु केरे तरफां थियो,’ त लोकेई असन घोड़ेई देनिन, किजोकि तैना यूहन्ना नबी मन्ते थिये।” 7 एल्हेरेलेइ तैनेई जुवाब दितो, “कि अस न ज्ञानम कि केसेरी तरफां थियो।” 8 यीशु तैन सेइं ज़ोवं, “त अवं भी तुसन सेइं न ज़ोई कि एना कम्मां कसेरे अधिकारे सेइं केरताई।” 9 फिरी यीशु तैन लोकन अक मिसाल देइतां ज़ोने लगो, “एक्की मैने दाढ़ी बाग लाई ते तै ठेकेदारन ठेके पुड़ देइतां एप्पू खरे चिरे कोस्कोई दूर मुलखे चळो जेव। 10 ज़ेइस दाढ़ पकनेरो मौसम अव त तैनी अपनो हिस्सो नेनेरे लेइ अक नौकर बागी मां भेज़ो। पन तैनेई तै खूब कुटो ते खाली वापस भेज़ो। 11 ते फिरी तैनी अक होरो नौकर भेज़ो, पन तैनेई तैसेरी भी बेइज्जती की, ते तै भी झुस कुट केरतां खाली वापस भेज़ो। 12 फिरी तैनी अक ट्लेइयोवं होरो नौकर भेज़ो, पन तैनेई तैसेरी भी बेइज्जती की ते ज़ख्मी केरतां कढो। 13 तैखन बागारे मालिके ज़ोवं, ‘अवं अपनू ट्लारु मटू भेजताई शैइद तैना तैसेरो लिहाज़ केरेलो।’ 14 पन ज़ैखन ठेकेदारेइं तै लाव त एप्पू मांमेइं मुशोरो केरने लगे, ए मालिके, एज्जा एस्से मारम ताके जेइदात इश्शी भोइ गाए। 15 तैनेई तैन मटू बागी मरां बेइर शैरी छँडू, ते मारु तुस सोचा कि फिरी बागारे मालिके तैन सेइं कुन केरेलो। 16 ते मालिक एइतां तैन मैरी छँडेलो ते बाग होरि केरे हवाले केरेलो।” तैनेई एन शुन्तां ज़ोवं, “परमेश्वर न केरे एरु न भोए।” 17 तैनी तैन केरे पासे तेकतां ज़ोवं, “फिरी इन कुने ज़ैन पवित्रशास्त्रे मां लिखोरुए कि, ‘जै घोड़ मिस्त्रेई रद्दी कियो, तैए घोड़ कूनेरो घोड़ भोलो।’ 18 जै मैन्हु इस घोड़े पुड़ बिछँडेलो तैसेरे टुकड़े-टुकड़े भोइ गाले, ते जैस उन्दो ए घोड़ बिछँडेलो तैस ए पितां छँडेलो।” 19 शास्त्री लोकेई ते प्रधान याजकेई यीशु ट्लानेरी कोशिश की। किजोकि तैना बुझी जोरे थिये, कि तैनी ए मिसाल एन केरे बारे मां शुनेवरी थी, पन तैना लोकन करां डरते थिये। 20 तैना लोक यीशुए ट्लानेरो मौको तोपने लोरे थिये, तैनेई विश्वैसी केरे रूपे मां जासूस भेजे ताके तैसेरी कोई गल ट्लेइ सखन ते फिरी राजेरे अधिकारे मां देइ देन। 21 तैनेई यीशु पुच्छू, “हे गुरु अस ज्ञानतम कि तू सच्चो आस ते सच्चेरी शिक्षा देतस, ते केन्वेरी तरफदारी न केरस बल्के सच्चे सेइं परमेश्वरी बत्तरी शिक्षा देतस। 22 कुन असन महाराजे

जो धड़त देनी जेइजे कि नेई?” २३ यीशुए तैन केरि चलाकी बुझतां तैन जो
 ज़ोवं। २४ “मीं अक दीनार हिराथ ते एस पुढ केसेरी शकल ते केसेरु नंबे?”
 तैनेई ज़ोवं, “महाराजेरी।” २५ यीशु तैन सेइं ज़ोवं, “ज़ैन महाराजेरु तैन
 महाराजे जो देथ, ते ज़ैन परमेशरे ए, तैन परमेशरे जो देथ।” २६ ते तैना
 लोकां केरे सामने तैसेरी कोई गल न ट्लेइ सखे बल्के तैसेरे जुवाबे सेइं तैना
 हैरान भोइतां चुप रेइजे। २७ फिरी सटूकी ज़ैन ज़ोते थिये कि मुवोरे ज़ींते
 न भोन ते फिरी किछ यीशु कां एइतां पुछ्ने लगे। २८ “हे गुरु असन जो
 मूसेरो हुक्मे कि अगर केन्चेरो ढला अपनि कुआन्शारे भोंते संते ओईट्ल मेरि
 गाए त तैसेरो ढला तैस कुआन्शी सेइं ढला बनाए, ताके तै अपने ढलाएरे
 लेइ औलाद पैदा केरे। २९ सत ढला थिये पेइले ढला बनाव ते ओईट्ले मेरि
 जेव। ३० फिरी होरे तैस सेइं ढला बनाव। ३१ फिरी तैल्ला पत्ती ट्लेइयोवं तै
 कुआन्श रख्खी फिरी एन्चरे सेइं सत्तोई ज़नेई ढला बनाव, पन सब बेऔलाद
 मेरि जे। ३२ ते आखकार तै कुआन्श भी मेरि जेई। ३३ ते ज़ींते भोने पुढ तै
 केसेरी कुआन्श भोली? किजोकि तै सत्ते ढलां केरि कुआन्श बनोरी थी।”

३४ यीशुए तैन सेइं ज़ोवं, “इस दुनियारे लोकन मां त ढला बनानेरो दस्तूरे।
 (aiōn g165) ३५ पन ज़ैना लोक एजने बैली दुनियारे काबल भोले, ते ज़ैना
 मुड़दन मरां ज़ींते भोले तैना ढला न बनाले। (aiōn g165) ३६ तैना मरेले भी
 नन्हा एल्हेरेलेइ की तैना स्वर्गदूतां केरे ज़ेरे भोले ते तैन जो ज़ींते भोनेरां ते
 परमेशरेरां मट्ठां ज़ोले। ३७ ते ज़ैडी तगर मुड़दां केरो ज़ींते भोनेरी गल्ले, ज़ेन्चरे
 मूसा नेबेरे ज़लते झाल्लोवेरे बारे मां, तेन्चरे इशारो कियो किजोकि तै परमेशर
 अब्राहमेरो परमेशर, इसहाकेरो परमेशर ते याकूबेरो परमेशर ज़ोइतां फुकारतो
 थियो। ३८ पन परमेशर मुड़दां केरो नई बल्के ज़ींतां केरो परमेशर। किजोकि
 तैसेरे नेडे सब ज़ींतेन।” ३९ शास्त्री लोकन मरां किछेई जुवाब दित्तो, “हे गुरु
 तीं त बड़ु रोड़ु ज़ोवं।” ४० फिरी तैन मरां केन्वी हिम्मत न अई, कि एस होरु
 किछ पुछ्न। ४१ फिरी यीशुए तैन सेइं ज़ोवं, “फिरी मसीह जो दाऊदेऱु मट्ठू
 केन्चरे सेइं ज़ोतन? ४२ किजोकि दाऊद त एप्पू भजना केरे किताबी मां ज़ोते,
 परमेशरे मेरे प्रभु सेइं ज़ोवं, मेरे देइने पासे बिश। ४३ कि जां तगर अवं तेरे
 दुश्मन तेरे पावन हैठ न बिशैली। ४४ दाऊद त तैस जो प्रभु ज़ोते, फिरी तैन
 तैसेरु मट्ठू केन्चरे भोवं?” ४५ जैखन सब लोक शुनी राहोरे थिये त यीशुए

अपने चेलन सेइं ज़ोवं। 46 “शास्त्री लोकन करां हुशार रेइयथ तैना लम्मे-
लम्मे कुरते लांने पसंद केरतन, ते होरु एन चातन कि लोक बज़ारन मां तैन
जो नमस्कार ज़ोन, ते तैना प्रार्थना घरे मां उच्ची कुर्सी तोपतन ते धामन मां
बड़े खास बनू चातन। 47 तैना विधवां कुआन्शां केरां घरां लुटतन ते लोकन
हिरानेरे लेइ बड़ी लम्मी प्रार्थना केरतन। तैन हछछी सज्जा मैलनीए।”

21 यीशु अमीर लोकां केरे पासे तकने लगो, जैना-जैना दान-पेट्टी मां दान
लोरे थिये छँडने। 2 तैनी अक बड़ी गरीब विधवा कुआन्श लाई जैसां दूर्द
पेइसे यानी अक थेलो ज्ञाढो। 3 तैखन यीशुए ज़ोवं, “अवं तुसन सेइं सच्च
ज़ोताईं कि दान-पेट्टी मां दान देने बालन मरां सेब्भन करां जादे इस विधवा
कुआन्शां दान दित्तू। 4 किजोकि तैनेई त अपनि दौलती मरां सिर्फ धगसेरे
पेइसे परमेशरे घरे मां दितोरेन पन इस कुआन्शां अपनि गरीब हालती सेइं
जैन किछ एसारे पल्ले थियूं सब किछ देइ छँडू।” 5 किछ लोक मन्दरे बारे मां
ज़ोने लोरे थिये, कि बड़े माथे घोड़ेई सेइं ते दान कियोरी चीज़न सेइं बनोरुए,
त यीशुए ज़ोवं। 6 “तैना दिहाडे एजने बालेन कि इन चीज़ां जैना तुस इडी
लहने लोरेथ इडी घोड़े पुढ़ घोड़ नई रानो ज़ो बछोड़ो न गालो।” 7 तैनेई यीशुए
पुच्छू, “हे गुरु जी एन गल्लां केइस भोनिन? ते तैन केरो दुनियाई मां एजनेरो
कुन निशान भोनोए।” 8 यीशुए तैन ज़ोवं, “खबरदार टेपलोइयथ नन्ना,
किजोकि काई लोक मेरे नंक्वे सेइं एजनेन ते तैनेई ज़ोनूए कि अवं मसीह
आई, ते मोको भी नेडे पुज़ोरोए तुस तैन पत्ती न गेइयथ। 9 ते ज़ेखन तुस
लड़ेइयरी त उलझानरी अफुवां शुनेले त डेरथ नन्ना, किजोकि एन गल्लां केरु
पेइले भोनू ज़स्तरीए, पन तेइसे खातमों नई भोनो।” 10 तैखन यीशुए ज़ोवं,
“किजोकि कौमी पुढ़ कौम, ते राज्जे पुढ़ राज़ चढ़हाई केरेलू। 11 ठारी-ठारी
बडे-बडे भुंजल एजनेन ते काल पेनोए ते बिमारी फैलनिएं ते बुरी-बुरी गल्लां
भोनिन ते अम्बरे मां आजीब निशान लेइहोनेन। 12 एन सब गल्लां भोने करां
पेइले तुश्शे दुश्मन तुसन सिर्फ मेरे नव्वरे वजाई सेइं ढप्पेले ते तुसन सताले
ते प्रार्थना घरेरी आदालती मां हाज़र केरेले ते कैद केरेले ते गवर्नरन ते कने
राज़न कां पैश केरेले। 13 तैखन तुसन मेरी गवाही देनेरो रोड़ो मौको मैलेलो।
14 पन तुसन कोई ज़स्तरत नई, कि पेइले फिक्र केरने लगथ कि अस कुन
ज़ोमेलो। 15 किजोकि अवं तुसन एरी ज़बान ते अकल देइलो, कि कोई भी

मुखालफ तुश्शे सामने खड़ो न भोइ सकेलो ते न लोक तुश्शे खलाफ किछ
 जोई सकेलो। 16 ते तुश्शे हाज बव ते ढला ते रिशतेदार ते दोस्त तुसन सेइं
 बैर केरेले ते तुसन मरां किछन मारेले भी। 17 ते मेरे नव्वेरे वजाई सेइं सारे
 लोक तुसन सेइं नफरत केरेले। 18 पन तुश्शे दोग्गेरो कोई बाल बांको न
 भोलो। 19 सब किछ झ्लेलां तुस अपनि जान बच्चेइ साखेलो।” 20 “जेइस
 तुस यरुशलेम नगर चेव्रे पासन फौवजेइं सेइं घेरेल लाले, त बुझथ कि एस
 नाश भोनेरे दिहाडे नेडे ओरेन। 21 तैस मौके जैन यहूदिया मां भोले तैना
 पहाडे पुड़ जो नेश्शी गान ते जैना यरुशलेम नगरे मां भोले त तैन बेइरोवं
 निसन ते जैना ड्लोंव्वन मां भोले त तैना नगर मांजो न गान। 22 किजोकि
 एना बदलेरे दिहाडे भोले, एन मां तैन सब किछ जैन पेइलू पवित्रशास्त्रे मां
 लिखोरुए तैन पूर्ख भोनूए। 23 तैन दिहाडन मां जैना दोजींती त दुद्ध पियाती
 कुआन्श भोली, तैन केरे लेइ अफसोस! किजोकि धेरती पुड़ बड़ी मुसीबत
 एजनीए ते एस कौमी पुड़ बड़ी आफत एजनीए। 24 तैना सब तलवारी सेइं
 मारे गाले ते गुलाम बेनतां सेब्बी कौमन मां पुजेले ते गैर कौमां केरो मौको
 पूरो भोने तगर यरुशलेम नगर गैर कौमेईं सेइं पस्त भोंतो रालू। 25 “दिहाडे
 चेंदनरी ते तारन मां निशान बांदे भोनेन ते धेरती पुड़ कौमन बड़ी तकलीफ
 पुजनियें, किजोकि समुन्द्रेरी लैहेरां केरि शौरी सेइं तैना डेरि गानेन। 26 डरे
 मारे एजने बैली मुसीबतरे इंतज़ार केरते-केरते तैन केरे होश उड़ी गानेन,
 किजोकि अम्बरेरी सैरी शेक्कि हिल्लेली। 27 तैखन लोक मैनेरु मटू बेडि शेक्कि
 ते महिमा सेइं बिदलारी मां एंडू लाएले। 28 जैखन एन गल्लां भोनी शुरू
 भोली त सिधे खडे भोइतां उबरु तेकथ, किजोकि तुश्शो छुटकारो भोने
 बालोए।” 29 फिरी यीशुए तैन अक मिसाल देइतां ज़ोवं, “तुस फ़ेगेरे बुट ते
 होरि बुट्टन भी हेरतथ। 30 जेरि तैस गुडी लेगनी शुरू भोइचन? त तुस हेरतां
 बुझतथ कि नेला ओरोए। 31 एसेरो ज़ेरो, जैखन तुस एना गल्लां, जैना मीं
 ज़ोई, भोते हेरेले, त तुस बुझ्ही छङ्गा कि परमेश्वरे राज नेडे ओरुए। 32 अवं
 तुसन सेइं सच्च ज़ोताई, कि ज़ां तगर एन गल्लां पूरी न भोन, एस कौमरो
 खातमों न भोलो। 33 धरती अम्बर टेली गालू पन मेरी गल्लां कथे न टेलेली।
 34 “बस्सा खबरदार भोथ कोस्कोई एरु न भोए कि तुश्शो दिल नशे मां मसत
 भोइतां इस जिन्दगरे फिक्रे सेइं कमजोर भोए, ते तैस दिहाडे तुश्शे लेइ अक

मुसीबत बने। ३५ किजोकि तै इस सैरी धेरती पुङ् ज़ेत्रे लोकन तैन सेब्हन पुङ्
एन्नरे एजनीए। ३६ बस्सा, हर वक्त तियार राथ ते प्रार्थना केरते राथ, ताके
तुस एन गल्लन करां ज़ैना भोने बैलिन बेचतां राथ, ते मैनेरे मटु कां खड़े
भोनेरे काबल भोथ।” ३७ यीशु रोज़ मन्दरे मां शिक्षा देतो थियो, ते राती ज़ैतून
पहाड़े पुङ् रातो थियो। ३८ झ़ोझां सारे लोक यीशुएरी गल्लां शुन्नेरे लेइ मन्दरे
मां तैस कां एइते थिये।

22 अखमीरी तिहारेरी दिहाड़ी ज़ैस जो फ़सह ज़ोतन नेड़े ओरी थी। २
प्रधान याजक ते शास्त्री मौको तोपने लोरे थिये कि यीशु केन्चरे मारम।
किजोकि तैना लोकन करां डरते थिये। ३ ते शैतान यहूदा मां बेस्सी जेव तैस
जो इस्करियोती भी ज़ोते थिये, ते तै यीशुएरे १२ चेलन मां गनो गातो थियो।
४ दे तै प्रधान याजकन ते प्रार्थना घरेरे किछ खास पुच्छने गन्ने लोकन कां जेव
ते तैन सेइं मुशोरो केरने लगो कि केन्चरे सेइं यीशु तैन केरे हवाले केरी बटते।
५ तैना बड़े खुशी भोए ते तैस पेंझे देनेरो वादो कियो। ६ तैनी तैन केरि गल
मन्नी ते मौको तोपने लगो, कि यीशु केन्चरे सेइं तैन केरे हावाले केरे ते
केन्ची पतो न लगो। ७ अखमीरी रोटूरु तिहार नेड़े ओरु थियूं, ज़ैस फ़सह
तिहारे मां गबड़ेरु बलिदान देनू ज़रुरी थियूं। ८ यीशुए पतरस ते यूहन्ना एन
ज़ोइतां भेज़े, “कि गाथ ते इश्शे लेइ फ़सह तिहारेरी रोट्टी तियार केरा।” ९
चेलेई पुच्छू, “कि तू कोड़ि चातस कि अस तींजो फ़सह तिहारेरी रोट्टी तियार
केरम?” १० यीशुए तैन जुवाब दित्तो, “नगर मां गाते तुसन अक मैन्ह मैलनोए
ज़ै पैनेरो घड़ो घिन्तां च़लोरो भोनोए, तैस पत्ती गेइयथ ते ज़ैस घरे मां तै गालो
तुस भी गेइयथ। ११ तैसेरे मालिके सेइं ज़ोइयथ कि गुरे ज़ोरुए कि ट्लाहना
केरि ठार कोड़ि आए, ज़ैड़ी अवं अपने चेलन सेइं साथी फ़सह तिहारेरी रोट्टी
खेइ सेखी? १२ तै तुसन दोपरे नेइतां अक बड़ो कमरो हिरालो ज़ै खूब रोड़ेचारे
सज़ैवरो भोनोए तैड़ी इश्शे लेइ तियारी केरथ।” १३ तैनेई तैड़ी गेइतां सब
किछ तेरह लाव ज़ेरु तैनी ज़ोरु थियूं, ते तैड़ी फ़सह तिहारेरी रोट्टी तियार की।
१४ ज़ैखन रोट्टी खानेरो मौको अव त यीशु अपने प्रेरितन सेइं साथी बिश्शोरे
थिये। १५ ते यीशुए तैन सेइं ज़ोवं, “मेरी ए बड़ी इच्छा थी, कि अपनो दुःख
झ़ल्लने (मरने) करां पेइले एककी बार फ़सह तिहारेरी रोट्टी तुसन सेइं साथी
खेइ। १६ किजोकि अवं तुसन सेइं ज़ोताई, कि अज़ेरां पत्ती तांतगर न किछ

खेड़ सेखी, ज़ां तगर परमेशरेरे राज़ज़ेरु कम पूरू न भोए।” 17 फिरी यीशुए दाढ़ेरे रसेरो कटोरो ट्लातो ते परमेशरेरु शुक्र केरतां चेलन दित्तो ते ज़ोवं, “यांथ ते एप्पू मांमेहं बंटा। 18 किजोकि अवं तुसन सेइं ज़ोताई कि अज़ेरां पत्ती दाढ़ारो ए रस फिरी तांतगर न पीलो ज़ां तगर परमेशरेरु राज़ न एज्जे।” 19 फिरी यीशुए रोट्टी ट्लाती ते परमेशरेरु शुक्र केरतां ट्लोडी ते तैसेरे टुकडे बनेइतां अपने चेलन एन ज़ोइतां दित्ती, “कि ई मेरी जाने ज़ै तुश्शे लेइ अवं देताई ते तुस भी मेरी यादगैरी मां एन्ने केरते रेइयथ।” 20 एन्नरे रोट्टी खानेरे बाद तैनी कटोरो ट्लातो ते चेलन कां दित्तो ते ज़ोवं, “कि ई कटोरो मेरो तैस खूनेरो नंब्वो करारे ज़ै तुश्शे लेइ दित्तोरोए। 21 पन हेरा मीं ट्लुवांने बालो मीं सेइं साथी खाने लोरोए। 22 किजोकि मैनेरु मटू त हुनी च्चलोरोस ज़ेन्नरे कि तैसेरेलेइ पेइले एन पक्कू भोरूए पन तैस मैन्हु पुड़ अफसोस ज़ेसेरे हथेहं तै गिरफ्तार भोए।” 23 एन शुन्तां तैना एप्पू मांमेहं पुच्छेने लगे, “असन मां एरो ज़ेरो कौने ज़ै एन कम केरेलो?” 24 तैन एस गल्ली पुड़ एप्पू मांमेहं बेस भोइ कि असन मां बड़ो कौने? 25 यीशु तैन सेइं ज़ोवं, “गैर कौमन पुड़ तैन केरे राज़े राज़ केरतन, ते ज़ैन केरो तैन पुड़ अधिकारे भोते तैन जो भलाई केरनेबाले ज़ोतन। 26 पन तुसन मां एरु लोडे भोवरु, तुसन मां ज़ै बड़ोए तै निकड़ेरे बराबर बने ते ज़ै खास आए तै सेवकेरे बराबर बने। 27 किजोकि बड़ो कौने? ज़ै तैस कां साथी बिशोरोए या तै ज़ै तैसेरो चेलोए? कुन तै तैस कां नई बिशोरो? पन अवं त तुसन मां अक सेवकेरे बराबर आई। 28 पन तुस तैना आथ ज़ैना मेरी अज़मैइशरे मौके बराबर मीं सेइं साथी रातथ। 29 ज़ेन्नरे बाजी मीं अक राज़ दित्तोरुए अवं भी तुसन अक राज़ देताई। 30 ताके तुस मेरे राज़े मां मीं सेइं साथी बिश्तां खाथ पीथ, बल्के बडे-बडे शाही तखतन पुड़ बिश्तां इसाएलेरे 12 गोत्रां केरो इन्साफ केरेले।” 31 “शमौन, शमौन, खबरदार रा, शैताने परमेशरे करां अज़ाज़त मग्गोरीए कि तुसन सेब्बन परखे, कि रोडे बुरे करां अलग केरे ज़ेन्नरे ज़मीनदार गेहुनं करां झाङ्ग अलग केरते। 32 पन मीं तेरे लेइ प्रार्थना की, कि तू मीं पुड़ विश्वास केरनो न शारस, ज़ैखन तू मन फिरास त अपने विश्वासी ढ्लान मज़बूत केरां।” 33 पतरसे यीशु सेइं ज़ोवं, “हे परमेशर तीं सेइं अवं कैद भोने बल्के मरनेरे लेइ भी तियार आई।” 34 पन यीशुए ज़ोवं, “हे पतरस अवं तीं सेइं ज़ोताई कि अज कुकडे बांग देने

करां पेइले तू मेरो ट्लाई बार इन्कार केरेलो कि अवं एस न ज़ैनी।” 35
 यीशुए तैन सेइं ज़ोवं, “कि ज़ेइस मीं तुस खुशखबरी शुनाने, बगैर बेटवे, बूटां
 ते झोलेरे बगैर भेज़ोरे थिये त तुस केन्ची चीज़ारे घटी भोइ?” तैनेई ज़ोवं,
 “केन्ची चीज़री नई।” 36 यीशु तैन सेइं ज़ोवं, “पन हुनी ज़ैस कां बेटवो
 भोए ते साथी रखे ते एन्हरे झोलो भी ते ज़ैस कां तलवार न भोए तै अपनू
 कोट बेच्तां भी तलवार धिन्ने। 37 अवं तुसन सेइं ज़ोताई कि ई गल्ले ज़ै
 पवित्रशास्त्रे मां लिखोरीए, कि तै पूरी भोए। तै बुरे लोकन सेइं साथी गनो
 जेव! एल्हेरेलेइ मेरे बारे मां लिखोरी गल्लां पूरी भोने लोरिन।” 38 तैनेई ज़ोवं,
 “हे प्रभु हेर इडी दूर्ध तलवारन।” तैनी तैन सेइं ज़ोवं “बेड़ि आन।” 39 फिरी तै
 बेइर निस्सो ते ज़ेन्हरे तैसेरो दस्तूर थियो, तै ज़ैतून पहाड़े पुड़ जो चलो जेव ते
 तैसेरे चेले भी तैस सेइं साथी चले जे। 40 तैस ठैरी पुज़तां तैनी तैन सेइं ज़ोवं,
 “प्रार्थना केरा ताके तुस अज़मैइशी मां न पेथ।” 41 यीशुए तैन करां थोड़े ज़ेरे
 अगर गेइतां ज़ैथू केरे भारे बिश्तां प्रार्थना केरने लगो। 42 “हे बाजी अगर तेरी
 मर्जी भोए त ई दुखेरो कटोरो मीं करां दूर केर, पन फिरी भी मेरी मर्जी पूरी न
 भोए बल्के तेरी मर्जी पूरी भोए।” 43 तैखन तैनी अम्बरेरां अक स्वर्गदूत लाव
 ज़ै तैस शक्ति देतो थियो। 44 ते तै परेशान भोइतां होरि जादे दिले सेइं प्रार्थना
 केरने लगो ते तैसेरो पिसीनो बुझा कि खूनेरे बडे-बडे तेप्पु तल्ले झ़ड़ते थिये।
 45 प्रार्थना केरनेरे बाद यीशु अपने चेलन कां वापस अव ते तैना गम्मेरे मारे
 झुलोरे मैल्ले। 46 यीशुए तैन सेइं ज़ोवं, “तुस किजो झुल्लोरेथ उठा ते प्रार्थना
 केरा ताके अज़मैइशी मां न राथ।” 47 हेजू यीशुए गल ज़ोने लोरो थियो, त
 मैन्हु केरो अक जथो तैड़ी पुजो ते बारहन मरां अक ज़ेसेरु नवं यहूदा थियूं,
 तैन सेइं अग्री-अग्री थियो, ते तै यीशु फुम्मड़ी देने अगर अव। 48 पन यीशुए
 तैस सेइं ज़ोवं, “यहूदा कुन तू एक्की फुम्मड़ी सेइं मीं मैनेरे मट्टे ट्लुवातस?”
 49 ज़ैखन यीशुएरे सैथेई एन सब हेरु त तैनेई ज़ोवं, “हे प्रभु कुन अस तलवार
 चलाम?” 50 ते तैन मरां एक्के महायाजकेरे नौकरे पुड़ तलवारां चलाई ते
 तैसेरो तैनी कन्न उड़ाव। 51 पन यीशुए जुवाब दित्तो, “बस्सा बडु भोइ जेव।”
 ते यीशुए तैसेरो कन्न तैखने हथ लेइतां बझाव। 52 तैखन यीशुए प्रधान
 याजकन ते मन्दरेरे सिपाही ते बुजुर्ग ज़ैन तैस गिरफ्तार केरने ओरे थिये तैन
 जो ज़ोवं, “तुस कुन तलवारां ते डंडे धिन्तां मीं डैकू बुझतां ट्लाने ओरेथ? 53

ज़ेइस अवं तुसन सेइं साथी मन्दरे मां भोतो थियो, त तुसेर्ई मीं सेइं हथ
न लाव, पन ई त तुशो आंधरेरे मौकेरो अधिकारे।” 54 ज़ैखन तैनेर्ई यीशु
ट्लातो तैस तैटुं नेइतां महायाजकेरे घरे नीयो, पतरस भी पत्तपति बल्हे-बल्हे
तैरां जेव। 55 तैनेर्ई अंगने मां अग बालोरी थी ते सब बिश्तां अग तपने लोरे
थिये ते पतरस भी तैन मां थियो। 56 ते अक कुआन्श अग्गी कां बिशोरी
तकने लोरी थी ते पतरसेरां तेकतां ज़ोने लगी, “कि ई मैन्हु भी तैस सेइं साथी
थियो।” 57 पन पतरसे इन्कार केरतां ज़ोवं, “हे कुआन्शो अवं एस न ज़ैनी ए
कौने।” 58 थोड़ी सैइत्रां पत्ती होरे एकके पतरसेरां तेकतां ज़ोवं, “तू भी तैना
केरो साथिस।” पन पतरसे ज़ोवं, “नई अवं नई।” 59 कोई एककी धेटेरे बाद
केन्चे होरे बड़े याकीने सेइं ज़ोवं, “ई मैन्हु पक्को तैस सेइं साथी थियो,
किजोकि ए भी गलीली आए।” 60 पन पतरसे इन्कार केरतां ज़ोवं, “अवं
एस न ज़ैनी तू कुन ज़ोतस?” हेजू पतरसे ए गल ज़ोने लोरो थियो, त कुकड़े
बांग दित्ती। 61 ते प्रभुए फिरतां पतरसेरे पासे तक्कु ते पतरसे परमेशरेरी तै
गल याद आई, ज़ै तैनी पतरसे सेइं ज़ोरी थी, “कि अज़ कुकड़े बांग देने करां
पेइले तू मेरो ट्लाई बार इन्कार केरेलो।” 62 ते पतरस बेदर गेइतां ज़ोरे-ज़ोरे
लेरां देने लगो। 63 ज़ैने मैनेर्ई यीशु अपने कब्जे मां कियोरो थियो, तैना तैसेरी
हासी बनाते थिये ते कने तैस बाते थिये। 64 तैना यीशुएरी एछळ्हन पुड़ पट्टी
बेन्धतां बाते थिये ते पुछळते थिये, “भविष्यिवाणी केर ते ज़ो केनि बाहोरिए?”
65 ते तैनेर्ई एन्चरे होरि भी बेड़ि गल्लां ज़ोई ते तैसेरी तुहीन की। 66 झोझां
बुजुर्ग लोक ते प्रथान याजक ते शास्त्री लोकेर्ई यीशु अपने महासभाई मां
आनो, 67 ते ज़ोने लगे, “अगर तू मसीह आस त ज़ो!” यीशुए तैन सेइं ज़ोवं,
“अगर अवं तुसन ज़ोई भी त तुस मेरू याकीन न केरेले।” 68 ते अगर अवं
तुसन पुछी त तुस जुवाबे न देले। 69 पन अज़ेरां बाद मैनेरू मदू परमेशरेरे
देइने पासे बिशोरू लाएले।” 70 एस गल्ली पुड़ तैना सब ज़ोने लगे, “तू
परमेशरेरू मदू आस?” यीशुए जुवाब दित्तो, “तुस एप्पू मींजो ज़ोतथ कि तू
आस?” 71 तैनेर्ई ज़ोवं, “हुनी असन होरि शाहादतां केरि कुन ज़रूरीए?
किजोकि असेर्ई एसेरी जबान शुनेरूए।”

23 तैखन तैना सब तैटुं उठे ते यीशुए पिलातुसे कां घिन्तां जे। 2 ते तैस जो
एन ज़ोइतां ए इलज़ाम लाने लगे, “कि ए इश्शे लोकन भड़काते ते महाराज़े

जो धड़त देनेरे लेइ ठाकते, ते अपने आपे जो मसीह राजो ज़ोते।” ३ तैखन पिलातुसे यीशुए पुच्छू, “तू यहूदी केरो राजोस?” यीशु तैस जुवाब दित्तो, “तू एप्प ज़ोतस!” ४ पिलातुसे प्रधान याजकन ते लोकन सेइं ज़ोवं, “कि अबं एस मैन्हु मां कोई कसूर न लेई।” ५ पन तैना बड़े घमण्डे सेइं ज़ोने लगे, “ए यहूदियारे इलाके करां गलील इलाके तगर बल्के इडी तगर लोकन अपनि शिक्षाई सेइं भड़काते।” ६ ज़ैखन पिलातुसे एन शुनू त तैनी पुच्छू, “कुन ए मैन्हु भी गलील इलाकेरो आए।” ७ ते ज़ेरो तैस पतो लगो, कि ए हेरोदेसेरे इलाकेरो रानेबालोए, त पिलातुसे तै हेरोदेस कांजो भेजो। किजोकि तैस वक्ते मां तै एप्पू भी यरुशलेम नगरे मां थियो। ८ ज़ैखन हेरोदेसे यीशु लाव त बड़ो खुशी भोव। किजोकि तैस च्चरोक्नी देंती यीशु हेरनेरी इच्छा थी। तैनी तैसेरे बारे मां बेडि गल्लां शुनोरी थी, ते तैस बड़ी उमीद थी, कि यीशुएरो कोई चमत्कार हेरे। ९ तैनी यीशुए बड़ु किछ पुच्छू, पन यीशुए तैस कोई जुवाब न दित्तो। १० पन याजक ते प्रधान याजक ते कने शास्त्री लोक बड़े ज़ोरे शोरे सेइं यीशु पुड़ इलज़ाम लाने लगे। ११ तैखन हेरोदेस भी अपने सैथन सेइं मिलतां यीशुएरी तुहीन की, ते तैसेरी हासी बनाई फिरी तैस अक चमकतो कुरतो लुवेइतां पिलातुसे कां वापस भेजो। १२ पेइले पिलातुस त हेरोदेस दुश्मन थिये, तैस दिहाड़े तैना दोस्त बेनि जे। १३ तैखन पिलातुसे प्रधान याजक ते सरदार ते होरे लोक अकोटु किये। १४ “ते पिलातुसे तैन सेइं ज़ोवं तुसेई ए मैन्हु मीं कां एन ज़ोंतो आनोरोए कि, ए लोकन भड़काते ते मिमी एसेरी पुछ गन की, पन ज़ैस जुर्मेरो दोष तुस एस पुड़ लातथ, अबं एल्हेरो एसमां कोई कसूर न लेई।” १५ ते न हेरोदेस ज़ैनी ए असन कां भेजोरोए तैस भी कोई दोष न मैल्लो, ते असन कां एरु कोई सबूत बराँमद न भोवं, ज़ैस सेइं ए कत्ल कियो गाए। १६ तैल्हेरेलेइ अबं एस कोडेइ बाएतां छैडी देताई।” १७ पिलातुस यहूदी केरे फ़सह तिहारेरे मौके पुड़ अक कैदी हथरां छँडतो थियो। १८ तैना सारे लोक चिन्डां लगे मारने, “कि एस मैन्हु सज्जा देथ ते बरअब्बा इश्शे लेइ हथरां छँड्हा।” १९ बरअब्बा नगर मां गड़बड़ी केरनेरे ते कतलेरे बारे मां पाबंद भोरो थियो। २० पिलातुसे यीशु हथरां छँडनेरे इरादे सेइं लोकन दुबारु पुच्छू। २१ पन तैना लोक मना चिन्डां लगे मारने, “कि तू एस क्रूसे पुड़ चाढ़ एस क्रूस पुड़ चाढ़।” २२ तैखन पिलातुसे तैन ट्लेइयोवं

फेरे फिरी ज़ोवं, “किजो आखर एनी कुन जुर्म कियोरोए? हेरा एसमां एरु
 कोई सबूत बराँमद न भोवं, कि ए मौतरे सज्जारो हकदार भोए, तैलहेरेलेइ
 अवं एस कुटेइतां छैडी देताईं।” 23 पन तैना चिन्डां मैरी-मैरी ज़ोने लगे, ए
 क्रूसे पुड़ चाढ़ेरो लोड़ते, ते तैन केरि चिन्डां मारनेरी उमीद पूरी भोइ। 24
 बस्सा, पिलातुसे ज़ोवं कि तैन केरे मेरज़रे मुताबिक कियूं गाए। 25 ते ज़ै मैन्हु
 हुकुमतरे खलाफ ते खूनेरे जुर्म मां कैद थियो, ते ज़ैस हथरां छँडनेरे लेइ तैनेईं
 दरखुवास कियोरी थी, तै हथरां छँडो पन यीशु तैन केरि मेझीं सेइं सिपाही केरे
 हवाले कियो। 26 ज़ैखन तैना यीशु नेइतां चलोरे थियो, तै तैनेईं शमौन कुरेनी
 ज़ै एककी इलोंवेरां ओरो थियो, ट्लातो ते क्रूस तैस कां छुने जो दित्तू कि तू ईं
 क्रूसे छुइतां यीशु पत्ती च्लाला। 27 ते बड़े लोक तैस पत्ती च्लोरे थिये ते किछ
 कुआन्शां भी थी ज़ैना यीशुएरे लेइ शौग बनैती थी। 28 यीशुए तैन केरे पासे
 मुडतां ज़ोवं, “हे यरुशलेम नगरेरी कुइयाव मेरे लेइ लेरां न देथ, बल्के अपने
 बच्चां केरे लेइ लेरां देथ। 29 किजोकि तैना मुशकिल दिहाड़े एजने बालेन
 ज़ैखन लोक एन ज़ोले कि, ‘धन आन तैना कुआन्शां ज़ैना बेऔलादन ते बच्चे
 न पाले।’” 30 “तैस वक्ते लोक पहाड़न सेइं ज़ोले, ‘असन उन्हे बिछड़ा ते
 उच्ची ठारन जो ज़ोले, कि असन छँपाथ।’ 31 किजोकि ज़ैखन तैनेईं सब्ज़
 बुटे सेइं एन केरू, त शुक्कोरे बुटे सेइं कुन न केरेले?” 32 ते सिपाहीं दूर्ह होरे
 मुर्जम भी यीशु सेइं साथी च्लवरे थिये ताके तैन भी मारन। 33 ज़ैखन तैना
 तैस ठैरी पुज़े ज़ैस जो “खोपड़ी” ज़ोतन त तैड़ी यीशु क्रूसे पुड़ चाढ़े, ते तैना
 दूर्ह मुर्जमन भी एककी यीशुएरे देइने पासे ते होरि बांए पासे क्रूसे पुड़ चाढ़े।
 34 यीशु ज़ोवं, “हे बाजी एन माफ करां एन न ज़ानन् कि एना कुन लोरेम
 केरने।” ते तैनेईं तैसेरे लिंगां केरे लेइ पेरची छेडतां शर्त रख्खू ते एपू मांमेइं
 बंटां। 35 लोक खड़खड़े एन सब किछ हेरने लोरे थिये ते सरदार ज़ोरे-ज़ोरे
 सेइं ज़ोते थिये, “एनी होरे त बचाए ते अगर ए मसीहे ते परमेश्वरे चुनोरे त
 अपने आपे किजो न बचाए।” 36 सिपाही भी तैस कां एइतां तैसेरी हासी
 बनाने लगे (किजोकि तै अपनो आप राजो बनातो थियो), ते घटया दाढ़ारो
 रस पीनेरे लेइ तैस देने लगे। 37 “ते ज़ोते थिये तू अगर यहूदी केरो राजोस त
 अपनो आप बचाए!” 38 ते तैस क्रूसे पुड़ यानी यीशुएरे दोग्गे करां बहा अक
 पखड़ी लिखतां लेवरी थी, ते तैस पुड़ एन लिखेरु थियूं, “ए यहूदी केरो राज

आए।” 39 तैन दूर्वा डैकू जैना मारे जे तैन मरां एकके यीशु जो तुहीन केरतां ज़ोवं, “अगर तू मसीह आस त एप्पू भी बंव ते असन भी बज्जा।” 40 पन होरे दुइयोवं डैके तैस जो डिङ्कतां ज़ोवं, “तीं परमेश्वरो भी डर नई? जै सज्जा तैस मैलने लावरी तीं भी त तैए सज्जा मैलने लोरीए। 41 असन त इन्साफेरे मुताबिक अपने बुरे कम्मां केरि सज्जा मैलने लोरी पन एनी त कोई गलत कम नई कियेरू।” 42 तैखन तैनी ज़ोवं, “हे यीशु जैखन तू अपने राज़जे मां एज्जेलो त मीं भी याद केरां।” 43 यीशुए तैस जो ज़ोवं, “अवं तीं सेइं सच्च ज़ोताईं कि तू अज़े मीं सेइं साथी स्वर्गे मां भोलो।” 44 दीसारे 12 बज़ेई सारे मुलखे मां आंधरू भोवं, त ट्लेइ बज्जन तगर रावं। 45 दिहाड़ो भी कालो भोव ते मन्दरेरो पड़दो बां देंता बुन तगर फेटतां दूर्वा टुकड़े भोइ जे। 46 यीशुए बड़े ज़ोरे सेइं ज़ोवं, “हे बाजी अवं अपनि आत्मा तेरे हथ्ये मां सोंफताईं,” ते एन ज़ोइतां यीशुए प्राण दित्ते। 47 जैखन रोमी सूबेदारे एन सब हेरु त परमेश्वरी तारीफ केरते ज़ोवं, “ए मैन्हु सच्चे धर्मी थियो।” 48 ते सारे लोक जैना तैड़ी थिये ए अनर्थ हेरतां छाती पिटृते च्छले जे। 49 पन यीशुएरे सारे दोस्त ते तैना कुआन्शां जैना गलील इलाके मरां यीशुए पत्पती ओरी थी दूर ज़ेरे खेड़ोइतां, जैन किछ भोइ रावरू थियूं सब किछ हेरी रेवरी थी। 50 अक मैन्हु थियो, ज़ेसेरू नवं यूसुफ थियूं, तै यहूदी केरि आदालतरो अक मुलाज़म भी थियो, ते अक बड़ो नेक ते धर्मी मैन्हु थियो। 51 तै बेड़ी आदालत अफसरां केरे फैसलेरे हके मां न थियो। तै यहूदी केरे नगर अरिमतियाह रानेबालो थियो, ते परमेश्वरे राज़जेरे तलाशी मां थियो। 52 तैनी पिलातुसे कां गेइतां यीशुएरी लाश मगी। 53 ते लाश क्रूसे पुड़ेरां ओसैलतां मलमलेरे कपड़े मां पलेटतां ते एककी कब्री मां रख्खी, जै एककी शफ़ड़ी मां बनेवरी थी, तैस कब्री मां पेइले कोई लाश न थी रखोरि। 54 तै तियेरारी दिहाड़ी थी जै आरामेरी दिहाड़ी शुरू भोने बाली थी। 55 ते तैना दूर्वा कुआन्शां जैना गलील इलाके मरां यीशुए पत्पती ओरी थी, यूसुफे पत्पती जेर्ई ते तैनेर्ई तै कब्र हेरी, कि यीशुएरी लाश एसमां केन्चरे सेइं रखोरीए। 56 तैखन तैना अपने घरे वापस आए, ते खुशबूदार चीजां ते इत्र तियार कियो ते आरामेरे दिहाड़े मूसेरे कानूनेरे मुताबिक आराम कियो।

24 हफतेरी पेइले दिहैड़ी झोड़ां किछु कुआन्शां खुशबूदार चीज़ां नेइतां जई,
ज़ैना तैनेई तियार कियोरी थी ते एन्तां कब्री कां पुज़ी। 2 पन तैनेई तै घोड़
कब्री करां बिछुड़ोरो लाव। 3 ज़ैखन तैना अन्तर जेर्द त तैन यीशुएरी लाश न
मैल्ली। 4 तैखन तैना एन हेरतां परेशान भोइ त दूर्द मैन्हु ज़ैन छित्तां लिगड़ां
लेगोरां थियां, तैन कुआन्शन कां इहतां खेड़ोए। 5 तैना कुआन्शां डेरि जेर्द ते
तैना ज़मीनरे पासे तकने लग्गी। तैन मैनेई तैन जो ज़ोवं, “तुस ज़ींते, मुड़दन
मां किजो लोरिथ तोपने। 6 तै इडी नई बलके ज़ींतो भोरोए तुसन याद नई कि
ज़ेइस तै गलीले मां थियो, त तैनी तुसन ज़ोरु थियूं कि, 7 मैनेरु मटू यानी
अवं पापी लोकां केरे हथथे देनोए ते क्रूसे पुड़ चाढ़नोई ते फिरी ट्लेइ दिहाड़ां
बाद फिरी ज़ींतो भोनोई।” 8 तैखन तैना यीशुएरी गल्लां याद एई। 9 तैखन
तैना कब्री करां चेलि जेर्द, त तैनेई यीशुएरे 11 चेलन ते बाकी होरि चेलन भी
एस गल्लरो पतो दित्तो। 10 ज़ैनेई प्रेरितन सेइं गल्लां की, मरियम मगदलीनी
योअन्ना ते याकूबेरी अम्मा मरियम ते तैस सेइं साथी होरि भी काई कुआन्शां
थी। 11 पन तैन, तैन केरि गल्लां कहानी लग्गी, ते तैनेई तैन केरु याकीन न
कियूं। 12 पन पतरस उठो ते तै कब्रेरे पासे दौवड़तो तैस ठैरी कां जेव, ते तैडी
तैनी लिकतां अन्तर तक्कू ते सिर्फ कफन तैड़ी लाव, ते एस गल्ली पुड़ हैरान
भोइतां तैटुं चलो जेव। 13 फिरी एरु भोवं कि तैन मरां दूर्द चेले तैस दिहैड़ी
एककी ड्लोंव्वेरे पासे चलोरे थिये, तैस ड्लोंव्वेरु नवं इम्माऊस थियूं। तैन
यरूशलेम नगरेरां 11 किलोमीटर दूर थियूं। 14 तैना एपू मांमेइं एस्से बारे मां
गल्लां केरते चलोरे थिये ज़ै बितना बीतोरी थी। 15 ज़ैखन तैना गल्लन मां
मसत थिये, ते एपू मांमेइं गलबात लोरे थिये केरने त यीशु एपू तैन कां
नेडे एइतां तैन सेइं साथी-साथी चलने लगो। 16 पन तैनेई यीशु न पिशानो
किजोकि परमेशरे तैना पिशाने करां रोकोरे थिये। 17 यीशुए तैन जो ज़ोवं,
“तुस लोक एपू मांमेइं कुन गल्लां केरने लोरेथ?” तैना रुकी जे, ते तैन केरु
तुतर उदास लेइहोने लगू। 18 तैखन तै ज़ेसेरु नवं किलयुपास थियूं तैस
सेइं ज़ोने लगो, “यरूशलेम नगरे मां सिर्फ तू अक मैन्हु आस ज़ैस पतो नई
कि, आखरी दिहाड़न मां कुन-कुन भोने लोरुए।” 19 यीशुए ज़ोवं, “कुन
लोरुए भोने?” तैनेई तैस सेइं ज़ोवं, “नासरत नगरेरो यीशु, ज़ै नबी थियो, तै
परमेशरेरे ते मैन्हु केरे सामने कम्मन मां ते शिक्षा देने मां बेड़ि शेक्ति बालो

थियो। 20 तै प्रधान याजकेई ते हाकिमेई केन्चरे सेइं रोमी गवनरि हवाले
 कियो ते तैस जो कतलेरे हुक्म देइतां तै कूस पुड़ चाढ़ो। 21 पन असन त
 उमीद थी कि ए मैनूए, जै इसाएली लोकन रोमेरे राज्जे करां आजाद केरेलो,
 एन गल्लन अज्ञ ट्लेइयोवं दिहाड़ीए। 22 हुन्ना असन मरां किछ कुआन्शां
 अज्ञ झोड़ां कब्री कां जोरी थी, तैन केरे ज़ोने सेइं असां हैगन भोए। 23 जैखन
 तैन लाश न मैल्ली त तैना एन ज़ोंती एई, असेई स्वर्गदूत लाए ते तैनेई ज़ोवं,
 कि यीशु ज़ींतो भोरोए। 24 तैखन किछ इश्शो साथी भी कब्री कां जे, ते जेन्नरे
 कुआन्शोई ज़ोरु थियूं तेरहु लाव पन यीशु न लाव।” 25 यीशु तैन दूर्घ चेलन
 सेइं ज़ोवं, “हे बेअक्त्ल लोकव! तुश्शे लेइ पवित्रशास्त्र मां नेबी केरि ज़ोरी
 गल्लन पुड़ भी विश्वास केरनो केत्रो मुशकले। 26 कुन मसीहेरे लेइ ज़रुरी न
 थियूं कि दुःख झाल्ले ते फिरी अपनि महिमा मां दाखल भोए?” 27 यीशु
 अपने बारे मां तैना सैरी गल्लां समझेइ, जैना पवित्रशास्त्रे मां मूसा करां देते
 सारे नेबई ज़ोरिन। 28 एत्रे मां तैना तैस ड्लव्वें नेड़े पुजे ज़ैड़ी तैनेई गानू थियूं
 तैनेई बुझू कि यीशु अग्रोवं गानूए। 29 पन तैनेई एन ज़ोइतां मजबूर कियो,
 “कि असन कां बिश किजोकि दिहाड़ी डुबोरीए आंथरू भोने बालूए।” बस्सा
 तै बिशनेरे लेइ तैन सेइं साथी अन्तर चळो जेव। 30 जैखन तै तैन सेइं साथी
 रोट्टी खांने बिश्शो त तैनी रोट्टी ट्लाती ते बरकत देइतां ट्लोड़ी ते तैन देने
 लगो। 31 तैखन तैन केरि एछळी खुल्ली ते तैनेई तै पिशानो, पन तै तैन
 करां आलोप भोइ जेव। 32 तैना एप्पू मांमेइं ज़ोने लगे, “जैखन तै बत्तां
 असन सेइं साथी गल्लां लोरो थियो केरने, ते असन पवित्रशास्त्रेरो मतलब
 मसमझातो थियो, त असन केरी उमीद भोरी थी।” 33 तैना तैखने तैद्वां उठे ते
 यरुशलेम नगरे मां आए ज़ैड़ी तैना यारहे चेले ते होरे तैन केरे साथी एक्की
 ठैरी मैल्ले। 34 तैना ज़ोने लोरे थिये, “कि प्रभु सच्चे ज़ींतो भोरोए ते शमैन
 पतरसे लाहोरोए।” 35 तैनेई बत्तरी सैरी गल्लां शुनेई ते फिरी केन्चरे असेई
 यीशु रोट्टी ट्लोड़ते बार पिशानो। 36 तैना गल्लां केरने लोरे थिये त यीशु तैन
 केरे मझाटे खड़ो भोइतां ज़ोने लगो, “तुसन शान्ति मैल्ले।” 37 पन तैना एत्रे
 डेरि जे, कि तैना समझाने लगे कि असां आत्मा लहने लोरेम। 38 यीशुए तैन
 सेइं ज़ोवं, “तुस किजो डर्रेथ ते तुश्शे मने मां शक किजो भोतीए। 39 मेरे हथ
 पाव हेरा अवं तैए आई, मीं हथ लेइतां हेरा, किजोकि आत्माई हड्डी त कने

मास न भोए ज़ेरु तुस मीं मां लातथ।” 40 एन ज़ोनेरे पत्ती तैनी अपने हथ पाव हिराए। 41 पन खुशी सेइं तैन याकीन न भोवं, कि यीशु ज़ीतोए, ते तैना हैरान भोए, यीशुए तैन सेइं ज़ोवं, “तुसन कां खाने जो किछ आए?” 42 तैनेई तैस ट्लाड़ोरी मेछ़लरो अक टुकड़ो दित्तो। 43 तैनी ट्लाती ते तैन केरे सामने खाइ। 44 तैनी तैन सेइं ज़ोवं, “ज़ैखन अवं तुसन सेइं साथी थियो, त मीं तुसन एना गल्लां ज़ोरी थी, कि मूसेरे कानूने मां ते नेबी केरि किताबन मां ते भजना केरि किताबी मां मेरे बारे मां ज़ैन किछ लिखोरुए तैन पूरु भोनू ज़रुरीए।” 45 तैखन तैनी तैन केरि मद्दत की, ताके पवित्रशास्त्रे सेमझी सखन। 46 ते तैन सेइं ज़ोवं, “एन पवित्रशास्त्र मां लिखोरुए कि मसीह दुःख झैल्लेलो ते ट्लेइयोवं दिहाड़े मुड़दन मरां ज़ींतो भोलो। 47 ते तैसेरे नंवे सेइं यरुशलेम नगरें शुरु केरतां सैरी कौमन मां पापन करां मनफिरानेरे मैफारो प्रचार कियो गालो। 48 किजोकि तुस एना सैरी गल्लां केरे गवाहथ। 49 हेरा, अवं एप्पु तुसन पवित्र आत्मा देह्लो, ज़ेसेरो वादो बाजी परमेशरे कियोरोए। पन ज़ां तगर स्वर्गेरां शक्ति न मैल्ले तांतगर इस नगर मां राथ।” 50 फिरी यीशुए तैना नगरेरे बेझर बैतनिय्याह ड्लोंब्वेरे नेड़े ने। ते अपनो हथ खड़ो केरतां तैन बरकत दित्ती। 51 ज़ैखन तै तैन बरकत देने लोरो थियो, त तैन करां अलग भोइ जेव ते परमेशरे तै स्वर्ग जो नीयो। 52 चेलेई तैसेरी आराधना की ते फिरी खुशी सेइं यरुशलेम नगरे जो वापस चले जे। 53 ते तैना हर वक्त मन्दरे मां एइतां परमेशरेरी तारीफ केरते थिये।

यूहन्ना

1 (दुनियारे रङ्गनेरे पेइलो) शुरुआती मां वचन थियूं। तैन वचन परमेशरे सेइं साथी थियूं। तैन वचन परमेशर थियूं। 2 शुरुआती मां परमेशरे सेइं साथी तैन वचने थियूं। 3 सब किछ वचनेरे ज़िरिये बनाव जेव। त जैन किछ बनाव ज़ोवं, तैस मरां कोई भी चीज़ तैसेरे बगेर न बनाई जेई। 4 तैस (वचने) मां ज़िन्दगी थी; ते तै ज़िन्दगी सारे मैनन् लौ देचे। 5 त तै लौ आंधरे मां (हमेशा) चमकचे, त आंधरु लोई कथी कैबू न केरि सके। 6 परमेशरेरी तरफां अक मैन्हु भेजो जेव, ज़ेसेरु नवं यूहन्ना थियूं। 7 तै तैस लोअरे बारे मां ज़ोने ओरो थियो, ताके सब लोक तैसेरे ज़िरिये सेइं (तैस लोई पुड़) विश्वास केरन। 8 तै एप्पू लौ न थियो, पन लोअरे बारे मां लोकन गवाही देने ओरो थियो। 9 सच्ची लौ ज़ै हर एककी मैन्हु (परमेशरेरे बारे मां ज्ञान्नेरी) लौ देचे, तै दुनियाई मां एजनेबाली थी। 10 तैन वचन दुनियाई मां (ओरु) थियूं, त दुनिया तैसेरे ज़िरिये बनाई जेई, पन दुनियारे लोकेई तैन न पिशानू (कि तै कौन आए)। 11 तै अपने लोकन कां अव, पन तैसेरे अपने लोकेई तै कबूल न कियो। 12 पन ज़ेत्रे लोकेई तै कबूल कियो, तैनी तैनन् परमेशरेरे बच्चे भोनेरु हक दितूः यानी सारे लोकन ज़ैना तैसेरे नंचे पुड़ विश्वास केरतन। 13 तैना न हाज-बच्चे सेइं, न मैन्हु केरे मेर्जी सेइं, न तैस मैनेरे मेर्जी सेइं ज़ै बच्चे पैदा केरनेरी इच्छा रखते, बल्के परमेशरेरे मेर्जी सेइं पैदा भोरेन! 14 तैन वचन मैन्हु बेनतां किछ वक्त असन सेइं साथी रावं, ते (इस दुनियाई मां) डेरो कियो। तैनी असन पुड़ बड़ो अनुग्रह कियो ते परमेशरेरे बारे मां सारी सच्चाई हिराई। (ज़ताली तै इड़ी थियो, तैखन) असेई तैसेरी महिमा लाई। (ज़ेन्चरां की) तै अपने बाजी परमेशरे करां अव, त तैसेरी ज़ेरि महिमा कोन्ची मां नई थी। 15 यूहन्ने तैसेरे बारे मां गवाही दिती, ते ज़ोरे सेइं लोकन सेइं ज़ोवं, “ई तै आए, ज़ेसेरे बारे मां मीं ज़ोरु थियूं, कि ज़ै मेरे बाद एज्जी राओरोए, तै मीं करां बड़ो महान आए, किजोकि तै मीं करां पेइलो थियो। 16 तैसेरी भरपूरी सेइं (यानी, तैसेरे सारे अनुग्रह ते सच्चाई सेइं) असन सेब्भन आशिर्वाद पत्ती आशिर्वाद मैल्लू। 17 मूसा नेबेरे ज़िरिये असन कानून मैल्लो, पन यीशु मसीहेरे ज़िरिये असन कां (परमेशरे करां) अनुग्रह ते सच्चाई पुज्जी। 18 परमेशर केन्चे कथी भी नई लावरो, पन तैसेरु अकके मटू (यीशु) ज़ैन बाजी परमेशरेरे कुम्मे मां आए,

तैने असन परमेश्वर हिराव।” 19 यूहन्ने यीशु मसीहेरे बारे मां ई गवाही दित्ती, (एकसां) जैखन यहूदी लोकां केरे लीडरेई यरुशलेम नगरेरां यूहन्ना कां किछ याजक त लेवी भेज़े, त तैनेई तैस पुच्छू, “तू कौन आस?” 20 यूहन्ने तैन सेइं सच ज़ोवं ते किछ भी छ़पानेरी कोशिश न की, त तैनी तैन सेइं ज़ोवं, “अवं मसीह नई!” 21 तैखन तैनेई तैस पुच्छू, “फिरी तू कौन आस? कुन तू एलिय्याह नबी आस?” यूहन्ने तैन् जुवाब दित्तो, “अवं तै नई!” तैनेई फिरी पुच्छू, “कुन तू कोई नबी आस?” तैनी जुवाब दित्तो, “नई!” 22 तैखन तैनेई तैस पुच्छू, “फिरी तू कौन आस? (असन ज़ो) ताके अस तैन् जुवाब देम ज़ैनेई अस भेज़ोरेम। तू अपने बारे मां कुन ज़ोतस?” 23 तैनी जुवाब दित्तो, “ज़ेन्चरे यशायाह नेबे (मेरे बारे मां) ज़ोरूए, तेन्चरे अवं सुनसान ठैरी मां लोकन हक देइतां ज़ोताई कि, ‘तुसन कां प्रभु एजनेबालो आए, तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)” 24 फरीसी लोकां केरे तरफां किछ मैन्हु यूहन्ना कां भेज़ोरे थियो। 25 तैनेई यूहन्ना पुच्छू, “अगर तू न मसीह आस, न एलिय्याह, त न नबी, त फिरी (तीं कुन अधिकार आए) लोकन बपतिस्मो किजो देतस?” 26 यूहन्ने जुवाब दित्तो, “अवं त (लोकन) पैनी सेइं बपतिस्मो देताई, पन तुसन सेइं साथी रानेबालो अक एरो आए, जैस तुस हकीक्ति मां न पिशानथ। 27 ई तै आए, जै मेरे बाद एजनेबालो आए, तै मीं करां महान आए। अवं त तैसेरो गुलाम भोनेरे काबल भी नई कि तैसेरे बूटेरे तसमे खोल्ली।” 28 एना गल्लां, यरदन दरियारे पार बैतनियाह नगरे मां भोइ, ज़ैड़ी यूहन्ना लोकन बपतिस्मो देतो थियो। 29 एग्री दिहाड़े यूहन्ने यीशु अपने पासे एइतो लाव, त तैनी यीशुएरे बारे मां लोकन सेइं ज़ोवं, “तक्का, परमेश्वरे तरफां भेज़ोरू (बलिदानेरु) गबडू, जैन सैरी दुनियारे लोकां केरे पाप नेते! 30 ई तै आए, ज़ेसेरे बारे मां मीं ज़ोरू थियूं कि, ‘अक मैन्हु मेरे बाद एजनेबालो आए, जै मीं करां बड़े महान आए, किजोकि तै मीं करां पेइलो थियो।’ 31 हुन्ना तगर अवं त एप्पू भी तैस पिशानतो न थियो। पन एल्हेरेलेइ अवं (इडी) एजतां लोकन पैनी सेइं बपतिस्मो देताई, ताके तै मैन्हु इसाएलेरे लोकन मां बांदो भोए।” 32 तैखन यूहन्ने लोकां केरे सामने गवाही दित्ती, “मीं पवित्र आत्मा कबूतरेरे शकली मां अम्बरेरां एइतो लाव, ते तै तैस पुड़ बिश्शो। 33 अवं त एप्पू पिशानतो न थियो कि यीशु

हकीकिं मां कौन थियो, पन परमेशरे ज़ैनी अवं लोकन पैनी सेइं बपतिस्मो
 देने भेजो, तैनी मीं सेइं ज़ोवं, ‘ज़ैस पुड तू पवित्र आत्मा एइतो त बिश्तो
 लाएलो, तैए लोकन पवित्र आत्मा सेइं बपतिस्मो देनेबालो आए।’ 34 तै मीं
 लाव, त अवं तुसन गवाही देताई, कि ए मैन्हु परमेशरेरु मटू आए!” 35
 दुझयोवं दिहाडे, फिरी यूहन्ना त तैसेरे चेलन मरां दूई तैडी खडे भोरे थिये, 36
 त यीशु तैलमेइं चलोरो थियो। ज़ैखन यूहन्ने यीशु लाव, त तैनी यीशुएरे बारे
 मां अपने चेलन सेइं ज़ोवं, “तकका, इन परमेशरे तरफां भेजोरु (बलिदानेरु)
 गबडू आए!” 37 ज़ैखन यूहन्नारे दुझये चेलोई एन शुनू, त तैना यीशु पत्ती
 चलो। 38 यीशुए बेदलोइतां तैना एइते लाए ते तैन पुच्छू, “तुस केस लगोरेथ
 तोपने?” तैनेई ज़ोवं, “हे गुरु, तू कोड़ि रातस?” 39 तैनी तैन ज़ोवं, “चला
 तुस एप्प हेरेले।” तैखन तैनेई गेइतां तैसेरे रानेरी ठार हेरी, ते तैस दिहाडे
 तैना तैस साथी राए। तै कोई डलोइङी चेव्रे बजां केरो मौको थियो। 40 तैन
 दूई चेलन मरां, ज़ैना यूहन्नेरी गल्लां शुन्तां यीशु पत्ती चलोरे थिये, अक
 अन्द्रियास थियो, ज़ै शमौन-पतरसेरो ढला थियो। 41 तैनी पेइलू एन कम
 कियूं कि अपने ढला शमौन-पतरस तोपतां तैस सेइं ज़ोवं, “असन मसीह
 मैलोरोए!” 42 तैखन अन्द्रियासे यीशु कां शमौन आनो। यीशुए तैसेरे पासे
 तककू ते ज़ोवं, “तू यूहन्नेरु मटू शमौन आस। पन अज़ज़ेरे बाद तेरु नवं कैफा
 भोलू।” यूनानी भाषाई मां कैफारो मतलब “पतरस” आए। (एसेरो मतलब
 घोड़।) 43 होरसां दुझयोवं दिहाडे यीशुए गलील इलाके मां गानू चाव। तैनी
 फिलिप्पुस लेइतां तैस सेइं ज़ोवं, “मीं सेइं साथी चल (ते मेरो चेलो बन)।”
 (फिलिप्पुस यीशु सेइं साथी चलो।) 44 फिलिप्पुस बैतसैदा नगरे मां रातो
 थियो, ज़ैडी अन्द्रियास त पतरस भी राते थिये। 45 तैल्ला पत्ती फिलिप्पुस
 गेइतां नतनएले सेइं मिलो त ज़ोने लगो, “असन मसीह मैलोरोए, ज़ेसेरे बारे
 मां (बडे पेइले) मूसेरे कानूने मां लिखोरोए त कने नेबेर्ई भी अपनि किताबी
 मां लिखोरोए। तै यूसुफेरु मटू नासरत नगरे बालो यीशु आए, जै नासरत
 नगरेरो आए!” 46 नतनएले तैस सेइं ज़ोवं, “कुन नासरते मरां कोई रोडी
 चीज निस्सी सकतीए?” फिलिप्पुसे ज़ोवं, “एइतां एप्प हेर।” (त नतनएल
 फिलिप्पुसे सेइं साथी चलो।) 47 यीशुए नतनएल अपने पासे एइतो लाव ते
 तैनी तैसेरे बारे मां एन ज़ोवं, “ई असली इसाएली मैन्हु आए, एसमां कोई

पाखंड नई!” 48 नतनएले यीशु पुच्छू, “तू मीं केन्चरे ज्ञानतस?” यीशुए तैस जुवाब दित्तो, “फिलिप्पुस तीं कुजाने करां पेइले ज़ैखन तू फ्रेगेरे बुटे हैठ थियो, मीं तू तैड़ी लावरो थियो।” 49 तैखन नतनएले ज़ोवं, “हे गुरु, (हुन्ना अवं ज्ञानतां कि) तू परमेश्वरे मटू आस! तू इसाएल लोकां केरो राजो आस!” 50 यीशुए तैस जुवाब दित्तो, “कुन तू मीं पुड़ एल्हेरेलेइ विश्वास केरतस कि मीं तीं सेइं एन ज़ोवं, कि मीं तू फ्रेगेरे बुटे हैठ लावरो थियो? तू इस करां भी बेड़ी-बेड़ी गल्लां लाएलो!” 51 फिरी तैल्ला पत्ती यीशुए ज़ोवं, “अवं तुसन सेइं सच्च-सच्च ज़ोताई कि, तुस स्वर्ग खुल्लू त कने परमेश्वरे स्वर्गदूतन उबरे गाते त मैनेरे मटू पुड़, यानी मीं पुड़ उतरते लाएले।”

2 तैल्ला पत्ती, ट्लेइयोवं दिहाडे गलील इलाकेरे काना नगरे मां केन्चेरो इला थियो। यीशुएरी अम्मा भी तैड़ी थी। 2 यीशु ते तैसेरे चेलन भी धाम कियोरी थी। 3 ज़ैखन दाढ़ेरो रस मुक्को, त यीशुएरी अम्मा तैस सेइं लगी ज़ोने, “एन कां दाढ़ेरो रस मुकोरोए।” 4 यीशु लगो ज़ोने, “अम्मा, मीं तीं सेइं कुन कम? हेजू मेरो वक्त नई ओरो।” 5 तैसेरे अम्मा नौकरन सेइं ज़ोवं, “जैन किछ यीशु तुसन सेइं ज़ोए, तैन्ने केरथ।” 6 तैड़ी नेडे घोड़ां केरे शा (बट्टे) घडे रखोरे थिये, जैन मां दूर्दूर्दूर्दैलाई-ट्लाई मन (पानी) लगतू थियूं। यहूदी लोक अपने रुवाज़ेरे मुताबिक (अपने आपे त कने चीज़न) धोनेरे लेइ एन घडे (मां पानी भेरतां) इस्तेमाल केरते थिये। 7 यीशुए नौकरन सेइं ज़ोवं, “घड़न मां पानी भरा।” तैनेई पूरे घडे भरे। 8 तैखन यीशुए तैन सेइं ज़ोवं, “हुन्ना, घडे मरां किछ पानी केढतां धामारे प्रधाने कां (चखनेरे लेइ) देथ। तैनेई तैस कां नेव। 9 ज़ैखन धामारे प्रधाने तैन पानी चख्खू, जैन दाढ़ेरो रस बनोरु थियूं, तै न थियो ज्ञानतो कि एन कोट्टां ओरुए, पन नौकर ज्ञानते थिये, जैनेई तैन केढतां आनेरु थियूं। एल्हेरेलेइ धामारे प्रधाने लाडो कुजाव, ते तैस सेइं ज़ोवं, 10 ‘हर कोई मैन्हु (आम तौरे, धामी मां) पेइलो रोडो दाढ़ारो रस देते, त ज़ैखन लोक पीतां रज्जतन, त बादे मां घट रोडो ज़ेरो दाढ़ेरो रस देते, पन तीं रोडो हेजू पत्रोवं रखोरो थियो।’” 11 गलील इलाकेरे काना नगरे मां यीशुए पेइलो चमत्कार कियो। एन केरतां तैनी अपनि महिमा बांदी की, त तैसेरे चेलेई तैस पुड़ (होरो भी जादे) विश्वास कियो कि तै मसीह आए। 12 तैल्ला पत्ती यीशु त तैरी अम्मा ते तैसेरे ढ्ला ते कने तैसेरे चेले कफरनहूम

नगरे मां जे, ते किछ दिहाडे तैड़ी राए। 13 ज़ेइस यहूदी लोकां केरु फ़सह तिहार नेडे अव, त यीशु यरूशलेम नगरे जो च़लो जेव। 14 त तैड़ी मन्दरेरे अंगने मां तैनी (बलिदानेरे लेइ) दांत, भैड़ां त कबूतर बेचने बाले लाए त कने पेंइसे बदलनेबाले भी अपने मेज़न पुड़ बिश्शोरे लाए। 15 तैखन तैनी रेस्सरो अक कोड़ो बनेइतां, तैनन् सेब्भन त भैड़ां त दांत मन्दरे मरां बेझर कढे, त बुपारी केरे पेंइसे (इरां उरां) शारे, त तैन केरे मेज़ उलटाए। 16 त कबूतर बेचनेबालन सेइं ज़ोवं, “इना इट्टु नेइ गाथा! मेरे बाजी केरे मन्दरे बुपारी लोकां केरु घर न बनाथ!” 17 ज़ैखन तैसेरे चेलई एन शुनू, त तैनन् याद अव कि (परमेश्वरी किताबी मां) लिखोरूए कि (मसीहे परमेश्वरे सेइं ज़ोवं) “तेरे घरेरे लेइ मेरी भक्ति, (हे परमेश्वर) मेरे अन्तर अगारी ज़ेरि ज़लतीए!” 18 तैखन यहूदी लोकां केरे किछ लीडरई तैस सेइं ज़ोने लगो, “तू असन कोई निशान (चमत्कार) हिरा कि मन्दरेरे अंगने मरां लोकन कढनेरे लेइ तीं कां परमेश्वरेरे तरफां अधिकार आए?” 19 यीशुए तैन जुवाब दित्तो, “एस मन्दरे डोला, ते अव ट्लेइ दिहैडन मां एस (दुबारो) बनेइलो।” 20 यहूदी लोकेई यीशु जुवाब दित्तो, “कुन इस मन्दरे बने मां 46 साल लगोरेन, कुन तू एस ट्लेइ दिहैडन मां (दुबारो) बनेइ सकतस?” 21 तैनेई गलत समझू यीशुए ज़ैस मन्दरेरी गल कियोरी थी, तै तैसेरी अपनि जान थी। 22 एल्हेरेलेइ (बादे मां) ज़ैखन यीशु (क्रूसे पुड़ मरो त) मुडदन मरां ज़ींतो भोव, त तैखन तैसेरे चेलन याद अवं कि यीशुए (अपने मौत त कने ज़ींतो भोनेरे बारे मां) असन ई गल ज़ोरी थी। त (एसेरे वजाई सेइं) तैनेई पवित्रशास्त्रे मां लिखोरी गल्लन पुड़ त कने यीशु मसीहेरी ज़ोरी गल्लन पुड़ होरो भी जादे विश्वास कियो। 23 ज़ताली यीशु फ़सह तिहारेरे मौके यरूशलेम नगरे मां थियो, त बडे लोकेई तैसेरे चमत्कार, ज़ैना तैनी किये, लेइतां तैस पुड़ विश्वास कियो। 24 पन किरी भी यीशुए तैन पुड़ अतबार न कियो, किजोकि तै सेब्भी केरो इन्सानी सोच ज़ानतो थियो। 25 तैस ए ज़रूरत न थी कि कोई मैन्हु तैस केन्ची होरि मैनेरे बारे मां ज़ोए, किजोकि तै (पेइले) मैन्हु केरि सोच ज़ानतो थियो।

3 फरीसी लोकन मां अक मैन्हु थियो ज़ेसेरु नवं नीकुदेमुस थियूं। तै यहूदी लोकां केरो अक लीडर थियो। 2 एककी राती तै यीशु कां एइतां ज़ोने लगो, “हे गुरु, अस ज़ानतम कि तू परमेश्वरी तरफां गुरु भोइतां ओरोस; किजोकि

जैना चमत्कार तू हेरातस, होरो कोई न हेरेई सके, ज्ञांतगर परमेश्वर तैस सेइं
 साथी न भोए।” ३ यीशुए जुवाब दित्तो, “अबं तुसन सेइं सच्च-सच्च ज्ञोतां कि
 ज्ञांतगर कोई मैन्हु दुबारो जर्म न घिन्ने, त तै परमेश्वरे राज्ञ न लई सके।” ४
 नीकुदेमुस पुच्छने लगो, “जैखन मैन्हु बुढो भोते, त तै केन्चरे सेइं दुबारो पैदा
 भोइ सकते? कुन तै अम्मारे पेटे मां गेहतां दुबारो ज़ेरमी सकते?” ५ यीशुए
 जुवाब दित्तो, “अबं तुसन सेइं सच्च-सच्च ज्ञोताई कि ज्ञांतगर कोई मैन्हु पैनी
 सेइं ते आत्माई सेइं पैदा न भोए, तै परमेश्वरे राज्ञे मां दाखल न भोइ सके।
 ६ किजोकि हाज-बव अपने बच्चन सिर्फ एस जानेरी ज़िन्दगी देइ सकतन,
 पन सिर्फ (पवित्र) आत्मा लोकन आत्मिक ज़िन्दगी देइ सकते। ७ हैरन न
 भो कि मीं तीं सेइं कुन ज़ोवं कि, ‘तीं दुबारो जर्म घिन्नू ज़रूरीए।’ ८ हवा
 ज़ेरां चलनू चातीए तैरां चलचे, त तू तैसारी आवाज त शुनतस, पन एन न
 ज्ञानस कि तै कोट्ठां इच्चे त कोरां गाचे। तेन्चरे कोई भी न हेरी सके त न
 समझी सके कि केन्चरां पवित्र आत्मा लोकन (नव्वीं) ज़िन्दगी देते।” ९
 तैखन नीकुदेमुसे पुच्छ, “एना गल्लां केन्चरे सेइं भोइ सेकतिन पवित्र आत्मा
 केन्चरां लोकन नव्वीं आत्मिक ज़िन्दगी देते?” १० यीशुए तैस सेइं ज़ोवं,
 “तू इस्साएली लोकां केरो (अक खास) गुरु भोइतां भी कुन इना गल्लां न
 समझस? ११ अबं तीं सेइं सच्च-सच्च ज्ञोताई, जैन अस ज्ञानतम तैन्ने (लोकन)
 ज्ञोतम, त जैन असेई लावरूए तैसेरे बारे मां (लोकन) गवाही देतम, पन फिर
 भी तुस लोक इश्शी गवाही न मन्थ। १२ मीं त तुसन सेइं धेतरी गल्लां केरे
 बारे मां गल की, त तुसेई (मीं पुड़) विश्वास न कियूं, त अगर अबं स्वर्गेरी
 गल्लां ज़ोई त तुस केन्चरे विश्वास केरेले? १३ (स्वर्गेरी गल्लां ज्ञानेरे लेइ
 कधी) कोई मैन्हु स्वर्ग मां नई जोरो, सिर्फ तैए जै स्वर्गरां ओरो, यानी अबं
 मैनेरु मटू जैन स्वर्ग मां आई। १४ जेन्चरे मूसा सुनसाने मां (परमेश्वरे लोकन
 बचानेरे लेइ पितल सेइं बनोरो) सप (खंभे पुड़) उच्चे पुड़ चढ़ाव, तेन्चरे एन
 ज़रूरी आए कि (अवं) मैनेरु मटू भी उच्चे पुड़ चाढ़ू गाए। १५ ताके जै कोई
 तैस पुड़ विश्वास केरे, तैस हमेशारी ज़िन्दगी मैल्ले।” (aiōnios g166) १६
 “किजोकि परमेश्वरे दुनियारे लोकन सेइं एत्रो प्यार कियो कि तैनी अपनू
 अक्के मटू दित्तू, ताके जै कोई तैस पुड़ विश्वास केरे, तै नाश न भोए, बल्के
 हमेशारी ज़िन्दगी हासिल केरे। (aiōnios g166) १७ किजोकि परमेश्वरे अपनू

मट्ठू दुनियाई मां एल्हेरेलेइ नई भेज़ोरु कि तै दुनियारे लोकन (तैन केरे पापां केरि) सज्ञा दे, बल्के एल्हेरेलेइ कि दुनियारे लोक तैसेरे ज़िरिये सेइं (पापां केरि सज्ञाई करां) मुक्ति हासिल केरन। 18 जै तैस पुड़ विश्वास केरते, तैस सज्ञा न मैल्ले। पन जै मट्ठे पुड़ विश्वास न केरे, तै पेइलोए दोषी भोइ जोरोए, किजोकि तैनी परमेश्वरे अकैल्ले मट्ठेरे नंब्वे पुड़ विश्वास नई कियोरो। 19 परमेश्वर लोकन सज्ञा देनेरी वजा ई आए कि ज़ैस जो लौ ज़ोतन तै दुनियाई मां ओरिए, परमेश्वरे अपनि लौ दुनियाई मां भेज़ी, पन लोक ते कने तैन केरां कम्मां बुरां थियां, एल्हेरेलेइ तैनेई तैस लोई करां जादे पापेरु आंधरु पसंद कियूं। 20 जै कोई बुरु कम केरते, तै लोई सेइं नफरत केरते त लोअरे नेड़े न एज्जे, एरु न भोए कि तैसेरे कम्मन पुड़ दोष लाव गाए। 21 पन हर कोई जै परमेश्वरी सच्चाई पुड़ चलते, तै लोई कां एइते, ताके लोई सेइं बांदो भोए कि तैसेरे सब कम्मां परमेश्वरी शक्ति सेइं साथी किये गातन।” 22 एना गल्लां केरे बाद यीशु तैसेरे चेले यहूदिया इलाके मां आए, तै टैड़ी रेइतां लोकन बपतिस्मो देने लगे। 23 यूहन्ना भी शालेम नगरेरे नेड़े ऐनोन नंब्वेरे ठैरी लोकन बपतिस्मो देतो थियो। किजोकि तैड़ी हच्छु पानी थियूं त लोक बपतिस्मो नेनेरे लेइ तैस कां एइते राते थिये। 24 किजोकि यूहन्ना हेजू कैदखाने मां न थियो छ़ुड़ोरो। 25 एक्सां यूहन्नारे चेलां केरि केन्ची यहूदी मैन्हु सेइं (रुवाज़ेरे मुताबिक) शुद्ध भोनेरे बारे मां बेंस भोइ। 26 एल्हेरेलेइ यूहन्नारे चेले तैस कां एइतां ज़ोने लगे, “हे गुरु, (तीं पतो आए) तै मैन्हु जै यरदन दरियारे पार तीं सेइं साथी थियो त कने तीं तैसेरे बारे मां गवाही दित्तोरी थी, हेर, तै भी लोकन बपतिस्मो देते त सब लोक तैस कां गातन!” 27 यूहन्ना जुवाब दित्तो, “(तै रोड़ी गल आए, किजोकि) मैन्हु किछ न हासिल केरि सके, जांतगर तैस स्वर्गेरां (यानी परमेश्वरे करां) न मैल्ले। 28 तुस एप्प मेरे गवाह आथ, कि मीं तुसन सेइं ज़ोरु थियूं कि अवं मसीह नई, पन अवं तैस करां पेइले (परमेश्वरां तरफां) भेज़ोरोई। 29 ज़ेसेरी महरनीए तै महरावे, पन महरावेरो दोस्त जै खड़ोए महरावेरी हर गल खुशी सेइं शुनतो रहते; हुनी मेरी ई खुशी पूरी भोइ। (कि सब लोक तैस कां गातन)। 30 एन ज़रुरीए कि तै बधै ते अवं घैटी।” 31 “(मसीह) जै स्वर्गेरां एइते तै होरि सेब्भन करां महान भोते। त जै मैन्हु धेरती पुड़ेरां भोते, तै धेरतारी गल्लां केरते। जै

स्वर्गों एइते तै सेब्भना उच्चो महान भोते। 32 तैनी (परमेश्वरे तरफां) जैन
किछ लाव ते शुनेऱ, तैसेरे बारे मां लोकन शुनाते, पन तैसेरी गवाही कोई न
शुने। 33 जै कोई तैसेरी गवाही पुढ विश्वास केरते, तै तैसेरी तसदीक केरते
कि परमेश्वर सळळो आए। 34 किजोकि (मसीह) जै परमेश्वरे भेजोरोए, तै
परमेश्वरी गल्लां ज़ोते, किजोकि परमेश्वर तैस पवित्र आत्मा नैपतां न दे।
35 (परमेश्वर) बाजी मट्ठे सेइं प्यार रखते, तै तैनी सब किछ तैसेरे हावाले
कियोरुए। 36 जै (परमेश्वरे) मट्ठे पुढ विश्वास केरते तैस हमेशारी ज़िन्दगी
मैलचे, पन जै मट्ठे पुढ विश्वास न केरे तै ज़िन्दगी करां दूर रालो, ते तैस पुढ
परमेश्वरो क्रोध (हुन्ना करां लेइतां हमेशा) राते।” (aiōnios g166)

4 फिरी जैखन प्रभु पतो लगो कि फरीसी लोकेई शुनोरूए, यीशु, यूहन्ना
करां जादे चेले बनाते ते बपतिस्मो देतो। 2 (हालांकी सच एन थियूं यीशु एप्पू
नई बल्के तैसेरे चेले बपतिस्मो देते थिये), 3 तैखन तैना यहूदिया इलाके
शैरतां गलील इलाके जो चले जे। 4 ते तैसेरु सामरिया इलाके मांमेइं भोइतां
गानू ज़रुरी थियूं। 5 एल्हेरेलेइ तै सामरिया इलाकेरे सूखार नगर मां अव, तै
ठार तैस ज़मीनरे नेडे थी जै याकूबे अपने मट्ठे यूसुफे दित्तोरी थी। 6 याकूबे
जैन खुह बनोरु थियूं तैन तैडी थियूं, ते यीशु सफर केरतां थकोरो थियो,
ते तैस खुहे पुढ विश्वो। तैखन दुपाहरां केरो मौको थियो। 7 एत्रे मां अक
सामरी कुआन्श तैडी पानी भरने आई। यीशुए तैस जो ज़ोवं, “मीं पानी
पीया।” 8 किजोकि तैसेरे चेले रोट्टी आन्नेरे लेइ नगर मां जोरे थिये। 9 तैस
सैमरी कुआन्शां तैस जो ज़ोवं, “तू यहूदिस ते अवं त सामरी, तू मीं पानी
पीयानेरे लेइ किजो ज़ोतस?” किजोकि यहूदी सैमरन सेइं मिलनू जुलनु न
थिये सुखाते। 10 यीशुए तैस जुवाब दित्तो, “अगर तू ज़ानेथी कि परमेश्वर तीं
कुन देनू चाते, त एन भी ज़ानेथी कि, तीं करां कौन पानी मगने लोरोए, त तू
तैस करां मगेथी, ते तै तीं ज़िन्दगरु पानी देथो।” 11 तैस कुआन्शां ज़ोवं,
“हे प्रभु, तीं कां पानी भरनेरे लेइ कोई भांड नई, ते खुह बङ्गु डुघू आए, ते
तीं ज़िन्दगरु पानी कोट्टां मैल्लू? 12 कुन तू इश्शे पूर्वज याकूबे करां भी
बहुोस, जैनी एन खुह असन दित्तेरुए, ते तैनी एप्पू भी ते तैसेरी औलादां ते
तैसेरे गोरु गब्बेइं भी एस्से मरां पिव?” 13 यीशुए तैस जुवाब दित्तो, “जै
कोई एस खुहे मरां पियेलो तैस फिर भी ट्रिलिश रानीए। 14 पन जै कोई

तैन पानी पीते ज़ैन अवं देताई तै हमेशारे लेह ट्लिशोरो न रालो, बल्के ज़ैन
 पानी अवं तैस देलो तैन तैस मां अक नाग बनेलो ज़ै पानी देतो रालो, ज़ैस
 सेइं तैस हमेशारी ज़िन्दगी मैलेली।” (aiōn g165, aiōnios g166) 15 तैस
 कुआन्शां यीशु जो ज़ोवं, “हे प्रभु, मीं भी तैन पानी दे ताके मीं ट्लिश न लगे
 ते मीं बार-बार पानी भरने इस खुहे पुड़ न एजनू पे।” 16 यीशुए तैस जो
 ज़ोवं, “गा, अपनो मुन्श कुजा।” 17 तैसां कुआन्शां जुवाब दित्तो, “मेरो कोई
 मुन्श नई।” यीशुए तैस जो ज़ोवं, “तीं सच ज़ोवं, ‘कि मेरो कोई मुन्श नई।’
 18 किजोकि तीं पंच मुन्श बनोरेन ते ज़ैस सेइं साथी तू हुन्ना आस, तै तेरो
 मुन्श नई, तीं ज़ैन किछ ज़ोवं तैन सच्चे ज़ोरूए।” 19 तैस कुआन्शा ज़ोवं,
 “हे प्रभु, मीं लगते तू कोई नबी आस। 20 इश्शो दादे-पड़दादई इस पहाड़े
 पुड़ आराधना की, पन तुस यहूदी लोक ज़ोतथ कि ज़ैड़ी आराधना कियोरी
 लोड़चे, तै ठार सिर्फ यरूशलेम आए।” 21 यीशुए तैस कुआन्शी जो ज़ोवं, “हे
 कुआन्श, मेरी गल्लरो विश्वास केर, कि तै मौको भी एज्जी राहोरोए, कि तुस
 लोक बाजी केरि आराधना न त इस पहाड़े पुड़ केरेले ते न यरूशलेमे मां
 केरेले। 22 तुस सामरी लोक ज़ेसेरी आराधना केरतथ तैस न ज़ानथ, पन
 अस यहूदी लोक ज़ेसेरी आराधना केरतम तैस ज़ानतम, किजोकि मुक्ति
 यहूदन मरां आए। 23 पन तै मौको एज्जी राहोरोए बल्के ओरोए, ज़ैखन सच्चे
 भक्त बाजेरी आराधना आत्मा ते सचैई सेइं केरेले, किजोकि बाजी एरे ज़ेरे
 सच्चे भक्त तोपते। 24 परमेशर आत्मा आए, एल्हेलेह तैसेरे भक्त तैसेरी
 आराधना आत्मा ते सच्चैई सेइं केरन।” 25 कुआन्शां तैस सेइं ज़ोवं, “अवं
 ज़ानती कि मसीह, ज़ैस जो ख्रिस्त ज़ोतन एजनेबालोए, ज़ैखन तै एज्जेलो
 तैस बक्त किछ समझालो।” 26 तैखन यीशुए ज़ोवं, “अवं ज़ै तीं सेइं गल्लां
 लगोरोइं केरने तैए मसीह आई।” 27 एत्रे मां तैसेरे चेले आए ते तैनेई तै
 एककी कुआन्शी सेइं गल्लां केरतो लेइतां हैरान राए, पन केन्चे तैस एन न
 पुच्छू, “तू कुन चातस?” या “एस कुआन्शी सेइं किजो गल्लां लगोरोस
 केरने?” 28 तै कुआन्श पैनेरो घड़ो तैड़ी छेडतां वापस नगर मां जेर्ई ते मैन्
 सेइं ज़ोने लगी। 29 “एज्जा, एककी मैन्हु सेइं मिला तैनी मीं सेइं सब किछ
 ज़ोवं ज़ैन मीं अज़ तगर कियेरु थियुं, कुन ए तै मसीह त नई?” 30 तैना मैन्हु
 नगर मरां निस्तां यीशु हेरनेरे लेह तैसेरे पासे चलने लगे। 31 यीशुएरे चेले तैस

कां मिनत केरने लगो, “हे गुरु, रोट्टी खा।” 32 पन यीशुए तैन सेइं ज़ोवं, “मीं कां खानेरे लेइ अक एरी रोट्टी आए, पन तुसन तैसेरे बारे मां कोई पतो नई।” 33 तैखन चेले एप्पू मांमेइं ज़ोने लगे, “कुन केन्चे पेइलू एसेरे लेइ किछ खाने जो आनोरुए?” 34 यीशुए तैन सेइं ज़ोवं, “मेरी रोट्टी ईए कि, परमेश्वरी मर्जी पूरी केरि जैनी अवं भेजोरोई ते तैन कम पूरु केरि जैन तैनी दित्तोरुए। 35 कुन तुस न ज़ोथ कि, फसल पकने हेजू चेव्रे महीन्न बाकिन? अवं तुसन जो ज़ोताई कि, अपनि एछळी घाड़ा! ते एजनेबाले मैनन् हेरा, जैना पककोरे ऊडारां केरि फसलारे ज़ेरे आन। 36 फसल कटने बालन कम केरतां मज़दूरी मैल्ली राओरीए, यानी तैना लोकन अकोटु केरि राओरेन जैना लोकन हमेशारी ज़िन्दगी हासिल केरेले, ताके ज़ै बेते ते कटते साथी खुशी मनान।

(aiōnios g166) 37 एल्हेरेलेइ अक कहावते कि बेनेबालो कोईए ते कटने बालो होरो कोईए, तैन सच्चे। 38 मीं तुस भेजे कि गाथ तैस फसली कट्टा ज़ै तुसेई नई बेवरी, होरेई मेहनती सेइं कम कियूं ते तुसन तैन केरि मेहनतरो फल मैल्लो।” 39 नगरेरे बड़े लोकेई तैस सैमरी कुआन्शरी गल शुन्तां यीशु पुड़ विश्वास कियो, किजोकि तैसां तैन लोकन सेइं ज़ोवं कि तैनी मीं सेइं सब किछ ज़ोवं, जैन मीं कियेरु थियूं। 40 जैस नगरेरे सामरी लोक यीशु कां ओरे थिये, मिनत केरतां ज़ोने लगे, असन कां बिश फिरी तै दूर्ध दिहाड़े तैड़ी राव। 41 होरे भी बड़े लोक थिये जैनेई तैसेरी गल्लां शुन्तां तैस पुड़ विश्वास कियो। 42 तैनेई तैस कुआन्शरी जो ज़ोवं, “असेई तेरी गल्लां शुन्तां विश्वास नई कियोरो, बल्के असेई अपने कन्नेई शुनेरुए ते असेई एन हुनी बुझू कि ए मैन्हु सच्चे दुनियाई मुक्ति देनेबालोए।” 43 दूर्ध दिहैड़ना बाद यीशु फिरी गलीलेरे पासे चलो जेव। 44 ते यीशुए एप्पू ज़ोरु थियूं कि कोई नबी अपने मुलखे मां इज्जतरे काबल न समझो गाए। 45 जैखन तै गलीले मां अव त गलीली लोक तैस सेइं खुशी सेइं मिले, एल्हेरेलेइ कि तैनेई तैन सब किछ जैन तैनी फसहरे मौके यरुशलेम नगरे मां कियेरु थियूं, तैनेई अपनि एछळेई सेइं लावरु थियूं तैखन तैना एप्पू भी तैड़ी थिये। 46 दुइयोवं बार जैखन तै गलील इलाकेरे काना इलव्वें मां ओरो थियो जैड़ी तैनी पानी दाढ़ारो रस बनोरो थियूं। तैड़ी अक बड़ो बड़ो राजेरो अफसर थियो तैसेरु मटू कफरनहूम नगर मां बिमार भोरु थियूं। 47 जैखन तैनी अफसरे शुनू कि यीशु यहूदिया

इलाकेरां गलील इलाके मां ओरोए त तै यीशु कां पुङ्जो ते मिनत केरतां ज्ञोने
लगो मेरु मटू मरने बालूए तू चल ते तैस बज्झा, किजोकि तैन मरने बालू
थियुं। 48 यीशुए तैस सेइं ज्ञोवं, “ज्ञांतगर तुस लोक निशान ते चमत्कार न
लाएले कधे विश्वास न केरेले कि, अवं मसीह आई।” 49 तैनी बड्डे अफसरे
ज्ञोवं, “प्रभु लूश केर एरु न भोए कि मेरु मटू मेरि गाए।” 50 यीशुए जुवाब
दित्तो, “च्चल तेरु मटू ज़ींतू भोनूए।” तैनी तैसेरी गल्लरो विश्वास कियो ते तैटुं
च्चलो जेव। 51 तै हेजू बत्तां थियो त तैसेरे नौकर तैस मैल्ले ते ज्ञोने लगो, “तेरु
मटू ज़ींतूए।” 52 तैखन तै पुच्छने लगो, “मेरु मटू कैखन ज़ेरे बेज्झोने लग्गोरु
थियुं?” ते तैनेई ज्ञोवं “तैसेरो भुखार हीज दीसां एक्की बजे उतरी जोरो
थियो।” 53 तैखन तैसेरे बाजी याद अवं कि, तैए मौको थियो, जैखन यीशुए
ज्ञोरु थियुं, “गा तेरु मटू ज़ींतूए” तैखन तैनी भी ते तैसेरे पूरे टब्बरे यीशु पुड
विश्वास कियो। 54 ई दुइयोवं चमत्काररो निशान थियो जै यीशुए यहूदिया
इलाकेरां वापस एजनेरां बाद गलील इलाके मां कियोरो थियो।

5 एन गल्लन पत्ती यहूदी केरु अक तिहार भोवं, ते यीशु यरुशलेम नगरे जो
जेव। 2 यरुशलेम नगरे मां भैड्हां केरे दारे कां अक हावदे, जैस जो इब्रानी
भाषाई मां बैतहसदा ज्ञोतन, तैसेरां पंच अंगना थियां। 3 एन मां बडे बिमार,
काने, टोंटे, नीपाते (पानी हीलनेरे इंतज़ारे मां) भोते थियो। 4 (किजोकि वक्ते
पुड़ परमेशरेरो स्वर्गदूत हावदे पुड़ एइतां पानी हिलातो थियो, ते पानी हिलनेरां
पत्ती जै कोई पेइलो हवदे मां गातो थियो तै ठीक भोतो थियो, चाए तैसेरी
कोई भी बिमारी किना भोए)। 5 तैड़ी अक मैन्हु थू, जै 38 सालां केरो बिमार
थू। 6 यीशुए तै तैड़ी बिशोरो लाव ते एन जेनतां कि ए बड़ो चरोकनो इस
हालती माए, ते तैस पुच्छ, “कुन तू ठीक भोनू चातस?” 7 तैने बिमारे जुवाब
दित्तो, “हे प्रभु, मीं कां कोई मैन्हु नई, कि ज़ताली पानी हिलावं गाए त मीं
कोई हावदे मां गाने लेइ मेरी मद्दत केरे, मेरे पुज़ते-पुज़ते तांतगर होरो कोई
गातो।” 8 यीशुए तैस सेइं ज्ञोवं, “उठ अपनि खट सल्ल ते च्चल फिर।” 9
तै मैन्हु तैखने ठीक भोव, ते अपनि खट छुइतां च्चलने फिरने लगो। 10 तै
आरामेरी दिहाड़ी थी एल्हेरेलोइ यहूदी लीडर तैस सेइं जै ठीक भोरो थियो,
ज्ञोने लगो, “अज त आरामेरी दिहाड़ी आए, तीं खट छूनी जेइज नई।” 11
तैने तैन जुवाब दित्तो, “जैने अव ठीक कियो, तैने मीं सेइं ज्ञोवं, ‘अपनि खट

छू ते चल फिर।” 12 तैनेई तैस पुच्छ, “तै कौन मैनूए ज़ैने तीं सेइं ज़ोवं,
 ‘खट छुइतां चल फिर?’” 13 ज़ै ठीक भोरो थियो तै न थियो ज़ानतो कि तै
 कौन आए, किजोकि तैस ठैरी भीड़ भोनेरे वजाई सेइं यीशु तैस ठैरारां होरि
 पासे चुपचारे चलो जोरो थियो। 14 एन गल्लन पत्ती यीशु तै मन्दरेरे अंगने मां
 मैल्लो, यीशुए तैस सेइं ज़ोवं, “तक, तू ठीक भोरोस, फिरी पाप न करां, एरु
 न भोए कि, एस करां बड़ी आफत एज्जे।” 15 तैने मैने यहूदी लीडरन सेइं
 ज़ोवं, कि ज़ैने अवं ठीक कियोरोई तै यीशुए। 16 एल्हेरेलेइ यहूदी लीडर यीशु
 सताने लाए, किजोकि तै एरां ज़ेरां कम्मां आरामेरे दिहाड़े केरतो थियो। 17
 एस पुड़ यीशुए तैन सेइं ज़ोवं, “मेरो बाजी यानी परमेश्वर हमेशा कम केरते,
 मीं भी कम कियोरू लोडे।” 18 एस वजाई सेइं यहूदी लीडर मनां जादे तैस
 मारनेरी कोशिश केरने लाए, किजोकि तै न सिर्फ आरामेरे दिहाड़ेरो हुक्म
 न थियो ट्लोतो बल्के परमेश्वरे अपनो बाजी ज़ोतो थियो ते अपनो आप
 परमेश्वरेरे बराबर बनातो थियो। 19 यीशुए तैन सेइं ज़ोवं, “अवं तुसन सेइं
 सच-सच ज़ोताई, मटू यानी अवं एप्पू किछ न केरि बेटि, सिर्फ तैन ज़ैन बाजी
 परमेश्वरे करां केरतू लाताई, किजोकि ज़ैना-ज़ैना कम्मां बाजी करां केरतो
 लाते तैन मटू भी तैस्से तरीके सेइं केरते। 20 किजोकि बाजी, मटै सेइं प्यार
 केरते, ते ज़ैना-ज़ैना कम्मां तै एप्पू केरते, तैना सब मटै भी हिराते, ते तैन एस
 करां भी बड़ुं कम्मां हिरालू, ताके तुस हैरान भोथ। 21 किजोकि ज़ेन्चरे बाजी
 मुड़दन ज़ींतो केरते, तेन्चरे मटू भी ज़ैस चाते तैस ज़ींतो केरते। 22 बाजी
 केन्चरी इन्साफ न केरे, पन तैने इन्साफ केरनेऱ सारु कम मटै दित्तेरुए। 23
 कि सब लोक ज़ेन्चरे बाजेरी आदर केरतन तेन्चरे मटैरी भी आदर केरन, ज़ै
 मटैरी आदर न केरे, तै बाजी केरि ज़ैने तैन भेजोरुए तैसेरी आदर न केरे। 24
 अवं तुसन सेइं सच ज़ोताई ज़ै मेरु वचन शुन्तां मेरे भेजने बाले पुड़ विश्वास
 केरते, हमेशारी ज़िन्दगी तैसेरीए, ते तैस पुड़ सज़ारो हुक्म न भोए, बल्के तै
 मौतरां पार भोइतां हमेशारे ज़िन्दगी मां दाखल भोते।” (aiōnios g166) 25

“अवं तुसन सेइं सच-सच ज़ोताई, कि तै वक्त एजनेबालोए, बल्के हुन्नाए
 ज़ैस मां मुड़दे परमेश्वरेरे मटैरी यानी मेरी आवाज शुनेले, ते ज़ैना शुनेले तैना
 हमेशा ज़ीएले। 26 किजोकि ज़ेन्चरे बाजी अपने आपे मां ज़िन्दगी रखते
 तेन्चरे तैने मटै भी ए अधिकार दित्तोरोए, कि अपने आपे मां ज़िन्दगी रखे

एल्हेरेलेइ तैन मैनेरु मट्टूए। 27 बल्के बाजी परमेश्वरे तैस सैरी लोकां केरि
 आदालत केरनेरो भी अधिकार दित्तोरोए, एल्हेरेलेइ कि तैन यानी अवं मैनेरु
 मट्टू आई। 28 एसमां हैरान न भोथ, किजोकि तै वक्त एइते कि ज़ेत्रे कब्रन मां
 आन तैसेरी आवाज़ शुन्तां झ़ींते भोनेन। 29 ज़ैनेई भलाई कियोरीए हमेशारे
 ज़िन्दगी लेइ झ़ींते भोनेन ज़ैनेई बुरी ज़िन्दगी ज़ीयोरीए तैना सज़ारी लेइ झ़ींते
 भोनेन।” 30 “अवं अपने आपे सेइं किछ न केरि बेटि, ज़ेन्नरे मेरो बाजी मीं
 ज़ोते तेन्नरे अवं लोकां केरि आदालत केरताई, ते मेरी आदालत सच्चीए,
 किजोकि अवं अपने मेझीं सेइं नई पन अपने भेज्ने बालेरी मझीं सेइं चाताई।
 31 अगर अवं अपनि गवाही एप्पू देई, त मेरी गवाही सच्ची नई। 32 अक होरो
 आए, यानी मेरो बाजी ज़ै मेरी गवाही देते, ते अवं ज़ानताई ज़ै गवाही तै मेरे
 बारे मां देते तै सच्चीए। 33 तुसेई मैन्ह यूहन्ना कां मेरे बारे मां पुछ्ने भेजे, ते
 तैनी सच्चेरी गवाही दित्तोरीए। 34 पन अवं अपने लेइ मैनेरी गवाही न चैई,
 पन यूहन्ना ज़ै गवाही दित्ती तैसेरे बारे मां एल्हेरेलेइ ज़ोवं ताके तुसन
 मुक्ति मैल्ले। 35 तै त बलतो ते चमकतो दीयेरो ज़ेरो थियो, पन तुसन थोड़े
 चिरेरे लेइ तैसेरी लोई मां खुश भोनू रोट्टू लग्गू। 36 पन मीं कां ज़ै गवाहीए तै
 यूहन्नारी गवाही करां भी बढ़ीए। किजोकि ज़ैन कम बाजे मीं केरनेरे लेइ
 दित्तेरु मतलब इन्ने कम्मां ज़ैना अवं केरताई, तैना मेरी गवाही देतन कि बाजे
 अवं भेजोरोई। 37 ते बाजी ज़ैने अवं भेजोरोई तैने मेरी गवाही दित्तोरीए, तुसेई
 न कधी तैसेरी आवाज़ शुनोरी, ते न तै आमने सामने लोरोए। 38 तुसेई तैसेरी
 शिक्षा अपने मने मां नई रख्खोरी, किजोकि तुसेई मीं पुड़ विश्वास न कियो,
 कि अवं परमेश्वरे भेजोरोई। 39 तुस पवित्रशास्त्रे मां एन पढ़तथ, किजोकि
 तुस सोचतथ कि हमेशारी ज़िन्दगी तैस मां मैलतीए, तै ईए, ज़ै मेरे बारे मां
 गवाही देते। (aiōnios g166) 40 फिरी भी तुस हमेशारे ज़िन्दगी हासिल केरनेरे
 लेइ मीं कां न एजनू चाथ। 41 अवं मैनन् करां तारीफ़ न चैई। 42 पन अवं
 तुसन ज़ानताई तुश्शे दिले मां परमेश्वरे लेइ प्यार नई। 43 अवं अपने बाजेरे
 अधिकारे सेइं ओरोई, ते तुस मेरी गल न मन्नथ। अगर होरो कोई अपने
 अधिकारे सेइं एज्जे, त तैसेरी गल मन्नले। 44 तुस मीं पुड़ विश्वास न केरि
 बटथ, किजोकि तुस एक्की होरि करां तारीफ़ चातथ, ते तुस तै तारीफ़ न
 चाथ जै सिर्फ़ परमेश्वरे तरफांए। 45 इन न समझा कि अवं बाजेरे सामने

तुसन पुड़ दोष लेइएलो, तुसन पुड़ दोष लानेबालोए त मूसोए, जैस पुड़ तुसेई
भरोसो रख्खोरोए। 46 किजोकि अगर तुसेई मूसेरो विश्वास कियोरो भोथो, त
मेरो भी विश्वास केरेथे, किजोकि तैने मेरे बारे मां लिखोरुए। 47 तुस त तैसेरे
कानूनेरे गल्लन पुड़ विश्वास न केरथ, ते फिरी तुस किजो मेरी गल्लन पुड़
विश्वास केरेले?”

6 एन गल्लन पत्ती यीशु गलीलेरे समुन्दरेरे मतलब तिबिरियुसेरे समुन्दरेरे
पार जेव। 2 ते अक बड़ी भीड़ तैस पत्ती चली, किजोकि जैना चमत्कार तै
बिमारन पुड़ हीरतो थियो, ते तैना ठीक भोते थिए ते लोक एन हेरते थिए। 3
तैखना यीशु पहाड़े पुड़ चेढ़तां अपने चेलन साथी तैड़ी बिश्शो। 4 ते यहूदी केरे
फ्रसहेरु तिहार नेड़ थियूं। 5 जैखन यीशुए अक बड़ी भीड़ अपने पासे एंइती
लाई, त तैने फिलिप्पुसे सेइ ज़ोवं, “असां एना केरे लेइ रोट्टी कोट्टां धिन्म?”
6 पन तैनी तै गल तैस अज़मानेरे लेइ ज़ोई, किजोकि तै एप्पू ज़ानतो थियो
कि तै कुन केरेलो। 7 फिलिप्पुसे तैस जुवाब दित्तो, “एन केरे लेइ 200
दीनारां केरि रोट्टी भी पूरी न भोली कि तैन थोड़ी-थोड़ी मैली गैली।” 8 तैसेरे
चेलन मरां शमौन पतरसेरे ढ़लाए अन्द्रियासे तैस सेइ ज़ोवं। 9 “इड़ी अक
मट्टुए जैस कां जोआं केरि पंच रोट्टिन, तै दूई मेछ़लीन, पन एत्रे लोकन जो
कुन तैना पूरी भोनिन?” 10 यीशुए ज़ोवं, “लोकन बिशाला।” तैड़ी बड़ो घास
थियो। तैखन लोक जैना लगभग 5000 मड़द बिश्शोरे थिये। 11 तैखन
यीशुए रोट्टी टलेइ ते शुक्र केरतां बिशने बलना दित्ती, ते तेन्वरे मेछ़लीन मरां
भी ज़ेत्री तैना चातो थियो बेन्टी। 12 जैखन तैना खेइतां रज्ज़े त तैनी अपने
चेलन सेइ ज़ोवं, “बच्चोरे टुकड़े अकोट्टे केरा, ताके किछ शारू न गाए।” 13 ते
तैनेई अकोट्टे केरे, ते जोआं केरे पंच रोट्टी केरे टुकड़न मरां जैना खाने बालन
करां बंचोरे थिए 12 टोकरे थिए। 14 तैखन तै चमत्कार जै तैनी कियोरो
थियो लोक हेरतां ज़ोने लाए, “तै नबी जै दुनियाई मां एजनेबालो थियो सऱ्हे
ईए।” 15 यीशुए एना ज़ेनतां कि एना मीं राज़ो बनानेरे लेइ ट्लानो चातन,
फिरी तै अकैल्लो पहाड़े पुड़ जेव। 16 जैखन ड्लोझ भोइ, त तैसेरे चेले
समुन्दरे बन्ने जो। 17 ते किश्ती मां चेढ़तां समुन्दरेरे पार कफरनहूम नगर जो
चले, तैस वक्ते आंधरू भोरु थियूं, ते यीशु हेजू तगर तैन कां न थियूं ओरो।
18 ते बड़ी तेज़ हवा चलोरी थी ते समुन्दरे मां छेल्ली उठने लेइ। 19 जैखन तै

लगभग ट्लाई चेत्रे मील नेडे अव, त तैनेई यीशु समुन्दरे पुड़ चलतो लाव ते
 किश्तरे नेडे एइतो लाव ते डरे। 20 पन यीशुए तैन सेइं ज़ोवं, “अवं आई डरा
 न।” 21 ते तै तैस किश्ती मां चङ्गनेरे लेइ तियार भोव, ते तैखने किश्ती तैस
 ठैरी पुड़ पुज़ी ज़ैडी तैना चलोरे थिये। 22 दुड़योवं दिहाडे तैस मैन्हु केरि भीड़ां
 जै समुन्दरेरे पार खड़ी थी, इन हेरतां कि एककी किश्तरे अलावा होरि कोई न
 थी, यीशु अपने चेलन साथी तैस किश्ती पुड़ न चङ्गेरो थियो, पन सिर्फ तैसेरे
 चेले थिये। 23 (तैखन होरि किश्ती तिबिरियुस नगरेरां तैस ठैरी एई, ज़ैडी
 तैनेई प्रभुएरु शुक्र केरतां रोटी खोरी थी) 24 एल्हेरेलेइ ज़ैखन लोकेई हेरु कि
 इडी न यीशु ते न तैसेरे चेले, ते तैना फिरी तैना निककी-निककी किश्तन
 पुड़ चेढ़तां यीशु तोपते कफरनहूम नगर ए पुज़े। 25 समुन्दरेरे पार ज़ैखन
 तैना तैस मैल्ले त तैने ज़ोवं, “हे गुरु, तू इडी कताली अव?” 26 यीशुए
 तैन जुवाब दितो, “अवं तुसन सेइं सच-सच ज़ोताई, तुस मीं एल्हेरेलेइ न
 तोपथ कि तुसेई चमत्कार लाव, बल्के एल्हेरेलेइ कि रोटी खेइतां रङ्ग्जे। 27
 नाश भोनेबैली रोट्टरे लेइ मेहनत न केरा। पन तैस रोट्टरे लेइ मेहनत केरा जै
 हमेशारी ज़िन्दगी देतीए, जै मैनेरु मटू यानी अवं तुसन देइलो, किजोकि बाजी
 परमेशरे मीं एन्चरां केरनेरो अधिकार दित्तोरोए।” (ajōnios g166) 28 तैनेई
 तैस्से सेइं ज़ोवं, “परमेशरेरु कम केरनेरे लेइ अस कुन केरम?” 29 यीशुए
 तैन जुवाब दितो, “परमेशर तुसन करां एन कम चाते कि तुस तैस पुड़ यानी
 मीं पुड़ विश्वास केरा ज़ैनी अवं भेजोरोई।” 30 तैखन तैनेई तैस सेइं ज़ोवं,
 “फिरी तू कुन निशान हीरातस कि अस तैस हेरतां तेरो विश्वास केरम? तू
 कोन ज़ेरु कम हीरातस? 31 इश्शे दादेई-पङ्गदादेई जंगले मां स्वर्गेरी रोटी
 खेइ, जैस जो मन्नो ज़ोतन। ज़ेन्चरे पवित्रशास्त्रे मां लिखोरुए, तैनी तैन
 खानेरे लेइ स्वर्गरां रोटी दित्ती।” 32 यीशुए तैन सेइं ज़ोवं, “अवं तुसन सेइं
 सच-सच ज़ोताई कि मूसा तुसन तै रोटी स्वर्गरां न दित्ती, पन मेरो बाजी तुसन
 सच्ची रोटी स्वर्गरां देते। 33 किजोकि जै रोटी परमेशर देते, ते तै ईए जै
 स्वर्गरां एइतां दुनियारे लोकन ज़िन्दगी देतीए।” 34 तैखन तैनी तैस्से सेइं
 ज़ोवं, “हे प्रभु, ए रोटी असन स्वर्गरां देतो रा।” 35 यीशुए तैन सेइं ज़ोवं,
 “ज़िन्दगरी रोटी (जै ज़िन्दगी देनेबाली रोटी) अब्वें आई, जै मीं कां एजते तै
 कथी निअन्नो न भोलो, ते जै मीं पुड़ विश्वास केरेलो तै कथी ट्लिशोरो न

भोलो। 36 पन मीं तुसन सेइं पेइलू ज़ोरूए, कि तुसेर्ई अवं लोरोई फिरी भी मीं पुड़ विश्वास न केरथ। 37 ज़ैन किछ बाजी मीं देते तैन सब किछ मीं कां एजनूए, ते ज़ै कोई मीं कां एज्जेलो अवं तैस ज़रूर कबूल केरेलो। 38 किजोकि अवं अपनि मर्जी नई, बल्के परमेश्वरी मर्जी पूरी केरनेरे लेइ स्वर्गोंरां ओरोई ज़ैनी अवं भेज़ोरोई। 39 ईए मेरे बाजेरी मर्जी आए ज़ैनी अवं भेज़ोरोई कि ज़ैन किछ तैनी मीं दित्तोरोए तैस मरां अवं किछ न हिरेई, पन आखरी दिहैड़ी फिरी तैस ज़ींतो केरेलो। 40 किजोकि मेरे बाजेरी मर्जी ईए कि ज़ै कोई मटु हेरे ते तैस पुड़ विश्वास केरे, तैस हमेशारी ज़िन्दगी मैल्ले, ते अवं तैस आखरी दिहैड़ी फिरी ज़ींतो केरेलो।” (aiōnios g166) 41 एल्हेरेलेइ यहूदी लोक तैस पुड़ कुड़कुड़ाने लगे, किजोकि तैनी ज़ोरू थियूं, “ज़ै रोट्टी स्वर्गोंरां ओरिए तै अवं आई।” 42 ते तैनेई ज़ोवं, “कुन एन यूसुफेरु मटू यीशु नई, ज़ेसेरे अम्मा बाजी अस ज़ानतम? त तै केन्चरे ज़ोते कि अवं स्वर्गोंरां ओरोई?” 43 यीशुए तैन जुवाब दित्तो, “एप्पु मांमेइं न कुड़कुड़ाथ। 44 कोई मीं कां न एज्जी बटे ज़ांतगर बाजी, ज़ैनी अवं भेज़ोरोई, तैस मीं कां न आने, ते अवं तैस आखरी दिहैड़ी फिरी ज़ींतो केरेलो। 45 नेबी केरे पवित्रशास्त्रे मां एन लिखोरूए, ‘तैना सब परमेश्वरे तरफां शिख्खोरे भोनेन।’ ज़ैनी बाजी करां शुनोरूए त शिख्खोरोए तै मीं कां एइते। 46 एसेरो मतलब ई नई कि केन्चे बाजी लोरोए, पन ज़ै परमेश्वरे तरफांए यानी मीं बाजी लोरोए। 47 अवं तुसन सेइं सच-सच ज़ोताई ज़ै कोई विश्वास केरते हमेशारी ज़िन्दगी तैसेरीए। (aiōnios g166) 48 ज़िन्दगरी रोट्टी (ज़िन्दगी देनेबाली रोट्टी) अव्वें आई। 49 तुश्रो दादे-पड़दादेई जंगले मां मन्नो खाऊ ते मरे। 50 ई तै स्वर्गेरी रोट्टीए कि मैन्हु खान ते न मरन। 51 ज़िन्दगरी रोट्टी ज़ै स्वर्गोंरां ओरिए अव्वें आई। अगर कोई इस रोट्टी मरां खाए, त हमेशा ज़ींतो रालो, ते जैस रोट्टी सेइं दुनियारे लोकन हमेशारी ज़िन्दगी मैलचे, तैन मेरु मासे।” (aiōn g165) 52 एस पुड़ यहूदी लोक एप्पु मांमेइं बेंस केरने लाए, “ई मैन्हु असन अपनू मास केन्चरे खाने जो देइ बटते?” 53 यीशुए तैन सेइं ज़ोवं, “अवं तुसन सेइं सच-सच ज़ोताई, कि ज़ांतगर तुस मैनरे मट्रू यानी मेरु मास न खाले, ते मेरो खून न पीले, तुसन हमेशारी ज़िन्दगी न मैलेली। 54 ज़ै मेरु मास खाते ते मेरो खून पीते हमेशारी ज़िन्दगी तैसेरीए ते आखरी दिहैड़ी अवं फिरी तैस ज़ींतो केरेलो।

(aiōnios g166) 55 किजोकि हकीक्ति मां मेरु मास खानेरी चीज़े ते मेरो खून पीनेरी चीज़े। 56 ज़ै मेरु मास खाते ते खून पीते तै मीं मां बनोरो राते, ते अवं तैस मां। 57 ज़ेन्वरे ज़ीते बाजी अवं भेजोरोई, ते अवं बाजी केरे कारन ज़ोताई, तेन्वरे तै भी ज़ै मीं खालो मेरे कारन ज़ींतो रालो। 58 ज़ै रोटी स्वर्गरां ओरिए, तैस रोटी ज़ेरि नई ज़ै तुश्शे दादे-पङ्डदादेई खाइ ते बादे मां मरे, पन जै कोई ई रोटी खालो तै हमेशा ज़ींतो रालो।” (aiōn g165) 59 इना गल्लां तैनी कफरनहूम नगरेरे एककी प्रार्थना घरे मां ज़ोई। 60 एल्हेरेलेइ तैसेरे चेलन मरां बड़ेई एन शुन्तां ज़ोवं, “ए शिक्षा सकते, एस कौन मेन्नी बटते?” 61 यीशु अपने मने मां एना बुझतां कि मेरे चेले एस गल्ली पुङ् पुँ पुँ मांमेइं कुङ्कुङ्डाने लोरेन, तैन पुँछू, “कुन इना गल्लां तुसन मीं पुङ् विश्वास केरने करां रोकतिन?” 62 अगर तुस मैनेरु मटू यानी अवं ज़ैडी पेइलो थियो उबरे (स्वर्गे) गातो लाएले, त कुन भोलू? 63 परमेश्वरी आत्मा त ज़िन्दगी देने बालीए, मैन्हु केरि ताकती सेइं किछ न केरोए, ज़ैना गल्लां मीं तुसन सेइं ज़ोई तैना परमेश्वरी आत्मारे तरफां आन ते तैना ज़िन्दगी भी आन। 64 पन तुसन मां किछ एरे आन ज़ैना विश्वास न केरन। किजोकि यीशु पेइलो ज़ानतो थियो कि ज़ैना विश्वास न थी केरते तैना कौन आन, ते तैस कौन ट्लवालो। 65 ते तैनी ज़ोवं, “एल्हेरेलेइ मीं तुसन सेइं ज़ोरु थियूं ज़ांतगर बाजी केरे तरफां एन वरदान न मैल्ले तांतगर कोई मीं कां न एज्जी बटै।” 66 एस पुङ् तैसेरे चेलन मरां बडे उलटे फिरे, ते तैल्ला पत्ती तैस साथी न चले। 67 तैखन यीशुए 12 चेलन सेइं ज़ोवं, “कुन तुस भी चळू गानू चातथ?” 68 शमैन पतरस तैस जुवाब दित्तो, “हे प्रभु अस केस कां गाम? हमेशारी ज़िन्दगरी देने बैली गल्लां त तींए कां आन। (aiōnios g166) 69 ते असेई तीं पुङ् विश्वास कियो ते ज़ानू कि तू परमेश्वरो पवित्र मैन्हु आस।” 70 यीशुए तैन जुवाब दित्तो, “कुन मीं तुस 12 न चुने। फिर भी तुसन मरां अक मैन्हु शैताने।” 71 तैने इन तैस शमैन इस्करियोतेरे मट्टे यहूदा इस्करियोतेरे बारे मां ज़ोवं। हांलाकि तै तैन 12 चेलन मरां अक थियो, ज़ै यीशु ट्लुवाने बालो थियो।

7 एना गल्लन पत्ती यीशु गलील इलाके मां फिरतो राव, किजोकि यहूदी लीडर तैस मारनेरी कोशिश केरि राओरे थिये, एल्हेरेलेइ तै यहूदिया इलाके मां फिरनू न चातो थियो। 2 यहूदी केरु झोंफ़डी केरु तिहार (तेम्बु) नेढू थियूं।

3 एल्हेरेलेइ तैसेरे ढलाएई तैस ज़ोवं, “इडी न रा। यहूदिया इलाके मां गा जैडी तिहार मनाने लोरेन, कि ज़ैना चमत्कार तू केरतस तैना तेरे तैना चेले भी हेरन, जैना यहूदिया इलाके मां रातन। 4 किजोकि एरो कोई न भोलो कि जै मशूर भोनू चाए, ते छेपतां कम केरे। अगर तू कम केरतस, त अपनो आप हिरा।” 5 किजोकि तैसेरे ढला भी तैसेरो विश्वास न थी केरते। 6 तैखन यीशुए तैन सेइं ज़ोवं, “मेरो लेइ ठीक वक्त हेजू नई ओरो, पन तुस केन्ची वक्त मां भी गेइ सकतथ। 7 इस दुनियरे लोक तुसन सेइं बैर न केरि सकन, पन मीं सेइं बैर रखतन किजोकि अवं तैन केरे खलाफ इन ज़ोताई कि तैना बुरां कम्मां केरतन। 8 तुस तिहारे मां गाथ, मीं हुना एस तिहारे मां नई एजनू किजोकि मेरो हेजू ठीक वक्त नई ओरो।” 9 ते तै तैन सेइं एना गल्लां केरतां गलीले मां राव। 10 पन जैखन तैसेरे ढला तिहारे मां चले जे त तै बांदो न पन छेपतां जेव। 11 यहूदी लीडर तिहारे मां यीशु तोपने लाए। तैना लोकन पुछँझी राओरे थिये, “तै मैनु कोडि आए?” 12 ते लोकन मां तैसेरे बारे मां बल्हे-बल्हे बेड़ि गल्लां भोइ, किछ ज़ोते थी, “तै रोड़ो मैनूए।” ते किछ ज़ोते थी, “नई तै मैनन् गुमरा केरते।” 13 फिरी भी यहूदी लोकां केरे प्रधानां केरे डरे सेइं केन्ची भी मैन्हु तैसेरे बारे मां खुलतां तैसेरे बारे मां गल केरनेरी हिम्मत न भोइ। 14 जैखन तिहारे अध्ये दिहाड़े बीते, त यीशु मन्दरेरे अंगने मां गेइतां शिक्षा देने लगो। 15 तैखन यहूदी लीडरेई हैरान भोइतां ज़ोवं, “एनी त पवित्रशास्त्रेरी शिक्षा केन्ची करां नई पढ़ेरीए, फिरी एस केन्चरे एना गल्लां एई?” 16 यीशुए तैन जुवाब दित्तो, “मेरी शिक्षा मेरी अपनि नई, बल्के परमेश्वरेरे तरफां आए, जैने अवं भेज़ोरोई। 17 अगर कोई तैसेरी मेझी पुड़ चलनू चाए, त तै इस शिक्षारे बार मां ज़ानेलो कि ए परमेश्वरेरे तरफांए या अवं अपने तरफां ज़ोताई। 18 जै अपने तरफां किछ ज़ोते तै अपनि बड़याई चाते, पन जै अपने भेज़ने बालेरी बड़याई चाते तै ईमानदार आए, ते तैस मां कोई बेइमानी नई। 19 तुसन मूसे कानून दित्तो, पन तुसन मरां कोई भी तैस पुड़ न चले! पन तुस लोक मीं मारनेरी कोशिश केरतथ।” 20 लोकेई जुवाब दित्तो, “तीं पुड़ भूतेरो सैयोए! कौन तीं मारनेरी कोशिश केरते?” 21 यीशुए जुवाब दित्तो, “मीं अक चमत्कार कियो, ते तुस हैरान भोए। 22 एल्हेरेलेइ मूसा तुसन खतनेरो हुक्म दित्तो (एना नई कि मूसेरे तरफांए बल्के बाप दादां करां चलतो ओरोए) ते

तुस आरामेरे दिहाड़े मैनेरो खतनो केरतथ। 23 एल्हेरेलेइ आरामेरे दिहाड़े
 मैनेरो खतनो कियो गाते ताके मूसेरे कानूनेरो हुक्म न टले, त तुस मीं पुड़
 किजो क्रोध केरतथ, कि मीं आरामेरे दिहाड़े अक मैन्हु रोड़ेचारे ठीक केरो।
 24 तुतर हेरतां इन्साफ न केरा बल्के ठीक-ठीक आदालत केरा।” 25 तैखन
 किछ यरुशलेम नगरेरे रानेबाले एप्पू मांमेइं एक्की होरि पुछ्ने लगे, “कुन ए
 तै नई, जैस मारनेरी कोशिश चलोरिए? 26 पन तकका, तै त खुले आम
 गल्लां केरते, ते कोई एस किछ न ज्ञोए। कुन लीडरेइ सच्चे, सच्च जानू कि ए
 मसीहे? 27 पन ए मैन्हु मसीह केन्वरे भोइ सकते? एस त अस ज्ञानतम
 कि ए कोट्टां ओरोए, पन ज़ेइस मसीह एज्जेलो त कोई न ज्ञानेलो कि तै
 कोट्टां एज्जेलो।” 28 तैखन यीशुए मन्दरे अंगने मां शिक्षा देते बारे ज़ोरे सेइं
 ज़ोवं, “तुस मीं ज्ञानतथ ते इन भी कि अवं कोट्टां ओरोई। अवं एप्पू नई
 ओरो, पन मेरो भेज्ने बालो सच्चोए, तैस तुस न ज्ञानाथ। 29 पन अवं तैस
 ज्ञानताई, किजोकि अवं तैसेरे तरफां ओरोई, ते तैनी अवं भेज्नोरोई।” 30 एस
 पुड़ लीडरेइ तै ट्लानो चाव, फिरी भी केन्चे तैस सेइं हथ न लव, किजोकि
 तैसेरो मरनेरो वक्त हेजू न थियो ओरो। 31 फिरी भी भीड़ी मरां बडे लोकेइ
 तैस पुड़ विश्वास कियो, ते ज़ोने लाए, “मसीह जैखन एज्जेलो ते एट्टां जादे
 चमत्कार हिरालो जैना एने हीराहे?” 32 फरीसी लोकेइ, लोक तैसेरे बारे मां
 बल्हे-बल्हे एना गल्लां केरते शुने, ते प्रधान याजकेइ ते फरीसी लोकेइ तैस
 ट्लानेरे लेइ मन्दरेरे पहरदार भेजे। 33 एस पुड़ यीशुए ज़ोवं, “अवं थोड़े चिरे
 तगर हेजू तुसन साथी आई, फिरी अवं अपने भेज्ने बाले कां वापस गानोई।
 34 तुस मीं तोप्पेले, पन अवं नई मैलनो, ते जैड़ी अवं आई, तैड़ी तुस न
 एज्जी बटथ।” 35 एस पुड़ यहूदी लीडर एप्पू मांमेइं ज़ोने लगे, “ए कोरां
 चलोरे, जेरां अस न गेइ बटम? कुन ए तैन कां गालो जैना यूनान नगरे मां
 तितर-बितर भोइतां रातन, ते यूनानेरे लोकन भी शिक्षा देलो?” 36 एस
 गल्लरो कुन मतलबे जै एनी जोई, कि तुस मीं तोप्पेले, पन अवं तुसन न
 मैलेलो, ते जैड़ी अवं आई तैड़ी तुस न एज्जी बटथ? 37 तिहारेरे आखरी
 दिहाड़े, जै खास दिहाड़ी भोतीए, तेइस यीशु खड़े भोइतां ज़ोने लगे, “अगर
 कोई ट्लिश्शोरो भोए त मीं कां एज्जे ते पीये। 38 जै मीं पुड़ विश्वास केरे,
 जेन्यरे पवित्रशास्त्रे मां लिखेस्तु, तैसेरे दिले मरां तै पैनेरे दरिया निस्सेले जैना

जिन्दगी देतन।” 39 यीशुए एना गल्लां पवित्र आत्मारे बारे मां ज़ोई, जैविश्वास केरेने बालन पुड़ एजनेबाली थी, किजोकि पवित्र आत्मा हेजू तगर न थी दित्तोरी, किजोकि यीशु हेजू तगर अपनि महिमा मां वापस न थियो जोरोए। 40 तैखन भीड़ी मरां किछेई एना गल्लां शुन्तां ज़ोवं, “सच्चे ई तैनबी आए, ज़ेसेरे एजनेरी अस उमीदी मां आम।” 41 किछ लोकेई ज़ोवं, “ई मसीहे,” पन किछेई ज़ोवं, “कुन मसीह गलील इलाकेरां एजनोए? 42 पवित्रशास्त्र मां लिखोरु कि मसीह दाऊदेरे खानदाने ते बैतलहम डलब्बे मरां एजजेलो, जैडी दाऊद राजो रातो थियो।” 43 यीशुए बारे मां लोकां केरो अलग-अलग खियाल थियो, एल्हेरेलेइ तैन एप्पू मांमेइं अनबन भोइ। 44 किछ तैन मरां तैस ट्लाने चाते थिये, पन केन्चे तैस सेइं हथ न लव। 45 तैखन मन्दरेरे पहरदार, प्रधान याजकन ते फरीसन कां एइतां तैन सेइं ज़ोवं, “तुसेई तै किजो न आनो?” 46 पहरदारेई जुवाब दित्तो, “केन्चे मैने कथी एत्री रोड़ो गल्लां न कियोरी, ज़ेरि गल्लां ए मैन्हु केरते।” 47 फरीसेई तैन जुवाब दित्तो, “कुन तुस भी टेपलोरेथ? 48 कुन सरदारन ते फरीसन मरां केन्चे तैस पुड़ विश्वास कियोरोए? 49 पन एन लोक जैना मूसेरे कानूने न ज़ानन् तैन पुड़ परमेश्वरो फिटकार भोते।” 50 नीकुदेमुसे जै पेइलो तैस कां राती ओरो थियो, ते तैना मरां अक थियो, तैनी ज़ोवं, 51 “कुन इश्शे कानून केन्ची मैन्हु सज्जा देनेरी अजाज्जत देते, ज़ांतगर तैसेरी गल शुन्तां इन न ज़ानम कि तै कुन केरते?” 52 तैनेई तैस जुवाब दित्तो, “कुन तू भी गलील इलाकेरो आस! पवित्रशास्त्रे मां तोप ते ज़ान, कि गलीलेरां कोई नबी त नई निसने बालो!” 53 (तैखन सब अपने-अपने घरे चले जे)।

8 पन यीशु अपने चेलन सेइं साथी जैतून पहाड़े पुड़ जेव। 2 होरसां तै झेझां-झेझां मन्दरेरे अंगने मां जेव, बड़े लोक तैस कां आए ते तै बिश्तां तैन शिक्षा देने लगो। 3 तैखन शास्त्री ते फरीसी लोक एककी कुआन्शी जै बदमैशी मां ट्लेइयोरी थी, तै मझाटे खड़ी केरतां यीशु सेइं ज़ोवं, 4 “हे गुरु, ई कुआन्श बदमाशी केरते वक्त ट्लोरीए। 5 मूसेरे कानूने मां मूसा असन हुक्म दितोरोए कि एरी ज़ेरि कुआन्शी घोड़ेई बैइतां मारा, ते तू एस कुआन्शरे बारे मां कुन ज़ोतस, कि अस एस कुन केरम?” 6 तैनेई यीशु परखनेरे लेइ ए गल ज़ोई, ताके तैस पुड़ दोष लाने जो गल मैल्लो। पन यीशु उन्डे लिकतां एंगलोई सेइं

ज़मीनी पुड़ लिखने लव। 7 ज़ैखन तैना तैस पुछते राए, त तैनी उबरे तेकतां तैन सेइं ज़ोवं, “तुसन मरां ज़ैनी पाप न भोए कियोरोए, तैए पेइलो घोड़े बाए।” 8 ते फिरी उन्डे लिकतां एंगलोई सेइं ज़मीनी पुड़ लिखने लव। 9 पन तैना एना शुन्तां बहुन करां निकड़न तगर सारे एककी पत्ती अक तैटुं चले जे, ते यीशु अकैल्लो राव, ते तै कुआन्श मझाटे खड़ी राई। 10 यीशुए उबरे तेकतां तैस पुच्छू, “हे कुआन्श, तैना कोरां जे? कुन केन्चे तीं पुड़ सज़ारो हुक्म न दित्तो?” 11 तैसां ज़ोवं, “हे प्रभु केन्चे नई।” यीशुए ज़ोवं, “अवं भी तीं सज़ारो हुक्म न देई। अपने घरे जो गा ते फिरी पत्ती पापेरी न ज़िन्दगी ज़ीयां।” 12 यीशुए फिरी लोकन सेइं ज़ोवं, “दुनियारी लौ अव्वे आई, जै मीं पत्ती एज्जेलो त तै आंधरे मां न चलेलो, पन तै लौ हासिल केरेलो जै ज़िन्दगरी देचे।” 13 फरीसी लोकेई तैस सेइं ज़ोवं, “तू अपनि गवाही एप्पू देतस, तेरी गवाही सच्ची नई।” 14 यीशुए तैन जुवाब दित्तो, “भला अवं अपनि गवाही एप्पू देताई फिरी भी मेरी गवाही सच्चीए, किजोकि अवं ज़ानताई कि अवं कोटुं ओरोई ते कोरां गाताई? पन तुस न ज़ानाथ कि अवं कोटुं ओरोई ते कोरां गाताई। 15 तुस इन्सानेरी सोचरे मुताबिक इन्साफ केरतथ, अवं केन्चेरी इन्साफ न केरि। 16 ते अगर अवं इन्साफ केरि भी त मेरो इन्साफ सच्चोए, किजोकि अवं अकैल्लो नई, पन अवं ते मेरो बाजीए, ज़ैनी अवं भेज़ोरोई। 17 मूसेरे कानूने मां भी लिखोरोए कि दूर्ड ज़नां केरि गवाही मिलतां सच्ची भोतीए। 18 अक त अवं अपनि गवाही देताई, ते दुइयोवं गवाही मेरो बाजी देते ज़ैनी अवं भेज़ोरोई।” 19 तैनेई तैस पुच्छू, “तेरो बाजी कोड़ि आए?” यीशुए जुवाब दित्तो, “न तुस मीं ज़ानतथ न मेरे बाजी, अगर मीं ज़ानते त मेरे बाजी भी ज़ानते।” 20 एना गल्लां तैनी मन्दरेरे अंगने मां शिक्षा देते भण्डार घरे मां ज़ोई, ते केन्चे तै न ट्लाव, किजोकि तैसेरो वक्त हेजू न थियो ओरो। 21 यीशुए फिरी तैन सेइं ज़ोवं, “अवं ज़ानताई कि तुस मीं तोप्पेले ते पाप केरते-केरते मरेले, जैड़ी अवं गाताई तैड़ी तुस न एज्जी बटथ।” 22 एस पुड़ यहूदी लीडरेई ज़ोवं, “कुन एने अपनो आप मारनोए, जैन ज़ोते कि जैड़ी अवं गाताई तैड़ी तुस न एज्जी बटथ?” 23 यीशुए तैन सेइं ज़ोवं, “तुस इस दुनियाई मां ज़र्मोरिथ, अवं स्वर्गरां ओरोई। तुस दुनियारेथ, अवं दुनियारो नई।” 24 एल्लेरेलेइ मीं तुसन सेइं ज़ोरु थियूं, कि तुस

अपने पापन मां मरेले, किजोकि अगर तुस विश्वास न केरेले कि अवं तैए आईं त अपने पापन मां मरेले।” 25 यहूदी लीडरेई तैस सेइं ज़ोवं, “तू कौन आस?” यीशुए तैन सेइं ज़ोवं, “जैन शुरू करां ज़ोतो ओरोई, अवं तैए आई। 26 तुशो बारे मां मीं बड़ु किछ ज़ोनूए ते फैसलो केरनोए, पन मेरो भेजने बालो सच्चोए, ते जैन मीं तैस करां शुनोरूए तैन दुनियारे लोकन सेइं ज़ोताई।” 27 तैनेई एन न समझू कि असन सेइं बाजी केरे बारे मां कुन ज़ोने लोरोए। 28 तैखन यीशुए ज़ोवं, “जैखन तुस मैनेरे मटु यानी मीं उच्चे पुड़ चाढ़ले, त ज़ानेले कि अवं तैए आई, अवं अपने आपे सेइं किछ न केरि, ज़ेन्नरे मेरो बाजी मीं शिखालते तेन्चरे तैना गल्लां केरताई। 29 मेरो भेजने बालो मीं साथीए, तैनी अवं अकैल्लो नई शारोरो किजोकि अवं हमेशा तैन कम केरताई जैस सेइं तै खुश भोते।” 30 बड़े लोकेई यीशुएरी तैना गल्लां शुन्ते वक्त ज़ैना तै ज़ोई राओरो थियो तैस पुड़ विश्वास कियो। 31 तैखन यीशुए तैन यहूदन सेइं ज़ैनेई तैस पुड़ विश्वास कियोरो थियो ज़ोवं, “अगर तुस मेरे वचने मां बनेरे राले, त सच्चे मेरे चेले भोले। 32 तुस सच्चे ज़ानेले ते सच्चे तुसन आज़ाद केरेलू।” 33 तैनेई तैस जुवाब दित्तो, “अस त अब्राहमेरे औलादी मरां आम, ते कधी केन्चरे गुलाम नई भोरे, फिरी तू केन्चरे ज़ोतस कि तुस आज़ाद भोले?” 34 यीशुए तैन जुवाब दित्तो, “अवं तुसन सेइं सच्चे-सच्चे ज़ोताई कि ज़ै कोई पाप केरते तै पापेरो गुलामे। 35 गुलाम हमेशा घरे न रेइ सके, मटू हमेशा रहते। (aiōn g165) 36 एल्हेरेलेइ अगर मटू तुसन आज़ाद केरे त सच्चे तुस आज़ाद भोले। 37 अवं ज़ानताई कि तुसा अब्राहमेरे औलादी मरां आथ, फिरी भी मेरी शिक्षा तुस मन्थ, एल्हेरेलेइ तुस मीं मारने चातथ। 38 अवं तैन्ने ज़ोताई ज़ैन मीं लव, जैखन अवं अपने बाजी सेइं साथी थियो, ते तुस तैन्ने केरतथ जैन तुसेई अपने बाजी केरां शुनोरूए।” 39 तैनेई तैस जुवाब दित्तो, “इश्शो पूर्वज त अब्राहमे।” यीशुए तैन सेइं ज़ोवं, “अगर तुस अब्राहमेरे औलादी मरां भोथे त अब्राहमेरां ज़ेरां कम्मां केरेथ। 40 पन हुन्ना तुस मीं मारनो चातथ, किजोकि मीं तुसन तैना सच्ची गल्लां ज़ोई जैना मीं परमेशरे करां शुनी, एरु त अब्राहमे न थियूं कियोरू। 41 तुस अपने बाजेरां ज़ेरां कम्मां केरतथ।” तैनेई तैस सेइं ज़ोवं, “अस बदमैशी सेइं नई ज़मेरि, इश्शो अक्के बाजीए, ते तै परमेशरे।” 42 यीशुए तैन सेइं ज़ोवं, “अगर परमेशर तुश्शो

बाजी भोथो, त तुस मीं सेइं प्यार केरेथ, किजोकि अवं परमेशरेरे करां ओरोई,
अवं अपने तरफां नई ओरो, बल्के तैनी भेज़ोरोई। 43 तुस मेरी गल्लां किजो
न समझाथ? एल्हेरेलेइ कि तुस मेरी शिक्षा मन्नी न चाथ। 44 तुस अपने
बाजी शैतानेरेथ, ते तैसेरी मर्जी पूरी केरनि चातथ। तै त शुरु करां खूनी आए
ते सच्चे पुड़ बनोरो न राव, किजोकि सच्च तैस मां अथथी नई। जैखन तै
झूठ ज़ोते त अपने सुभावेरे मुताबिक ज़ोते, किजोकि तै झूठो बल्के झूठेरो
बाजीए। 45 पन अवं सच्च ज़ोताई तांए तुस मेरो विश्वास न केरथ। 46 तुसन
मां मीं कौन पापेरो दोष लाते? अगर अवं सच्च ज़ोताई त फिरी मेरो विश्वास
की न केरथ? 47 जै परमेशरेरे तरफां भोते तै परमेशरी गल्लां केरते, ते तुस
एल्हेरेलेइ न शुनथ किजोकि तुस परमेशरेरे तरफां नई।” 48 एना शुन्तां
यहूदई तैस सेइं ज़ोव, “कुन अस ठीक न थिये ज़ोते, कि तू सामरी मैन्हु आस,
ते तीं मां भूते!” 49 यीशुए जुवाब दित्तो, “मीं मां भूत नई, पन अवं अपने
बाजेरी इज्जत केरताई, ते तुस मेरी निरादर केरतथ। 50 पन अवं अपनि
बड़याई न चैई, हाँ अकके जै चाते कि लोक मेरी बड़याई केरन, ते तै आदालत
केरनेबालो भी आए। 51 अवं तुसन सेइं सच्च-सच्च ज़ोताई कि जै कोई मैन्हु
मेरे वचने पुड़ च़ले तै कथे न मरेलो।” (aiōn g165) 52 यहूदई तैस सेइं ज़ोवं,
“हुनी त असेई बुद्धू, कि तीं मां भूते, अब्राहम ते नबी भी मरे, ते तू ज़ोतस,
अगर कोई मेरे वचने पुड़ च़ले तै कथी न मरेलो। (aiōn g165) 53 इश्शो
पूर्वज अब्राहम मरो, कुन तू तैस करां भी बड़ो आस? ते नबी भी मरे, तू अपने
बारे मां कुन सोचतस कि तू कौन आस?” 54 यीशुए जुवाब दित्तो, “अगर
अवं अपनि बड़याई केरि त मेरी बड़याई किछ भी नई। पन मेरी बड़याई
केरनेबालो मेरो बाजीए, जैस तुस ज़ोतथ कि तै तुश्शो परमेशरे। 55 तुसेई त
तै न जानो, पन अवं तैस ज़ानताई, अगर अवं ज़ोई कि तैस न जैनी, त तुश्शो
ज़ेरो झूठो भोइ। पन अवं तैस ज़ानताई ते तैसेरे वचने पुड़ च़लताई। 56 तुश्शो
पूर्वज अब्राहम मेरी दिहाड़ी हेरनेरे उमीदी पुड़ बड़ी खुश थियो, ते तैनी हेरी, ते
खुश भोव।” 57 यहूदई तैस्से सेइं ज़ोवं, “हेजू तू 50 साला केरो भी नई भोरो
फिरी भी तीं अब्राहम लोरोए?” 58 यीशुए तैन सेइं ज़ोवं, “अवं तुसन सेइं
सच्च-सच्च ज़ोताई कि अब्राहम पैदा भोने करां पेइलो, अवं आई।” 59 तैखन
तैनेई तैस मारनेरे लेड घोड़ सल्ले, पन यीश छेपतां मन्दरे मरां निस्सी जेव।

9 फिरी यीशुए अपने चेलन सेइं साथी चलोरो थियो, ते तैनेई अक मैन्हु
 लाव, जै ज़म्नेरो कानो थियो। **2** तैसेरे चेलोई तैस पुच्छू, “हे गुरु, केने पाप
 कियो कि ए कानो ज़रमो, एने मैने या एसेरे अम्मा बाजे?” **3** यीशुए जुवाब
 दित्तो, “न एने पाप कियो, न एसेरे अम्मा-बाजेई, पन तै एल्हेरेलेइ कानो
 ज़रमो ताके परमेशरे चमत्कार एसमां लेईहोन। **4** जैने अवं भेज़ोरोई, असेई
 तैसेरु कम लूशी केरनू ज़रुरीए, ज़ैन कम तैनी असन दित्तोरुए, तै रात एजने
 बालीए ज़ैस मां कोई भी कम न केरि सके। **5** जांतगर अवं दुनियाई मां आई,
 अवं दुनियारी लौ आई।” **6** एन ज़ोइतां तैनी ज़मीनी पुड़ थुकू, ते तैस थुके
 सेइं मित्ती सन्नी, ते तै मित्ती कानेरे एछळन पुड़ लाई। **7** ते तैस सेइं ज़ोवं,
 “गा शीलोह नंवेरे हावदे मां अपनू तुत्तर धो” (शीलोहेरे मतलब भेज़रो) तैनी
 गेइतां धोवं, ते लांतो वापस अव। **8** तैखन तैस मैनेरे पड़ोसेई त जैनेई तै
 भीख मगतो लावरो थियो, एककी होरि सेइं ज़ोने लगे, “कुन ई तैए मैन्हु
 नई जै पेइलो बिश्तां भीख मगतो थियो?” **9** किछ मैन्हु ज़ोने लाए, “ई
 तैए,” होरेई ज़ोवं, “नई तैसेरो ज़ेरो कोई होरो भोनोए,” तैनी ज़ोवं, “अवं तैए
 आई।” **10** तैखन तैना तैस पुच्छने लगे, “तेरी एछळन केन्चरां लौ आई?”
11 तैनी जुवाब दित्तो, “यीशु नंवेरे एककी मैने मित्ती सन्नी, ते मेरी एछळन
 पुड़ लेइतां मीं सेइं ज़ोवं, गा शीलोह हावदे मां गेइतां अपनू तुत्तर धो, ते अवं
 जेव ते मीं तुत्तर धोवं, ते लाने लाव।” **12** तैनेई तैस पुच्छू, “तै मैन्हु कोड़ि
 आए?” तैनी ज़ोवं, “मीं नई पतो।” **13** लोकेई तै जै पेइलो कानो थियो
 फरीसी लोकन कां नेव। **14** जैस दिहाड़े यीशुए मित्ती सैनतां तैसेरी एछळी लौ
 दित्तो थी, तै आरामेरी दिहाड़ी थी। **15** फिरी फरीसी लोकेई भी तैस पुच्छू,
 “तैसेरी एछळन लौ केन्चरे आई?” तैनी तैन सेइं ज़ोवं, “तैनी मेरी एछळन पुड़
 मित्ती लाई, फिरी मीं तुत्तर धोवं, ते अवं हुनी लाताई।” **16** एस पुड़ किछ
 फरीसी लोक ज़ोने लगे, “ए मैन्हु परमेशरे तरफां नई, किजोकि ए आरामेरी
 दिहाड़ी न मन्ने।” होरेई ज़ोवं, “एरो ज़ेरो पापी मैन्हु ऐरे चमत्कार केन्चरे हिरेई
 बटते?” ते तैन एप्पू मांमेइं अनबन भोइ। **17** तैनेई काने फिरी पुच्छू, “जैने
 तेरी एछळी खोलोरेन, तू तैसेरे बारे मां कुन ज़ोतस?” तैनी ज़ोवं, “तै नबी
 आए।” **18** पन यहूदी लीडरन विश्वास न भोव, कि तै कानो थियो ते हुनी
 लाते, जांतगर तैनेई, तैसेरे अम्मा-बाजी न कुजाए। **19** तैन पुच्छू, कुन एन

तुश्शू मट्टूए, “जैस तुस ज़ोतथ कि कानो ज़र्मोरू थियूं? फिरी हुना केन्वरां लाते?” 20 तैसरे अम्मा बाजीए जुवाब दित्तो, “असां त ज़ानतम कि एन इश्शू मट्टूए, ते कानो ज़र्मोरू थियूं। 21 पन अस इन न ज़ानतम कि अज़ केन्वरे लाते, ते न इन ज़ानतम कि केने एसेरी एछळ्हन लौ दित्ती, एन हुनी बड्हूए एस पुछा, ए अपने बारे मां एप्पू ज़ोलो।” 22 एना गल्लां तैसरे अम्मा बाजे एल्हेरेलेइ ज़ोई तैना यहूदी लीडरन करां डरते थिये, किजोकि यहूदी लीडर सारे अक भोरे थी, कि अगर कोई जोए, कि ए मसीहे त तै प्रार्थना घरे मरां कह्हो गाए। 23 एल्हेरेलेइ तैसरे अम्मा बाजे ज़ोवं, “एन बड्हूए, एस्से पुछा।” 24 तैखन तैस मैन्हु ज़ै कानो थियो, दुइयोवं बार कुजेइतां ज़ोवं, “सच्च ज़ोइतां परमेश्वरेरी बड़याई केर, अस ज़ानतम तै मैन्हु पापीए।” 25 तैनी जुवाब दित्तो, “अवं न ज़ैनी कि ए पापी कि नई, अवं अक गल ज़ानताई, कि अवं कानो थियो हुनी लाताई।” 26 तैनेई तैस पुच्छू, “तैने तीं सेइं कुन कियूं? तैनी केन्वरे तेरी एछळ्हन लौ दित्ती?” 27 तैनी तैन सेइं ज़ोवं, “मीं त तुसन सेइं ज़ोवरूए, ते तुसेर्ई न शुनू, हुनी दुइयोवं बार किजो शुनू चातथ? कुन तुस भी तैसरे चेले बन्ने चातथ?” 28 तैखन तैना तैस बुरू भलू ज़ोने लाए, “तूए तैसरो चेलोस, अस त मूसरे चेलेम।” 29 अस ज़ानतम परमेश्वर मूसा सेइं गल्लां की, पन एस न ज़ानम कि ए कोट्हां ओरोए। 30 तैनी तैन जुवाब दित्तो, “ए त बड़ी बड्ही गल्ले कि तुस न ज़ानाथ कि ए कोट्हां ओरोए, फिरी भी तैनी मेरी एछळ्हन लौ दित्ती। 31 अस ज़ानतम कि परमेश्वर पापी केरि न शुने, पन कोई परमेश्वरे भक्त भोए त तैसरे मेर्जी पुड़ चळतो भोए, त परमेश्वर तै तैसेरी शुनते। 32 दुनिया रचनेरे वक्ते करां कधे शुन्ने मां नई ओरोए कि केन्चे ज़र्मनेरे कानेरी एछळ्हन लौ दित्तोरी, (aiōn g165) 33 अगर ए मैन्हु परमेश्वरेरे तरफां न भोथो त किछ न केरि सकेथो।” 34 तैनेई तैस ज़ोवं, “तू त बिलकुल पापन मां ज़र्मोरोस, तू असन शिखालतस?” ते तैनेई तै प्रार्थना घरे मरां बेइरोवं कह्हो। 35 यीशुए शुनू कि तै बेइरोवं कह्होरोए, ते ज़ैखन तैसेरी तैस सेइं मुलाकात भोइ, त तैस सेइं ज़ोवं, “कुन तू मैनेरे मट्टे पुड़ विश्वास केरतस?” 36 तैनी तैस जुवाब दित्तो, “हे प्रभु, मीं सेइं जो कि तै कैने, ताके अवं तैस पुड़ विश्वास केरि?” 37 यीशुए तैस सेइं ज़ोवं, “अच्चें आई, तीं अवं पेहलो लोरोई, जै तीं सेइं गल्लां केरि राओरोए।” 38 तैनी ज़ोवं, “हे प्रभु, अवं

तीं पुड़ विश्वास केरताई।” ते तैस कां मथो टेको। 39 तैखन यीशुए ज़ोवं, “अवं इस दुनियाई मां ई इन्साफ केरने ओरोई, ज़ैना न लान तैना लान, ते ज़ैना लातन तैना काने भोन।” 40 ज़ैना फरीसी लोक तैस सेइं साथी थिये तैनेई ज़ोवं, “कुन तू असन जो भी काने ज़ोतस?” 41 यीशुए तैन सेइं ज़ोवं, “अगर तुस काने भोथे त पापी न भोथे, पन हुनी ज़ोतथ कि अस लातम, एल्हेरेलेइ तुश्शे पाप माफ़ न भोले।”

10 “अवं तुसन सेइं सच-सच ज़ोताई, कि ज़ै कोई दारे बत्तां बाड़े मां न गाए, पन होरि बत्तां गाते, तै चोर ते डैकूए। 2 पन भैड़ुं केरो पुहाल दारे बत्तां गाते। 3 तैसेरेलेइ दरबान दार खोलते, ते भैड़ुं तैसेरी गल पिशैनतिन, ते तै अपनि भैड़ुन नंवे सेइं कुजाते ते बेइर नेते। 4 ते ज़ैखन तै अपनि सैरी भैड़ुं बेइर कढते, त तैन केरे अग्री-अग्री चलते, ते भैड़ुं तैस पत्ती-पत्ती गैतिन, किजोकि तैना तैसेरी आवाज़ पिशैनचन। 5 तैना बखले पत्ती न गैली, पन तैस करां नश्शोली, किजोकि तैना बखलेरी आवाज़ न पिशानन्।” 6 यीशुए तैन सेइं मिसाल देइतां ज़ोवं, पन तैनेई न समझू कि एसेरी गल्लां केरो कुन मतलबे, ज़ैना तै असन सेइं ज़ोते। 7 तैखन यीशुए तैन सेइं फिरी ज़ोवं, “अवं तुसन सेइं सच-सच ज़ोताई, भैड़ुं केरु दार अव्वे आई। 8 ज़ेत्रे मीं करां पेइले आए सब चोर ते डैकून, पन मेरी भैड़ुई तैन केरि न शुनी। 9 दार अवं आई, अगर कोई मेरे जिरिये अन्तर गालो, त परमेशर तैस मुक्ति देलो, ते तै अन्तर बेइर एइतो गालो ते खूराक पालो। 10 चोर होरि कोन्ची कम्मेरे लेइ न एज्जे, बल्के चोरी केरने ते मारने ते नाश केरने एइते, अवं एल्हेरेलेइ ओरोई कि तैन भरपूर ज़िन्दगी ज़ीन। 11 रोड़ो पुहाल अव्वे आई, रोड़ो पुहाल भैड़ुं केरे लेइ अपनि जान देते। 12 ज़ैखन नौकर गिद एंइतू लाते त तै भैड़ुं शैरतां नेश्शी गालो। किजोकि तै तैन केरो न पुहाले न मालिके, ते गिद तैन पुड़ हमलो केरतां तितर-बितर केरते। 13 तै एल्हेरेलेइ नशते कि तै नौकर आए, ते तैस भैड़ुं केरि फिक्र नई। 14 रोड़ो पुहाल अवं आई, अवं अपनि भैड़ुं पिशानताई, ते मेरी भैड़ुं मीं पिशैनचन। 15 ज़ेन्चरे बाजी मीं ज़ानाते, तेन्चरे अवं भी तैस ज़ानताई, ते अवं भैड़ुं केरे लेइ अपनि जान देताई। 16 ते मेरी होरि भी भैड़ुन, ज़ैना इस बाड़े मां नई, मीं तैना भी ऐनिन ज़रुरिन, तैना मेरी आवाज़ पिशैनेली, फिरी अकके डेरो ते अकके पुहाल भोनोए। 17 अवं अपनि जान

देताई, एल्हेरेलेइ बाजी मीं सेइं प्यार केरते, कि अवं फिरी ज़ींतो भोई। 18
 कोई मेरी ज़िन्दगी मीं करां न थसोडे, बल्के अवं एप्पू देताई, मीं तैस देनेऱु भी
 अधिकारे ते नेनेरो भी अधिकारे, ई हुक्म मीं मेरे बाजी करां मैलोरोए।” 19
 एल्लां पत्ती, यहूदन मां फिरी अनबन भोइ। 20 तैन मरां बडे ज़ोने लाए, “तैस
 मां भूते, ते तै पागले, तैसेरी किजो शुनातथ?” 21 होरे लोकेई ज़ोवं, “एना
 गल्लां ऐरे मैनेरी नई ज़ैस मां भूत भोए, कुन भूत कांना केरि एछळी खोल्ली
 बटते?” 22 यरूशलेम नगरे मां तिहार भोवं, ते हीवतडेरो मौसम थियो। 23
 यीशु सुलैमानेरे मन्दरेरे अंगने मां हंठने फिरने लग्गोरो थियो। 24 तैखन यहूदेई
 तै घेरो ते पुच्छू, “तू केइस तगर इश्शो दिले डामाडोल केरतस? असन सेइं
 साफ-साफ ज़ो। कुन तू मसीह आस?” 25 यीशुए तैन जुवाब दित्तो, “मीं
 तुसन सेइं ज़ोवं पन तुस विश्वास न केरथ। ज़ैना कम्मां अवं अपने बाजी केरे
 अधिकारे सेइं केरताई तैना मेरे गवाह आन। 26 पन तुस एल्हेरेलेइ विश्वास न
 केरथ कि मेरी भैडुन मरां नई। 27 मेरी भैडुं मेरी आवाज़ पिशैनचन, अवं तैन
 ज़ानताई, तैना कथी नाश न भोले, ते कोई तैन मेरे हथ्ये मरां न थसोडी सके।
(aiōn g165, aiōnios g166) 29 मेरो बाजी, ज़ैनी तैना मीं दित्तोरिन, सेब्बन
 करां महान आए, ते कोई तैन बाजी केरे हथ्ये मरां न नेइ बटे। 30 अवं त
 बाजी अकके आम।” 31 दुबारां फिरी, यहूदेई तैस घोड़ेव देनेरे लेइ फिरी घोड़
 सल्ले। 32 एस पुड़ यीशुए तैन सेइं ज़ोवं, “मीं अपने बाजी केरे तरफां बडां
 रोडां कम्मां हिरां, तैन मरां कोस कम्मेरे लेइ घोड़ेव देतथ?” 33 यहूदेई तैस
 जुवाब दित्तो, “रोडां कम्मां केरे लेइ अस तीं पुड़ घोड़ेव नई केरने लेवरे, पन
 परमेशरेरी तुहीन केरनेरे लेइ, एल्हेरेलेइ कि मैन्हु भोइतां अपनो आप परमेशर
 बनातस।” 34 यीशुए तैन जुवाब दित्तो, “मूसेरे कानूने मां एन लिखोरु कि
 परमेशरे अपने लोकां केरे लीडरन सेइं ज़ोवं कि तैना ईश्वरन। 35 (तुसन
 पत्तोए पवित्रशास्त्रेरी गल कोई भी बेदली न बटे) अगर परमेशरे तैन लोकन
 जो ईश्वर ज़ोवं जैन कां परमेशरेरु वचन पुज्जू, 36 फिरी तुस किजो ज़ोतथ
 कि तू तुहीन केरतस, जैखन अवं जोताई कि अवं परमेशरेरु मटू आई? बाजी
 परमेशरे अवं पवित्र ठहरेइतां दुनियाई मां भेजो। 37 अगर अवं अपने बाजेरु
 कम न केरि, त मेरो विश्वास न केरा। 38 पन अगर अवं अपने बाजेरु कम

केरताईं, त चाए तुस मेरो विश्वास न भी केरा, पन तैन कम्मन पुड़ विश्वास केरा। तैखन तुस बुज्जेले ते समझेले कि बाजी मीं मां आए, ते अवं बाजी मां आई। 39 तैनेई फिरी तैस ट्लानेरी कोशिश की, पन तै तैन करां चलो जेव।” 40 फिरी यीशु यरदन दरियारे पार तैस ठैरी जेव, जैडी यूहन्ना पेइले बपतिस्मो देतो थियो, ते तैडी राव। 41 बडे लोक तैस कां एइतां ज्ञोते थिये, “यूहन्ना त कोई चमत्कारी निशान न हिराव, पन जैन किछ यूहन्ना एसेरे बारे मां ज़ोवं, तैन सब सच थियूं।” 42 ते तैडी बडेई यीशु पुड़ विश्वास कियो।

11 मरियम ते तैसेरी बेइन माथरि ड्लव्हें बैतनिय्याह मां लाजर नव्वेरो अक मैन्हु थियो 2 ई तैए मरियम थी जैसां बादे मां प्रभु पुड़ इत्र छेडतां अपने बालन सेइं तैसेरे पाव पूँछोरे थी, एसेरो ढ्ला लाजर बिमार थियो। 3 तैखन तैसेरी बेइने यीशु कां अक बिस्तार भेज्जो, “हे प्रभु, जैस सेइं तू प्यार केरतस तै बिमारे।” 4 जैखन यीशुए एन शुनू त ज़ोवं, “ए बिमारी मरनेरे लेइ नई बल्के परमेशरेरी महिमारे लेइ आए, ताके तैसेरे जिरिये परमेशरेरे मटुरी महिमा भोए।” 5 यीशु मार्था ते तैसेरी बेइन मरियम ते लाजरे सेइं प्यार केरतो थियूं। 6 जैखन यीशुए शुनू कि, लाजर बिमारे, पन फिर भी दूई दिहाड़ तैडी बिश्शो जैडी तै थियो। 7 दूई दिहैड़ना बाद यीशुए अपने चेलन सेइं ज़ोवं, “एज्जा, अस फिरी यहूदिया इलाके मां गाम।” 8 चेले ज़ोने लगे, “हे गुरु, थोड़े चिर पेइले यहूदी लीडर तीं घोड़ेई बाते थिये, ते तू फिरी तैडी गानू चातस?” 9 यीशुए जुवाब दित्तो, “कुन दिहैड़ी मां 12 घंटे न भोन? जै दीसां चलते तैस ठोकर न लगे, एल्हेरेलेइ कि तै दुनियारी लोई मां चेलि सकते। 10 पन अगर तै राती चलते त आंधरे मां तैस ठोकर लगचे, किजोकि तैस कां लौ नई।” 11 तैनी एना गल्लां ज़ोई, ते अपने चेलन सेइं ज़ोने लगो, “इश्शो दोस्त लाजर झुलोरोए पन अवं तैस बीझाने चलोरोई।” 12 तैसेरे चेले ज़ोने लगे, “हे प्रभु अगर तै झुलोरोए त तै बीझेलो।” 13 यीशुए लाजरेरे मरनेरे बारे मां ज़ोरु थियूं, पन तैसेरे चेलेई बुझू कि तैसेरो मतलब निड्लारे बारे मां झुलोरोए, पन अवं तैस बीझाने चलोरोई। 14 तैखन यीशुए रोड़ेचारे ज़ोवं, “लाजर मेरि जेवरोए। 15 अवं खुश आई कि तुश्शे लेइ फैइदोए, कि अवं तैडी न थियो ज़ैस सेइं विश्वास केरथ। हुनी एज्जा अस तैडी गाम।” 16 तैखन थोमा ज़ैस जो दिमुस ज़ोतन, होरि चेलन सेइं ज़ोने लगो, “एज्जा, अस भी

तैस सेइं साथी मरनेरे लेइ गाम।” 17 जैखन यीशुए बैतनिय्याह इलव्वें मां पुज़जो त तैस पतो लगो, कि लाज़र दब्बोरे चेव्रे दिहाडे भोरेन 18 बैतनिय्याह यरूशलेम नगरेरां कोई ट्लाई किलोमीटर दूर थियूं। 19 बडे यहूदी लोक मार्था ते मरियमी कां तैन केरे ढला लाज़रेरे मरनेरां पत्ती तैना तसल्ली देने ओरे थिये। 20 जैखन मार्था शुनू कि यीशु ओरोए तै तैस सेइं मिलनेरे लेइ बेइर निस्सी, पन मरियम बेइर न निस्सी। 21 मार्था यीशुए सेइं ज़ोने लगी, “हे प्रभु, अगर तू इडी भोथो त मेरो ढला न थियो मरनो। 22 पन अवं ज्ञानती, हुनी जैन किछ तू परमेशरे करां मगेलो, ते परमेशर तीं देलो।” 23 यीशुए तैस ज़ोवं, “तेरो ढला ज़ींतो भोइ गानोए।” 24 मार्था तैस सेइं ज़ोवं, “अवं ज्ञानती तै आदालतरे दिहाडे ज़ेइस सारे लोक ज़ींते भोनेन, तेइस तै भी ज़ींतो भोइ गानोए।” 25 यीशुए तैस ज़ोवं, “मैनन् मुडदन मरां ज़ींते केरनेबालो अव्वें आई। जै मीं पुड़ विश्वास केरते तै मरनेरां बाद भी ज़ींतो रालो। 26 ते जै कोई ज़ींतोए, ते मीं पुड़ विश्वास केरते, तै कथे न मरेलो, कुन तू इस पुड़ विश्वास केरचस?” (aiōn g165) 27 मार्था जुवाब दित्तो, “हाँ प्रभु, मेरो विश्वास तीं पुड़े, कि तू परमेशरे मटू मसीह जैन दुनियाई मां एजनेबालू थियूं।” 28 जैखन तैसां ए गल ज़ोई तै वापस चली जेर्इ, ते अपनि बेइन मरियम कनारे कुजेइतां ज़ोने लगी, “गुरु जी ओरेन ते तीं कुजाने लगोरेन।” 29 तै एन शुन्तां लूशी उट्टतां यीशु सेइं मिलने चली आई। 30 यीशु हेजू इलव्वें मां न थियो पुज़ोरो, पन तै तैड़ी थियो ज़ैड़ी मार्था तैस सेइं मिलोरी थी। 31 तैखन तैना यहूदी लोक ज़ैना मरियमी तसल्ली देने ओरे थिये मरियम लूशी खड़ी उट्टतां बेइर जेर्इ, तै तैना भी तैस पत्ती बेइर जे, कि भोइ सकते ए लेरां देने कब्री पुड़ चलोरिए। 32 जैखन मरियम तैस ठारी पुज़ी ज़ैड़ी यीशु थियो तै तैस लेइतां तै तैसेरे पवन पुड़ बिछड़ी जेर्इ ते ज़ोने लगी, “हे प्रभु अगर तू इडी भोथो त मेरो ढला न थियो मरनो।” 33 जैखन यीशुए तै तैस सेइं साथी एजनेबाले यहूदी लोक लेरां देते लाए, तै आत्माई मां उदास भोइतां बड़ो दुःखी भोव। 34 ते पुच्छू, “तुसेई लाज़र कोड़ि रख्खोरोए?” तैना ज़ोने लगे, “हे प्रभु, असन सेइं साथी एइते एप्पू हेर।” 35 यीशु लेरां देने लगो। 36 तैखन यहूदी लोक ज़ोने लगे, “हेरा, ए लाज़रे सेइं केत्रो प्यार केरतो थियो।” 37 पन तैन मरां किछ ज़ोने लगे, “कुन जैनी कानेरी एछछन लौ दित्ती, इन भी न केरि बटू, कि ए

मैन्हु न मरेथो?” 38 यीशु दुखी दिले सेइं कब्री कां अव, तै अक कुढ थी, जैस पुड़ अक घोड़ छडोरो थियो। 39 यीशु ज़ोने लगो, “घोड़ खड़ो केरा।” मार्था ज़ै लाज़री बेइन थी तै ज़ोने लगी, “हे प्रभु एस मरां त मुशक लोरीए एजने, किजोकि एस चेव्रे दिहाड़े मरे भोरेन।” 40 यीशुए तैस सेइं ज़ोवं, किजोकि, “मीं तुसन न थियूं ज़ोरु कि अगर तेरो विश्वास भोलो, त तू परमेश्वरी महिमा हेरेली।” 41 तैखन तैनेईं तै घोड़ धिसाव, ते यीशुए उबरे तेकतां ज़ोने लगो, “हे बाजी, अवं तेरु शुक्र केरतां कि तीं मेरी शुनी।” 42 अवं ज़ानतो थियो, कि तू मेरी प्रार्थना शुन्तस पन अवं एन लोकां केरे लेइ जैना चेव्रे पासन खेड़ोरेन एन ज़ोरु थियूं कि एना भी विश्वास केरन, कि तीं अवं भेज़ोरोई।” 43 एन ज़ोनेरां पत्ती यीशुए ज़ोरे सेइं ज़ोवं, “लाज़र बेइर निस!” 44 ते तै मुओरो लाज़र बेइर निस्सो ज़ेसेरे हथ पाव कफने सेइं बंधोरे थिये ते दोग्गे अक कपड़ो बंधोरो थियो। यीशुए तैन सेइं ज़ोवं, “एस खोल्ला ते एस गाने देथ।” 45 बडे यहूदी लोक जैना मरियम सेइं मिलने ओरे थिये। ते तैसेरां इन्ना कम्मां हेरतां तैस पुड़ विश्वास कियो। 46 पन तैन मरां किछेई फरीसन कां गेइतां सब शुनावं जैना यीशुए कियेरु थियूं। 47 एस पुड़ प्रधान याजकन ते फरीसी लोक महासभारे लोक अकोटु किये ते ज़ोने लगे, “अस कुन केरम? ए मैन्हु त इड़ी बड़े चमत्कार लोरोए केरने।” 48 अगर अस एस हुन्ना न रोकमेले त सारे लोक तैस पुड़ विश्वास केरेले, कि ए मसीह आए, ते फिरी रोमेइं इड़ी एइतां इश्शो मन्दरे ते इश्शी कौमी दुझने नाश केरेले।” 49 तैखन तैन केरे टोली मरां अक ज़ेसेरु नवं कैफा थियूं, जै तैस साल मन्दररो महायाजक थियो ज़ोने लगो, “तुस लोक किछ न ज़ानाथ, 50 तुसन इन न समझथ कि, तुश्शे लेइ रोड़ूए, इश्शो लोकां केरे लेइ अक मैन्हु मरे, न कि इश्शो सारे लोक।” 51 ए गल तैनी अपने आपे सेइं न थी ज़ोरी, पन तैस साल महायाजक भोइतां भविष्यद्वाणी, कि यीशु इस्पएलेरे सारे लोकां केरे लेइ अपनि जान देलो। 52 तै सिर्फ इस्पएलेरे लोकां केरे लेइ नई, पन एल्हेरेलेइ भी कि जैना परमेश्वरे बच्चे तितर-बितर भोरेन तैन अकोटु केरतां अक बनाए। 53 बस्सा, यहूदी लीडरेई तैस दिहाड़ेरे बाद यीशु मारेरो इरादो कियो। 54 एल्हेरेलेइ यीशुए तैस वक्ते करां यहूदन मां बांदे मां न फिरो, पन जंगलेरे नेडे एप्रैम नगरे मां जेव, ते अपने चेलन सेइं साथी तैड़ी राने लगो। 55 तेइस यहूदी केरु फ़सह तिहार नेडे अव,

ते बड़े लोक आसेपासेरे इलाकन मरां यरुशलेम नगरे मांजो चले जे, ताके अपनो आप शुद्ध केरन। ५६ तैना यीशु तोपते थिये तेइस तैना मन्दरे मां अकोटे भोए, ते एक्की होरि सेइं ज़ोने लगे, “तुस कुन समझातथ? कोई पत्तोए कुन तै इडी फ़सह तिहारे मां एजजेलो कि नई?” ५७ ते प्रधान याजकेई ते फरीसी लोकेई हुक्म दित्तोरो थियो कि अगर केन्ची पतो लगे कि यीशु कोड़ि आए त ज़ोथ दे ताके असां तैस गिरफ्तार केरम।

१२ फ़सह तिहारे करां शा दिहाड़े पेइले यीशु बैतनिय्याह ड़लब्बे मांजो चलो अव, ज़ैडी लाज़र रातो थियो, ज़ै यीशुए मुड़दन मरां ज़ींतो कियोरो थियो। २ तैड़ी तैनेई यीशुएरी खातरदारी केरनेरे लेइ धाम बनाई। ते मार्था सेवा लोरी थी केरने, लाज़र भी तैन मरां अक थियो ज़ैना यीशु सेइं साथी रोट्टी खाने बिश्शोरे थियो। ३ तैखन मरियमा जटामासी सेइं बनोरो अध्धो लीटर खुशबूदार इत्र ज़ै बड़ो कीमती थियो, यीशुएरे पावन मल्लो, ते अपने दोग्गेरे बालन सेइं पोछ्ने लगी, ते सारू घर रोड़ी मुशकी सेइं भेरोई जेव। ४ पन तैसेरे चेलन मरां अक यहूदा इस्करियोती नव्वेरो अक चेलो, ज़ैनी यीशु ट्लुवेवरो थियो ज़ोने लगो, ५ “ई इत्र ३०० दीनारन मां बेच्चां गरीबन किजो न दित्तो?” ६ तैनी एना गल्लां एल्हेरेलेइ न थी ज़ोरी, कि तैस गरीबां केरो खियाल थियो, पन एल्हेरेलेइ ज़ोवं कि तै चोर थियो, तैस कां पेइंसां केरि झोली भोती थी, ते ज़ैन किछ तैस मां रखते थी तै कढतो थियो। ७ यीशुए ज़ोवं, “एस तंग न केरा, एसां वर्तेरे पेइले मेरी जान दब्बनेरी तियारी कियोरीए। ८ किजोकि गरीब लोक त तुसन सेइं साथी सदा रातन, पन अवं तुसन सेइं साथी सदा नई रानो।” ९ मैन्हु केरि बड़ी भीड़ी तैड़ी आई ज़ैखन तैनेई शुनू कि यीशु तैड़ी अव। तैना सिर्फ यीशु नई बल्के लाज़रे भी हेरने ओरे थिये, ज़ै तैनी मुड़दन मरां ज़ींतो कियोरो थियो। १० तैखन प्रधान याजके लाज़र भी मारनेरी सलाह की। ११ किजोकि बड़े लोक यहूदी लीडरन करां चले जे, ते तैनेई यीशु पुड़ विश्वास कियो। १२ होरसां मैन्हु केरि बड़ी भीड़ तिहारे मां आई। ज़ैखन तैनेई शुनू कि यीशु भी यरुशलेम नगरे मां एजनेबालोए, १३ त तैनेई खजूरां केरि डेलड़ी हथ्थन मां रेखतां नहरे देते तैस सेइं मिलनेरे लेइ निस्से ते ज़ोने लगे, “होशाना (तारीफ़) धने इस्पाएलेरो राज़ो, ज़ै प्रभुएरे नव्वे सेइं एइते।” १४ ज़ैखन यीशु अक गधरो बच्चो मैल्लो, ते तै तैस पुड़ बिश्तां यरुशलेम नगरे मांजो अव,

जेन्चरे पवित्रशास्त्रे मां लिखोरुए तेन्चरे एन भोवं, 15 “हे सियोनेरी कुई
 (यस्तलेमेरे लोक), तू न डर, हेर, तेरो राजो एज्जी राओरोए, ते तै गधेरे बच्चे
 पुड़ चेदतां एज्जी राओरोए।” 16 पेइलू त यीशुएरे चेलेर्ई किछ न समझू,
 पन जैखन यीशुएरी महिमा बांदी भोइ, तैनेर्ई तैना सैरी गल्लां याद की, एन
 सब गल्लां तैसेरे बारे मां लिखोरी थी, ते लोकेर्ई एरो ज़ेरो सलूख कियोरो
 थियो। 17 तैखन भीड़े लोकेर्ई जैना तैस सेइं थी, ई गवाही दिती, कि तैनी
 लाज़र कब्बी मरां कुजाव, ते मुड़न मरां झींतो कियो। 18 एल्हेरेलेइ लोक
 तैस सेइं मिलनेरे लेइ आए, किजोकि तैनेर्ई शुनोरु थियूं, तैनी ई चमत्कार
 कियोरे। 19 फरीसी लोक एन हेरतां एककी होरि सेइं ज़ोने लगे, “सोचा, तुस
 लोक किछ नई केरि लोरे बटने, हेरा सारी दुनिया एस पत्ती चली।” 20 जैना
 लोक फ़सह तिहारे मां यस्तलेम नगरे मां आराधना केरने ओरे थिये, तैन मां
 किछ यूनानी थियो। 21 तैना फिलिप्पुसे कां जे ज़ै गलीलेरे नगर बैतसैदा मां
 रातो थियो, तै ज़ोवले हथ केरतां ज़ोने लगे, “जनाब अस यीशु सेइं मिलनू
 चातम।” 22 फिलिप्पुसे अन्द्रियासे सेइं ज़ोवं, ते अन्द्रियास फिलिप्पुसे सेइं
 साथी जेव ते यीशु सेइं ज़ोवं। 23 यीशुए तैन जुवाब दितो, “कि मैनेरे मट्टेरी
 यानी मेरी महिमा बांदी भोनेरो वक्त ओरोए। 24 अवं तुसन सेइं सच-सच
 ज़ोताई, कि ज़ांतगर गेहुं केरो ग्लेव मित्ती मां न मर्ए, तै अकके रहते, पन
 जैखन मरते त बड़ो फल आनते, (तेन्चरे मीं सेइं साथी भोनूए)। 25 जै अपनि
 जान ट्लारी रखते ते अपनि जान गुवाते, पन ज़ै अपनि जानी सेइं बैर रखते ते
 अक हमेशारी ज़िन्दगी बचालो। (aiōnios g166) 26 जै कोई मेरी सेवा केरनि
 चाते त तैसेरेलेइ ज़रुरीए तै मेरो चेलो बने, ताके ज़ैड़ी अवं आई तैड़ी मेरो
 सेवक भी भोए, ज़ै मेरी सेवा केरते मेरो परमेशर तैस इज़्ज़त देलो।” 27
 “हुना मेरो दिल बड़ो उदास भोरोए। एल्हेरेलेइ अवं कुन ज़ोई? ‘हे बाजी इस
 दुखेरी घेड़ी करां मीं बचा,’ पन अवं इस दुनियाई मां एल्हेरेलेइ ओरोई कि
 दुख झेल्ली। 28 हे बाजी तू केत्रो महिमा बालोस इन बांदू केर।” तैखन
 स्वर्गोंरां अक आवाज़ अई, “मीं तेरी केत्री महिमा बांदी कियोरीए ते फिरी भी
 केरेलो। 29 तैखन तैड़ी जैना मैन्हु खड़े भोइतां शुनी रावरे थिये, तैनेर्ई ज़ोवं,
 गुड़ने लोरुए,” ते होरोई ज़ोवं, “केन्चे स्वर्गदूते तैस सेइं गल की।” 30 यीशुए
 ज़ोवं, “ई आवाज मेरे फैट्टेरे लेइ नई बलके तुश्शे लेइ आए। 31 इस वक्त

परमेश्वर दुनियारे लोकां केरो इन्साफ केरेलो, ते अवं इस शैतानेरी शक्ति नाश केरेलो जै इस दुनियाई पुङ राज्ञ केरते। 32 ते ज़ैखन अवं ज़मीनी पुङां उच्चे चाढ़ा गालो, तैखन अवं सैरी लोकन एप्पू कांजो आनेलो।” 33 एन ज़ोइतां तैनी साफ चारे बांदू कियूं, ते तै केन्चरां मरने बालो। 34 एस पुङ लोकेर्ई ज़ोवं, “असेई मूरेरे कानूने मां ई गल शुनोरीए, कि मसीह हमेशा रानोए, फिरी तू केन्चरे ज़ोतस कि मैनेरु मटू उच्चे पुङ चढ़नू ज़रूरीए? एन मैनेरे मटू कौनेन?”

(aión g165) 35 यीशुए तैन सेइं ज़ोवं, “लौ तुसन कां थोड़े चिरे तगरे आए, ज़ा तगर लौ तुसन साथीए, तांतगर चलते राथ, एरु न भोए आंधरु तुसन घेरे, जै आंधरे मां चलते तै न ज़ाने तै कोरां चलरोए। 36 ज़ांतगर लौ तुसन सेइं साथीए, त लोई पुङ विश्वास केरा ताके तुस लोअरे बच्चे बनथ।” इना गल्लां ज़ोइतां यीशु छेप्पी जेव। 37 तैनी तैन केरे सामने बड़े चमत्कार हिराए, फिरी भी तैनेई विश्वास न कियो। 38 ताके यशायाह नेवेरु ज़ोरु वचन पूरु भोए, “हे प्रभु, केन्चे इश्शे खुशखेबरी पुङ विश्वास न कियो, ते बड़े लोकेर्ई परमेश्वरेरी शक्ति हेरतां भी कबूल न की।” 39 एल्हेरेलेइ तैना विश्वास न केरि सके यशायाह एककी होरि ठैरी ज़ोतेः 40 “तैनी तैन केरि एछळी केनि की, ते मन सखत कियोरोए, एरु न भोए कि तैना एछळन सेइं लान ते मने सेइं बुझन, ते माफी मगन ते अवं तैन बज्झोई।” 41 यशायाह नबी एल्हेरेलेइ ज़ोतो थियो, कि तैनी यीशुएरी एजनेबाली महिमा लवरी थी, ते तैसेरे बारे मां गल भी की। 42 फिरी भी लीडरन मरां बड़ेई यीशु पुङ विश्वास कियो, पन फरीसी लोकां केरे वजाई सेइं बांदे मां न थिये मन्ते, एरु न भोए कि असन प्रार्थना घरे मरां कढन। 43 किजोकि मैन्हु केरि बड़याई तैन परमेश्वरेरी बड़याई करां जादे रोड़ी लगती थी। 44 तैखन यीशुए ज़ोरे सेइं ज़ोवं, “जै कोई मीं पुङ विश्वास केरते तै मीं पुङ नई पन मेरे भेजने बाले परमेश्वरे पुङ विश्वास केरते। 45 ते जै मीं हेरते तै मेरे भेजने बाले हेरते। 46 अवं दुनियाई मां अक लौ बेनतां ओरोई, ताके जै मीं पुङ विश्वास केरे तै आंधरे मां न रालो। 47 अगर कोई मेरी गल्लां शुन्तां तैन पुङ अमल केरे, त अवं तैस दोष न लेइलो, अवं दुनियारे लोकन पुङ दोष लाने नई पन मुक्ति देने ओरोई। 48 जै मेरो इन्कार केरते ते मेरी गल्लां कबूल न केरे, तैस पुङ दोष लानेबालो अकके, मतलब जैन वचन मीं ज़ोरुए, तैन आखरी दिहाड़े तैस दोषी ठैरालू। 49 किजोकि मीं अपने

अधिकारे सेइं किछ नई ज़ोरु, पन बाजी जैने अवं भेज्होरोई तैनी मीं हुकम
दित्तोरोए, कि कुन-कुन ज़ोई ते कुन-कुन शुनेई? 50 ते अवं ज़ानताई कि
तैसेरो हुकम मन्ने सेइं हमेशारी ज़िन्दगीए मैलतीए, एल्हेरेलेइ अवं तुसन सेइं
तैन्ने ज़ोताई ज़ैन ज़ोनेरो हुकम मेरे बाजे मीं दित्तोरोए।” (aiōnios g166)

13 फ़सह तिहारेरे पेइले दिहाडे यीशुए ज़ैनीं छँडू, कि मेरो दुनियाई मरां
बाजी कां वापस गानेरो वक्त ओरोए। तै अपने लोकन सेइं ज़ैना दुनियाई मां
थियो ज़ेरो प्यार केरतो थियो, तेरहो प्यार आखरी तगर केरतो राव। 2 शेताने
शमौनेरे मट्टे यहूदा इस्करियोतेरे दिले मां पेइले यीशु ट्लुवानेरो खियाल छँडोरो
थियो। यीशु त कने तैसेरे चेले ड्लाई खानेरो लोरे थियो। 3 यीशु पतो थियो
कि बाजे सैरी चीज़ां तैसेरे हथ्ये मां दित्तोरिन, ते कने तै परमेशररी तरफां
ओरोए ते परमेशरे कांजो वापस च्छलरोए। 4 एल्हेरेलेइ तै रोट्टी छेडतां खड़ो
उठो ते अपनू कोट खोल्लू, ते अक तोलियो अपने लखे सेइं पलैटो। 5 तैखन
तैनी अक भांड ट्लावं ते तैस मां पानी छाडु ते अपने चेलां केरे पाव धोइतां
लखे बन्धेरे तोलिये सेइं पांछे। 6 ज़ैखन तै शमौन पतरस कां अव त पतरसे
ज़ोवं, “हे प्रभु, कुन तू मेरे पाव धोने लोरस?” 7 यीशुए जुवाब दित्तो, “ज़ैन
अवं केरने लोरोई तू हुन्ना न बुझास, पन पत्ती तू बुझेलो।” 8 पतरसे तैस सेइं
ज़ोवं, “तू मेरे पाव कधे न धोई सकस!” यीशुए तैस सेइं ज़ोवं, “अगर अवं
तेरे पव न धोई, त तू मेरो चेलो नई।” (aiōn g165) 9 शमौन पतरस यीशु सेइं
ज़ोने लगो, “हे प्रभु, तू मेरे पाव नई बल्के हथ ते दोग भी धो।” 10 यीशुए
तैस सेइं ज़ोवं, “ज़ैनी निहावरूए, तैस पावां केरे अलावा होरु धोनेरु किछ
ज़रूरत नई। तै बिलकुल शुद्ध, ते तुस शुद्धथ, पन सारे नई।” 11 तै त ट्लुवाने
बाले ज़ानतो थियो एल्हेरेलेइ तैनी ज़ोवं, “तुस सब शुद्ध नई।” 12 ज़ैखन
यीशुए सेब्बी केरे पाव धोए त अपनू कोट लेइतां अपनि ठैरी बिश्शो तैखन
तैनी तैन पुच्छू, “कुन तुस समझतथ कि मीं तुसन सेइं कुन कियूं? 13 तुस
मींजो गुरु, ते प्रभु ज़ोतथ, तुशू ज़ोनू ठीके, किजोकि अवं आई। 14 अगर मीं
तुश्शो गुरु त कने प्रभु भोइतां तुश्शे पाव धोए, त तुश्शो भी फर्जे कि एककी
होरेरे पाव धोथ। 15 किजोकि मीं तुसन अक नमूनो हिराव, कि ज़ेन्चरे मीं
पाव धोए तुस भी एरु केरथ। 16 अवं तुसन सेइं सच-सच ज़ोताई, कि नौकर
अपने मालिके करां बढ़ो न भोए, ते न भेज्होरो भेजने बाले करां। 17 तुस त

एना गल्लां ज्ञानतथ, ते अगर तैन पुढ़ अमल केरतथ त तुस धन आथ। 18
 अवं तुसन सेब्ही केरे बारे मां न जोई, जैना मीं चुनोरेन अवं तैन ज्ञानताई, पन
 इन एल्टेरेलोइ आए, कि पवित्रशास्त्रेरु एन वचन पूरु भोए, जैने मेरी रोट्टी
 खाइ, तैए मेरे खलाफ भोव। 19 अवं तैन भोने करां पेइले तुसन जोताई कि
 जैखन भोए त विश्वास केरथ कि अवं तैए आई। 20 अवं तुसन सेइं सच्च-सच्च
 जोताई कि, जै मेरे भेजोरे कबूल केरते तै मीं कबूल केरते, ते जै मीं कबूल
 केरते तै मेरे भेजनेबाले बाले कबूल केरते।” 21 एना गल्लां ज्ञोइतां यीशु
 आत्माई मां उदास भोइतां बड़ो दुःखी भोव, ते अपने चेलन सेइं जोने लगो,
 “अवं तुसन सेइं सच्च-सच्च जोतां, कि तुसन मरां एकके अवं ट्लुवानोई।” 22
 चेले एककी होरेरे पासे तकने लगो, किजोकि तैन पतो न थियो कि ए केसेरे
 बारे मां जोने लोरोए। 23 तैसेरे चेलन मरां अक चेलो जैस सेइं यीशु प्यार
 केरतो थियो, यीशुएरे नेड़े बिशोरो थियो। 24 तैखन शमौन पतरसे तैसेरे पासे
 इशारे सेइं पुच्छू, “ज्ञो कसेरे बारे मां जोने लोरोए?” 25 तैखन तेन्चरे यीशुएरे
 छैतरे पासे लिकतां पुच्छू, “हे प्रभु, तै कौनेद्दा?” 26 यीशुए जुवाब दित्तो, “जैस
 अवं ई रोट्टो टुकड़ो डोबतां देह्लो तैए।” ते यीशुए टुकड़ो डोबतां शमौनेरे मट्टे
 यहूदा इस्करियोती दित्तो। 27 ते टुकड़ो नेनेरे पत्ती तै शैतानेरे बस्से मां भोइ
 जेव, तैखन यीशुए तैस ज्ञोवं, “तीं जैन किछ केरनूए, लूशी केर।” 28 पन
 होरि केन्ची ए पतो न लगो कि ए गल यीशुए केसेरे बारे मां की। 29 यहूदा कां
 पेइसां केरी थेलड़ी भोती थी, ते किछेई समझू, कि यीशु तैस सेइं ज्ञोते, कि
 जैन किछ असन तिहारेरे लेइ लोड़ते तैन घिन्ने, या गरीबन किछ दे। 30 तैखन
 यहूदा टुकड़ो खेइतां बेद्दर चलो जेव, तै रातरो वक्त थियो। 31 जैखन तै बेद्दर
 जेव त यीशु जोने लगो, “हुनी मैनेरे मट्टे यानी मेरी महिमा भोइ, ते मेरे जिरिये
 परमेश्वरी महिमा भोइ, 32 ते परमेश्वर भी मीं एप्पू महिमा बालो केरेलो,
 बल्के जल्दी केरेलो। 33 हे मेरे दोस्तव, अवं किछ चिरेरे लेइ हेजू तुसन सेइं
 साथी आई, फिरी तुस मीं तोप्पेले, ते जेन्चरे मीं यहूदन भी ज्ञोवं, जैड़ी अवं
 गाताई तैड़ी तुस न एज्जी बटथ, तेन्चरे अवं तुसन सेइं भी ज्ञोताई। 34 अवं
 तुसन अक नंब्वो हुक्म देताई कि, एककी होरि सेइं प्यार केरा, जेन्चरे मीं
 तुसन सेइं प्यार कियो तुस भी एकके होरि सेइं प्यार केरा। 35 अगर तुस
 एकके होरि सेइं प्यार केरेले त सेब्ही लोकन पतो लगेलो, कि तुस मेरे

चेलेथ।” 36 शमैन पतरसे तैस पुळ्हू, “हे प्रभु तू कोरां च्लोरोस?” यीशुए जुवाब दितो, “ज़ेरां अवं च्लोरोई तू हुना मीं सेइं साथी न एज्जी सकस, पन बादे मां एज्जी सकतस।” 37 पतरसे ज़ोवं, “हे प्रभु अवं हुना तीं सेइं साथी किना एज्जी सेखी? अवं त तेरे लेइ अपनि जान भी देनेरे लेइ तियार आई।” 38 यीशुए जुवाब दितो, “कुन तू मेरे लेइ अपनि जान देलो, अवं तीं सेइं सच-सच ज़ोताई कि कुकड़ बांग देने करां पेइले तू मेरो ट्लेइ बार इन्कार केरेलो।”

14 “तुश्शो दिल उदास न भोए, तुस परमेशरे पुड़ विश्वास केरतथ, मीं पुड भी विश्वास केरा। 2 मेरे बाजेरे घरे मां बड़े कमरेन, अगर न भोथी त अवं तुसन सेइं ज़ोथो, किजोकि अवं तुश्शे लेइ ठार तियार केरने च्लोरोई। 3 अगर गेइतां तुश्शे लेइ ठार तियार केरि त वापस एइतां तुसन एप्पू सेइं साथी नेलो, ताके ज़ैडी अवं भोलो तुस भी तैडी भोथ। 4 ते ज़ेरां अवं च्लोरोई तुस तैठेरी बत ज्ञानतथ।” 5 थोमा तैस ज़ोवं, “हे प्रभु, असन नई पतो तू कोरां च्लोरोस, ते फिरी बत केन्चरे ज्ञानम?” 6 यीशुए तैस सेइं ज़ोवं, “बत, सच्ची ते हमेशारी जिन्दगी अव्वे आई, कोई मेरे ज़िरियेरे बगैर बाजी कां न एज्जी सके। 7 अगर तुसेई अवं पिशानोरो भोथो त मेरे बाजी भी पिशानेथे, पन हुनी तुस तैस ज्ञानतथ ते कने लाव भी।” 8 फिलिप्पुसे तैस सेइं ज़ोवं, “हे प्रभु असन बाजी हिरा, तैन्ने इश्शे लेइ बडू आए।” 9 यीशुए तैस सेइं ज़ोवं, “फिलिप्पुस, एते चिरे अवं तुसन सेइं साथी राव कुन तू मीं न ज्ञानस ज़ैनी अवं लाव तैनी बाजी भी लाव तू किजो ज़ोतास असन बाजी हिरा? 10 कुन तू विश्वास न केरस, कि अवं बाजी मां आई ते बाजी मीं मां आए? अवं ज़ैना गल्लां तुसन सेइं ज़ोताई तैना गल्लां अवं अधिकारे सेइं न ज़ोई, बल्के बाजी मीं मां रेइतां अपनू कम केरतो। 11 मेरो विश्वास केरा, कि अवं बाजी मां आई ते बाजी मीं मां आए, नई त ज़ैना कम्मां केरताई तैन हेरतां मीं पुड़ विश्वास केरा।” 12 अवं तुसन सेइं सच-सच ज़ोताई, “कि ज़ै मीं पुड़ विश्वास केरते, एना कम्मां ज़ैना अवं केरताई तै भी केरेलो, बल्के मीं करां भी बडां कम्मां केरेलो, किजोकि अवं बाजी कां च्लोरोई। 13 जैन किछ तुस मेरे नंवे सेइं मगेले अवं तुसन देलो कि बाजी केरि महिमा मट्टोरे वजाई सेइं बांदी भोए। 14 अगर तुस मेरु नंवे सेइं किछ भी मगेले त अवं तैन केरेलो।” 15 “अगर तुस

मीं सेइं प्यार केरतथ त मेरे हुक्मन मन्नेलो। 16 अवं बाजी कां प्रार्थना
केरेलो ते तै तुसन अक मद्दतगार देलो कि हमेशा तुसन सेइं साथी रालो।

(aiōn g165) 17 मतलब तै आत्मा जै परमेशरेरे बारे मां सच बांदू केरेली,
जै दुनिया कबूल न केरि सके, किजोकि न तैस लेइहोए न ज़ाने, तुस तैस
ज्ञातथ किजोकि तै तुसन साथी रहती, ते तै तुसन मां भोली। 18 अवं तुसन
अकैल्लो न शेरेलो बल्के अवं तुसन कां एज्जेलो। 19 ई दुनिया किछ चिरेरां
बाट मीं न लाएली, पन तुस मीं लांते राले, किजोकि अवं ज़ींतोई ते तुस भी
ज़ींते राले। 20 ज़ैखन अवं ज़ींतो भोलो तेइस तुसन पतो लगेलो, कि अवं
अपने बाजी मां आई ते तुस मीं मां आथ ते अवं तुसन मां आई। 21 ज़ैस कां
मेरे हुक्म आन ते तैन मन्ते, त तैए मीं सेइं प्यार केरते ते मेरो बाजी तैस सेइं
प्यार केरेलो, ते अवं तैस सेइं प्यार केरेलो, ते अपनो आप तैस पुड़ बांदो
केरेलो।” 22 तैखन यहूदा (तै यहूदा इस्करियोती न थियो बल्के होरो चेलो
थियो) तैस सेइं ज़ोवं, “हे प्रभु कुन भोव कि तू अपनो आप असन पुड़ बांदो
केरनो चातस ते दुनियारे लोकन पुड़ नई?” 23 यीशुए जुवाब दित्तो, अगर
कोई मीं सेइं प्यार केरते त तै मेरी शिक्षाई मन्ते, ते मेरो बाजी भी तैस सेइं
प्यार केरेलो, ते अस तैस कां एजमेले ते तैस सेइं साथी रामेले। 24 जै मीं सेइं
प्यार न केरे, तै मेरे शिक्षाई न मन्ने, जै शिक्षा तुस शुन्ने लोरेथ, मेरी नई पन
मेरे बाजी केरि ज़ैने अवं भेज़ोरोई। 25 “एना सैरी गल्लां मीं तुसन साथी
रेहतां ज़ोई। 26 पन तै मद्दतगार यानी पवित्र आत्मा ज़ैस बाजी मेरे ठैरी
भेज़ेलो, तुसन सैरी गल्लां शिखालेलो, ते हर गल जै मीं तुसन सेइं ज़ोरी याद
करालो।” 27 अवं तुसन शान्ति देहतां जै मीं कां आए, ज़ेन्चरे दुनिया देचे
तेन्हरे नई, तुश्शो दिल उदास न भोए ते न डेरथ। 28 तुसेई शुनू, मीं तुसन
सेइं ज़ोवं, अवं गाताई तुसन कां फिरी एज्जेलो अगर तुस मीं सेइं प्यार केरते
भोते त खुशी भोने थिये, कि अवं बाजी कां चलोरोई किजोकि बाजी मीं करां
बड़ोए। 29 मीं सैरी गल्लां पेइले तुसन ज़ोरिन कि ज़ैखन तैना पूरी भोन त
तुस विश्वास केरेले। 30 हुनी अवं तुसन सेइं जादे गल्लां न केरेलो, किजोकि
शैतान एइते, जै इस दुनियाई पुड़ राज केरनेबालोए। मीं पुड़ तैसेरो किछ
अधिकार नई। 31 ज़ेन्चरे बाजीए मीं हुक्म दित्तो, अवं तेन्हरे केरताई। पन एन

एल्हेरेलेइ भोते कि दुनिया ज़ाने, कि अवं बाजी सेइं प्यार केरताई। ते उठा
इट्टां च्चलम।

15 यीशुए ज़ोवं “अवं दाछारू सच्चू बड़ह अच्वें आई, ते मेरो बाजी बागबाने।
2 जै डालड़ी मीं मां आए, ते तैस फल न लगे, तै कट्टी गानीए, ते जैस फल
लगते तैस छांटते कि जादे फल लगे। 3 तुस तैस शिक्षाई सेइं जै मीं तुसन
दित्तोरीए शुद्ध आथ। 4 तुस मीं मां बनोरे राथ, ते अवं तुसन मां, ज़ेन्चरे
डालड़ी अगर बड़हे सेइं बनोरी न राए, त अपने आप सेइं तैस फल न लगे। 5
तेन्चरे तुसन भी अगर मीं मां बनोरे न राले त तुस फलदार न भोइ सकेले। 6
अवं दाछारू बड़ह आई, तुस डेलड़ी आथ, जै मीं मां बनोरो रहते तैस खूब
फल लगते, किजोकि मीं करां अलग भोइतां तुस किछ न केरि सखत। 6
अगर कोई मीं मां बनोरो न राए, त तैस डेलड़ारो ज़ेरोए जैस केटतां शारतन,
ते शुककी गाचे, ते लोक घेरतां अग्गी मां फुकी छँडतन। 7 अगर तुस मीं मां
बनोरे रातथ ते मेरी गल्लां तुसन मां बेनोरी रैतिन त ज़ैन चाहेले ते मगेले तुसन
दित्तू गालू। 8 मेरे बाजेरी महिमा एसमां आए कि तुस हछो फल आनां, फिरी
तुस मेरे चेले भोले। 9 ज़ेन्चरे बाजे मीं सेइं प्यार कियो, तेन्चरे मीं भी तुसन
सेइं प्यार कियो। मेरे प्यारे मां बनोरे राथ। 10 अगर तुस मेरे हुक्मन मन्नेले, त
मेरे प्यारे मां बनोरे राले, ज़ेन्चरे मीं अपने बाजेरे हुक्म मन्ने, ते तैसेरे प्यारे मां
बनोरो राव। 11 मीं एना गल्लां एल्हेरेलेइ तुसन ज़ोरिन, कि मेरी खुशी तुसन
मां बनोरी राए।” 12 “मेरो हुक्मे ई आए ज़ेन्चरे मीं तुसन सेइं प्यार कियो,
तुस भी एककी होरि सेइं प्यार केरा 13 एस करां जादे प्यार केन्चे नई कियोरो,
कि कोई अपने दोस्तां केरे लेइ अपनि जान दे। 14 जै हुक्म अवं देताई, अगर
तुस तैस मन्नथ, त मेरे दोस्त आथ। 15 अज़ज़ेरे बाद अवं तुसन जो नौकर न
ज़ोइलो, किजोकि नौकर न ज़ाने कि तैसेरो मालिक कुन केरते। मीं तुसन जो
दोस्त ज़ोरुए, किजोकि ज़ैन किछ मीं बाजी करां शुनोरुए तुसन भी शुनावरु
आए। 16 तुसेई अवं नई चुनोरो पन मीं तुस चुनोरेथ ते ठहरावरे भी आथ,
ताके तुस गेइतां फल आनथ, ते तुश्शो फल बनोरो राए, कि तुस मेरे नंवे सेइं
बाजी करां ज़ैन किछ मगथ, तै तुसन देलो किजो तुस मेरे चेलेथ। 17 अवं इन
गल्लां केरो हुक्म एल्हेरेलेइ देताई, कि तुस एककी होरि सेइं प्यार केरा।” 18
“अगर दुनियारे लोक तुसन सेइं दुश्मनी रखतन, त याद रखा कि तैनई पेइले

मीं सेइं दुश्मनी रख्खोरी। 19 अगर तुस दुनियारे भोथे, त दुनिया अपने लोकन सेइं प्यार केरती, पन हुनी तुस दुनियारे लोक नई किजोकि मीं तुस दुनियाई मरां चुनोरेथ तांए दुनियारे लोक तुसन सेइं दुश्मनी रखतन। 20 तै गल जै मीं तुसन सेइं ज़ोरी थी याद रख्खा, नौकर अपने मालिके करां बड्हो न भोए, अगर दुनियां अवं सतेवरोइं त तैना तुसन भी सताले, अगर तैनेई मेरी गल्ली पुड अमल कियूं त तुश्शी गल्ली पुड भी अमल केरेले। 21 पन तैना लोक तुसन सेइं एरो ज़ेरो बताव केरेले, किजोकि तुस मेरे चेलेथ। तैना मेरे भेजने बाले परमेश्वरे न ज्ञानन्। 22 अगर मीं एइतां तैन सेइं गल्लां न भोथी कियोरी त तैना पापी न थिये भोने, पन हुनी तैन केरे पापेरो तैन कां कोई बहानो नई। 23 जै मीं सेइं दुश्मनी रखते, ते तै मेरे बाजी सेइं भी दुश्मनी रखते। 24 अगर मीं तैन केरे सामने तैना चमत्कार न भोथे कियोरे, जैना कधी होरे केन्चे नई कियोरे त तैना पापी न थिये भोने, पन हुनी तैनेई सब किछ लाव, ते मीं भी ते बाजी सेइं दुश्मनी रख्खी। 25 पन एन एल्हेरेलेइ भोवं कि तैन केरे कानूने मां लिखोरी तै गल पूरी भोए, तैनेई मीं सेइं खामखा दुश्मनी रख्खी। 26 पन जैखन तै मद्दतगार एज्जेलो जैस अवं अपने बाजेरे तरफां भेजेलो, मतलब सच्चेरी आत्मा, जै बाजी केरि तरफां एइतीए, तै मेरी गवाही देली। 27 ते तुस भी गवाह आथ किजोकि तुस भी शुरू करां मीं सेइं साथी थिये।”

16 “मीं तुसन एना सैरी गल्लां एल्हेरेलेइ ज़ोई कि तुश्शो विश्वास न ट्लुटे। 2 तैनेई तुस प्रार्थना घरन मरां कढनेथ, खास केरतां एरो ज़ेरो वक्त एज्जी राहोरोए, जै तुसन मारेलो तै इन समझेलो कि तै परमेश्वरी सेवा केरने लोरोए। 3 तैन एन सब एल्हेरेलेइ केरेले कि न तैनेई कधी मेरो बाजी जानो ते न कधी अवं। 4 पन मीं एना सैरी गल्लां एल्हेरेलेइ तुसन सेइं ज़ोई, कि जैखन तैना पूरी भोनेरो वक्त एज्जेलो, त तुसन याद एज्जे, कि मीं तुसन एन पेइलू ज़ोरु थियूं, ज़ेइस तुस मेरे चेले बनोरे थिये। मीं एना गल्लां केरे बारे मां पेइलू एल्हेरेलेइ न ज़ोवं, कि अवं एप्पू तुसन सेइं साथी थियो।” 5 “पन हुन्ना अवं अपने भेजने बाले कां चलोरोई, पन तुसेई केन्चे भी न पुच्छू कि तू कोरां चलोरोस? 6 पन मीं तुसन सेइं ज़ोई छ़डेरुए एल्हेरेलेइ तुश्शो मन उदास आए। 7 फिरी भी अवं तुसन सेइं सज़ ज़ोताई कि मेरु इट्टां गानू तुश्शे लेइ फैइदोए, अगर अवं न गेइलो त तै मद्दतगार तुसन कां नई एजनो, पन

अवं ग्लो जेव त तैस अवं तुसन कां भेजी देलो। ८ ते जैखन तै एज्जेलो त
 दुनियाई पाप ते धार्मिकता ते इन्साफेरे बारे मां सब किछ बांदू केरेलो। ९
 पापेरे बारे मां एल्हेरेलेइ कि दुनियां मीं पुड़ विश्वास न कियो, १० धार्मिकतारे
 बारे मां एल्हेरेलेइ कि अवं वापस बाजी कां ग्लोरोई ते तुसेई अवं फिरी नई
 लहनो, ११ इन्साफेरे बारे मां एल्हेरेलेइ कि, शैतान जै दुनियाई पुड़ राज़
 केरनेबालो मुर्जम बनोरोए।” १२ “अवं तुसन सेइं होरु भी बडू किछ ज्ञोनू
 चाताई, पन हुन्ना तुसेई तैन झौली नई बटनू। १३ पन जैखन तै मतलब सच्चेरी
 आत्मा एज्जेली त तै सच्चेरी बत हिराली, किजोकि तै अपने तरफां न ज़ोली,
 पन जैखन किछ परमेशरे करां शुनेली तैने ज़ोली, ते एजने बैली गल्लां
 ज़ोली। १४ ते मेरी महिमा केरेली किजोकि तै मेरी गल्लां ज़ोली, किजोकि तै
 मेरी गल्लन मरां तुसन सेइं ज़ोली। १५ जैन किछ बाजी केरुए, तैन सब
 मेरुए, एल्हेरेलेइ मीं ज़ोवं, कि तै मेरी गल्लन मरां शुनालो।” १६ “थोड़े चिरेरां
 पत्ती तुसेई अवं फिरी नई लहनों, ते तैसेरे थोड़े चिरेरां पत्ती तुसेई अवं फिरी
 लांनोई।” १७ तैखन तैसेरे किछ चेलेई एप्पू मांमेइं ज़ोवं, इन कुने, “ए कुन
 ज़ोते, थोड़े चिरेरां पत्ती तुस मीं न लाएले, ते फिरी थोड़े चिरेरां पत्ती तुस मीं
 लाएले? कि अवं बाजी कां गाताई?” १८ तैखन तैनेई ज़ोवं, “थोड़े ज़ेरे चिरेरां
 बाद, एन जै ए ज़ोते, कुन आए? अस न ज्ञानम कि कुन?” १९ यीशुए एन
 जैनतां, कि एना मीं पुछ्नू चातन, “कुन तुस मेरी इस गल्लरे बारे मां एप्पू
 मांमेइं गलबात केरने लोरेथ, कि एस गल्लारो कुन मतलबे, थोड़े चिरेरां पत्ती
 मीं न लाएले, ते फिरी थोड़े चिरेरां पत्ती लाएले? २० अवं तुसन सेइं सच-सच
 ज़ोताई, कि तुस लेरां देले ते शोग बनाले, पन दुनियारे लोक खुशी भोले, पन
 जैखन तुस मीं दुबारां लाएले त तुश्शो दुःख, खुशी मां बेदलोई गानोए। २१
 जैखन कुआन्श जातीए त तैस बड़ी तकलीफ भोतीए, किजोकि तैसेरे दुःखेरी
 घड़ी नेड़े पुजोरीए, पन जैखन बच्चो ज़र्मते त एस खुशी मां कि दुनियाई मां
 अक मैन्हु पैदा भोरोए अपनि तकलीफ बिस्सरी गाचे। २२ ते तुसन भी हुन्ना
 तेरही तकलीफे, पन अवं तुसन सेइं फिरी मिलेलो, ते फिरी तुश्शे मने मां
 खुशी भोली, ते खुशी तुसन करां कोई न नेही सकेलो। २३ तैस वक्ते तुस
 मीं कोई किछ न पुछेलो, अवं तुसन सेइं सच-सच ज़ोताई, तुस मेरे नंवे
 सेइं बाजी करां जैन किछ मगथ, ते तुसन देलो किजो तुस मेरे चेलेथ। २४

तुसेई मेरु नवं घिन्तां हुना तगर बाजी करां किछ नई मगेरु, मगेले त तुसन मैल्ली गालू, ते तुश्शी खुशी पूरी भोली।” 25 “अवं तुसन एना गल्लां मिसाल देइतां ज्ञोताई, पन तै वक्त ओरोए कि अवं कहैन्न मां फिरी न ज्ञोइलो, पन रोड़े च्चारे बाजेरे बारे मां तुसन सेइं गल्लां केरेलो। 26 तैस वक्ते तुस मेरु नवं घिन्तां प्रार्थना केरेले, अवं इन न ज्ञोई, कि तुश्शे लेइ बाजी सेइं बिनती केरि। 27 किजोकि बाजी परमेश्वर तुसन सेइं एप्पू प्यार केरते, एल्हेरेलेइ कि तुसेई मीं सेइं प्यार कियो, ते तुसेई विश्वास कियोरोए कि अवं परमेश्वरी तरफां ओरोई। 28 अवं बाजी करां दुनियाई मां ओरोई, हुनी दुनियाई मरां भोइतां वापस बाजी कां च्चलोरोई।” 29 तैसेरे चेलेई ज्ञोवं, “हुन्ना तू साफ-साफ गल लोरस केरने, ते कोई मिसाल देइतां न ज्ञोस। 30 हुन्ना असेई बुझू कि तीं सब किछ पत्तोए, ते ज्ञारत नई कि कोई तीं पुछे, असां विश्वास केरतम कि तू परमेश्वरे करां ओरोस।” 31 यीशुए तैन सेइं ज्ञोवं, “हुनी तुस विश्वास केरतथ! 32 हेरा, तै वक्त एज्जी राओरोए बलके पुज्जोरोए, कि तुस सब नेशतां अपने-अपने बत्तां गानेथ, ते अवं अकैल्लो शारनोई पन फिरी भी अवं अकैल्लो नई, किजोकि मेरो बाजी मीं सेइं साथीए। 33 मीं तुसन एना गल्लां एल्हेरेलेइ ज्ञोई, ताके तुसन शान्ति मैल्ले, किजो तुस मेरे चेलेथ, तुस दुनियाई मां मुसीबत त उठाताथ, पन हिम्मत रखा, मीं शैताने पुड़ ज़ींत हासिल कियोरीए, जै इस दुनियाई पुड़ राज़ केरतो।”

17 जैखन यीशुए अपने चेलन सेइं एना सब गल्लां ज्ञोई, त तैनी उबरु स्वर्गेरां तेकतां ज्ञोवं, “हे बाजी हुन्ना तै वक्त ओरोए कि तू अपने मट्टेरी महिमा केर, कि मट्टू भी तेरी महिमा केरे। 2 किजोकि तीं तैस सेब्बी मैनन् पुड़ अधिकार दित्तोरोए, जैना तीं तैस दित्तोरेन हमेशारी जिन्दगी दे। (aiōnios g166) 3 ते हमेशारी जिन्दगी तै आए, कि तैना सिर्फ तीं एककी सऱ्चये परमेश्वरे ज्ञानन् ते यीशु मसीहे भी ज्ञानन् जै तीं भेज्जोरोए। (aiōnios g166) 4 मीं तैन कम जैन तीं मीं दित्तेरु थियूं मुकेइतां धेरतली पुड़ तेरी महिमा की। 5 ते हुनी हे बाजी मीं एप्पू सेइं साथी मेरी तै महिमा केर जै दुनियारे पेइली मेरी तीं साथी थी।” 6 “मीं तेरु नवं तैन कां बांदू कियूं, जैना तीं दुनियाई मरां चुनतां मीं दित्तोरेन तैना तेरे थिये, पन तीं मींजो दित्तोरेन ते तैनेई तेरे बचने पुड़ अमल भी कियोरुए। 7 हुनी तैना ज्ञानतन, कि जैन किछ तीं मीं दित्तेरु तैन सब

तेरी तरफांए। ८ एल्हेरेलेइ मीं तैना गल्लां ज़ैना तीं मीं दित्तोरी थी, मीं तैन पुज़ेई ते तैनेई तैन पुड़ विश्वास कियो, ते सव्र पिशानू, कि अवं तेरी तरफां ओरोई, ते ई भी विश्वास कियो कि तीं अवं भेज़ोरोई। ९ अवं तैन केरे लेइ प्रार्थना केरताई, दुनियारे लोकां केरे लेइ न केरि, पन तैन केरे लेइ ज़ैना तीं मीं दित्तोरेन, किजोकि तैना सब तेरे आन। १० ते ज़ैन किछ मेरु आए, तैन सब किछ तेरुए, ते ज़ैन तेरु तैन मेरुए, ते इन सेइं मेरी महिमा बांदी भोई। ११ मीं हुनी इस दुनियाई मां नई रानू, पन तैना हेजू इस दुनियाई मां आन, ते अवं तीं कां एजताई, हे पवित्र बाजी, अपने तैस नंवे सेइं ज़ैन तीं मीं दित्तोरुए, तैन केरि हफाज़त केर, कि तैना असन बराबर भोन। १२ ज़ैखन अवं तैन सेइं साथी थियो, मीं तेरे तैस नंवे सेइं, ज़ैन तीं मीं दित्तोरुए, तैन केरि हफाज़त की, मीं तैन केरि देख भाल की, नाश भोनेबाले मैनेरे अलावा कोई नाश न भोव, एल्हेरेलेइ पवित्रशास्त्रेरी गल पूरी भोइ। १३ पन हुन्ना अवं तीं कां एजताई, ते इना गल्लां अवं दुनिया मां ज़ोताई, कि तैना मेरी खुशी एप्पू मां पूरी केरन। १४ मीं तैन तेरु वचन तैन कां पुज़ेवरुए, ते दुनियारे लोकेई तैन सेइं दुश्मनी रख्खी, किजोकि ज़ेन्चरे अवं दुनियारो नई, तैना भी नई। १५ मेरी प्रार्थना ई नई कि तू तैन दुनियाई मरां ने, पन तू तैन शैताने करां बचेइतां रख। १६ ज़ेन्चरे अवं दुनियारो नई तैन भी इस दुनियारे नई। १७ तेरु वचन सऱ्हे। सऱ्हेरे ज़िरिये सेइं तैन पवित्र केर। १८ ज़ेन्चरे तीं अवं दुनियाई मां भेज़ोरोई तेन्चरे मीं भी तैना दुनियाई मां भेज़ोरेन। १९ अवं अपनो आप तैन केरे लेइ पवित्र केरताई, ताके तैना भी सऱ्हेरे ज़िरिये सेइं पवित्र भोन।” २० “मेरी प्रार्थना सिर्फ चेले केरे लेइ नई, पन तैन केरे लेइ भी ज़ैना तैन वचनेरे ज़िरिये मीं पुड़ विश्वास केरेले। २१ कि तैना सब अक भोन, ज़ेन्चरे तू बाजी मीं मां आस, ते अवं तीं मां आई तेन्चरे तैना असन मां भोन, एल्हेरेलेइ दुनियारे लोक विश्वास केरन, कि तींए अवं भेज़ोरोई। २२ ते तै महिमा ज़ै तीं मीं दित्तोरीए, कि ज़ेन्चरे अस अक आम तैन भी अक भोन। २३ अवं तैन मां भोइलो, ते तू मीं मां भोलो, ताके तैन पूरो अकीजो भोए, ते दुनिया ज़ाने कि तीं अवं भेज़ोरोई। ज़ेन्चरे तीं मीं सेइं प्यार कियो, तेन्चरे तीं तैन सेइं भी प्यार कियो। २४ हे बाजी अवं चाताई कि ज़ैना तीं मीं दित्तोरेन, ज़ैडी अवं आई तैडी तैना भी मीं सेइं साथी भोन, कि तैना भी मेरी महिमा हेरन, जै तीं मीं दित्तोरीए।

दुनियारे रचने करां भी पेइले तीं, मीं सेइं प्यार कियोरोए। 25 हे धर्मी बाजी,
दुनियां तू न पिशानो, पन मीं तू पिशानो, ते तैन चेलेई भी अवं पिशानो कि तीं
अवं भेज़ोरोई। 26 मीं तैन पुड़ बांटू कियूं, कि तू कौन आस, ते बांटू केरतो
रालो, जैस प्यारे सेइं तीं मीं प्यार कियो, तै तैन मां भोए, ते अवं तैन मां
बनोरो रेई।”

18 यीशुए ए प्रार्थना केरतां झाडी, त अपने चेलन सेइं साथी किद्रोन वैदरे
पार जेव। तैड़ी अक बाग थी तै ते तैसेरे चेले तैड़ी जे। 2 तैस ट्लुवांने बालो
यहूदा तैस ठारारो बाकम थियो, किजोकि यीशु अपने चेलन सेइं साथी तैड़ी
केही फेरेई जोरो थियो। 3 तैखन यहूदे, रोमी सिपाही ते किछ प्रधान याजक ते
फरीसी केरे तरफां भेज़ोरे लोकन सेइं साथी एन्तां दीये ते मिसालां ते हथियार
घिन्तां तैड़ी पुजाए। 4 तैखन यीशु सब गल्लां जैना तैस सेइं भोनेबैली थी,
बुझतां तैन सेइं ज़ोने लगो, “तुस केस लोरेथ तोपने?” 5 तैनेई तैस जुवाब
दित्तो, “यीशु नासरी।” यीशुए तैन सेइं ज़ोवं, “अवं तैए आई।” तैस ट्लुवाने
बालो यहूदा भी तैन सेइं साथी खड़खडो थियो। 6 जैखन यीशुए ज़ोवं, “अवं
तैए आई,” तैना पत्रोवं ज़मीनी पुड़ झ़डे। 7 एल्हेरेलेइ तैनी फिरी पुच्छू, “तुस
केस लोरेथ तोपने?” तैनेई जुवाब दित्तो, “यीशु नासरी।” 8 यीशुए जुवाब
दित्तो, “मीं त ज़ोवं कि अवं तैए आई, अगर तुस मीं तोप्पतथ, त एन लोकन
गाने देथ।” 9 एन एल्हेरेलेइ भोवं, कि तैन वचन पूरू भोए, “जैना तीं मीं
दित्तो, तैन मरां मीं अक भी न हिरव।” 10 शमौन पतरसे कां अक तलवार थी,
तैनी तलवार केढतां महायाजकेरे नौकरे बाई ते तैसेरो देइने कन्न केटव। तैस
नौकरे नवं मलखुस थियूं। 11 तैखन यीशुए पतरसे ज़ोवं, “अपनि तलवार
मियांने मां रख, कुन अवं तै दुखेरो कटोरो न पीं ज़े मेरे बाजे मीं पीनेरे लेइ
दितोए?” 12 तैखन रोमी फौवजी ते तैन केरे सूबेदार ते यहूदी केरे लीडरेई
यीशु ट्लाव तै बंधे। 13 ते पेइलो हन्ना कां नीयो किजोकि तै कैफारो शेरहो
थियो ज़ै तैस सालेरो महायाजक थियो। 14 ई तैए कैफाए जैनी यहूदन सलाह
दित्तोरी थी, कि इश्शे लोकां केरे लेइ एककी मैनेरु मरनू रोडू आए। 15 शमौन
पतरस ते अक होरो चेलो यीशु पत्ती जे। तै चेलो महायाजकेरो बाकम थियो,
तै यीशु सेइं साथी महायाजकेरे अंगने मां जेव। 16 पन पतरस बेइर दारे पुड़
खड़ो थियो, तै होरो चेलो ज़ै महायाजकेरो बाकम थियो वापस अव, ते तैस

नौकरैनी सेइं जै दारे पुड थी गल केरतां पतरस अन्तर नीयो। 17 तैस नौकरेनां
 जै दारे पुड थी पतरसे पुच्छू, “कुन तू भी तैसेरे चेलन मरां आस?” पतरस
 ज़ोवं, “नई अवं नई!” 18 ठंडारे वजाई सेइं नौकरेर्ह ते मन्दरेरे पहरदारेर्ह अग
 बालोरी थी, ते पतरस भी तैन सेइं साथी अग लोरो थियो तपने। 19 तैखन
 महायाजक यीशुएरे चेलां त कने तैसेरी शिक्षारे बारे मां पुच्छने लगो। 20
 यीशुए जुवाब दितो, “मीं त सेब्धी केरे सामने सैरी गल्लां कियोरिन, मीं
 त रोज़ तुशो प्रार्थना घरन ते मन्दरे मां, ते जैडी यहूदी अकोटु भोतन तैडी
 शिक्षा दिती, ते छेपतां किछ भी न ज़ोवं। 21 तू मीं ए सवाल किजो पुछतस?
 शुन्नेबालन पुच्छू, कि मीं तैन सेइं कुन ज़ोवर्सु? हेर तैन पतोए, कि मीं कुन
 ज़ोवर्सु।” 22 जैखन तैनी ज़ोवं, त मन्दरेरे पहरदारन मरां अक जै तैडी खड़ो
 थियो, तैनी यीशुए थप्पड़ बैइतां ज़ोवं, “कुन तू महायाजक एन्चरे जुवाब
 देतस?” 23 यीशुए तैस जुवाब दितो, “अगर मीं किछ बुरू ज़ोर्सु त साबत
 केर, पन अगर रोडु ज़ोर्सु त थप्पड़ किजो बातस?” 24 तैसेरां बाद हन्ना
 यीशुएरे हेजू बन्धोरो थियो तेन्चरे महायाजक कैफा कां भेज्जो। 25 शमैन
 पतरस खड़खड़ो अग लोरो थियो तपने। तैखन केन्चे तैस पुच्छू, “कुन तू भी
 तैसेरे चेलन मरां आस?” पतरस इन्कार केरतां ज़ोवं, “नई अवं नई।” 26
 महायाजकेरे नौकरन मरां अक जै तैसेरो रिशतेदार थियो, ज़ेसेरो कन्न पतरसे
 तलवारी सेइं कटोरो थियो, ज़ोने लगो, “कुन मीं तू बागी मां यीशु साथी नई
 लाहोरो?” 27 पतरसे फिरी इन्कार कियो, ते तैखन कुकड़े भी बांग दिती।
 28 तैनई यीशु झेझां कैफा करां रोमी गवर्नर पिलातुसेरे महले मां नीयो, पन
 तैना एप्पू अन्तर न जे, ताके भिटे न भोन, ते फसह तिहारेरी रोटी खेइ बटन।
 29 तैखन पिलातुस तैन कां बेइर अव ते ज़ोने लगो, “तुस इस मैन्हु पुड कुन
 इलजाम लातथ?” 30 तैनई तैस जुवाब दितो, “ए मैन्हु मुर्जम न भोथो त
 असेई ए तीं कां न थियो आन्नो।” 31 पिलातुसे तैन सेइं ज़ोने लगो, “तुस
 एस नेथ ते अपने कानूनेरे हिसाबे सेइं फैसलो केरा।” यहूदी लीडर ज़ोने लगे,
 “असन त केन्ची भी मारनेरी अज़ाज़त नई।” 32 एन एलहेरेलेइ भोवं कि
 जैन गल्लां यीशुए ज़ोरी थी, कि तै केरही मौतां मरेलो पूरी भोन। 33 तैखन
 पिलातुस फिरी महले मां जेव ते तैनी यीशु कुजेइतां तैस पुच्छू, “कुन तू यहूदी
 केरो राजोस?” 34 यीशुए जुवाब दितो, “तू ए गल अपनि भोती ज़ोने लोरोस

कि होरेई मेरे बारे मां तीं सेइं ज़ेवरीए?” ३५ पिलातुसे जुवाब दित्तो, “कुन अवं यहूदी आई? तेरी कौमरे ते प्रधान याजकेई तू मेरे हवाले कियोरोस, तू जो तीं कुन कियोस्हए?” ३६ यीशुए जुवाब दित्तो, “मेरु राज़ इस दुनियारु नई, अगर दुनियारु भोथू त मेरे चेले जंग केरेथे, ते मीं यहूदी लोकां केरे प्रधानां केरे हथ्थे टलेयोने न देथे, पन हुन्ना मेरु राज़ इट्टुरु नई।” ३७ पिलातुसे ज़ोवं, “त कुन तू राज़ोस्?” यीशुए जुवाब दित्तो, “तू ज़ोतस कि, अवं राज़ोई, अवं एल्हेरेलेइ ज़रमोरोई, ते एल्हेरेलेइ दुनियाई मां ओरोई कि सच्चेरे बारे मां शिक्षा देई। ज़ैना सच्चे मन्तन तैना मेरी गल शुन्तन।” ३८ पिलातुसे पुच्छू, “सच्च कुने?” एन ज़ोइतां तै यहूदी लीडरन कां जेव ते ज़ोने लगो, “अवं त एस मैन्हु मुरज्जम न सेमझ्ही।” ३९ पन तुश्शे रीतरे मुताबिक अवं फ़सह तिहारेरे मौके पुड़ अक कैदी हथरां छ़डताई। कुन तुस चातथ कि अवं तुश्शे लेइ यहूदी केरे राज़े हथरां छ़ेह्ही? ४० तैना फिरी ज़ोरे-ज़ोरे सेइं ज़ोने लगे, ए नन्ना इश्शे लेइ बरअब्बा हथरां छ़ड। बरअब्बा अक डैकू थियो।

19 पिलातुसे सिपेहिन हुक्म दित्तो, कि यीशु नेइतां कोड़े बान। २ ते सिपाहीयेइ कंटां केरु ताज बनेइतां यीशुएरे दोग्गे पुड़ रख्खू, ते तैस बैंजनी रंगेरां लिगड़ां लुवां। ३ ते तैन केरे सामने तैन कां एइतां ज़ोने लगो, “हे यहूदी केरे राज़ा, नमस्कार!” ते तैस थप्पड़ बाहे। ४ तैखन पिलातुसे फिरी बेइर गेइतां लोकन सेइं ज़ोवं, हेरा, “अवं तैस तुसन कां फिरी बेइर आनताई, तुसन पतो लगे कि मीं एसमां कोई जुरम न लेइहोव।” ५ ज़ैखन यीशु कंटां केरु ताज दोग्गे पुड़ रेखतां ते बैंजनी लिगड़ां लेइतां बेइर आनो त पिलातुसे तैन सेइं ज़ोवं, “हेरा ई मैन्हु।” ६ ज़ैखन प्रधान याजक ते मन्दरेरे पहरदारेई यीशु लाव त ज़ोरे-ज़ोरे चिन्डां मैरतां ज़ोने लगे, “एस कूसे पुड़ चाढ़ा, एस कूसे पुड़ चाढ़ा!” पिलातुसे तैन सेइं ज़ोवं, “तुसे एस नेथ ते कूसे पुड़ चाढ़ा, किजोकि अवं एसमां कोई दोष न लेहीं।” ७ यहूदी लीडर ज़ोने लगे, “इश्शो भी कानूने, ते तैसेरे कानूनेरे मुताबिक ए मौतरे सजारे काबले। किजोकि ए अपने आपे जो परमेशरेरु मटू ज़ोते।” ८ ज़ैखन पिलातुसे एन शुनू त तै मन्ना डरो। ९ ते फिरी अपने महले मां जेव ते यीशु सेइं फिरी ज़ोवं, “तू कोट्टां ओरोस?” पन यीशुए तैस किछ जुवाब न दित्तो। १० पिलातुसे तैस सेइं ज़ोवं, “तू मीं सेइं गल कि न केरस? कुन तीं पतो नई कि मीं अधिकार कि अवं तीं हथरां छ़ैडी

या क्रूसे पुड़ चैढ़ई।” 11 यीशुए जुवाब दित्तो, “अगर ए अधिकार तीं परमेश्वरे करां न भोथो मैलोरो त तेरो कोई अधिकार मीं पुड़ न थियो भोनो, पन ज़ैनी अवं तेरे हवाले कियोरोई ते हछे पापेरो हकदार भोरोए।” 12 तैसरां बाद पिलातुसे यीशु हथरां छँडनो चाव, पन यहूदी लोक चिन्डां मेरतां ज़ोने लगे, “अगर तू एस मैन्हु हथरां छँडेलो त तू महाराजेरे पासे नई, जै कोई अपनो आप राज़ो बनाते तै महाराजेरे खलाफ भोते।” 13 ज़ैखन पिलातुसे एन शुनू त तैनी यीशु बेइर कुजेइतां अपने आदालतरे तखते पुड़ बिश्शो ज़ैस जो इब्रानी भाषाई मां, गब्बता, ज़ोतन। 14 तै फसह तिहारेरी तियैरारी दिहाड़ी थी ते दुपाहरां केरे करीब थियो, तैखन पिलातुसे यहूदी लोकन जो ज़ोवं, “हेरा, ई तुश्शो राज़ो!” 15 पन तैना ज़ोरे-ज़ोरे सेइं ज़ोने लगे, “एस इट्टां दूर ने! इट्टां दूर ने! ते एस क्रूसे पुड़ चाढ़ा!” पिलातुसे ज़ोवं, “कुन अवं तैस जै तुश्शो राज़ो क्रूसे पुड़ चैढ़ी?” प्रधान याजकेर्इ ज़ोवं, “महाराजेरे अलावा इश्शो कोई राज़ो नई!” 16 एसेरां बाद पिलातुसे यीशु तैन केरे हवाले कियो, ताके तैना तैस क्रूसे पुड़ चाढ़न। 17 यीशु अपनू क्रूस छुइतां खोपड़ी जो चलो ज़ैस जो इब्रानी मां गुलगुता ज़ोतन। 18 तैड़ी तैनेई यीशु ते तैस सेइं साथी दूर्घ डैकू भी क्रूसे पुड़ चाढ़ो, अक तैसेरे देइने पासे होरो बांए पासे ते यीशु मझाटे। 19 पिलातुसे एककी पेखड़ी पुड़ तैसेरो दोष लिखतां क्रूसे पुड़ लाई तैस पुड़ लिखोरु थियूं, “यीशु नासरी यहूदी केरो राज़ो।” 20 काई यहूदई तैन पढ़ू, किजोकि ज़ैस जगाई यीशु क्रूसे पुड़ चढ़ोरो थियो ते जगा यरुशलेम नगरेरे नेडे थी, ते पेखड़ी पुड़ इब्रानी, लातीनी ते यूनानी भाषाई मां लिखोरु थियूं। 21 यहूदी केरे प्रधान याजकेर्इ पिलातुसे कां दरखुवास की, “यहूदी केरो राज़ो न लिखा पन एन लिखा कि ए ज़ोते, ‘अवं यहूदी केरो राज़ोई।’” 22 पिलातुसे जुवाब दित्तो, “मीं जैन लिखी छाडु, तैन लिखू।” 23 ज़ैखन स्पेहियेर्इ यीशु क्रूसे पुड़ चाढ़ो त तैनेई यीशुएरे लिगड़ा बंटां ते तैन केरे चेवे हिस्से किये, ताके सेब्बन अक-अक हिस्सो मैल्ले सिर्फ तैसेरू कोट बाकी राऊं, जैन बा ते बुना तगर अक्के थियूं। 24 तैना एप्पू मांमेइं ज़ोने लगे, “एसेरे टोटे केरनेरे बजाए शर्त रखम ज़ेसेरे नंवे पुड़ परची निसेली लिगड़ां तैस भोलां।” एन एल्केरेलेइ भोवं कि जैन पवित्रशास्त्रे मां लिखोरु थियूं तैन पूरू भोए कि, “तैनेई मेरां लिगड़ां बंटा ते मेरे कोटेरे लेइ शर्त रख्खू ते सिपैहीयेइं एन कियूं।” 25 यीशुएरे क्रूसे कां

तैसेरी अम्मा ते तैसेरी अम्मारी बेइन मरियम ज़ै क्लोपासेरी कुआन्श थी, मरियम मगदलीनी खड़खड़ी थी। 26 यीशुए अपनि अम्मा ते अक अपनो चेलो ज़ैस सेइं तै प्यार केरतो थियो, तैस कां नेड़े खड़खड़ो लाव त तैनी अपने अम्मा सेइं ज़ोवं, “हे कुआन्श, हेर, तेरु मट्टुए।” 27 ते चेले जो ज़ोवं, “अज़ेरां बाद, ई तेरी अम्मा आए, तैनी चेले तैखने तै अपने घरे नेइ।” 28 ज़ैखन यीशुए ज़ानू कि हुनी सैरी गल्लां पूरी भोइजेइ, एल्हेरेलेइ ज़ेन्वरे पवित्रशास्त्रे मां लिखोरु थियूं तैन पूरु भोवं त तैनी ज़ोवं, “मीं ट्लिश लगोरीए।” 29 तैड़ी अक भांड सिरके सेइं भेरतां रखोरु थियूं केन्चे जूफेरी डालड़ी तैस मां डोबतां यीशुएरे ऐशी सेइं हुराई। 30 ज़ैखन यीशुए च्छ्वू त तैनी ज़ोवं, “पूरु भोवं” ते क्रोड़ी ट्लोड़तां अपने प्राण दित्ते। 31 ते एल्हेरेलेइ कि तै तियेरारी दिहाड़ी थी, होरसां आरामेरी दिहाड़ी ते कने फ़सह तिहार थियूं। ई यहूदी केरे लेइ खास दिहाड़ी थी, यहूदी न थिये चाते कि आरामेरे दिहाड़े लाशां क्रूसन पुड टंगोरी रान, एल्हेरेलेइ तैनेई पिलातुसे कां गेइतां ज़ोवं, कि मुर्जमां केरि ज़न्धां ट्लोड़तां तैन केरि लाशां उन्ढी उसालम। 32 सिपाही आए तैनेई पेइले मैनेरी ज़न्धां ट्लोड़ी, फिरी होरेरी भी, ज़ैना यीशु सेइं साथी क्रूसे पुड़ चाढ़ेरे थिये। 33 पन ज़ैखन यीशुएरी बारी अई त तैनेई हेरु कि ते पेइले मेरि जेवरोए, ते तैनेई तैसेरी ज़न्धां न ट्लोड़ी। 34 पन सिपेहिन मरां एकके अपनि बलम एन्तां यीशुएरे देल्लोड़ी मां बाई ते तैखने खून त पानी बगने लगू। 35 ज़ैनी मैने एन हेरु, तैनी गवाही दित्ती, ते तैसेरी गवाही सच्चीए, ते तै ज़ानते, कि सच्च ज़ोते कि तुस भी विश्वास केरा। 36 एना सैरी गल्लां एल्हेरेलेइ भोइ कि पवित्रशास्त्रे मां लिखोरु पूरु भोए, “तैसेरी कोई हडी न ट्लोड़ी गाए।” 37 पवित्रशास्त्रेरे एककी होरि वचने मां लिखोरुए, “तैस ज़ैनेई बलमी सेइं बाई तैना तैस हेरेले।” 38 एना गल्लां केरे पत्ती अक मैन्हु यूसुफ नंव्वेरो ज़ै अरिमतियाह ड्लोंवेरो रानेबालो थियो, पिलातुसे कां बिनती केरने लगो, कि यीशुएरी लाश दे, ए मैन्हु यहूदी लोकां केरे प्रधानां केरे डरे सेइं छेष्टां यीशुएरो चेलो थियूं, तै पिलातुसे तैस अज़ाज़त दित्ती, ते तैनी यीशुएरी लाश नेही। 39 नीकुदेमुस भी अव, ज़ैनी एककी बार राती यीशु सेइं मुलाकात कियोरी थी, तैनी गन्धरस ते एलवा आनोरे थिये, एन तेत्ती किल्लो थियूं। 40 तैखन तैनेई यीशुएरी लाश नेइतां यहूदी केरे दबनेरे रसमरे मुताबिक तैस खुशबूदार चीजां लेइतां कफने

मां पलेटतां रख्खी। 41 जैडी यीशु कूसे पुड़ चाढोरो थियो तैडी बागी मां अक नंवी कब्र थी, ज़ैस मां पेइली कोई लाश न थी। 42 ते ए यहूदी केरि आरामेरी तियेरारी दिहाडी थी ते कब्र भी नेडे थी तैनेई यीशुएरी लाश तैडी रख्खी।

20 हफतेरी पेइली दिहैडी झेझां हेजू आंधरू थियूं मगदलीन ड्लंव्वेरी मरियम कब्री पुड़ आई, तैसां हेरु कि कब्री करां घोड़ भी खड़ा कियोरोए। 2 ते दौवड़ती शमौन पतरस ते होरि चेले कां पुजी जै यीशु सेइं प्यार केरतो थियो, ज़ोने लगी, “तैनेई प्रभुएरी लाश कब्री मरा केढतां नीयोरो, ते असन नई पतो तै कोड़ि रख्खोरोए।” 3 एना शुन्तां पतरस त अक होरो चेलो कब्रारे पासे चलो। 4 ते दुइये साथी-साथी दौवड़तां चलोरे थिये, पन तै होरो दुइयोवं चेलो पतरस करां अग्रोवं निस्सी जेव, ते तैस करां पेइलो कब्री पुड़ पुज़ो। 5 तैनी लिकतां तक्कू ते कफन लाव ते अन्तर न जेव। 6 तैखन शमौन पतरस भी पत्ती-पत्ती तैडी पुज़ो ते सिथो कब्री मां जेव तैनी हेरु कि तैडी लिगड़ां थियां। 7 ते कफनेरो तै रुमाल भी जै यीशुएरे दोगे सेइं पलेटोरो थियो, लिगड़न मां नई पन अलग ठैरी थियो। 8 तैखन तै होरो चेलो भी जै कब्री पुड़ पेइलो पुज़ोरो थियूं अन्तर जेव तैस भी लेइतां याकीन भोवं। 9 किजोकि तैनेई पवित्रशास्त्रेरी ए गल न थी समझोरी ज़ेसेरे बारे मां यीशुएरु मुड़दन मरां ज़ींतू भोनू ज़रुरी थियूं। 10 तैखन एना चेले वापस घरजो चले जे। 11 पन मरियम कब्री करां बेइर लेरां देंती थी। लेरां देंती-देंती तैसां लिकतां कब्री मांजो तक्कू। 12 त तैडी तैसां दूर्ध स्वर्गदूत लाए जैन छित्तां लिगड़ां लग्गोरां थियां, जैडी यीशुएरी लाश रखोरि थी तैडी अक शरेइंते ते होरो परेइंते बिश्शोरे लाए। 13 तैनेई तैस पुच्छ, “हे कुआन्शे तू किजो लोरिस लेरां देने?” मरियमा ज़ोवं, “तैनेई मेरे प्रभुएरी लाश नेवरीए ते पतो नई कोड़ि रख्खोरोए।” 14 एना ज़ोंते तै पत्रोवं बेदलोई त तैडी यीशु खड़खड़ो लाव, पन तैस पिशान न आई कि ए यीशुए। 15 यीशुए ज़ोवं, “हे कुआन्शे तू किजो लेरां देने लोरिस? तू केस तोपने लोरिस?” तैसां समझू कि कोई बागबाने, तैसां ज़ोवं, “हे जनाब अगर तीं तै नीयोरोए त ज़ो कि तीं कोड़ि रख्खोरोए ते अवं तैस नेइ।” 16 यीशुए तैस सेइं ज़ोवं, “मरियम!” तैसां तैसेरे पासे फिरतां इब्रानी मां ज़ोवं, “रब्बूनी!” ज़ेसेरो मतलबे हे गुरु। 17 यीशुए ज़ोवं, “मीं सेइं न हुरा किजोकि अवं बाजी कां बाह हेजू नई जोरो, पन मेरे ढ्लान गेइतां ज़ो कि अवं अपने

बाजी ते तुश्शो बाजी ते अपने परमेश्वर ते तुश्शो परमेश्वरे कां बा च्छलोरोई।” 18
 मरियम मगदलीनी तैटुं च्छली जेर्ह ते चेलन कां गेझतां तैन पतो दित्तो, “मीं प्रभु
 लाहोरोए ते तैनी मीं सेइं एना गल्लां की।” 19 तैस्से दिहैडी जै हफतेरी पेइली
 दिहाडी थी ड्लोझरे मौके सारे चेले एककी ठैरी थिये, ते यहूदी लोकां केरे
 प्रधानां केरे डरे सेइं दार बन्द केरतां बिश्शोरे थिये, तैखन यीशु अव ते मङ्गाटे
 खडो भोइतां ज्ञोने लगो, “तुसन शान्ति मैलती राए।” 20 एन ज़ोइतां तैनी
 अपने हथ ते अपनि देल्लोडी तैन हिराई, चेले तैस हेरतां खुशी भोए। 21
 यीशुए फिरी ज़ोवं, “तुसन शान्ति मैलती राए, ज़ेन्चरे बाजी अवं भेज़ोरोई,
 तेन्हरे अवं भी तुसन भी इस दुनियाई मां भेज़ताई।” 22 एन ज़ोइतां तैनी तैन
 जो फुक दित्ती ते ज़ोवं, “पवित्र आत्मा नेथ। 23 ज़ैन केरे पाप तुस माफ़ केरले
 त तैन केरे पाप माफ़ भोले, ज़ैन केरे तुस रखेले तैना राले।” 24 पन बादे मां
 12 चेलन मरां अक मैन्हु मतलब थोमा ज़ैस दिदुमुस ज़ोतन, ज़ैखन यीशु अव
 त तै तैन साथी न थियो। 25 ज़ैखन होरि चेले तैस सेइं ज़ोवं, “कि असेई प्रभु
 लाव,” तैखन तैनेई ज़ोवं, “जां तगर अवं तैसेरे हथ्थन मां कीलां करां गत्तन मां
 अंगलोई न छेडी, तांतगर विश्वास न केरि।” 26 अठ दिहैडना बाद यीशुएरे चेले
 एककी बार फिरी तैस्से ठैरी बिश्शोरे थिये, ते थोमा भी तैडी थियो ते दार भी
 बन्द थियूं, ते यीशु इझतां तैन मङ्गाटे खडो भोव, ते तैन जो ज़ोने लगो, “तुसन
 शान्ति मैल्ले।” 27 फिरी तैनी थोमा जो ज़ोवं, “अपनि अंगलोई आन ते मेरो
 हथ हेर ते अपने हथ्थे सेइं मेरी दल्लोडी हेर, शक न केर बल्के मीं पुड़ विश्वास
 केर।” 28 थोमा तैस जो ज़ोवं, “हे मेरे प्रभु हे मेरे परमेश्वर!” 29 यीशुए तैस
 जो ज़ोवं, “तीं लेइतां तीं मीं पुड़ विश्वास कियो, धन तैना ज़ैना बगैर लाहने मीं
 पुड़ विश्वास केरन।” 30 यीशुए अपने चेलां केरे सामने होरे भी बडे चमत्कार
 कियोरे थिये, ज़ैना इस किताबी मां नई लिखोरे। 31 पन ज़ैना लिखोरन,
 एल्हेरेलेइ लिखोरेन, कि तुस विश्वास केरथ, कि यीशु परमेश्वरू मटू, मसीहे
 आए, ते विश्वास केरतां तैसेरे नंके सेइं हमेशारी जिन्दगी हासिल केरथ।

21 बादे मां यीशुए एप्पू एककी फेरे फिरी अपने चेलन पुड़ तिबिरियुस
 समुन्द्रे बन्ने एन्चरे बांदो भोव। 2 शमौन पतरस, थोमा ज़ैस जो दिदुमुस
 ज़ोतन, नतनएल जै गलीलेरे काना नगर मां रातो थियूं ते जेब्देरु मटू ते होरे
 चेले भी तैडी थिये। 3 शमौन पतरसे तैन सेइं ज़ोवं, “अवं मेछळी ट्लाने

गातार्दि।” तैनेई ज़ोवं, “अस भी तीं साथी चलतम।” तैना तैटुं निस्से ते किश्ती मां चेढ़तां जे, पन तैस राती तैन किछ न मैल्लू। 4 झोझां सुबेलो यीशु बन्ने पुड़ एइतां खड़ो भोव, पन चेलई न पिशानो कि ए यीशुए। 5 तैखन यीशुए तैन ज़ोवं, “हे बच्वव, कुन तुसन कां किछ खाने जो आए?” तैनेई जुवाब दित्तो, “नई।” 6 यीशुए ज़ोवं, “ज़ाल किश्तरे देहने पासे छुडथ त तुसन किछ मेछ़ली मैलनिन।” तैनेई ज़ाल छाडु ते मेछ़ली एत्री ज़ाले मां लेगि कि ज़ाल खिचोने न लगू। 7 तैखन यीशु ज़ैस चेले सेइं प्यार केरतो थियो तैनी पतरस सेइं ज़ोवं, “ए त प्रभुए।” ज़ेरु शमौन पतरसे शुनू कि प्रभुए, तैनी अपनो चोगो, ज़ै कम केरनेरे लेइ खोल्लोरो थियो लाव ते पैनी मांजो छाल मारी। 8 होरे चेले ज़ैना किश्ती मां थिये ज़ाल ज़ैना मेछ़लई सेइं भेरतां थियूं तैनेई खिचतां आनू, किजोकि तैना 100 मीटर दूर थिये। 9 ज़ैखन तैना बन्ने पुड़ ओस्से, त तैनेई मूरन पुड़ मेछ़ली रेखोरिन ते इलेखी रोटी भी लेई। 10 यीशुए तैन सेइं ज़ोवं, “ज़ैना मेछ़ली तुसेई ट्लेतोरिन तैन मरां किछ इरां आनां।” 11 शमौन पतरस किश्ती मां चढ़ो ते ज़ाल इलेखी पुड़ खिचतां आनू ज़ैस मां 153 मेछ़ली लेगोरी थी, ते फिरी भी ज़ाल नई छींदोरु। 12 यीशुए तैन सेइं ज़ोवं, “एज्जा केलोव खाथ।” पन चेलन मरां केच्ची हिम्मत न अई कि पुछ्न, “कि तू कौन आस?” तैना ज़ानते थिये कि ए प्रभुए। 13 यीशुए रोटी ट्लाती ते तैना भी दित्ती ते मेछ़ली भी दित्ती। 14 यीशु मुड़दन मरां ज़ीतो भोनेरां पत्ती ट्लेइयोवं फेरे अपने चेलन पुड़ बांदो भोइ जेव। 15 ज़ैखन तैनेई केलोव खाव, त यीशुए शमौन पतरसे सेइं ज़ोवं, “शमौन,” यूहन्नेरे मट्ठा, “कुन तू होरि चेलन करां जादे मीं सेइं प्यार केरतस?” तैनी ज़ोवं, “हाँ प्रभु तू त मीं ज़ानतस कि अवं तीं सेइं प्यार केरताई।” यीशुए ज़ोवं, “मेरां गबड़ां चार।” 16 यीशुए फिरी तैन सेइं ज़ोवं, “शमौन, यूहन्नेरे मट्ठा, कुन तू मीं सेइं प्यार केरतस?” तैनी ज़ोवं, “हाँ प्रभु, अवं तीं सेइं प्यार केरताई।” यीशुए तैस सेइं ज़ोवं, “मेरी भैट्ठुं सम्भाल।” 17 तैनी ट्लेइयोवं फेरे फिरी पुच्छू, “शमौन यूहन्नेरे मट्ठा, कुन तू मीं सेइं प्यार केरतस?” पतरस दुःखी भोइतां ज़ोवं, “प्रभु तू एप्प सैरी गल्लां जानतस, तू जानतस, कि अवं तीं सेइं प्यार केरताई,” यीशुए, ज़ोवं, “मेरी भैट्ठुं चार।” 18 अवं तीं सेइं सच ज़ोताई, ज़ैखन तू नौजवान थियो त अपन मज एप्प बंधतो थियो, ते जैडी चातो थियो,

एप्पू गातो थियो, पन ज़ैखन तू बुढो भोलो, त अपने हथ अग्रोवं केरेलो, ते
होरो तेरु मज़ बंधेलो ज़ैडी तू न चालो तैडी तीं नेले। 19 यीशुए ए गल ज़ोइतां
इशारो कियो कि पतरस कोस मौतां मेरतां परमेशररी महिमा बांदी केरेलो।
तैखन यीशुए ज़ोवं, “मीं पत्ती च़ल!” 20 पतरसे फिरतां तक्कू, कि यीश सेइं
प्यार केरनेबालो चेलो तैस पत्ती च़लोरोए थियो, ए तै चेलो थियो ज़ैनी रोट्टी
खाते यीशुएरे पासे लिकतां पुछेऱु थियूं, “हे प्रभु तै कौने, ज़ै तीं ट्लुवालो?”
21 पतरसे तैसेरे पासे तेकतां यीशुए पुच्छू, “हे प्रभु एस चेले सेइं कुन भोलू!”
22 यीशुए जुवाब दित्तो, अगर अवं चैई कि, “अगर मेरे वापस एजने तगर
ज़ींतो राव त एसमां तीं कुन? तू मीं पत्ती च़ल!” 23 एन्हरे ढलान मां ए गल
सेभीए फैली जेई, कि ए चेलो न मरेलो, पन यीशुए एन न थियूं ज़ोरु, कि तै
न मरेलो अगर अवं चैई कि, “अगर मेरे वापस एजने तगर ज़ींतो राव, त
एसमां तीं कुन?” 24 ई तै चेलोए, ज़ै इना गल्लां केरि गवाही देते, ते ज़ैनी
एना गल्लां लिखोरिन, असां ज्ञानतम कि तैसेरी गवाही स़च्चीए। 25 यीशुए
होरां भी बड़ां कम्मां कियोरां थियां, अगर सेभी केरे बारे मां लिखनू भोए त
अवं समझताई, कि तैना किताबां अज़ भोथी त तैन केरे लेइ इस दुनियाई मां
ठार न थी भोनी।

प्रेरितों के काम

1 जनाब थियुफिलुस, मीं अपनि पेइली किताब मां तैना सैरी गल्लां लिखोरिन, ज़ैना यीशु शुरू मां केरतो ते शिखालतो राव, 2 तैस दिडैड़ी तगर ज़ेइस तै स्वर्गे मांजो नीयो जेव। तैस करां पेइले तैनी अपने चुनोरे प्रेरितन पवित्र आत्मारे शेक्करे ज़िरिये सेइं किछ हुक्म भी दित्तोरे थी। 3 यीशुए दुःख झैलनेरां ते मौतरे बाद तैनी अपने ज़ीते भोनेरां काई पक्कां सबूतां तैन हिरां, ते 40 दिहाड़न तगर तैन लेइहोतो राव, ते परमेशरेरे राज़ज़ेरे गल्लां शुनातो राव। 4 एक्की फेरे ज़ैखन यीशुए अपने चेलन सेइं साथी थियो तैनी तैन ठाकू, “कि तुस यरुशलेम नगरे मारा बेइर न गेइयथ ते मेरे बाजी परमेशरेरो तै वादो पूरो भोनेरो इंतज़ार केरथ, ज़ेसेरे बारे मां तुसेई मीं करां शुनोरू भी आए। 5 किजोकि यूहन्ना त लोकन पैनी सेइं बपतिस्मो दित्तो, पन तुसन थोड़े दिहैड़ना पत्ती पवित्र आत्मा सेइं बपतिस्मो दित्तो गालो (यानी परमेशर पवित्र आत्मा भेज़ोलो ज़ै तुसन सेइं साथी रालो)” 6 ज़ताली प्रेरित दुबारा यीशु सेइं मिले, त तैनेई तैस पुच्छू, “हे प्रभु, कुन तू इस वक्ते फिरी इसाएले तैसेरू राज़ देने बालोस?” 7 तैनी तैन सेइं ज़ोवं, “तैस वक्तरो या ज़ेइस तैना गल्लां भोली, तैन केरे बारे मां तुसन ज़ान्नेरी कोई ज़रुरत नई, ज़ैना बाजी परमेशरे अपने अधिकार मां रेखोरिन। 8 पन पवित्र आत्मा ज़ैखन तुसन पुड़ उतरेली त तुसन शक्ति मैलेली, ते तुस यरुशलेम नगर ते सारे यहूदिया ते सामरिया इलाकन मां बल्के धेरतारे हर पासे मेरे गवाह भोलो।” 9 एना गल्लां ज़ोनेरां पत्ती यीशु तैन केरे सामने हेरते-हेरते परमेशरे तै स्वर्गे जो नीयो, ते बिदलारां तै तैन केरे एछळ्हन करां छुपाव। 10 ज़ैखन तैना यीशुए अम्बरे मांजो गांतो तकने लोरे थिये, त अचानक, दूर्व मङ्गद ज़ैन छितां लिगड़ां लग्गोरां थियां तैन कां एइतां खड़े भोए। 11 ते ज़ोने लगे, “हे गलीली मङ्गदाव तुस खड़खड़े अम्बरेरे पासे कुन तकने लोरेथ? एहे यीशु ज़ेन्चरे तुश्शे सामने परमेशरे, स्वर्गे मांजो नीयो, ज़ेन्चरे तुसेई स्वर्गे मांजो गांतो लाहोरोए तेन्चरे फिरी एइतो लाएलो।” 12 ज़ैखन चेले ज़ैतून पहाड़े पुड़ेरां ज़ैन यरुशलेम नगरेरे नेड़े एक्की किलोमीटर दूरे, यरुशलेम नगरे मांजो वापस आए। 13 नगरे मां एइतां तैना तैस कमरे मां जे ज़ैड़ी तैना रहते थिये, तै कमरो दुइयोवं छते थियो। तैना प्रेरित इना थिये, पतरस, यूहन्ना, याकूब, अन्द्रियास, फिलिप्पुस थोमा, बरतुल्मै, मत्ती ते

हलफर्द्दरु मटू याकूब ते शमैन जेलोतेस ते याकूबेरु मटू यहूदा रहते थिये। 14 एना सब मङ्द ते किछ होरि कुआन्शां जैनेई यीशुएरी मदत कियोरी थी, ते यीशुएरी अम्मा मरियम ते यीशुएरे ढलान सेइं साथी अक मन भोइतां लगातार प्रार्थनाई मां लग्गोरे थिये। 15 ते तैने दिहाड़न मां पतरस तैन ढलां केरि टोली मां जैन केरि तैधात कोई 120 थिये, पतरस खड़ो भोइतां ज्ञाने लगो। 16 “हे मेरे ढलाव, पवित्रशास्त्रेरी तै गल जै पवित्र आत्मा दाऊद राजेरी जिरिये पेइले ज्ञोरी थी, पूरी भोनी ज़रुरी थी, तै गल यहूदारे बारे मां ज्ञोरी थी, जैनी यीशुएरे टलुवांने बालां केरि मदत कियोरी थी। 17 तै असन सेइं साथी सेवा केरनेबालो थियो, ते असन साथी तै गनो गातो थियो। 18 तैनी नीच कमैयरे लेइ यीशु टलुवाव, ते फिरी तैनी तैना पेइंसे यहूदी लीडरन वापस दिते, ते तैनेई तैन पेइंसां केरू अक ऊडार घिन्नू, जैडी तै दोग्गेरे भारे खिरकोरो थियो, ते तैसेरु पेट फेटतां तैसेरी एंट्लोडी बेझर निस्सी।” 19 यरुशलेम नगरेरे सारे लोकन ए पतो लग्गोरो थियो, तैनेई अपने भाषाई मां तैस उडारेरु नवं हकलदमा रख्खू, जैसेरो मतलबे, “खूनेरु ऊडार।” 20 किजोकि दाऊदे भजना केरि किताबी मां लिखोरूए कि, “तैसेरु घर उज़डे, ते तैस मां कोई बसने बालो न भोए, ते इन भी लिखोरूए, तैसेरी पदवी कोई होरो ने।” 21 एल्हेरेलेइ एन ज़रुरीए कि अक एरो मैन्हु चुनो गाए, जै प्रभु यीशुएरे सारे कम्मां केरे गवाह भोए, यानी यीशुएरो यूहन्ना करां बपतिस्मो नेने करां लेइतां असन करां यीशुएरे स्वर्गे गाने तगर 22 तैन मरां अक मैन्हु चुनो गाए, जै असन सेइं साथी यीशुएरे ज़ींते भोनेरो गवाह भोए। 23 तैखन तैनेई दुझ्ये ज़ने नामज़द किये, अक यूसुफ जैस जो बरसब्बास ज़ोते थिये, जैसेरो खताब यूस्तुस थियो, ते दुझ्योवं मत्तियाह थियो। 24 ते एन ज़ोइतां प्रार्थना की, “हे प्रभु, तू सेब्बी केरे दिले जानतस ते असन पुड़ बांदू केर, कि इन दुईन मां तीं कौन ज़ेरो चुनोरोए। 25 कि तै इस सेवकाई ते प्रेरिताइयोरो पद ने, जै यहूदा शैरतां अपने ठैरी जेवरोए।” 26 तैनेई तैसेरे बारे मां शर्त रखेऱ थियूं, जैन मत्तियाह नंवे पुड़ निस्सू, एल्हेरेलेइ तै 12 प्रेरितन सेइं साथी गनो जेव।

2 जैस यहूदी केरे पिन्तेकुस्त तिहारेरी दिहाड़ी अई, त तैना सब एककी ठैरी अकोट्टे थिये। 2 अचानक अम्बरेरां आवाज आई, जेन्चरे बड़ो बात चलने लोगोरो थियो, ते तैस सेइं सारु घर घुमने लग जैडी तैना बिश्शोरे थिये। 3 ते

तैनेई अगारी लप्परी ज़ेरि ज़िभां लोई, ज़ैना अलग-अलग भोइतां तैन सेब्भन पुड़ एइतां टिकी। 4 ते तैना सब पवित्र आत्माई सेइं भरपूर भोए, ते आत्मारे वरदाने सेइं तैना अलग-अलग भाषा केरने लगे। 5 तैस वक्ते मां, बड़े यहूदी भक्त ज़ैना तिहारे मां दुनियारी सैरी मुलखन मरां ओरे थिये, तैना यरूशलेम नगरे मां राने लोरे थिये। 6 ज़ैखन तैनेई ए बातेरी ज़ेरि आवाज़ शुनी त बड़े लोक जम्हां भोए, ते सब लोक बड़े हैरान रेइजे, किजोकि हर कोई चेलन अपने-अपने भाषाई मां गल्लां केरते शुन्ने लोरे थियो। 7 ते सब बड़े हैरान भोइतां ज़ोने लगे, हेरा, “कुन एना ज़ोनेबाले सारे गलील इलाकेरे रानेबाले नई? 8 फिरी एन कुन भोइ रावरूए कि, असन मरां हर कोई अपनि-अपनि भाषा शुन्ने लोरोए। 9 असन मरां किछ इन इलाकन मरां आन, पारथी, मेदी, एलामी ते मेसोपोटामिया, यहूदिया, कप्पदूकिया, पुन्तुस ते आसिया, 10 फ्रूमिया, पंफूलिया, मिस मुलख, ते लीबिया मुलखे ज़ै कुरेन नगरेरे नेड़े, इन सब मुलखां केरे रानेबाले ते रोमी मुसाफर, 11 कुन यहूदी, ते कुन यहूदी पंथ धारण केरनेबाले, क्रेती ते अरब मुलखेरे लोक भी आन, पन अस अपनि-अपनि भाषाई मां तैन करां परमेश्वरां बड़ुं-बड़ुं कम्मां केरि चर्चा शुन्ने लोरेम।” 12 तैना सब बड़े हैरान भोइ जे ते घबरेइतां एककी होरि पुच्छने लगे, “कि एन कुन भोइ रावरूए?” 13 पन किछ तैन केरि हासी बनेइतां ज़ोने लगे, “कि एनेई सज़री शराप पियोरीए।” 14 तैखन पतरस 11 प्रेरितन सेइं साथी खड़ो भोव, ते बड़े ज़ोरे सेइं ज़ोने लगो, “हे लोकव हे यहूदियारे रानेबालव ते हे यरूशलेम नगरेरे राने बालाव, मेरी गल ध्याने सेइं शुना, अवं तुसन ज़ोताई इड़ी एन कुन भोने लोरूए। 15 ज़ैन तुस बुझने लोरेथ तैन नई, एना मैन्हु नशे मां नई, किजोकि हुन्ना त झ़ोझ़ेरे नौ बज़ोरेन, 16 बल्के ए तै गल्ले, ज़ै परमेश्वरे योएल नेबेरे ज़िरिये ज़ोरी थी, 17 परमेश्वर ज़ोते कि, आखरी दिहैड़न मां एरु भोलू, अवं अपनि आत्मा सेब्भी लोकन देइलो, ते तुश्शां मट्ठां कुइयां भविष्यिवाणी केरेलां, ते तुश्शे नौजवान दर्शन हेरेले, ते बुढ़े सुपना हेरेले। 18 बल्के अवं तैन दिहैड़न मां अपने सेवादार मड़दन ते सेवादार कुआन्शन पुड़ अपनि आत्मा उतरेलो, ते तैना भविष्यिवाणी केरेले। 19 अवं अम्बरे मां आजीब-आजीब कम्मां ते ज़मीनी पुड़ निशान, यानी अग, खून ते कालो तूएरी बिदलार हिरेयेलो। 20 प्रभुएरी दिहाड़ी एजने करां पेइले, दिहाड़े आंधरे भोइ

गानोए, ते चाँदनी खूनेरी ज़ेरि भोनीए, तै अक महान ते खास दिहाड़ी भोनीए।

21 ते ज़ै कोई परमेश्वरे नवं घिन्नेलो तैस मुक्ति मैलेली।” 22 “हे इस्माएलेरे लोकव, इना गल्लां शुना, यीशु नासरत नगरेरो अक मैन्हु थियो, ज़ै परमेश्वर तुश्री लेइ भेजोरो थियो, ते एस गल्लारी तसदीक तैसेरे खास चमत्कारां केरे सबूतेई सेइं भोचे, जैना परमेश्वरे तैसेरे ज़िरिये सेइं इश्शो सामने हिरां, ज़ेन्नरे कि तुस एप्पू भी ज्ञानतथ। 23 जैखन तै परमेश्वरे इंतज़ामेरे पूरे मौके पुड ज्ञानेरे हिसाबे सेइं टलुवाव, ते तुसेई तै अधर्मी लोकां केरे हथ्ये कूसे पुड टंगेइतां माराव। 24 पन परमेश्वरे तै मौतरे सकेंजे मरां छुटेइतां ज़ींतो कियो, किजोकि एन भोइ न थियूं सकतु, कि तै मौतरे कब्जे मां राए। 25 किजोकि दाऊद मसीहेरे बारे मां एन ज़ोते, हेरा, प्रभु हर वक्त मेरे सामने, अवं तैन लोकन करां न डरेलो जैना मेरो नुकसान चातन। 26 तांए मेरो दिल बडो खुश भोव, ते अवं खुशी सेइं ज़ोइलो, बल्के मेरी जान उमीदी सेइं ज़ीएली। 27 किजोकि तू मेरे प्राणन पाताले मां राने न देलो, ते न अपने पवित्र मैन्हु शडने देलो! (Hadēs g86) 28 तीं मीं ज़िन्दगारी बत हेरेवरिए, तू अपने हजूरी सेइं मीं भरपूर केरेलो।” 29 “हे मेरे ढलाव, अवं कौमारे बुजुर्ग दाऊदेरे बारे मां तुसन सेइं साफ-साफ ज़ोई सकताई, कि तै मेरि भी जेव, ते दब्बो भी ते तैसेरी कब्र अज़ तगर इश्शो सामने मौजूद। 30 तै नबी थियो, ते तै ज्ञानतो थियो, कि परमेश्वरे तैस सेइं वादो कियोरो थियो, ‘अवं तेरी खानदेंनी मरां अक मैन्हु तैसेरे तखते पुड बिशैलेलो।’ 31 तैनी पेहले भोनेबैली गल्लां ते मसीहेरे मुडदन मरां ज़ींते भोनेरे बारे मां बियांन कियेरु थियूं, कि न तै पाताले मां राने देलो, ते न अपने पवित्र मैन्हु शडने देलो! (Hadēs g86) 32 “एहे यीशु परमेश्वरे ज़ींतो कियो ज़ेसेरे अस सब गवाह आम। 33 ते हुना तै स्वर्गे मां खास ठैरी यानी परमेश्वरेरे देइने पासे आए। ते तैने बाजी परमेश्वरे करां पवित्र आत्मा हासिल की, ज़ेसेरो तैने वादो कियोरो थियो, यीशुए असन पवित्र आत्मा भरपूरी सेइं दित्तोरीए, जैन तुस लातथ ते शुन्तथ। 34 किजोकि दाऊद त एप्पू स्वर्गे मां नई जोरो, पन फिर भी तै एप्पू ज़ोते, प्रभु परमेश्वरे मेरे प्रभु सेइं ज़ोवं, मीं सेइं साथी राज केर। 35 जांतगर अवं तेरे दुश्मन तेरे अधीन न केरि। 36 एल्हेरेलेइ, इस्माएलेरे सारे लोकन पतो लगे, कि परमेश्वरे, यीशु जै तुसेई कूसे पुड चाढो तै प्रभु भी कियो ते मसीह भी कियो।” 37 एना गल्लां शुन्तां तैन बडो एसास

भोव कि तैना पापिन, तैखन तैनेईं पतरसे ते होरि प्रेरितन सेइं ज़ोवं, “हे ढलाव अस कुन केरम?” 38 पतरसे तैन सेइं ज़ोवं, “पापन करां मनफिराथ ते तुसन मरां सारे यीशु मसीहे नंब्वे सेइं बपतिस्मो घिन्ना, त परमेश्वर तुसन माफ़ केरेलो ते पवित्र आत्मा तुसन इनामे मां मैलेली। 39 एल्हेरेलोइ कि ए वादो तुसन त तुश्शी औलाटी सेइं आए ते तैन सेभन सेइं जैना दूर-दूर गतन, ते ज़ैन इश्शो प्रभु परमेश्वरे एप्पू कां कुजाते।” 40 पतरसे होरि भी बेड़ि गल्लां केरि गवाही दित्ती, ते तैन बार-बार ज़ोवं, कि अपनो आप एस टैरी कौमी करां बचाथ। 41 ते तैनेईं तैसेरी गल्लां कबूल की, तैनी तैन बपतिस्मो दित्तो, तैस दिहैड़ी लगभग कोई 3000 मैन्हु तैन मां शामिल भोए। 42 एना लोक प्रेरितन करां शिक्षा हासिल केरते थिये, ते संगती रखते थिये, ते साथी रोट्टी खाते थिये, ते प्रभु भोज मनाते थिये ते प्रार्थना केरने मां मधन रहते थिये। 43 प्रेरितां केरि ज़िरिये सेइं बड़े चमत्कार ते निशान भोते थिये, ते यरुशलेमेरे सारे लोक डेरि जे। 44 यीशु मसीह पुड़ विश्वास केरनेबाले सारे अकोटु रहते थिये, ते सैरी चीज़न मां एककी होरि बराबर हिस्सेदार रखते थिये। 45 ते तैना अपनि जेइदात ते माल सबाब बेचतां एककी होरेरी जुरूरतरे मुताबिक रकम बेंटां सेब्भी केरि ज़रूरत पूरी केरते थिये। 46 तैना रोज़ अक मन भोइतां मन्दरे मां अकोटु भोते थिये, ते घरन मां साथी रोट्टी खाते थिये ते प्रभु भोज मनाते थिये, ते अकोटु भोइतां खुशी सेइं खाते थिये। 47 तैना परमेश्वरे तारीफ केरते थिये, तैना सैरी केरि नज़री मां रोड़े थिये। ज़ैन पापन करां मुक्ति मैलती थी, परमेश्वर तैन लोकन तैन केरि टोली मां शामिल केरतो थियो।

3 एककी दिहाड़े पतरस ते यूहन्ना प्रार्थना केरने दीसेरे ट्लेइ बज़ेइ मन्दरे मांजो च्छ्लोरे थिये। 2 ते मैनेईं अक ज़मनेरो टोंटो छुइतां आनोरोए थियो, ते तैस मन्दरेरे दारे पुड़ छुड़ते थिये, ज़ैस दारेरु नवं “रोट्टु” थियूं, ताके अन्तर गाने बालन करां भीख मग्गे। 3 ज़ैखन तैनी पतरस ते यूहन्ना मन्दरे मांजो गांते लाए त तैन करां भीख मग्गे लगो। 4 पतरस ते यूहन्ना तैसेरे पासे खेड़ोइतां ज़ोने लगे, “इश्शो पासे तक।” 5 ते तैस उमीद भोइजेइ कि एन करां किछ मैलेलू, तै तैन केरे पासे तकने लगो। 6 पतरसे ज़ोवं, “सोन्हू चाँदी त असन कां अथी नई, पन ज़ैन मीं कां आए तैन अवं तीं देताई, तू यीशु मसीह नैसेरे नंब्वे सेइं खड़ो उठ ते च्छ्ल फिर।” 7 पतरसे ज़ेरो तैसेरो देइनो हथ

द्लेइतां खड़ो कियो, त तैसेरे पावन मां ते गुडन मां ताकत आई। ८ ते तै
 तैखने खड़ो भोव, ते च्छलने फिरने लगो, ते फिरी छालां मारतो ते परमेश्वरी
 तारीफ केरतो तैन सेइं साथी मन्दरेरे अंगने मां च्छलो जेव। ९ ते सेब्ही लोकेई
 तै च्छलतो फिरतो ते परमेश्वरी तारीफ केरतो लाव। १० ते पिशानो ई त तैए,
 जै मन्दरेरे रोडे दारे पुड़ बिश्तां भीख मगतो थियो, ते जै चमत्कार एन लोकां
 केरे सामने भोव, त तैना लोक बडे हैरान राए। ११ जैखन तै मैन्हु पतरस ते
 यूहन्ना द्लेइतां खड़खड़ो थियो, त सब लोक जैना तैडी खड़खड़े थिये, बडे
 हैरान भोइतां सुलैमानी अंगने मां देवडतां तैन कां आए। १२ पतरसे एन हेरु त
 तै लोकन कां एन्चरे खड़ो भोव, ते ज्ञोने लगो, “हे इसाएली लोकव तुस एस
 गल्ली पुड़ किजो हैरान भोरेथ, ते असन एन्चरे किजो तकने लोरेथ, असेई
 अपने शक्ति या भक्ति सेइं ए टोंटो मैन्हु च्छलने फिरनेरे काबल नई बनेवरोए।
 १३ अब्राहम ते इसहाक ते याकूबेरे परमेश्वरे ते इश्शे पूर्वजां केरे परमेश्वर अपने
 दासे यीशु महिमा दित्ती, पन तुसेई तै यहूदी लीडरन कां दित्तो कि तैना तैस
 मारन। पिलातुसे तै हथरां छडनेरो इरादो कियो, पन तुसेई यीशुएरो इन्कार
 कियो। १४ तुसेई यीशु अक एरो पवित्र ते धर्मी मैन्हु रद कियो, ते पिलातुसे
 कां दरखुवास की, कि तै तुश्शे लेइ अक कातली हथरां छडे। १५ तुसेई तै
 ज़िन्दगी देनेबालो मारो, पन अस गवाह आम, कि परमेश्वरे तै मुडदन मरां
 ज़ींतो कियो। १६ तैसेरे नव्वेंरी शक्ति एस टोंटे, जै तुश्शे सामने ते जैस तुस
 जानतथ शिफा दित्तोरिये ते ए मैन्हु यीशुएरे नंक्वे सेइं ते यीशु पुड़ विश्वास
 केरने सेइं बिलकुल ठीक भोव, ते ए एप्पू तुश्शे सामने। १७ “हे मेरे ढलाव
 अवं ज्ञानताई कि जैन किछ तुसेई ते तुश्शे लीडरेई यीशु सेइं कियूं तैन तुसेई
 अनज्ञान भोइतां कियूं। किजोकि तुसन न थियो पतो कि तै मसीह आए। १८
 पन परमेश्वरे एना सैरी गल्लां जैना तैनी अपने नेबी केरे ज़िरिये ज़ोरी थी, कि
 मसीह दुःख ऊठालो ते मरेलो ते तैनी तैना एन्चरे पूरी की। १९ बस्सा पापन
 करां मनफिराथ ते परमेश्वरे पासे फिरा ते तै तुश्शे पाप माफ केरेलो, ते
 परमेश्वरी तरफां तुश्शे लेइ परमेश्वरे तरफां रोडे दिहाडे एज्जेले। २० ते तै
 मसीह यानी यीशु जै तैनी ठहरावरो आए, तुश्शे लेइ भेजे। २१ पन जांतगर
 तैना सैरी चीजां बहाल न केरे, जैन केरे बारे मां परमेश्वरे बडे पेइले अपने
 पवित्र नेबी केरि जबानी जोरूए, तांतगर यीशुएरु स्वर्गे मां रानू जरूरीए। (aiōn)

g165) 22 ज़ेन्चरे मूसा एस बारे मां ज़ोरू थियूं, प्रभु परमेश्वर तुश्शे ढ़लान मरां
तुश्शे लेइ मेरो ज़ेरो अक नबी भेज़ेलो, ज़ैन किछ तै तुसन सेइं ज़ोए, तुस
तैसेरी गल शुनथ। 23 पन ज़ै तैस नेबेरी गल न शुनेलो, तै लोकन मरां नाश
कियो गालो। 24 ते शमूएल परमेश्वरेरी गल्लां ज़ोनेबाले करां देइतां पेइले
तमाम नेबेर्ड इन दिहाड़ां केरे बारे मां शुनावरु। 25 तुस नेबी केरि खानदेंनी ते
ज़ै करार परमेश्वरे इश्शे पूर्वजन सेइं कियोरो थियो, तैस मां तुस सब शामलथ,
परमेश्वरे अब्राहमे सेइं ज़ोरू थियूं, कि तेरे मट्टेरे ज़िरिये सेइं दुनियारी तमाम
कौमन बरकत मैलेली। 26 परमेश्वरे अपनो सेवक मुड़दन मरां ज़ींतो कियो ते
पेइलो तुसन कां भेज़ो, ताके तुसन तै बरकत दे, कि तुसन मरां हर कोई
पापेरी ज़िन्दगी शैरतां परमेश्वरे पासे फिरे।”

4 हेजू पतरस ते यूहन्ना लोकन सेइं गल्लां केरते थिये, त किछ याजक ते
मन्दरेरे पेरहेदार ते किछ सदूकी लोक तैड़ी पुज़े। 2 तैना बड़े सेरकोए, कि
पतरस ते यूहन्ना लोकन एरी शिक्षा देते कि परमेश्वरे मर्ए लोकन ज़ींतो केरेलो,
ज़ेन्चरे तैनी यीशु मुड़दन मरां ज़ींतो कियोरोए। 3 तैनेर्ड तैना दुइयोवं दिहैड़ी
तगर गिरफ्तार रख्खे, किजोकि तै ड्लोझारो मौको थियो। 4 पन केही लोकेई
वचन शुन्तां यीशु पुड़ विश्वास कियो, ते तैन केरि तैधात 5000 मड़द भोइ।
5 होरसां एरु भोवं कि तैन केरे लीडर ते बुजुर्ग ते शास्त्री यरुशलेम नगरे मां
जम्हां भोए। 6 हन्ना महायाजक तैड़ी थियो, ते कैफा ते यूहन्ना महायाजक ते
सिकन्दर ते खानदेनरे होरे लोक भी तैड़ी थिये। 7 तैनेर्ड पतरस ते यूहन्ना
मझाटे खड़े किये ते तैन पुच्छू, “तुसेई केसेरे शक्ति या केसेरे अधिकारे सेइं
एन कम कियोरूए?” 8 तैखन पतरस पवित्र आत्माई सेइं भरपूर भोइतां तैन
एन्चरे सेइं ज़ोने लगो, “हे कौमरे लीडराव ते बुजुर्गव। 9 अगर अज़ असन
एल्हैरेलेइ पूछ ताछ की गातीए, कि असां एककी रोड़े कम्मेरो जुवाब देम, ज़ैन
असेई एककी टोंटे मैनेरे लेइ कमाव ते तैस शिफ़ा दित्ती। 10 ते तुसन ते सारे
इसाएलिन ए पतो लगे, कि ए मैन्हु यीशु मसीह नैसरेरे नव्वेंरी शक्ति सेइं
बेज़झोइतां तुश्शे सामने खड़ोए, ज़ै यीशु तुसेई कूसे पुड़ चाढ़ोरो थियो, पन
परमेश्वरे तै मुड़दन मरां ज़ींतो कियोरोए। 11 ए तैए घोड़े, ज़ै तुसेई मिस्ट्रेई रद्दी
कियोरो थियो, पन तैए घोड़ कूनेरो खास घोड़ भोइ जेव। 12 ते पापां केरि
माफ़ि केन्ची होरेरे ज़िरिये सेइं नई, किजोकि अम्बररां बुन मैनन् मां कोई होरु

दुइयों नवं नई दित्तेरु, ज़ेसेरे जिरिये सेइं मुक्ति मैल्ले, सिर्फ यीशुएरे नंवे सेइं मुक्ति आए।” 13 ज़ैखन तैनेई पतरस ते यूहन्नारी दिलेरी हेरी, त तैखन तैन पतो लगो, कि एना त अनपड़ ते मामुली मैन्हु आन ते तैना बड़े हैरान भोए, तैखन तैनेई बुझू कि एना लोक यीशु सेइं साथी राहोरेन। 14 तैनेई पतरस ते यूहन्ना खलाफ किछ न ज़ोई बटु, एल्हेरेलेई कि ज़ै मैन्हु बेझ़ोरो थियो, तै मैन्हु तैन सेइं साथी खड़खड़ो थियो। 15 तैखन तैनेई पतरस ते यूहन्ना महासभा करां बेडर नेनेरे लेइ ज़ोंवं, ते एप्पू मांमेइं मुशोरो केरने लगे। 16 “असां एन लोकन सेइं कुन केरम? यरुशलेम नगरेरे सब लोक ज्ञानतन कि एन लोकेई अक बड़ो चमत्कार कियोरोए, ज़ेसेरो अस इन्कार न केरि बटम। 17 पन एल्हेरेलेई अस एन न चाम कि ए गल लोकन मां जादे मुशूर न भोए, रोडू त एने कि अस एन धमकेइतां ज़ोम कि अज़ेरे बाद एन नवं घिन्तां केन्वी सेइं गल न केरन।” 18 तैखन तैनेई पतरस ते यूहन्ना अन्तर कुजेइतां हैदैयत दित्ती, “यीशुएरु नवं घिन्तां केन्वी सेइं गल न केरथ, ते न शिक्षा देइयथ।” 19 पन पतरस ते यूहन्ना तैन जुवाब दित्तो, “तुस एप्पू ए फैसलो केरा, कि कुन ए गल परमेश्वरी नज़री मां ठीके, फिरी अस तुश्शी गल मन्नम कि परमेश्वरी? 20 किजोकि एन नई कि ज़ैन किछ असेई शुनू ते लाहू, ते तैसेरे बारे मां ज़ोतम।” 21 तैखन तैनेई पतरस ते यूहन्ना धमकेइतां हथरां छँडे, द्रासले मां तैना फैसलो न केरि सके, कि एन सज्ञा त देम पन केन्वरे देम, किजोकि तमाम लोक ए चमत्कार हेरतां परमेश्वरी महिमा केरते थिये। 22 किजोकि ज़ैस मैन्हु पुड़ शिफा देनेरो चमत्कार हिरावरो थियो, तै 40 सालन करां जादे उमरारो थियो। 23 पतरस ते यूहन्ना तैटुं छुट्नेरां बाद अपने लोकन कां चले जे, ते ज़ैन किछ प्रधान याजक ते बुजुर्गेई तैन ज़ोरु थियूं, तैन सेइं शुनावं। 24 ज़ैखन तैनेई एना गल्लां शुनी त अक भोइतां बड़े ज़ोरे सेइं परमेश्वरे कां प्रार्थना केरने लगे, तीं धरती त कने अम्बर ते समुन्द्रे ते ज़ैन किछ एसमां आए बनोरुए। 25 तीं पवित्र आत्मारे जिरिये सेइं अपने सेवक इश्शे पूर्वज दाऊदेरी जिरिये ज़ोरु थियूं, “कि कौमेई किजो हैल्लो मच्चाव? ते मुलखां-मुलखां केरे लोक किजो बेफैइदे खियाल केरतन? 26 ज़मीनरे राजे, प्रभु ते तैसेरे मसीहेरे खलाफ खड़े भोए ते हाकिम साथी खड़े भोए।” 27 “एन सज्जे कि हेरोदेस पुन्तियुस ते पिलातुस भी गैर यहूदी ते सब इसाएली लोकन

सेइं साथी तेरे पवित्र सेवक यीशुएरे खलाफ नगर-नगरे मां खड़े भोए, जै तीं
मसीह ठहरावरो थियो। 28 तैना एल्हेरेलेइ अकोटु भोरे थिये कि जैन किछ तू
अपनि कुदरतारो इरादेरे मुताबिक पेइले तैनी ठहरावरु थियूं, तैस पुड़ अमल
केरम। 29 हुनी हे प्रभु, तैन केरि धेमकी शुन, ते अपने दासन इन वरदान दे,
कि तेरु बच्चन बेड़ि दिलेरी सेइं लोकन शुनेर्इ बटम। 30 अपनो हथ अग्रोवं
रख, ते अपने पवित्र सेवक यीशुएरे नंब्वे सेइं शिफ्फा दे, ते चमत्कार ते निशान
हिरा।” 31 ते जैखन तैनेर्इ प्रार्थना की, त जैस ठैरी तैना अकोटु जम्हां थिये,
त तै ठार हिल्ली, ते तैना सब पवित्र आत्माई सेइं भेरोए, ते परमेश्वरु बच्चन
बेड़ि दिलेरी सेइं शुनाने लगे। 32 विश्वास केरनेबालां केरि मण्डली अक मन
ते अक जान थी, कोई भी एरो न थियो जै अपनो माल अपनो समझतो
भोए, बल्के होरन भी सैरी चीज्जन मां शामल रखते थिये। 33 ते प्रेरित बेड़ि
शक्ति सेइं प्रभु यीशुएरे मुड़दन मरां ज़ीते भोनेरी गवाही देते थिये, ते तैन
पुड़ परमेश्वरो बड़ो अनुग्रह थियो। 34 तैन मरां कोई भी गरीब न थियो,
किजोकि ज़मीना केरे त घरां केरे मालिक तैन बेच्चतां तैन केरि कीमत प्रेरितन
कां आनते थिये। 35 ते तैना तै रकम प्रेरितन देते थिये, ते हर केन्वी तैसेरी
जुरुरतारे मुताबिक बेंटां देते थिये। 36 यूसुफ नंब्वेरो अक लेवी थियो, जै
साइप्रसेरो रानेबालो थियो, ते प्रेरितेर्इ तैसेरु नवं बरनबास रखेरु थियूं (ज़ेसेरो
मतलबे शैनतरु मट्टु)। 37 तैनी अपनू ऊडार बेचू, ते कीमत एन्तां प्रेरितन
दित्ती।

5 हनन्याह नव्वेरो अक मैन्हु थियो, ते तैसेरी कुआन्शरु नवं सफीरा थियूं ते
तैनेर्इ अपनि जेर्दातरो किछ हिस्सो बेची छड्हो। 2 ते कीमती मरां किछ पेइसे
एप्पू कां रखे, ज़ेसेरो तैसेरी कुआन्शी भी पतो थियो, ते बाकी होरे पेइसे एन्तां
प्रेरितन दित्तो। 3 पन पतरसे तैस सेइं ज़ोवं, “हे हनन्याह! शैताने तेरे मने मां ए
गल केन्वरे छडी, कि तू पवित्र आत्माई सेइं झूठ ज़ोस, ते ज़मीनारे पेइसन
मरां किछ रेख्खी छडस? 4 कुन बेच्चने करां पेइले ज़मीन तेरी न थी, पन
बेच्चनेरां बाद कुन पेइसो तेरो न भोव? तीं अपने मने मां किजो सोचू? तीं मैन्हु
सेइं नई बल्के परमेश्वरे सेइं झूठ ज़ोरूए!” 5 हनन्याह एन शुनते खिरकी जेव,
ते तैसेरे प्राण निस्से, ते जैन लोकेर्इ एन शुनू त तैना बड़े डेरि जे। 6 तैखन
किछ नौजवान आए ते तैनेर्इ तैसेरी लाश कफने मां पलेटतां ते बेइरोवं नेइतां

देवतां छङ्डी। 7 दलेइ धैन्टना पत्ती तैसेरी कुआन्श आई, ते तैस एस बारे मां कोई पतो न थियो। 8 पतरसे तैस पुच्छू, “मीं ज़ो, कुन तुसेई दुइयेई ज़मीन एत्रे मां बेचोरी थी?” तैसां ज़ोवं, “हाँ कुल कीमत एत्री मैल्लोरी थी।” 9 पतरसे तैस सेइं ज़ोवं, “प्रभुएरी आत्मा अज़मानेरे लेइ तुस केन्चरे सेइं राजी भोए, ते ज़ैन लोकेई तेरो मुन्श दबोरोए, तैन केरे पाव हेर दारे पुड़ आन, ते तैना तीं भी बेइरोवं घिनी गाले।” 10 तै कुआन्श तैखने तल्ले बिछङ्डी, ते तैसारे भी प्राण निस्सो, ते ज़ैखन नौजवान अन्तर आए त तै कुआन्श मर्फ लेइतां तै भी छुइतां तैसारे मुन्शे ड्लाखोरां देवतां छङ्डी। 11 सैरी यरुशलेमेरी कलीसिया ते एन गल्लां केरे शुन्ने बाले बड़े डेरि जो। 12 प्रेरितां केरे ज़िरिये बड़े चमत्कार ते निशान बांदे भोए, ते सारे विश्वासी अक भोइतां सुलैमानी अंगने मां जम्हां भोते थिये। 13 हालांकी होरे लोक तैन केरि बड़ी इज्ज़त केरते थिये, पन केन्ची हिम्मत न आई कि तैन मां शामिल भोन। 14 बड़े मझदेहं ते कुआन्शोई विश्वास कियो ते तैन लोकां केरि मेनडली मां शामिल भोए, ते परमेश्वर मन्ने बालां केरि तैधात बद्धती च़ली। 15 ज़ैन प्रेरितेई कियूं तैसेरो नितीजो ई भोव, कि लोक बिमारन खट्टन पुड़ ते पिट्ठी पुड़ छुइतां सङ्की मां रखते थिये, कि पतरस ज़ैखन तैस बत्तां एज्जे त तैसेरी छाव त तैन पुड़ पे। 16 यरुशलेम नगरेरे चेव्रे पासना ड्लोंवां केरे बड़े लोक बिमारन ते ज़ैन पुड़ भूतां केरो सैयो, एपू सेइं साथी आनते थिये, ते तैना सब बेज़ज्जोते थिये। 17 तैखन महायाजक ते तैसेरे साथी ज़ैना सदूकी केरे फिरके मरां थिये, तैन बड़ी जलन भोने लगी ते तैना प्रेरितां केरे खलाफ खड़े भोए। 18 ते तैनेई प्रेरित ट्लुवेइतां कैद मां छेड़ी दित्ते। 19 पन प्रभुएरो राती स्वर्गदूत कैदखाने मां दार खोलतां प्रेरितन कां जेव, ते तैना बेइर केढतां तैन सेइं ज़ोने लगो। 20 “गाथ ते मन्दरेरे अंगने मां खड़े भोइतां हमेशारे ज़िन्दगरे बारे मां लोकन बिस्तार देथ।” 21 तैना एन शुन्तां झोझां मन्दरेरे अंगने मां पुजे ते ज़ेन्चरे तैन स्वर्गदूते हुक्म दित्तोरो थियो, तेन्चरे लोकन शिक्षा देने लगे, ते ज़ैखन इसाएली महायाजक ते तैसेरे साथी तैड़ी आए, त तैनेई महासभा ते सब यहूदी केरे सारे बुजुर्ग कुजाए, ते तैनेई यीशुएरे प्रेरित कैदखाने मरां कुजाए। 22 ज़ैखन मन्दरेरे पेरहेदार कैदखाने मां पुजे त तैन प्रेरित तैड़ी न मैल्ले, ते वापस एइतां तैन खबर दित्ती। 23 “असेई कैदखानो रोड़ेचारे बंद

कियोरी थियो, ते पेरहेदार भी असन दारे मां खड़खडे मैल्ले, पन ज़ैखन
 असेई कैदखानो खोल्लो त अन्तर कोई न मैल्लो।” 24 एना गल्लां शुन्तां
 मन्दरेरे पहरेदारां केरो प्रधान, प्रधान याजक ते सारे लोक हैरान रेइजे, ते तैन
 केरि फिक्री मां पे कि हुनी कुन भोनौ! 25 तैखन केन्चे एइतां ज़ोवं, “तैना
 मैन्हु ज़ैना तुसेई कैदे मां छडोरे थिये, तैना मन्दरे मां खडे भोइतां शिक्षा देने
 लगोरेन।” 26 तैखन मन्दरेरे पहरेदारां केरे प्रधान अपने सिपाही साथी धिन्तां
 जे, ते प्रेरित कुजेइतां आने पन ज़बरदस्ती नई, किजोकि तैना लोकन करां
 डरते थिये, कि एरु न भोए एना असन घोड़ै बान। 27 तैनेई प्रेरित एन्तां
 महासभा मां पैश किये, ते महायाजके तैन पुच्छू। 28 “असेई तुसन ठाकेरु
 थियूं कि यीशुएरु नवं धिन्तां शिक्षा न देइयथ? फिरी भी हेरा, तुसेई सारे
 यरुशलेम नगरे मां अपनि शिक्षा फैलाई, ते तैस मैनेरो खूनेरो दोष असन
 पुड़ लानो चातथ।” 29 पतरस ते होरि प्रेरितेई जुवाब दित्तो, “असन मैन्हु
 केरो हुक्म मन्नेरे बजाहे परमेशरेरो हुक्म मन्नो जादे ज़रुरीए। 30 इश्रे दादे-
 पड़दादां केरे परमेशरे ए यीशु मुड्दन मरां ज़ींतो कियो, ज़ै तुसेई कूसे पुड़
 चेढ़तां मारो। 31 तैए परमेशरे, प्रभु ते मुक्ति देनेबालो बनेइतां अपने देइने पासे
 बिशालो, ताके तै इस्साएलिन मन फिराने ते पापां केरि मैफारो मौको दे। 32
 असां एन गल्लां केरे गवाह आम, ते पवित्र आत्मा भी, ज़ै परमेशरे तैनी
 अपनो हुक्म मन्ने बालन दित्तोरीए।” 33 ज़ैखन तैनेई एन शुनू त फुकोई जे,
 ते तैन केरि मर्जी लगी ज़ोने कि एन मैरी छडम। 34 पन अक फरीसी मैन्हु
 ज़ेसेरु नवं गमलीएल थियूं ते ज़ै शास्त्री भी थियो, ते ज़ै सेब्ही लोकन मां
 इज़जतदार थियो, तैनी महासभा मां खडे भोइतां हुक्म दित्तो कि एना मैन्हु
 थोड़े चिरे बेझर भेजा। 35 तै एन ज़ोने लगो, “हे इस्साएली लोकव तुस ज़ैन
 किछ एन मैनन् सेइं केरनू चातथ तैन रोडेचारे सोचा। 36 किजोकि थोड़े
 चिरे पेइले थियूदास इन ज़ोइतां खडो भोरो थियो, ते ज़ोतो थियो, अवं भी
 किछ आई, ते लगभग 400 मैन्हु तैस सेइं मिले, पन तै मारो जेव, ते तैसेरे
 मन्नेबाले सारे तितर-बितर भोइ जे, ते तैन केरो नामो निशान मिटी जेव। 37
 तैसेरां पत्ती मैन्हु केरे गिनतरे वक्ते गलील इलाकेरो यहूदा निसोरो थियो, ते
 तैनी काई लोक अपने पासे खिचोरे थिये, तै भी मारो जेव, ते तैसेरे ज़ेत्रे
 साथी थिये, सब तितर-बितर भोइ जे। 38 हुनी अवं तुसन एन्ने जोताई कि

एन मैनन् करां दूर भोथ, ते एन गाने देथ, किजोकि अगर एना चमत्कार,
मैन्हु केरि तरफां भोले त एप्पू खतम भोइ गानेन। 39 पन अगर एना कम्मां
परमेश्वरी तरफां भोलां, त तुस एन मैन्हु केरु किछ न बिगडी सकत, ते तुस
परमेश्वरे खलाफ लङ्नेबाले भोले, तैनेई तैसेरी सल्लाह मन्नी।” 40 ते प्रेरित
अन्तर कुजेइतां तैन डंडेइं बावैहीतां तैन ज़ोवं, कि अज़ेरां बाद यीशुएरे नंवे
सेइं कोई गल न केरथ, ते तैना हथरां छडे। 41 प्रेरित महासभा मरां च्छले जे,
तैना एस गल्ली पुडु खुशी थिये, कि असां यीशुएरे नंवे सेइं बेइज्ञत भोनेरे
काबल त भोए। 42 तैनेई शिक्षा देनी बंद न की, बल्के रोज मन्दरे मां गेइतां ते
घर-घर गेइतां लगातार खुशखबरी शुनाते राए कि यीशु ही मसीह आए।

6 ई गल तेइसेरीए ज़ेइस चेले केरि गिनती बधने लगोरी थी, यूनानी भाषा
ज़ोनेबालो यहूदी चेलेई इब्रानी भाषा ज़ोनेबाले यहूदी चेलां केरि शकैइत केरने
लगे, कि हर दिहैड्रे सेवाई मां विधवां केरि खबर न की गाए। 2 एन शुन्तां
12 प्रेरितेई सारे यरुशलेमेरे सारे विश्वासी लोक (चेले) अकोटु किये, ते ज़ोवं,
“इश्शे लेइ एन मुनासब नई कि अस परमेश्वरी वचनेरु प्रचार केरनो छेडतां
खाने पीनेरी सेवाई मां लगगम 3 एल्हेलेइ हे मेरे ढळाव, अपने लोकन मरां
सत भलमानस मैन्हु चुना, ज़ैना पवित्र आत्माई सेइं भरपूर ते अक्लमन्द
भोन, ताके आस तैन एस कम्मेरी ज़िमेबारी सोंफम।” 4 पन अस त प्रार्थना
केरने ते बच्चन शुनानेरी ते शिक्षा देनेरी सेवाई मां लग्गोरो रानेम। 5 ए गल
सारे लोकन पसंद आई, ते तैनेई अक स्तिफनुस जै विश्वास ते पवित्र आत्माई
सेइं भरपूर थियो चुनो, ते होरे ज़ैना चुने तैन केरां नवां इना आन, फिलिप्पुस
प्रुखुरुस, नीकानोर, तीमोन, परमिनास ते नीकुलाउस जै अन्ताकिया नगरेरो
रानेबालो थियो, ते यहूदी फिरके मां ओरो थियो। 6 ते तैना प्रेरितन कां हाज़र
किये, ते तैन केरे लेइ तैनेई प्रार्थना की, ते तैन पुडु हथ रख्खे। 7 एन्वरे सेइं
परमेश्वरे बच्चन फैलतु जेरं, ते यरुशलेम नगरे मां चेलां केरि गिनती बद्धती
जेर्ई, ते याजकां केरि अक टोली विश्वासे मां आई ते मसीही भोइजेइ। 8
स्तिफनुस अनुग्रह ते शेक्कि सेइं भरपूर भोइतां लोकन चमत्कार ते निशान
हिरातो थियो। 9 आजाद भोरे यहूदी लोकां केरु अक प्रार्थना घर थियूं,
कुरेनी ते सिकन्दरिया ते किलिकियारे ते आसियारे किछ लोकन मरां किछ
स्तिफनुसे सेइं बेंस केरने लगे। 10 तैना तैन गल्लां केरो जुवाब न देइ बटे,

जैना पवित्र आत्मा तैस जोनेरी समझा दित्ती। 11 तैखन तैनेई किछ लोक शिखाले, कि तुस झूठ ज़ोइयथ कि, “असेई स्तिफनुस मूसेरे त कने परमेशरे खलाफ तुहीन केरते शुनोरोए।” 12 तैखन तैनेई किछ लोक, बुजुर्ग ते शास्त्री स्तिफनुसेरां खलाफ बमकाए ते तै ट्लेइतां महासभा मां पैश कियो। 13 तैनेई बडे झूठे गवाह पैश किये, “ते तैनेई गवाही दित्ती कि ए मैन्हु पवित्र ठाररे ते मूसेरे कानूनेरे खलाफ तुहीन केरने करां बाज़ न एज्जे। 14 ते असेई एस मैन्हु करां एन भी ज़ोतू शुनू, कि यीशु नासरी इस मन्दरे डोलेलो, ते तैना रसमां जैना मूसा नेबे दित्तोरिन बदलेलो।” 15 तैखन लोक जैना महासभा मां दिशोरे थी, तैसेरे पासे तक्कू कि तैसेरु तुतर स्वर्गदूतेरे ज़ेरु लेइहोतु थियूं।

7 तैखन महायाजके स्तिफनुसे सवाल पुछो, “कुन एना इलज़ाम सच्चे आन?” 2 तैनी ज़ोवं, “हे ढ्लाव ते मेरे बुजुर्गाव, मेरी गल शुना, इश्शो पूर्वज अब्राहमे हारान नगरे मां बसने करां पेइलो मेसोपोटामिया इलाके मां थियो, ते महिमा बाले परमेशरे तैस दर्शन दितू 3 ते परमेशरे तैस सेइं ज़ोवं, अपनो देश त अपने रिशतेदारन शैरतां तैस मुलखे मां गा, ज़ै अवं तीं हरेइलो। 4 तांए तै कसिदी केरे मुलखे शैरतां हाराने मां बसोरो थियो, तैसेरे बाजेरे मरनेरां पत्ती परमेशरे तै तैस मुलखे मां आनो जैस मां अज़ तुस बसोरेथ। 5 पन परमेशरे तैस इडी किछ भी जेइदात न दित्ती, बल्के पाव रखने जो भी ज़मीन न दित्ती, पन वादो ज़रूर कियो कि ई ज़मीन अवं तीं ते तेरी औलादी कब्जे मां देलो हालांकि तेइस अब्राहमे कोई औलाद न थी। 6 परमेशरे इन भी ज़ोवं, तेरी औलाद एककी बखले देशे मां परदेशी भोली, तैना तैन गुलाम बनाले, ते 400 सालन तगर तैन दुख देलो। 7 फिरी परमेशरे ज़ोवं, ज़ै कौम तैन गुलाम बनाली तैन अवं सज़ा देइलो, ते तैसेरां बाद तैना तैस मुलखे मरां निस्सतां इडी एज्जेले ते मेरी आराधना केरेले। 8 ते परमेशरे अब्राहमे सेइं करार कियो ते तैस सेइं ज़ोवं, कि निशानेरे रूपे मां सेब्भी घरानेरे नर मैन्हु केरो खतनो केर। जैखन इसहाक ज़रमो ते अठे दिहैडी केरो भोव, त अब्राहमे तैसेरो खतनो कियो, ते एन्वरे इसहाके अपने मट्टे याकूबेरो खतनो कियो, ते याकूबेरे अपने 12 मट्टां केरो खतनो कियो। 9 याकूबेरे मट्टैई जलनी सेइं अपनो ढ्ला यूसुफ मिस्र मुलखे जो गाने बालन जो बेंगो, ते तैनेई यूसुफ मिस्रे मां नेइतां गुलाम बनाव? पन परमेशर यूसुफे सेइं साथी थियो। 10 परमेशरे तै सैरी

मुसीबतन करां छुटेइतां, ते तैस बड़ी अकल दित्ती, ते मिसेरे फ़िरैन राज़ेरे
 सामने बड़ी काबलीत दित्ती, ते फ़िरैन राज़े, यूसुफ मिस्र मुलखेरो ते अपने
 महलेरो गवर्नर बनावं। 11 ज़ैस वक्ते यूसुफ थियो त मिस्र मुलख ते कनानारे
 सारे मुलखे मां काल पेव, ते बड़ी मुसीबत आई, ते इश्शे दादे-पङ्ददादन खाने
 जो अन न मैल्लू। 12 ज़ैखन याकूबे शुनू कि मिसे मां अन्न आए, त तैनी इश्शे
 पूर्वज मिस्र मुलखे मां पेइली बार भेजे, तैना यूसुफ सेइं मिले ते अन आनू पन
 तैनेई तै न पिशानो। 13 ज़ैखन तैना ठुइयोवं फेरे मिस्र मुलखे मां अन्न आन्ने
 जे, त यूसुफे अपनो आप तैन पिशानाव, ते फ़िरैने भी यूसुफेरी कौमरो पतो
 लगो कि ए इब्रानी आए। 14 तैसेरां बाद यूसुफे अपनो बाजी याकूब ते तैसेरे
 75 मैन्हु केरु टब्बर मिस्र मुलखां मांजो एजनेरो बिस्तार भेज़ो। 15 किछ
 वक्तेरां बाद याकूब मिस्र मुलखे मां जेव, ते तै त इश्शे दादे-पङ्ददादे तैड़ी मेरि
 जे। 16 तैन केरि लाशां तैटुं इश्शे मुलख कनाने मां वापस एन्ही, ते तैनेई
 याकूब, तैस ठैरी दफन कियो, ज़ै ठार अब्राहमे चाँदी देइतां घिन्नोरी थी, ते
 याकूबेरां मटुं शेकेम नगरेरे तैस ठैरी दफन कियां, ज़ै याकूबे हामोरेरी औलादी
 करां घिन्नोरी थी।” 17 “परमेशरे अब्राहमे सेइं अक वादे कियोरो थियो, तैस
 वादेरो पूरो भोनेरो मौको अव त मिसे मां इश्शे लोकां केरि गिनती भी बड़ी
 बेद्धी जेर्ई। 18 तैस मौके अक होरो राज़ो मिस्र देशे मां राज़ केरने लगो, ज़ै
 यूसुफे न थियो ज़ानतो। 19 तैनी इश्शी कौमी सेइं एरी घलाकी कि ते इश्शे
 दादन-पङ्ददादन सेइं एरी बदसलूकी की, तैना एत्रे मजबूर किये कि तैना अपने
 ज़र्मते बच्चे बेइरोवं शारन ताके तैना मेरि गान। 20 तैने दिहैड़न मां मूसा पैदा
 भोव, तै परमेशरेरी नज़री मां बड़ो रोड़ो थियो, ते तै ट्लाई महीन्न तगर अपने
 बाजेरे घरे मां छेपतां पलतो राव। 21 पन ज़ैखन जादे चिरे तगर छुपेर्ई न बटे,
 तै दरियाए मां शारो त फ़िरैनेरे कुइयां तै नेव ते अपने मट्टोरो ज़ेरो पालो। 22
 मूसा नबी मिसी केरि सैरी शिक्षारो ते तैन केरि सैरी गल्लां केरि वाकफित
 भोइजेइ, ते गलबाती ते कम्मे मां मजबूत थियो।” 23 “ज़ैखन मूसा नबी 40
 सालां केरो भोव, त तैसेरे मने मां ए गल आई, कि अवं अपने इसाएली ढ़लां
 केरो हाल पतो केरि। 24 मूसा एककी इसाएली मैन्हु पुड़ जुलम भोतो लाहू त
 तैनी तै बचाव, ते तै ज़ालम मिसी मैरतां ज़ैस पुड़ जुलम भोरो थियो बदलो
 घिन्नो। 25 तैनी सोचू, कि तैसेरे ढ़लां समझेले, कि परमेशरे तैसेरे जिरिये सेइं

तैन मिस्री केरि गुलैमी करां तैन मुक्ति देलो, पन तैनेईं न समझू। 26 मूसा
 होरसां दूई इस्साएली एप्पू मांमेइं लड़ते लाए, ते तैन समझानेरी कोशिश की,
 ते मूसा तैन ज़ोवं, हे जवानव तुस त एप्पू मांमेइं ढला भोतथ, ते तुस किजो
 एककी होरि पुड़ जुलम केरतथ? 27 पन ज़ै मैन्हु अपने पड़ोसी पुड़ जुलम
 केरने लोरो थियो, त तैनी मैने मूसा जो धमकेइतां ज़ोवं, तू केनि असन पुड़
 हुकूमत केरनेबालो या हाकिम बनेवरोस? 28 ज़ेन्चरे तीं तै मिस्रेरो रानेबालो
 हीज मारोरो थियो, तेन्चरे तू अज़ मीं मारने चातस? 29 ए गल शुनते मूसा
 तैटां नश्शो, ते मिद्यान मुलखे मां परदेशी भोइतां राने लगो, ते तैड़ी तैसेरा दूई
 मटां पैदा भुआं। 30 40 साल मिद्यान मुलखे मां रानेरे बाद तैस सीनै पहाड़ेरे
 सुनसान ठारी मां एककी झाल्लेरी अग्गी स्वर्गदूत लाव, ते परमेशरे स्वर्गदूतेरे
 ज़िरिये तैस सेइं गल की। 31 मूसा झाल्लेरी अग्गी लेइतां कि झाल फुकोने नईं
 लोरू त तै हैरान रेइ जेव, ते ज़ैखन तै हेरनेरे लेइ नेड़े जेव त तैनी प्रभुएरी
 आवाज़ शुनी। 32 ‘अवं तेरे दादे-पड़दादां केरो यानी अब्राहम, इसहाक ते
 याकूबेरो परमेशर आई,’’ तैखन मूसा डेरतां कम्बने लगो, इन तगर कि तैस
 हेरनेरी हिम्मत न भोइ। 33 तैखन प्रभुए तैस जो ज़ोवं, अपने पांवां केरी जुट्टी
 खोल्ल, किजोकि ज़ैस ठैरी तू खड़ोस तै पवित्र ठारे। 34 मीं मिस मुलखे मां
 अपने लोकां केरि बुरी हालत हेरी, मीं तैन केरू कर लानू ते लेरां शुनोरिन,
 एल्हेरलेइ अवं तैन छुटानेरे लेइ उन्ढो ओरोई, हुनी एई अवं तीं फिरी वापस
 मिस मुलखे जो भेजताई। 35 “एहे तै मूसो आए ज़ेसेरो इस्साएली लोकेई
 पेइलो इन्कार कियोरो थियो, कि तू केनि असन पुड़ हुकूमत केरनेबालो या
 हाकिम बनेवरोस, ते एहे तै मूसा परमेशरे अपने स्वर्गदूतेरे ज़िरिये सेइं ज़ै तैनी
 बलते झाल्लोए मां लाहोरो थियो, ते छुटानेबालो बनेइतां भेजो। 36 एनी मैने
 मिस मुलखे ते लाल समुन्द्रे मां 40 सालन तगर सुनसान ठैरी मां चमत्कार ते
 निशान हिराए। 37 एनी मूसा इस्साएली लोकन सेइं ज़ोरु थियूं परमेशर तुश्शे
 ढलान मरां तुश्शे लेइ अक मेरो ज़ेरो नबी खड़ो केरेलो। 38 एहे मूसा, इश्शे
 दादा पड़दादां केरो नबी राव ज़ैखन तैन सुनसान ठारी मां अकोट्टे भोरोए,
 परमेशरे एककी स्वर्गदूत सीनै पहाड़े पुड़ मूसे कानून दित्तो ते तैनी इश्शे दादे
 पड़दादन तैन कानून दित्तो, मूसे ज़िन्दगी देनेबाले वचन मैल्ले, तैनी तैना
 असन तगर पुजाए। 39 पन इश्शे दादे-पड़दादेई तैसेरो हुक्म न मन्नो चाव,

बल्के इकरार कियो, ते तैना मिस मुलखेरे जो वापस गानू चाते थिये। 40
 तैनेई मूसेरे ढलाए हारूने सेइं जोवं, तू इश्शे लेइ अक देबतो बना, जै असन
 अग्री-अग्री मिस मुलखे जो चले, किजोकि अस न ज्ञानम कि मूसा जैनी असां
 मिस मुलखे मरां केढतां आनोरेम, तैस कुन भोवं? 41 तैस वक्ते तैनेई बछड़ेरी
 अक मूरत बनाई, ते तैस कां बलिदान चाढ़ू, ते अपने हथ्थां केरे बनेवरी मूरती
 कां बड़ी खुशी मनाने लाए। 42 एल्हेरेलेइ परमेशरे तैन करां अपनू तुतर
 फिराव, ते तैना दिहाड़ेरी ते चैंदनरे ते अम्बरेरे तारां केरि ईश्वरेरे रूपे मां तैन
 केरि आराधना केरनेरे लेइ शारे, जेन्हरे नेबी केरि किताबी मां लिखोरूप, हे
 इस्माली लोकव, कुन तुस 40 सालन तगर सुनसान ठैरी मां जानवरां केरु
 बलिदान ते होरु बलिदान मेरे लेइ केरते राए? 43 बल्के तुसेई एप्पू सेइं साथी
 मोलेक देबतेरी मूरती ते रिफान देबतेरे तारे छुइतां चलते थिये, एना तैना
 मूरतिन जैन कां तुस मथ्थो टेकते थिये, एल्हेरेलेइ अवं तुसन बाबेले करां भी
 दूर बसेइलो।” 44 “सुनसान ठारी मां इश्शे दादन पड़दादन कां गवाहेरो तेम्बु
 थियो, परमेशरे तै ठहराव ते तैनी मूसा सेइं जोवं, जेन्हरे तीं लोरुप तैसेरे
 मुताबिक बना। 45 बड़े सालना बाद तैए तेम्बु इश्शे दादे-पड़दादई यहोशू सेइं
 साथी इड़ी आनो, जैस वक्ते तैनेई गैर कौमन पुड़ अधिकार हासिल कियो,
 जैना परमेशरे इश्शे दादे-पड़दादां केरे सामने कढे, ते तै तेम्बु दाऊद राज्हेरे वक्ते
 तगर राव। 46 दाऊदे पुड़ परमेशरे अनुग्रह कियो, ते तैनी मिनत की, कि अवं
 याकूबेरे परमेशरेरे लेइ अक घर बनेइ। 47 पन तैसेरे मट्टे सुलैमाने तैसेरेलेइ
 मन्दर बनाव। 48 पन परमप्रधान परमेशर हथ्थां केरे बनेवरे मन्दरन मां न राए,
 जेन्हरे यशायाह नेबेरे किताबी मां लिखोरूप, 49 प्रभु ज़ोते, स्वर्ग मेरो तखते,
 ते ज़मीन मेरे पांवां केरि चौकीए, तुस फिरी मेरे लेइ केरु ज़ेरु मन्दर बनाले?
 ते मेरे आराम केरनेरी ठार केरही जेरि भोली? 50 कुन मीं एप्पू सैरी चीजां नई
 बनेवरी? 51 “हे ढीठ लोकव, तुस तैसेरी शुन्नी ते मन्नी न चाथ, तुस पवित्र
 आत्मारी हमेशा खलाफत केरतथ। जेन्हरे तुश्शे दादे-पड़दादे केरते थिये, तुस
 भी तेन्हरे केरतथ। 52 नेबन मरां को तुश्शे दादे-पड़दादई नई स्तेवरो? जैनेई
 तैस एजनेबाले मसीहेरे बारे मां जोवं जै धर्मी आए, ते जैखन मसीह अव ते
 तुसेई धोखे सेइं तै ट्लुवेइतां मारो। 53 तुसन स्वर्गदूतन करां मूसेरे कानून त
 मैल्लो, पन तैस पुड़ अमल न कियूं।” 54 जैखन तैनेई एना गल्लां शुनी त

यहूदी लीडर फुकोई जे, ते स्तिफनुसे जो दंत लगे चापने। ५५ पन तैनी पवित्र आत्माई सेइं भेरोइतां अम्बरेरे पासे तक्कू, ते तैनी परमेशरेरी महिमा ते यीशु परमेशरेरे देइने पासे खड़खड़ो लाव। ५६ तैनी ज़ोवं, “हेरा, अबं स्वर्ग खुल्लू लाताई, ते मैनेरे मट्टे परमेशरेरे देइने पासे खड़खड़ो लाताई।” ५७ एन शुन्तां तैना ज़ोरे सेइं चिन्डां मारने लगे, ते अक भोइतां सेब्हेई तैस पुड़ हमलो कियो। ५८ ते तै दीलतां यरुशलेम नगर करां बेइर नीयो ते तैस जो घोड़ेई बाने लगे ते तै मारो, तैखन तैस पुड़ दोष लाने बालेई अपने चोगे खोलतां शाऊल नव्वेरे एककी मैन्हु कां रेखतां छङ्गे। ५९ ते ज़ैखन तैना स्तिफनुसे जो घोड़ेई बाने लागोरो थिये, ते तै स्तिफनुस इन ज़ोइतां प्रार्थना केरने लगो, “हे प्रभु यीशु, मेरी आत्मा कबूल केर। ६० फिरी तैनी ज़ैधू केरे भारे बिश्तां ज़ोरे सेइं ज़ोवं, ‘हे प्रभु एन इस पापेरो दोषी न बनेइयां।’” एन ज़ोनेरां पत्ती तैनी प्राण दित्त।

८ शाऊल तैसेरी मौती सेइं राज़ी थियो। तैस्से दिहाड़े यरुशलेम नगरेरे कलीसियाई पुड़ जुलम भोने लाव ते प्रेरितां केरे अलावा सारे लोक यहूदिया ते सामरियारे इलाकन मांजो तितर-बितर भोए। २ किछ परमेशरेरे भक्त मैनेर्ई स्तिफनुस नेइतां देबतां छङ्गो, ते तैसेरे मरने पुड़ बड़ो शोग कियो। ३ पन शाऊल कलीसियाई सताने लोरो थियो, ते तै घर-घर गातो थियो, ते विश्वासी मङ्गदन ते कुआन्शन बेइरोवं घसीटतो थियो, ते कैद केरतां छङ्गतो थियो। ४ पन ज़ैना विश्वासी तितर-बितर भोते थिये तैना खुशखबरी शुनाते छले। ५ ते फिलिप्पुस सामरियारे एककी नगर मां गेइतां मसीहेरो प्रचार केरने लगो। ६ ज़ैना गल्लां तैन लोकेई फिलिप्पुसेरी करां शुनी, ते ज़ैना निशान तै हिरातो थियो, तैन हेरी-हेरी, तैनेई अक भोइतां मन लाव। ७ ज़ैखन फिलिप्पुसे हुक्म दित्तो, त बड़े लोकन मरां भूतां चिन्डां मैरतां निस्सी जेआं, ते बड़े लोक अधरंगी ते टोटे बेझङ्गोइ जे। ८ ते तैन केरे वजाई सेइं नगरेरे बड़े लोक खुश भोइजेइ। ९ शमौन नव्वेरे एककी मैने सामरियारे नगर मां सारे लोक अपने जैदेइ सेइं हैरान कियोरे थिये, ते अपने आपे बड़ो खास मैन्हु बनातो थियो। १० निकके बडे सब तैसेरे पासे भोइतां ज़ोने लगे, “ए मैन्हु परमेशरेरी तै शक्ति ज़ैस ज़ो महान ज़ोतन।” ११ तैनी अपने जैदू सेइं बड़े चिरेरां देंते सब हैरान कियोरे थिये, एल्हेरेलेइ तैना लोक तैसेरी बड़ी इज़्जत केरते थिये। १२ पन ज़ैखन फिलिप्पुसे परमेशरेरे राज़ज़ेरे ते यीशु मसीहेरी खुशखबरी प्रचार की त

लोकेई विश्वास कियो, ते मङ्गदेहं कुआन्शोई बपतिस्मो नेव। 13 तैखन शमैने भी फिलिप्पुसेरे प्रचारे पुड़ विश्वास कियो, ते बपतिस्मो नेइतां फिलिप्पुसे सेइं साथी राने लगो ते तै बड़े चमत्कार ते निशान हेरतां हैरान रेइ जेव। 14 जैखन यरुशलेम नगरे मां प्रेरितेई शुनू कि सामरियारे लोकेई परमेशरेरु बच्चन कबूल कियोरुए ते तैनेई पतरस त यूहन्ना तैन कां भेजो। 15 जैखन तैना तैड़ी पुजे त तैनेई तैन लोकां केरे लेइ प्रार्थना की, कि एन पुड़ पवित्र आत्मा उतरे। 16 एल्हेलेइ कि तैन पुड़ पवित्र आत्मा हेजू न थी उतरोरी, तैनेई सिर्फ प्रभु यीशु मसीहेरे नंवे सेइं बपतिस्मो निहीयोरो थियो। 17 तैखन यूहन्ना ते पतरसे तैन पुड़ हथ रेखतां प्रार्थना की, ते तैन भी पवित्र आत्मा उतरी। 18 जैखन शमैने हेरु कि प्रेरितां केरे हथ रखने सेइं पवित्र आत्मा उतरते, त शमैने पेंइसे एन्तां प्रेरितन कां पैश किये। 19 ते शमैन ज़ोने लगो, “मीं भी शक्ति देथ, कि अवं भी जैस पुड़ हथ रेख्खी त तैस पुड़ पवित्र आत्मा उतरे।” 20 पतरसे तैस सेइं ज़ोवं, “तेरे पेंइसे तीं सेइं साथी गर्क भोन, किजोकि तू पेंइसन सेइं परमेशरेरु दान घिन्नू चातस। 21 एस सेवाई मां तेरो कोई भी हिस्सो नई किजोकि तेरो मन परमेशरे कां साफ नई। 22 तू अपनि इस बुरैई करां मनफिरा, ते प्रभु कां प्रार्थना केर, शैड प्रभु तेरी इस बुरे खियाले माफ़ केरे। 23 मनफिरा अवं हेरताई कि तू बड़े जलनी ते पापेरी गुलैमी मां आस।” 24 तैखन शमैने जुवाब दितो, “मेरे लेइ प्रभु कां प्रार्थना केरा, कि जैन किछ तुसेई ज़ोरुए, तैन मीं पुड़ न एज्जे।” 25 ते पतरस ते यूहन्ना गवाही देइतां ते प्रभु यीशुएरु वचन शुनेइतां यरुशलेम नगरे मां वापस आए, ते एइते बारे सामरी लोकां केरे बड़े ड्लोंवन मां खुशखबरी शुनाई। 26 फिरी एरु भोवं कि परमेशरे एककी स्वर्गदूते फिलिप्पुसे सेइं ज़ोवं, “उठ ते दक्षिणेरे बत्तां गा, जै यरुशलेम नगरेरां गाज़ा नगरे जो गातीए। ई रेगिस्तानी बत आए।” 27 तै उठो ते चळो जेव, ते बत्ती मां तैस अक कूश मुलखेरो खोजो मैल्लो, जै कूशी केरि रानी कन्दाकारो खज़ानची थियो, तै आराधना केरने यरुशलेम नगरे मां ओरो थियो। 28 तै अपने रथे पुड़ चेढ़तां अपने मुलखे जो वापस ओरो थियो, ते यशायाह नेबेरी किताब ज़ोरे-ज़ोरे सेइं पढ़ने लगोरो थियो। 29 पवित्र आत्मा फिलिप्पुसे सेइं ज़ोवं, “नेड़े गेइतां रथे सेइं साथी चल।” 30 फिलिप्पुस देवड़तां रथे कां नेड़े पुजो, त तैस करां यशायाह नेबेरी किताब पढ़ती शुनी, ते तैस पुच्छू, “तू जैन

पढ़ने लोरोस कुन तैन समझातस?” 31 तैनी ज़ोवं, “जां तगर कोई मीं न समझाए त अवं केन्वरे सेमझी?” ते तैनी फिलिप्पुसे कां मिनत की, कि एई रथे पुड़ बिश। 32 पवित्रशास्त्रे मरां ज़ैन तै पढ़ने लग्गोरो थियो, त तैन इन थियूं, “तैनेई तै भैडारो ज़ेरो मारने जो नीयो, ज़ेन्वरे गबडू अपनि उन्ना बरथांने बालां केरे सामने चुप राते, तेन्वरे तैनी भी अपनू आशी न खोल्लू।” 33 तै घटया समझो जेव ते तैस कोई इन्साफ न मैल्लो, ते कोई भी तैसेरे वंशेरे बारे मां न ज़ोई सके, किजोकि धेरती पुड़ तैसेरे वंश भोने करां तैस मारतन। 34 खोजे फिलिप्पुसे पुच्छू, “अवं तीं कां मिनत केरतां, मीं सेइं ज़ो कि ए नबी कसेरे बारे मां ज़ोते, अपने या होरि केन्वरे बारे मां ज़ोते?” 35 तैखन फिलिप्पुसे ज़ोनू शुरू कियूं, तैनी पवित्रशास्त्रे करां शुरू केरतां यीशुएरो खुशखबरी शुनाई। खोजे तैना गल्लां शुनी ते विश्वास कियो। 36 बत्तां च्चलते-च्चलते तैना एककी तालाबे कां पुज़े, तैखन खोजे ज़ोवं, “इडी तालाब आए, हुनी मीं बपतिस्मो नेने करां कौन रोकी सकते?” 37 फिलिप्पुसे ज़ोवं, “अगर तू पूरे दिले सेइं विश्वास केरतस त बपतिस्मो नेही सकतस,” तैनी जुवाब दित्तो, “अवं विश्वास केरताई कि यीशु ही परमेशरेर मटूए।” 38 फिरी तैनी रथ रोकनेरे लेइ हुक्म दित्तो, ते खोजो ते फिलिप्पुस दुइये तालाबे मां जे, ते फिलिप्पुसे तैस बपतिस्मो दित्तो। 39 ज़ैखन तैना पैनी मरां बेइर निस्से त प्रभुएरी पवित्र आत्मा फिलिप्पुस तैटूं नेव, ते खोजे तै फिरी न लाव, परमेशरे तै बचाव ते तै बड़ी खुशी सेइं वापस अपने मुलखे जो जेव। 40 ते फिलिप्पुस अशदोदे मांमेइं निसतो च्चलतो सारे ड्लोंव्वन मां खुशखबरी शुनातो कैसरिया मां पुज़ो।

9 शाऊल प्रभुएरे चेलन धमकाने ते मारने मां मधन थियो, ते तै महायाजके कां जेव। 2 ते तैस करां दमिशक नगरे प्रार्थना घरां केरे लेइ चिट्ठी मेग्गी, कि चाए कोई मड़द भोए या कुआन्श जै यीशु पत्ती च्चलने बालो भोए, तैस ट्लेइतां यस्शलेम नगरे मां आने। 3 ज़ैखन तै च्चलतो-च्चलतो दमिशक नगरेरे नेडे पुज़ो, त अचानक अम्बरेरां लौ आई ते तैसेरे चेव्रे पासन चमकने लगी। 4 ते शाऊल ज़मीनी पुड़ खिरको, ते तैस प्रभुएरी आवाज आई, “हे शाऊल, हे शाऊल तू मीं किजो स्तातस?” 5 शाऊले एन पुच्छू, “हे प्रभु, तू कौन आस?” तैनी ज़ोवं, “अवं यीशु आई, जैस तू सतातस। 6 हुनी उठ ते नगरे मां

गा, तैड़ी तीं सेइं ज्ञोवं गालू, कि तीं कुन केरनूए।” 7 ज़ैना लोक तैस सेइं साथी थिये, तैना चुपचारे रेइजे, तैन आवाज़ त शुनोती थी, पन लेइहोतू किछ भी न थियूं। 8 तैखन शाऊल ज़मीनी पुड़ां खड़े उठो, त तैनी अपनि एछळी घैड़ी त तैस किछ भी न लगू लेइहोने, ते तै तैसेरे सैथेई हथेरा टलेइतां दमिश्क नगरे मां पुजाव। 9 ते तैनी टलाई दिहाड़न तगर न लेई बटु, ते न तैनी किछ खाव ते पिव। 10 दमिश्क नगरे मां यीशुएरो अक चेलो रातो थियो, प्रभु यीशुए तैस दर्शन देइतां ज्ञोवं, “हे हनन्याह!” तैनी ज्ञोवं, “हाँ प्रभु ज़ो।” 11 तैखन प्रभुए तैस जो ज्ञोवं, “उस गेली मां गा ज़ैस जो ‘सिद्धी’ ज़ोतन, ते यहूदारे घरे गा तैड़ी शाऊल नव्वेरो अक मैनूए, ज़ै तरसुस नगरेरो रानेबालोए, तू तैसेरे बारे मां पुछां, किजोकि हेरा तै प्रार्थना केरने लोरोए। 12 तैनी हनन्याह नव्वेरो अक मैन्हु अन्तर इटो लाव, ते एप्पु पुड़ हथ रखतो लाहोरोए कि तै अपनि एछळेई सेइं फिरी लाए।” 13 हनन्याहे जुवाब दित्तो, “हे प्रभु, मीं एस मैनेरे बारे मां लोकन करां बेड़ि गल्लां केरती शुनोरिन, ते एन भी कि एनी तेरे लोकन सेइं यरुशलेम नगरे मां कुन-कुन बुरू कियोरुए। 14 एस प्रधान याजकन करां अधिकार मैलोरोए, कि इड़ी भी ज़ैना लोक तीं पुड़ विश्वास केरतन, तैन गिरफ्तार केरतां यरुशलेम नगरे जो ने।” 15 पन प्रभुए तैस सेइं ज्ञोवं, “तू गा किजोकि मीं तै मैन्हु चुनोरोए, कि तै गैर कौमन, राजन, ते इस्माएलेरे लोकन मेरे बारे मां प्रचार केरे, ते तै मीं चुनोरोए कि तै मेरी सेवा केरे। 16 ते अवं तैस ज़ोइलो, लोकन मेरे बारे मां ज़ोनेरे वजाई तैस केत्रे-केत्रे दुःख झ़ैलनो पेनोए।” 17 तैखन हनन्याह तैस घरे मां जेव, ज़ैड़ी शाऊल थियो, ते तैस पुड़ हथ रेखतां ज्ञोवं, “हे ढला शाऊल, प्रभु, मतलब यीशु, ज़ैस बत्तां तू ओरोस ते तीं लेइहोरो थियो, तैनी अवं भेज़ोरोई, कि तू फिरी लास ते पवित्र आत्माई सेइं भेरोस।” 18 ते तैखन तैसेरे एछळेन मरां ज़ेरां शेकड़ां झ़ड़ां ते तै लहने लगो, ते खड़े उठां बपतिस्मो नीयो। 19 ते किछ रोट्टी खेइतां तैस हिम्मत आई, ते किछ दिहाड़े तै चेलन सेइं साथी दमिश्क नगरे मां राव। 20 तैसेरां बाद अकदम तै दिमिश्क नगरेरे प्रार्थना घरन मां प्रचार केरने लगो, कि यीशु परमेश्वरे रुदूए। 21 सब शुने बाले हैरान भोइतां जोने लगे, “कुन ई तैए मैन्हु नई, जै यरुशलेम नगरे मां ज़ैना यीशु मसीह पुड़ विश्वास केरते थिये मारतो थियो? ते इड़ी भी एल्हेरेलेड ओरो थियो, कि एन लोकन टलेइतां प्रधान याजकां केरे

हवाले केरे?” 22 पन एसेरां बाद शाऊल होरो भी शेक्ति सेइं प्रचार केरतो राव, ते एस गल्लरू सबूत देइदेइ कि यीशु ही मसीहे, दमिश्क नगरेरे रानेबालां यहूदी केरु आशी बंद केरतो राव। 23 ज़ैखन शाऊले दशिमके मां बड़ो वक्त बीतो त यहूदई मिलतां तैस मारनेरो मुशोरो कियो। 24 पन शाऊले एस गल्लरो पतो लगो, तैना त तैस मारनेरे लेइ रात दिहैड़ी दारन पुड़ रहते थिये। 25 पन राती तैसेरे चेलई तै टोकरे मां रख्खो, ते नगरेरे दुवारी पुडां रस्से सेइं टोकरी मां ओसैलतां बुन पुजाव। 26 ज़ैखन शाऊल यरूशलेम नगरे मां पुजो त तैनी चेलन सेइं मिलनेरो इंतज़ाम कियो, पन सब तैस करां डरते थी कि तै भी चेलोए। 27 पन बरनबासे शाऊल एप्पु सेइं साथी प्रेरितन कां आनो ते तैन ज़ोवं, कि केन्चरे दमिश्क नगरेरे बत्तां च्छलते-च्छलते एस प्रभु यीशु लेइहोरोए, ते प्रभुए एस सेइं गल्लां कियोरिन, ते एनी केत्रे दिलेरी सेइं दमिश्क नगरे मां यीशुएरे नव्वंरो प्रचार कियोरोए। 28 प्रेरितई बरनबासेरी गल्लां केरो विश्वास कियो, ते शाऊल तैन सेइं साथी राव, ते यरूशलेम नगरे मां गातो राव। 29 ते यूनानी भाषा केरनेबाले यहूदन सेइं भी गलबात केरतो थियो, दिलेर भोइतां प्रभुएरो प्रचार केरतो थियो, पन तैना तैस मारनेरी कोशिश मां रहते थी। 30 एलहेरेलेइ विश्वासी ढलाई तै कैसरिया नगरे मांजो नीयो, ते तैटां तरसुसे नगरे जो भेजो। 31 त सारे यहूदिया इलाके मां ते गलील इलाके ते सामरिया इलाकेरी कलीसियान मां चैन भोव, ते तरक्की भोती जेई, ते तै प्रभुए डरे मां ते पवित्र आत्मारे शैन्ति मां च्छलती ते बड़े लोकेई यीशु मसीह पुड़ विश्वास कियो। 32 फिरी एरु भोवं कि पतरस सारे इलाके मां हंठतो फिरो, ते तैन पवित्र लोकन साथी भी पुजो, जैना लुद्धा नगरे मां रहते थिये। 33 त तैस तैड़ी ऐनियास नव्वंरो अक मैन्हु मैल्लो, तैस अधरंग थियो, ते अठे सालां केरो देंतो खट्टी पुड़ राहेरो थियो। 34 पतरसे तैस जो ज़ोवं, “हे ऐनियास! यीशु मसीह तीं बङ्गाते, उठ अपनू बङ्गान खड़ केर,” तैखने तै बेज़्झोइतां खड़ो भोव। 35 तैखन लुद्धा नगरेरे ते शारोनेरे राने बालेई एन हेरतां प्रभु यीशु पुड़ विश्वास कियो। 36 याफा नगरे मां अक कुआन्श थी, ज़ेसारू नवं तबीता थियूं (यूनानी भाषाई तैसेरु दोरकास थियूं, ज़ेसेरो मतलब हिरनी) तै विश्वासी थी, ते रोडां-रोडां कम्मां केरती ते गरीबां केरि मद्दत केरती थी। 37 तैने दिहाड़न मां ज़ेइस पतरस लुद्धा मां थियो, तै बिमार भोइतां मेरि जेई, ते तैसारी लाश नेइतां

दोपरे कमरे मां रखोरि थी। 38 लुदा याफारे नेडे थियूं, ते जैखन चेलोई शुनू कि पतरस लुदा मां आए, त दूई मैन्हु भेजतां मिनत की, “कि असन कां एजने मां ठढ न ला।” 39 तैखन पतरस तैन सेइं साथी चलो जेव, ते जैखन तैड़ी पुज़ो त तै बा तैस कमरे मां नीयो, सैरी विधवां कुआन्शां लेरां देती थी, ते तैस ढलखमेइं खेड़ी थी, ते तैना लिगड़ां ज़ैना दोरकास सियोरां थियां हिराने लेगि। 40 पतरसे तैना सब बेझोवं कढे, ते एप्पू ज़ैधू केरे भारे प्रार्थना केरने लगो, फिरी तैनी लाशारे पासे तुत्तर फरेइतां ज़ोवं, “हे तबीता, उठ।” तैखन तैसां अपनि एछ़छी खोल्ली, ते पतरसे तेकतां खड़ी भोइ। 41 पतरसे हथेरां ट्लेइतां खड़ी की, ते विश्वासी ते विधवां कुआन्शां कुजेइतां ज़ींती ते होशी मां तैन केरे सुपुर्द की। 42 एस गल्लरी खबर सारे याफा नगरे मां फैली जेई, ते बडे लोकेई प्रभु यीशु पुड विश्वास कियो। 43 पतरस किछ चिरे तगर याफा नगरे मां शमैन नव्वेरो एककी मैनेरे कां राव, ज़ै चमड़ेरु कम केरतो थियो।

10 कैसरिया नगरे मां अक मैन्हु थियो, तैसेरु नवं कुरनेलियुस थियूं ते तै अक इतालियानी फौवजरो सूबेदार थियो। 2 कुरनेलियुस त तैसेरे घरे सारे लोक परमेशरे करां डरने बाले थिये, कुरनेलियुस यहूदी लोकन बडु दान देतो थियो, ते परमेशरे कां लगातार प्रार्थना केरतो रातो थियो। 3 एककी दिहाड़े कुरनेलियुस दीसां अक रोडे चारे दर्शन हेरु, परमेशरेरो अक स्वर्गदूत तैस कां अव, ते ज़ोने लगो, “हे कुरनेलियुस।” 4 तैनी तै रोडे-चारे लाव ते डेरतां ज़ोवं, “हे मालिक कुने?” तैनी तैस सेइं ज़ोवं, “तेरी प्रार्थना ते तेरु दान यादगैरेयर लेइ परमेशरे कां पुज़ेरु आए। 5 हुनी तू मैन्हु याफा नगरे मां भेजतां तैस मैन्हु ज़ेसेरु नवं शमैन पतरसे अपने घरे कुजा। 6 तै शमैनेरे घरे बिशोरो थियो, ज़ै चमड़ेरु कम केरनेबालो थियो, ज़ेसेरु घर समुद्रेरे बन्ने।” 7 जैखन स्वर्गदूत एना गल्लां केरतां चलो जेव, त कुरनेलियुस अपने दूई सेवकन ते अपने सिपेहिन मरां अक भक्त सिपाही कुजाव। 8 ते तैन सारो बिस्तार ज़ोइतां याफा नगरे जो भेजे, कि पतरसे कुजान। 9 होरसां जैखन तैना भेजोरे लोक चलते-चलते नगर नेडे पुज़े। तै दुपारहरां केरो वक्त थियो, तैस वक्ते पतरस बा छती पुड़ प्रार्थना केरने लावरो थियो। 10 तैस ढलुख लगी ते तै किछ खानू चातो थियो, पन जैखन मैन्हु रोट्टी बनाने लगे त तैस बेहोशी ज़ेरि भोइजेइ। 11 ते तैनी हेरु कि अम्बर खुल्लूए, ते अक चादर लाई ज़ै व्रेत्रे कूना टेंगोरी

अम्बरेरे पासेरां उन्ठी ज़मीनरे पासे ओरी। 12 ज़ैस मां ज़मीनरे सारे जानवर ते पेटेरे भारे च्छलने बाले जन्तू ते अम्बरेरां चुड़ोलू तैस चादरी मां थियां। 13 तैखन अक आवाज़ आई, “हे पतरस, उठ ते मार ते खा।” 14 पन पतरसे जुवाब दित्तो, “नई प्रभु, कधे नई, किजोकि मीं अज़ तगर कोई अपवित्र ते भिट्ठी चीज़ नई खोरी।” 15 फिरी दुइयोवं बार तैनी आवाज़ शुनी, “जैन किछ परमेशरे शुद्ध कियोरुए, तू तैस जो भिटू न जो।” 16 ट्लेइ बार ए आवाज़ आई, ते फिरी तै च्छादर अम्बरेरे पासे च्छली जेर्ह। 17 पतरस दिले मां सोचने लग्गोरो थियो, कि एस दशनिरो कुन मतलब भोइ सकते, जैन अज़ मीं लाव, एत्रे मां कुरनेलियुसेरे भेजोरे मैन्हु शमौनेरु घर तोपते-तोपते दारे मां पुज़े। 18 तैनेर्ह हक देइतां पुच्छू, “शमौन ज़ैस जो पतरस ज़ोतन इडी तुश्शे कां आए?” 19 हेजू पतरस दशनिरे बारे मां सोचने लग्गोरो थियो, त पवित्र आत्मा तैस जो ज़ोवं, “शमौन, हेर ट्लाई मैन्हु तीं पुच्छने लगोरेन। 20 खड़ो उठ ते बुन गा, तैन सेइं साथी गाने करां न डेरां, किजोकि तैना मीं भेजोरेन।” 21 पतरस बुन अव, ते तैन मैन्‌सेइं ज़ोने लगो, “ज़ैस मैन्हु तुस तोपने लगोरेथ तै अवं आई, ते तुस किजो ओरेथ?” 22 तैनेर्ह जुवाब दित्तो, “असां कुरनेलियुस सूबेदारे जै धर्मी ते परमेशरे करां डरने बालोए, ते सारे यहूदी तैसेरी तारीफ केरतन, एकके पवित्र स्वर्गदूते तैस जो ज़ोरुए, तू शमौन पतरसे अपने घरे कुजेइतां तैसेरी गल्लां शुन।” 23 तैखन पतरसे तैना अन्तर कुजाए, ते तैन केरि खातरदारी की। होरसां पतरस तैन सेइं साथी चलो जेव, ते याफा नगरेरे काई ढलान मरां किछ तैस सेइं साथी चले जे। 24 एग्री दिहाडे तैना कैसरिया नगरे मां पुज़े, कुरनेलियुस अपने रिश्तेदारन ते अपने दोस्तन अकोटु केरतां तैन बलगने लाव। 25 पतरस जैखन कुरनेलियुसेरे घरे पुज़ो, त कुरनेलियुसे तैसेरी बड़ी आदर खातरी सेइं इज्जत की, ते क्रोड़ी पव्वन कां रेखतां तैस कां मथ्थो टेको। 26 पन पतरसे तै खड़ो कियो ते ज़ोवं, “खड़ो भो किजोकि अवं भी त अक मैन्हु आई।” 27 फिरी तै कुरनेलियुसे सेइं गल्लां केरतो अन्तर जेव, तैड़ी बड़े लोक अकोटु बिश्शोरे लेइतां, 28 तैस सेइं ज़ोवं, “तुसन पत्तोए इश्शे यहूदी केरे लेइ गैर कौमी सेइं मिलनू जुलनु कानूनेरे खलाफे, पन परमेशरे मीं सेइं ज़ोरुए कि अवं केन्ची मैन्हु जो अपवित्र या भिट्टो ज़ोई। 29 एल्हेरेलेइ तुसेर्ह अवं कुजाव त अवं चुपचारे चलो अव। हुनी अवं तुसन पुछताई कि

तुसेई अवं किजो कुजेवरोई?” 30 कुरनेलियुसे ज़ोवं, “अवं चेव्रे दिहाड़ना पेइले अपने घरे मां इस मौके कोई ट्लेइ बज़ेइं प्रार्थना लोरो थियो केरने, त अचानक अक मैन्हु चमकतां लिगड़ां लग्गोरो मेरे तुत्तरे अगर खड़ो भोव। 31 ते ज़ोने लगो, हे कुरनेलियुस, तेरी प्रार्थना परमेशरे शुनोरीए ते तेरू दान भी कबूल कियोरुए। 32 एल्हेरेलेइ कोन्ची याफा नगरे मां भेज़तां शमैन ज़ैस जो पतरस ज़ोतन, कुजा। तै शमैनेरे कांए जै चमड़ेरु कम केरनेबालो, ते समुद्रे बन्ने रहते। (ज़ैख्न तै एज्जेलो त तै परमेशरे बारे मां ज़ोलो) 33 तैख्न मीं मैन्हु भेज़े, ते तीं बड़ु रोड़ु कियूं कि तू अव। हुनी अस परमेशरे सामनेम, ताके जैन किछ परमेशरे ज़ोरू तैन शुनम।” 34 तैख्न पतरस ज़ोने लगो, हुनी मीं याकिन भोव, कि परमेशर केन्चेरो तरफदार नई। 35 बल्के हर कौमी मरां जै परमेशरे करां डरते ते रोड़ां कम्मा केरते परमेशर तैस कबूल केरते। 36 इस्साएली लोकां केरे लेइ परमेशरे भेज़ोरे सन्देशरे बारे मां तुसन पतो आए। परमेशरे यीशु मसीहेरे ज़ियिये सेइं जै सेब्भी केरो प्रभुए शैनतरी खुशखबरी शुनाई। 37 यूहन्नारे बपतिस्मेरो प्रचार केरने करां लेइतां गलील इलाके करां शुरु भोइतां सारे यहूदिया इलाके मां कुन-कुन भोव, तुस भी ज्ञानतथ। 38 केन्चरे प्रभु यीशु नासरी पवित्र आत्माई सेइं ते शक्ति सेइं अभिषेक कियूं, ते तै लोकां केरु भलू केरतो राव, तैनी सब ज़ैना शैतानेरे ज़ाले मां फासोरे थिये, तैना छुटाए, किजोकि परमेशर तैस सेइं साथी थियो। 39 तैनी ज़ैन किछ यहूदी केरे मुलखे मां ते यस्शलेम नगरे मां कमाव, असां तैसेरे गवाह आम, ते तैए यहूदी लीडरेई यस्शलेमे मां क्रूसे पुड़ टेंगेइतां माराव। 40 परमेशरे तैए ट्लेइयोवं दिहाड़े फिरी ज़ींतो केरतां हिराव। 41 तै सैरी लोकेई नई बल्के गवाहैई लाव, ज़ैना परमेशरे पेइले चुनतां रखोरे थिये, यानी असां ज़ैनेई तैसेरे मुड़दन मरां ज़ींते भोनेरां बाद तैस सेइं साथी रोट्टी खोरीए। 42 ते तैनी असन हुक्म दित्तो कि लोकन मां प्रचार केरम ते गवाही देम, कि ई तैए जै परमेशरे ज़ींते ते फटरां केरो हाकिम भोए। 43 सारे नबी तैसेरे बारे मां गवाही देतन, कि जै कोई तैस पुड़ विश्वास केरेलो त तैस तैसेरे नंवे सेइं पापां केरि माफ़ि मैले। 44 पतरस हेजू एन ज़ोंतो थियो, त पवित्र आत्मा तैन पुड़ उतरी, ज़ैना बच्चन शुने लोरे थिये। 45 ते ज़ेत्रे यहूदी विश्वासी पतरसे सेइं साथी ओरे थी, तैना सब हैरान भोए कि गैर कौमन पुड़ भी पवित्र आत्मा उतरोरीए। 46

किजोकि तैनेई तैना किसमे-किसमेरी भाषां केरते, ते परमेशरेरी तारीफ़ केरते शुनोरी थिये, तैखन पतरसे ज़ोवं। 47 “ज़ेन्नरे परमेशरे असन पवित्र आत्मा दित्तोरीए तेन्नरे तैन भी दित्तोरीए, कुन कोई एन मैनन् पैनेरो बपतिस्मो नेने करां रोकी सकते?” 48 एल्हेरेलेइ पतरसे हुक्म दित्तो, कि एन लोकन यीशु मसीहेरे नंवे सेइं बपतिस्मो देथ, तैखन तैनेई पतरसे कां मिनत की, कि किछ दिहाडे असन कां हेजू बिश।

11 यहूदिया मां रानेबाले प्रेरितेई ते विश्वासी ढलाएई ए खबर शुनी, कि गैर यहूदेई भी परमेशरेरु बच्चन कबूल कियूं। 2 ते ज़ैखन पतरस वापस यरुशलेम नगरे मां अव, त यहूदी विश्वासी लोक तैस सेइं बेस केरने लगे। 3 “तू गैर कौमां केरे घरे जेव, ते तैन सेइं साथी बिश्तां रोट्टी भी खाइ।” 4 पतरसे तैन सेइं सारो बिस्तार पत्रां देंतो ते आखरी तगर एन्नरे शुनाव, कि कुरनियुसेरे घरे कुन भोवं। 5 “अवं याफा नगर मां प्रार्थना केरने मां मघन थियो, त मीं किछ बेहोशी ज़ेरि भोइजेइ, ते मीं अक दर्शन लाव, ते अक चादर ज़ेरि चेव्रे कूना टेंगोइतां अम्बरेरे पासेरां उन्दी एइतां मीं तगर पुज़ी। 6 अवं तैस मां तकने लगो त कुन हेरेताई कि, तैस मां ज़मीनरे सारे चेव्रे ज़ंधेइ चळने बाले जानवर ते पेटेरे भारे चळने बाले जीप ते अम्बरे मां उडरने बालां चुड़ोलू थियां। 7 तैखन मींजेई अक आवाज़ आई, ज़ै ज़ोने लगी, हे पतरस खड़ो उठ ते इन मार ते खा।’ 8 मीं जुवाब दित्तो, प्रभु नई, किजोकि मीं अज़ तगर कोई भी अपवित्र या भिट्टी चीज़ नई खोरी। 9 एसेरे जुवाबे मां अम्बरेरां होरि आवाज़ आई, ‘ज़ैन किछ परमेशरे पवित्र बनेवरीए, तू तैस जो भिटू न ज़ो।’ 10 ए आवाज़ ट्लेइ बार आई, ते फिरी तै चादर अम्बरेरे पासे खिचोइतां चळी जेई। 11 ठीक तैस्से मौके ट्लाई मैन्हु ज़ैना कैसरिया नगरे मरां कुरनुलियुसे मीं कां भेज़ोरे थिये, तैस घरे कां सामने खड़े भोए, ज़ैडी अवं थियो। 12 तैखन पवित्र आत्मा मीं सेइं ज़ोवं, बेधड़क चारे एन सेइं साथी गा, एना 6 ढला भी मीं सेइं साथी आए, ते असां तैस मैनेरे घरे जे। 13 तैनी असन सेइं ज़ोवं, कि केन्नरे सेइं तैनी अक स्वर्गदूत घरे लाव ते ज़ोने लगो, याफा मां केन्ची मैन्हु भेजतां शमैन ज़ैस जो पतरस ज़ोतन, तैस अपने घरे कुजा। 14 तै एइतां तीं अक एरो बिस्तार देलो, ज़ेसेरे ज़ोने सेइं तेरी खानदानेरे सारे मैनन् परमेशर मुक्ति देलो। 15 ज़ैखन मीं तैडी गेइतां तैन सेइं गल्लां शुरू की, त पवित्र आत्मा तैन

पुङ् उतरी, ज़ेन्वरे पेइले असन पुङ् उतरोरी थी। १६ तैखन मीं प्रभुएरु तैन वचन याद आऊं, ज़ैन तैने ज़ोवरो थियूं कि यूहन्ना त पैनी सेइं बपतिस्मो दित्तो, पन तुसन पवित्र आत्माई सेइं बपतिस्मो मैलेलो। १७ बस्सा अगर परमेशरे तैन भी तैए तोफो दित्तो, ज़ै असन प्रभु यीशु मसीह पुङ् विश्वास केरने सेइं मैल्लो, त अवं कौन भोताई कि परमेशरे रोकी?” १८ ज़ैखन यहूटी विश्वासी लोकेई एन शुनू त चुप रेइजे, “ते परमेशरेरी तारीफ़ केरने लगे, तां त सच्चे कि परमेशरे गैर कौमन भी पापन करां मन फिरेइतां यीशु पुङ् विश्वास केरतां हमेशारी ज़िन्दगी हासिल केरनेरो तोफो दित्तोरोए।” १९ त तैना लोक ज़ैना तैस दुखेरे मारे ज़ै स्तिफनुसेरे मौतरे वक्ते शुरु भोरो थियो, तितर-बितर भोइजेइ, ते च्छलते-च्छलते फीनीके इलाके ते साइप्रस ते अन्ताकिया नगरे तगर पुजे, पन तैना यहूटी केरे अलावा होरन परमेशरेरु वचन न थिये शुनाते। २० पन तैन मरां किछ साइप्रसेरे रानेबाले ते किछ कुरेनेरे रानेबाले थिये, ज़ैना अन्ताकिया नगरे मां इटां यूनानी लोकन भी प्रभु यीशु मसीहेरी खुशखबरी शुनाने लगे। २१ ते प्रभुएरी शक्ति तैन पुङ् थी, ते बडे गैर कौमरे लोकेई तैन केरे सनदेशे पुङ् विश्वास कियो, ते प्रभु यीशु पुङ् भरोसो केरनो शुरु कियो। २२ तैखन तैन केरि खबर यरुशलेम नगरेरे कलीसियारे लोकन तगर पुज्जी, ते तैनेई बरनबास अन्ताकिया नगरे जो भेज्जो। २३ तै तैडी पुज्जतां, ते परमेशरेरो अनुग्रह हेरतां बडे खुशी भोव, ते तैन ए गल ज़ोई कि अपने तने मने सेइं प्रभु सेइं लिपटोरे रान। २४ बरनबास अक रोडे मैन्हु थियो, तै पवित्र आत्माई ते विश्वासे सेइं भरपूर थियो, ते बडे लोक प्रभु मां आए। २५ तैखन बरनबास अन्ताकिया नगर शैरतां शाऊले तोपने तरसुस नगरे जो च्छलो जेव। २६ तैनी शाऊल तोप्तां अन्ताकिया नगरे मां आनो, तैडी तैना एककी साले तगर दुझे ज़न्हे कलीसियाई मां लोकन प्रभु यीशुएरी शिक्षा देते राए, ते लोक चेलन जो सेब्बन करां पेइले अन्ताकिया नगरे मां मसीही ज़ोने लगे। २७ तैने दिहाड़न मां किछ विश्वासी ज़ैना नबी थिये, यरुशलेम नगरेरां अन्ताकिया नगरे मां आए। २८ तैन मरां अक नबी ज़ेसेरु नवं अगबुस थियूं खडे भोइतां ते पवित्र आत्मारे ज़ोने सेइं एन ज़ोने लगो, कि सैरी दुनियाई मां अक बडे काल पेनोए। ए काल क्लौदियुस हाकिमेरे वक्ते पेव। २९ तैल्हेरेलेइ चेलेई फैसलो कियो कि, असन मरां हर कोई अपनि-अपनि हैसयतरे मुताबिक किछ दान

देथ, ताके यहूदिया इलाके मां रानेबाले मसीही ढ्लां केरि मदत भोइसखे। 30
बस्सा तैनेई किछ रकम अकोट्ठी की ते बरनबास ते शाऊलेरे हथ्ये यरुशलेम
नगरेरे बुजुर्गन कांजो भेजी।

12 तैस्से वक्ते मां हेरोदेस राजो कलीसियारे किछ मैनन् दुःख देनेरे लेइ तैना
ट्लाने शुरू कीए। 2 ते यूहन्ना प्रेरितेरो ढ्ला याकूब तलवारी सेइं मराव। 3
ज़ैखन तैनी हेरु कि यहूदन ए गल बड़ी खुशी अई, त तैन दिहाड़न मां पतरस
भी ट्लाव। तैना दिहैड़ी अखमीरी रोटूरी तिहारेरी थी। 4 ते तैस ट्लानेरां बाद
हेरोदेस तै कैदखाने मां छङ्गो, ते तैसेरी निगरेंनारे लेइ चेव्रे टोली बनाई, हर
टोली चेव्र-चेव्र सिपाही केरि थी, हेरोदेसेरो खियाल थियो कि फ़सह तिहारेरे
बाद तै कैदे मरां केढतां लोकां केरे सामने पैश केरे। 5 कैदखाने मां पतरस
बड़े दिहाड़न तगर पेरहे मां थियो, पन सारी कलीसिया तैसेरेलेइ परमेशरे कां
प्रार्थना केरने लगोरी थी। 6 हेरोदेसे, पतरस लोकां केरे सामने आने करां
पेइले अक रात ज़ैखन पतरस दूई पहरेदारां केरे मझाटे बंधोरो झुलोरो थियो,
ते सिपाही कैदखानेरे डेवढी पुड़ पैरहो देंते थिये। 7 त अचानक परमेशरेरो
स्वर्गदूत कैदखाने मां अव, ते सारो कैदखानो ट्लकड़े भोइ जेव, स्वर्गदूते
पतरसे खित्ती देइतां बींझाव ते ज़ोवं, “उठ, ते लूश केर।” ते शंगलां पतरसेरे
हथ्यन सैहिंयेरां खुल्ली जेई। 8 स्वर्गदूते पतरसे सेइं ज़ोवं, “अपनू मज़ बन्ध
ते बूट ला।” पतरसे तैने कियूं ते फिरी ज़ोवं, “अपनो चोगो ला ते मीं पत्पती
एई।” 9 पतरस स्वर्गदूत पत्पती कैदखाने मरां बेइर अव, पन तैस ए पतो
न थियो, कि स्वर्गदूते जैन केरने लगोरोए एन सच्चे या कोई दर्शन हेरने
लगोरोइं। 10 तै दुझोवं पेरहेदारे करां बेइर निस्तां अव, ते लोहेरे फाटके
कां पुज़ो, ज़ै नगरेरे पासे खुलतो थियो, तै फाटक तैन केरे लेइ अपने आप
खुल्लो, ते तैना तैछुं निस्तां दूर पुजे, स्वर्गदूत पतरसे तैड़ी पुज़ेइतां गैइब भोइ
जेव। 11 तैखन पतरस होशी मां अव, ते ज़ोने लगो, “हुनी मीं पूरू याकीन
भोवं, कि परमेशरे अपनो स्वर्गदूत भेजतां अवं हेरोदेसेरे हथ्ये मरां छुटाव, ते
यहूदी लीडरेई जैन सोचेऱ थियूं, तैन बन्ने न दितू।” 12 ज़ैखन तै एस बारे मां
सोचने लगोरो थियो, त मरियमेरे घरे पुज़ो, ज़ै यूहन्ना ज़ैस जो मरकुस ज़ोते
थिये तैसेरी अम्मा थी। तैड़ी बड़े विश्वासी लोक अकोट्ठे भोइतां प्रार्थना केरने
लगोरो थियो। 13 पतरसे बेइरु दार गुड़कावं त अक नौकरानी ज़ेसारू नवं स्दे

थियूं, तै दार खोलने आई। 14 तैसां पतरसेरी गल शुनी तै तैसां गल पिशानी तै बगैर दार खोलनेरां दौवड़ती खुशी भोइतां आई, ते ज़ोने लगी, पतरस बेइर दार मां ओरोए। 15 तैना मैन्हु ज़ोने लगे, “तू कुन पागल भोरिस।” पन ज़ैखन तैसां रोड़ेचारे ज़ोवं, कि तै पतरसे, तै तैना ज़ोने लगे “पतरस त नई पन पतरसेरो स्वर्गदूत भोलो।” 16 ते पतरस बेइर दार गुडकातो राव, ते ज़ैखन तैनेई दार खोल्लू त पतरस लेइतां हैरान रेइजे। 17 पतरसे तैन जो हथ्ये सेइं इशारो कियो, कि चुप राथ, ते फिरी अन्तर एइतां सारो बिस्तार शुनाव, कि अवं केन्चरे परमेशरे कैदखाने मरां बेइर कढो, ते फिरी ज़ोवं, “याकूबे त तैसेरे होरि मसीह ढुलान भी पतो देइयथ।” ते एप्पू केन्ची होरि जगाई जो चलो जेव। 18 ज़ैखन झोझा भोइ त सिपेहिन एप्पू मांमेइं खलबली मेचि जेर्डि, कि पतरस कोरां जेव। 19 ज़ैखन हेरोदेसे तैस तोप्पनेरो हुक्म दित्तो त तैनी सिपेही केरु बियांन घिन्नेरां पत्ती तैन जो कतलेरो हुक्म दित्तो, ते पतरस यहूदिया इलाके मरां कैसरिया नगरे जो चलो जेव, ते किछ चिरे तगर तैड़ी राने लाव। 20 हेरोदेस सूर ते सैदारे नगरेरे लोकन पुड़ बडो नाराज़ थियो, तैखन तैना लोक मिलतां तैस कां आए, ते बलास्तुसे जै राजेरो खास मैन्हु थियो, मनेइतां मेल केरनो चाव, किजोकि राजो एरे मुलखेरां तैन केरे मुलखे खर्चो मैलतो थियो। 21 तैखन तैनी अक दिहाड़ी ठुवहलाई ते हेरोदेस राजो अपना राजेरां लिगड़ां लेइतां आदालतरे तखते पुड़ बिश्तां लोकन सेइं ज़ोने लगो। 22 तैनेई ज़ैखन शुनू त ज़ोने लगे, “ए मैन्हु केरि आवाज़ नई बल्के परमेशरेरी आवाज़े।” 23 किजोकि हेरोदेसे परमेशरेरी तारीफ़ न की, तैल्हेरेलेइ तैस परमेशरे स्वर्गदूतेरी एरी मार पेर्ई कि तैसेरी सैरी जानी कीड़े लग्गे, ते तै मेरि जेव। 24 पन परमेशरेरू बच्चन अग्रोवं बद्धतू जेवं, ते विश्वासी लोकां केरि गिनती बद्धती जेर्दि। 25 ज़ैखन बरनबास ते शाऊल अपनि सेवा जै तैन केरे सुपुर्द कियोरी थी, तैनेई पूरी की त अन्ताकिया नगरेरां यस्शलेम नगरे जो वापस आए, ते यूहन्ना जैस जो मरकुस ज़ोते थिये, एप्पू सेइं साथी आनो।

13 अन्ताकिया नगरेरे कलीसियाई मां काई नबी ते गुरु थिये, मतलब बरनबास, शमौन ज़ैस जो नीगर भी ज़ोतन, लूकियुस कुरेनी, ते मनाहेम ज़ै मुलखेरे चेवरोवं हिसे पुड़ हाकिम थियो जै हेरोदेसेरो दुद्ध ढला थियो, ते शाऊल थियो। 2 ज़ैखन तैना बरत रेखतां प्रभुएरी आराधना केरने लगोरो

थिये, त पवित्र आत्मा तैन सेइं ज़ोवं, “जैस सेवारे लेइ बरनबास ते शाऊल मीं
 कुजोरेन, तैसेरेलेइ तैन अलग केरा।” ३ तैखन तैनेई बरत रेखतां प्रार्थना की,
 ते तैन पुड़ हथ रेखतां तैना परमेशरेरे कम्मेरे लेइ भेजो। ४ शाऊल ते बरनबास
 पवित्र आत्मारी तरफां भेजोरे सिलूकिया नगरे जो जे, ते तैटुं तैना ज़िहाज़े
 पुड़ चेढ़तां साइप्रस टैपू जो चले। ५ ज़ैखन तैना सलमीसे मां पुज़े, त तैड़ी
 तैना यहूदी केरे प्रार्थना घरे मां परमेशरेरू वचन शुनाव, ते यूहन्ना मरकुस भी
 तैन केरि मद्दत केरनेरे लेइ तैड़ी थियो। ६ ज़ैखन तैनेई सारे ज़ज़ीरे ते नगरन-
 नगरन मां हंठु फिरु, त तैना पाफुसे नगरे मां पुज़े, त तैन केरि मुलाकात
 एककी डैइंनोड़े यहूदी ते झूठे नेबी सेइं भोइ, ज़ेसेरू नवं बार-यीशु थियूं। ७ तै
 तैटुरे हाकिम सिरगियुस, पौलुस सेइं साथी थियो, ज़ै अक अक्लमन्द मैन्हु
 थियो, ते तैनी बरनबास ते शाऊल कुजाए ते परमेशरेरू वचन शुन्नू चाऊ। ८
 पन एलीमास डैइंनोड़ो (किजोकि तैसेरे नंवेरो मतलब डैइंनोड़ो ए) तैन केरि
 खलाफत केरने लगो, तैने हाकिम यीशु पुड़ विश्वास केरने करां रोकनो चाव।
 ९ तैखन शाऊल ज़ेसेरू नवं पौलुस भी आए, पवित्र आत्माई सेइं भेरोइतां
 ध्याने सेइं एलीमास डैइंनोड़ेरे पासे तकने लगो, ते तैस सेइं ज़ोवं, १० “हे
 शैतानेरे कोआ, तू हर किसमेरी पाखंडे सेइं ते चलैकी सेइं भेरतस, ते नेकारो
 दुश्मन, कुन तू परमेशरेरी बत बगाड़ने करां बाज़ न एजस? ११ हुनी प्रभु तेरे
 खलाफे, तू कानो भोइगानोस, ते किछ चिरे तगर तू दिहाड़ो न लाएलो।”
 तैखने तैस आंधरू लेइयोने लगू, ते तै इरां-उरां तोपने लगो, ताके कोई तैस
 हथेरां ट्लेइतां चलाए। १२ तैखन हाकिमे एन हेरतां, ते प्रभुएरी शिक्षा शुन्तां
 हैरान राव, ते प्रभु यीशु पुड़ विश्वास कमाव। १३ पौलुस ते तैसेरो साथी
 पाफुस नगरेरां ज़िहाज़े मां पंकूलिया इलाकेरे पिरगा नगरे मां आए, ते यूहन्ना
 तैन शैरतां वापस यरूशलेम नगरे जो चलो जेव। १४ ते तैना पिरगा नगरेरां
 निस्तां पिसिदिया इलाकेरे अन्ताकिया नगरे मां पुज़े ज़ै गलतिया इलाके मां
 आए। ते आरामेरे दिहाड़े प्रार्थना घरे मां गेइतां बिश्शी जे। १५ मूसेरो कानून ते
 नेबी केरि किताबी मां पढ़नेरे बाद तैटुरे प्रार्थना घरेरे प्रधाने तैन ज़ोवं, “अगर
 मैन्हु केरि भलैड्यरे लेइ तुस भी किछ ज़ोनू चातथ त ज़ोथ।” १६ तैखन
 पौलुस खड़ो उठो ते हथ्थे सेइं इशारो केरो कि चुप रान ते ज़ोने लगो, “हे
 इसाएली लोकव ते परमेशरेरो डर मन्नेबाले गैर कौमां केरे लोकव मेरी गल

शुना। 17 इन इस्साएली लोकां केरे परमेशरे इश्शे दादे-पड़दादे चुने, ज़ैखन
 तैना मिस मुलखे मां परदेशी भोइतां रहते थिये, तैन परमेशरे तरक्की दित्ती, ते
 बड़े शेक्ति सेइं तैटूं कठे। 18 ते तै सुनसान ठैरी मां लगभग 40 सालन तगर
 तैन केरि झ़ैल्लातो राव, तैना बार-बार हुक्म ट्लोड़ते राए। 19 कनान मुलखे
 मां परमेशरे सत कौमां नाश केरतां तैन केरि ज़मीन अपने इस्साएली लोकन
 विरासती मां दित्ती। 20 एना गल्लां पूरी भोने लगभग 450 साल लगे, तैसेरां
 बाद परमेशरे तैन केरे लेइ शमूएल नेबेरे वक्ते तगर हाकिम रखे। 21 ज़ैखन
 हेजू शमूएल तैन केरो हाकिम थियो त तैन लोकई राज़ो बनानेरे लेइ दरखुवास
 की, ते परमेशरे बिन्यामीनेरे गोत्रे मरां कीशेरू मटू शाऊल राज़ो बनावं ते तैनी
 40 साल यरूशलेम नगरे मां राज़ कियूं। 22 फिरी तैनी शाऊल हटेइतां दाऊद
 तैसेरी ठैरी तैन केरो राज़ो बनाव, ज़ेसेरे बारे मां तैनी गवाही दित्ती, मीं यिशैरू
 मटू दाऊद मेरे मनेरे मुताबिक मैलोरूए, तैस पुड़ अवं खुश आई, ते तैए मेरी
 मर्जीं पूरी केरेलो। 23 परमेशरे अपने वादेरे मुताबिक तैसेरे वंशेरे मरां पापन
 करां मुक्ति देनेरे लेइ इस्साएले कां यीशु मसीह भेज़ो। 24 ज़ेसेरे एजने करां
 पेइले यूहन्ना इस्साएलेरे सारे लोकन प्रचार कियो, कि पापन करां मनफिराथ
 ते बपतिस्मो नेथ।” 25 ज़ैखन यूहन्नारू कम पूरू भोनेबालू थियूं, त तैनी
 ज़ोवं, “तुस मीं कुन समझातथ? ‘अवं मसीह नई!’ बल्के हेरा, तै मेरे बाद
 एजनेबालोए, किजोकि अवं त एस काबल नई कि तैसेरे बूटां केरे तसमे भी
 खोल्ली सेखी।” 26 “हे मेरे ढलाव, तुस ज़ैना अब्राहमेरे औलादारे लोकव, ते
 परमेशरेरो डर मन्नेबाले गैर कौमां केरे लोकव, इस मुक्तरो बिस्तार तुसन कां
 भेज़ेरोए। 27 यरूशलेम नगरेरे रानेबाले लोकेई ते तैन केरे प्रधानेई यीशु मसीह
 न पिशानो, ते न नेबी केरि गल्लां सेमझी, ज़ैना हर आरामेरे दिहाड़े पेढ़तां
 शुनेई गैती थी। 28 हालांकी तैन मौतरी सजारे काबल सबूत न मैल्लू, पन
 फिरी भी तैनेई पिलातुस गवनरि कां दरखुवास की, कि ए मारो गाए। 29 ते
 तैनेई सब किछ ज़ैन तैसेरे बारे मां पवित्रशास्त्रे मां लिखोरू थियूं, पूरू कियूं, त
 तै कूसे पुड़ कील देइतां मारो, ते ओसैलतां एककी कब्री मां छङ्गो। 30 पन
 परमेशरे तै मुङ्दन मरां भी जींतो कियो। 31 ते ज़ैना लोक गलील इलाके मरां
 तैस सेइं साथी यरूशलेम नगरे मां ओरे थिये, तैन चेलन काई दिहाड़न तगर
 यीशु लेड्योतो राव, ते हुनी तैना लोक जैनेई तै लाहोरोए गवाही देतन। 32

असां तुसन खुशखबरी शुनातम, कि जै वादो परमेशरे इश्वरो दादे-पड़दादन सेइं कियोरो थियो। 33 कि परमेशरे यीशु मसीह मुडदन मरां ज़ींतो केरतां तै वादो पूरु कियो, ते भजना केरि किताबी मां परमेशर मसीहेरे बारे मां ज़ोते, तू मेरु मट्टूस ते अवं तेरो बाजी भोव। 34 एन सङ्गे, कि परमेशरे तै मुडदन मरां भी ज़ींतो कियो, ताके तै न शडे, परमेशरे बचने मां एन्ने बियांन कियोरुए, कि अवं तीं पवित्र ते सङ्गी बरकत देलो, जैन केरो वादो परमेशरे दाऊदे सेइं कियोरो थियो। 35 ते होरि भजने मां दाऊद ज़ोते, तू अपने पवित्र मैन्हु शडने न देलो। 36 किजोकि दाऊद त अपने वक्ते मां परमेशररी मज्जी पूरी केरनेरां पत्ती मेरि जेव, ते अपने दादन-पड़दादन सेइं साथी दफन भोव, ते तैसेरी जान शैडी जेई। 37 पन जै (यीशु मसीह) परमेशरे मुडदन मरां ज़ींतो कियो, त तैसेरे शडनेरी नौबत न आई। 38 “एल्हेरेलेइ, हे ढलाव, बुझा कि यीशुएरे ज़िरिये सेइं तुसन पापां केरि मैफारी खबर शुनाई गाचे। 39 तुस मूसा नेबेरे कानुने मुताबिक धर्मी न थी भोने, पन जै कोई यीशु पुढ़ विश्वास केरे तै धर्मी भोए। 40 “एल्हेरेलेइ खबरदार राथ, कोस्कोई एरु न भोए कि नेबी केरि ए गल तुसन पुढ़ सङ्घे बीते, 41 तुस जैना होरि केरि तुहीन केरतथ, हेरा, ते हैरान भोथ, ते बरबाद भोथ, किजोकि अवं तुश्शे ज़ींते ज़ागते एरु कम केरनेबालोई, कि अगर कोई तुसन सेइं तैसेरे बारे मां गलबात भी केरे, त तुस कधे विश्वास न केरेलो।” 42 जैखन पौलुस ते बरनबास प्रार्थना घरे मरां च़ले, त लोक तैन कां मिनत केरतां ज़ोने लगे, कि होरि आरामेरी दिहाड़ी भी एन्ने गल्लां केरे बारे मां ज़ोवं गाए। 43 जैखन लोक आराधनारे बाद बेझर निस्से, त बड़े लोक पौलुस ते बरनबासे पत्ती च़ले, ते तैन मां किछ यहूदी थिये, ते किछ नंवे यहूदी पंथ धारण कियोरे थिये, ते तैनेई तैन सेइं गलबात केरतां तैन समझाव, कि परमेशरे अनुग्रहे मां बनोरे राथ। 44 होरि आरामेरे दिहाड़े लगभग सारू नगर परमेशरेरु वचन शुन्नेरे लेइ अकोटू भोवं। 45 जैखन यहूदी लीडरेई एत्रे हछे लोक लाए त तैन जलन भोइ, ते पौलुसेरे खलाफ गल्लां लगे केरने। 46 तैखन पौलुस ते बरनबासे दिलेर भोइतां तैन ज़ोवं, “ज़रुरी एन थियूं, कि असां पेइले तुसन परमेशरेरु बच्चन शुनाम, पन तुस त इन्कार केरने लोरेथ, ते अपनो आप हमेशारी ज़िन्दगरे काबल न समझाथ, त हेरा हुनी असां गैर कौमां केरे पासे गातम। (aiōnios g166) 47 किजोकि प्रभुए असन ई

हुक्म दित्तोरोए, मीं तू मीं तू गैर कौमां केरे लेइ लौ बनोरस, ताके तुशी ज़िरिये
सारे ज़मीनी पुड़ मुक्ति आनी गाए, ते तू ज़मीनरे हर पासे मुक्तरु दार भोस।”

48 इन शुन्तां गैर कौमां केरे लोक बड़े खुशी भोए, ते परमेशरेरी तारीफ़ केरने
लगे, ते ज़ैना परमेशरे हमेशारी ज़िन्दगरे लेइ ठहरावरे थिये, तैनेई विश्वास
कियो। (aiōnios g166) 49 ते प्रभुएरु बच्चन सारे मुलखे मां फैली जेवं। 50

पन यहूदी लीडरई बड़े भक्त ते इज्जतदार कुआन्शां ते नगरेरे काई खास मैन्हु
भड़काए, तैनेई पौलुस ते बरनबासे सितेइतां तैना तैस इलाके मरां भी केढी
छ़डे। 51 तैखन पौलुस ते बरनबासे तैन केरे सामने अपने पावां केरि धूड़
ठुड़कतां तैना इकुनियुम नगरे जो चले जे। 52 ते चेले इकुनियुम नगरे मां
खुशी ते पवित्र आत्माई सेइं भरपूर भोते राए।

14 इकुनियुम नगरे मां पौलुस ते बरनबास दुइये जने प्रार्थना घरे मां जे, ते
एरु भाषण केरने लगे ते बड़े यहूदी लोकेई ते यूनानी लोकेई विश्वास कियो।
2 पन विश्वास न केरनेबाले यहूदई, गैर यहूदी लोक भड़काए ते तैनेई विश्वासी
मैन्हु विश्वासे करां दूर किये, ते तैन केरे खलाफ़ क्रोध पैदा कियो। 3 ते
पौलुस ते बरनबास काई दिहाड़े तैड़ी राए, ते प्रभुएरी भरोसे पुड़ दिलेरी सेइं
गल्लां केरते थिये, ते प्रभु तैन केरे ज़िरिये चमत्कार ते निशान करेइतां अपने
अनुग्रहेरे वचने सच्चो साबत केरतो राव। 4 पन नगरेरे लोकन एप्प मांमेइं
फूट भोइजेइ, किछ लोक यहूदी केरे पासे भोए, ते किछ प्रेरितां केरे पासे
भोए। 5 यहूदी ते गैर यहूदी अपने प्रधान्न सेइं मिलतां तैन बेइज्ञत केरने ते तै
घोड़ेई बाने लगे। 6 त तैन एस गल्लरो पतो लगो, तैना तैटुं नेश्शी जे, ते
लुकाउनिया इलाकेरे नगरन लुस्त्रा ते दिरबे मां ते तैसेरे आसे-पासेरे इलाके
मां चले जे। 7 ते तैड़ी तैना खुशखबरी शुनाने लगे। 8 लुस्त्रा नगरे मां अक
मैन्हु विश्वोरो थियो, ज़ै पांवां केरो कमज़ोर थियो, तै ज़मनिरो टोन्टो थियो, ते
तै कधी न थियो चलोरो। 9 तै पौलुसेरी गल्लां ध्याने सेइं शुन्ने लगोरो थियो,
पौलुसे तैसेरे पासे ध्याने सेइं तक्कू त ज़ानू, कि एसमां एत्रो विश्वासे कि ए
बेझ्झोइ सकते। 10 ते पौलुसे तैस मैन्हु ज़ोरे सेइं ज़ोवं, “अपने पावन पुड़
खड़े भो।” ते तै तैखने खड़े भोव, ते चलने लगो। 11 ज़ैखन लोकेई पौलुसरु
एन कम हेरु त लुकाउनिया भाषाई मां ज़ोरे सेइं ज़ोने लगे, “कि देबतो असन
कां मैनेरो शकली मां ओरोए।” 12 ते तैन लोकेई बरनबासेरु नवं ज्यूस रख्खू,

(जैन यूनानी देबतेरु नवं थियूं), ते पौलुसेरु हिर्मेस नवं रख्खूं, (जै होरि देबतां केरो बिस्तार देने बालन मरां प्रधान थियो) किजोकि तै गल्लां केरने मां जादे माहिर थियो। 13 ते ज्यूस देबतेरु मन्दर नगरेरे सामने थियूं, तैसेरो पुजारी दांत ते फूँडू केरे हार एन्तां नगरेरे फाटके पुडु पुज़ो, किजोकि तैना लोक चाते थिये कि असां प्रेरितां केरे लेइ बलिदान केरन। 14 जैखन बरनबास ते पौलुस प्रेरितेई एन शुनूं ते तैना दुखी भोए, ते तैनेई अपना लिग़ा़ां छिन्दां ते मैनन् मां जे ते ज़ोरे-ज़ोरे ज़ोने लगे। 15 “लोकव तुस एन कुन केरने लगोरेथ? असां भी तुश्शे ज़ेरे दुःख सुख झैल्लने बाले मैन्हु आम, ते तुसन खुशखबरी शुनातम, ताके तुस एना फुज्जूल चीज़ां शैरतां ज़ीते परमेशरेरे पासे एज्जथ, जैनी धरती त कने अम्बर ते समुन्द्रे ते जैन किछ भी एसमां आए तैनी बनोरुए। 16 तैनी बीतोरे वक्ते मां सैरी कौमन अपनि-अपनि बत्तां च्चलने दित्तू। 17 फिरी भी तैनी अपनो आप बेगवाह न बनाव, पन अपनि भलाई हेरानेरे लेइ तैनी अम्बरेरां झ़ड़ी दित्ती, ते फसलां केरे लेइ मौसम बनाए, ताके तुसन हछु अन भोए ते तुश्शे दिल खुशी सेइं भरे।” 18 एना गल्लां ज़ोइतां तैनेई लोक बेड़ि मुशकली सेइं रोके, कि एना इश्शे लेइ बलिदान न देन। 19 तैखन किछ यहूदी अन्ताकिया नगरे ते इकुनियुम नगरे मरां आए, ते तैनेई लोक अपने पासे केरतां पौलुसे पुडु पथराव केरने लगे, ते तै मुओरो बुझतां नगर करां बेझरोवं घसीटां नीयो। 20 जैखन चेले तैड़ी पुज़े ते तैनेई पौलुस घरे मां आनो ते तै खड़ो उठो ते वापस नगर मां अव, ते होरसां बरनबासे सेइं साथी दिरबे नगरे जो च्चलो जेव। 21 पौलुस ते बरनबासे तैस नगर मां खुशखबरी शुनाई ते बड़े चेले बनाए, ते तैसेरां बाद तैना लुस्त्रा ते इकुनियुम नगरे ते अन्ताकिया नगरे मां वापस आए। 22 तैना हर एककी नगरेरे चेलां केरे मन मज़बूत केरते ते ई शिक्षा देते थिये कि विश्वासे मां बनोरे राथ, ते इन ज़ोते थी, “ते असेई बड़ो दुःख झैल्लतां परमेशरेरे राज़जे मां दाखल भोनूए।” 23 ते तैनेई हर कलीसियाई मां तैन केरे बुजुर्ग ठहराए, ते बरतां रेखतां प्रार्थना की, ते तैना प्रभुएरे सुपुर्द किये, जैस पुडु तैनेई विश्वास कियोरो थियो। 24 फिरी तैना पिसिदिया इलाके मरां निस्तां पंफूलिया इलाके मां पुज़े। 25 ते पिरगा नगरे मां वचन शुनेइतां त अत्तलिया नगरे मां आए। 26 तैट्टूं ज़िहाजे मां चेढ़तां वापस अन्ताकिया नगरे मां आए, ते तैड़ी तैनेई तैस सेवरे लेइ जै तैनेई पूरी

कियोरी थी, परमेश्वरे अनुग्रहे सुपुर्द कियोरी थी। 27 अन्ताकिया नगरे मां पुज्जतां तैनेई कलीसियारे लोक अकोटु किये, कि परमेश्वरे असन सेइं साथी भोइतां केरहां-केरहां बडां कम्मां कियां। ते गैर कौमां केरे लेइ बत खोल्ली, कि तैना भी यीशु पुड़ विश्वास केरन। 28 ते तैना चेलन सेइं साथी बड़े दिहाड़न तगर राए।

15 फिरी किछ लोक यहूदिया इलाके मरां आए, ते विश्वासी ढ्लान ए शिक्षा देने लगे, “अगर मूसेरे रसमरे मुताबिक तुश्शो खतनो नई भोरो त तुसन मुक्ति न मैल्ली बटे।” 2 एस गल्ली पुड़ पौलुस ते बरनबासेरो तैन लोकन सेइं बड़ो मतभेद ते बड़ी बेंस भोइ, ते कलीसियारे लोकेई पौलुस ते बरनबास ते किछ होरे मैन्हु चुने कि तैना यरुशलेम नगरे मां गेइतां तैड़ी एस मसले पुड़ प्रेरितन ते बुजुर्गन सेइं गलबात केरतां हल कढन। 3 तैखन कलीसियारे लोकेई तैना खर्चों देइतां भेजे, ते ज़ैखन तैना फीनीके ते सामरियारे इलाकन मांमेइं चलोरे थिये, तैनेई ज़ोवं, कि केन्चरे गैर कौमां केरे लोक खुशखबरी शुन्तां मसीह पुड़ विश्वास कियो, ते कलीसियाई मां शामल भोए, एन शुन्तां सारे मसीह ढला बड़े खुश किये। 4 ज़ैखन तैना यरुशलेम नगरे मां पुज़े, त तैठेरी कलीसियारे लोक ते प्रेरित ते बुजुर्ग तैन सेइं बेड़ि खुशी सेइं मिले, ते तैखन पौलुस ते बरनबासे सब किछ बिस्तार दित्तो, कि परमेश्वरे तैन केरे ज़िरिये सेइं केत्रा-केत्रा कम्मां कियां। 5 पन फरीसी पंथेरे किछ लोकेई ज़ैनेई विश्वास कियोरो थियो, तैन मरां किछ ज़ोने लगे, “गैर कौमन मरां विश्वास केरनेबालां केरो खतनो कियोरो लोड़े, ते एन मूसा नेबेरे कानूने पुड़ अमल केरनेरो हुक्म दित्तोरो लोड़ते।” 6 तैखन प्रेरित ते बुजुर्ग ए गलबात केरनेरे लेइ अकोटु भोए। 7 बड़ी बेंस भोनेरे बाद पतरसे तैन खड़े भोइतां ज़ोवं, “हे मेरे ढलाव, तुस ज्ञानतथ कि बड़े झिरे पेइले परमेश्वरे अवं तुसन लोकन मरां चुनो, ताके गैर कौमन मेरे ज़िरिये खुशखबरी शुनाई गाए ते तैना विश्वास केरन। 8 परमेश्वर ज़ै दिलेरो हाल ज्ञानते, तैनी तैन भी इश्शी ज़ेरि पवित्र आत्मा देइतां इन हिराव, कि परमेश्वरे तैना अपने लोकां केरे ज़ेरे कबूल किये। 9 ते विश्वास केरनेरे ज़िरिये सेइं तैन केरे मन पवित्र केरतां असन मां ते तैन मां कोई फर्क न रख्खो। 10 त हुनी तुस परमेश्वरी अज़मैइश किजो केरतथ? कि गैर कौमन मरां ओरे चेलन (यानी विश्वासी लोकन) पुड़ एत्रो बोझ किजो

रखतथ, जै न असेई छुइयोए ते न इश्शे दादे-पड़दादे छुइयोए। 11 एरु केरनू
 ठीक नई, किजोकि इश्शू याकीन त इने कि प्रभु यीशु मसीहेरे अनुग्रह सेइं
 तैन केरे पापां केरि मुक्ति भोली, तेन्हरे इश्शी मुक्ति भोली, न कि मूरेरे कानूने
 सेइं।” 12 तैखन सारे लोक चुपचाप बरनबास ते पौलुसेरी गल्लां शुन्ने लगे,
 कि परमेशरे केन्हरे गैर कौमन मां तैन केरे जिरिये केरहे-केरहे निशान ते
 चमत्कार किये। 13 जैखन तैना चुप भोए त याकूब ज़ोने लगो, “मेरे ढलाव
 मेरी गल शुना।” 14 शमैन पतरसे रोडेच्चारे ज़ोवं, कि परमेशरे पेइले केन्हरे
 गैर कौमन पुड़ सिद्धी नज़र की, ताके तैन मरां मैन्हु चुनतां अपने लोक बनाए।
 15 नेबी केरु बच्चन भी एसेरु ज़ेरुए जेन्हरे लिखोरुए कि। 16 एसेरां बाद अवं
 फिरी एइतां दाऊदेल राज़ बनेइलो, जैन तैसेरे दुश्मनेई नाश कियोरु थियूं। 17
 ताके बाकी सारे लोक ते गैर कौमन समेत जैना मीं कुजोरेन मेरे लोक भोन,
 ते मीं तोप्पन। 18 ए तैए प्रभु ज़ोते जै दुनियारे शुरुआती करां इन गल्लां केरि
 खबर देतो अव। (aiōn g165) 19 “एल्हेरेलेइ मेरो खियाल ईए, गैर कौमन मरां
 जैना लोक परमेशरे कां एइतन, तैन अस यहूदी केरो कानून मन्हेरे लेइ मजबूर
 न केरम। 20 बल्के तैन चिट्ठी लिखतां एन ज़ोम कि मूरतन कां चैढ़ोरी चीज़ां
 करां दूर रान, ते बदमैशी ते गलचैटी देइतां मारोरे जानवरां केरु मास न खान
 ते खून न खान। 21 किजोकि बड़े पेइले नगर-नगरे मां मूसेरे कानूनेरो प्रचार
 केरनेबाले भोते आए, ते तैना हर आरामेरे दिहाड़े प्रार्थना घरे मां पेढ़ी गाती
 थी।” 22 तैखन प्रेरित ते बुजुर्ग ते सारी यरुशलेमेरे सारे कलीसिया मिलतां
 एन रोडू समझू, कि असन मरां किछ मैन्हु चुने गान, मतलब यहूदा, जैस जो
 बरसब्बास ज़ोतन ते सीलास जैना ढलान मां खास आन, ते तैन पौलुस ते
 बरनबासे सेइं साथी अन्ताकिया नगरेरे कलीसियाई मां भेज़म। 23 ते तैनेई
 तैन केरे हथ्ये इन लिखतां भेजू, “अन्ताकिया नगरे ते सीरिया ते किलिकिया
 इलाकां केरे रानेबाले विश्वासी ढलान जैना गैर कौमन मरां आन, प्रेरितां ते
 बुजुर्ग ढलां केरु नमस्कार! 24 असेई शुनेरुए, कि किछ मैन्हु बगैर अजाज़तां
 तुश्शे इड़ी आए, ते तैनेई अपनि गल्लेई सेइं तुश्शो दिल परेशान कियो। 25
 एल्हेरेलेइ असेई एन ठीक समझू, कि इष्टुं दूझ मैन्हु अपने ट्लारे बरनबास ते
 पौलुस सेइं साथी तुसन कां भेज़म। 26 एना एरे मैन्हु आन कि जैन इश्शे प्रभु
 यीशु मसीहेरे लेइ अपनि जानरी भी परवाह नई। 27 एल्हेरेलेइ असेई यहूदा ते

सीलास भेज़ोरेन, ते तैना एप्पू भी एना गल्लां शुनालो। 28 पवित्र आत्मा, ते असेई एन ठीक समझू कि इना ज़रुरी गल्लां केरे अलावा तुसन पुड होरो बोझ न देम। 29 बस्सा तुस मूरतन कां चाढ़ेरे बलिदाने ते खून करां ते गल दुबेइतां मारोरे जानवरे करां ते बदमाशी केरने करां दूर राथ एन तुश्शे लेइ रोडू भोलू। अग्रोवं जो शुभकामना” 30 बस्सा तैना मैन्हु च्लते-च्लते अन्ताकिया नगरे मां पुजे, तैड़ी तैनेई कलीसियारे लोक अकोटु केरतां ए चिट्ठी तैन केरे हवाले की। 31 तैना चिट्ठी मां लिखोरी गल्लां पेढ़तां बडे खुशी भोए। 32 यहूदा ते सीलास एप्पू भी नबी थिये, तैनेई तैटुरे विश्वासी ढ्लान शिक्षा दित्ती ते तैना विश्वासे मां पक्के बनाए। 33 किछ दिहाड़ा बाद तैटुरे विश्वासी ढ्लाएई आनन्दे सेइं ते प्रार्थना केरतां वापस भेजे, ताके अपने भेज़ने बालन कां वापस गान। 34 सीलासे अन्ताकिया नगरे मां रानेरो फैसलो कियो ते यहूदा अकैल्लो वापस यरूशलेमे जो अव। 35 ते पौलुस ते बरनबास अन्ताकिया नगरे मां रुकी जे, तैड़ी तैना काई होरि लोकन सेइं मिलतां लोकन प्रभु यीशुएरे वचनेरी शिक्षा देते राए ते खुशखबरी शुनाते राए। 36 किछ चिरेरां बाद पौलुसे बरनबास सेइं ज़ोवं, “च्ल असां तैन सारे नगरन मां गाम, ज़ैडी असेई खुशखबरी शुनावरी थी, ते तैन विश्वासी ढ्लान सेइं मुलाकात केरम, ते हेरम कि तैन केरो कुन हाले।” 37 तैखन बरनबासे यूहन्ना ज़ैस जो मरकुस ज़ोतन, साथी नेनो चाव। 38 पन पौलुसे ठीक न समझू कि यूहन्ना तैन सेइं साथी गाए, किजोकि तै पंफूलिया इलाके मां कम शैरतां अलग भोरो थियो। 39 पौलुस त बरनबासे एप्पू मांमेइं बड़ी अनबन भोइ, ते तैना अलग भोए, बरनबास ते मरकुस जिहाजे मां साइप्रस जो चलो जे। 40 पन पौलुसे सीलास एप्पू साथी नीयो, ते विश्वासी ढ्लाएई तैन केरे लेइ प्रार्थना की, ते तैना परमेश्वरे अनुग्रहेरे सुपुर्द किये ते तैना तैटुं चले जे। 41 पौलुस सीरिया ते किलिकिया इलाकन मांमेइं निस्सो च्लतो ते कलीसियां केरे विश्वासी लोकन मज़बूत केरतो जेव।

16 तैना फिरी दिरबे नगरे ते लुस्त्रा नगरे मां आए, तैड़ी अक चेलो तीमुथियुस नव्वेंरो रातो थियो, तैसेरी अम्मा यहूदी थी, ते तै मसीह पुड विश्वास केरती थी, पन तैसेरो बाजी यूनान मुलखेरो रानेबालो थियो। 2 तीमुथियुस लुस्त्रा नगरे मां ते इकुनियुम नगरेरे विश्वासी ढ्लान मां बड़ो रोडो मैन्हु थियो। 3 पौलुसेरी

इच्छा ई थी, कि तैतैस साथी ने, तैन यहूदी केरि वजाई ज़ैना तैड़ी रहते तैसेरो
 खतनो कियो, किजोकि तैना सब ज़ानते थी कि तैसेरो बाजी यूनान मुलखेरो
 रानेबालो थियो। 4 पौलुस ते तैसेरे साथी नगर-नगरे मांमेझं चलते जे, तैटुरे
 विश्वासी लोकन तैना हुक्मां केरे बारे मां ज़ोंते जे, ज़ैना यरुशलेम नगरे मां
 प्रेरितेई ते बुजुर्गेई मिलतां ठहरावरे थिये, ताके लोक तैन पुड़ अमल केरन। 5
 बस्सा कलीसियां विश्वासे मां पेक्की भोती जेर्ई, ते तैन केरि कलीसियां केरि
 तैथात बद्धती जेर्ई। 6 पौलुस ते तैसेरे साथी फ्रूगिया ते गलातिया इलाकन
 मांमेझं निस्तां जे, किजोकि पवित्र आत्मा तैना आसिया इलाके मां बच्चन
 शुनाने करां रोकोरे थिये। 7 ते तैना मूसिया इलाकेरे नेडे पुज्जतां, बितूनिया
 इलाके मां गानू चाते थिये, पन यीशुएरे आत्मा गाने न दित्ते। 8 एल्हेरेलेझ
 तैना मूसिया इलाकेरे नेडेरां त्रोआस नगरे मांजो चळते जे। 9 राती पौलुसे
 अक मैन्हु दर्शने मां लाव, “तै मकिदुनी इलाकेरो थियो, तै खड़ो भोइतां
 पौलुसे कां मिनत केरने लोरो थियो, कि पार समुन्दरे मकिदुनिया इलाके मां
 एइते इश्शी मद्दत केरा।” 10 तैसेरे इस दर्शन हेरनेरां पत्ती लूशी अस पार
 मकिदुनिया इलाके मां गानेरे लेझ तियार भोइ जे, किजोकि असेई बुझू कि
 परमेश्वरी असां तैड़ी खुशखबरी शुनानेरे लेझ कुजवरेम। 11 असां त्रोआस
 नगरेरां जिहाजे मां जे, ते पैनेरू सफर केरतां सुमात्राके टैपू पुड़ आए, ते तैटुं
 होरसां नियापुलिस नगरे मां आए। 12 तैटुं असां फिलिप्पी नगरे मां पुजे, ज़ैन
 मकिदुनिया इलाके मां खास नगरे, ते रोमी केरि बेसती मांए, ते अस तैस
 नगरे मां किछ दिहाड़े राए। 13 आरामेरे दिहाड़े असां नगरेरे फाटके मरां
 निस्तां दरियाए पुड़ पुजे, किजोकि असन उमीद थी कि तैड़ी यहूदी केरि
 प्रार्थना केरनेरी कोई ठार भोनीए, असां तैड़ी गेझतां बिश्शी जे, तैड़ी किछ
 कुआन्शां थी, असां तैन सेझं गल्लां केरने लगे। 14 इश्शी गल्लां शुन्ने बैली
 कुआन्शन मां अक परमेश्वरी भक्त लुदिया नव्वेंरी थी, तै थुआतीरा नगरेरी
 राने बाली थी, ते बैंगनी लिंगड़ां बेचने बाली थी, ते प्रभुए तैसेरो मन खोल्लो,
 कि तै पौलुसेरे गल्लन पुड़ ध्यान केरे। 15 ज़ैखन तैसां ते तैसारे पूरे टब्बरे
 बपतिस्मो नीयो त तै बिनती केरतां जोने लगी, “अगर तुस लोक मीं प्रभुएरी
 ईमानदार दासी समझतथ, त मेरे घरे चळा ते बिश्शी राथ,” ते तैसारी मिनत
 शुन्तां असां खुशी भोए। 16 एक्की फेरे असां प्रार्थना केरनेरी ठारी जो चळोरे

थिये त असन अक दासी मैल्ली ज़ै भूतां केरे मदती सेइं एजनेबाले वक्तेरे बारे
 मां ज़ोती थी। ते अपने मालिकां केरे लेइ बड़े पेंइसे कमाती थी। 17 तै पौलुसे
 पत्ती ते असन पत्ती चली ते ज़ोने लगी, “ए मैन्हु परमप्रधान परमेशरेरो दासे,
 ते एना असन पापां केरि मुक्तरी बत हिरातन।” 18 तै काई दिहाड़े एने केरती
 राई, पन पौलुसे जिच भोव, ते मुडतां तैस भूते जो ज़ोवं, “अवं तीं यीशु
 मसीहेरे नंवे सेइं हुक्म देताई निस्सी गा, ते तै तैखने तैस मरां निस्सी जेर्ई।”
 19 जैखन तैसेरे मालिकेइं हेरु कि इश्शी कमैइयरी उमीद ट्लुटी जेर्ई, त तैनेई
 पौलुस ते सीलास ट्लेइतां चौके मां प्रधानां केरे हवाले किये। 20 तैनेई पौलुस
 ते सीलास हाकिमन कां पैश किये, ते ज़ोने लगे, “एना यहूदीन ते इश्शे नगर
 मां बड़ी खलबली मच्चाने लगोरेन। 21 ते एरे रुवाज़ेरी शिक्षा देतन, ज़ैन केरु
 केरनू ते मन्नू असन रोमे मां रानेबालान केरे इश्शे लेइ बिलकुल भी ठीक
 नई।” 22 एन शुन्तां सारे लोक पौलुस ते सीलासेरे खलाफ अकोट्टे भोए, ते
 हाकिमेई तैन केरां लिगड़ां खोलतां छिन्दां ते सोटेई बानेरो हुक्म दित्तो। 23
 सिपैहीयेइं तैन खूब बेंतेइं बैही ते कैदखाने मां छडे, ते कैदखानेरे प्रधाने हुक्म
 दित्तो, कि रोड़ेचारे पेरहो दित्तो गाए। 24 तै हुक्म शुन्तां तैना आँधरी कोठी मां
 छडे, ते तैन केरे पावन लेकड़ी बेड़ि लेइ। 25 एध्धी राती पौलुस ते सीलास
 प्रार्थना केरने मां मघन थिये, ते परमेशरेरां भजना लोरे थी ज़ोने, ते होरे कैदी
 भी शुन्ने लोरे थिये। 26 अचानक अक भुंज़ल अव, ते कैदखानेरे बुनीयाद
 हिल्ली ते सारां दारां खुल्ली जेआं, ते सैरी कैदी केरि बेड़ि भी खुल्ली जेर्ई। 27
 कैदखानेरो प्रधान बींझो ते खड़ो उठो, ते तकने लगो, ते हेरते कि कैदखानेरां
 दारां खुल्ली जोरेन, त तैनी समझू कि सारे कैदी नश्शोरेन, ते तैनी अपनि
 तलवार खिच्ची कि अवं अपनो आप मैरी छेढ़ी। 28 पन पौलुसे ज़ोरे सेइं
 ज़ोवं, “अपनो आप न मार किजोकि असां सब इड़ी आम।” 29 तैखन तै
 दीयो बैलतां अन्तर जेव, ते पौलुसे ते सीलासेरे पावन पुड़ पेव, 30 फिरी तैनी
 तैना बेइर आने ते ज़ोने लगो, “जनाब अवं कुन केरि, कि मेरी मुक्ति भोए?”
 31 तैनेई ज़ोवं, “प्रभु यीशु मसीह पुड़ विश्वास केर, त तीं ते तेरे टब्बरे पापन
 करां मुक्ति मैल्लनीए।” 32 ते तैनेई तैस त तैसेरे टब्बरे प्रभुएरु वचन शुनाव।
 33 तैखने तैने राती पौलुस ते सीलास नेइतां तैन केरे ज़खम धोए, ते तैनी
 तैसेरे सारे टब्बरे बपतिस्मो नीयो। 34 फिरी तैनी तैना अपने घेरे ने, ते तैन

खाने जो रोटी दित्ती, ते सारे टब्बरे परमेशरे पुड़ विश्वास केरतां बड़े खुश थिये।

35 होरसां झोझा हाकिमेई सिपाही भेजतां बिस्तार भेजो, कि तैन मैनन् हथरां छेड़ी देथ। 36 दरोगा पौलुसे जो ज़ोवं, “हाकिमे हुक्म दित्तोरोए कि पौलुस ते सीलास कैदखाने मरां हथरां छ़डा, एल्हेरेलेइ तुस खुशी सेइं चले गाथ।” 37 पन पौलुसे तैन सेइं ज़ोवं, “तैनेई अस ज़ैना रोम मुलखेरे राने बालेम, बगैर कसूरे सेब्भी केरे सामने मारे कुटे ते कैदखाने मां छ़डे, ते हुनी चुपचारे हथरां छ़डने चाते? पन एन न भोइसखे, तै एप्पू एज्जे ते असन बेझर कढे।” 38 सिपैहीयेइं गेइतां हाकिमन बिस्तार दित्तो, कि पौलुस ते सीलास रोम मुलखेरे राने बालेन, ते तैना डेरि जे। 39 तैनेई तैड़ी एइतां तैन करां माफ़ी मागी, ते फिरी तैना कैदखाने मरां बेझर आने ते मिनत की, कि नगर मरां चले गाथ। 40 बस्सा पौलुस ते सीलास कैदखाने मरां बेझर निस्से ते लुदियारे घरे जे, ते तैड़ी विश्वासी ढुलान सेइं मिले ते तैन शान्ति देइतां चले जे।

17 पौलुस ते सीलास तैसेरां बाद अमिफुलिस ते अपुल्लोनिया नगरन मांमेइं गेइतां थिस्सलुनीके नगरे मां आए, तैड़ी यहूदी केरु अक प्रार्थना घर थियूं। 2 पौलुस अपने रीतरे मुताबिक प्रार्थना घरे मां ट्लाई आरामेरे दिहाइन तगर पवित्रशास्त्रेरी किताबी मरां तैन सेइं बेंस केरतो राव। 3 पौलुस तैन केरो मतलब खोल्ली-खोल्ली समझातो थियो, “कि यीशु मसीहेरो दुःख झैल्लनो ते मुड़दन मरां ज़ीतू भोनू ज़रूरी थियूं, कि ज़ैस यीशुएरे बारे मां अवं प्रचार केरतम, तैए मसीह आए।” 4 तैन मरां किछ यहूदी ते गैर कौमां केरे लोक ज़ैनेई विश्वास कियोरो थियो, ते होरि भी बेड़ि भक्त कुआन्शां ज़ैनेई विश्वास कियोरो थियो पौलुसे ते सीलासे सेइं मिली जेर्ई। 5 पन यहूदेई जलनी सेइं काई नगरन मां बुरे लोक अकोट्टे केरतां हंगामो केरनो शुरू कियो। तैनेई यासोनेरे घरे पुड़ हमलो कियो ताके पौलुसे ते सीलासे लोकां केरे सामने आनन। 6 पन ज़ैखन तैना न मैल्ले त यासोन त काई होरे विश्वासी ढुला घसीटां नगरेरे हाकिमन कां आने, ते ज़ोरे-ज़ोरे सेइं ज़ोने लगे, “एन मैनेई हर ठैरी परेशानी फैलावरी, ते अज़ इड़ी भी पुज़ोरेन। 7 ते एना यासोने अपने घरे मां रखोरेन, ते एना लोक महाराज़ेरे हुक्मेरी खलाफत केरतन, ते ज़ोतन कि राज़ो त यीशु आए।” 8 ए गल शुन्तां नगरेरे हाकिम ते सारे लोक परेशान भोए। 9 ते तैनेई यासोन ते बाकी लोक ज़मानती पुड़ हथरां छ़डे। 10 ड्लोझां

विश्वासी ढलाएई पौलुस ते सीलास तैटुं बिरीया नगरे जो भेज़ो, ज़ैखन तैना
 तैड़ी पुज़े त तैना यहूदी केरे प्रार्थना घरे मां जे। 11 बिरीया नगरेरे लोक
 थिस्सलुनीके नगरेरे यहूदन करां भले थिये, तांए तैनेई खुशखबरी बेड़ि खुशी
 सेइं कबूल की, तैना रोज़ एना गल्लां केरे बारे मां गलबात केरते थिये, कि
 पौलुसेरी गल्लां सेच्ची आन कि नई। 12 एल्हेरेलेइ काई यहूदेई ते काई
 होरि यूनानी इज़ज़तदार कुआन्शोई भी यीशु पुड़ विश्वास कियो। 13 ज़ैखन
 थिस्सलुनीके नगरेरे यहूदन पतो लगो कि पौलुस बिरीया नगरे मां परमेश्वरे
 वचन शुनाते, ते तैना लोकन भटकाने ते हलचल मच्चाने लगो। 14 तैखन
 विश्वासी ढलाएई पौलुस समन्दरेरे बन्ने भेज़ो, पन सीलास त तीमुथियुस तैड़ी
 राए। 15 ते पौलुसेरी मद्दत केरनेबाले एथेंस नगरे तगर जे, ते सीलास ते
 तीमुथियुसेरे लेइ बिस्तार नेइतां चले जे, कि मीं कां जल्दी एज्जो। 16 ज़ैखन
 पौलुस एथेंस नगरे मां तैन बलगने लगोरो थियो, त एन तकते कि सारू नगर
 मूरती सेइं भेरतांए त तैसेरो दिल बड़ो उदास भोव। 17 एल्हेरेलेइ तै प्रार्थना
 घरे मां यहूदन ते तैन सेइं ज़ैना परमेश्वरो डर मन्नेबाले (भक्त) गैर कौमन मरां
 यहूदन मां ओरे थिये चैके मां गेइतां मिलतो थियो, ते तैन सेइं रोज़ बेस
 केरतो थियो। 18 किछ इपिकूरी ते किछ स्तोईकी उस्ताद तैस सेइं बेस केरने
 लगे, ते तैन मरां किछ ज़ोने लगे, “बकवादी कुन ज़ोनू चाते?” ते किछ ज़ोने
 लगे, “ए त होरि देबतां केरो पतो देनेबालो भोइ सकते, किजोकि पौलुस
 यीशुएरो ते कने ज़ींते भोनेरी खुशखबरी शुनातो थियो।” 19 तैखन तैनेई तै
 एप्प सेइं साथी अरियुपगुस नव्वेरे मन्दरे मां नेव, ते तैस पुच्छू, “कुन अस
 ज़ैनी सकतम कि ज़ैस नव्वे पंथेरी तू शिक्षा देतस, तै कुने? 20 असां तेरे
 ऐशेरां बेड़ि आजीब गल्लां शुने लोरेम, ते असां एन ज़ाननू चातम कि एन
 केरो कुन मतलबे?” 21 (द्रासले मां एथेंसेरे लोक कुन देशी कुन परदेशी
 अपनि फुरस्तरो सारो मौको होरि कम्मां केरे बजाहे सिर्फ नव्वीं-नव्वीं गल्लां
 ज़ोने ते शुन्ने मां गुजारते थिये।) 22 तैखन पौलुस अरियुपगुसे नव्वेरे मन्दरे
 मझाटे खड़ो भोइतां ज़ोने लगो, “हे एथेंसेरे लोकव, अवं हेरताई कि तुस हर
 गल्ली मां देबतन बड़ो उच्चो द्रजो देतथ। 23 ज़ैखन अवं तुश्शे नगर मां हंठतो
 फिरतो थियो, त मेरी नज़र तुश्शे पूजनेरी चीज़न पुड़ ते बलिदानेरी ठारी
 पुड़ पेई, जैस पुड़ लिखोरु थियूं, अनजान परमेश्वरे लेड, बस्सा तुस जैस

ज्ञानथ नन्ना ते तैसेरी पूजा केरतथ, अवं तुसन तैसेरे बारे मां ज्ञोताई। 24
जैनी परमेशरे दुनिया ते सैरी चीजां बनेवरिन, तै धेरतरो ते अम्बररो मालिके,
तै हृथां केरे बनेवरे मन्दरन मां न राए। 25 तैस मैनेरे मद्दतरी ज़रूरत नई,
किजोकि तै केन्ची चीज़री ज़रूरत नई, तै सैरन ज़िन्दगी ते सांस ते सब किछ
देते। 26 तैनी एककी मैन्हु सेइं हर कौमारे लोक पैदा किये, ताके सारे ज़मीनी
पुड़ आबाद भोन, तैनी तैन केरि ज़िन्दगरे दिहाड़े बनाए ते रानेरे लेइ ठार
बनाई। 27 परमेशरे एन कियूं ताके लोक तैस तोप्पन ते शैद तोपते-तोपते
तैन मैल्ली गाए, हालांकी तै असन केन्ची करां दूर नई। 28 किजोकि तै असन
सेइं साथी आए ते ज़ींते रातम ते च़लतम फिरतम, ज़ेन्चरे कि तुशो लिखने
बालैई भी ज़ोरूए, ‘असां त तैसेरे बच्चेम।’ 29 ते परमेशरे बच्चे भोइतां
सोचेरु लोड़े, कि ईश्वरत्व सोने, चैंदरी, या घोड़ेरी मूरतरीए ते ज़ै केन्ची मैनेरे
हाथां केरि कारीगिरीए ते खियाले सेइं आए। 30 एल्हेरलेइ परमेशरे लोकां
अज्ञानतारे वक्ते पुड़ ध्यान न दित्तू ते हुनी तै मैनन् सेळ्ही ठैरन हुक्म देते कि
मन फिरान। 31 किजोकि तैनी अक दिहाड़ी ठुवालेवरीए ज़ैखन तै सच्चे सेइं
दुनियारो इन्साफ एककी एरे मैनेरे ज़िरिये सेइं केरेलो, ज़ै तैनी रख्खोरोए, ते तै
तैनी मुड़दन मारं ज़ींतो केरतां ए गल सैरी मैनन् साबत कियोरीए।” 32 ज़ैखन
तैनेई मुड़दां केरि आदालतरे बारे मां शुनू त तैन मरां किछ एस गल्लरी मज़ाक
बनाने लगे, ते किछेई ज़ोवं, “अस एस बारे मां फिरी कोस्कोई शुन्मेले।”
33 एन हेरतां पौलुस तैदुं निस्तां च़लो जेव। 34 पन किछ लोक तैस सेइं
मिली जे, ते तैनेई प्रभु पुड़ विश्वास कियो, तैन मरां अक दियुनुसियुस ज़ै
अरियुपगुसेरो प्रधान थियो, ते अक कुआन्श थी, तैसारु नवं दमरिस थियूं ते
तैन केरे अलावा होरे भी बड़े मैन्हु थिये।

18 तैसेरां बाद पौलुस एथेंस नगरे मरां निस्तां कुरिन्थुस नगरे मां अव। 2
तैड़ी तैस अक यहूदी मैल्लो, तैसेरु नवं अकिवला थियूं, ते तै पुन्तुस इलाकेरो
रानेबालो थियो, ते तैसेरी कुआन्शरु नवं प्रिस्कल्ला थियूं, ते दुइये साथी
इतालिया इलाकेरां ओरां थियां, किजोकि क्लौदियुस हाकिमे हुक्म दित्तोरो
थियो, कि सारे यहूदी रोमे मरां च़ले गान ते पौलुस तैन कां जेव। 3 किजोकि
पौलुसेरो ते अकिवलारो तेम्बु बनानेरो बुपार थियो, तांए पौलुस तैस सेइं साथी
राव, तैना कम केरने लगे। 4 ते पौलुस हर आरामेरे दिहाड़े तैन केरे प्रार्थना घरे

मां गातो थियो, ते यहूदी लोकन ते यूनानी लोकन समझाने लगो कि, यीशु
 पुड़ विश्वास केरा। ५ ज़ैखन सीलास ते तीमुथियुस मकिदुनिया इलाके मां
 आए, त पौलुस वचन शुनाने मां मघन थियो, ते लगातार यहूदन सेइं एन
 ज़ोतो थियो कि यीशु ही मसीह आए। ६ पन ज़ैखन यहूदी खलाफत त कने
 तुहीन केरने लगे, त पौलुसे अपना लिंगड़ां ठुड़कां ते ज़ोने लगो, “तुश्शो खून
 तुश्शो दोग्गे पुड़ भोए! अवं बेइलज़ाम आई, अज़ज़ेरे बाद अवं गैर कौमन
 कां गेइलो।” ७ तैखन प्रार्थना घरे मरां निस्तां तीतुस यूस्तुस नंव्वेरे एक्की
 परमेशरेरे भक्त मैनेरे घरे जेव, ज़ै गैर कौमी मरां थियो, ज़ेसेरु घर प्रार्थना घरे
 सेइं साथी थियू। ८ एस प्रार्थना घरेरो प्रधान क्रिस्पुसे ते तैसेरे सारे टब्बरे
 प्रभु पुड़ विश्वास कियो, ते बड़े कुरिन्थिसेरे लोकेई शुन्तां विश्वास कियो ते
 बपतिस्मो नीयो। ९ एक्की राती प्रभुए पौलुसे सेइं दशनि मां गल की, ते ज़ोवं,
 “ठर नन्ना ते तू ज़ो ते चुप न रा, १० किजोकि अवं तीं सेइं साथी आई, ते
 कोई तीं पुड़ हमलो केरतां नुकसान न पुज़ेई सकेलो, किजोकि इस नगर
 मां बड़े लोकन ज़ैना मीं पुड़ भरोसो रख्खेले।” ११ पौलुस तैड़ी डैढ साल
 राव, ते तैन परमेशरेरी खुशखबरी शिखालतो राव। १२ ज़ैखन गल्लियो,
 अखाया इलाकेरो हाकिम थियो, त यहूदैई मिलतां पौलुसे पुड़ हमलो कमाव,
 ते पौलुस ट्लेइतां आदालतरे तखते कां नीयो, ते ज़ोने लगे। १३ “एन लोकन
 समझाते, कि परमेशरेरी आराधना एन्हरे केरा, ज़ै मूसेरे कानूनेरे बिलकुल
 बरखलाफे।” १४ पौलुस ज़ैखन किछ ज़ोने बालो थियो, त गल्लियोए यहूदन
 सेइं ज़ोवं, “हे यहूदी लोकव, अगर केन्वी जुर्मेंरी या कोई बड़ी बुरी गल भोथी
 त अवं तुश्शी शुनेथो। १५ पन तुश्शो इलज़ाम त सिर्फ खाली गल्लां केरो ते
 नंव्वां केरो ते तुश्शो कानूनेरे बारे मां आए, ते अवं न ज़ैनी, किजोकि अवं एन
 गल्लां केरो हाकिम बन्नो न चैई।” १६ ते गल्लियो हुक्म दित्तो कि एन तखते
 करां बेइरोवं कढे। १७ तैखन तैनेई सेब्बेई प्रार्थना घरेरो प्रधान सोस्थिनेस
 इन्साफेरे तखतेरे सामने कुटो, पन गल्लियोए एन गल्लां केरि किछ भी
 परवाह न कमाई। १८ पौलुस काई दिहाड़े कुरिन्थुस नगरे मां राव, ते फिरी तै
 विश्वासी ढ्लान करां च्छ्लो जेव ते किंछिया मां अपनि मिनत पूरी केरनेरे लेइ
 अपने दोगेरी टिंड बनाई। ते बादे मां समुन्दरी जिहाजे मां सीरिया इलाके जो
 च्छ्लो जेव, ते प्रिस्कल्ला ते अक्विला भी तैस सेइं साथी थियां। १९ ज़ैखन

तैना इफिसुस नगरे मां पुज़े त पौलुसे प्रिस्कल्ला ते अक्विला तैडी छँडां,
ते पौलुस एककी प्रार्थना घरे मां जेव ते यहूदन सेइं बेंस केरने लगो। 20
जैखन तैन लोकई तैस कां मिनत की, “कि तू हेजू किछ दिहाडे असन कां
बिश।” त पौलुसे तैन सेइं मन्नू 21 पन जैखन पौलुस तैटुं च्लो त तैनी
तैन सेइं वादो कियो, “अगर परमेशरेरी मर्जी भोइ त अवं फिरी तुसन कां
एज्जेलो।” ते फिरी पौलुस ज़िहाजे मां चेढतां इफिसुसे जो च्लो जेव। 22 ते
कैसरिया नगरे मां ज़िहाजे मरां ओस्सो त तैनी यरुशलेम नगरे मां गेझतां तैन
केरि कलीसियारे लोकन सेइं मिलने जेव, ते फिरी तै अन्ताकिया नगरे मां
अव। 23 अन्ताकिया नगरे मां किछ च्चिर बितनेरे बाद तै तैटुं च्लो जेव,
ते गलातिया ते फूगिया इलाकां केरे सब चेलन मज़बूत केरतो जेव। 24
अपुल्लोस नंव्वेरे अक यहूदी थियो, तैसेरु ज़र्म सिकन्दरिया नगरे मां भोरु
थियूं तै बडो ज्ञानी मैन्हु थियो, ते पवित्रशास्त्रेरे बारे मां बडो ज्ञानकार थियो,
तै इफिसुस मां अव। 25 तैनी प्रभुएरे बत्तरी शिक्षा शिखोरी थी, ते लगातार
यीशुएरे बारे मां ठीक-ठीक शुनातो ते शिखालातो थियो, पन तै सिर्फ यूहन्नारे
बपतिस्मे तगर ज्ञानतो थियो। 26 तै प्रार्थना घरे मां बेथडक च्चारे ज़ोने लगो,
पन प्रिस्कल्ला ते अक्विला तैसेरी गल्लां शुन्तां, तैनेई तै अपने घरे नीयो, ते
परमेशरेरी बत्तारे बारे तैस होरु भी रोडे च्चारे ज़ोवं। 27 जैखन तैनी थापू कि
पार ओस्तां अखाया इलाके जो गाए ते विश्वासी ढलाई तैस हिम्मत दित्ती,
ते तैटेरे चेलन जो चिट्ठी लिखी, कि एस सेइं रोडेच्चारे मिलाथ, ते तैनी तैडी
पुजतां तैन केरि बडी मद्दत की, जैनेई अनुग्रहेरे वजाई सेइं विश्वास कियोरो
थियो। 28 किजोकि तै बडे ज़ोरे शोरे सेइं यहूदन सेइं बेंस केरतां खुल्ले आम
पवित्रशास्त्रे सेइं साबत केरतो थियो, कि यीशु ही मसीहे।

19 जैखन अपुल्लोस कुरिस्थुस नगरे मां थियो, त पौलुस बेइएं सारे इलाकन
मेइं इफिसुस नगरे मां अव, तैसेरी तैडी होरे भी काई चेलन सेइं मुलाकत
भोइ। 2 तैनी तैन पुच्छू, “कुन विश्वास केरते बार तुसन पुड़ पवित्र आत्मा
उतरोरी थी?” तैनेई जुवाब दित्तो, “असेई त पवित्र आत्मारे बारे मां शुनेऱु भी
नई।” 3 तैखन पौलुसे ज़ोवं, “फिरी तुसेई कोस किसमेरो बपतिस्मो नीयो?”
तैनेई जुवाब दित्तो, “यूहन्नारो।” 4 पौलुसे ज़ोवं, “यूहन्ना त तैन लोकन
बपतिस्मो दित्तो जैनेई पापन करां मनफिराथ, ते यूहन्ना इस्माएली लोकन

ज़ोवं, जै मेरे बाद एजनेबालोए, तैस पुड़ विश्वास केरा, जै मसीह आए।” ५
 एन शुन्तां तैनेई प्रभु यीशु मसीहेरे नंबे सेइं बपतिस्मो नीयो। ६ ते ज़ैखन
 पौलुसे तैन पुड़ हथ रखे त पवित्र आत्मा तैन पुड़ उतरी, त तैना अलग-अलग
 भाषा केरने लगे, ते भविष्यिवाणी केरने लगे। ७ एना सब लगभग १२ मैन्हु
 थिये। ८ फिरी पौलुसे प्रार्थना घरे मां गेइतां ट्लेइ महीन्न तगर बड़े निडर
 भोइतां परमेशरे राज्जेरे बारे मां लोकन सेइं बेंस केरने समझाने लाव। ९ पन
 तैन मरां किछ सकत दिलेरे भोइ जे, ते तैनेई विश्वास केरनेरे बजाहे इन्कार
 कमाव, ते एस पंथेरे बारे मां बुरु ज़ोने लगे, एल्हेरेलेइ पौलुस तैन करां कनारे
 भोइ जेव, ते चेले भी कनारे किये ते तुरन्नुसेरे सुकुले मां बेंस केरतो ते तैन
 शिखालतो राव। १० दूई सालन तगर एरु भोतू राव, एड़ी तगर कि आसिया
 इलाकेरे रानेबाले कुन यहूदी ते कुन यूनानी सेब्झैई प्रभुएरु बच्चन शुनू। ११ ते
 परमेशर पौलुसेरे ज़िरिये सेइं बडां-बडां कम्मां ते चमत्कार हिरातो थियो। १२
 एड़ी तगर कि पौलुस जैस रुमाले सेइं या फटके सेइं हथ लातो थियो, त तैना
 बिमारन पुड़ छँडते थिये, त तैना बिमार बेज़ङ्गोते थिये, ते अगर तैन पुड़ भूतां
 केरो सैयो भोतो थियो, त तैना लोक ठीक भोते थिये। १३ पन किछ यहूदी
 मङ्गद ज़ैना फुक-फक केरते थी, ते एन केरने लगे कि, जैन पुड़ भूतां केरो
 सैयो भी भोए तैन पुड़ यीशुएरे नंबे इन ज़ोइतां फुक फक देने लाए, “जैस
 यीशुएरो प्रचार पौलुस केरते, अवं तैसेरी कसम देताई।” १४ यहूदी प्रधान
 याजक ज़ेसेरू नवं स्किकवा थियूं, तैसेरां सत मट्टां थियां, तैना एने कम्मां
 केरतां थियां। १५ ते भूते जुवाब दित्तो ते ज़ोवं, “अवं यीशु मसीह भी ज़ानताई
 ते पौलुसे भी ज़ानताई, पन तुस कौन आथ?” १६ तैखन तै मैन्हु जैस पुड़
 भूतेरो सैयो थियो, तैन्न यीशुएरे नंबे सेइं फुक-फक देने बालन जो पेव, ते
 तैना अपने कब्जे मां केरतां एत्रे कुट्टे कि तैना ज़खी भोइतां नगनगे तैट्टां
 नश्शो। १७ ज़ैखन इफिसुस नगरेरे रानेबाले यहूदन ते यूनानी लोकन एस
 गल्लरो पतो लगो, त तैना डेरि जे, ते प्रभु यीशु मसीहेरी बड़याई की। १८ ते
 ज़ैनेई विश्वास कियोरो थियो, तैनेई एइतां अपने-अपने बुरे कम्मां केरो इकरार
 सेब्झी केरे सामने कियो। १९ ते केही लोकेई जैना जैदू केरते थिये, तैना
 किताबां सैरैई एन्तां सेब्झी केरे सामने फुकी, ते ज़ैखन तैन किताबां केरि
 कीमतारो हिसाब लाव त कोई ५०००० चैंदरे सिकन करां जादे थी। २०

एन्हरे प्रभुएरो वचन बड़े तकड़े चारे फैलतो जेव ते भारी राव। 21 एन गल्लां केरे बाद पौलुसे फैसलो कियो, कि अवं मकिदुनिया ते अखाया इलाकां केरे विश्वासी लोकन सेइं मिलतां यस्शलेम नगरे जो गेड, ते तै ज्ञोवं, “यस्शलेम नगर मां गेइतां रोम नगर भी मां गानू भी ज़स्त्रीए।” 22 एलहेरेलेइ अपने सैथन मरां तीमुथियुस ते इरास्तुस दूर्ध मैन्हु मकिदुनिया इलाके जो एप्पू करां पेइले भेजे, ते एप्पू भी किछ निरे आसिया इलाके मां राव। 23 तैस वक्ते तैस पंथेरे बारे मां हंगामो भोव। 24 किजोकि अक चैंदरो करीगिर थियो, तैसेरु नवं दिमेत्रियुस थियूं ते अरतिमिस देबारे मन्दरेरी मूरती बनेइतां, कारीगिरन बडू कम दुवेरु थियूं, जैस सेइं तैन केरो बड़ो बुपार चलोरो थियो। 25 तैनी एन कम ज़ान्ने बाले सारे कारीगिर अकोटु कमाए ते ज़ोने लगो, “हे मेरे ढलाव असां इन कम केरतां बड़े पेंझे कमातम। 26 पन तुस हेरतथ ते शुन्तन कि एना दूर्ध मैन्हु पौलुसेरे ज़ेरे केन्चरे इफिसुस नगरे ते लगभग सारे आसिया इलाकेरे नगरन मां लोकन टपलाने लोरेन ते ज़ोतन कि जै हथ्थेरां केरि कारीगिरीए, तै ईश्वर नई। 27 डर एस गल्लरो नई, सिर्फ कि इश्शे पैशेरी बदनामी भोली, बल्के पुरानी देबी अरतिमिस, जै आए तैसारु मन्दर भी घटया समझू गालू, ज़ेसेरी पूजा सारे आसिया इलाके मां ते सारे दुनियाई मां केरतन, तैसेरी इज़ज़त भी खतम भोइगानिये।” 28 जैखन तैन लोकेई शुनू त तैना सरकी सेइं भेरोई जे, ते ज़ोरे-ज़ोरे नहरे देने लगे, “इफिसी केरि देबी अरतिमिस, महान आए!” 29 हेरते-हेरते सारे नगर मां हलचल मेचि जेई, लोकेई गयुस ते अरिस्तर्खुस, मकिदुनी इलाके ज़ैना पौलुसे सेइं साथी ओरे थिये, तैना ट्लेइतां घसीटते तमाशो हेरनेरी ठैरी जो दौवड़ते ने। 30 पौलुस भी सभाई मां गानू चातो थियो पन चेलेई तैस जो बिस्तार भेजतां ते मिनत केरतां ज़ोवं, कि तमाशो हेरने न गेइयां किजोकि तैड़ी बड़ो खतरोए। 31 ते आसिया इलाकेरे हाकिमन मरां भी तैसेरे काई दोस्तेई तैस जो बिस्तार भेजतां ते मिनत केरतां ज़ोवं, कि तमाशो मचौरी थी, किजोकि किछ लोक नहरे देते थिये, ते बड़े लोकन पतो न थियो कि तैना तैड़ी किजो अकोटु भोरेन। 33 तैखन तैनेई सिकन्दर, जै यहूदी लोकेई खड़े कियोरो थियो, भीड़ी मरां किछ लोकेई तै अग्रोवं कियो, ते सिकन्दर हथ्ये सेइं इशारो केरतां लोकां केरे सामने जुवाब देनो चातो थियो। 34 पन जेरो लोकन पतो लगो कि ए यहूदी आए, त सब ज़ोरे-ज़ोरे लगभग

दूर्व घंटन तगर चिन्डां मारने लगो, “इफिसुस नगरेरे देबी अरतिमिस, महान आए।” 35 तैखन एककी मंत्री नगरेरे लोकन चुप करेइतां ज़ोने लगो, “कि इफिसुस नगरेरे रानेबालो कौन न ज़ाने कि इफिसुस नगर लोक अरतिमिस देबारू मन्दरे, ते एसेरे मूरतरो बड्हो रखवालेन, जैन अम्बररां बिछ़ड़ोरो थी। 36 ज़ैखन एना गल्लां केरे खलाफ केन्चे किछ न ज़ोवं त ठीक थियूं कि तुस चुप राथ ते बगैर सोच सेमझातां किछ न केरेथ। 37 तुसेई ज़ैना मैन्हु इड़ी आनोरेन तैनेई न मन्दरे लुटेऱुए न इश्शी देबारे खलाफ तुहीन कियोरीए। 38 अगर दिमेत्रियुस ते एसेरे कारीगिरन केन्ची पुड़ दाओ केरनोए त आदालतरु दार खुल्लूए, ते हाकिम भी आन, ज़ैडी तुस एककी होरि पुड़ दाओ केरि सकतथ। 39 पन अगर तुस होरि कोन्ची चीज़रे बारे मां पुछनू चातथ त तैसेरो फैसलो भी पंचैइती मां कियो गालो।” 40 मीं इस गल्लरो डरे कि अगर हाकिम इस हंगामेरे बारे मां शुनेलो त ज़ोलो कि अस रोमी सराकारारी खलाफब्रज़ी केनेरी कोशिश केरने लोरेम, ते अस एत्रे लोकां केरे अकोटु भोनेरो कुन जुवाब देमेले। 41 एन ज़ोनेरां बाद तैनी पैन्चैयत खतम कमाई।

20 ज़ैखन हंगामो मुक्को त पौलुसे चेले कुजाए ते तैन केरो होसलो बधव, ते तैन बिश्शा ज़ोइतां मकिदुनिया इलाके जो च्चलो जेव। 2 तैस सारे मुलखे मांमेइं चेलन होसलो देइतां यूनान इलाके मां (ज़ैस जो अखाया इलाको भी ज़ोतन) अव। 3 तैड़ी तै ट्लाई महीने राव, ते ज़ैखन तै समुन्दरी ज़िहाज़े मां सीरिया इलाकेरे पासे गानेबालो थियो, त यहूदी केरे लीडरेई तैस बत्तां मारनेरी साज़िश बनाई, तैस पतो लगो त एल्हेरेलेइ तैनी एन रोड़ समझू कि मकिदुनिया इलाके मांमेइं जो सीरिया इलाके जो गाए। 4 बिरीया नगरेरे रानेबाले पुरुसेरू मटू सोपत्रुस, ते थिस्सलुनीकि मांमेइं अरिस्तर्खुस ते सिकुन्दुस ते दिरबे नगरेरो गयुस, ते तीमुथियुस ते आसियारो तुखिकुस ते त्रुफिमुस आसिया इलाके तगर असन सेइं साथी च्चले जे (लूका भी तैन सेइं साथी थियो)। 5 पन तैना अग्रोवं गेइतां त्रोआस नगरे मां असन बलगते राए। 6 ते अस अखमीरी रोट्टी केरे तिहारे बाद फिलिप्पी नगरे मरां सफर केरतां पंच दिहैड़ी मां त्रोआस नगरे मां तैन कां पुजे, ते रात दिहैड़ी तैड़ी राए। 7 हफतेरे पेइले दिहाड़े असां प्रभु भोजेरे लेइ अकोटु भोए, ते पौलुसे होरसां तैटुं अग्रोवं गानू थियूं, त एल्हेरेलेइ तै तैन सेइं गल्लां केरने लाव ते एध्धी राती तगर

तैन शिक्षा देने लाव। 8 दोपरे ज़ैड़ी असां सब अकोटु बिश्शोरे थिये, त तैड़ी काई दीये बलते थिये। 9 त अक नौजवान दैरी मां बिश्शोरो थियो, ते तैसेरु नवं यूतुखुस थियूं, तै पौलुसेरो प्रचार ठंडी तगर शुन्तां तैस निहल आई, ते ट्लेइयोंवं छतरां उन्ढो खिरको, ते तै मेरि जेव। 10 पौलुस बुन अव ते तै नौजवान ट्लेइतां तैस सेइं लिपटो ते ज़ोने लगो, “कि डरा नन्ना ए ज़ींतोए।” 11 फिरी तैनेईं बा गेइतां सेब्भेईं मिलतां रोट्टी खाइ, ते फिरी ट्लेकड़ोने तगर बच्चन शुनाने लगो, तैखन तै तैटुं च्लो जेव। 12 लोकेईं तै नौजवान ज़ींतो घरजो नीयो, ते तैन बड़ी खुशी भोइ। 13 असां अगगर गेइतां ज़िहाजे मां सुवार भोइ जे, ते अस्सुस नगरे जो च्ले जे, ताके तैड़ी पौलुसे भी ज़िहाजे मां चाढ़म, किजोकि पौलुसे पेइले पैदल गानेरो बिस्तार कियोरो थियो। 14 ज़ैखन तै असन अस्सुस नगरे मां मैल्लो तै असेईं ज़िहाजे मां चाढ़ो ते असां मितुलेन नगरे मां आए। 15 तैटुं असां ज़िहाजे मां सुवार भोइ जे ते अस खियुस ज़ींरेरे सामने पुज़े, ते अग्री दिहाड़े असां सामुसे मां पुज़े, ते होरसां अस मीलेतुस नगरे मां आए। 16 पौलुसे थापेरु थियूं कि अवं इफिसुस नगरे मां उतरेलो, किजोकि तै आसिया इलाके मां जादे वक्त बीतानो न थियो चातो, किजोकि तै जल्दी मां थियो, कि अगर भोइसखे, तै पिन्तेकुस्त तिहारे दिहाड़े यरुशलेम नगरे मां राए। 17 ज़ैखन अस मीलेतुस नगरे मां ओस्से, त पौलुसे इफिसुस नगरेरे कलीसियारे बुजुर्गन जो बिस्तार भेजो कि तैना एज्जन। 18 ज़ैखन तैना तैस कां आए, तैनी तैन सेइं ज़ोवं, तुस ज़ानतथ कि पेइले दिहाड़ेरां ज़ैखन अवं आसिया इलाके मां पुज़ो, अवं तेइसेरो देंतो अज्ज तगर हर वक्त तुसन सेइं साथी केन्चरां राव। 19 मतलब बड़े नेरमी सेइं, ते ऐंखरु बछोड़ी-बछोड़ी, ते तैन अज़मैइश मां जैना यहूदी केरि चळैकी सेइं मीं पुड़ एई, अवं प्रभुएरी सेवा केरतो राव। 20 ते जैना-जैना गल्लां तुश्शे लेइ फैइदेरी थी, तैना मीं तुसन सेइं बगैर केन्वरे डरे तुसन सेइं ज़ोई छेड़ी, ते बल्के जैन किछ भी शिखालू दिले सेइं ते घर-घर गेइतां शिखालू। 21 बल्के अवं यहूदी लोकां ते यूनानी लोकां केरे दुइयां केरे सामने गवाही देताई कि तैना परमेश्वरेरे सामने पापन करां मन फिरान, ते इश्शे प्रभु यीशु मसीह पुड़ विश्वास केरन। 22 हेरा हुनी अवं पवित्र आत्मारी गल मेन्तां यरुशलेम नगरे जो गाताई, ते मीं पतो नई कि तैड़ी मीं पुड़ केरि-केरि गुजरेली। 23 अवं सिफ

एत्र ज्ञानतार्दि कि पवित्र आत्मा मीं हर नगर मां एन ज़ोती राई, कि बन्धना ते
मुसीबत मेरे लेइ तियारन। 24 पन मेरी जान, मेरे लेइ कोई कदर कीमत न
रख्खे, त बस्सा अवं एन चातार्दि कि मेरी दौड़ पूरी भोए ते तैस सेवाई पूरी
केरि, ज़ै मीं परमेश्वरे अनुग्रहे खुशखबरी पुड़ गवाही देनेरे लेइ प्रभु यीशु करां
मैल्ली। 25 ते हुनी अवं ज्ञानतार्दि, कि तुसेई अवं जैन मां परमेश्वरे अनुग्रहेरी
खुशखबरी हर पासे शुनातो राव, त मीं फिरी न लाएले। 26 एल्हेरेलेइ अवं
तुसन साफ-साफ ज़ोई छुटतार्दि, कि जैना लोक यीशु पुड़ विश्वास केरने बगैर
मेरेले, त अवं तैन केरे ज़िमेवार नई। 27 किजोकि अवं बगैर केन्ची डेररां
तुसन शिखालतो राव, कि परमेश्वरी मर्जीं तुशो लेइ कुने। 28 बस्सा अपनो
ते सारे विश्वासी लोकां केरो खियाल रखा, ज़ेसेरे लेइ तुस पवित्र आत्मारे
तरफां चुनोरेथ, कि परमेश्वरी कलीसियारी रखवाली केरा, ज़ै लोक तैनी
अपने खूने सेइं घिन्नोरेन। 29 अवं ज्ञानतार्दि कि मेरे गानेरां बाद झूठे उस्ताद
मारने बालां गिदां केरे ज़ेरे तुसन मां एज्जेले, ते ज़ेन्हरे तैना भैडुन मारतन
तेन्हरे तैना झूठे उस्ताद तुसन नुकसान पुजाले। 30 बल्के तुसन मरां भी एरे
लोक खड़े भोले जैना सच ट्लोड़ मरोड़ केरतां छेडेले, ताके चेलन अपने पासे
केरन। 31 एल्हेरेलेइ बींझो राथ ते याद रखा, कि अवं ट्लाई साल लेरां देंतो
रात दिहैड़ी हर एक्की तैन खबरदार केरतो राव। 32 हुनी अवं तुसन परमेश्वरे,
ते तैसेरे अनुग्रहे वचनेरे सुपुर्द केरतार्दि, कि ज़ै तुसन विश्वासे मां मज़बूत
केरि सकते, ते तुसन तैस जागिरारो हकदार बनेइ सकते, ज़ेसेरो वादो तैनी
कियोरोए जैनी तुस पवित्र कियोरेथ। 33 मीं केन्चेरे सोन्ने चेंदारु या लिगड़ां
केरु लालच नई कियेरु। 34 तुस एप्पू ज्ञानतथ कि मीं अपने हथेइं सेइं
अपने ते अपने सैथी केरि हर अक ज़रूरत पूरी कियोरीए। 35 मीं तुसन सब
किछ केरतां हिराव, कि एन्हरे सेइं कमज़ोरन समैली सकतम, कि प्रभु यीशु
मसीहेरी गल्लां याद रखम, “कि देनू नेने करां जादे धने।” 36 एन गल्लां केरे
बाद पौलुसे ज़ैधू केरे भारे बिश्तां तैन सेब्बन सेइं साथी प्रार्थना की। 37 तैना
सब गले मिलतां लेरां देने लगे, ते पौलुसे फुम्मड़ी देने लगे। 38 खास केरतां
तैना इस गल्ली सेइं दुखी थी, जैना तैनी जोरी थी, कि तुस मीं फिरी कधी न
लाएले, ते तैनेई तै ज़िहाजे तगर पज़ाव।

21 जैखन असां तैन करां चले जे त समुन्दरेरे सफर शुरु कियूं, त सिधे बत्तां
 कोस ज़ीरि मां आए, ते होरसां अस रुदुस मां पुज़े, ते फिरी तैटुं पतरा
 ज़ीरि मां चले जे। 2 ते अक जिहाज़ फीनीके इलाके जो गांतू मैल्लू त असां
 तैस पुड़ चेढतां सफर शुरु कियूं। 3 जैखन इश्शी नज़र साइप्रस ज़ीरि पुड
 पेर्द, त अस तैस बाए हथ्थे ओरैलतां सीरिया इलाके जो चले जे, सूर नगरे मां
 ओस्से, किजोकि इश्शो ज़िहाज़े तैड़ी किछ बोझ उसालनो थियो। 4 तैड़ी
 असन चेले मैल्लो ते तैन कां असां सत दिहाडे राए। तैर्द वित्र आत्मरे ज़ोने
 मुताबिक पौलुसे यरूशलेम नगरे मां गानेरे लेइ ठाको। 5 सत दिहैड़ा बाद
 कुआन्शां मट्टन समेत नगरेरे बेइर तगर साथी आए, ते समुन्दरेरे बन्ने पुजतां
 असेर्द ज़ैधू केरे भारे बिश्तां प्रार्थना की। 6 फिरी असां तैन करां अलग भोए त
 ज़िहाज़े मां चेढतां चले जे, ते तैना भी अपने-अपने घरजो चले जे। 7 जैखन
 असां सूर नगरे मरां सफर पूरू केरतां पतुलिमयिस मां पुज़े, ते विश्वासी ढलान
 जो नमस्कार केरतां तैन सेइं साथी अक दिहाड़ी राए। 8 ते होरसां असां तैटुं
 चेलतां कैसरिया नगरे मां आए, ते फिलिप्पुस खुशखबरी प्रचार केरनेबालेरे
 घरे जे ते तैड़ी राए, जै सत्तन मरां अक थियो। 9 तैसेरी चेवे कुवैरी कुइयां थी,
 ते तैना भविष्यवाणी केरती थी। 10 जैखन अस तैड़ी काई दिहाड़े राए, त
 तैड़ी अक नबी थियो, ज़ेसेरु नवं अगबुस थियूं तै यहूदिया इलाकेरां ओरो
 थियो। 11 तैनी असन कां इइतां पौलुसेरे मज़े सेइं अपने हथ पाव बंधे ते ज़ोने
 लगो, “पवित्र आत्मा इन ज़ोतीए कि जैस मैनेऱ इन मज़ आए, तैस यरूशलेम
 नगरेरे यहूदी इसेरे ज़ेरे बंधेले, ते गैर कौमां केरे लोकां केरे हवाले केरेले।” 12
 जैखन असेर्द एना गल्लां शुनी, त असेर्द ते होरि लोकेहूं पौलुसे कां मिनत की,
 कि यरूशलेम नगरे मां न गेइयां। 13 पन पौलुसे जुवाब दित्तो, “तुस एन
 कुन केरने लोरेथ? तुस किजो लेरां देइ-देइ मेरो दिल ट्लोडने लोरेथ? अवं
 यरूशलेम नगरे मां प्रभु यीशु मसीहेरे नंवे सेइं सिफ बेंधोनेरे लेइ नई बल्के
 मरनेरे लेइ भी तियार आई।” 14 जैखन तैनी न मनू त असां चुप राए, “कि
 प्रभुएरी मर्जी पूरी भोए।” 15 किछ दिहाड़ा बाद असां सफरेरी तियारी केरने
 लगे, ते फिरी असां यरूशलेम नगरे जो चले जे। 16 कैसरिया नगरेरे किछ चेले
 असन सेइं साथी चले, ते असेर्द मनासोन नंवेरो साइप्रसेरो अक पुरानो चेलो
 साथी आनो कि अस तैसेरे घरे रहम। 17 ते जैखन असां यरूशलेम नगरे मां

पुँजे, त इश्शो विश्वासी ढला बड़े खुशी सेइं असन सेइं मिलने आए। 18 होरसां
 असां पौलुसे साथी नेइतां याकूबे सेइं मिलने जे, तैड़ी सब बुजुर्ग अकोट्टे भोरे
 थिये। 19 तैखन तैनी नमस्कार केरतां, जैना-जैना कम्मां परमेशरे तैसेरी
 सेवारे ज़िरिये सेइं गैर कौमन मां कियोरां थी, अक-अक केरतां सब ज़ोआं।
 20 तैनेई इन शुन्तां परमेशरी तारीफ़ की, ते फिरी पौलुसे सेइं ज़ोने लगे,
 “हे ढला तू जानतस, कि यहूदन मरां हज़ारई लोकेई विश्वास कियोरोए,
 ते तैना सब मूसेरे कानूने पुड़ अमल केरने मां मघनन्। 21 ते तैन तेरे बारे
 शिखालेउ कि तू गैर कौमन मां रानेबाले सारे यहूदन ए शिक्षा देंतो ओरोस,
 कि मूसा नेबेरे कानूनेरे शारने, ते अपने मटां केरो खतनो न केरा, ते न यहूदी
 केरे रीतन पुड़ न चला। 22 त फिरी कुन कियूं गाए? लोकेई ज़रुर शुनेले कि
 इड़ी ओरोस। 23 एल्हेरेलेइ जैन अस तीं सेइं ज़ोतम, तैन केर। इश्शो इड़ी चेव्रे
 मैन्हु आन जैनेई मिनत मगोरीए। 24 तू तैन एप्पू सेइं साथी ने ते तैन सेइं
 मिलतां अपनो आप शुद्ध केर, ते तैन केरो खच्चो भी दे, ताके तैन अपनो
 दोग्गेरी टिंड बनान। तैखन सेब्बन पतो लगनोए कि जैना गल्लां तेरे खलाफ
 फैलेवरिन, तैन केरि कोई बुनीयाद नई, ते तू एप्पू भी सच्चे दिले सेइं मूसेरे
 कानूने पुड़ अमल केरतस। 25 ते ज़ैडी तगर तैन गैर कौमां केरो सवाले, कि
 जैनेई विश्वास कियोरोए, तैन केरे बारे मां असेई पेडले फैसलो केरतां लिखतां
 भेजू, कि तैना मूरतन कां बलिदान कियेरु मास ते खूने करां ते गलचैटी देइतां
 मारोरे जानवरां केरे मासे करां परहेज़ केरन, ते बदमाशी न केरन। 26 होरसां
 पौलुसे तैना मैन्हु साथी ने, ते तैन सेइं साथी अपने आपे शुद्ध केरतां मन्दरे मां
 जेव, ते खबर दिती कि तैन केरे शुद्ध भोनेरे बाद चढ़तल चाढ़नेरे दिहाड़े केइस
 पूरे भोनेन।” 27 जैखन शुद्ध भोनेरे सत दिहाड़े पूरे भोनेबाले थिये, त आसिया
 इलाकेरे यहूदेई पौलुस मन्दरे मां लाव त लोक भड़काए, ते तैस ट्लेइतां
 चिन्डां मारने लगे। 28 “हे इसाएली लोकव इश्शी मद्दत केरा, ईए तै मैनूए, जै
 हर ठैरी लोकन इश्शे कानूनेरे खलाफ ते मन्दरेरे खलाफ शिक्षा देंतो रहते, ते
 एनी एसेरां अलावा गैर कौमां केरे लोक इश्शे मन्दरे मां एन्तां तै पवित्र ठार
 अपवित्र कराते।” 29 तैनेई एन एल्हेरेलेइ ज़ोवं कि तैनेई पौलुस इफिसुस
 नगरेरे रानेबाले त्रुफिमुस सेइं साथी लाहोरो थियो, ते समझते थिये कि पौलुसे
 तै ज़रूरी मन्दरे मां नीयोरो भोनोए। 30 तैखन सारे नगर मां हलचल मेंजि जेई,

ते मैन्हु देवड़तां जम्हां भोए, ते पौलुस ट्लेइतां मन्दरे मरां घसीटतां बेइर आनो, ते लूशी दारां बंद कियां। 31 ज़ैखन तैना तैस मारनेरी कोशिश केरने लवरे थिये, ते फौजी टोलरे सरदारे कां खबर पुऱ्जी, कि बड़े लोकेई यरुशलेम नगरे मां खलबली मच्चोरीए। 32 तैखन तैना सिपेहिन ते सूबेदारन एन्तां तैन कांजो दौड़ो, ते तैनेई फौजी टोलरे सरदारे ते सिपाही लेइतां पौलुस मारनो कुटनो बंद कियो। 33 फौजी टोलरे सरदारे नेडे गेइतां पौलुस अपने कब्जे मां कियो, ते तैस दूर्घ शांगलेइं सेइं बंधनेरो हुक्म दित्तो, ते फिरी तैनी पुऱ्छू, “ए मैन्हु कौने ते एनी कुन कियेरु आए?” 34 तैस भीड़ी मां किछ लोक चिन्डां मारते थिये, ते एत्री शौर मच्चौरी थी, कि तैस पूरो पतो न लगो ते तैनी हुक्म दित्तो, कि पौलुसे किल्लै मां पुजाथ। 35 ज़ैखन पौलुस सिपाहीयेइं पेवड़न उबरो च्चलेवरो थियो, ते लोकां केरे वजाईं सेइं सिपाहीयेइं पौलुस उबरो छुइतां नेव। 36 सारे लोक ज़ैना पौलुसे पत्ती पेवरे थिये, तैना चिन्डां मारते थिये, “एस मारा!” 37 पौलुसे सिपाही किल्लै मां पुजाने बाले थिये, ते तैनी फौजी टोलरे सरदारे सेइं ज़ोवं, “कुन मीं अज़ाज़ते कि अवं तीं सेइं किछ ज़ोई?” ते तैनी पुऱ्छू, “तू यूनानी भाषा ज्ञानतस?” 38 कुन तू तै मिस्स मुलखेरो रानेबालो नई, ज़ैनी किछ चिरे पेइले सरकारारी खलाफत कियोरी थी, ते 4000 मैनन् ज़ैन कां हथियार थिये तैना जंगले मां नीयोरे थिये? 39 पौलुसे ज़ोवं, “अवं त यहूदी आई, ते तरसुस नगरेरो राने बालोई, ज़ैन किलिकिया इलाकेरु मुशूर नगर, अवं तीं कां मिनत केरताई मीं लोकन सेइं गल केरने दे!” 40 ज़ैखन तैनी अज़ाज़त दित्ती, ते पौलुस पेवड़न पुऱ्ड खड़ो भोइतां लोकन जो हथ्ये सेइं इशारो कमाव कि चुप रान। ते ज़ैखन तैनेई चुप कमाई ते पौलुसे इब्रानी भाषाई मां ज़ोनू शुरू कमाव:

22 “मेरे ढ्लाव ते बुजुर्गाव, मेरी गल शुना, ज़ै अवं अपनि सफैई मां पैश लोरोई केरने!” 2 ज़ैखन लोकेई तैस करां इब्रानी भाषा ज़ोती शुनी त तैना चुप रेइजे, तैखन पौलुसे ज़ोवं: 3 “अवं त यहूदी आई, ते अवं किलिकिया इलाकेरे तरसुस नगरे मां ज़रमो, पन इस नगर मां गमलीएल करां शिक्षा हासिल की, ते अपने दादां-पड़दादां केरे कानूने ठीक तरीके सेइं शिखोरीए, ते अवं भी परमेशरेरे लेइ एरो मघन थियो, ज़ेरे अज़ तुस आथ। 4 मीं मड़दन ते कुआन्शन बेंधतां, ते कैद केरतां, ई पंथ इड़ी तगर सताए, ते तैना माराए भी।

५ एप्पू महायाजक ते सब बुजुर्ग एस गल्लरे गवाह आन, कि मीं दमिश्क नगरे
 मां रानेबाले यहूदी ढलां केरे लेइ चिट्ठी एन्होरी थी, ते अवं तैड़ी एस नीती सेइं
 जोरो थियो, ते ज़ैना तैड़ी भोन तैन सज्ञा देनेरे लेइ बेन्धतां यरूशलेम नगरे जो
 नेही।” ६ “अवं ज़ैखन सफर केरते-केरते दमिश्क नगरेरे नेडे पुजो, त तै
 दुपाहरां केरो मौको थियो। ते अम्बरेरां अक बड़ी लौ आई ते मेरे चेवे पासन
 बलने लगी। ७ ते अवं तल्ले बिछड़ी जेव, ते मीं अक आवाज़ शुनी, ज़ै मींजो
 ज़ोने लोरी थी, हे शाऊल, हे शाऊल तू मीं किजो स्तातस? ८ त मीं पुच्छू, हे
 प्रभु तू कौन आस? त तैनी मींजो जुवाब दित्तो, अवं यीशु नासरी आई, ज़ैस
 तू स्तातस। ९ मेरे सैथेईं लौ त लाई पन तैन कोई गल न समझी, कि तै
 आवाज़ मीं सेइं कुन लोरीए ज़ोने? १० त मीं पुच्छू, हे प्रभु अवं कुन कम्मेईं,
 प्रभुए ज़ोवं, उठ दमिश्क नगरे मां गा तैड़ी तीं ज़ैन तेरे केसनेरे लेइ रखेरुए
 तैड़ी तीं सेइं ज़ोवं गालू। ११ मेरे सैथेईं अवं हथ्थेरां ट्लेइतां दमिश्क नगर मां
 पुजाव। किजोकि तैस बड़े महिमारे वजाई सेइं मीं किछ न लेइयोवं।” १२
 “तैड़ी अक मैन्हु हनन्याह नव्वेरो कानूनेरे मुताबिक भक्त मैन्हु अव, ते तैटुरे
 यहूदन मां बड़ो इज़ज़ातदार थियो। १३ तै मीं कां खड़ो भोइतां ज़ोने लगो, हे
 ढला, शाऊल, अपनि एछळी खोल्ल, ते मेरी एछळी तैखने खुल्ली जेई, ते अवं
 तैस लहने लगो। १४ तैखन तैनी ज़ोवं, इश्शे बुजुरगां केरे परमेश्वरे तू चुनोरोस,
 ताके तू तैसेरी मर्जी पूरी केरस ते मसीह लास ते तैसेरी गल्लां शुनस। १५
 किजोकि तू सैरी लोकन मां तैसेरो गवाह भोलो, ते तैन ज़ोलो कि तीं कुन
 लाहेरुए ते कुन शुनेरुए। १६ हुनी चिर किजो लातस? उठ, ते बपतिस्मो ने ते
 तेरे पाप माफ़ भोन।” १७ “ते ज़ैखन अवं यरूशलेम नगरे मां वापस अव, ते
 अवं मन्दरे मां प्रार्थना केरने लोरो थियो, त मीं दर्शन लावं। १८ ते तै लाव ते
 एन ज़ोतू शुन कि लूश केर, ते यरूशलेम नगरे मरां लूशी निस, किजोकि एना
 लोक मेरे बारे मां तेरी गवाही कबूल न केरेले। १९ मीं ज़ोवं, हे प्रभु एना लोक
 ज़ानतन कि अवं हर प्रार्थना घरे मां गातो थियो, ते केन्चरे अवं तेरे मन्ने बालन
 कैद केरतो ते कुटतो थियो। २० ते ज़ैखन तेरे गवाह स्तिफनुस मारने लोरे
 थिये, त अवं भी तैड़ी थियो, ते तैसेरे मारने मां खुशी थियो। ते अवं मारने
 बालां केरां लिगड़ां पहरतो थियो। २१ ते प्रभुए मीं सेइं ज़ोवं, ‘गा अवं तीं
 गैर कौमन कां दूर-दूर भेजेलो।’” २२ सारे लोक तैसेरी गल्लां शुन्ने लोरे

थिये, पन ज़ैखन तै इड़ी तगर पुजो त सारे लोक ज़ोर-ज़ोरे चिन्डां मारने लगे,
 “ए ज़ींतो रखनेरे काबल नई!” एस मार। 23 ज़ैखन लोकां केरि शौर ते
 चिन्डां चेलती रेह, त तैना चोगे शैरतां धूडु आसमाने उडारने लगे। 24 त
 फौजी पलटनरे सरदारे पौलुस किल्लै मां नेनेरो हुक्म दित्तो, “एस कोडेइं सेइं
 बाथ ते एसेरु बियांन घिन्ना ताके पतो लगे, कि लोक किजो चिन्डां मारने
 लोरेन।” 25 ज़ैखन तैना कोडेइं सेइं बानेरे लेइ पौलुस रेसी सेइं बंधो, त तैनी
 एककी सूबेदारे सेइं ज़ोवं जै तैड़ी नेड़े थियो। “कुन अक रोमी नगरेरे मैन्हु
 बगैर कसूरे झुसनो जेइज़े?” 26 ज़ैखन तैनी सूबेदारे एन शुनू त तै फौजी
 पलटनरे सरदारे कां जेव, “तू कुन ज़ोतस? ए त अक रोमी मैनूए।” 27
 फौजी पलटनरे सरदारे पौलुसे कां एइतां पुच्छू, “कुन तू रोमीस?” तैनी ज़ोवं,
 “हाँ।” 28 इन शुन्तां फौजी पलटनरे सरदारे ज़ोवं, “कि मीं रोमी भोनेरी
 पदवी बड़े पेंइसे देइतां हासिल कियोरीए।” ते पौलुसे ज़ोवं, “पन अवं त
 ज़मनेरो रोमी।” 29 ज़ैना लोक पौलुसेरु बियांन घिन्ने बाले थिये, तैना नेश्नी
 जे, फौजी पलटनरे सरदारे भी इन बुझतां कि ई रोमीए, ते तैनी तै बंधो, ते
 डेरि जेव। 30 होरसां तै ठीक-ठीक ज़ान्नेरी इच्छा सेइं कि यहूदी तैस पुड़
 किजो दोष लातन, एल्हेरेलेइ तैनी तै खोल्लो, ते प्रधान याजक ते सारी
 महासभा अकोड़ी केरनेरो हुक्म दित्तो, ते पौलुस बुन गेइतां तैन केरे सामने
 खड़ो कियो।

23 पौलुसे महासभारे लोकां केरे पासे रोड़ेचारे तेकतां ज़ोवं, “हे ढ्लाव अवं
 बेड़ि नेक नीती सेइं परमेशरेरे हुक्मां केरे मुताबिक ज़िन्दगी गुज़ारतो ओरोई।”
 2 महायाजक हनन्याह पौलुसेरी एना गल्लां शुन्तां पौलुसे कां खड़े भोरे
 लोकन हुक्म दित्तो, कि एसेरे तुत्तरे पुड़ थप्पड़ बाथ। 3 पौलुसे तैस सेइं ज़ोवं,
 “हे पाखंडी, परमेशर तीं बाए। तू इड़ी बिशोरोस कि मूसेरे कानूनेरे मुताबिक
 मेरो इन्साफ केरस, ते कुन तू मूसेरे कानूनेरे खलाफ बानेरो हुक्म देतस?” 4
 ज़ैना तैड़ी खड़ेखड़े थिये, त तैना ज़ोने लगे, “कुन तू परमेशरेरे महायाजकेरी
 तुहीन केरतस?” 5 पौलुसे तैन सेइं ज़ोवं, “ढ्लाव मीं पतो न थियो, कि ए
 महायाजक, किजोकि लिखोरुए, तू अपने लोकां केरे प्रधाने जो बुरू न ज़ो।”
 6 पौलुस ज़ानतो थियो, कि तैन मां किछ सदूकी भी आन, ते किछ फरीसी
 लोक भी आन ते तै महासभाई मां ज़ोरे सेइं ज़ोने लगो, “हे ढ्लाव अवं त

फरीसी लोकां केरे खानदेन्नी मरां आई, ते मीं पुड़ एनेई एल्हेरेलेइ मुकदमो
 च्छ्लेवरोए, कि अवं उमीद रखताई कि मुड़दे फिरी ज़ींते भोले।” ७ पौलुसेरु
 एन ज़ोंते फरीसी ते सटूकी लोकन एप्पू मांमेइं लड़ाई शुरू भोइजेइ, ते सेड्भन
 एप्पू मांमेइं खल बनो। ८ किजोकि सटूकी ज़ोतन कि मुड़दे ज़ींते नई भोने, ते
 न स्वर्गदूतन ते न कोई आत्मा आए, पन फरीसी लोक एन दुझ्ये गल्लन पुड़
 विश्वास केरतन। ९ तैखन तैना बेंस केरने लगे, शास्त्री लोकन मरां ज़ैना
 फरीसी लोकन मां थिये, तैना खड़े भोइतां लड़ाई केरतां ज़ोने लगे, “असां
 इस मैन्हु मां कोई कसूर न लहम, अगर केन्ची आत्मा या स्वर्गदूते एस सेइं
 कोई गल कियोरीए त फिरी कुन भोवं?” १० गल एत्री बेद्दी जेर्इ, कि फौजी
 पलटनरे सरदारे बुझ्नू, कि एरु न भोए कि पौलुसेरे टोटे-टोटे बनान, त तैनी
 हुक्म दित्तो कि बुन गाथ ते पौलुसे ज़बरदस्ती तैटुं कढा ते किल्लै मांजो
 आनां। ११ तैस्से राती प्रभु यीशुए पौलुसे कां इटां ज़ोवं, “हे पौलुस हिम्मत
 रख ज़ेन्हरे तीं यफ्शलेम नगरे मां मेरी गवाही दित्तोरीए, तेन्हरे तीं रोमे मां भी
 गवाही देनी भोली।” १२ होरसां झेझां किछ यहूदी मैनेई मिलतां फैसलो
 कियो, ते कसम कमाई कि ज़ांतगर असां पौलुसे कत्तल न केरम, तांतगर
 किछ न खाम ते न पींम। १३ एस साजिशी मां ४० मैनन् करां जादे थिये। १४
 तैना प्रधान याजकन ते बुजुर्गन कां जे, ते ज़ोने लगे, “असन पुड़ लानत भोए,
 अगर असां पौलुसे मारनेरे बगैर किछ खाम या पींम, असेई त तैस खतम
 केरनेरी कसम कमेवरीए। १५ एल्हेरेलेइ तुस सब महासभा मां मिलतां फौजी
 पलटनारे सरदारे कां दरखुवास देथ, कि तै पौलुसे लोकां केरे सामने आने,
 ताके एस मुकदमेरी सारी हकिकत फिरी पतो चले, एस करां पेइले पौलुस
 इडी पैश कियो गाए, असां तियार आम, कि तैस मारम।” १६ पन ज़ैखन
 पौलुसेरे बेइनारे मट्ठे एस साजशरो पतो लगो, त तैनी किल्लै मां गेइतां पौलुसे
 पतो दित्तो, कि तैना लोक तैस मारनो चातन। १७ तैखन पौलुसे सूबेदारन
 मरां अक कुजाव, ते तैस सेइं ज़ोवं, “कि इस जवाने फौजी पलटनरे सरदारे
 कां नेथ, किजोकि ए किछ ज़ोनेरे लेइ ओरोए।” १८ बस्सा, तैनी तै फौजी
 पलटनरे सरदारे कां साथी नीयो, ते ज़ोने लगो, “अवं पौलुसे जै कैदी आए,
 तैनी अवं कुजाव, ते तैनी मीं कां दरखुवास कियोरीए, कि इस जवाने अवं तीं
 कां एन्ही, किजोकि ए किछ तीं सेइं जोनू चाते।” १९ फौजी पलटनरे सरदारे

तैस जवानेरो हथ ट्लेइतां तै कनारे ज़ेरे नीयो ते तैस पुच्छ्ने लगो, “तू मीं सेइं कुन ज़ोनू चातस?” 20 तैनी जवाने ज़ोवं, “यहूदी लीडरेई अकोटु भोइतां तीं कां दरखुवास देनेरो फैसलो कियोरोए। कि तू पौलुसेरी पुछ गन केरनेरे बहाने तैस महासभा मां आनस। 21 तू तैन केरि गल न मेन्ना, किजोकि कोई 40 मैनन् करां जादे यहूदी तैस पुड हमलो केरनेरी कोशिशी मां आन, तैनेई कसम कमेवरी कि ज़ांतगर असां पौलुसे न मारम तांतगर असां किछ खाम या पींग, त असन लानत भोए, हुनी तैना तियारन, सिर्फ तेरे वादेरो इंतज़ारे।” 22 फौजी पलटनरे सरदारे तै जवान वापस भेज़ो, ते तैस ज़ोवं कि गा, “एना गल्लां केरो ज़ैना तीं मीं सेइं ज़ोई, होरि केन्ची पतो न लोडी लग्गोरो।” 23 तैखन तैनी टूर्ड सूबेदार कुजाए, ते तैन सेइं ज़ोवं, “तुस 200 सिपाही ते 70 सुवार ते 200 भाले च्चलानेबाले तियार रख्खा, तैनेई राती 9 बज़ेई कैसरिया नगरे मां गानूए। 24 ते पौलुसेरे लेइ घोड़े तियार रखा, ताके तै गवर्नर फेलिक्स कां हफाज़ती सेइं पुज़ाव गाए।” 25 ते फौजरे प्रधाने अक चिट्ठी एस तरिकेरी लिखी। 26 “श्रीमान फेलिक्स गवर्नर क्लौदियुस लूसियासे जो नमस्कार। 27 ए तै मैनूए, जै यहूदेई ट्लातोरो थियो, ते एस तैना मारनेबाले थिये, त अवं सिपाही नेइतां साथी जेव, ते तै छुटाव, किजोकि मीं पतो थियो, कि तै अक रोमेरो रानेबालोए, त फौजी पलटन नेइतां छुटाव। 28 लिहाज़ा एन ज़ान्नेरी केरनेरे लेइ कि तैना तैस पुड कुन इलज़ाम लातन, मीं तै तैन केरि महासभा मां पैश कियो। 29 ते पतो लगो, कि तैन केरो इलज़ाम तैन केरे कानूनेरे मुताबिक एसेरे खलाफ कोई एरो इलज़ाम नई, कि ज़ेसेरे ज़िरिये सेइं असां तैस कैद केरम या मौतरी सज्जा देइ सख्म। 30 मीं पतो लग्गोरोए कि एसेरे खलाफ कोई साज़िश भोइ राहोरीए, ते मीं ए जल्दी तीं कांजो भेज़ोरोए, ते मीं तैस पुड दाओ केरनेबालन भी ज़ोर्णए, कि तैना भी तीं कां अपनो मुकदमो पैश केरन।” 31 सिपाही, फौजी पलटनरे सरदारेरे हुक्मेरे मुताबिक पौलुसे एप्पू सेइं साथी नेइतां रातो रात अन्तिपत्रिस नगरे मां पुज़ाव। 32 होरसां दीसां घोड़ सुवारन तैस सेइं साथी अग्री-अग्री गानेरो हुक्म दित्तो, ते तै एप्पू किल्लै मांजो वापस च्चलो जेव। 33 जैखन घोड़ सुवार कैसरिया नगरे मां पुज़े त तैनेई गवनरि कां चिट्ठी देइतां पौलुस तैस कां पैश कियो। 34 गवनरि चिट्ठी पेढतां पुच्छू, “ए कौस इलाकेरो रानेबालोए?” जैखन

तैस पतो लगो कि ए किलिकिया इलाकेरो रानेबालोए। 35 त तैनी ज़ोवं, कि अवं तेरो मुकदमो तैखन शुनेलो, “ज़ैखन तीं पुड़ दोष लाने बाले भी इड़ी हाज़र भोले।” तैखन तैनी हुक्म दित्तो कि पौलुसे हेरोदेसेरे पहेरे मां रख्खा।

24 पंचे दिहैड़ना बाद हनन्याह महायाजके किछु बुजुर्ग ते तिरतुल्लुस नंवेरो वकील साथी कैसरिया नगरे मां पुज़े, ते गवनरे कां पैश भोइतां पौलुसरां खलाफ फरयाद कमाई। 2 ज़ैखन पौलुस पैश कियो त तिरतुल्लुस इलज़ाम लेइतां ज़ोने लाव, “हे महान फेलिक्स, तेरे वजाई सेइं अस बड़े खुशी सेइं रातम, ते तेरे ज़िरिये सेइं इस कौमरी केत्री बुरैई सुधैरी गैतिन। 3 एन अस हर ठैरी हर किसमे सेइं मन्तम। 4 पन हुनी अवं तेरो जादे वक्त नेनो न चैई, अवं तेरी मिनत केरताई कि इश्शी अक दूई गल शुन। 5 असेई लाहेरुए कि ई मैन्हु बड़ो फसाद केरनेबालोए, ई दुनियारे सारे यहूदन मां फितनाबाज़े, ते नासरी कुपथेरो प्रधान आए। 6 एनी त मन्दरे भी अशुद्ध केरनेरी कोशिश की, ते एल्हेरेलेइ असेई ए ट्लेइतां एस पुड़ अस अपने कानूनेरे मुताबिक मुकदमो चलानो चाते थिये। 7 पन फौजी पलटनरो सरदार लूसियास असन करां ज़बरदस्ती नेही जेव। 8 ते इस पुड़ दोष लाने बाले तीं कां हाज़र भोनेरो हुक्म दे। इन सेब्बी गल्लां केरे बारे मां अस एस पुड़ दोष लातम, तू एप्पू सच ज़ान।” 9 यहूदी लोकेई भी तैस सेइं साथी भोइतां ज़ोवं, कि एना गल्लां केन्चां भोइ सेकतिन। 10 ज़ैखन गवनरे पौलुसे बियांन देनेरे लेइ इशारो कियो, त पौलुसे जुवाब दित्तो, “अवं ज़ानताई कि तू केही सालां केरो देंतो इस कौमरो इन्साफ केरनेबालो आस, एल्हेरेलेइ अवं अपनि सफाई तीं कां पैश केरताई। 11 तू एप्पू पतो केरि सखत्स कि अवं 12 दिहड़े पेइले यरूशलेम नगरेरे मन्दरे मां आराधना केरनेरे लेइ जोरो थियो। 12 मेरे मुदेइयेइं अवं मन्दरे मां केन्ची सेइं भी बेंस केरतो नई लाहोरो, ते प्रार्थना घरे मां ते नगर मां इरां उरां लड़ाई केरतो भी नई लाहोरो। 13 हुनी एना इलज़ाम ज़ैना मीं पुड़ लाने लोरेन, ते तेरे सामने साबत न केरि सखे। 14 हाँ अवं इकरार ज़रुर केरताई कि ज़ैस पंथे एना कुपंथ ज़ोतन, अवं तैसेरे मुताबिक अपने दादे-पड़दादां केरे परमेश्वरी आराधना केरताई, ते ज़ैन किछु मूसरे कानूने ते नेबी केरि किताबी मां लिखोरुए, तैन सेब्बन पुड़ मेरो विश्वास आए। 15 अवं परमेश्वरे पुड़ तैए भरोसो रखताई, ज़ै तैना रखतन कि धर्मी लोकन ते

पापी लोकन परमेश्वर मुड़दन मरां ज़ींतो केरेलो। 16 ते एल्हेरेलेइ मेरो ज़मीर
 परमेश्वरे कां भी ते इन्साने कां भी बेइलज़ाम राए। 17 केही सालां केरे बाद
 अवं अपने गरीब लोकन दान पुज़ाने, ते च़ढ़तल च़ाढ़ने ओरो थियो। 18 तैखन
 एनेई अवं मन्दरे मां लाव, त अवं शुद्ध भोनेरी रीत पूरी केरने लोरो थियो, बगैर
 लोक अकोटु केरतां ते बगैर कोन्ची हंगामे इन कम केरतो लाव। पन तैना
 आसिया इलाकेरे किछ यहूदी थी, ते तैन जाईज थियू। 19 अगर मीं किछ
 गलत कियोरु भोथू त तैनेई इडी तेरे सामने मीं पुड दोष लोरो लोडतो थियो,
 किजोकि तैनेई एप्पू लावरुए कि मीं मन्दरे मां कुन कियू। 20 इना लोक ज़ैना
 इडी ओरेन, एना ज़ोन कि जैखन अवं महासभा मां पैश भोरो थियो, त एनेई
 मीं मां कुन कसूर लाहोरो थियो? 21 सुवाए इस गल्लरे कि जै मीं बड़े ज़ोरे
 सेइं आवाज देइतां ज़ोरी थी, कि अवं ई विश्वास केरताई परमेश्वरे मुड़दन ज़ींते
 केरते, एल्हेरेलेइ मीं पुड मुकदमो च़लाने लगोरेन।” 22 फेलिक्स जै इस पंथेरे
 बारे मां ठीक-ठीक ज्ञानतो थियो, एन ज़ोइतां मुकदमो बंद कियो, “जैखन
 फौजी पलटनरो सरदारे लूसियास इडी एज्जेलो त अवं तुश्शे सामने इस
 मुकदमेरो फैसलो केरेलो।” 23 तैनी सूबेदारे हुक्म दितो, कि पौलुसे पेरहे मां
 रख्खा, ते तैसेरे दोस्तन मरां केन्ची भी तैसेरी सेवा केरनेरे लेइ न रोकथ। 24
 केही दिहैडना बाद गवर्नर फेलिक्स अपनि कुआन्श द्रुसिल्ला जै यहूदी थी,
 तै तैस सेइं साथी कैसरिया मां अव, तैनी पौलुसे जो समाद भेजो ते यीशु
 मसीह पुड विश्वास केरनेरे बारे मां गल्लां शुनाए। 25 जैखन पौलुस एन ज़ोवं,
 कि परमेश्वरी नज़री मां कुन रोड़ए ते अपने इच्छा कैबू केरनेरे बारे मां ते
 एजनेबाले परमेश्वरे इन्साफेरे बारे मां भी ज़ोवं, त फेलिक्स डेरि जेव, ते ज़ोने
 लगो, “हुनी तू गा, अगर फुर्सत मैलेली त अवं तीं फिरी तीं कुजेइलो।” 26
 तैस पौलुसे करां किछ मैलनेरी उमीद थी, एल्हेरेलेइ तै तैस बार-बार कुजातो
 थियो, ते तैस सेइं गल्लां केरतो थियो। 27 पूरे दूर्द सालना बाद पुरकियुस
 फेस्तुस, फेलिक्सेरे ठैरी गवर्नर बनो, ते फेलिक्से यहूदी खुश केरनेरे लेइ
 पौलुस कैदखाने मां रख्खो।

25 फेस्तुस तैस इलाके मां पुज़तां ट्लेइ दिहैडना बाद कैसरिया नगरेरां
 यरुशलेम नगरे मांजो जेव। 2 जैडी प्रधान याजकेई ते यहूदी लीडर तैस कां
 एइतां पौलुसेरे खलाफ दोष लाने लगो। 3 तैना तैस कां मिनत केरने लगे, कि

लूशी पौलुसे यरुशलेम नगरे मां हाजर भोनेरो हुक्म दे, द्रासले मां तैनेईं तैस
 बत्तां मारनेरी साज़िश कियोरी थी। 4 फेस्तुसे जुवाब दित्तो, “पौलुस कैसरिया
 नगरे मां कैदे, ते अवं भी तैड़ी लूशी गाने बालोई।” 5 फिरी ज़ोवं कि तुसन
 मरां किछ खास अधिकार रखनेबाले मीं सेइं साथी चलन, “अगर सज्जे तैनी
 कोई गलत कम कियेरु भोए त तैस पुड़ दोष लान।” 6 ते फेस्तुस अठ दश
 दिहाड़े यरुशलेम नगरे मां राव, ते फिरी कैसरिया नगरे जो चलो जेव, तैड़ी
 तै दुइयोवं दिहाड़े आदालतरी तखते पुड़ बिश्शो, ते हुक्म दित्तो कि पौलुसे
 हाजर केरा। 7 ज़ैखन पौलुस हाजर भोव, त यरुशलेम नगरेरे यहूदी लीडरेई
 तैस चुफुरतां धेरो देइतां बड़े झूठे इलज़ाम लाने शुरु किये। पन कोई पक्कू
 सबूत न मैल्लू। 8 पौलुसे अपनि सफाई देंते बार यहूदी केरे झूठे इलज़ामा
 केरे लेड़ इन्कार कियो, ते ज़ोवं, “मीं त यहूदी केरे कानूनेरे खलाफ कोई
 कसूर नई कियोरो, ते न मन्दरेरे खलाफ ते न महाराजेरे खलाफ कोई कसूर
 कियोरोए।” 9 पन फेस्तुस एप्पू यहूदी लीडरन खुश केरनेरे लेड़ पौलुसे
 पुच्छू, “तीं यरुशलेम नगरे जो गानू मन्जुरे, ताके अवं एस मुकदमेरो फैसलो
 तैड़ी केरि?” 10 पौलुसे ज़ोवं, “अवं इड़ी महाराजेरे इन्साफेरे तखतेरे सामने
 खड़ो आई, ते मेरे मुकदमेरो फैसलो इस्से ठैरी भोरो लोड़ते, ज़ैड़ी रोमी मैनेरो
 इन्साफ भोरो लोड़े, तू एप्पू भी रोड़ेचारे ज्ञानतस कि मीं यहूदी केरो कोई
 कसूर नई कियोरो। 11 अगर अवं कुसुरवार आई त मौतरी सज़ारे काबल
 आई त मेरो मरनेरो इन्कार नई, पन अगर जैना झूठे इलज़ाम यहूदी मीं पुड़
 लाने लगोरेन ते अगर तैना झूठेन त केन्ची हक नई कि मीं तैन केरे हवाले
 केरे। ते अवं इड़ी महाराजे कां बिनती केरताई, कि मेरो इन्साफ इड़ी कियो
 गाए।” 12 तैखन फेस्तुस सल्लाकारन करां मुशोरो केरतां जुवाब दित्तो, “तीं
 महाराजे कां बिनती कियोरीए त तू महाराजे कां गालो।” 13 किछ दिहैड़ना
 बाद अग्रिष्णा राजो ते तैसेरी निकड़ी बेइन बिरनीके कैसरिया नगरे मां एइतां
 फेस्तुसे सेइं मुलाकात की। 14 तैन केरे बड़े दिहाड़े तैड़ी रानेरे बाद फेस्तुसे
 पौलुसेरे बारे मां राजे ज़ोवं, “अक मैन्हु आए, जै फेलिक्से कैद कियोरोए। 15
 ज़ैखन अवं यरुशलेम नगरे मां थियो, त प्रधान याजक ते यहूदी बुजुर्ग तैस पुड़
 दोष लगे लाने, कि एस सज़ा दित्ती गाए। 16 पन मीं तैन ज़ोरु थियूं, कि रोमी
 केरे दस्तूरेरे मुताबिक कोई मैन्हु सज़ा देनेरे लेड़ हवाले न कियो गाए, जांतगर

तैस अपने मुदेइ केरे सामने तैन इलज़ामा केरे बारे मां अपनि सफाई पैश केरनेरो मौको न दित्तो गाए। 17 एलहेरेलेइ ज़ैखन यहूदी लीडर इड़ी आए, त मीं ठढ न लाई, पन होरसां इन्साफेरे तखते पुड़ बिश्तां हुक्म दित्तो, कि पौलुस आदालती मां आनो गाए। 18 ज़ैखन तैसेरे मुदेइ अपनो दाओ पैश केरनेरे लेइ खड़े भोए त, तैनई कोई एरो इलज़ाम तैस पुड़ न लाव, ज़ेसेरी बारे मां अवं समझातो थियो। 19 पन अपने फिरकेरे बल्के तैन केरि लड़ाई तैन केरे अपने धर्मेर केन्ची यीशु नव्वेरे मैनेरे बारे मां थी। तै मेरि जेवरोए, पन पौलुस तैस जो ज़ींतो ज़ोते। 20 अवं बेड़ि उलझनी मां राहोरोइं कि केन्चरे एन गल्लां केरो पतो केरि, एलहेरेलेइ मीं पौलुसे पुच्छू, कि तीं यरुशलेम नगरे मां गानू मन्जुरे, ताके एन गल्लां केरो फैसलो तैड़ी भोए? 21 पन पौलुसे बिनती कमाई कि इस मुकदमेरो फैसलो महाराजे कां लोड़ते भोरो, एलहेरेलेइ मीं हुक्म दित्तो कि तै महाराजे कां गाने तगर इड़ी पाबंद राए।” 22 अग्रिप्पा राजे फेस्तुसे सेइं ज़ोवं, “अवं भी एस मैनेरी गल्लां शुननी चाताई।” तैनी जुवाब दित्तो, “तू तैसेरी गल्लां कालां शुनी सखत्स।” 23 होरसां अग्रिप्पा राजो ते कने बिरनीके बेड़ि शांनी सेइं आए, ते फौजी पलटनरे सरदारेइं ते नगरेरे खास लोक सभा मां दाखल भोए, फेस्तुसे हुक्म दित्तो कि पौलुसे हाज़र केरा। 24 फिरी फेस्तुस ज़ोवं, “हे अग्रिप्पा राजा ते बाकी लोकव तुस इस मैन्हु हेरतथ एसेरे खलाफ सैरी यहूदी कौमां मीं कां यरुशलेम नगरे मां भी ते इड़ी भी चिन्डां मैरतां दरखुवास कियोरी थी, कि ए मैन्हु ज़ींतो रखनो ठीक नई। 25 पन मीं पतो लगो कि एनी कोई एरु गलत कम नई कियेरु, कि ए कल्ल कियो गाए, एलहेरेलेइ एनी इड़ी बिनती कियोरीए, त अवं ठीक समझातां कि एस रोम नगरे मां भेज़ी। 26 पन मीं तैसेरे बारे मां कोई ठीक गल न मैल्ली, कि महाराजे जो लिखी, एलहेरेलेइ मीं तै तुश्शे सामने ते खास केरतां अग्रिप्पा राजा, तेरे सामने पैश कियोरोए, ताके पुछ गन केरनेरे बाद अगर कोई खास गल भोए त अवं लिखी। 27 किजोकि केन्ची कैदी भेज़ते बार तैसेरे इलज़ाम अगर अवं केन्ची न शुनेइ त मेरी लेइ ठीक नई।”

26 अग्रिप्पा राजे पौलुसे जो ज़ोवं, “तीं अपने बारे मां ज़ोनेरी अज़ाज़ते।” तैखन पौलुस अपनो हथ्ये सेइं इशारो केरतां अपनि सफाई पैश केरने लगो।
2 “हे अग्रिप्पा राजा, अवं अपनो आप खुश किस्मत समझाताई, कि तेरे

सामने खड़ो भोइतां यहूदी लोकां केरे प्रधानां केरे इलज़ामा केरे खलाफ
 अपनि सफ्टाई पैश केरने लगोरोइं। 3 खास केरतां तू सारे यहूदी केरि रीति
 रुवज़ेरे बारे मां ज्ञानतस, ते एल्हेरेलेइ अवं तीं कां मिनत केरताईं, कि तू
 सबरी सेइं मेरी गल शुन। 4 यहूदी मीं रोड़ेच्चारे ज्ञानतन कि पेइले अवं अपने
 लोकन मां ते यस्तलेम नगरे मां ते मेरी जवेनरो चालचलन केरहो थियो। 5
 तैना पेइले देंते मीं ज्ञानतन ते अगर चान त मेरे हके मां गवाही देइ सकतन,
 कि अवं अपने पंथेरे मुताबिक फरीसी भोइतां अपने धर्मेरे सञ्चे पंथे सेइं
 ज़िन्दगी गुज़रतो ओरोई। 6 परमेशरे इश्शे दादे-पड़दादन सेइं अक वादो
 कियोरो थियो, मीं उमीदे कि तै पूरो भोलो, तैस उमीदारी वजाई सेइं मीं
 पुड़ मुकदमो चलेवरोए। 7 एस वादेरे पूरे भोनेरी उमीद इश्शे 12 केरे 12
 गोत्रने, एल्हेरेलेइ तैना दिले सेइं रात दिहाड़ी परमेशरेरी सेवा केरते रातन। 8 जां
 कि परमेशर मुड़दन फिरी ज़ींते केरते, तुस इस गल्ली पुड़ विश्वास कि न
 केरथ? 9 “पेइले अवं भी समझातो थियो, कि यीशु नैसरेरे नव्वेरी हर तरीके
 मुखालफत केरनि मेरो फरज़े। 10 एल्हेरेलेइ अवं यस्तलेम नगरे मां एन्ने
 केरतो राव, मीं प्रधान याजकन करां अज़ाज़त एन्तां बड़े परमेशरेरे सेवक कैद
 केरतां छड़े, ते ज़ैखन तैना मारे गाते थिये, त अवं भी तैड़ी खलाफत केरतो
 थियो। 11 अवं प्रार्थना घरन मां गातो थियो, ते तैन केरि तुहीन केरतो थियो।
 ते लोकन यीशुएरे खलाफ तुहीन केरनेरे लेइ मजबूर केरतो थियो। ते मसीही
 लोकां केरि मुखालफत केरने सेइं मीं एत्री खुशी भोती थी, कि अवं दूर-दूर
 नगरन मां गेइतां तैन सतातो थियो।” 12 “एककी बार प्रधान याजकन करां
 अधिकार एन्तां एस्से कम्मेरे लेइ दमिश्क नगरेरे सफर केरने लगगोरो थियो।
 13 त हे राजा अवं हेजू बत्तां थियो, त मीं दुपहरां केरे मौके अम्बररां अक लौ
 एंडीती लाई, जै दिहाड़ेरी लौई करां भी जादे थी, ते तै इश्शे चेव्रे पासन चमकने
 लगी। 14 असां सब ज़मीनी पुड़ बिछूड़ी जे, ते मीं अक आवाज़ शुनी, जै
 मीं सेइं इब्रानी भाषाई मां एन ज़ोने लगगोरी थी। कि हे शाऊल हे शाऊल
 तू मीं किजो स्तातस? मीं सेइं लड़ाई केरनि तेरे लेइ बेकारे। 15 “त मीं
 जुवाब दित्तो, हे प्रभु तू कौन आस, त प्रभुए मीं जुवाब दित्तो अवं यीशु आई
 जैस तू स्तातस? 16 पन उठ ते अपने पवन पुड़ खड़ो भो, किजोकि मीं तीं

एल्हेरेलेह दर्शन दित्तोरुप, कि तीं अवं अपनो सेवक बनेहं, ते ज़ैन किछ तीं
लाहेरुए तू तैसेरो गवाह बनस। 17 अवं तीं तेरे लोकन करां ते गैर कौमन करां
बन्नांतो रेइलो अवं तीं तैन मां भेज्जताई। 18 ताके तू तैन केरि एछळी खोल्लस
ते तैन आंधरे मरां लौई मां आनस ते कने शैताने करां छुटेइतां परमेशरेरे पासे
आनस, ताके तैना मीं पुड़ विश्वास केरन ते परमेशर तैन केरे पाप माफ केरे,
ते तैन लोकन मां शामिल भोन ज़ैना पवित्र कियोरेन, तैना विरासत हासिल
केरन।” 19 ते एल्हेरेलेह, “हे अग्रिष्णा राजा मीं एस स्वगेरे दर्शनिरो इन्कार
नई कमेवरो। 20 ते पेइले मीं दमिश्क नगरेरे लोकन मां ते फिरी यरुशलेम
नगरेरे ते सारे यहूदिया इलाकेरे रानेबालो ते गैर कौमन भी प्रचार केरतो
कियो। कि पापन करां मनफिराथ, ते परमेशरेरे पासे फिरा ते अपने स्भावे
सेहं साबत केरा कि तुसेई पापन करां मन फिरावरोए। 21 एन्ने गल्लां केरे
लेह यहूदेई अवं मन्दरे मां ट्लातो ते मारनेरी कोशिश की। 22 “पन अवं
परमेशरेरी किपर्दी सेहं अज़ तगर ज़ींतोई, ते सेब्भी निक्के बहुन कां अवं
गवाही देताई, कि ज़ैना गल्लां अवं ज़ोताई कि ज़ैना नेबई ज़ोरी थी, ते मूसा
नेबे भी ज़ोरी थी। 23 कि मसीह बड़ो दुख भोगेलो, ते सेब्भन करां पेइलो
मुड़दन मरां ज़ींतो भोइतां यहूदी कौमी त गैर कौमां केरे लोकन ब़ालो ज़ै
लौअरो ज़ेरो आए।” 24 ज़ैखन पौलुस एन ज़ोने लग्गोरो थियो, त फेस्तुस
ज़ोरे सेहं ज़ोवं, “तू पागल भोइ जेर। जादे ज्ञाने सेहं तू पागल भोइजेरोस।”
25 पौलुसे जुवाब दित्तो, “जनाब फेस्तुस साहब अवं पागल नई भोरो, अवं
ज़ैन किछ ज़ोने लग्गोरोइ तैन सच्चे ते ज्ञाने सेहं आए। 26 राजो भी ज़ेसेरे
सामने अवं निडर भोइतां एन गल्लां जानते, ते मीं याकीने कि एन मरां कोई
भी गल तैस करां छ़ोपोरी नई, किजोकि ए चमत्कार कोई एरो नई भोरो।
27 हे अग्रिष्णा राजा कुन तू नेबी केरो, अवं जानताई कि तू मनतस?” 28
अग्रिष्णा राजे पौलुसे सेहं ज़ोवं, “कुन तू थोड़ी ज़ेरि गल्लेई सेहं मीं तू मसीही
बनानो चातस?” 29 पौलुसे जुवाब दित्तो, चाए थोड़ी ज़ेरि या जादे गल्लेई
सेहं, “पन अवं त परमेशरे कां प्रार्थना केरताई कि, न सिर्फ तू बल्के ज़ेत्रे भी
अज मेरी गल्लां शुनी रावरेन सब मेरे ज़ेरे मसीही भोन, पन इन शंगलां केरे
बगैर।” 30 तैखन अग्रिष्णा राजो ते गवर्नर ते बिरनीके ते तैस सेहं साथी होरे
भी खड़े भोए ते चले जे। 31 ते बेड्र निस्तां एककी होरि सेहं ज़ोने लगे, “कि

ए मैन्हु कोई एरु कम त नई लोरो केरने, कि एस मौतरी सज्जा दित्ती गाए, या कैदखाने मां रख्खो गाए। 32 अग्रिप्पा राजे फेस्तुस सेइं ज़ोवं, अगर एनी मैने महाराजे कां फरयाद न भोथी कियोरी त ए छुटी सकतो थियो।”

27 ज़ैखन फिस्तुस हाकिमेरे ज़िरिये ए बिस्तार बनों कि असां लोक ज़िहाजे मां इतालिया जो गाम, त पौलुस त होरे कैदी यूलियुस नंवे औगुस्तुस फौजी पलटनरे सरदारेरे एककी सूबेदारेरे सुपुर्द किये। 2 असां अद्रमुत्तियुम नगरेरां एककी समुन्द्री ज़िहाजे मां चेढ़तां आसिया इलाकेरे नेड़ेरे ठैरी गानेबाले थिये, त अरिस्तर्खुस नंवे थिस्सलुनीके नगरेरो अक मकिदुनी असन सेइं साथी थियो। 3 होरसां ज़ैखन ज़िहाज़ सैदा मां रुकी जेवं, त यूलियुसे पौलुसे पुड़ महरबानी केरतां तैस अपने दोस्तन सेइं मुलाकात केरनेरी अज़ाज़त दित्ती, ताके तैसेरे ज़िरिये सेइं पतो लगो। 4 तैटुं फिरी असां ज़िहाज़े मां चेढ़तां चले जे, ते साइप्रसेरे आड़ी मांमेइं निस्से, किजोकि हवा बड़ी ज़बरदस्त थी। 5 फिरी किलिकिया नगरे ते पंफूलिया नगरेरे नेड़े समुन्द्री बत्तां निस्तां अग्रोव चले जे, त लूसिया इलाकेरे मूरा नगर मां ओस्से। 6 तैड़ी सूबेदारे सिकन्दरिया नगरेरु अक ज़िहाज़ इतालिया इलाके जो चलेरु मैल्लू, तैनी असां तैस मां चाढे। 7 असां बड़े दिहाड़न तगर बल्हे-बल्हे अग्रोवं चलते राए, ते कनिदुस नगरेरे सामने पुजे। पन तेज़ हवा चलने सेइं असन अग्रोवं गानेरी मुशकिल भोइजेइ, ते एल्हेरेलेइ असां सलमोनेरे सामने निस्तां क्रेतेरी आड़ी मां निस्से। 8 ते बेड़ि मुशकली सेइं समुद्रेरे बन्ने-बन्ने अग्रोवं चलते शुभलांगरबारी नंवेरी एककी ठैरी पुजे, जैटुं लसया नगर नेडू थियूं। 9 तैड़ी असन केही दिहाड़े बीते, पैनेरे सफरे मां मुशकिल एल्हेरेलेइ भोती थी, कि छुटकारेरी दिहाड़ी तिहारेरे बरतेरे दिहाड़ो बीतेरे थी, ते पौलुसे तैन एन ज़ोइतां खबरदारी दित्ती, 10 “जनाब मीं एरु लगते कि इश्शू सफर बड़ू खतरनाक भोलू, कि न सिर्फ इश्शो माल सबाब ते ज़िहाजे बल्के इश्शी जानी भी खतरोए।” 11 पन सूबेदारे कपताने ते ज़िहाजेरे मालिकेरी गल पौलुसेरी गल करां जादे मन्नी। 12 किजोकि तै बंदरगह ठंढारो मौसम कटनेरे लेइ रोड़ी न थी, एल्हेरेलेइ इश्शो फैसलो ए थियो, कि असां केन्वी तरीके अग्रोवं निस्सम ते असन उमीद थी, कि फिनिक्स मां पुज़तां हीवतड़ेरो मौसम तैड़ी गुज़ैरी गामेले। ए क्रेते अक बंदरगह थी, जैसेरां दारां क्षिण-पश्चिम ते उत्तर-पश्चिम पासे खुलतां थियां। 13

जैखन दक्षिणी पासेरां हवा चलने लगी, त तैनेई सोचू कि तैन केरि मर्जी पूरी केरनेरे लेइ रोड़ो वर्के, ते तैनेई ज़िहाज़ेरु लैंगर तैटुं खदू कियूं, ते समुन्दरेरे बन्ने अग्रोवं चलते जे। 14 पन लूशी अक बड़ी तूफानी हवा चली जैस जो यूरकुलीन ज़ोतन। 15 जैखन तैने ज़िहाज़ अपने पलैटै मां कियूं, ते ज़िहाज़ ढलैक्कां खाने लगू, ते असेई ज़िहाज़ हावावे बहावे पुड़ छदू। 16 तैखन कौदा नंवेरो अक निकड़ो टैपू अव, त असेई भी रुड़ते-रुड़ते तै डुंगी जै ज़िहाज़ेरे पत्तोरां बंधोरी थी, त बेड़ि मुशकली सेइं कैबू मां की। 17 ते ज़िहाज़ेरे टोलरे मैनेई तै उब्री चेढ़तां ज़िहाज़ ट्लुटने करां बचानेरे लेइ रेसेइं सेइं बेंधतां छदू। किजोकि तैन डर थियो, कि एरु न भोए, कि ज़िहाज़ सुरतिसेरे रेती मां डुबी गाए, एल्हेरेलेइ तैनेई भारी सामान ओसालू ते ज़िहाज़े मां रुड़ते-रुड़ते चले जे। 18 जैखन तूफानी हवाई सेइं ज़िहाज़ जादे ढलैक्कां खाने लगू, त होरसां असेई ज़िहाज़ेरो माल समुन्द्रे मांजो शारनो शुरु कियो, 19 ट्लेइयोवं दिहाड़े तैनेई ज़िहाज़ेरु सामान भी समुन्द्रे मांजो शैरी छदू। 20 त काई दिहाड़े न असेई दिहाड़ो लाव ते न तारे ते तूफान भी मन्ना जादे ज़ोर केरने लगोरो थियो, ते असन बचनेरी हुनी कोई उमीद न राई। 21 रोटी खाने काई दिहाड़े भोरे थिये, एल्हेरेलेइ पौलुसे तैन मां खड़े भोइतां ज़ोवं, “ढलाव अगर तुसेई मेरु ज़ोनू मन्नोरु भोथू, ते क्रेते मरां अग्रोवं न ओरे भोथे, त ई नुकसान ते ई तकलीफ किजो भोनी थी? 22 “पन अवं तुसन कां मिनत केरताई कि, हिम्मत न हारा तुसन मरां कोई भी न मरेलो, चाए ज़िहाज़ डुबी किना गाए। 23 किजोकि जैस परमेशरेरी अवं आराधना केरताई, तैसेरो स्वर्गदूत हीज राती मीं कां ओरो थियो। 24 ते तै ज़ोने लगो, हे पौलुस डर नन्ना तू महाराजे कां ज़रुर पैश भोलो ते परमेशर तेरी वजाई सेइं एन सेब्भी केरि जान बचालो, जैना ज़िहाजे मां तीं सेइं साथी आन। 25 एल्हेरेलेइ हे जनाब तुस हिम्मत रखा कि मेरे परमेशरे जैन किछ मीं सेइं ज़ोरुए तैने भोलू। 26 असां ज़रुर केन्ची टेपू पुड़ पुज़ी गामेले।” 27 चेवधोवं राती जैखन असां अदिया समुन्द्रे मां इरां उरां फिरते थिये, त ज़िहाजे बाले मैनेई अंदाज़ो लाव कि असां बन्नेरे नेड़े पुज़ी जोरेम। 28 तैनेई पानी रेसी सेइं नापू त 37 मीटर निससू ते थोड़े अगर गेडतां नापू त 27 मीटर निससू। 29 एस डरे सेइं कि कोस्कोई शफ़ड़ी सेइं न बज्म, ते तैनेई ज़िहाज़ेरे पैतरीं पासे चेव्रे लैंगां समुन्द्रे मां छडां ते झेझेरे लौअरे लेइ

प्रार्थना केरने लगे। 30 ज़िहाज़ चलानेबाले मुझाटेरां बेइरोवं निसनेरे लेइ डोंगी उन्ढी ओसाली। पन तैना ज़िहाज़ेरे एग्री पासेरां लैंग्र पैनी मां छँडनू चाते थिये। 31 तैखन पौलुसे सूबेदारे ते सिपेहिन सेइं ज़ोवं, “अगर इना लोक ज़िहाज़े मां न भोले त तुश्शू लोकां केरु बच्चनू मुशकले।” 32 एल्हेरेलेइ सिपैहीयेइ डूंगारी रेस्सी केटां समुन्द्रे मांजो शैरी दित्ती। 33 झेझा भोने करां पेइले पौलुसे सेब्बन कां मिनत कमाई, कि तुस किछ रोट्टी खाथ। तैनी ज़ोवं, “तुस चेवधे दिहैड़ी केरे देंते बंचनेरे खियाले मां पेवरेथ, ते तुस रोट्टी सेइं हुरोरे भी नई। 34 अवं तुसन कां मिनत केरताई कि तुस रोट्टी खाथ, किजोकि तुश्शे लेइ रोडू एन्ने कि याकीन केरा कि तुश्शो बाल बिंगो न भोलो।” 35 ज़ैखन तैनी एन ज़ोवं, त तैनी रोट्टी ट्लाई ते सेब्बी केरे सामने परमेशरेऱ शुक्र केरतां ट्लोड़ी ते खाने लगो। 36 तैस करां लेइतां होरन भी हिम्मत आई, ते तैना भी रोट्टी खाने लगे। 37 असां सब मिलतां कोई 276 मैनु थिये, ज़ैना इस ज़िहाज़े मां सुवार थिये। 38 ज़ैखन तैनेई रेज़तां रोट्टी खाइ त तैनेई सारे गेहुं समुन्द्रे मांजो शारने शुरु किये, ताके ज़िहाज़ पोल्लु भोए। 39 ज़ैखन दिहाड़ी निस्सो त तैनेई तै ठार न पिशानी, पन अक ठार लाई ते तै पासो साफ थियो, तैनेई बिस्तार कमाव कि अगर भोइसखे त असां ज़िहाज़ एस पुड़ चाढ़म। 40 बस्सा लैंगर खोलतां समुन्द्रे मां छैड़ी दित्तू, ते पत्रवारां केरि रेसी भी ढिल्ली छैड़ी, एग्रीयों बादबान भी बा चैड़ी छँड्हो, ते एप्पू बन्नेरे पासे जो चळे। 41 पन ज़िहाज़ खुशकी पुड़ गेइतां रेती पुड़ टिकी जेवं, ते ज़िहाज़ेरो एग्रीयों पासो रेती मां डुबी जेवं ते पैत्रीयों पासो छेल्लेई सेइं बज़कने लगो। 42 सिपेही केरि सल्लाह थी कि कैदन मारम ताके तैन मरां कोई तारी देइतां नेशी न गान। 43 पन सूबेदारे पौलुसेरी जान बङ्घानेरे लेइ एन न दित्तू केरने, ते हुक्म दित्तो कि ज़ै तारी ज़ानते त तै पेइलो छाल मारे, ते खुशकी पुड़ पुज़तां अपनि जान बचाए। 44 ते बाकी होरे लेकड़ेरे तखतन पुड़ ते ज़िहाज़ेरी होरि चीज़ां केरि मद्दती सेइं अपनि जान बचाथ, ते बस्सा सब एस तरीके सेइं खुशकी पुड़ ठीक ठाक पुज़ी जे।

28 ज़ैखन असां ठीक ठाक बन्ने पुड़ पुज़े, त असन पतो चळो कि इस टैपू जो माल्टा ज़ोतन। 2 तैट्हेरे राने बालेई असन सेइं बड़ो रोड़ो बर्ताव कियो, झाड़ी लग्गोरी थी, ते ठंड भी बड़ी थी, तैनेई अग बाली ते इश्शी बड़ी आदर कमाई। 3 पौलुसे कैडु केरो अक लेगु बनावं, ते ज़ैखन तै तैना कैडु अग्गी मां

छँडने लगो त अगारे सेके सेइं तैन कैडन मरां अक सप निस्सो, ते पौलुसेरे
 हथ्ये सेइं पलेटोव। 4 ज़ैखन तैन लोकेईं सप पौलुसेरे हथ्ये सेइं पलेटोरो लव,
 त एप्पू मांमेईं ज़ोने लगे, “ए मैन्हु झरूर कोई खूनी आए, ए समन्द्रे मां गर्क
 भोने करां त बङ्गोरोए, पन इन्साफे ए ज़ीतो न राने न दित्तो।” 5 पन तैनी तैस
 सप्ये अगी मांजो घिल देइतां टलटौ, ते तैस किछ नुकसान न भोव। 6 तैना
 लोक बलगने लग्गोरो थिये, कि एसेरी सारी जान एफरी गानीए ते ए मेरि
 गानोए, ते बडे चिरे तगर बलगनेरे बाद पौलुसे किछ न भोवं, त तैना लोक
 सोचने लगे, “ए झरूर कोई देबतोए।” 7 तैस ठैरारे आसे-पासेरे टैपेरी प्रधान
 पुबलियुसेरी ज़मीन थी, तैनी असां अपने घरे ने ते ट्लाई दिहाडे इश्शी आदर
 खातर की। 8 पुबलियुसेरे बाजी भुखार ते पैचसी सेइं बड़ो बिमार भोरो
 थियो, ते पौलुसे तैस कां गेइतां तैसेरेलेइ प्रार्थना की, ते तैस पुड़ हथ रेखतां तै
 बङ्गाव। 9 फिरी तैस टैपेरे बाकी बिमार लोक आए ते तैना ठीक भोइ जे। 10
 तैन लोकेईं इश्शी बडी इज्जत की, ते असां तैटुं अग्रोवं गानेरे लेइ तियार
 भोए, त तैनेईं इश्शी जुरुरतरी सैरी चीज़ां ज़िहाजे मां छैडी दित्ती। 11 इश्शू
 ज़िहाज़ बिगडनेरे ट्लेइ महिना बाद असां सिकन्दरियारे एककी ज़िहाजे मां
 चळे जे, ज़ैन ठंड मुकने तगर तैस टैपू मां रुकेरु थियूं, तैस मां यूनैनी केरि दूई
 अकोट्टी देबतेरी मूरतां बनोरी थी। 12 पेहले असां सुरक्सा नगरे मां पुज़े, ते
 ट्लाई दिहाडे तैड़ी राए। 13 तैटुं असां चळते-चळते रेगियुम नगरे मां पुज़े, ते
 होरसां दक्षिणी हवा चळने लगी ते असां होरसां पुतियुली नगरे मां पुज़े। 14
 तैड़ी असन किछ ढ़ला भी मैल्ले, तैनेईं असां कुजाए ते असां तैड़ी सत दिहाडे
 राए, ते तैसेरां बाद असां रोमे मां पुज़े। 15 तैट्टेरे मसीही ढ़लान पतो लगो, कि
 असां ओरेम त तैना असन अगराने अपियुसेरे चौके ते ट्लेइ धर्मशालन तगर
 आए, पौलुसे तैना लेइतां परमेशरेरु शुक्र कियूं ते तैस बड़ी हिम्मत भोइ।
 16 ज़ैखन अस रोम नगरे मां पुज़े ते पौलुसे अज़ाज़त मैल्ली, कि तै एककी
 पैरहेदारी निगरेनी मां ज़ैड़ी चाए गेइ सकते। 17 ज़ैखन ट्लाई दिहाडे बीते
 त पौलुसे यहूदी केरे प्रधान कुजाए, ते ज़ैखन तैना अकोट्टे भोए त पौलुसे
 तैन सेइं ज़ोवं, “द्वलाव मीं अपनि कौमरे ते अपने दादे-पढ़दादां केरि रसमरे
 खलाफ कोई कम नईं कियेरु त फिर भी अवं पाबंद केरतां यरुशलेम नगरे मां
 रोमी सरकारारे हवाले कियो। 18 तैनेईं पुछु गन केरनेरे बाद अवं हथरां छँडनो

थियो। किजोकि मीं कोई एरु कम न थियूं कियेरु कि ज़ैस सेइं मीं मौतरी सज्जा देथे। 19 पन ज़ैखन यहूदई मुखालफत की, त मीं महाराजे कां बिनती की। पन एल्हेरेलेइ नई कि अवं अपनि कौमी पुढ़ कोई इलज़ाम लानो चातो थियो। 20 एल्हेरेलेइ मीं एन रोडु समझू, कि तुसन सेइं मिलतां गल केरि, अवं इस्राएलेरी एककी उमीटी जै मसीह आए शांगलन सेइं बंधोरोइ।” 21 तैनेई तैस सेइं ज़ोवं, “असन यहूदन करां न कोई चिट्ठी मैल्ली ते न तैटुं एजनेबाले इशो लोकेई तेरे बारे मां कोई खबर दित्ती, ते न तेरे खलाफ किछ ज़ोवं। 22 पन असां तेरे बारे मां ज़ाननू चातम, ए त असन पत्तोए, कि लोक सेव्ही ठैरन एस पंथेरे खलाफ गल्लां केरतन।” 23 तैखन यहूदी लोकेई पौलुसेरी गल्लां शुन्नेरे लेइ अक दिहाड़ी ठुवहलाई, ज़ैखन तै दिहाड़ी आई, त लोक पेइले लोकन करां भी जादे अकोटु भोए। पौलुसे तैन परमेशरेरे राज्जेरे बारे मां समझाव, ते साथी यीशुएरे बारे मां मूसेरे कानूने ते नेबी केरे किताबन मरां तैन रोड़ेचारे समझेइतां झेझां करां डलोझी तगर गल्लां शुनातो राव। 24 किछ तैसेरी गल्लां शुन्तां मघन भोइ जे ते मनू ते किछेई विश्वास भी कियो। 25 ज़ैखन तैना एप्प मामेइं अक न भोए, त पौलुसे तैन गाने करां पेइले अक गल ज़ोई, “पवित्र आत्मारे ज़िरिये यशायाह नबी तुश्शे दादे-पड़दादां केरे बारे मां ठीके ज़ोरु थियूं।” 26 एन लोकन कां गा, ते एन ज़ो कि, “तुस शुन्ते त राले, पन समझेले न, ते तकते त राले पन पिशानेले न। 27 किजोकि एन लोकां केरे दिले मोटु भोरेन, ते एना टोने भोरेन, ते एनेई अपनि एछळी निकोल कियोरिन। किजोकि एरु न भोए, कि एना लहन ते कन्न सेइं शुन्न ते दिले सेइं समझन, ते एना मेरे पासे फिरन ते अवं एन शिफ्का देई। 28 “एल्हेरेलेइ अवं चाताई कि तुस ज़ानथ कि परमेशरेरी मुक्ति गैर कौमन कां भी भेज़ोरोए ते तैना तैस शुनेले।” 29 ज़ैखन पौलुसे एन ज़ोवं, त यहूदी एप्प मामेइं बेस केरते तैटुं चले जे। 30 पौलुस पूरे दूर्द सालन तगर क्रैइयेरे मुकाने मां राव, 31 ते ज़ै भी तैस सेइं मिलने एइतो थियो, पौलुस तैस सेइं मिलतो थियो, ते बेधड़क भोइतां परमेशरेरे राज्जेरी खुशखबरी शुनातो थियो, ते प्रभु यीशु मसीहेरे बारे मां शिक्षा देतो राव।

रोमियों

१ अवं पौलुस यीशु मसीहेरो दास आई, ते प्रेरित भोनेरे लेइ परमेश्वरे चुनोरोई,
ते परमेश्वरेरी खुशखबरी प्रचार केरनेरे लेइ ठहरावरो आई। **२** ज़ेसेरी तैने पेइले
अपने नेबी केरे ज़िरिये पवित्रशास्त्रे मां, **३** अपने मट्टे इशो प्रभु यीशुएरे बारे
मां वादो कियोरो थियो, ज़ै जिसमेरे मुताबिक त दाऊदेरे खानदाने मरां पैदा
भोव। **४** ते पवित्र आत्मारे ज़िरिये सेइं मुड़दन मरां ज़ींतो भोनेरे वजाई सेइं तै
शक्ति सेइं परमेश्वरेरू मट्टू भोव। **५** ज़ेसेरे ज़िरिये असन अनुग्रह ते प्रेरिताई
मैल्ली; कि तैसेरे नंवे सेइं सब कौमां केरे लोक विश्वास केरतां तैसेरी मन्न।
६ ज़ैन मरां तुस भी यीशु मसीहेरे भोनेरे लेइ कुजोरेथ। **७** अवं ई चिट्ठी तुश्शे
सेब्बी केरे नंवे लिखताई, ज़ैना तुस रोम नगरे मां रातथ, ते परमेश्वरेरे ढलारेथ,
ते पवित्र भोनेरे लेइ चुनोरेथ। इशो बाजी परमेश्वर ते प्रभु यीशु मसीहेरे तरफां
तुसन शान्ति ते अनुग्रह मैलतो राए। **८** पेइलो अवं तुश्शे सेब्बी केरे लेइ यीशु
मसीहेरे ज़िरिये परमेश्वरेरू शुक्र केरताई, किजोकि तुश्शो विश्वास ज़ै यीशु
मसीह पुड़ आए, तैसेरी चर्चा हर पासे भोने लोरी। **९** परमेश्वर ज़ेसेरी सेवा
अवं अपने पूरे दिले सेइं तैसेरे मट्टेरी खुशखबरी प्रचार केरतां केरताई, तै मेरो
गवाहे; कि अवं तुसन कोस तरीके सेइं लगातर प्रार्थनाई मां याद केरताई। **१०**
ते लगातर अपने प्रार्थनान मां बिनती केरतो राताई, कि केन्घरे हेजू भी तुसन
कां एजनेरे लेइ मेरू सफर परमेश्वरेरे तरफां कामयाब भोए। **११** किजोकि अवं
तुसन सेइं मिलनेरे लेइ कोशिश केरताई, कि अवं तुसन कोई आत्मिक वरदान
देई, ज़ैस सेइं तुस विश्वासे मां मज़बूत भोथ। **१२** मतलब इन, कि अवं तुसन
कां एइतां तुसन सेइं साथी तैस विश्वासेरे ज़िरिये, ज़ै मीं मां ते तुसन माए,
तैसेरे ज़िरिये अस हिम्मत हासिल केरम। **१३** ते ढलाव ते बेइनव, अवं चाताई
तुस ज़ानथ, कि मीं तुसन कां बार-बार एजनू चाव। ज़ेन्घरे मीं गैर कौमरे
लोकन विश्वास केरनेरे लेइ बद्धनेरी मद्दत की, तेन्घरे तुश्शी भी मद्दत केरि, पन
हुना तगर रुकोरो राव। **१४** अवं संस्कारी लोकन ते असंस्कारी लोकन, पढ़ेरे
लोकन या अनपड़ लोकन सेब्बन खुशखबरी शुनेइलो। **१५** ते अवं तुसन भी
ज़ैना रोम नगरे मां रातथ, खुशखबरी शुनानेरे लेइ हर वक्त तियार आई। **१६**
किजोकि अवं यीशु मसीहेरी खुशखबरी प्रचार केरने करां न शरमेई, एल्हेरेलेइ
परमेश्वर अपने शक्ति सेइं तैन लोकन मुक्ति देते, ज़ैना खुशखबरी पुड़ विश्वास

केरतन, पेइले यहूदन फिरी गैर यहूदन। 17 किजोकि खुशखेबरारे जिरिये परमेश्वर असन अपने नज़री मां धर्मी बनाते, ज़ैन शुरू करां आखरी तगर विश्वासे सेइं भोते। ज़ेन्चरे पवित्रशास्त्रे मां लिखोरूए, “ज़ै मैन्हु विश्वासेरे जिरिये सेइं परमेश्वरे सामने धर्मी बनाव गाते तैए ज़ीतो रालो।” 18 परमेश्वरो क्रोध तैन लोकन पुड़ स्वर्गों इइते, ज़ैना बुरां ते दुष्टेरां कम्मां केरतन, ते ज़ैना सच्चे अधर्मे सेइं दबेइतां रखतन। 19 किजोकि परमेश्वरे बारे मां ज्ञान तैन मैन्हु केरे मन्न मां बांटौ, एल्हेरेलेइ कि परमेश्वरे तैन पुड़ बांटू कियोरूए। 20 किजोकि तैसेरे आहेरे गुण, मतलब तैसेरी सदारी शक्ति, ते परमेश्वरो सुभाव दुनियाई बनानेरे वक्तेरे देंतो तैसेरे कम्मन सेइं हेरने मां इइते, इड़ी तगर कि तैन लोकन कां कोई बहानो नई। (ai^os g126) 21 हांलाकि तैनेई परमेश्वर त पिशानो, पन परमेश्वरी तैस काबल बड़याई न की, ते न शुक्र कियूं, पन बेकार सोचने लाए, इड़ी तगर कि तैन केरो बेअक्ल मन आंधरो भोव (मतलब तैना गलत सोचने लगे)। 22 तैना अपने आपे अक्लमन्द सेमझतां बेवकूफ बने। 23 ते न मरने बाले परमेश्वरी महिमा मरने बाले मैन्हु, ते चुड़ोलू ते जानवरां, ते पेटेरे भारे चलने बाले जीपां केरे मूरतन मां बदली। 24 एल्हेरेलेइ परमेश्वरे तैना तैन केरे मनेरे खुवैइशां केरे मुताबिक अशुद्ध भोनेरे लेइ शारे कि, एप्पू मांमेइं अपने जानां केरी अनादर केरन। 25 किजोकि तैनेई परमेश्वरी सच्चाई बेदलतां झूठ बनाई, ते सृष्टारी पूजा ते आराधना केरि, न कि तैस बनाने बालेरी, ज़ै हर वक्त धन ते रोडोए। आमीन। (ai^on g165) 26 एल्हेरेलेइ परमेश्वरे तैना नीच खुवाइशन मां शारे, इड़ी तगर कि तैन केरि कुआन्शोई भी स्भाविक कम्मां बेदलतां तैन केरे ज़ैना स्भाविक आन तैन केरे खलाफ बदला। 27 तेन्चरे तैन केरे मङ्द भी कुआन्शन सेइं सुभाविक कम्मां शैरतां एप्पू मांमेइं गंदे कम्मन मां मसत भोए, मतलब कि मङ्देइं, मङ्दन सेइं रिश्तो रेखतां प्रभु करां ठीक बदलो नेव। 28 ते तैनेई इन जेइज़ न समझू कि परमेश्वरे कबूल केरन, एल्हेरेलेइ परमेश्वरे भी तैना तैन केरे मनेरे हालती पुड़ शारे; कि बुरां कम्मां केरन। 29 ते तैना हर किसमेरे अधर्मे, दुष्टे, लालचे, बैरे सेइं भेरोई जे; ते कपट, ते खून केरनो, ते लड़ाई केरनि, ते धोखो देनो, ते जलनी सेइं भेरोए, ते चोगलखोर, 30 बदनाम केरनेबाले, परमेश्वरे सेइं नफरत केरनेबाले, जैन केरि इज्जत केर्ही लोडे तैन केरि इज्जत न केरनेबाले,

घमण्ठी, बड़कां मारनेबाले, बुरी-बुरी गल्लां बनाने बाले, अम्मा बैपू केरो हुक्म न मन्नेबाले। 31 बेवकूफ, धोखो देनेबाले, सच्चे प्यारे करां खाली, दया न केरनेबाले भोइजेइ। 32 हालांकी तैना परमेश्वरो ई हुक्म ज्ञातन, कि एरां ज़ेरां कम्मां केरनेबाले मौतरे सज्जारे लाइकन, फिरी भी न सिर्फ एप्पू एरां कम्मां केरतन बल्के एरां कम्मां केरनेबालन सेइं भी खुश भोतन।

2 एल्हेरेलेइ हे दोष लाने बाला, तू कोई की न भोस; तीं कां कोई बहानो नई, किजोकि जैस गल्लरो तू होरन पुड़ दोष लातस, तैसे गल्ली पुड़ तू अपनो आप भी दोषी बनातस, एल्हेरेलेइ तू एप्पू भी तैन्ने कम केरतस। 2 ते अस ज्ञानतम कि, जैना एरां कम्मां केरतन परमेश्वर तैन केरो इन्साफे केरतां तैन सज्जा देते। 3 ते हे मैन्हु, तू जै बुरां-बुरां कम्मां केरनेबालन पुड़ दोष लातस, ते एप्पू भी तैन्ने कम केरतस; कुन तू समझतस, कि तू परमेश्वरे सज्जाई करां बचेलो? 4 कुन तू परमेश्वरी कृपा, ते बरदाश केरनू, ते सबराउ धन घटया समझतस, ते कुन इन न समझास, कि परमेश्वरी कृपा तीं पापन करां मन फिरानेरो इन्कार केरतस, जैस दिहाडे परमेश्वर अपनो क्रोध हिरालो, तैस मां परमेश्वरे सच्चो इन्साफ बांदो भोलो, त परमेश्वर तेरो रोडेघारे इन्साफ केरेलो। 6 परमेश्वर हर एककी तैसेरे कम्मां केरे मुताबिक बदलो देलो। 7 जैना लोक रोडां कम्मां केरतां परमेश्वरी तरफां मैलने बैली महिमा, ते आदर, ते कथे न खतम भोने बाली जिन्दगरे तोपी मां रातन, परमेश्वरे तैन हमेशारी जिन्दगी देलो। (aiōnios g166) 8 पन जैना खुदगरज्जन, ते सच्चे न मन्नेबालेन, बल्के बुराई केरनि चातन, तैन पुड़ परमेश्वरो क्रोध, ते कोप एज्जेलो। 9 ते मुसीबत ते दुःख हर एककी मैन्हु पुड़ एज्जेलो जै बुराई केरते। परमेश्वर पेइलो यहूदी लोकां केरो इन्साफ केरेलो फिरी गैर यहूदी लोकां केरो इन्साफ केरेलो। 10 हर अक मैन्हु जै रोडां कम्मां केरते तैस महिमा, आदर, ते शान्ति मैलेली, पन परमेश्वर इना सैरी चीज़ां पेइले यहूदी लोकन देलो फिरी गैर यहूदी लोकन। 11 किजोकि परमेश्वर केन्चेरी तरफदारी न केरे। 12 एल्हेरेलेइ कि जैन गैर कौमारे लोकेई बगैर मूसेरो कानून मेलतां पाप कियो, परमेश्वर तैन बगैर मूसेरो कानूने सज्जा देलो, ते जैनेई मूसेरो कानून मेलतां पाप कियो, परमेश्वर तैन सज्जा भी मूसेरे कानूनेरे मुताबिक देलो। 13 किजोकि परमेश्वरे नज़री

मां मूसेरो कानून शुनेने बाले धर्मी नई, बल्के मूसेरे कानूने पुड़ चलने बाले
 धर्मी ठहराए गानेन। 14 फिरी ज़ैखन होरि कौमां केरे लोक जैन कां मूसेरो
 कानून नई, सुभावे सेइं किछ मूसेरे कानूनेरे गल्लन पुड़ चलतन, ते मूसेरो
 कानून तैन कां न भोनेरे बावजूद भी अपने लेइ एप्पू कानून आन। 15 तैना
 इन हिरातन कि परमेशरो कानून तैन केरे दिलन मां लिखोरोए, ते तैन केरे
 ज़मीर भी इस गल्ली पुड़ गवाही देतन, किजोकि तैन केरे अपने खियाल
 भी तैन पुड़ दोष लातन या बेइलज्ञाम ठहरातन। 16 एरु तेइस भोलू ज़ेइस
 परमेशर ज़ै खुशखबरी मीं शुनावरीए तैसेरे मुताबिक यीशु मसीहेरे ज़िरिये
 मैन्हु केरि छेपोरी गल्लां केरो इन्साफ केरेलो। 17 तू एप्पू जो यहूदी ज़ोतस,
 ते मूसेरे कानूने पुड़ तेरो विश्वासे, ते तू अपने आपे पुड़ घमण्ड केरतथ, कि तू
 परमेशरो खास मैन्हु आस। 18 ते तू परमेशरी मर्जी ज़ानतस, ते तू इन भी
 ज़ानतस कि कोनां गल्लां रोड़ी आन, किजोकि तीं इना गल्लां केरु ज्ञान मूसेरे
 कानूने करां मैलोरिन। 19 ते तू भरोसो रखतस, कि तू कान्न परमेशरी बत
 हिरानेबालोस, ते जैना आंधरे मां आन तैन केरे लेइ लोअरो ज़ेरे आस। 20
 ते बेअक्लन शिखालने बालोस, ते बच्चां केरो उस्तादातस, ते तीं पक्को
 पतो कि परमेशरो कानून तीं पूरू ज्ञान ते सच्चाई शिखालते। 21 ते जैन
 तू होरन शिखालतस, अपने आपे की न शिखालस? तू होरन शिक्षा देतस
 कि चोरी नई केरनि, कुन तू चोरी केतस? 22 तू ज़ै ज़ोतस, “बदमाशी नई
 केरनि,” कुन तू बदमाशी केरतस? तू ज़ै मूरतन सेइं नफरत केरतस, कुन तू
 मन्दरन लुटतस? 23 तू ज़ै घमण्ड केरतस कि तू परमेशरेरे कानूने ज़ानतस,
 एप्पू किजो कानून न मेन्तां, परमेशरी तुहीन केरतस? 24 “किजोकि तुश्शे
 यहूदी लोकां केरे वजाई सेइं गैर कौमन मां परमेशरेरे नंव्रेरी तुहीन भोतीए,”
 एल्हेरेलेइ पवित्रशास्त्रे मां एरु लिखोरुए। 25 अगर तू मूसेरे कानूने पुड़
 चलस, त खतनो कराने सेइं तीं फैइदो त आए, पन अगर तू मूसेरो कानून न
 मन्नस त तीं मां ते तैस मां, ज़ेसेरो खतनो नई भोरो कोई फर्क नई। 26 ते
 अगर कोई मैन्हु ज़ेसेरो खतनो न भोए भोरो, त तै मूसेरे कानूने पुड़ चले, त
 परमेशरेरे लेइ तै मैन्हु ते ज़ेसेरो खतनो भोरोए दुइये बराबर आन। 27 ते
 ज़ैस मैनेरो खतनो नई भोरो, अगर तै मूसेरे कानूने पूरू केरे, त तै तीं दोषी
 ठहरालो। किजोकि तीं कां मूसेरो कानूने ते तेरो खतनो भी भोरोए, पन फिरी

भी तू कानूने पुङ् न चलस। 28 किजोकि सच्चो यहूदी तै नई ज़ेसेरु ज़ार्म
यहूदन मां भोरु या ज़ेसेरो खतनो भोरोए। 29 बलके सच्चो यहूदी तैए, ज़ेसेरो
मन परमेशरे कां सच्चोए, ते सच्चो खतनो तैए ज़ै पवित्र आत्मारे कम्मां केरे
ज़िरिये दिलेरो भोरोए, न की मूसेरो कानून मन्ने सेइं भोरोए। एरे लोकां केरि
बड़याई लोक नई बल्के परमेशर एप्पू केरते।

3 (किछ लोक पुछतन) यहूदी केरि कुन बड़याई, या खतनेरो कुन फैइदो? 2
हर किसमे सेइं बढ़ु किछ। पेइलू त इन कि सारू परमेशरेरु वचन तैन सोंफू।
3 अगर किछ यहूदी परमेशरे कां ईमानदार न निस्से त कुन भोवं? कुन तैन
केरे ईमानदार न राने सेइं परमेशर तैन केरे लेइ अपने वादे पूरे केरने मां झूठो
भोव? 4 नई, कथे नई! बल्के परमेशर हमेशा सच्च ज़ोते, ते हर अक मैन्हु
झूठो भोव, ज़ेन्चरे पवित्रशास्त्रे मां परमेशरेरे बारे मां लिखोरुए, “ज़ैस सेइं तू
एपनी गल्लन मां धर्मी भोस, ते इन्साफेरे वक्ते तीं ज़ींत मैल्ले।” 5 अगर
इश्शां बुरां कम्मां परमेशरेरी धर्मिकता ठहराते, त अस कुन ज़ोम? कुन इन
कि परमेशर क्रोध केरते ते असन सज्जा देते। (इन अवं इन्सानेरी रीति पुङ्
ज़ोताई)। 6 नई, कथे नई! अगर परमेशर इश्शो यहूदी केरो इन्साफ रोड़े चारे
न केरेलो, त तै किजो दुनियारो इन्साफ केरेलो? 7 किछ ज़ोतन, अगर मेरे
झूठेरे वजाई सेइं परमेशरेरी सच्चाई बांदी भोतीए ते तैसेरी महिमा भोतीए, त
फिरी किजो पैपी केरो ज़ेरो मीं पुङ् हुक्म दित्तो गाते? 8 “एज्जा, अस बुराई
केरम, कि इस सेइं भलाई पैदा भोए?” पन असन पुङ् दोष भी लव गाते, ते
केत्रे ज़ोतन, कि एन केरू भी एने ज़ोनू आए। पन एरे ज़ेरेन पुङ् दोष लानो
ठीक आए। 9 त फिरी अस कुन ज़ोम? कुन अस यहूदी होरन करां रोड़ेम?
नई, कधी नई; किजोकि असेई यहूदी लोकन पुङ् ते गैर यहूदी लोकन पुङ् ई
दोष लोरोए, कि तैना सारे पापेरे कब्जे मां आन। 10 ज़ेन्चरे पवित्रशास्त्रे मां
लिखोरुए, “कोई परमेशरेरे सामने धर्मी नई, अक भी नई। 11 कोई सच्चे
समझदार नई, कोई परमेशरे तोपने बालो नई। 12 सारे परमेशरे करां दूर
भोरेन, सारे निकम्मे बनोरेन, कोई भलाई केरनेबालो नई, अक भी नई। 13
तैन केरू गल खुल्ली कब्रे, तैनेई अपने ऐशी सेइं धोखो दित्तो, तैन केरे ओठन
पुङ् सप्पां केरु ज़ेरे। 14 ते तैन केरू भाषण लानती, ते ट्लिठे सेइं भेरतांए।
15 तैन केरे पव खून केरने लेइ तेज्जन। 16 तैना ज़ेरां भी गातन तुबाही ते

कलोश तैन पत्ती गाते। 17 तैन न ज्ञानन् शैन्ति सेइं केन्द्ररां जीतन। 18 तैन मां परमेश्वरो डर बिलकुल भी नई।” 19 अस ज्ञानतम, कि मूसेरो कानून ज़ैन किछ ज़ोते, तैन्ने सेइं ज़ोते, ज़ैना तैस मन्तन, एल्हेरेलेइ कि केन्द्री कां कोई बहानो न भोए, ते सारी दुनिया परमेश्वरे सज़ारे लायिक भोए। 20 किजोकि मूसेरो कानूनेरे मुताबिक कम्मां केरने सेइं कोई मैन्हु परमेश्वरे सामने धर्म नई भोनो, एल्हेरेलेइ कि मूसेरो कानूने सेइं पिशान भोतीए कि अस पापी आम। 21 पन हुनी बगैर मूसेरो कानून मन्ने सेइं तै धार्मिकता बांदी भोरीए जै परमेश्वरे तरफां एइतीए, ज़ेसेरे बारे मां मूसेरो कानूने ते नेबी केरि किबातन मां लिखोरूए। 22 मतलब परमेश्वरी तै धार्मिकता जै यीशु मसीह पुड़ विश्वास केरनेबालां केरे लेइए; किजोकि तैन मां किछ भेद भाव नई। 23 एल्हेरेलेइ कि सेब्हेई पाप कियो, ते तैस महिमा करां दूर आन जै परमेश्वर देते। 24 पन परमेश्वरे अपने अनुग्रहे सेइं अस पापां केरि सज़ाई करां यीशु मसीहेरे ज़िरिये छुटाए ते मुफ्ते मां धर्मी ठहराए। 25 परमेश्वरे मसीहेरे खूनेरे वजाई सेइं अक एरो छुटकारो ठहराव, जै विश्वास केरने सेइं फैइदामंद भोते, कि ज़ैना पाप पेइले केरे, ते ज़ैना परमेश्वरे अपने बर्दाशती सेइं टाले; तैन केरे बारे मां तै अपनि धार्मिकता बांदी केरते। 26 बल्के इस्से वक्ते तैसेरी धार्मिकता बांदी भोए; कि ज़ैस सेइं तै एप्प धर्मी ठहरे, ते जै यीशु पुड़ विश्वास केरे, तैसेरो धर्मी ठहराने बालो भोए। 27 ते घमण्ड केरनू कोडि राव? तैसेरी त ठरे नई। कोस कानूनेरे वजाई सेइं? कुन मूसेरो कानून मन्ने सेइं? नई, बल्के विश्वासेरे वजाई सेइं। 28 एल्हेरेलेइ अस ज्ञानतम, कि मैन्हु मूसेरो कानूनेरे मुताबिक कम्मां केरनेरे बगैर यीशु मसीह पुड़ विश्वास केरने सेइं धर्मी भोते। 29 कुन परमेश्वर सिर्फ यहूदी केरोए? कुन गैर कौमां केरो नई? हाँ गैर कौमां केरो भी आए। 30 किजोकि अक्के परमेश्वरे, जै खतने बालन भी विश्वासे सेइं, ते ज़ैन केरो खतनो नई भोरो तैन भी विश्वासे सेइं धर्मी ठहरालो। 31 ते कुन अस विश्वासे सेइं मूसेरो कानूने रद केरतम? नई, कधे नई; बल्के मूसेरो कानूने बनोरु रखतम।

4 त अस कुन ज़ोम, कि इश्शे पूर्वज अब्राहमे कुन मैल्लू? 2 किजोकि अगर अब्राहम रोड़े कम्मन सेइं धर्मी ठहरावरो भोथो, त तैस घमण्ड केरनेरी ठार भोथी, पन रोड़ां कम्मां केरु घमण्ड परमेश्वरे सामने नई। 3 पवित्रशास्त्र कुन

जोते, इन कि “अब्राहमे परमेशरेरे वादन पुड़ विश्वास कियो, ते तै तैसेरेलेइ धार्मिकता गनो जेव।” 4 कम केरनेबालेरी मज़दूरी देनी दान नई, पन हक समझू गाते। 5 पन ज़ै (पुन्नेरु) कम न केरे बल्के पापी मैन्हु धर्मी ठहराने बाले पुड़ विश्वास केरते, तैसेरो विश्वास तैसेरेलेइ धार्मिकता गनो गाते। 6 ज़ैस परमेशर बगैर (पुन्नेरे) कमां केरे धर्मी ठहराते, तैस दाऊद भी धन जोते। 7 “धने तै ज़ैसेरे अर्धम भोए, ते जैन केरे पाप ढके जे। 8 धने तै मैन्हु ज़ैस परमेशर पापी न ठहराए।” 9 ते इन धन ज़ोनू, कुन खतने बालां केरे लेइ आए, या जैन केरो खतनो नई भोरो तैन केरे लेइ भी आए? अस पवित्रशास्त्रे मरां जोतम, “अब्राहमे परमेशरेरे वादन पुड़ विश्वास कियो ते तै तैसेरेलेइ धार्मिकता गनो जेव।” 10 इन तैसेरो खतनो भोने करां पेइलू भोव न कि खतनो भोनेरे बाट। 11 परमेशरे तै पेइलो कबूल कियो ते धर्मी ठहराव, ज़इस हेजू तैसेरो खतनो न थियो भोरो, ते तैस खतनेरो निशान मैलो, कि तैस धार्मिकता पुड़ छाप भोए, किजोकि तै तैन सेळ्ही केरो (आत्मिक) बाजी ठहरे ज़ैना विश्वास त केरतन पन तैन केरो खतनो नई भोरो। तैना भी तैन केरे विश्वासेरे वजाई सेइं धर्मी भोन। 12 ते ज़ैन केरो खतनो भोरोए तैन केरो पूर्वज भोए, ज़ैन केरो न सिर्फ खतनो कियोरोए, पन जैन इश्शो पूर्वज अब्राहमेरो ज़ेरो विश्वास आए, ज़ै तैनी बगैर खतनेरी हालती मां कियोरी थियो। 13 परमेशरे अब्राहमे ते तैसेरे वंश सेइं वादो कियोरो थियो कि तैना दुनियारे बारस भोले। ई वादे एल्हेरेलेइ नई दित्तोरो कि अब्राहमे मूसेरो कानून मन्नो, बल्के तैसेरो विश्वास ज़ै परमेशरे पुड़ थियो तैसेरे वजाई सेइं तै धर्मी ठहराव जेव। 14 ज़ै वादो परमेशरे दित्तोरो थियो कि तैना दुनियारे बारस भोले अगर मूसेरो कानून मन्ने सेइं आए, त फिरी विश्वास बेमतलब, ते वादो बेकार भोव। 15 परमेशर तैस पुड़ क्रोध केरते ज़ै कानूने रोडे चारे न मन्ने, ते ज़ैडी कानून नई, तैडी तैसेरु ट्लोड़नू भी नई। 16 एल्हेरेलेइ परमेशरेरे वादे विश्वासेरे ज़िरिये हासिल भोतन, ताके तैना वादे अनुग्रहेरे ज़िरिये पकके भोन, ते सारे वादे अब्राहमेरे वंशेरे लेइ आन, न सिर्फ यहूदी केरे लेइ, जैना मूसेरु कानून मन्तन बल्के तैन सेळ्ही केरे लेइ भी आन, जैना अब्राहमेरो ज़ेरो विश्वास केरनेबालन, तैए इश्शो सेळ्ही केरो पूर्वजे। 17 ज़ेन्चरे पवित्रशास्त्रे मां लिखोरुए, “मीं तू बेड़ि कौमां केरो पूर्वज बनेवरोस” परमेशरे पुड़ तैने विश्वास कियो, ते जै मुड़दन जींतो केरते ते

जैना चीज़ां वाजूद नई, तैन भी हाज़र केरते। 18 परमेश्वरे वचनेरे मुताबिक कि “तेरु खानदान एरु भोलू” तैना बेड़ि कौमां केरे पूर्वज भोन। तैनी न उमीदी मां भी उमीदी रेखतां विश्वास कियो, 19 ते अब्राहम जै लगभग 100 सालेरो थियो, अपने मर्दे जानी, ते सारारे मर्दे पेटेरे हालीती पुड़ भी विश्वासे मां कमज़ोर न भोव। 20 ते गैर विश्वासी भोइतां परमेश्वरे वादे पुड़ शक न की, पन विश्वासे मां मज़बूत भोइतां परमेश्वरी बड़याई की। 21 ते तैस पूरो भरोसो भोव, कि जैस गल्लरो वादो परमेश्वरे कियोरोए, तै तैस पूरो केरनेरी शक्ति भी रखते। 22 अब्राहमेरो विश्वास तैसेरेलेइ धार्मिकता गनो जेव। 23 ते ई वचन, “विश्वास तैसेरेलेइ धार्मिकता गनो जेव,” न सिर्फ तैसेरेलेइ लिखो जेव। 24 बल्के इश्शो लेइ भी जैन केरे लेइ विश्वास धार्मिकता गनो जेव, मतलब इश्शो लेइ जैना अस परमेश्वरे पुड़ विश्वास केरतम, जैने इश्शो प्रभु यीशु मसीह मुड़दन मरां ज़ींतो कियो। 25 यीशु इश्शो पापां केरे लेइ मारनेरे लेइ ट्लुवाव जेव, ते असन धर्मी ठहरानेरे लेइ परमेश्वरे ज़ींतो भी कियो।

5 एल्हेरेलेइ असां विश्वासे सेइं धर्मी भोए, ते जैन किछ इश्शो प्रभु यीशु मसीहे इश्शो लेइ कियोरु तैसेरे ज़िरिये इश्शो मेल मलाप परमेश्वरे सेइं भोरोए। 2 ते इश्शो विश्वासेरे वजाई सेइं मसीहे अस इस अनुग्रहे तगर पुज्जाए, जैड़ी अज़ अस खड़े भी आम, ते असां पूरे याकिने ते आनन्दे सेइं परमेश्वरी महिमा बंटनेरे लेइ उमीदी मां रातम। 3 सिर्फ एन्ने नई, बल्के मुसीबतन मां भी अस आनन्द केरम, किजोकि अस ज्ञानतम कि मुसीबतन सेइं सबर बद्धती। 4 परमेश्वर असन रोडे समझते किजोकि केन्चरे सबर केरनि असेई शिखोरोए, ते तै असन रोडे समझते ताएं असन उमीदे। 5 ई उमीदी असन शरमिन्दा न केरे, किजोकि पवित्र आत्मा जै परमेश्वरे असन दित्तोरोए तैसेरे ज़िरिये सेइं तैसेरो प्यार इश्शो दिलन मां भरोरोए। 6 किजोकि जैखन अस अपनो आप बचानेरे लेइ कमज़ोर थिये, त मसीह परमेश्वरे ठहरावरे वक्ते पुड़ इश्शो पैपी केरे लेइ मरो। 7 केन्ची धर्मी मैनेरे लेइ भी कोई मरे, इन बड़ु मुशकले, पन शैइद केन्ची धर्मी मैनेरे लेइ कोई अपनि जान देनेरी जुरत केरे। 8 पन परमेश्वरे अपनो महान प्यार एन्चरे बांदो कियो, कि जैखन असां पापी थिये तैखन मसीह इश्शो लेइ मरो। 9 ते अस तैसेरे खूने सेइं धर्मी ठहरे, त मसीहेरे ज़िरिये सेइं परमेश्वरे हमेशारी सज़ाई करां ज़रुर बचमेले 10 किजोकि जैखन अस परमेश्वरे दुश्मन

थिये त तैसेरे मटुरे मौती सेइं इश्शो मेल तैस सेइं भोव, ते फिरी मेल मलाप
 भोरोए त तैसेरे ज़िन्दगी सेइं असन पक्की मुक्ति मैलेली। 11 ते सिर्फ इन्ने
 नई, पन हुनी प्रभु यीशु मसीहेरे ज़िरिये सेइं इश्शो मेल परमेशरे सेइं भोरोए,
 एल्हेरेलेइ अस परमेशरे मां आनन्द केरतम। 12 एल्हेरेलेइ ज़ेन्चरे एककी
 मैनेरे ज़िरिये यानी आदमेरे ज़िरिये पाप दुनियाई मां अव, ते पापे सेइं मौत
 आई, ते एन्वरे मौत सेब्बी मैनन् मां फैली। किजोकि सेब्बेई पाप केरो। 13
 मूसेरो कानून देने करां पेइले पाप दुनियाई मां त थियो, पन ज़ैडी कानून नई,
 तैडी पाप गनो न गाए। 14 फिरी भी आदमे करां मूसा तगर सेब्बी लोकेई
 पाप कियो ते सब लोक मरे, ज़ैन लोकेई तैस आदमेरो ज़ेरो पाप न कियो
 तैना भी मरे, आदम मसीहेरो ज़ेरो थियो, ज़ै मसीह एजनेबालो थियो। 15
 पन परमेशरेऱ वरदान आदमेरे पापेरू ज़ेरू नई, इन सच्चे कि एककी मैन्हु
 यानी आदमेरे पापेरे वजाई सेइं बडे लोक मरे। पन परमेशरेरे अनुग्रह त कने
 तैसेरू वरदान बडे लोकां केरे लेइ महान आए ज़ैन एककी मैन्हु यानी यीशु
 मसीहेरे अनुग्रहे सेइं एइते। 16 ज़ैन वरदान परमेशरे असन दित्तू तैन आदमेरे
 पापेरू ज़ेरू नई, किजोकि एककी मैनेरो पाप सज्जा घिन्तां अव। पन हालांकी
 असेई भी बडे पाप कियोरेन फिरी भी परमेशरे असन एरू वरदान दित्तोरूए
 ज़ैन असन परमेशरेरी नज़री मां धर्मी ठहराते। 17 किजोकि एककी मैनेरे
 पापेरे वजाई सेइं सब लोक मरे, त ज़ैन लोकन अनुग्रहेरु ते धार्मिकतारू
 बडू वरदान एककी मैनेरे ज़िरिये मैलते, तैना लोक जीते राले ते एककी मैन्हु
 यानी यीशु मसीहेरे ज़िरिये राज़ केरेले। 18 एल्हेरेलेइ ज़ेन्चरे एककी मैनेरो
 पाप सेब्बी मैनेरू केरे लेइ सज्जा आनते, तेन्चरे मसीहेरे धार्मिकतारू कम
 सेब्बी मैनेरू केरे लेइ धर्मी ठहराने लेइ वजा बनू, ज़ैस सेइं ज़िन्दगी मैलतीए।
 19 किजोकि ज़ेन्चरे एककी मैनेरे हुक्म न मन्ने सेइं बडे लोक पापी भोए,
 तेन्चरे एककी मैनेरे हुक्म मन्ने सेइं बडे लोक धर्मी भोले। 20 मूसेरो कानून
 एल्हेरेलेइ दित्तोरो थियो कि सारे लोकन पतो लग्गे कि तैना केत्रे पापिन। पन
 ज़ेन्चरे लोकेई ज़ेत्रे जादे पाप किये तेन्चरे परमेशरेरो अनुग्रह तैस करां भी बडो
 जादे भोवं, 21 कि ज़ेन्चरे सेब्बी लोकेई पाप किये ते मरे, तेन्चरे परमेशरेरो
 अनुग्रह राज़ केरते ते परमेशरे अस इश्शे प्रभु यीशु मसीहेरे वजाई सेइं धर्म
 ठहरावरेम। मतलब असन हमेशारी ज़िन्दगी मैलेली। (aiōnios g166)

6 त अस कुन ज़ोम? कुन अस पाप केरते रहम, कि परमेशररो अनुग्रह
बद्धतो गाए? २ नई, कधी नई! अस ज़ैखन पापेरे लेइ मरे ते फिरी किजो
अग्रोवं जो पापे मां ज़िन्दगी बीताम? ३ तुस ज़ानतम कि ज़ैखन असेई सेढभी
लोकेई यीशु मसीहे सेइं साथी अक भोनेरे लेइ बपतिस्मो नीयोरो थियो,
तैखन अस तैस सेइं साथी मरे थिये। ४ ज़ैखन असेई बपतिस्मो नीयोरो थियो
तैखन अस मसीह सेइं साथी मरे ते दवे जे, ताके अस भी नव्वीं ज़िन्दगी
ज़ींग, झेन्नरे मसीह बाजी परमेशररी महिमा सेइं मुड़दन मरां ज़ींतो कियो। ५
किजोकि अगर अस बपतिस्मेरे ज़िरिये मसीहेरी मौती मां शामिल भोरेम, त
अस भी पक्के तैसेरे ज़ेरे ज़ींते भोमेलो। ६ अस ज़ानतम कि इश्शी पुरानी
इन्सानयत यीशु मसीह सेइं साथी कूसे पुड़ चाढ़ोरीए, ताके पापेरो जिसम
बेफाइदो भोए, ते अस अग्रोवं जो पापेरे गुलैमी मां न रहम। ७ ज़ैखन मैन्हु
मरते त तैखन तै पापेरी शक्ति करां आज़ाद भोते। ८ एल्हेरेलेइ अगर अस
मसीह सेइं साथी मरे, ते इश्शो विश्वास ईए कि तैस सेइं साथी ज़ींते भी
भोमेलो। ९ किजोकि अस एन ज़ानतम, कि मसीह मुड़दन मरां ज़ींतो भोरोए
ते तै फिरी न मरेलो, ते तैस पुड़ फिरी मौतरू राज़ नई भोनू। १० ज़ैखन मसीह
मरो त तै एककी बार सेढभी केरे पापेरे लेइ मरो; पन हुनी तै ज़ींतोए, ते सिफ
परमेशररे लेइ ज़ींतोए। ११ एन्हरे तुस अपने बारे मां भी सोचा कि तुस पापेरे
लेइ त मरोरेथ, पन यीशु मसीहे तुसन ज़िन्दगी दित्तोरीए ते तुस परमेशररे लेइ
ज़ींते आथ। १२ एल्हेरेलेइ तुस अपने जानी मां पापेरी इच्छान राज़ केरने न
देथ, ते तुस तैन केरे मुताबिक न चला। १३ ते अपने जिसमेरे अंगन बुरे कम्मां
केरे लेइ पापे न सोंफा, पन अपने आपे मुड़दन मरां ज़ींते सेमझतां परमेशरे
सोंफा। ते अपने जिसमेरे अंगन धार्मिकतारे कम्मां केरे लेइ परमेशरे सोंफा।
१४ ते तुसन पुड़ पापेरू राज़ न भोलू, किजोकि तुस मूसेरे कानूनेरे अधीन नई
बल्के अनुग्रहेरे अधीन आथ। १५ त कुन भोव कि अस एल्हेरेलेइ पाप केरम,
कि असां मूसेरे कानूनेरे अधीन नई बल्के अनुग्रहेरे? नई, कधे नई। १६ तुस
ज़ानथ, कि ज़ैखन तुस ज़ेसेरो हुक्म मन्नेरे लेइ अपनो आप गुलामां केरे ज़ेरे
सोफतथ त तुस तैसेरे गुलाम आथ। चाए पापेरी ज़ेसेरो अन्त मौते, चाए हुक्म
मन्नेरे ज़ेसेरो अन्त धार्मिकताए। १७ तुस त पेइले पापेरे गुलाम थिये पन हुनी
तुसन जै शिक्षा मैलोरी थी तैस पूरे दिले सेइं मन्नेबाले भोए, एल्हेरेलेइ अवं

परमेशरे शुक्र केरताई। 18 ते हुनी परमेशरे तुस पापेरी शक्ति करां छुटेइतां आज्ञाद किये, ते तुस परमेशरे गुलाम बने ताके तुस ज़ैन रोदू तैन केरि बटथ। 19 अवं ई मिसाल एल्हेरेलेइ इस्तेमाल केरने लोरोई, किजोकि तुश्शे लेइ इन समझानू मुश्किले। ज़ेन्वरे तुसेई पेइले अपनो आप गुलामेरे ज़ेरो बुरां कम्मां केरे लेइ अधर्मे ते बुरैइरे लेइ सोंफेरे थियो, तेन्वरे हुनी तुस अपने आपे परमेशरेरी सेवारे लेइ सोंफा ताके तुस पूरे तरीके सेइं तैसेरे भोथ। 20 ज़ेइस तुस पापेरे गुलाम थिये, त तुसन परमेशर खुश केरनेरी कोई ज़रूरत न थी। 21 तुसन पुरैनी ज़िन्दगी सेइं कुन फैइदो मैलो? सिर्फ तुस शरमातथ, किजोकि ज़ैन तुसेई कियू तैसेरो नितीजो सिर्फ मौते। 22 पन हुनी तुस पापे करां आज्ञाद भोरेथ ते तुस परमेशरे दास बनोरेथ। किजोकि इना गल्लां तुसन पवित्र बनैली ते तुसन हमेशारी ज़िन्दगी मैलेली। (aiōnios g166) 23 किजोकि पापेरी मज़दूरी त मौते, पन परमेशरेरू वरदान इश्शे प्रभु यीशु मसीह मां हमेशारी ज़िन्दगी आए। (aiōnios g166)

7 हे ढलाव ते बेइनव, कुन तुस न ज्ञानथ अवं मूसेरो कानून ज्ञान्ने बालन सेइं ज़ोताई, कि ज्ञांतगर मैन्हु ज़ींतो रहते, तांतगर तैस पुड मूसेरे कानूनरो अधिकार भोते? 2 मिसालरे तोरे पुड, ढलावरी कुआन्श कानूनेरे मुताबिक ज्ञांतगर तैसेरो मुन्श ज़ींतोए तांतगर तैसेरी पाबंदे। पन अगर मुन्श मेरि गाए, त तै मुन्शेरे कानूने करां छुटी जेर्ई। 3 ते अगर मुन्श हेजू ज़ींतो ते होरि मङ्गदेरी भोए त तै बदमाश भोतीए, पन मुन्श मेरि गाए, त तैसेरे कानूने करां छुटी, इडी तगर कि होरि मङ्गदेरी भोए, फिरी भी बदमाश न ठहरेली। 4 हे ढलाव ते बेइनव, ज़ैखन तुस मसीह सेइं साथी मरे, त तुस कानूनेरे लेइ मर्ई। हुनी तुस मसीहेरे आथ ज़ै मुड्दन मरां ज़ींतो कियोरोए, ताके तुस परमेशरेरे लेइ फलदार ज़िन्दगी ज़ीथ। 5 किजोकि ज़ेइस अस अपने सुभावेरे मुताबिक चलते थिये, त पापी सुभाव असन मां कम केरतो थियो, ते कानूने तैना पापी इच्छां उकसेइं, ते ज़ैन किछ असेई कियू तैसेरो फल मौत थियो। 6 पन ज़ेसेरे बंधने मां अस थिये, तैसेरेलेइ मेरतां, हुनी कानूने करां एरे छुटोरेम, पन आत्मारे नव्वे तरीके पुड सेवा केरतम, न कि लफसन सेइं। 7 त अस कुन ज़ोम? कुन मूसेरो कानून पापे? नई, कधी नई! बल्के बगैर मूसेरे कानूने अवं पापे न पिशैनी, अगर मूसेरो कानून न ज़ोथो कि “लालच न केर” त अवं

लालचे न ज़ैनेथो। ८ पन पापे मौको लेइतां हुक्मे सेइं मीं मां हर किसमेरु
 लालच पैदा कियूं, किजोकि बगैर मूसेरे कानूने पाप मरो आए। ९ अवं त
 मूसेरे कानूने बगैर पेइलो ज़ींतो थियो, पन ज़ैखन हुक्म अव, त पाप ज़ींतो
 भोव ते अवं मरो। १० ते तैए हुक्म ज़ै ज़िन्दगरे लेइ थियो, मेरे लेइ मौतरी वजा
 बनो। ११ किजोकि पापे मौको मेलतां हुक्मे सेइं मीं धोखो दित्तो, ते तैस सेइं
 अवं आत्मिक तोरे पुड मरो। १२ एल्हेरेलेइ मूसेरो कानून पवित्र आए, ते
 हुक्म भी पवित्र, ठीक ते रोडोए। १३ ते कुन ज़ै चीज़ रोड़ी थी मेरे लेइ मौत
 बनी? नई, कधे नई! पन पापे तैस रोड़ी चीज़ी सेइं मेरे लेइ मौत पैदा केरतां
 अवं मारो, कि तैसेरो पाप भोनो बांदो भोए, ते हुक्मे सेइं पाप बड़ो जादे
 बुझोए। १४ किजोकि अस ज़ानतम कि मूसेरो कानून त आत्मिके, पन अवं
 जिसमानी ते पापेरो गुलाम भोनेरे लेइ बिकोरोई। १५ ते ज़ैन अवं केरताई, तैस
 न ज़ैनी, किजोकि ज़ैन अवं चाताई, तैन न केरि, पन ज़ैस सेइं मीं नफरते,
 तैन्ने केरताई। १६ ते अगर, ज़ैन अवं न चैई तैने केरताई, त अवं मनताई, कि
 मूसेरो कानून रोड़ो आए। १७ ते एस हालती मां बुरी चीज़ां केरनेबालो अवं
 नई, बल्के पापे, ज़ै मीं मांए। १८ किजोकि अवं ज़ानताई, कि मीं मां मतलब
 मेरे जिसमे मां कोई रोड़ी चीज़ नई, रोड़ू केरनेरी इच्छा त मीं मां आए, पन मीं
 करां न केरोए। १९ किजोकि ज़ैस रोड़े कम्मेरी इच्छा अवं केरताई, तैन मीं
 करां न बने, पन ज़ैस बुरैइयरी इच्छा भी न केरि तैस केरताई। २० पन अगर
 अवं तैन्ने केरताई, ज़ेसेरी इच्छा न केरि, ते तैन केरनेबालो अवं नई, बल्के
 पापे ज़ै मीं मांए। २१ ते मीं ई कानून मैलतो, कि ज़ैखन रोड़े कम्मेरी इच्छा
 केरताई, त अवं बुराई केरताई। २२ किजोकि अवं ज़मीरे सेइं त परमेश्वरेरे
 कानूने सेइं बड़ो खुश भोताई। २३ पन मीं अपने जिसमेरे अंगन मां होरि ज़ेरो
 कानून लेइहोते, ज़ै मेरी अक्लरे कानूने सेइं लड़ते, ते मीं पापेरे गुलैमरे कानूने
 मां छँडते ज़ै मेरे जिसमेरे अंगन मांए। २४ अवं केरो नुभाघ मैन्हु आई, मीं
 इस जिसमे करां ज़ै मौतरे पासे नेते कौन छुटालो? २५ अवं परमेश्वरु शुक्र
 केरताई ज़ैने यीशु मसीहेरे ज़िरिये अवं बचाव, ते अवं अपनि अक्ली सेइं त
 परमेश्वरेरे कानूनेरो इस्तेमाल केरताई, पन अपने जिसमे सेइं पापेरी कानूनेरो
 इस्तेमाल केरताई।

8 एल्हेरेलेइ हुनी ज़ैना मसीह यीशु मां आन, तैन पुढ सज्ञारो हुक्म नई। 2 किजोकि पवित्र आत्मा तुसन ज़िन्दगी देलो, ज़ै यीशु मसीह करां एइती ते तै तुसन पाप ते मौती करां आज्ञाद केरेलो। 3 किजोकि ज़ैन कम कानूने इश्शो पापी सुभावेरे वजाई सेइं कमज़ोर भोइतां न केरि बटु, तैन परमेशरे कियूं, मतलब अपने मठे इश्शो पैपी केरो ज़ेरो भोनेरे लेइ, ते पापेरे बलिदानेरे लेइ भेजू, परमेशरे मसीहेरे जिसमे मां पापेरी सज्ञा दित्ती। 4 परमेशरे एन एल्हेरेलेइ कियूं ताके अस अपने पापी सुभावेरे मुताबिक नई, पन पवित्र आत्मारे मुताबिक च्छेलतां ज़ै हुक्म कानून देते तैस केरि बटम। 5 किजोकि ज़ैना लोक पापी सुभावेरे मुताबिक ज़िन्दगी बीतातन, तैना पापेरे बारे मां सोचतन, पन ज़ैना लोक पवित्र आत्मारे मुताबिक ज़िन्दगी बीतातन, तैना आत्मिक गल्लां केरे बारे मां सोचतन। 6 अगर इश्शो मन इश्शो पापी सुभावेरे मुताबिक च्छलते त अस मरमेले, पन अगर इश्शो मन आत्मारे मुताबिक च्छलते त असन कां ज़िन्दगी ते शान्ति मैलेली। 7 किजोकि पापी सुभावेरे मुताबिक च्छलनू परमेशरे सेइं बैर रखनोए, किजोकि न त पापी सुभाव परमेशरेरे कानूनेरे अधीने, ते न कानूनेरे मुताबिक चेलि बटते। 8 ते ज़ैना पापी सुभावेरे मुताबिक च्छलतन तैना परमेशरे खुश न केरि बटन। 9 पन ज़ैखन परमेशरेरो आत्मा तुसन मां बस्सते, ते तुस पापी सुभावेरे मुताबिक न च्छलथ बल्के पवित्र आत्मारे मुताबिक च्छलतथ, अगर कोन्ची मां पवित्र आत्मा नई त तै मसीहेरो मैन्हु नई। 10 ते अगर मसीह तुसन माए, त जिसम पापेरे वजाई सेइं मरेलो, पन आत्मा धार्मिकतारे वजाई सेइं ज़ींतीए। 11 ते अगर तैसेरी आत्मा ज़ैने यीशु मुड्दन मरां ज़ींतो कियो तुसन माए। ते ज़ै मसीह तैने मुड्दन मरां ज़ींतो केरेलो, ज़ै तुसन माए। 12 हे ढ्लाव ते बेइनव, असेई एन्चरे न लोडे ज़ीयेरु ज़ेन्चरे अस अपने पापी सुभावेरे मुताबिक ज़ीनू चातम, पन असेई एन्चरे ज़ीयोरु लोडे ज़ेन्चरे परमेशरेरो आत्मा चाते। 13 किजोकि अगर तुस अपने पापी सुभावेरे मुताबिक ज़ीले त तुस मरेले, पन अगर तुस पवित्र आत्मारे मुताबिक च्छलेले त तुस अपने पापी सुभावेरां कम्मां केरनां बंद केरेले ते फिरी तुस ज़ींते राले। 14 किजोकि ज़ेत्रे परमेशरेरो आत्मारे च्छलाने सेइं च्छलतन तैना परमेशरेरे बच्चेन। 15 किजोकि ज़ै आत्मा तुसन मैलोरोए तुसन फिरी गुलाम

बेनतां रानेरे लेइ नई, बल्के तै तुसन परमेशरेरे बच्चे बनाते। तैसेरे जिरिये
 अस परमेशरे जो हे अब्बा, हे बाजी ज़ोतम। 16 पवित्र आत्मा एप्पू इश्शी
 आत्मा सेइं मिलतां गवाही देते, कि अस परमेशरेरे बच्चेम। 17 किजोकि अस
 परमेशरेरे बच्चेम ते असां तैना बरकतां हासिल केरमेले ज़ैना परमेशर अपने
 लोकां केरे लेइ रेखोरिन, ते मसीहेरे लेइ भी ज़ैन परमेशरे रखोरुए, तैन भी
 अस मसीह सेइं साथी हासिल केरमेले; किजोकि अगर अस मसीहेरे ज़ेरे
 दुःख झैलमेले त अस भी मसीहे साथी महिमा हासिल केरमेले। 18 मीं पूरु
 याकीने, कि ज़ैना दुःख अस झैल्लने लोरेम, तैस महिमारे सामने, ज़ै परमेशर
 असन देनेबालोए, किछ भी नई। 19 किजोकि सैरी रचनारी चीज़ां बड़े बे
 सबरी सेइं तैस वक्तेरो इंतज़ार केरने लोरिन, कि ज़ेइस परमेशरे इन बांदो
 केरनू तैसेरे सच्चे बच्चे कौन आन। 20 किजोकि ज़ैन किछ परमेशरे बनाव,
 तैन सैरी चीज़ेइं अपनि कीमत गवाइ, एल्हेरेलेइ नई कि तैना अपने आप चैती
 थी, पन परमेशरे एन भोने दित्तू। पन फिरी भी उमीदे। 21 कि सृष्टि एप्पू भी
 खुश आए कि विनाशे करां छुटकारो हासिल केरतां, परमेशरेरे बच्चां केरे
 महिमारी अज़ैदी मां खुशी मनाली। 22 किजोकि अस ज़ानतम कि सारी सृष्टि
 मिलतां हुना तगर कर लातीए ते तकलीफी मां तड़फतीए, ज़ेन्हरे दोज़ींती
 गल्हे बिशनेरी तकलीफ भोतीए। 23 सिर्फ तैन्ना नई पन अस भी ज़ैन एजने
 बैली महिमारो पेइले फलेरो स्वाद चँखनेरे लेइ पवित्र आत्मा दित्तो, पन अस
 हेजू भी परमेशरेरे वक्ते बलगने लोरेम ज़ैखन परमेशर अपने बच्चे केरे रूपे मां
 कबूल केरेलो, ते असन जिसमेरे बुरैई करां छुटकारो देलो। 24 हुनी परमेशरे
 असन मुक्ति दित्तोरीए, असन ई उमीदे। पन अगर तुस कोन्ची चीज़ी हासिल
 केरनेरे लेइ उमीद केरथ जै तुसन कां पेइली आए, त फिरी तै उमीद नई।
 किजोकि जैस चीज़ी कोई हेरने लोरोए तैसेरी उमीद कुन केरे? 25 पन जैस
 चीज़ी अस न लहम, अगर तैसेरी उमीद रखतम, त सबरी सेइं तैस बलगते भी
 रातम। 26 एन्हरे पवित्र आत्मा इश्शी महत केरते ज़ैखन अस परमेशरे पुङ्
 भरोसो रखने मां कमज़ोर भोतम, किजोकि अस न ज़ानम, कि प्रार्थना केन्हरे
 केरतन; पन पवित्र आत्मा एप्पू कर लेइतां जै बयानेरे बेड़े, इश्शे लेइ बिनती
 केरतीए। 27 ते परमेशर जै मनां केरो ज़ान्ने बालोए ज़ानते, कि पवित्र आत्मा
 कुन लोरो जोने। किजोकि तै पवित्र लोकां केरे लेइ परमेशरेरे मेर्जी सेइं

बिनती केरते। 28 ते अस ज्ञानतम, कि ज़ैना लोक परमेशरे सेइं प्यार केरतन, परमेशर तैन केरे लेइ सब गल्लां केरे ज़िरिये भलाई पैदा केरते; मतलब तैन केरे लेइ ज़ैना तैनी अपने मेरज़ारे मुताबिक चुनोरेन। 29 किजोकि तैने ज़ैना पेइले चुने, ते पेइले ठहराए भी कि तैसेरे मटुरे रूपे मां भोन, ताके तै बड़े ढलान मां ज़ेठो भोए। 30 फिरी ज़ैना तैने पेइले ठहराए, तैना चुने भी, ते ज़ैना चुने, तैना धर्मी भी ठहराए, ते ज़ैना धर्मी ठहराए तैन महिमा भी दित्तोरीए। 31 ते अस एन गल्लां केरे बारे मां कुन ज़ोम? अगर परमेशर इश्शो पासे, ते इश्शो खलाफ कौन भोइ बटते? 32 परमेशरे अपनू मटू भी अपने लेइ न रख्खू, बल्के तैन इश्शो सेड्भी केरे लेइ तैसेरे दुश्मना केरे हवाले दिन्हू, ते तै मसीह सेइं असन तैन सब किछ देलो ज़ेसेरो वादो तैने असन सेइं कियोरोए। 33 अस परमेशरे चुनोरम, कोई असन पुड़ परमेशरे सामने दोष न लेई बटे, किजोकि तैए ज़ैने अस धर्मी ठहरावरेम। 34 फिरी कौने ज़ै सज़ारो हुक्म देलो? कोई नई, यीशु मसीह तैए ज़ै मरो, बल्के मुङ्दन मरां ज़ींतो भोव, ते परमेशरे देइने पासे, ते इश्शो लेइ बिनती भी केरते। 35 कौन असन मसीहेरे प्यारे करां अलग केरि बटते? मुसीबत या तंगी, या जुलम, या काल, या नगूपन, या खतरो, या तलवार? इन मरां कोई भी चीज़ असन मसीहेरे प्यारे करां अलग न केरि बटे। 36 ज़ेन्चरे पवित्रशास्त्रे मां लिखोरूए, “तेरे लेइ अस हर वक्त मौतरे खतरे मां रातम; अस मैरोने बैली भैड़ुं केरे ज़ेरे गने जोरेम।” 37 पन ज़ैने असन सेइं प्यार कियोरोए, तैसेरे ज़िरिये असन पूरे तरीके सेइं एन सैरी बुरी गल्लां पुड़ ज़ीत हासिल आए। 38 किजोकि मीं पूरू याकीने, कि न मौत, न ज़िन्दगी, न स्वर्गदूत, न हकोमतां, न ज़ै वक्त चलोरोए, न एजनेबालो वक्त, न शेक्ति, न उचार, 39 न दुधार ते न कोई होरि सृष्टि, असन परमेशरे प्यारे करां जै इश्शो प्रभु यीशु मसीह मांए अलग केरि सकेली।

9 अवं मसीह मां सच्च ज़ोताई, झूठ न ज़ोई, ते मेरो ज़मीर भी पवित्र आत्माई मां गवाही देते। 2 कि मीं बड़ो दुःखे, ते मेरो दिल लगातार मेरे लोकां केरे लेइ उदास भोते। 3 किजोकि मेरे यहूदी ढला ते बेइनां केरे लेइ, अवं हमेशारे लेइ श्रापित भोथो ते मसीह करां अलग भोथो अगर तैन इस वजाई सेइं तैन मुक्ति मैलती। 4 तैना इसाएलिन; ते तैना परमेशरे लेपलक बच्चे भोनेरे लेइ चुनोरेन, ते परमेशरे अपनि महिमा तैन पुड़ बांदी की। ते तैनी तैस सेइं

करार कियो, ते तैन मूसेरो कानून दित्तो। ते तैनी तैन अपनि आराधना ते
 अपने खूबसूत वादे पूरे केरनेरे लेइ हासिल केरनेरो मौको दित्तो। 5 अब्राहम,
 इसहाक ते याकूब तैन केरे दादे पड़दादे थिये, ते मसीह भी जिसमेरे लिहाजे
 सेइं तैने मरां अव, तै परमेशरे ते सेब्बन करां बाए ज़ै सेब्बन पुड़ राज़ केरते,
 तैसेरी महिमा हमेशा भोती राए। आमीन। (aiōn g165) 6 पन इन नई, कि
 परमेशरेरु वचन टलू कि, सारे ज़ैना इस्माएलेरे वंशन, तैना सब सज्जे इस्माएली
 नई। 7 ते न अब्राहमेरे वंश मां ज़र्म भोने सेइं सब परमेशरेरे बच्चे भोन।
 पन पवित्रशास्त्रे मां परमेशर अब्राहमे सेइं ज़ोते, “ज़ैना इसहाकेरे वंशे मरां
 पैदा भोले तैन्ने तेरु वंश मन्नू गालू।” 8 मतलब ज़ैना कुदुरती तरीके सेइं
 ज़र्म धन्तन तैना परमेशरेरे बच्चे नई, पन सिर्फ वादेरे बच्चे अब्राहमेरे बच्चे
 गने गातन। 9 किजोकि वादेरु वचन इने, “अवं एग्री साल इस वक्ते फिरी
 एज्जेलो, ते सारां अक मटू भोनूए।” 10 ते सिर्फ एन नई, पन ज़ेइस
 रिबका भी एक्की सेइं मतलब इसहाके सेइं दोज़ींती थी ते तैसेरे पेटे मां
 दूर्झ बच्चे थिये। 11 ते हेजू तगर तैना बच्चे न थिये ज़र्मोरो, ते न तैनेई रोड़ू
 या बुरु कियेरु थियूं कि परमेशरे रिबका सेइं ज़ोवं, तेरु बडू मटू निकड़ेरी
 सेवा केरेलू। परमेशरे एन एल्हेरेलेइ ज़ोवं कि एन हिराए, कि तै अपनि मेज़र्जी
 सेइं फैसले केरते ते इन तैन मटुं केरे रोड़ां या बुरे कम्मां केरे वजाई सेइं न
 थियूं। 13 ज़ेन्चरे पवित्रशास्त्रे मां लिखोरुए, “मीं याकूबे सेइं प्यार कियो, पन
 एसावरो इन्कार कियो।” 14 ते अस कुन ज़ोम, कि परमेशर बेइन्साफे कि तै
 ज़ैस चाते चुनते? नई, कथे नई! 15 किजोकि परमेशर मूसे सेइं ज़ोते, “अवं
 ज़ैस केन्ची पुड़ दया केरनि चैई, तैस पुड़ दया केरेलो ते ज़ैस पुड़ तरस केरनो
 चैई तैस पुड़ तरस केरेलो।” 16 एल्हेरेलेइ परमेशर तैस चुनेलो ज़ैस पुड़ तै
 दया हिरानी चाते; तैसेरी इच्छा लोक ज़ैन चातन या केरनेरी कोशिश केरतन
 तैस पुड़ निर्भर नई। 17 किजोकि पवित्रशास्त्रे मां परमेशरे मिस्सेरे राजे फिरैन
 सेइं ज़ोवं, “मीं तू एल्हेरेलेइ राजो बनोरोस, कि तीं मां अपनि शक्ति हिरेई, ते
 मेरे नंवरो प्रचार सैरी ज़मीनी पुड़ भोए।” 18 ते ज़ैस पुड़ तै चाते, तैस पुड़
 दया केरते; ते ज़ैस चाते ढीठ केरते। 19 ते किछ लोक मीं सेइं ज़ोले, “अगर
 एन्चरे, त फिरी परमेशर केन्चरे फैसलो केरि बटते कि अस गलत आम?
 एल्हेरेलेइ कोई भी तैस ज़ैन तै चाते केरने करां न रोकी बटे।” 20 हे मैन्हु,

तू कौन आस, जै तू परमेश्वरे सेइं बेंस केरतस? कुन बानोरी चीज़ बनाने
 बाले सेइं ज़ोई बट्टीए, “तीं अवं एरी किजो बनाई?” 21 कुन कुम्हारे मित्ती
 पुड़ अधिकार नई, कि एककी लुनदे मरां, अक भांड आदरारे लेइ बनाए, ते
 होरु नरादराए लेइ बनाए? 22 (परमेश्वरे अपने बनावरो लोकन सेइं ज़ैन तै
 चाए तैन केरनेरो अधिकारे) जैना नाश भोनेरे काबल थिये, तैन केरे खलाफ
 परमेश्वर अपनो क्रोध हिरानो ते अपनि सामर्थ बांदी केरनेरी चातो थियो, पन
 तैसेरे बदले मां तैनी सबर की। 23 (तैनी एन कियू) किजोकि तै हिरानू चातो
 थियो (मसीहेरे मौतरे बलिदानेरे ज़िरिये) तै केत्रो महान आए, ज़ैखन तै तैन
 लोकन पुड़ दया केरते जैना तैनी अपनि महिमा मां शामिल भोने लेइ चुनोरेन।
 24 मतलब असन पुड़ जैना तैने न सिर्फ यहूदन मरां बल्के गैर कौमन मरां भी
 चुने। 25 ज़ेन्हरे तै होशे नेबेरे किताबी मां ज़ोते, “जैना मेरे लोक न थी, तैन
 अवं अपने लोक ज़ोलो। ते जैना लोक मेरे ट्लारे न थिये, तैन जो ट्लारे
 ज़ोइलो। 26 ते तैस्से ठैरी ज़ैड़ी परमेश्वरे ज़ोरू थियूं, तुस मेरे लोक नई, तैस्से
 ठैरी ज़ींतो परमेश्वर तैन ज़ोलो तुस मेरे बच्चे।” 27 ते यशायाह नबी इस्माएली
 लोकां केरे बारे मां ज़ोते, “चाए इस्माएलेरी कुटमेरी गिनती समुद्रे किनारे
 रेतरी ज़ेरि बड़ी जादे भोली फिर भी तैन मरां थोड़े बज्जेले। 28 किजोकि प्रभु
 जलदी दुनियारे सेब्ही लोकां केरो सेखती सेइं इन्साफ केरेलो।” 29 ज़ेन्हरे
 यशायाह नेबे पेइलू भी ज़ोरू थियूं, “कि सर्वशक्तिमान परमेश्वरे इश्शे लेइ
 इश्शू वंश न बाचाथो, त अस सदोम ते अमोरा नगरां केरे ज़ेरे भोने थिये, जैना
 परमेश्वरे पूरे तरीके सेइं बरबाद कियां।” 30 ते अस कुन ज़ोम? इन कि जैना
 गैर कौमां केरे लोक जैना धार्मिकता न थी तोपते, तैनेई धार्मिकता हासिल
 की, मतलब तै धार्मिकता जै विश्वासे सेइं आए। 31 पन इस्माएली लोक मूसेरो
 कानून मेन्तां परमेश्वरे करां धर्मी जुवानू चाते थिये, पन तैन न भोइ बटु। 32
 किजो नई? एल्हेरेलेइ कि तैना विश्वासे सेइं नई, पन मूसेरो कानून मेन्तां
 धर्मी भोनेरी कोशिश केरते थिये, तैनेई तैस ठोकर खानेबाले घोड़े सेइं ठोकर
 खाइ। 33 ज़ेन्हरे पवित्रशास्त्रे मां लिखोरुए; “तका अवं सिय्योने मां अक
 ठेस लानेबालो घोड़, ते ठोकर खाने बाली चट्टान रखताई; ते जै तैस पुड़
 विश्वास केरेलो, तै शरमिन्दा न भोलो।”

10 हे द्वलाव ते बेहनव मेरे मनेरी इच्छा ते इस्साएली लोकां केरे लेड परमेश्वरे कां मेरी ई प्रार्थनाए, कि तैन मुक्ति मैल्ले। 2 अंव ज्ञानताई कि तैना परमेश्वरे लेड जोशो मां रहतन, पन सच्चे ज्ञाने सेइं नई। 3 किजोकि तैना तैस धार्मिकताई करां अनज्ञान राए जै परमेश्वरे तरफां मैलतीए, ते तैनेई अपनि धार्मिकता बनानेरी कोशिश की, एल्हेरेलेड तैनेई अपनो आप परमेश्वरेरी धार्मिकतारे अधीन न कियो। 4 किजोकि मसीहे तै मकसद पूरो कियोरोए ज्ञेसेरे लेड मूसेरो कानून दित्तोरो थियो, ताके जै कोई मसीह पुड विश्वास केरे तै परमेश्वरेरी नज़री मां धर्मी भोए। 5 किजोकि मूसे इन लिखोरूए, “जै मैन्हु तैस धार्मिकता मुताबिक च्छलते जै कानूनेरे ज़िरिये आए, तै तैसेरे ज़िरिये सेइं ज़ींतो रालो।” 6 पन जै धार्मिकता विश्वासे सेइं आए, तैसेरे बारे मां पवित्रशास्त्र इन ज़ोते, “तू अपने मने मां इन न ज़ोइयां कि स्वर्गे पुड कौन च़ढ़ेलो?” (मतलब मसीह आन्ने) 7 या इन न ज़ोइयां “पाताले मां कौन गालो?” (मतलब मसीह मुड़दन मरां ज़ींतो केरतां बा आने) (Abyssos g12)

8 पन पवित्रशास्त्र इन ज़ोते “परमेश्वरे वचन तेरे नेडे, ते तेरे ऐशी मां ते मने मां आए,” इन तैन वचने जैन असन परमेश्वरे पुड विश्वास केरनेरे बारे मां ज़ोते, ज्ञेसेरो अस प्रचार केरतम। 9 अगर तू अपने ज़बाना यीशुए, प्रभु ज़ेनतां मन्स ते अपने दिल सेइं विश्वास केरस, कि परमेश्वरे तै मुड़दन मरां ज़ींतो कियो, त तीं परमेश्वर पक्की मुक्ति देलो। 10 किजोकि इश्शे विश्वासेरे ज़िरिये सेइं अस परमेश्वरेरी नज़री मां धर्मी भोतम, ते इश्शे इकरार केरने सेइं मुक्ति मैलोरीए। 11 किजोकि पवित्रशास्त्र इन ज़ोते, “जै कोई तैस पुड विश्वास केरे, तै शरमिन्दो न भोलो।” 12 इन एल्हेरेलेड आए कि यहूदन ते गैर कौमन मां कोई फर्क नई, किजोकि परमेश्वर सेब्बी केरो प्रभुए; ते जैना तैसेरु नवं घिन्तन तै तैन बरकत देते। 13 ज़ेन्चरे पवित्रशास्त्र ज़ोते, “जै कोई प्रभुएरु नवं घिन्नेलो, तैस मुक्ति मैलेली।” 14 पन प्रभु पुड लोकेई विश्वास न कियो त तैना तैसेरु नवं किजो घिन्न? ते ज्ञेसेरे बारे मां तैनेई शुनोरु नई तैस पुड केन्चरां विश्वास केरेले? ते अगर तैसेरे बारे मां कोई प्रचार न केरे त तैना केन्चरां शुनी बटतन? 15 ते अगर कोई प्रचार केरनेरे भेजो न गाए त तैना केन्चरे शुनेई बटतन? ज़ेन्चरे पवित्रशास्त्र ज़ोते, “तैन केरे पव केत्रे रोडेन, जैना खुशखबरी शुनातन!” 16 पन सेब्बेई तै खुशखबरी

कबूल न की। यशायाह नबी ज़ोते, “हे प्रभु कोई इश्शो सन्देशो पुड़ विश्वास न केरे।” 17 एल्हेरेलेइ मसीहेरे बारे मां सन्देश शुन्नेरे बगैर कोई भी तैस पुड़ विश्वास न केरि बटे। 18 पन अवं पुछतई, “कुन इस्साएली लोकेई न शुनू?” हाँ तैनेई ज़रूर शुनू पन पवित्रशास्त्रे मां लिखोरुए “तैन केरु वचन सैरी ज़मीनी पुड़, ते तैन केरि गल्लां दुनियारे हर पासे पुज़ोरिन।” 19 अवं फिरी पुछतई, कुन इस्साएली लोकेई तैन वचन न समझू? पेइलो त प्रभुए मूसेरे ज़िरिये ई जुवाब देते, “अवं तैन केरे ज़िरिये जै कौम नई, इस्साएली लोकन जलन करालो, अवं बेवकूफ गैर कौमां केरे लोकां केरे ज़िरिये तुसन सरकालो।” 20 फिरी यशायाह बड़े दिलेरी सेइं परमेशरेरे लेइ ज़ोते, “ज़ैना मीं न थी तोपते, तैन अवं मैलो, ते ज़ैना मीं पुछते भी न थी, तैन पुड़ अवं बांदो भोव।” 21 पन इस्साएलेरे बारे मां परमेशर इन ज़ोते, “अवं हुक्म न मन्नेबाले ते बेस केरनेबाले लोकन सैरी दिहैड़ी कुजातो राव।”

11 एल्हेरेलेइ अवं पुछतई, कुन परमेशरे अपने लोक शारे? नई, कधे नई! अवं भी त इस्साएली आई, अब्राहमेरे खानदाने ते बिन्यामीनेरे गोत्रे मरां आई। 2 परमेशरे अपने तैना लोक न शारोरे, ज़ैना तैने पेइले चुने, कुन तुस न ज़ानथ, कि पवित्रशास्त्र एलियाहेरे बारे मां कुन ज़ोते, कि एलियाह नेबे इस्साएली लोकां केरे खलाफ परमेशरे कां बिनती केरते? 3 तैने ज़ोवं “हे प्रभु, तैनेई तेरे नबी मारे, ते तेरी बलिदान केरनेरी ठारां बरबाद की, ते सिर्फ अवं ए ऐकलो बद्धोरोई जै तीं मन्ने बालोई, हुनी तैना मीं भी मारने चातन।” 4 पन परमेशरे एलियाहे जुवाब दित्तो, “मीं अपने लेइ 7000 मङ्ग रखोरेन, ज़ैनेई बाल देबतेरे मूरती कां मथ्थो नई टेकोरो।” 5 एन्वरे इस वक्ते भी थोड़े ज़ेरे लोक बज़ोरेन, ज़ैना परमेशरे अपने अनुग्रह वजाई सेइं चुनोरेन। 6 अगर इन परमेशरेरे अनुग्रहे सेइं भोरुए, ते फिरी मूसेरे कानूनेरे मुताबिक कम्मन केरने सेइं नई, नई त फिरी अनुग्रह, अनुग्रह न राव। 7 ते फिरी नितीजो कुन भोव? कि इस्साएली ज़ेसेरी तोपी मां आन, तै तैन न मैलो; पन चुनोरेन मैलो, ते होरे बाकी लोक सखत कियोरेन। 8 ज़ेन्वरे पवित्रशास्त्रे मां लिखोरुए, “परमेशरे अज़्जेरे दिहाड़ी तगर तैन केरो मन ते दिल सुस्त कियो, ते एरी एछँचे दित्ती कि ताके तैना लई न बटन, ते एरे कन ताके तैना शुनी न बटन।” 9 ते राज़ो दाऊद ज़ोते, “अवं परमेशरे कां प्रार्थना केरताई कि तै तैन केरे तिहारन मां

ਟਲੇਇ ਬਟੇ ਤੇ ਫਸਾਏ, ਤੇ ਪਰਮੇਸ਼ਰ ਤੈਨ ਝੁਕਾਏ ਤੇ ਤੈਨ ਸਜ਼ਾ ਦੇਇ ਬਟੇ। 10 ਤੇ ਤੈਨ ਕੇਰਿ ਏਛ਼ਣ ਪੁੱਡ ਆਂਧ਼ੂ ਭੋਏ, ਤਾਕੇ ਤੈਨਾ ਲੇਈ ਨ ਬਟਨ, ਤੇ ਪਰਮੇਸ਼ਰ ਤੈਨ, ਤੈਨ ਕੇਰਿ ਪਰੇਸ਼ੈਨੀ ਕੇਰੇ ਵਜਾਈ ਸੇਇ ਦੁਖੀ ਕੇਰਿ ਬਟੇ।” 11 ਤ ਅਵਂ ਪੁਛਤਈ, ਕੁਨ ਯਹੂਦੀ ਲੋਕ ਠੋਕਰ ਲਗਨੇਰੇ ਵਜਾਈ ਸੇਇ ਹਮੇਸ਼ਾਰੇ ਲੇਇ ਬਿਛੁਡੇ? ਨਈ, ਕਥੇ ਨਈ! ਪਨ ਤੈਨ ਕੇਰੇ ਵਿਸ਼ਾਸ ਨ ਕੇਰਨੇਰੇ ਵਜਾਈ ਸੇਇ ਗੈਰ ਕੌਮਨ ਮੁਕਿ ਮੈਲਲੀ ਤਾਕੇ ਤੈਨ ਜਲਨ ਭੋਏ। 12 ਤੇ ਅਗਰ ਤੈਨ ਕੇਰੇ ਵਿਸ਼ਾਸ ਨ ਕੇਰਨੇਰੇ ਵਜਾਈ ਸੇਇ ਗੈਰ ਕੌਮਰੇ ਲੋਕਾਂ ਕੇਝ ਭਲੂ ਭੋਵਂ, ਹਕੀਕਿ ਮਾਂ ਗੈਰ ਕੌਮਾਂ ਕੇਰੇ ਲੇਇ ਬਡੂ ਰੋਡੂ ਭੋਲੂ ਜੇਇਸ ਯਹੂਦੀ ਲੋਕ ਪਰਮੇਸ਼ਰੇ ਕਾਂ ਵਾਪਸ ਏਜੋਲੇ। 13 ਅਵਂ ਤੁਸਨ ਗੈਰ ਕੌਮਰੇ ਲੋਕਨ ਸੇਇ ਏਨ ਜ਼ੋਤਾਈ। ਕਿ ਅਵਂ ਗੈਰ ਕੌਮਰੇ ਲੋਕਾਂ ਕੇਰੇ ਪ੍ਰੇਰਿਤ ਆਈ, ਤੇ ਅਪਨੇ ਸੇਵਾਰੇ ਬਾਰੇ ਮਾਂ ਘਮਣਡ ਕੇਰਿ। 14 ਤਾਕੇ ਅਵਂ ਕੋਨ੍ਚੀ ਤਰੀਕੇ ਸੇਇ ਅਪਨੇ ਲੋਕਨ ਜਲਨ ਕਰੇਇਤਾਂ ਤੈਨ ਮਰਾਂ ਕਿਛਨ ਮੁਕਿ ਟ੍ਰੈਵੇਈ। 15 ਕਿਜੋਕਿ ਇਸਾਏਲੀ ਲੋਕਾਂ ਕੇਝ ਸ਼ਾਝ ਗਾਨੂ ਦੁਨਿਆਰੇ ਲੋਕਾਂ ਕੇਰੇ ਲੇਇ ਮੇਲ ਮਿਲਾਪੇਰੀ ਵਿਚ ਬਨੀ, ਤੇ ਤੈਨ ਕੇਝ ਧੀਸ਼ੁ ਕਬੂਲ ਕੇਰਨੂ ਕਿ ਤੈ ਮਸੀਹ ਆਏ, ਏਨ ਏਝ ਭੋਲੂ ਜੇਨ੍ਚਰੇ ਮੁਝਦੇਰੂ ਜ਼ੀਂਤੂ ਭੋਨੂ! 16 ਤੇ ਕਿਜੋਕਿ ਪੂਰਵ ਅਬਾਹਮ ਤੇ ਦਾਦੇ ਪਡਦਾਦੇ ਪਵਿਤ੍ਰ ਥਿਥੇ ਤੇ ਤੈਨ ਕੇਰਿ ਖਾਨਦਾਨੀ ਭੀ ਪਵਿਤ੍ਰ ਭੋਲੀ, ਜੈਖਨ ਚਡ਼ਤਲਰੇ ਪੇਇਲੋ ਪੇਇਡੀ ਪਰਮੇਸ਼ਰੇਰੇ ਲੇਇ ਚਾਢ਼ਨੇਰੇ ਵਜਾਈ ਸੇਇ ਪਵਿਤ੍ਰ ਭੋਰੋਏ, ਤ ਪ੍ਰਾਂ ਸਨ੍ਨੋਝ ਅਟੂ ਭੀ ਪਵਿਤ੍ਰ ਭੋਰ੍ਹਾਏ, ਤੇ ਜੈਖਨ ਜੀਲ ਪਵਿਤ੍ਰ ਭੋਵਂ, ਤ ਡਾਲ ਭੀ ਪਵਿਤ੍ਰਨ। 17 ਇਸਾਏਲੀ ਲੋਕ ਜੈਤੂਨੇਰੇ ਬੁਟੇਰੇ ਡੈਲਡੀ ਕੇਰੇ ਜੇਰੇ ਆਨ ਤੇ ਇਥੇ ਦਾਦੇ ਪਡਦਾਦੇ ਅਬਾਹਮ, ਇਸਹਾਕ ਤੇ ਧਾਕੂਬ ਏਸ ਬੁਟੇਰੇ ਜੀਲਾਂ ਕੇਰੇ ਜੇਰੇ ਆਨ, ਤੇ ਅਗਰ ਕਿਛ ਡੈਲਡੀ ਟਲੋਡੀ ਜੇਈ, ਤ ਤੁਸ ਗੈਰ ਕੌਮਰੇ ਲੋਕ ਜਾਂਗਲੀ ਜੈਤੂਨੇਰੇ ਜੇਰੇ ਆਥ, ਤੇ ਤੁਸ ਤੈਸ ਅਸਲੀ ਜੈਤੂਨੇ ਮਾਂ ਕਲਮ ਕਿਧੋਰੇਥ ਤੇ ਜੀਲਾਂ ਕੇਰੇ ਖੁਰਾਕਾਰੇ ਹਕਦਾਰ ਭੋਰੇਥ। 18 ਤ ਤੀਂ ਤੈਨ ਡੈਲਡਨ ਪੁੱਡ ਜੈਨਾ ਟਲੋਡੀ ਜੇਈ ਤੇ ਸ਼ੈਰੀ ਜੇਈ ਤੈਨ ਪੁੱਡ ਘਮਣਡ ਨ ਲੋਡੇ ਕਿਧੇਰੂ, ਤੇ ਅਗਰ ਤੂ ਘਮਣਡ ਕੇਰਸ ਤ ਧਾਦ ਰਖ ਕਿ ਤੂ ਜੀਲਨ ਨਈ, ਪਨ ਜੀਲ ਤੀਂ ਸੁਮਭਾਲਤੇ। 19 ਫਿਰੀ ਤੂ ਜੋਲੋ, “ਡੈਲਡੀ ਏਲਹੇਰੇਲੇਇ ਟਲੋਡੀ, ਕਿ ਅਵਂ ਕਲਮ ਭੋਈ।” 20 ਇਨ ਸਚ਼ੇ, ਤੈਨਾ ਤ ਵਿਸ਼ਾਸ ਨ ਕੇਰਨੇਰੇ ਵਜਾਈ ਸੇਇ ਟਲੋਡੀ ਜੇਈ, ਪਨ ਤੂ ਵਿਸ਼ਾਸੇ ਸੇਇ ਬਨੇਰੇ ਰਾਤਸ, ਏਲਹੇਰੇਲੇਇ ਘਮਣਡ ਨ ਕੇਰ, ਪਨ ਡਰ ਕੇਰ। 21 ਕਿਜੋਕਿ ਪਰਮੇਸ਼ਰੇ ਅਸਲੀ ਡੈਲਡਨ ਪੁੱਡ ਦਿਆ ਨ ਕੀ, ਤ ਤੁਸਨ ਪੁੱਡ ਭੀ ਦਿਆ ਨ ਕੇਰੇਲੋ ਜੈਨਾ ਕਲਮ ਕਿਧੋਰੇਥ। 22 ਏਲਹੇਰੇਲੇਇ ਪਰਮੇਸ਼ਰੇਰੀ ਦਿਆ ਤੇ ਸਖਤੀ ਹੇਰ! ਜੈਨਾ ਪਾਪ ਕੇਰਨੇਰੇ ਵਜਾਈ ਸੇਇ ਝੜੇ ਤੈਨ ਪੁੱਡ ਸਖਤੀ, ਪਨ ਤੇਰੇ ਲੇਇ ਦਿਆ, ਤੇ ਤੂ ਅਪਨੇ ਆਪੇ ਪੁੱਡ ਤੈਸੇਰੀ ਦਿਆ ਬਨੋਰੀ ਰਾਨੇ ਦੇ, ਨਈ ਤ ਤੂ ਭੀ ਕਟੋ ਗਾਲੋ।

23 ते अगर यहूदी लोक फिरी विश्वास केन, त कलम केरे गानेन किजोकि परमेशर एन केरनेरे लेइ शेक्ति बालो आए। 24 किजोकि अगर तू तैस ज़ैतून, जै सुभावे सेइं जंगलीए कटो जेव, ते जै असलीए तैसेरे खलाफ रोड़े ज़ैतूने मां लव जेव, ते इना असली डैलडी आन अपने ज़ैतून मां किजो न लेर्इ गैली। 25 हे ढलाव ते बेइनव, अवं न चैई कि तुस गैर कौमरे लोक अपने बारे मां घमण्ड केरेथ। इस्माएली लोकन सेइं कुन भोव, अवं एस भेदेरे बारे मां तुसन सेइं ज़ोताई, कि जांतगर गैर कौमां केरे बड़े लोक मसीह कां न एजन, तांतगर किछ इस्माएली लोकां केरो दिल सखत रालो। 26 ते एन्चरे सैरी इस्माएली लोकन मुक्ति मैल्लनीए; ज़ेन्चरे पवित्रशास्त्रे मां लिखोरुए, “छुटानेबालो सियोनेरां (यस्तशलेम) एज्जेलो, ते अभक्ति इस्माएली लोकन करां दूर केरेलो। 27 ते तैन सेइं मेरो ई करार भोलो, कि अवं तैन केरे पाप माफ केरेलो।” 28 खुशखेबरारे वजाई त तैना तुशो लेइ परमेशरेरे बैरिन, पन परमेशरेरे चुनेरे वजाई सेइं ते तैन केरे बुजुर्गन दित्तोरे वचनेरे वजाई सेइं परमेशर तैन सेइं हेजू भी प्यार केरते। 29 किजोकि परमेशरे अपने वरदान्न करां ते अपने कुजाने करां कथे अपनो मन न बदले। 30 किजोकि ज़ेन्चरे पेइले तुसेई परमेशरेरो हुक्म न थियो मनोरो, पन हुना इस्माएली लोकां केरे हुक्मन मन्ने सेइं तुसन पुड़ दया भोइ। 31 तैना हेजू भी हुक्म न मन्नेबालेन कि जै दया तुसन पुड़ भोरीए तैन पुड़ भोली। 32 किजोकि सेब्भी लोकेई हुक्म नई मन्नोरो एल्हेरेलेइ तैना कैदी केरे ज़ेरे बनोरेन। पन परमेशरे एन एल्हेरेलेइ कियूं ताके तैन सेब्भन पुड़ दया केरि बटे। (eleēsē g1653) 33 वाह! परमेशर सेब्भी केरे लेइ भलो आए ते ज्ञानी ते अक्लमन्दे, कोई भी तैसेरे खियालन बियान न केरि बटे ते कोई तैसेरी बत्तां न सेमझी बटे। 34 ज़ेन्चरे पवित्रशास्त्रे मां लिखोरुए “कोई न ज्ञाने प्रभुएरे मने मां कुने या तैस सलाह देनेबालो कौने? 35 या केने पेइले तैस किछ दित्तू ज़ेसेरो बदलो तैस दित्तो गाए?” 36 किजोकि सब किछ परमेशरेरी तरफां आए। तैनी सब किछ बनाव, ते तैसेरे जिरिये, ते तैसेरेलेइ सब किछे। तैसेरी आदर सदा भोती राए। आमीन। (aiōn g165)

12 एल्हेरेलेइ हे ढलाव ते बेइनव, अवं तुसन कां परमेशरेरी दया याद केरताई बिनती केरतां ज़ोताई, कि अपनि ज़िन्दगी पवित्र, ते ज़ेरु परमेशरे पसंद एइते, बलिदान केरतां ज्ञाहा; ईए परमेशरेरी आराधना केरनेरो सही

तरीको आए। 2 ते इस दुनियारे तरीके पुढ़ न चला, पन परमेश्वर तुश्शी सोच बदलेरे ज़िरिये सेइं तुश्शो चालचलन भी बेदलोए, ताके तुस ज्ञानथ कि परमेश्वर तुसन करां कुन चाते, या जै रोडी ते जैन तैस पसंद एइते, ते सिद्ध आए। (aiōn g165) 3 किजोकि अवं तैस परमेश्वरे अनुग्रहेरे वजाई सेइं जै मीं मैलो, तुसन मरां हर एककी सेइं ज़ोताई, कि ज़ेन्नरे समझौरु लोडे, तैस करां कोई भी अपनो आप जादे न समझो, यानी कि ज़ेत्रो विश्वास परमेश्वरे तुसन दित्तोरोए तैसेरे मुताबिक अपने आपे समझा। 4 किजोकि ज़ेन्नरे इश्शेरे एककी जिसमे मां बडे अंगन, ते सेब्बी अंगां केरु अककां ज़ेरु कम नई। 5 तेन्नरे अस जैना मसीह पुड़ विश्वास केरतम, अस भी तैसेरे जिसमेरे ज़ेरे बने, ते अस तैसेरे अंग आम ते अस एककी होरि सेइं जुड़ोरेम। 6 ते ज़ैखन कि तैस अनुग्रहेरे मुताबिक जै परमेश्वरे असन दित्तोरुए, असन अलग-अलग वरदाना मैलोरन। ते जैस भविष्यवैनरु वरदान मैलेरुए, तै विश्वासेरे मुताबिक भविष्यवाणी केरे। 7 अगर सेवा केरनेरु वरदान मैलेरुए, त होरि केरि सेवाई मां लग्गोरो राए, अगर कोई शिखालने बालो भोए, त शिखालने मां लग्गोरो राए। 8 अगर तुश्श वरदान हिम्मत देने बालू भोए त तुसेर्ई हिम्मत देती लोडे रावरी, अगर कोन्ची दान देनेरु वरदान मैलोरु भोए तैने खुल्ले दिले सेइं लोडे दितोरु, अगर केन्ची अगवाई केरनेबालोए, तै जोशे सेइं अगवाई केरे, ते जै दया केरे तै खुशी सेइं दया केरे। 9 तुश्शो प्यार सच्चो भोए; बुरैर्ई सेइं नफरत केरा; भलाई केरने मां लग्गोरो राथ। 10 भाईचारेरे प्यारे सेइं एककी होरि सेइं प्यार केरा; आदरी सेइं होरन एप्पू करां रोडो समझा। 11 मेहनत केरने मां आलस न केरा; आन्मिक जोशे सेइं भेरोरे राथ; पूरे दिले सेइं प्रभुएरी सेवा केरते राथ। 12 जै उमीद तुसन आए तैस मां मघन राथ; मुसीबती मां मज़बूत राथ; प्रार्थना केरने मां लगातार लग्गोरो राथ। 13 परमेश्वरे लोकन जैन किछ ज़रुरी भोए, तैस मां तैन केरि मद्दत केरा; मेहमानां केरि आदर केरते राथ। 14 अपने सताने बालन बरकत देथ; बरकत देथ फिटकार न देथ। 15 आनन्द केरनेबालन सेइं साथी आनन्द केरा, ते लेरां देने बालन सेइं साथी लेरां देथ। 16 एप्पू मांमेइं मेल मलाप रखा; घमण्ड न केरा; गरीब लोकन सेइं साथी साथ रखा; इन न समझा कि तुस बडे अक्लमन्द आथ। 17 बुरैड्यरे बदले केन्ची सेइं बुराई न केरा; ध्यान देथ ते तैने केरा जैन गल्लां सेब्बी केरि नज़री

मां रोड़िन। 18 जैवू भोइ सकते, सेब्ही मैनन् सेइं साथी मेल मलाप रखा।

19 हे ट्लारव अपनो बदलो न नेथ; पन परमेशरे तुश्शे लेइ बदलो नेने देथ,
किजोकि पवित्रशास्त्रे मां प्रभु ज़ोते, “बदलो नेनो मेरु कम्मे, ते अज्वे बदलो
देइलो।” 20 पन पवित्रशास्त्र ज़ोते “अगर तेरो दुश्मन ढ्लुखोरो त तैस रोट्टी
खूवा; अगर ट्लिशोरो भोए, त तैस पानी पीया; किजोकि एरु केरने सेइं तू
तैस शरमिन्दो केरतस।” 21 बुरैइ करां न हारा पन बुराई भलैइ सेइं ज़ींतां।

13 हर कोई मैन्हु प्रथान अधिकैरी केरे अधीन राए; किजोकि कोई अधिकार
एरो नई, जै परमेशरेरे तरफां न भोए; ते जैना अधिकारी आन, तैना परमेशरे
ठहरावरेन। 2 एल्हेरेलेइ जै कोई अधिकैरी केरि खलाफत केरते, तै परमेशरेरे
कानूनेरी खलाफत केरते, ते जैना लोक परमेशरेरे कानूनेरी खलाफत केरतन
तैन सज्जा मैल्लनीए। 3 किजोकि हेरा हाकिम तैस मैन्हु जै भलाई केरते तैस
न डराए, पन तैस मैन्हु डराते जै बुरु कम केरते। अगर तुस हाकिमे करां डरनू
न चाथ त भलाई केरते राथ ते तुसन हाकिमे करां शाबाश मैलेली 4 हाकिम
परमेशरेरो सेवके ते तेरु भलू केरनेरे लेइ आए, पन अगर तू बुराई केरस,
त तू डर, किजोकि तैस कां तलवार बेफैइदी नई, ते तै परमेशरेरो सेवके;
जै बुरु कम केरनेबाले पुड़ कोप आनते। 5 एल्हेरेलेइ हाकिमेरे लेइ तुश्शू
समर्पण ज़रूरी आए न सिर्फ परमेशरेरे सज्जारे वजाई सेइं बल्के तुश्शे अपने
ज़मीरेरे वजाई सेइं। 6 एल्हेरेलेइ धड़त भी देतथ, किजोकि हकोमत केरनेबाले
परमेशरेरे सेवकन, ते सदा एस्से कम्मे मां लाग्गोरो रातन। 7 एल्हेरेलेइ हर
केन्चेरु हक देथ, ज़ेसेरी धड़त बनतीए तैस धड़त देथ; ज़ेसेरी चुंगी बनतीए
तैस चुंगी देथ; ज़ेसेरी इज्जत ते आदर केर्री लोड़े तैसेरी इज्जत ते आदर
केरा। 8 एप्पू मांमेइं प्यारेरे अलावा ते केन्ची गल्ली मां कोन्ची चीज़रे कर्ज़दार
न राथ; किजोकि जै होरन सेइं प्यार केरते, तैने परमेशरेरे दित्तोरे कानूनेरे
हुक्म पूरे किये। 9 किजोकि मूसेरे कानूने मां बड़े हुक्म दित्तोरेन ज़ेन्वरे कि
“बदमाशी न केर, कत्ल न केर, चोरी न केरा, लालच न केर,” ते एन केरे
अलावा होरो कोई भी हुक्म भोए त तैन सैरी केरि बुनीयाद इस्से गल्ली
माए, “अपने पड़ोसी सेइं अपने बराबर प्यार केर।” 10 प्यार पड़ोसेरी किछ
भी बुराई न केरे, एल्हेरेलेइ जै प्यार केरते तै परमेशरेरो दित्तोरो कानून पूरे
केरते। 11 एल्हेरेलेइ वक्त पिशीनतां इन केरा। तुश्शे लेइ निङ्गली मरां बीँझनेरो

वक्त ओरोए, किजोकि जैस वक्ते असेई विश्वास कियोरो थियो, तैस वक्तेरे खियाले सेइं हुनी इश्शी मुक्ति नेड़ीए। 12 इस बुरे दुनियाई मां रानेरो इश्शो वक्त लगभग खतम भोरोए, जेन्नरे रात ट्लेकड़ोने बालीए, ते लौ भोने बाली आए ते मसीहेरो वापस एजनेरो वक्त नेड़े ओरोए, एल्हेरेलेइ असां तैना कम्मां शारम जैना लोक आंधरे मां केरतन ते तैना हथियार बंधम जैना लोई मां इस्तेमाल भोतन। 13 एल्हेरेलेइ अस भी तैन लोकां केरो ज़ेरो बर्ताव केरम, जैना लोई मां ज़िन्दगी ज़ीतन न कि आंधरे मां, न कि नच्चने, नशो केरने, न बदमाशी केरने मां, ते लुचपने, लड़ई, ते जलनी मां मसत भोम 14 बल्के जेन्नरे प्रभु यीशु मसीहे ज़ीवं तेन्नरे तुस भी ज़ीथ, ते जिसमेरी खुवैशां पूरी केरनेरी कोशिश न केरा।

14 जै विश्वासे मां कमज़ोरे, तैस तुस कबूल केरा, पन तैस कुन कियेरु लोड़े ते कुन न लोड़े कियेरु तैस पुड़ बेंस केरनेरे लेइ नई। 2 किजोकि एककी विश्वासे, कि सब किछ खानू जेइज़े, पन जै विश्वासे मां कमज़ोरे, तै सिफ शागां खाते। 3 सब किछ खाने बालो तैस पुड़ दोष न लाए जै सब किछ न खाए, किजोकि परमेशरे तैना दुइये कबूल कियोरेन। 4 तू कौन आस जै होरेरे नौकरे पुड़ दोष लातस? तैनी खरु कियूं या बुरु इसेरो फैसलो तैसेरो मालिके केरेलो, बल्के तै कामयाब भोलो; किजोकि प्रभु तै इस काबल बनोरोए। 5 एन्नरे किछ लोक एककी दिहाड़ी होरि करां बेधतां मन्तन, ते किछ सब दिहाड़े बराबर मन्तन, हर केन्ची इन याकीन कियेरु लोड़े कि जैन तैना सोचतन तैन ठीके। 6 जै कोन्ची दिहाड़े मन्ते, तै प्रभुए इज़ज़त देनेरे लेइ मन्ते। जै सब किछ खाते, तै भी प्रभुए इज़ज़त देनेरे लेइ खाते, किजोकि तै परमेशरेरु शुक्र केरते, ते जै सब किछ न खाए, प्रभुएरे लेइ न खाए ते परमेशरेरु शुक्र केरते। 7 किजोकि असन मरां कोई न अपने लेइ ज़ीते, ते न कोई अपने लेइ मरते। 8 किजोकि अगर अस ज़ींतेम त, प्रभुएरे लेइ ज़ींतेम; ते अगर अस ज़ींम या मरम, अस प्रभुएरेम। 9 किजोकि मसीह एल्हेरेलेइ मरो ते ज़ींतो भी भोव, ताके मरोरे ते ज़ींतां दुइयां केरो प्रभु भोए। 10 तू अपने विश्वासी ढ़लाए पुड़ किजो दोष लातस? या तू फिरी किजो अपने विश्वासी ढ़लाए घटिया समझतस? अस सब परमेशरेरे आदालतरे तखतेरे सामने खड़े भोनेम। 11 जेन्नरे पवित्रशास्त्रे मां लिखोरुए, कि प्रभु ज़ोते, “अवं एपू तुसन सेइं वादो

केरताईं, हर कोई मीं कां ज़ैधू टिकेलो, ते हर अक ज़िभ परमेशरेरी इकरार केरेली।” 12 ते असन मरां हर केन्ची अपने-अपने कम्मां केरो लेखो परमेशरे देलो पेनोए। 13 एल्हेरेलेइ अग्रोवं जो अस एककी होरि पुड़ दोष न लाम, पन तुस एने थापा, कि कोई भी तुश्शे वजाई सेइं तुश्शो विश्वासी ढ़ला या बेइन पाप न केरे। 14 अब ज़ानताईं, ते प्रभु यीशुए तरफां मीं पक्कू याकीन भोवं, कि कोई खानेरी चीज़ अपने आपे सेइं अशुद्ध नई, पन ज़ै तैस अशुद्ध समझते, तैसेरेलेइ अशुद्ध आए। 15 अगर तेरो विश्वासी ढ़लाए या बेइन तेरे खाने सेइं दुःख पुज़े ते तै अग्रोवं जो परमेशरे पुड़ विश्वास केरनो शारे, त फिरी तू प्यारेरे रीति पुड़ न चलस, एरी चीज़ां न खा। ज़ेसेरे लेइ मसीह मरो ते तू अपने खाने सेइं तैस नाश न केर। 16 एल्हेरेलेइ ज़ैन कम तुश्शे लेइ रोड़ आए ते जेइज़े, तैसेरे बारे मां होरन तुहीन केरनेरो मौको न दे। 17 किजोकि परमेशरेरे राज़जे मां खानू पीनू माईने न रख्खे; माईने रखते धार्मिकतारी ज़िन्दगी ज़ींनी ते मेल मलाप, ते आनन्द तै आए ज़ै पवित्र आत्मा देते। 18 ज़ै कोई इस रीति सेइं मसीहेरी सेवा केरते, तैस सेइं परमेशरे खुश भोते, ते मैन्हु भी तैसेरे बारे मां रोड़ ज़ोतन। 19 एल्हेरेलेइ असेईं तैना कम्मां कियोरां लोड़न ज़ैन सेइं लोक मेल मिलापे सेइं रेइ बटन, ते एककी होरि विश्वासे मां मज़बूत केरम। 20 तुस ज़ेरु खानू चातथ तैसेरे वजाई सेइं परमेशरेरु कम न बगाड़ा। सब किछ शुद्ध त आए, पन तुश्शे खाने सेइं अगर होरो कोई मैन्हु परमेशरे पुड़ विश्वास केरनो शारे त तैसेरेलेइ बुरु आए। 21 रोड़ त इन्ने, कि तू न मास खास, ते न शराब पीस, ज़ेसेरे वजाई सेइं तेरे ढ़ला या बेइन पाप केरे। 22 तेरो इन चीज़ां केरे बारे मां ज़ै विश्वासे, तै तेरे ते परमेशरेरे दरमियाने मां आए, धने तैए, ज़ै तैस गल्ली मां, ज़ै तै ठीक समझे, अपने आपे दोषी न ठहराए। 23 पन ज़ै शक केरतां खाते, तै सज़ारे काबल भोइ जेव, किजोकि तै विश्वासे सेइं न खाए, ते ज़ैन किछ केरस ते विश्वास केरस कि एन ठीक नई त तू पाप केरतस।

15 एन्वरे अस ज़ैना विश्वासे मां मज़बूत आम, असेईं एन कियोरु लोड़े कि ज़ैना विश्वासे मां कमज़ोर आन तैन केरि मद्दत केरम; न कि अपनो आप खुश केरम। 2 असन मरां हर कोई अपने विश्वासी ढ़लान ते बेइन खुश केरनेरे लेइ मद्दत केरे ज़ैस सेइं तैन केरो विश्वास मज़बूत भोए। 3 किजोकि मसीहे भी अपनो आप खुश न कियो, पन ज़ेन्वरे पवित्रशास्त्रे मां लिखोरुए, “तेरे तुहीन

केरनेबालोई मेरी भी तुहीन की।” 4 ज़ेत्री गल्लां पेइली पवित्रशास्त्रे मां लिखोरिन, तैना इश्शे शिक्षारे लेइ लिखोरिन, कि अस सबरी ते पवित्रशास्त्रे करां हिम्मत हासिल केरम ताके असन उमीद भोए (परमेशर तैन्ने केरेलो ज़ेसेरे बारे मां तैनी वादो कियोरोए)। 5 अवं प्रार्थना केरताई कि परमेशर तुसन सबर ते हिम्मत दे, ताके तुस यीशु मसीह पत्ती च्चलते-च्चलते अक भोइतां ज़ीथ। 6 ते तुस सारे अकोटु भोइतां अक भोइतां एककी आवाज़ी मां परमेशर, इश्शे प्रभु यीशु मसीहेरे बाजेरी बड़याई केरा। 7 एल्हेरेलेइ, एककी होरि कबूल केरा, ज़ेन्वरे मसीहे तुस कबूल कियोरेथ; एल्हेरेलेइ एन केरा ताके लोक परमेशरेरी बड़याई केरन। 8 अवं ज़ोताई, कि ज़ैना वादे दादन पड़दादन दित्तोरे थिये, तैना वादे पूरे केरनेरे लेइ ते इन बांदू केरनेरे लेइ कि परमेशर सञ्चो, मसीह खतनो कियोरे लोकां केरो (यानी यहूदी केरो) सेवक बनो। 9 ते गैर कौमां भी परमेशरेरे दयारे वजाई सेइं परमेशरेरी बड़याई केरन, ज़ेन्वरे पवित्रशास्त्रे मां लिखोरूए, “गैर कौमन मां अवं तेरु शुक्र केरेलो, ते तेरे नव्वेंरु भजन केरेलो।” 10 फिरी होरि ठैरी लिखोरूए, “हे गैर कौमां केरे लोकव, परमेशरेरे लोकन सेइं साथी आनन्द केरा।” 11 ते फिरी पवित्रशास्त्रे ज़ोते, “हे गैर कौमां केरे लोकव, प्रभुएरी बड़याई केरा; ते हे मुलखां-मुलखां केरे सब लोकव; तैसेरी बड़याई केरा।” 12 ते फिरी यशायाह नबी पवित्रशास्त्रे मां लिखोरूए; “यिशैरु अक वंश निसेलू, ते तै गैर कौमन पुड़ हकोमत केरेलो। तैस पुड़ गैर कौमां उमीद रेखेली।” 13 अवं प्रार्थना केरताई परमेशर ज़ै उमीदरो देनेबालोए तुसन तैस पुड़ विश्वास केरनेरे वजाई सेइं सब किसमेरे आनन्द ते शैनति सेइं भरे, कि पवित्र आत्मारी शेक्कि सेइं तुश्शी उमीद बद्धती गाए। 14 हे मेरे ढ़लाव ते बेइनव, अवं एप्पू भी तुश्शे बारे मां जानताई, कि तुस भी भलैई सेइं भेरतथ, ते तुसेई कुन कियेरु लोड़े तुस रोड़े चारे ज़ानतथ ते एककी होरि शिखैली बटथ। 15 फिरी भी मीं ज़ैखन कैखन याद करानेरे लेइ तुसन बड़े दिलेरी सेइं लिखू, इन तैस अनुग्रहेरे वजाई सेइं भोवं, ज़ै परमेशरे मीं दित्तोरोए। 16 कि अवं गैर कौमां केरे लेइ यीशु मसीहेरो सेवक भोइतां परमेशरेरे खुशखेबरारी सेवा याजकेरी ज़ेरि केरि; जैस सेइं गैर कौमां केरे लोक परमेशरे दानेरे रूपे मां दित्ते गाले, जैस सेइं तै खुश भोलो, जैना पवित्र आत्मा पवित्र बनोरेन। 17 अवं यीशु मसीहेरे वजाई सेइं

परमेशरी सेवाई पुङ घमण्ड केरि बटताई। 18 किजोकि तैन गल्लां केरे
 अलावा मीं होरि कोन्ची गल्लां केरे बारे मां ज़ोनेरी दिलेरी नई, ज़ैना मसीहे गैर
 कौमन केरे लेइ वचन, ते कर्म, 19 ते निशान ते बड़े-बड़े कम्मां केरे शक्ति सेइं,
 ते पवित्र आत्मारे शेक्करे जिरिये कियां, इडी तगर कि मीं यरुशलेम नगरे
 मरां देइतां च्वेत्रे पासन इल्लुरिकुम इलाके तगर मसीहेरो खुशखेबरारो पूरो-
 पूरो प्रचार कियो। 20 पन मेरे मनेरी उमंगे, कि ज़ैडी-ज़ैडी यीशु मसीहेरी
 खुशखबरी प्रचार नई भोरो, तैडी खुशखबरी शुनेई; एरु न भोए होरेरे मुनीयादी
 पुङ घर बनेइं। 21 पन ज़ेन्द्रे पवित्रशास्त्रे मां लिखोरुए, तेन्द्रे भोए, “ज़ैन
 तैसेरे बारे मां कथी नई ज़ोरु, तैना लालहे, ते ज़ैनेई तैसेरे बारे मां नई शुनोरु
 तैना समझोले।” 22 एल्हेरेलेइ अवं तुसन कां एजनेरे लेइ बार-बार रुकोरो
 राव। 23 पन हुनी मीं इन इलाकन मां तैन लोकन खुशखबरी शुनेइतां अपनू
 कम पूरु कियूं ज़ैनेई मसीहे बारे मां न थियूं शुनोरु, ते मीं बड़े सालां केरि
 तुसन कां एजनेरी इच्छाए। 24 एल्हेरेलेइ ज़ैखन अवं इसपानिया मुलखे मां
 गेइ त तुसन मेइं एइते गेइलो, किजोकि मीं उमीदे, कि तैस सफरे मां तुसन
 सेइं मिली, ते ज़ैखन तुसन सेइं मिली त अवं खुश भोई, ते अवं चाताई तुस
 मेरे इसपानिया गानेरे सफरेरे लेइ मेरी मद्दत केरा। 25 पन हुनी त परमेशरेरे
 लोकां केरि सेवा केरनेरे लेइ यरुशलेम नगरे गाताई। 26 किजोकि मकिदुनिया
 ते अखाया इलाकेरे केरे विश्वासी लोकन इन रोड़ू लग्गू, कि यरुशलेम नगरेरे
 परमेशरेरे लोकां केरे लेइ ज़ैना गरीब आन, किछ चन्दो केरन। 27 तैनेई एन
 खुशी सेइं कियूं, तैना यरुशलेम नगरेरे लोकां केरे कर्जदारन, यहूदी लोकेई गैर
 कौमेरे लोकन परमेशरेरे तरफां रोड़ी चीज़ां दित्ती, ते इन रोड़ी कि गैर कौमां
 केरे लोक इस दुनियारी रोड़ी चीज़ां यहूदन देन। 28 अवं पेइलो यरुशलेम
 नगरे जो चलोरोई ताके ज़ै चन्दो अकोट्टो कियोरोए तैन देई, तैटुं पत्ती अवं
 तुसन कां रोम नगरे मां एइतां इसपानिया मुलखे जो गेइलो। 29 ते अवं
 ज़ानताई, कि ज़ैखन तुसन कां एज्जेलो, त मेरे एजनेरे वजाई सेइं मसीह
 तुसन पूरे तरीके सेइं बरकत देलो। 30 ते हे ढ्लाव ते बेझनव, प्रभु यीशु मसीह
 पुङ इश्शे विश्वासेरे वजाई सेइं ते पवित्र आत्मारे दित्तोरे प्यारेरे वजाई सेइं अवं
 तुसन कां बिनती केरताई, कि मीं सेइं साथी मेरे लेइ परमेशरे कां लगातार
 प्रार्थना केरा। 31 कि अवं यहूदिया इलाकेरे गैर विश्वासी लोकन करां बज्जोरो

रेईं, परमेश्वरे तैना लोक ज़ैना यरुशलेम नगरे मां आन खुशी सेइं तै मदत कबूल केरन ज़ै अवं तैन कां नेइलो। 32 ते अवं परमेश्वरी मेझीं सेइं आनन्दे कां एज्जी ते मीं तुसन साथी आराम मैल्लो। 33 अवं प्रार्थना केरताईं, कि शान्ति देनेबालो परमेश्वर तुसन सेष्भन सेइं साथी भोए। आमीन।

16 अवं तुसन सेइं फिबेरे बारे मां, ज़ै इश्शी विश्वासी बेइने ते किंखिया नगरेरे कलीसियारी सेवकाए, अवं चाताईं तुस तैसेरी इज्जत केरा। 2 कि तुस ज़ेन्वरे पवित्र लोकन सेइं कियेरु लोडे, तैस प्रभु मां कबूल केरा; ते ज़ैस गल्ली मां तैस तुसन करां केन्चेरी मदतरी ज़रूरत भोए, तैसेरी मदत केरा; किजोकि तै भी बड़ां केरि मदत केरनेबाली बल्के मेरी भी मदत केरनेबाली भोरीए। 3 प्रिस्किल्ला ते अकिवला ज़ैना प्रभु यीशु मसीह मां मेरे मद्गारन, नमस्कार। 4 तैनेईं मेरे जान बच्चानेरे लेइ अपनि जान खतरे मां रखोरि थी। सिर्फ अवं ए नईं, बल्के गैर कौमां केरि सैरी कलीसियां भी तैन केरु शुक्र केरतिन। 5 ते तैस कलीसिया भी नमस्कार ज़ैना तैन केरे घरे मां अकोट्टी भोतीए। मेरे ट्लारे इपैनितुसे भी ज़ै आसिया इलाकेरो मसीह पुड़ विश्वास केरनेबालो पेइलो विश्वासी ए, नमस्कार। 6 मरियम ज़ैसां तुश्शो लेइ बड़ी मेहनत केरि, नमस्कार। 7 अन्दुनीकुस ते यूनियासे ज़ै मेरो कुटमेरोए, ते मीं सेइं साथी कैद भोरो थियो, ते प्रेरितन मां मुशूर, ते मीं करां पेइले मसीह मां थी, नमस्कार। 8 अम्पलियातुसे, ज़ै प्रभु मां मेरो ट्लारोए, नमस्कार। 9 उरबानुसे, ज़ै मसीह मां इश्शो मदतगार, ते मेरे ट्लारो इस्तखुसे नमस्कार। 10 अपिल्लोसे ज़ै मसीह मां ईमानदार निस्सो, नमस्कार। अरिस्तुबुलुस ते तैसेरे टब्बरे जो नमस्कार। 11 मेरे कुटमेरे हेरोदियोने नमस्कार। नरकिस्सुसेरे टब्बरे ज़ैना लोक प्रभु मां आन, तैन नमस्कार। 12 त्रौफैना ते त्रौफोसा ज़ैन कुआन्शोई प्रभु मां बड़ी मेहनत की, नमस्कार। ट्लारी मसीही बेइन पिरसिस ज़ैसां प्रभु मां बड़ी मेहनत की नमस्कार। 13 रूफुसे ज़ै प्रभु मां चुनोरोए, ते तैसेरी अम्मा ज़ै मेरी अम्मारी ज़ेरि ए, दुइयन नमस्कार। 14 असुंक्रितुस ते फिलगोन ते हिर्मास ते पत्रुबास ते हर्मास ते तैन केरे सैथी विश्वासी लोकन नमस्कार। 15 फिलुलुगुस ते यूलिया ते नेरुस ते तैसेरी बेइन, ते उलुम्पास ते तैन केरे साथी सब परमेश्वरे लोकन नमस्कार। 16 मसीहोरे प्यारे सेइं एककी होरि जो नमस्कार केरा। तुसन भी मसीहोरे सैरी कलीसियारे तरफां नमस्कार।

17 हुनी हे ढलाव ते बेझनव, अवं तुसन कां बिनती केरताई, कि जैना लोक
 तैस शिक्षारे खलाफ ज़ै तुसन मांए, खलबली बनातन, ते ठोकर खानेरी वजा
 भोतन, तैन करां खबरदार राथ; ते तैन करां दूर राथ। 18 किजोकि एरे लोक
 इश्शे प्रभु यीशु मसीहेरी नई, पन अपने फैइदेरे लेइ सेवा केरतन; ते तैना
 रोडी-रोडी गल्लां केरतन ते चापलूसी सेइं सिधे सादे लोकन धोखो देतन।
 19 तुश्शे हुक्म मन्नेरे बारे मां सेब्भी लोकन पतो च्छ्लोरोए; एल्हेरेलेइ अवं
 तुश्शे बारे मां आनन्द केरताई; पन अवं इन चाताई, कि तुस भलाई केरनेरे
 लेइ अक्लमन्द बना, पन बुराई केरनेरे लेइ सादे बना। 20 शान्ति देनेबालो
 परमेश्वर शैताने जल्दी तुश्शे पवन सेइं ड्लेन्ज्यालो। इश्शे प्रभु यीशु मसीहेरो
 अनुग्रह तुसन पुड भोतो राए। 21 तीमुथियुस ज़ै मीं सेइं साथी कम केरते, ते
 लूकियुस ते यासोन ते सोसिपत्रुस मेरे कुटुम्बी केरे तरफां तुसन नमस्कार।
 22 मेरे चिट्ठी लिखने बाले तिरतियुसेरु प्रभु मां तुसन नमस्कार। 23 गयुस भी
 तुसन नमस्कार ज़ोते ज़ेसेरे घरे मां अवं राताई, तैडी कलीसियरे लोक अकोटु
 भोतन। इरास्तुस ज़ै नगरेरो भण्डारीए, ते ढला क्वारतुसेरु तुसन नमस्कार।
 24 अवं प्रार्थना केरताई, इश्शे प्रभु यीशु मसीहेरो अनुग्रह तुसन पुड भोतो
 राए। आमीन। 25 हुनी तुसन ज़ै खुशखबरी मीं प्रचार की, मतलब यीशु
 मसीहेरे प्रचारेरे मुताबिक विश्वासे मां मज़बूत केरि बटते, तैस भेदेरे प्रकाशेरे
 मुताबिक ज़ै बडे पेइलो देंतो छऱ्पोरो राव। (aiōnios g166) 26 पन हुनी बांदो
 भोइतां सनातन परमेश्वरे हुक्मे सेइं नेबी केरे किताबां केरे ज़िरिये सेब्भी
 कौमन ज़ोवरोए, कि तैना विश्वासेरे ज़िरिये सेइं हुक्म मन्नेबाले भोइ गान।
 (aiōnios g166) 27 तैस्से एककी बडे अक्लमन्द परमेश्वरी यीशु मसीहेरे
 ज़िरिये सदा महिमा भोती राए। आमीन। (aiōn g165)

1 कुरिन्थियों

1 अवं पौलुस ई चिट्ठी लिखने लोरोई। अवं, यीशु मसीहेरो प्रेरित भोनेरे लेइ परमेशरेरे मेर्जी सेइं कुजावरोई। मेरो विश्वासी साथी सोस्थिनेस भी मीं सेइं साथी आए (जै मेरी मद्दत केरने लोरोए)। 2 तुस ज़ैना कुरिन्थुस नगरेरे कलीसियारे विश्वासी आथ, परमेशरे तुस यीशु मसीह मां अपने लोकां केरे रूपे मां अलग कियोरेथ, ते कने पवित्र भोनेरे लेइ कुजोरेथ। तैन सेब्धी केरां नंवे ज़ैना हर ठेरी इश्शो त कने अपने प्रभु यीशुएरे नंवे सेइं प्रार्थना केरतन। 3 इश्शो बाजी परमेशर, ते प्रभु यीशु मसीहेरे तरफां तुसन अनुग्रह ते शान्ति मैलती राए। 4 अवं तुश्शो बारे मां अपने परमेशरेरू हर वक्त शुक्र केरताई, एल्हेरेलेइ कि परमेशरेरो ई अनुग्रह तुसन पुड़ यीशु मसीह मां भोव। 5 किजोकि तुसेई हर लिहाजे सेइं बेड़ि बरकतां हासिल कियोरिन, किजोकि तुस मसीह सेइं साथी अक आथ। एल्हेरेलेइ तैने तुसन अपनू वचन ज़ोनेरी ते समझनेरी खास काबलीत दितोरीए। 6 एन्वरे परमेशरे तुश्शो लेइ पक्कू कियू, कि मसीहेरे बारे मां सन्देश सङ्घे। 7 हुनी तुसन कां सारां आत्मिक वरदानां आन, किजोकि तुस इश्शो प्रभु यीशु मसीह बांदो भोनेरे बड़े इंतजारे मां आथ। 8 परमेशर तुसन आखरी तगर विश्वासे मां मज्जबूत भी केरेलो, कि तुस इश्शो प्रभु यीशु मसीहेरे वापस एजनेरे दिहाड़े बेइलज्ञाम भोथ। 9 परमेशर एन्जरे केरेलो, किजोकि ज़ैन किछ तै ज़ोते, तैस केरनेरे मां तै वफादारे। ते तैने तुस अपने मटु इश्शो प्रभु यीशु मसीहेरे संगती मां कुजावरेथ। 10 हे ढलाव ते बेइनव, अवं इश्शो प्रभु यीशु मसीहेरे अधिकारे सेइं इन केरनेरी बिनती केरताई, कि सब एककी होरि सेइं राजामंद भोथ; ते तुसन मां फिरके न भोन, पन अक मन भोथ, ते अकके खियाल रख्खा। 11 किजोकि हे मेरे ढलाव ते बेइनव, खलोएरे टब्बरेरे लोकेई मीं तुश्शो बारे मां ज़ोवरूए, कि तुसन मां लड़ाई लोरिन भोने। 12 मेरु ज़ोनेरो मतलब ई आए, कि तुसन मरां कोई त अपनो आप, “पौलुसेरे ज़ोते,” कोई “अपुल्लोसरो,” कोई “कैफारो,” कोई “मसीहेरो ज़ोते।” 13 ज़ैन तुस केरतथ तैन ठीक नई, कुन मसीह बेनटोव? कुन पौलुस कूसे पुड़ चाढ़ो जेव? या तुसन पौलुसेरे नंवे पुड़ बपतिस्मो मैलो? 14 अवं परमेशरेरू शुक्र केरताई, कि क्रिस्पुस ते गयुसेरू अलावा, मीं तुसन मरां केन्ची बपतिस्मो नई दित्तोरो। 15 कि एरु न भोए, कोई ज़ोए,

कि तुसन मेरे चेले बन्नेरे लेइ बपतिस्मो मैलो। 16 हाँ मीं याद आऊं, मीं स्तिफनासेरे टब्बरे भी बपतिस्मो दित्तो; एन केरे अलावा, अवं न जैनी कि मीं होरि केन्ची बपतिस्मो दित्तो। 17 किजोकि मसीहे अवं बपतिस्मो देनेरे लेइ नई, बल्के खुशखबरी शुनानेरे लेइ भेजोरोई, जैखन अवं लोकन परमेश्वरो सन्देश शुनाताई त अवं मैन्हु केरे च्छलाक खियालां केरो इस्तेमाल न केरि, एरु न भोए कि मसीहेरु क्रूस बेफैइटू भोए। 18 किजोकि क्रूसेरी कथा नाश भोने भालां केरे लेइ बेवकूफीए, पन असन मुक्ति मैलने बालां केरे लेइ परमेश्वरी शक्ति आए। 19 किजोकि पवित्रशास्त्रे मां परमेश्वर ज़ोते, “अवं इन हिरेइलो दुनियारे लोकां केरे खियालन कि तैना सोचतन कि तैना ज्ञानी आन, हकीकति मां तैना बेकार खियाल आन। अवं साबत केरेलो कि तैना अक्लमन्द नई।” 20 त फिरी, अक्लमन्द मैन्हु केरे बारे मां अस कुन ज़ोम? यहूदी केरे कानूनेरे महिर मैन्हु केरे बारे मां अस कुन ज़ोम? इस दुनियारो लोकां केरे बारे मां कुन ज़ोम जैना ज़ोने मां च्छलाकन? परमेश्वर तैना सारे बेवकूफ बनाए ते तैन केरि अक्ल बेफैइदी बकवास साबत की (aiōn g165)

21 किजोकि जैखन परमेश्वरे ज्ञानेरे मुताबिक दुनियां ज्ञान सेइं परमेश्वर न ज्ञानो, त परमेश्वरे इन रोडू लग्गू इस प्रचारेरे बेवकूफरे मुताबिक विश्वास केरनेबालन मुक्ति दे। 22 यहूदी त निशान चातन, ते गैर कौमां ज्ञानेरे तोपी मां आन। 23 पन अस त तैस क्रूसे पुड़ चाढ़ोरे मसीहेरो प्रचार केरतम जै यहूदी केरे लेइ ठोकरारी वजाए, ते गैर कौमां केरे लेइ बेवकूफीए। 24 पन जैना परमेश्वरे (अपने लोक भोनेरे लेइ) कुजोरेन, कुन यहूदी, कुन गैर कौमां, तैन केरे लेइ मसीह परमेश्वरी शक्ति, ते परमेश्वरेरु ज्ञाने। 25 किजोकि परमेश्वरी बेवकूफी मैन्हु केरे ज्ञाने करां जादे ज्ञान बालीए; ते परमेश्वरी कमज़ोरी मैन्हु केरे शेक्ति करां जादे ज़ोरे बालीए। 26 हे ढलाव ते बेइनव, इस बारे मां सोचा ज़ेइस परमेश्वरे तुस कुजाए तुस केरे थिये, कि न जिसमेरे मुताबिक बड़ ज्ञानी, ते न बेड़ि शेक्तिबाले, ते न इज्ज़तदार घरेरे कुजाए। 27 ज्ञाने बालन शरमिन्दा केरनेरे लेइ परमेश्वरे तैना चुने जैना दुनियारे नज़री मां बेवकूफन। ते ताकतबरन शरमिन्दा केरनेरे लेइ परमेश्वरे तैना चुने जैना दुनियारे नज़री मां कमज़ोरन। 28 परमेश्वरे तैना चुने जैना दुनियारी नज़री मां नीच ते घटिया आन, बल्के जैना अर्थी भी नई तैना भी चुने, कि तैन जैना आन, बेकार

केरन। 29 परमेशरे एन केरु ताके कोई प्राणी परमेशरे सामने घमण्ड न केरि सके। 30 पन परमेशरे तुस यीशु मसीह सेइं अक कियोरेथ, ते मसीहेरे ज़िरिये तैने अपनू ज्ञान दित्तोरुए। परमेशर अपने नज़री मां असन धर्मी भी बनाते। मसीहेरे ज़िरिये अस पवित्र किये जे, ते तै असन इश्शे पापन करां आज़ाद केरते। 31 ताके ज़ेन्हरे पवित्रशास्त्रे मां लिखोरए, तेन्हरे भोए, “कि ज़ै घमण्ड केरे तै तैस पुड़ घमण्ड केरे ज़ैन प्रभुए कियोरुए।”

2 हे ढलाव ते बेझनव, ज़ैखन मीं तुसन परमेशरे बारे मां सन्देश शुनव, त मीं बेड़ि गल्लां इस्तेमाल न की, कि अवं अपने आपे ज्ञानी हिरेई। 2 किजोकि मीं इन थापेरु थियूं कि तुसन मां यीशु मसीह, बल्के कूसे पुड़ चाढ़ेरे मसीहेरे अलावा होरि कोई गल न केरि। 3 ते कमज़ोरी ते डरे सेइं तुसन सेइं साथी, ते बड़ो थरकतो तुसन सेइं साथी राव। 4 ते मेरे शिक्षाई, ते मेरे प्रचारे मां ज्ञानेरी लालचानेरी बैली गल्लां न थी; पन पवित्र आत्मा शेक्ति सेइं इन हिरावं कि ज़ै सन्देश मीं शुनव तै सच थियो। 5 एल्हेरेलेइ की तुश्शो विश्वास मैन्हु केरे ज्ञाने सेइं नई, पन परमेशरे शेक्ति पुड़ निर्भर भोए। 6 फिरी भी अवं आत्मिक सिद्ध लोकन ज्ञानेरो सन्देश शुनाताई, पन इस दुनियारे लोकां केरो नई, ते इस दुनियारे हाकिमां केरु नई ज़ैना नाश भोनेन। (aiōn g165) 7 पन अस परमेशरेरु तैन छ़ोरु ज्ञान भेदेरे रीति पुड़ ज़ोतम, ज़ैन परमेशरे दुनिया बनाने करां पेइलू इश्शे महिमारे लेइ ठहराव। (aiōn g165) 8 परमेशरेरो ई मकसद इस दुनियारे हाकिमन मरां केन्चे भी न समझो, किजोकि अगर समझते भोथे, त महिमा बालो प्रभु कूसे पुड़ न चाढ़ेथे। (aiōn g165) 9 पन ज़ेन्हरे पवित्रशास्त्रेरे मां लिखोरुए, “कि ज़ैन न एछ़ेई लाव, न कन्नेई शुनू, ते ज़ैना गल्लां मैन्हु केरे दिले मां न एई, तैना सब परमेशरे तैन केरे लेइ तियार की, ज़ैना तैस सेइं प्यार केरतन।” 10 पन परमेशरे पवित्र आत्मारे ज़िरिये सेइं असन पुड़ बांदू कियूं; किजोकि पवित्र आत्मा सब गल्लां, बल्के परमेशरेरी डुगी गल्लां ज़ानते। 11 मैनन् मरां कौन केसेरी गल्लां ज़ानते, सिर्फ मैनेरी आत्मा ज़ै तैस मांए, तेन्हरे परमेशरेरी गल्लां भी कोई न ज़ाने, सिर्फ परमेशरेरो आत्मा। 12 पन असन दुनियारी आत्मा नई, पन तै आत्मा मैलोरोए, ज़ै परमेशरेरे तरफांए, कि आस तैन गल्लन समझाम, ज़ैना परमेशरे असन दितोरिन। 13 एल्हेरेलेइ अस मैन्हु केरे ज्ञानेरी शिखैलोरी गल्लन मरां

नई, पन पवित्र आत्मारे शिखैलोरी गल्लन मरां आत्मिक गल्लां आत्मिक ज्ञाने सेइं समझातम। 14 पन जिसमानी मैनु परमेशरेरे आत्मारी सञ्चार्य कबूल न केरे, किजोकि तैसेरेलेइ तै बेवकूफीए, ते न तै तैन सेमझी सके, किजोकि तैना सिर्फ पवित्र आत्मारे ज़िरिये सेमझी गैतिन। 15 पन जैन लोकन पवित्र आत्मा मैलोरो तैना, तैन सैरी गल्लन परखतन जैना पवित्र आत्मा शिखालते। पन जैन लोकन पवित्र आत्मा नई मैलोरो तैना, तैन न सेइं बटन जैन पवित्र आत्मा मैलोरोए। 16 इन सच्च आए, किजोकि पवित्रशास्त्र ज़ोते, “कोई न जाने प्रभुएरे मने मां कुने।” पन पवित्र आत्मा असन विश्वासी लोकन मसीहेरो मने दित्तोरोए।

3 हे ढ़लाव ते बेइनव, जैखन अवं तुसन कां थियो त तुसन सेइं एन्हरे सब गल्लां न केरि बटो, ज़ेन्हरे आत्मिक लोकन सेइं, पन ज़ेन्हरे तैन सेइं जैना मसीह मां बच्येन। 2 मीं तुसन परमेशरेरे वचने मरां सिर्फ बुनियादी गल्लां केरि शिक्षा दित्ती ते डुग्धी सञ्चार्य नई। किजोकि तैस वक्ते तुस तै शिक्षा हासिल केरनेरे ते समझनेरे काबल न थिये, बल्के हेजू भी हासिल केरनेरे काबल नई। 3 किजोकि हेजू तगर भी गैर विश्वासी केरे ज़ेरे आथ। एल्हेरेलेइ कि जैखन तुसन मां बैर, ते लड़ाइयन, त कुन तुस गैर विश्वासी केरे ज़ेरे न भोए? तुस एरे लोकां केरि ज़ेरि ज़िन्दगी ज़ीने लोरेथ, जैन केरो रिश्तो प्रभु सेइं न भोए। 4 एल्हेरेलेइ अक ज़ोते, “अवं पौलुसेरोई,” ते होरो ज़ोते, “अवं अपुल्लोसेरो आई,” त कुन तुस एरे लोकां केरि ज़ेरि ज़िन्दगी ज़ीने बाले न भोए, जैन केरो रिश्तो प्रभु सेइं न भोए! 5 अपुल्लोस कौने? ते पौलुस कौने? सिर्फ सेवक, जैन केरे ज़िरिये तुसेई प्रभु पुड़ विश्वास कियो, असन मरां हर केन्ये कम कियूं ज़ेन्हरे परमेशरे केरनेरे लेइ दित्तू। 6 अगर अवं तुश्शी तुलना ऊडारे सेइं केरि त मीं बीज बेवं, अपुल्लोसे सग्गू, पन परमेशरे बडावं। 7 एल्हेरेलेइ न त लानेबालो किछे, ते न सग्गने बालो किछे, पन परमेशर जै बडाने बालोए। 8 लानेबालो ते सग्गने बालो दुइये अक्कन; पन हर मैनु अपने-अपने मज़दूररो फल मैलनोए। 9 किजोकि अस परमेशरे सेइं साथी कम केरनेबाले आम, तुस एरे ऊडारां केरे ज़ेरे आथ जैन केरो तलक परमेशरे सेइं आए, ते इसेरे आलाव तुश्शी तुलना एरे घरे सेइं केरताई जैन परमेशरे बनावरूए। 10 परमेशरे जैन कम मीं केरनेरे लेइ दितोरु थियूं, मीं तैन अक्लमन्दी सेइं कियूं; अवं माहिर

मिस्वेरो ज़ेरो आई, मीं तुशें नगरे मां खुशखबरी प्रचार की ते शुरू मां तुसन यीशु पुड़ विश्वास केरनेरे लेइ मद्दत की, तैठां बाद ज़ैस कम्मेरी शुरुआत मीं कियोरी थी, होरे मसीही सेवा केरनेबाले तैस बुनियादी पुड़ लगातार कम केरते राए। पन असन मरां हर एककी कम केरनेबाले ध्याने सेइं सोचोरु लोड़, कि असेई परमेशरेरु कम केन्चरे लोड़ कियोरु। 11 किजोकि यीशु मसीह सच्ची बुनीयाद आए, ते होरो कोई होरि बुनीयाद न बनेइ सके, तैन इन आए, कोई तुसन मुक्ति हासिल केरनेरे लेइ नव्वीं शिक्षा न शिखैली बटे, मीं तुसन सेइं पेइलू ज़ोवरु कि परमेशर असन यीशु मसीहेरे ज़िरिये मुक्ति देते। 12 ते अगर कोई इस मुनीयादी पुड़ सोन्नू चॉटी या कीमती घोड़ या कैडु या घास फूसेरो रहो रखते। 13 ज़ैखन मसीह फिरी वापस एज्जेलो, त अग हर एककेरे कम्मे परखेली, ते अग हर मैनेरे कम्मेरी कीमत हिराली। 14 ज़ेसेरु कम तैस अग्गी सेइं न फुकोलू, तैस मज़दूरी मैलनीए। 15 ते अगर केन्चेरु कम फुकोलू त तैस नुकसान भोलो; पन तै एप्पू बच्चनोए पन फुकोते-फुकोते। 16 कुन तुस न ज्ञानथ, कि तुस परमेशरेरु मन्दरथ, ते परमेशरो आत्मा तुसन मां रहते? 17 अगर कोई तुसन नुकसान पुज्जाए, त परमेशर तैस नाश केरेलो; किजोकि परमेशरेरु मन्दर पवित्रे, ते तैन तुस आथ। 18 कोई अपने आपे धोखो न दे, अगर तुसन मरां कोई इस दुनियारे लोकन मां अपनो आप अक्लमन्द समझो, त तैस दुनियारी नज़री मां बेवकूफ बनोरु लोड़; ताके परमेशरेरे नज़री मां सच्चे ज्ञानी बने। (aiōn g165) 19 किजोकि इस दुनियारी अक्ल परमेशरे कां बेवकूफीए, ज़ेन्चरे पवित्रशास्त्रे मां लिखोरुए; “परमेशर जैन्न तैन केरे च्छैकी मां फसाते।” 20 ते फिरी पवित्रशास्त्र इन भी ज़ोते, “प्रभु जैनी केरे खियालन ज्ञानते कि बेफैइदेन।” 21 एलहेरेलेइ कोई मैनन् पुड़ घमण्ड न केरे, किजोकि किछ परमेशरे तुशू भलेरे लेइ दित्तोरुए। 22 तैन इन आए कुन अवं पौलुस, कुन अपुल्लोस, कुन कैफा, कुन दुनिया, कुन ज़ीनू, कुन मरनू, कुन ई वक्त, कुन एजनेबालो वक्त, सब किछ तुशूए। 23 ते तुस मसीहेरथ, ते मसीह परमेशरोए।

4 मैन्ह असन मसीहेरे सेवक, ते परमेशरेरे भेदां केरे भण्डारी समझन। 2 ज़ेन्चरे कि ज़ैस मैन्ह तैसेरे मालिके ज़ैन कम दित्तोरे भोए, तैने तैन कम केरने मां वफादार लोड़ रावरु, ज़ेसेरो तैस हुक्म दित्तो जेवरोए। 3 पन मेरे खियाले

मां ई गल निकड़ीए, कि तुस या मैनन् मरां कोई फैसलो केरनेबालो मीं परखे,
 बल्के अवं अपने आऐ न पेरखी। 4 किजोकि मेरो ज़मीर मीं कोन्ची गल्ली मां
 दोषी न ठहराए, पन इस सेइं अवं बेइलजाम न ठहरी, किजोकि मेरो परखने
 बालो प्रभुए। 5 ते जांतगर प्रभु वापस न एज्जे, पेइली केन्चेरो इन्साफ न
 केरा, तैए लोकां केरे सारे खियाल साफ तरीके ज़ोलो, जैन केरे बारे मां होरो
 कोई तैन न ज़ाने, ते तैन केरे दिलां केरे इरादे बांदे केरेलो। तैखन परमेश्वरी
 तरफां हर केन्चेरी तारीफ भोनीए। 6 हे ढुलाव ते बेइनव, मीं इन गल्लन
 मां तुश्शे लेइ अपनि ते अपुल्लोसेरी बेंस, मिसालारे रीति पुड़ कियोरीए,
 एल्हेरेलेइ कि तुस इश्शे ज़िरिये सेइं शिखा, कि जैन पवित्रशास्त्रे मां लिखोरे
 करां अग्रोवं न बधा, ते एककेरे पासे ते होरेरे खलाफ घमण्ड न केरथ। 7 केन्चे
 तू होरन करां रोडो नई बनोरो। सब किछ तीं परमेश्वरे तरफां दित्तू जोरूए,
 अगर तीं सब किछ परमेश्वरे दितोरू त तुसन घमण्ड केरनेरो अधिकार नई। 8
 तुस त रज़ोरेथ; तुस दौलतमन्द भोइजेइ, तुसेई इश्शे बगैर राज़ कियूँ: पन रोडू
 भोथू कि तुस राज़ केरथे ते अस भी तुसन सेइं साथी भोथे! 9 मेरी समझी मां
 परमेश्वरे अस प्रेरित लोक सेब्बना पत्ती तैन लोकां केरे ज़ेरे ठहरावरेम, जैन
 केरे मौतरो हुक्म भोइ जेवरोए; किजोकि अस दुनियारे ते स्वर्गदूतां, ते मैन्हु
 केरे लेइ अक तमाशो बनोरेम। 10 लोक असन बेवकूफ समझातन किजोकि
 अस मसीहेरे बारे मां प्रचार केरतम, पन तुस गेतली सेइं सोचतथ कि तुस
 अक्लमन्द मसीही आथ! बड़े लोक समझातन कि असन कां कोई अधिकार
 नई। पन तुस घमण्डे सेइं ज़ोतथ कि तुसन कां परमेश्वरे तरफां शक्ति आए,
 तैना इश्शी आदर न केरन पन तुश्शी आदर केरतन। 11 अस इस वक्ते तगर
 नियन्ने-टलिशोरे, ते छिनदोरे लिगड़न मां आम, ते धक्के खातम, ते असन कां
 घर नई; 12 ते अपने हथेइं सेइं कम केरतां मेहनत केरतम। लोक बुरु ज़ोतन,
 अस तैन बरकत देतम; तैना सतातन, अस झैल्लतम। 13 तैना बदनाम
 केरतन, अस नेरमी सेइं गल केरतम, इड़ी तगर कि, अज़ तगर लोक हेजू भी
 इश्शी इज़ज़त न केरन, तैना ज़ोतन कि इश्शी कोई कीमत नई। 14 मेरी इना
 गल्लां लिखनेरो मकसद ई नई कि तुसन छिथेई, पन अवं तुसन सुधारने
 चाताई, किजोकि तुस मेरे बच्चां केरे ज़ेरे आथ जैन सेइं अवं प्यार केरताई।
 15 किजोकि अगर मसीह मां तुश्शे शिखालनेबाले दश हजार भी भोथे, फिरी

भी तुश्शे बड़े बाजी नई, एल्हेरेलेइ कि मसीह यीशु मां खुशखेबरी सेइं अवं
तुश्शो बाजी केरो ज़ेरो भोए। 16 एल्हेरेलेइ अवं तुसन कां मिनत केरताईं, कि
मेरी ज़ेरि चाल चला। 17 एल्हेरेलेइ मीं तीमुथियुसे ज़ैन प्रभु मां मेरु ट्लारु, ते
वफादार मटूए, तुसन कां भेज़ोरुए, ते तै तुसन यीशु मसीह मां मेरु चालचलन
याद करालो, ज़ेन्चरे कि अवं हर एककी ठैरी हर कलीसिया मां शिक्षा देताई।
18 तुसन मरां बड़े लोक सोचतन कि अवं तुसन कां नई एजनो, एल्हेरेलेइ तैना
घमण्ड केरतन। 19 पन प्रभु चाए त मीं तुसन कां जल्दी एजनौ, ते न सिफ
तैन घमण्ड केरनेबालां केरि गल्लां नई, पन तैन केरि शेक्ति भी ज़ैनेलो। 20
किजोकि परमेशरेउ राज़ गल्लां केरु नई, पन शेक्ति मांए। 21 अगर हेजू भी
तुसेई बुरी बत नई शारोरी, अवं तुस सेखती सेइं झिड़क देइलो। पन अगर
तुसेई बुरी बत शारी त अवं तुसन सेइं नेरमी त कने प्यारे सेइं बर्ताव केरेलो।

5 इडी तगर शुन्ने मां ओरुए, कि तुसन मां बदमाशी भोचे, मतलब एरी
बदमाशी ज़ेरि गैर विश्वासी लोकन मां भी न भोए, कि अक मैन्हु अपने
बेबानी-अम्मा रखते। 2 तुसेई त दुःख कियोरो लोड़तो थियो ते उदास भोरु
लोड़तू थियू, ते ज़ैनी मैने एरु कियू तै कढोरो लोड़तो थियो, पन इसेरे बदले
तुस घमण्ड केरतथ। 3 चाए अवं तुस सेइं साथी नई, पन मेरे विचार तुसन
सेइं साथी आन, चाए अवं तैडी नई, फिरी भी मैने मां इन आए, कि एरु कम
केरनेबालेरे बारे मां फैसलो केरने लोरोई। 4 इन तैन आए ज़ैन केरनेरी ज़रूरत
आए। हकीकति मां इश्शे प्रभु यीशु मसीहेरो अधिकार तुसन कां आए, इन
पिशैनतां विश्वासी केरे रूपां अकोटु भोथ। इन एरु आए कि अवं भी अपने
मैने मां तैडी आई। ते फिरी प्रभु यीशु मसीहेरे ज़िरिये। 5 तैस मैन्हु ज़ैने पापी
बर्ताव कियोरो, तैस अपने टोली मरां कढा ते तैस मैन्हु शैतानेरे अधिकारे मां
वापस देथ, इस उमीदी सेइं कि तै अपने पापन करां मन फिरालो। किजोकि
अगर तै पापन करां मन फिरालो त तैस प्रभु यीशु मसीहेरे इन्साफेरे दिहाड़े
मुक्ति मैलेली। 6 घमण्ड केरनू बंद केरा, कि तुस न ज्ञानथ, कि थोड़ू ज़ेरु
खमीर पूरे सन्नोरे अट्टे खमीर केरते। 7 परानू खमीर केढतां, अपनो आप
साफ केरा, कि नंबू सनोरु अटू बना; ताके तुस अखमीरे राथ, किजोकि
इश्शो भी फ़सह ज़ै मसीहे, तै बलिदान भोरोए। 8 ते एज्जा अस तिहारे मां
आनन्द मनाम, न पुराने खमीरे सेइं न बुरेई, ते दुष्टरे खमीरे सेइं, पन सिधीयैई,

ते सचैइयरे बगैर खमीरेरे रोट्टी सेइं। ९ मां अपने पेइले चिट्ठी मां लिखोरुए, कि बदमाशी केरनेबालां केरि संगती न केरथ। १० इन नई, कि तुस बिलकुल इस दुनियारे बदमाशी केरनेबाले, या लालच केरनेबाले, या धोखो केरनेबालन, या मूरती पुज़ने बालां केरि संगती न केरा; किजोकि एन्चरे तुसेई इस दुनियाई मरां निसनू पेथू। ११ मेरु ज़ोनू त इन्ने, कि अगर कोई अपने आये विश्वासी ज़ोते, ते बदमाशी केरनेबालो, या लालची, या मूरती पुज़ने बालो, या गैई देनेबालो, या पीने बालो, या धोखो केरनेबालो भोए, त तैस सेइं साथ न रेखतथ, बल्के एरे मैन्हु सेइं साथी रोट्टी भी न खेइयथ। १२ ई मेरी ज़िमेबारी नई, कि ज़ैना लोक विश्वासी नई तैन केरि निन्दा केरि। पन हकीकति मां तुसेई तैन लोकन सज्जा दित्तोरी लोड़े ज़ैना तुश्शे कलीसियारे हिस्सो आन। १३ पन ज़ैना विश्वासी नई तैन केरो इन्साफ परमेश्वर केरते पन पवित्रशास्त्र ज़ोते, बुरु कम केरनेबाले मैन्हु अपने टोली मां एजने न देथ।

६ अगर तुसन मरां केन्चरी होरि विश्वासी सेइं लड़ाई भोए, त तुसेई फैसलेरे लेइ अधर्मी हाकिमन कां न लोड़े ज़ोवरु; तुसेई अपने कलीसियारे विश्वासी लोकन ज़ोवरु लोड़े कि तैना तुश्शे मुकदमेरो फैसलो केरन कि कौन सही ते कौन गलते। २ कुन तुस न जानथ, कि परमेश्वरे लोकेई दुनियारे लोकां केरो इन्साफ केरेनोए? ते अगर तुसेई दुनियारे लोकां केरो इन्साफ केरनोए, ते कुन तुस निकड़े करां निकड़े लड़ैइयरो फैसलो केरनेरी काबल नई? ३ तुस जानतथ कि एजनेबाले वक्ते मां असेई तैन स्वर्गदूतां केरो इन्साफ केरनोए ज़ैना स्वर्ग मरां शारोरे थिये, त पक्को तुस रोज़ेरी आम गल्लां केरो फैसलो केरि बटतथ। ४ अगर एरी गल्लां भोन, त तुसेई तैन केरो फैसलो केरनेरे लेइ तैन कां न लोड़े जेवरी ज़ैन केरि आदर कलीसियारे लोकन मां न की गाए। ५ अंवं तुसन छिथानेरे लेइ इन ज़ोताई, कि सऱ्ये तुसन मां अक भी अक्लमन्द न मैल्लो, जै विश्वासी लोकां केरो फैसलो केरे। ६ बल्के विश्वासी लोकन एप्पू मांमेई मुकदमे भोतन, ते तैना भी गैर विश्वासी लोकां केरे सामने। ७ पन सऱ्ये तुसन मां बड़ो दोष त ईए, एप्पू मांमेई मुकदमे केरतथ, बल्के बैइन्साफ किजो न झौल्लथ? अपनो नुकसान किजो न झौल्लथ? ८ बल्के बैइन्साफ केरतथ, ते नुकसान पुज़ातथ, ते तै भी विश्वासी लोकन। ९ कुन तुस न जानथ, कि बैइन्साफ लोक, परमेश्वरेरे राज़ोरे बारिस नई भोने? धोखो न

खाथ, न वेश्यागामी, न मूरती केरि पूजा केरनेबाले, न आयाश, न लुच्चे, न तैना ज़ैना मङ्द मङ्दन सेइं जिसमानी रिश्तो रखतन। 10 न च़ोर, न लालच़ी, न पीने बाले, न गैर्ड देनेबाले, न अंधेर केरनेबाले परमेश्वरे राज़ज़ेरे बारिस भोनेन। 11 तुसन मरां पेइले किछ एरे थिये, पन प्रभु यीशु मसीहेरे नव्वे ते इश्शे परमेश्वरी आत्माई सेइं तुश्शे पाप धोए जे, ते तुस पवित्र भोए ते धर्म ठहराए। 12 तुसन मरां किछ ज़ोई बटतन, कि सब चीज़ां मेरे लेइ जेइज़ त आन, पन सब चीज़ां फैइदेरी नई, सब चीज़ां मेरे लेइ जेइज़ त आन, पन अवं कोन्ची भी चीज़रो गुलाम बेनेलो। 13 तुसन मरां किछ ज़ोई बटतन, खानू पेटेरे लेइए, ते पेट खानेरे लेइ, एन सच्चे, पन परमेश्वर रोटी भी ते पेटे भी नाश केरेलो, पन जिसम बदमाशी केरनेरे लेइ नई, बल्के प्रभुएरे लेइए; ते प्रभु जिसमेरे लेइए। 14 ते परमेश्वरे, प्रभु यीशु अपने शेक्कि सेइं ज़ींतो केरो, ते तै असन भी ज़ींतो केरेलो। 15 कुन तुस न ज़ानथ, कि तुश्शी जाना मसीहेरे अंगन? ते कुन अवं मसीहेरे अंगन वेश्यारे अंगन सेइं शामिल केरि? नई, कथी नई। 16 कुन तुस न ज़ानथ, कि ज़ै कोई वेश्याए सेइं न जेइज़ रिश्तो रखते, तै तैस सेइं अक जान भोते? किजोकि पवित्रशास्त्र ज़ोते, “कि तैना दुइये अक जान भोलां।” 17 ते ज़ै प्रभुएरी संगती मां रहते, तै तैस सेइं साथी अक आत्मा भोते। 18 बदमाशी केरने करां दूर राथ, ज़ेत्रे होरे पाप मैन्हु केरते, तैना जानरे बेइरन, पन बदमाशी केरनेबालो अपने जानरे खलाफ पाप केरते। 19 कुन तुस न ज़ानथ, कि तुश्शी जान पवित्र आत्मारू मन्दरे; ज़ै तुसन मां आए, ते तुसन परमेश्वरी तरफां मैलोरोए? ते तुस अपने नई पन तुस परमेश्वरेरे आथ; 20 किजोकि प्रभुए अपनि जानरी कीमत देइतां तुस घिनोरेथ, एल्हेरेलेइ अपने जानरे ज़िरिये सेइं परमेश्वरी आदर केरा।

7 हुनी अवं तुश्शे तैन सवालां केरो जुवाब देताई, ज़ैना तुसेई अपने चिट्ठी मां पुच्छे, तुसेई पुच्छू, इन रोडू आए कि लोक ड़ला न बनान? 2 हाँ इन ज़रूरी आए कि बदमाशी केरनेरे डरे सेइं हर मङ्देरी कुआन्श, ते हर कुआन्शरो मुन्श भोए। 3 मुन्श अपने कुआन्शरू हक पूरू केरे; ते तेन्चरे कुआन्श भी अपने मुन्शरू। 4 कुआन्शी अपने जिसमे पुड़ अधिकार नई, पन तैसेरे मनशेरो अधिकारे; तेन्चरे मुन्शे भी अपने जिसमे पुड़ अधिकार नई, पन कुआन्शी। 5 तुस एककी होरि करां अलग न भोथ; पन सिर्फ थोड़े चिरेरे लेइ बिस्तारे

सेइं कि प्रार्थनारे लेइ फुर्सत मैल्ले, ते फिरी अकोटु भोथ, कि एरु न भोए,
 शैतान तुसन परखे। 6 पन ज़ैन अवं इन ज़ोने लोरोई ई सुझावे, न कि हुक्म।
 7 अवं इन चाताई, कि ज़ेरो अवं अड्लाव आई, तेरहे सब मैन्हु भोन; पन
 परमेशरे किछन ड्ला केरनू वरदान दित्तोरुए, ते किछन अकैलू रानेरु वरदान
 दितोरु। 8 मेरी सल्लाह अड्लां ते विधवां केरे ई आए, कि तैना अड्लाए रान,
 ज़ेन्चरे अवं आई। 9 पन अगर तैना अपनो आप कैबू न केरि बटन, त ड्ला
 बनान, किजोकि ड्ला बनानो इच्छान मां मसत राने करां रोडोए। 10 ज़ैन
 केरो ड्ला भोरोए, तैन केरे लेइ अवं नई, बल्के प्रभु हुक्म देते, कि कुआन्श
 अपने मुन्शो करां अलग न भोए। 11 (अगर अलग भोइ गाए, त होरो ड्ला न
 बनाए; या अपने मुन्शो सेइं फिरी मेल मिलाप केरे) ते मुन्श अपने कुआन्शी न
 शारे। 12 होरन सेइं प्रभु नई, पन अवं ज़ोताई, अगर केन्ची विश्वासी ढ्लाएरी
 कुआन्श विश्वासी न भोए, ते तै कुआन्श तैस साथी राने सेइं खुश भोए, त
 तै तैस न शारे। 13 ते ज़ैस कुआन्शरो मुन्श विश्वासी न भोए, ते तै मैन्हु
 तैस साथी राने सेइं खुश भोए; तै मुन्शो न शारे। 14 किजोकि एरो मुन्श ज़ै
 विश्वासी न भोए, परमेशर तैस सेइं एरो बर्ताव केरते ज़ेन्चरे अपने लोकन सेइं,
 किजोकि तैसेरी कुआन्श मसीही आए, ते एरी कुआन्श ज़ै विश्वासी न भोए,
 परमेशर तैस सेइं एरो बर्ताव केरते ज़ेन्चरे अपने लोकन सेइं, किजोकि तैसेरो
 मुन्श मसीही आए। अगर एरु न भोथू कि विश्वास न केरनेबालो मुन्श या
 कुआन्श परमेशरे लोक न भोथे, तैखन तुश्शे बच्चे भी परमेशरे न भोथे।
 पन हुनी तुश्शे बच्चे भी परमेशरे भोइ जे। 15 पन ज़ै मड्द ते कुआन्श
 विश्वासी न भोए, अगर तैना अलग भोन, त अलग भोने देथ, एस हालती मां
 कोई विश्वासी ढ्लाए या बेइन बन्धने मां नई। पन परमेशरे अस कुजोरेम
 कि सुखे सेइं ज़ींम। 16 हे कुआन्शव तुस इस गल्ली याद रखा कि तुश्शे
 मुन्श तुश्शे वजाई सेइं तुश्शी कुआन्शां मुक्ति हासिल केरि बटतन, ते हे मुन्शव तुस याद
 रखा कि तुश्शे वजाई सेइं तुश्शी कुआन्शां मुक्ति हासिल केरि बेटिन। 17
 ज़ैन किछ अवं ज़ोने लोरोई तैसेरो नचोड़ ई आएः हर मैन्हु तैस हालती मां
 रावरो लोडे ज़ै प्रभुए तैस दित्तोरीए जेइस तैनी परमेशरेरु कुजानू शुनू। अवं
 इन सेब्भी कलीसियान मां एन्चरे ठहराताई। 18 अगर कोई मैन्हु ज़ै खतनो
 कियोरे कुजोरो; त तै प्रभु यीश पुढ़ विश्वास केरते, तैस अपनो आप बगैर

खतने बालो हिरानेरी ज़रूरत नई; ते अगर कोई मैन्हु ज़ेसेरो खतनो नई भोरो,
 ते तै प्रभु यीशु पुड़ विश्वास केरते, तैस खतनो कराने ज़रूरत नई। 19 न
 खतनो किछ चीज़े, ते न खतनो न करानो, बल्के परमेशरेरे हुक्म मन्ने बड़े
 ज़रूरिन। 20 हर अक ज़ैस हालती मां कुजावरोए, तेन्हरे राए। 21 तू गुलाम
 थियो ज़ेइस परमेशरे कुजावरो थियो, फिरी भी परेशान न भोथ; पन अगर
 तू आजाद भोइ सकतस, त भो। 22 किजोकि ज़ैना गुलामेरे हालती मां
 कुजोरेन, तैना प्रभु मां आजादन, तेन्हरे ज़ैना प्रभु मां आजाद कुजोरेन, तैना
 मसीहेरे गुलामन। 23 परमेशरे तुस बड़ी कीमत देइतां घिनोरेथ, मैन्हु केरे
 गुलाम न बना, पन परमेशरे गुलाम बना। 24 हे ढलाव ते बेइनव, ज़ै ज़ैस
 हालती मां परमेशरे कुजवरोए, तै तैस्से हालती मां परमेशरे सेइं साथी राए।
 25 कुवैरी केरे लेइ मीं प्रभु करां कोई हुक्म नई मैल्लेरो, पन प्रभुए दयाई सेइं
 मीं अक्ल दित्तोरीए, ज़ैस पुड़ भरोसो कियो गाते, ते अवं ई सलाह देताई। 26
 किजोकि इन दिहाड़न मां विश्वासी लोकां केरे लेइ बुरु गल्लां भोने लोरिन,
 एल्हेरेलेइ मीं लगते कि इन तुश्शे लेइ रोड़ूए, अवं ई सलाह देताई कि ज़ैना
 ज़ेरे आन तैना एन्हरे रान। 27 अगर तेरी कुआन्शो, त तू तैस करां अलग
 भोनेरी कोशिश न केर, ते अगर तेरी कुआन्श नई त तू कुआन्शी न तोप। 28
 पन अगर तू ढला भी केरस, त पाप नई; ते अगर कुवारी ढलाई गाए त कोई
 पाप नई; पन एरे लोकन इस दुनियाई मां बड़ी परेशनी भोली, ते अवं बङ्गाने
 चाताई। 29 हे ढलाव ते बेइनव, अवं इन ज़ोताई, इश्शो इस दुनियाई मां जादे
 वक्त नई रावरो, एल्हेरेलेइ जादे फिक्र न केरा कि तुश्शी कुआन्शां आन या
 नई, पन प्रभुएरी सेवारे बारे मां सोचते राथ। 30 ते तैना ज़ैना लेरां देतन या
 ज़ैना खुश आन, या ज़ैना अपनि बनानेरे लेइ चीज़न घिन्तन, इन सेब्ही गल्लां
 केरे बारे मां जादे लोड़े सोचोरु (किजोकि इना सब गल्लां प्रभुएरी सेवा केरनि
 बिसरैली)। 31 तैना ज़ैना दुनियारी चीज़ां इस्तेमाल केरतन, तैनेई तैन सेइं
 लगाव न लोड़े रखोरो, किजोकि ज़ेन्हरे अस जानतम ई दुनिया जल्दी खतम
 भोनेबालीए। 32 मेरी इच्छा ई आए कि तुस दुनियारे ज़िन्दगरी खुवाइशन
 करां आजाद राथ, अडलाव मैन्हु प्रभुएरी सेवा केन्हरे केरनि ई फिक्र केरते
 कि प्रभुए खुश केरे। 33 पन ढलावरो मैन्हु दुनियारी गल्लां केरि फिक्री मां
 रहते, कि केन्हरे अपने कुआन्शी खुश रखे। 34 तैने दूई चीज़ां केरे बारे मां

सोचोरू लोडे, अपनि कुआन्श खुश केरनेरे बारे मां ते प्रभु खुश केरनेरे बारे मां। ड्लावरी ते अड्लाई मां भी फर्के, अड्लाई प्रभुएरी फिक्री मां रहतीए, कि केन्चरे अपनि आत्मा, ते जिसम दुइये पवित्र रखे, पन ड्लावरी दुनियारे फिक्री मां रहतीए, कि अपने मुन्शे खुश रखे। 35 ई गल तुश्शे फैइदेरे लेइ ज़ोताई, न कि तुसन फसानेरे लेइ, बल्के एल्हेरेलेइ ज़ेन्चरे लोडे तेन्चरे कियूं गाए, ताके तुस अक मन भोइतां प्रभुएरी सेवाई मां लोगोरे राथ। 36 ते अगर कोई इन समझे कि, अवं एपनी तैस कुवैरारू हक लोरोई मारने ज़ेसेरी जवानी लोरी ढलने, त ज़ेन्चरे चाए तै केरे, इस मां पाप नई, तै तैसेरो ड्ला भोने दे। 37 पन अगर ज़ैने बाजी अपने मने मां पक्को फैसलो कियोरोए, कोन्ची होरेरे दबावेरे अलावा तै केरते, त तैस कां तै अधिकारे ज़ैन तै केरनू चाते। ते अगर तै फैसलो केरते कि तैसेरी कुई ज़ेरि आए तेरही रखे, तै परमेश्वरी नज़री मां रोडू कम केरेलो। 38 ज़ै अपनि कुवैरारो ड्ला कराते, तै रोडू केरते, ते ज़ै न कराए तै भी रोडू केरते। 39 ज़ांतगर कोन्ची कुआन्शरो मुन्श ज़ींतो रहते, तांतगर तैस सेइं साथी रावरू लोडे, पन ज़ेइस तैसेरो मुन्श मेरि गाए, ज़ैस सेइं चाए ड्ला केरि बट्टीए, सिर्फ विश्वासी लोकन मां। 40 पन अगर तै फिरी दुबारां ड्ला न केरे, त मेरे खियाले मां बड़ी धने ते अवं समझताई, कि परमेश्वरो आत्मा मीं चलाने लोरीए।

8 तुसेई अपने चिठ्ठी मां मूरतन कां चाढ़ेरी चीज़ां केरे बारे मां पुछोरू थियूं, इस बारे मां अस ज़ानतम, पन ज्ञान असन अपने बारे मां घमण्डी बनाते, पन प्यार सेइं होरि केरि तरक्की भोतीए। 2 अगर कोई समझे, कि अवं किछ ज़ानताई, ते ज़ेरु ज़ानेरु लोडे तेरु हेजू तगर न ज़ाने। 3 पन अगर कोई परमेश्वरे सेइं प्यार केरते, ते तैस परमेश्वर पिशानते। 4 एल्हेरेलेइ अवं खानेरे बारे मां जुवाब देनो चाताई, अस मूरती केरे सामने बलिदान कियोरी चीज़ां केरे खानेरे बारे मां ज़ानतम, कि अस ज़ानतम कि मूरती सच्चो परमेश्वर नई, सिर्फ एकके सच्चो परमेश्वरे। 5 पन फिरी भी अम्बरे ते धेरतली पुड़ लोक बडे देबते ते प्रभु ज़ोतन, पन इश्शे लेइ अक्के परमेश्वर, तै इश्शो बाजी आए। तैने सैरी चीज़ां बनेइ, अस तैसेरे ज़िरिये ज़ींते रातम। एन्चरे असन कां अक्के प्रभुए ते तै प्रभु यीशु मसीहे। तैसेरे ज़िरिये सब किछ बनवं जेवं, अस तैसेरेलेइ ज़ींतेम। 7 पन सेब्बी विश्वासी लोकन इसेरु ज्ञान नई; पन किछ

लोक हेजू तगर मूरतन असली भोनेरी सोचनेरी आदते, एल्हेरेलेइ ज़ैखन लोक
मूरतिन कां चाढ़तन, त तैना असली देबतन पूजा केरे रूपे मां सोचतन ते तैन
केरो ज़मीर कमज़ोर भोइतां अशुद्ध भोइ गाते। ८ पन खानू असन परमेशरे
कां न पुज्याए, अगर अस न खाम, त असन किछ नुकसान नई, ते अगर
खाम त कोई फैइटो भी नई। ९ पन हुशार राथ, एरु न भोए, कि तुश्शी ई
आज़ादी कमज़ोर विश्वासे बालां केरे लेइ पाप केरनेरे लेइ वजा बने। १०
किजोकि अगर तीं जैनी मन्दरे मां मूरतन कां चाढ़ोरु खातो लाए, ते तै विश्वासे
मां कमज़ोर मैन्हु भोए, ते कुन तैसेरे ज़मीरे मां मूरती केरे सामने चैढ़ोरी
चीज़ां केरे खानेरी दिलेरी न भोली। ११ एस रीति सेइं तेरे ज्ञानेरे वजाई सेइं तै
विश्वासे मां कमज़ोर ढला ज़ेसेरे लेइ मसीह मरो तै मसीह पुड़ विश्वास केरनो
न शारे। १२ एन्वरे तुस अपने विश्वासी लोकन ठोकर पुजेइतां न सिर्फ तैन
केरे पापी भोए, बल्के मसीहेरे भी पापी भोले। १३ इस वजाई सेइं अगर खानू
कोन्ची विश्वास केरनेबालेरे लेइ ठोकर भोए, ते अवं कोन्ची तरीके सेइं कथी
मास न खेइलो, एरु न भोए कि मेरु खानू कोन्ची विश्वास केरनेबालेरे लेइ
ठोकरारी वजा बने। (aiōn g165)

९ अवं ज़ैन केरनू चाताई तैन केरनेरे लेइ आज़ाद आई। अवं अक प्रेरित
आई, मीं प्रभु यीशु लावरोए जै इश्शो प्रभुए, ज़ैन कम मीं प्रभुएरे लेइ कियूं
तुस तैसेरो नतीजोथ। २ अगर होरे लोक इस गल्ली न मनन् कि अवं प्रभु
यीशुएरो प्रेरित आई, त ढलाव तुसेई त लोडे मन्नोरु। किजोकि मीं ए तुसन
कां खुशखबरी आनोरी थी। तुश्शो प्रभु विश्वास इस गल्ली साफ केरते कि
अवं हकीकति मां तैसेरो प्रेरित आई। ३ जैना लोक मेरे प्रेरित भोनेरे अधिकारे
पुड़ सवाल पुळ्हतन, तैन केरे लेइ मेरो ईए फैसलो आए। ४ कुन असन खाने
पीनेरु हक नई? ५ कुन असन अधिकार नई, कि कोन्ची मसीही कुआन्शी
सेइं डला बनाम, ज़ेन्वरे होरे प्रेरित, ते प्रभुएरे ढला ते कैफा (यानी पतरस)
केरतन? ६ या सिर्फ मीं ते बरनबासे जिन्दगी ज़ीनेरे लेइ कम कियोरु लोडे?
७ को ज़ेरो फौजी अपनू खेइतां जंग केरते? या कौन बाग लेइतां तैसेरो फल न
खाए? कौन भैट्टां रेखतां तैन केरु दुद्ध न पीए? ८ अवं इना गल्लां मैन्हु केरि
रीति पुड़ नई लोरो ज़ोने, मूसेरो कानून भी इन्ने ज़ोते। ९ एल्हेरेलेइ मूसेरो
कानून ज़ोते, तैस मां इन लिखोरुए, “तुस खल्ले मां चलते बार दांतेरु आशी

न बेंदथ।” कुन परमेशर दांतां केरि फिक्र केरते? नई। 10 या खास केरतां इश्शो बारे मां लिखोरू, हाँ इश्शो लेइ लिखोरूए, किजोकि ठीके कि जोट्लने बालो उमीदी सेइं जोट्ले, उपाने बालो उमीदी सेइं उपाए। 11 असेई तुसन परमेशरेरो सन्देश शुनोवारोए। ज़ेन्नरे लोक बीज़ बेतन तेन्नरे असेई तुसन मां परमेशरेरे वचनेरु बीज़ बेव। एल्हेरेलेइ तुश्शो फरजे कि इश्शो रोजेरो खर्च्चे असन देथ। 12 जां कि तुसेई होरि लोकां केरि मद्दत की, ज़ैनेई तुसन प्रचार कियो, त मेरु त कने बरनबासेरु जादे हके। किजोकि अस तुश्शो पेइले प्रेरित आम, फिर भी असेई अपने ज़रुरतरे चीजां केरे लेइ ज़बरदस्ती न की, तैसेरे बदले अपने मेर्जी सेइं सब किछ झौल्लू कि मसीहेरे खुशखेबरी पुड़ विश्वास केरनेरे लेइ केन्नरे लेइ रुकावट बनम। 13 कुन तुस न ज्ञानथ कि ज़ै पवित्र चीजां केरि सेवा केरते; तै मन्दरे मरां खाते; ते ज़ै बलिदान केरनेरे ठारारी सेवा केरते; तै बलिदान केरनेरे ठारी सेइं शामिल भोते। 14 एन्नरे प्रभुए ठहराव, कि ज़ैना लोक खुशखेबरी शुनान, तैन केरि ज़िन्दगरो गुजारो भी तैन लोकन करां लोडे भोरो ज़ैना लोक खुशखेबरी शुन्तन। 15 पन मीं इन अधिकारन मरां कोई भी इस्तेमाल न कियो। ते मीं एना गल्लां एल्हेरेलेइ नई लिखोरी, कि मेरे लेइ एरु कियूं गाए। बिलकुल नई! किजोकि इस करां त मेरु मरनू रोडूए; कि कोई मेरु घमण्ड बेफैइदू ठहराए। 16 ते अगर अवं खुशखेबरी शुनेई, त मेरु किछ घमण्ड नई, किजोकि इन त मेरे लेइ ज़रुरीए, ते अगर अवं खुशखेबरी न शुनेई, त मीं पुड़ अफसोस। 17 किजोकि अगर अवं इन कम अपने मेर्जी सेइं केरताई, त मीं इनाम मैलेलू। पन अगर इन मेरी मेर्जी सेइं नई, पन अगर परमेशरे ई ज़िमेदारी दित्तोरीए, त अवं कोन्वी इनामेरी उमीद न रेख्खी बेटि। 18 ते फिरि मेरु कुन इनामे? कि खुशखेबरी शुनाने मां मसीहेरी खुशखेबरी मुफ्त बेंटी; इडी तगर कि ज़ैन खुशखेबरी मां मेरु हक्के, तैसेरो पूरो इस्तेमाल केरि। 19 किजोकि सेब्भन करां आजाद भोने पुड़ भी मीं अपनो आप सेब्भी केरो गुलाम बनाव; कि जादे करां जादे लोकन खिचतां ऐर्नीं। 20 अवं यहूदी केरे लेइ यहूदी बनो ताके यहूदन खिचतां मसीह मां ऐर्नीं, ज़ैना लोक यहूदी केरे कानूनेरे अधीन तैन केरे लेइ कानूनेरे अधीन न भोने पुड़ भी अधीन भोव, कि तैन ज़ैना कानूनेरे अधीन तैन खिचतां मसीह मां ऐर्नीं। 21 ज़ैना कानूनेरे अधीन नई तैन केरे लेइ अवं (पन अवं ज्ञानताई कि अवं परमेशरेरे कानूने

करां हीन नई, किजोकि अवं मसीहेरे कानूनेरे अधीन आई) तेरो बनो, कि तैन खिचतां मसीह कां ऐनीं। 22 अवं विश्वासे मां कमज़ोरां केरे लेइ कमज़ोर बनो, ताके कमज़ोरन खिचतां मसीह मां ऐनीं, अवं सेब्ही मैन्हु केरे लेइ सब किछ बनो, कि कोन्ची न कोन्ची तरीके सेइं लोकन मुक्ति मैल्ली। 23 ते अवं सब किछ मसीहेरे खुशखेबरारे लेइ केरताई, कि अवं होरन सेइं साथी तैन बरकतां केरो हिसेदार भोई। 24 कुन तुस न ज्ञानथ, कि दौड़ी मां त सब दौड़तन, पन इनाम अक्के नेते, तुस तेरहु दौड़ा, कि ज़ींतथ। 25 ते हर अक पलवान हर किसमेरो परेज़ रखते, तै त अक शुकने बाले ताजेरे लेइ इन सब किछ केरते, पन अस त तैस ताजेरे लेइ केरतम जैन कधी नई शुकनू। 26 एल्हेरेलेइ अवं एन्हरे दौड़ताई, पन बगैर मकसदे नई, अवं भी एन्हरे मुकन सेइं लड़ताई, पन तैसेरो ज़ेरो नई जै हवाई मां लड़ते। 27 पन अवं अपने जानरी खुवैशन मारताई, ते कैबू मां केरताई; एरु न भोए कि होरन प्रचार केरि, ते मीं इनाम न मैलेलो।

10 हे ढ्लाव ते बेइनव, अवं तुसन याद करानू चाताई, इश्शे दादे-पड़दादन सेइं बड़े पेइले सुनसान ठैरी मां कुन भोवं, परमेशरे तैन केरे अग्री-अग्री बिदलार भेजतां तैन सेब्हन बत हिराई, ते तैना सब लाल समुन्दरेरे पैनी मांमेइं एन्हरे पार किये ज़ेन्हरे शुककोरी ज़मीनी मांमेइं। 2 ते तैन सेब्हेई बिदलारी मां, ते समुन्द्रे मां मूसेरो बपतिस्मो नेव। 3 ते तैन सेब्हेई तै रोट्टी खाइ, जै परमेशरे तैन स्वरोंरा दित्ती। 4 तैन सेब्हेई अक्के पानी पिव जैन परमेशर तैन दित्तू, किजोकि तैना आत्मिक चट्टानी मरां पीते थिये, जै तैन सेइं साथी-साथी चलाती थी; ते तै चट्टान मसीह थियो। 5 पन परमेशर तैन मरां बड़न सेइं खुश न भोव, एल्हेरेलेइ तैना रेगिस्ताने मां मेरि जे। 6 इना गल्लां इश्शे लेइ खबरदारी भोइ, कि ज़ेन्हरे तैनेई लालच कियूं, तेन्हरे अस बुरी चीजां केरु लालच न केरम। 7 ते न मूरती केरि पूजा केरनेबाले बनम; ज़ेन्हरे तैना किछ बनेरे थिये, ज़ेन्हरे पवित्रशास्त्रे मां लिखोरुए, “लोक तिहारे मां खाने पीने बिश्शो, ते फिरी बुरु केरनेरे लेइ उठे।” 8 ते न असां बदमाशी केरम; ज़ेन्हरे तैन मरां किछेई की, कि एककी दिहाड़ी मां 23000 मरे। 9 ते न अस प्रभु यीशु मसीह अज़माम; ज़ेन्हरे तैन मरां किछेई अज़माव, ते तैना सपन सेइं मेरि जे। 10 ते न तुस कुड़कड़थ, ज़ेन्हरे तैन मरां किछेई कुड़कड़व, ते परमेशरेरे

तरफां भेजोरे स्वर्गदूते तैना मारे। 11 पन इना सब गल्लां, जैना तैन पुड बीती,
 तैना खबरदैरारी ज़ेरि थी, ते तैना इश्शी लेइ हैदैइयत भी आन, जैना अस
 दुनियारे आखरी वक्ते मां रातम लिखी जई। (aiōn g165) 12 एल्हेरेलेइ जै
 विश्वासी समझते, “कि अवं विश्वासे मां मज़बूताई,” तै खबरदार राए; कि
 तैसे पापे मां फिरी न बिछुड़े। 13 तुसन पुड एरी अज़मैइश नई ओरी, जै मैन्हु
 केरे झाल्लनेरे बेइरे, परमेशर वाफदारे, तै तुसन शेक्ति करां जादे अज़मैइशी मां
 गाने न देलो, बल्के अज़मैइशी सेइं साथी तैस मरां कडेलो भी; कि तुस
 झेल्ली भी बटथ। 14 एल्हेरेलेइ, हे मेरे ट्लाराव, मूरती पूजने करां बेंग्रते राथ।
 15 अवं समझदार बुझतां, तुसन सेइं ज़ोताई, जैन अवं ज़ोताई, तुस तैसेरे बारे
 मां सोचा कि सही आए या नई। 16 जैखन अस यीशु मसीहेरे मौती याद
 केरनेरे लेइ अकोटु भोतम, त अस दाढ़रो रस कटोरे सेइं पीतम, ज़ेसेरे बारे
 मां असेई परमेशरेरु शुक्र कियोरुए, ते अस ट्लोड़ेरी रोटी भी खातम, ई तैन
 बरकतन मां शामिल भोनेरो निशाने, जैना मसीहेरे जानी ते खूने करां एइतिन?
 17 एल्हेरेलेइ, कि अकके रोटीए जै मसीहे, चाए अस बड़ेम, अस अक जान
 भोतम किजोकि अस तैए अकके रोटी खातम। 18 इसाएल्लेरे लोकां केरे बारे
 मां सोचा, जैखन सारे लोक परमेशरेरे लेइ चाढ़ेरी रोटी खातन, तैना परमेशरेरे
 आराधनारे हिस्सेदार भोतन, तेन्वरे जैना लोक मूरतन कां बलिदान कियोरी
 चीज़न खातन तैना मूरती केरि पूजाई मां हिस्सेदार भोतन। 19 फिरी अवं कुन
 ज़ोताई? कि मूरतरी बलिदान किछे, या मूरती किछे? 20 नई, बल्के इन, कि
 तैना जैन बलिदान केरतन, तैना परमेशरेरे लेइ नई, पन भूतां केरे लेइ केरतन,
 ते अवं न चैई कि तुस भूतन सेइं साथी शामिल भोथ। 21 तुस प्रभुएरे कटोरे,
 ते भूतां केरे कटोरे दुइयन मरां न पी बटथ! तुस प्रभुएरे मेज़े ते भूतां केरे मेज़े
 मां शामिल न भोइ बटथ। 22 कुन अस प्रभु सरकातम? कुन अस तैस करां
 जादे शेक्ति बालेम? 23 तुस ज़ोतथ, अस किछ भी केरनेरे लेइ आजाद आम,
 हाँ, पन सब किछ इश्शे लेइ रोड़ नई। अस किछ भी केरनेरे लेइ आजाद आम,
 पन सब किछ इश्शे विश्वासे जै परमेशरे पुड़े मज़बूत न केरे। 24 कोई अपने
 भलेरे बारे मां न सोचे बल्के होरि केरे भलेरे लेइ सोचे। 25 जैन किछ किसैई
 केरे दुकान्न पुड़ बिकते, तैन खाथ, ते इन न पुच्छा कि मास कोट्ठां आनोरु ते
 अपनो जमरे शुद्ध रखा। 26 तुस तैन खाथ किजोकि पवित्रशास्त्र जोते,

“धरती ते सैरी चीज़ां प्रभुएरी आन।” 27 ते अगर गैर विश्वासी लोकन मरां
तुसन कोई धाम ज्ञोए, त तुस गानू चातथ, त ज़ैन किछ तुशें सामने रख्यू
गाए तैन खाथ, ते किछ न पुछा, कि कोटुं आनोरुए। 28 पन अगर कोई
तुसन सेइं ज्ञोए, “इना त मूरतन कां बलिदान कियोरु,” त तुस तैस न खाथ,
तुशें ज़मीरेरे वजाई सेइं नई बल्के ज़ैने तुसन सेइं ज्ञोवं तैसेरे ज़मीरेरे वजाई
सेइं। 29 मेरो मतलब, तेरो ज़मीर नई, बल्के तैस होरेरो। भला, मेरी आज़ादी
होरि मैनेरे ज़िरिये किजो परखी गाए? 30 अगर अवं शुक्र केरतां खाताई, त
ज़ैस पुड़ अवं शुक्र केरताई, तैसेरे वजाई सेइं मेरी बदनामी किजो भोतीए?
31 आखरी मां अवं इन ज़ोताई, तुस चाए खाथ, चाए पीथ, या चाए ज़ैन किछ
केरा परमेश्वरेरी महिमारे लेइ केरा। 32 अवं ज़ैन किछ केरताई, हर केन्वी खुश
केरनेरी कोशिश केरताई, अपने भलेरे बारे मां न सोची बल्के होरि केरे भलेरे
बारे मां सोचताई, ताके सेष्भन मुक्ति मैल्ले। एन्घरे तुस भी ज़ीथ ताके तुशें
वजाई सेइं न यहूदन, न गैर यहूदन न परमेश्वरेरे कलीसियाई परेशानी भोए।

11 ज़ेन्वरे अवं मसीहेरी ज़ेरि चाल चलताई तुस भी मेरी ज़ेरि चाल चला। 2
हे ढलाव ते बेइनव, अवं तुशी तारीफ केरताई, किजोकि तुस मां हर वक्त
याद केरते रातथ; ते ज़ै शिक्षां मीं तुसन दित्ती तैन केरे मुताबिक चलतथ।
3 ते अवं चाताई, कि तुस इन ज्ञानथ, हर एकके मङ्गदेरी क्रोड़ी मसीहे, ते
कुआन्शरी क्रोड़ी मङ्गदे, ते मसीहेरी क्रोड़ी परमेश्वरे। 4 जै मङ्गद क्रोड़ी ढेकतां
प्रार्थना या भविष्यवाणी केरते, तै अपने क्रोड़री अनादर केरते, किजोकि तैन
घमण्डेरे बराबरे। 5 पन जै कुआन्श बगैर दोग ढेकतां प्रार्थना या भविष्यवाणी
केरतीए, तै अपने क्रोड़री अनादर केरती, किजोकि तैन टिनडी भोनेरे बराबरे।
6 अगर कुआन्श ओड़नी न ओड़े, त दोग भी कटे; अगर कुआन्शरे लेइ दोग
कट्टानो शरमरी गाल्ले, त ओड़नी ओड़े। 7 हाँ मङ्गदे अपनो दोग ढकनो जेइज़
नई, किजोकि तै परमेश्वरू रूप ते शोभाए; पन कुआन्श मङ्गदेरी शोभाए! 8
किजोकि मङ्गद कुआन्शी मरां नई, बल्के कुआन्श मङ्गदे मरां निसोरिए। 9 ते
मङ्गद कुआन्शरे लेइ नई पन कुआन्श मङ्गदेरे लेइ बनेवरीए। 10 एल्हेरेलेइ
स्वर्गदूतां केरे वजाई सेइं कुआन्शरे लेइ इन ठीके कि अपने दोग ढकके,
ताके इस सेइं बांदू भोए कि तै मङ्गदेरे अधीने। 11 फिरी भी प्रभु पुड़ विश्वास
केरनेबालन मां कुआन्श मङ्गदे करां अलग नई, ते न मङ्गद कुआन्शरी करां

अलगो। 12 किजोकि ज़ेन्चरे पेइली कुआन्श मड़दे मरांए, पन हुनी मड़दन कुआन्श जर्म देतीए। सब चीजां परमेशरे करां आन। 13 तुस एप्पू फैसलो केरा, कुन कुआन्शी खुले आम आराधनाई मां बगैर दोग ढेकतां परमेशरे कां प्रार्थना केरनि शोभतीए? 14 कुन तुस भी न ज़ानथ, कि अगर मड़द लमो दोग रखे त तैसेरेलेइ शरमे। 15 पन अगर कुआन्श लमो दोग रखे; ते तैसेरेलेइ शोभाए किजोकि बाल तैसेरे ढकनेरे लेइ दितोरेन। 16 पन अगर कोई मीं सेइं राजी न भोए, त इन समझो न इश्शी न इश्शे परमेशरेरी कलीसियां केरि एरी रीतए। 17 इस बारे मां अवं तुसन इन ज़ोताई, अवं तुश्शी तारीफ़ न केरि, एल्हेरेलेइ कि तुश्शे अकोटु भोने सेइं भलाई नई, बल्के नुकसान भोते। 18 किजोकि पेइलू त अवं इन शुनताई, कि ज़ैखन तुस कलीसिया मां आराधनारे लेइ अकोटु भोतथ, त तुसन मां अन-बन भोतीए ते अवं किछ हटी तगर याकीन केरताई। 19 पन, बिलकुल तुसन मां बटवारो भोरो लोडे, ताके तुसन जैन कां परमेशरेरी मन्जूरीए पिशाने गाथ। 20 ते ज़ैखन तुस इश्शे प्रभु यीशुएरी मौती याद केरनेरे लेइ एककी ठैरी अकोटु भोतथ, त तुश्शे बतवि सेइं इन न लगे कि प्रभु भोज खानेरे लेइ अकोटु भोरेथ। 21 किजोकि खानेरे वक्ते हर कोई अपनो ड्लाछङ्गो होरन करां पेइलो खाते, ते किछ त नियन्नो रहतन, ते किछ मतवालो भोइ गाते। 22 कुन खाने पीनेरे लेइ तुसन घर नई या परमेशरेरी कलीसियाई घटिया समझातथ, कि जैन कां नई तैन छितातथ अवं तुसन कुन ज़ोई? कुन इस गल्ली मां तुश्शी तारीफ़ केरि? अवं तारीफ़ न केरि। 23 जै शिक्षा मीं प्रभु करां पुजी तै शिक्षा मीं तुसन दित्ती, कि प्रभु यीशुए जैस राती तै ट्लुवाव जेव तैने रोट्टी नी। 24 ते शुक्र केरतां ट्लोडी, ते ज़ोवं; “कि ई रोट्टी मेरे जानी हिराती, जै तुश्शे मुक्तरे लेइ बलिदान की गातीए, मेरी यादी मां इन्ने केरा।” 25 ते एन्चरे जैखन तैनेई रोट्टी खाइ, यीशुए दाछङ्गो कटोरे भी नेव, ते ज़ोवं; “ई कटोरे मेरे खूने मां नंब्वो करारे, जैखन भी पीथ, मेरे यादी मां इन्ने केरा।” 26 किजोकि जैखन ई रोट्टी खाथ, ते इस कटोरे मरां पीथ, ते प्रभुएरे मौती ज़ांतगर तै न एज्जे, इस बारे मां ज़ोते राथ। 27 एल्हेरेलेइ जै कोई प्रभुएरे रोट्टी नाजाइज़ तरीके सेइं खाए, या प्रभुएरे कटोरे मरां पीये, तै प्रभुएरे जानरो ते खूनेरे खलाफ पापी भोलो। 28 एल्हेरेलेइ मैन्हु अपने बतवि परखे ते एन्चरे इस रोट्टी मरां खाए, ते इस कटोरे मरां पीये। 29 किजोकि

जै इस रोट्टी खाते ते कटोरे मरां पीते बार इन न पिशाने कि तैसेरो रिश्तो
प्रभुएरी जानी सेइं केरोए, तै इस खाने पीने सेइं एप्पू पुड़ आफत आनते। 30
एल्हेरेलेइ तुसन मरां बड़े कमज़ोर ते रोगी आन, ते बड़े मेरि भी जे। 31
एल्हेरेलेइ अगर अस पेइले अपनो आप परखम त परमेश्वर असन सज्ञा न
देलो। 32 पन प्रभु असन सज्ञा देइतां शिखालते एल्हेरेलेइ कि अस दुनियाई
सेइं साथी दोषी न भोम। 33 ते हे मेरे ढ्लाव ते बेइनव, जैखन तुस प्रभुएरी
रोट्टी खानेरे लेइ अकोटु भोतथ, एककी होरि बलगा। 34 अगर कोई नियन्त्रो
भोए त अपने घरे मां खाए, जैस सेइं तुस अकोटु भोथ, रोड़े चारे बर्ताव केरा,
जैस सेइं प्रभु तुसन सज्ञा न दे, ते होरि गल्लां अवं एइतां ठीक केरेलो।

12 हे मेरे ढ्लाव ते बेइनव, हुनी तुश्शे तैस सवालेरे बारे मां जै तुसेई पवित्र
आत्मारे वरदानां केरे बारे मां पुच्छो, अवं चाताई तुस रोड़े चारे समझा। 2 तुस
ज्ञानतथ, कि तुस विश्वास केरने करां पेइले तुसन जेन्चरे ज़ीते थिये तुसन
पुड़ भूतां केरो अस्सर भोतो थियो, कि तुस मूरती केरि पूजा केरथ, जैना
ज़ींती न भोन। 3 एल्हेरेलेइ अवं चाताई तुस ज्ञानथ, कि जै कोई परमेश्वरेरे
आत्मारे जुवाने सेइं ज़ोते, तै न ज़ोए, कि यीशु लानतीए, सिफ एककैलो
पवित्र आत्मा आए, जै इस काबल बनाते, कि कोई भी इन ज़ोई सकते कि
“यीशु प्रभुए!” 4 वरदाना त बड़े किसमां केरन, पन इना सब परमेश्वरेरो
आत्मा देते। 5 अस बड़े किसमां केरु कम परमेश्वरेरे लेइ केरतम, पन अस
तैससे एककी प्रभुएरी सेवा केरतम। 6 परमेश्वर इश्शे ज़िन्दगी मां अलग-
अलग किसमे सेइं कम केरते, पन तैए परमेश्वर जै असन सेब्भन तैसेरेलेइ
कम केरनेरी काबलीत देते। 7 असन सेब्भन अक एरी काबलीत दित्तोरीए,
जैस सेइं पवित्र आत्मारी हज़ूरी साबत भोती, ताके अस अपने सैथी विश्वासी
लोकां केरि मद्दत केरम। 8 किजोकि परमेश्वरे आत्मारे ज़िरिये एककी मैन्हु
समझदैरारो सन्देश शुनानेरी काबलीत दित्तोरीए, ते होरि मैन्हु तैससे आत्मारे
ज़िरिये सेइं ज्ञानेरो सन्देश शुनानेरी काबलीत दित्तोरीए। 9 तैए आत्मा एककी
मैन्हु मसीह पुड़ मज़बूती सेइं विश्वास केरनेरी काबलीत देते, ते तैए होरि मैन्हु,
बिमार लोकन बङ्गानेरी काबलीत देते। 10 आत्मा एककी मैन्हु चमत्कारेरां
कम्मां केरनेरी शक्ति देते, ते होरि परमेश्वरेरो सन्देश शुनानेरू वरदान, ते
कोन्ची आत्मां केरि परख, ते कोन्ची मैन्हु बड़े किसमां केरि भाषां ज़ोनेरी

काबलीत दित्ती, जैना तैने नई पेढ़ोरी, ते होरि मैन्हु तैन भाषां केरो मतलब समझांनेरी काबलीत दित्ती, जैना तैनेर्ह नई पेढ़ोरी। 11 सब वरदानां तैस्से एक्की पवित्र आत्मारु कम्मे। तैए ज़ेन्नरे चाते सेब्बी विश्वासी लोकन वरदान देते। 12 किजोकि ज़ेन्नरे इश्शे जिसम त अक्के ते तैसेरे अंग बड़ेन, ते तैसे एक्की जिसमेरे अंग हछ्छे भोने सेइं भी सब मिलतां अक्के जिसमे, तेन्नरे मसीह भी आए, ते तैना भी जैना तैस पुऱ् विश्वास केरतन। 13 किजोकि असेर्ह सेब्बेर्ह कुन यहूटी, कुन गैर कौमां, कुन गुलाम, कुन आज्ञाद अक्के आत्मारे ज़िरिये अक जिसम भोनेरे लेइ बपतिस्मो नेवरोए, ते असन सेब्बन अक्के आत्मा मैल्ली। 14 इश्शे जिसमे मां अक्के अंग नई, बल्के बड़ेन। 15 अगर पव ज़ोए अवं हथ नई, एल्हेरेलेइ अवं जिसमेरो अंग नई। त कुन तैसेरे ज़ोने सेइं तै जिसमेरो अंग न राए? 16 ते अगर कन्न ज़ोए; “अवं अछ़ नई, एल्हेरेलेइ अवं जिसमेरो अंग नई,” त कुन तैसेरु एरु ज़ोने सेइं तै जिसमेरो न राए? 17 अगर सारो जिसम अछ्छे भोथी त शुन्नू कोट्टां भोथू? ते अगर सारो जिसम कन्न भोथो त शीघ्नू कोट्टां भोथू? 18 पन सच्चे परमेश्वरे इश्शे जिसमे मां अंग अपने मेर्जी सेइं अक-अक केरतां इश्शे जिसमे मां अपने-अपने ठैरी रखोरेन। 19 अगर तैना सभे अक्के अंग भोथे, त फिरी जिसम न भोथो। 20 एल्हेरेलेइ, जिसमेरे बड़े अंग भोने सेइं अक जिसम बनते। 21 अछ़ हथ्थे सेइं न ज़ोई सके, “मीं तेरी ज़रूरत नई,” ते न क्रोड़ी पवन सेइं ज़ोई बट्टीए, “मीं तेरी ज़रूरत नई!” 22 पन जिसमेरे अंग जैना होरन करां कमज़ोर लेइहोतन, बड़े ज़रूरिन। 23 ते जिसमेरे जैन अंगन अस आदरारे काबल न समझम तैन केरि अस जादे आदर देतम; ते इश्शे अशोबते अंग होरे भी रोड़े भोतन। 24 फिरी इश्शे शोबते अंगन एसेरी ज़रूरत नई, पन परमेश्वरे जिसम बनोवरोए, कि जैस अंगे घटी थी तैस होरि भी जादे आदर भोए। 25 परमेश्वरे एन कियूं ताके जिसमेरे अंगन मां अन-बन न भोए, पन तैना एक्की होरेरी देख-भाल केरन। 26 एल्हेरेलेइ अगर जिसमेरे एक्की अंगे दुःख मैलते, त सारी जान ते सब अंग तैस सेइं साथी दुखी भोतन; ते अगर एक्की अंगेरी बड़याई भोतीए; त तैस साथी सब अंग आनन्द केरतन। 27 एन्नरे तुस सब मिलतां मसीहेरो जिसमथ, ते तैसेरे जिसमेरे अंगथ। 28 मसीहेरी जानी मां यानी कलीसियाई मां, परमेश्वरे असन अलग-अलग कम केरने जो

दित्तोरूप, पेइले प्रेरित, दुइयों नबी, द्लेहयों शिक्षा देनेबाले, फिरी तैना, जैन चमत्कार केरनेरो अधिकार दित्तोरोए। फिरी तैनी तैना ज़ैन बझानेरो अधिकार दित्तोरोए, ते तैना जैन होरि केरि मद्दत केरनेरी काबलीत दित्तोरोए, जैना प्रधान्न, तैना जैन पवित्र आत्मारे तरफां अलग-अलग किसमां केरि भाषां ज्ञोनेरी काबलीत मैली। 29 हर कोई प्रेरित नई। हर कोई नबी नई। हर कोई शिक्षा देनेबालो नई। हर कोई चमत्कार केरनेबालो नई। 30 कुन सेब्धन बझानेरू वरदान मैलेरू। हर कोई अलग-अलग भाषां केरनेबालो नई। हर कोई भाषां केरो मतलब समझानेबालो नई। 31 सेब्धन कां तरजमो केरनेरी काबलीत नई, रोडू त इन आए पवित्र आत्मां करां वरदानां हासिल केरनेरी बेड़ि इच्छाई मां राथ। पन सङ्घे रोडू कुने, तैन अवं हुनी ज़ोताई।

13 अगर अवं मैन्हु, ते स्वर्गदूतां केरि भाषां केरि, ते प्यार न रेख्खी, त अवं ठन-ठन केरनेबाली पितल, ते झान-झान केरनेबाली झाझाई। 2 ते अगर अवं भविष्यिवाणी केरि सेखी, ते सब भेद ज़ैनी ते, मीं इड़ी तगर पूरो विश्वास भोए, कि पहाड़न घासेई, पन प्यार न रेख्खी, त अवं किछ भी नई। 3 ते अगर अवं अपनि सारी जेइदाद कंगालन देई, या अपनो जिसम फुकनेरे लेइ देई, ते प्यार न रेख्खी, त इन मेरे कोन्ची कम्मेरू नई। 4 जैना लोक होरन सेइं प्यार केरतन तैना सबर ते दर्याई सेइं कम केरतन, तैना जलन न केरन, तैना अपनि बड़ीयाई न केरन, ते न घमण्ड केरन। 5 तैना होरन बेइज्ज़त न केरन, तैना खुदगरज न भोन, जल्दी क्रोध न केरन ते जैना बुरी गल्लां तैन केरे खलाफ भोइ, तैन तैना याद न केरन। ते तैन केरे खलाफ जैना पाप केरतन तैना, तैन बड़े आसान तरीके सेइं माफ़ केरतन। 6 तैना खुश न भोन ज़ैखन लोक बुरु केरतन, पन तैना तैखन खुश भोतन ज़ैखन लोक तैन केरतन जैन ठीक ते सङ्घू। 7 तैना सब गल्लां झैल्लतन, प्यार विश्वास कधी न गुवाए, ते असन परमेशरे पुड़ भरोसो केरनेरे काबल बनाते, मुशकलन ते तकलीफन मां सबर रखते। 8 भविष्यिवैनी ते गैर भाषां ते खास ज्ञान बेकार भोलू। पन प्यार हमेशारे लेइ रालो! 9 किजोकि इश्शू ज्ञान ते इश्शी भविष्यिवाणी केरनेरी काबलीत अधीनीए, पन ज़ैखन सिद्ध एज्जेलो, त जैन अधूरूए तैसेरी ज़रूरत नई। 11 इन मैनेरे बेडोनेरू ज़ेरु आए। ज़ैखन अवं बच्चो थियो, त बच्चां केरो ज़ेरो ज़ोतो ते सोचतो ते समझातो थियो। पन ज़ैखन अस बड्डे भोतम, त

बच्चां केरि गल्लां शारतम। 12 एन्वरे असन सेइं भी आए ज़ैना अस विश्वास केरतम, किजोकि अस तैस मैनेरे ज़ेरे आम ज़ै खराब शीशो मां शकल हेरते, (किजोकि अस सब किछ रोडे चारे न ज्ञानम) सिर्फ एजनेबाले वक्ते मां, अस सब किछ समझामेले, एल्हेरेलेइ असेई परमेशर आमने सामने हेरनोए। हुना मेरु ज्ञान पूरु नई। पन तैस एजनेबाले वक्ते मां (ज़ैखन तै दिहाड़ी एज्जेली) रोडे चारे ज़ैनेलो, परमेशर भी मीं ज्ञानेलो। 13 लिहाज़ा, हुनी, ट्लाई किसमां केरि चीज़न ज़ैना असेई ज़रूरी केरनिन, परमेशरे पुड़ विश्वास, परमेशरे वादन पुड़ उमीद, ते परमेशरे ते होरन सेइं प्यार। पन इन ट्लाई गल्लन मां ज़ै महाने, तै ई आएः परमेशरे ते होरन सेइं प्यार केरन।

14 एककी होरि सेइं प्यार केरनेरी कोशिश केरा। ते आत्मिक वरदानां केरि बड़ी इच्छा रखा, खास केरतां इन, कि भविष्यिवाणी केरा। 2 किजोकि, ज़ै गैर भाषाई मां गल्लां केरते; तै मैनन् सेइं नई, बल्के परमेशरे सेइं गल्लां केरते; एल्हेरेलेइ कि तैसेरी कोई न समझो; किजोकि तै भेदेरी गल्लां पवित्र आत्मारे शेक्ति सेइं ज़ोते। 3 पन ज़ै परमेशरे तरफां सन्देश शुनाते, तै विश्वासी लोकन, विश्वासे मां मज़बूत भोनेरे लेइ मद्दत केरते, ते होरि विश्वासी लोकां केरि हिम्मत बद्धाते ते तस्सली देते। 4 ज़ै गैर भाषाई मां ज़ोते, तै अपने विश्वासे मज़बूत केरते। पन ज़ै भविष्यिवाणी केरते, तै कलीसियारे विश्वासी लोकां केरे विश्वासे मज़बूत केरते। 5 अवं चाताई, कि तुस गैर भाषाई मां गल्लां केरा, पन जादे इन चाताई कि भविष्यिवाणी केरा: किजोकि अगर गैर भाषा ज़ोनेबालो कलीसियारे विश्वासी लोकां केरे विश्वासे मां मज़बूत भोनेरे लेइ तरजमो न केरे त भविष्यिवाणी केरनेबालो तैस करां जादे खास कम केरि रावरोए। 6 एल्हेरेलेइ हे ढ्लाव ते बेइनव, अगर अवं तुसन कां एइतां गैर भाषाई मां गल्लां केरि त तुसन मीं करां कुन फैइदो भोलो। पन अगर अवं प्रकाश या खास ज्ञान, या परमेशरे सन्देश शुनेई या शिक्षा देई त इस सेइं तुश्शी मद्दत भोली। 7 एन्वरे, अगर तुस बाजो बजाथ जेन्वरे बेइशोई या सारंगी, अगर तैन रोडे चारे न बजाव गाए त ज़ैन बजाव लावरू गाने त तैन केन्वरे पिशानेले बेइशोई या सारंगी मां कुन लावरू बज़ने। 8 जंगी मां अगर नड़शिनेरी आवाज़ साफ न भोए, त फौजी जंगरे लेइ तियार न भोइ सकन। 9 एन्वरे, ज़ैखन तुस तैना गल्लां केरथ ज़ैना होरि लोकन समझ न एजन, त

जैन किछु ज़ोवं गाते तैसेरी कोई कीमत नई। 10 दुनियाई मां बेड़ि भाषा आन, त हर भाषारो मतलबे। 11 पन अगर अस तैस भाषाई न समझम जै होरे जोने लोरेन, त एन एरु भोलू कि ज़ेन्वरे तैना इश्शे लेइ परदेशी भोले ते अस तैन केरे लेइ परदेशी भोले। 12 एन्वरे तुस भी जैखन पवित्र आत्मारे वरदानां केरे लेइ बड़ी इच्छा रखतथ, त तैन वरदानां केरि इच्छा रखा जैन सेइं कलीसियारे विश्वासी लोक विश्वासे मां मज़बूत भोन। 13 एल्हेरेलेइ जै गैर भाषा केरते, तै प्रार्थना केरे, कि जैन किछु तैने ज़ोवं, तैसेरो मतलब समझेनेरे काबल भी भोइ सके। 14 किजोकि अगर अवं गैर भाषाई मां प्रार्थना केरने लोरोई, त मेरी आत्मा प्रार्थना केरतीए, पन मेरी सोचरे लेइ फैइटो नई, किजोकि इन मीं समझ न एज्जे। 15 त फिरी मीं कुन कियोरु लोडे? एरो भी वक्त भोते जैखन मीं अपने आत्माई सेइं प्रार्थना कियोरी लोडे, एरो वक्त भी भोते जैखन मीं अपने अकली सेइं भी प्रार्थना कियोरी लोडे। किछु वक्ते मीं अपने आत्माई सेइं गीतां ज़ोवरां लोडे, ते होरि वक्ते मीं अकली सेइं भी गीत ज़ोवरां लोडन। 16 मन्ना कि जैखन किछु आम मैन्हु तुश्शे आराधनाई मां एजन, जैखन तुस अपने आत्माई सेइं परमेशरेरी बडयाई केरथ। अगर तैना तुश्शी न समझे, त तुश्शे परमेशरेरु शुक्र केरनेरे बाद तैना केन्वरे बुझेले कि किताली, “आमीन” ज़ोनू किजोकि तैना न समझे तुस कुन लोरेथ ज़ोने। 17 तुश्श परमेशरेरु शुक्र केरनू रोड़ए, पन इन होरि केरे विश्वासे मज़बूत केरनेरे लेइ मद्दत न केरेलू। 18 अवं अपने परमेशरेरु शुक्र केरताई, कि अवं तुसन सेब्भन करां जादे गैर भाषां केरताई। 19 पन कलीसियाई मां गैर भाषा केरने मां दश हज़ार गल्लां केरे ज़ोनेरे केरतां इन मीं होरु भी रोड़ लगते, कि होरन शिखालनेरे लेइ अकली सेइं पंचे गल्लां ज़ोई। 20 हे ढ़लाव ते बेइनव, तुस इना गल्लां समझने मां बच्चे न बना, पन बुरैई केरनेरे लेइ बच्चां केरे बना, पन इस किसमेरी गल्लां समझनेरे लेइ समझदार बना। 21 कानूने मां प्रभु ज़ोते; “अवं बखलां केरे जिरिये ज़ोइलो, जैना गैर भाषां केरेले, पन फिरी भी तैना मेरी न शुनेले।” 22 एल्हेरेलेइ असन मरां किछु गैर भाषा केरन जै पवित्र आत्मारे तरफां आए, इश्शे शब्द तैन लोकां केरे लेइ प्रभुएरे शेक्किरो निशाने, जैना प्रभु पुड़ विश्वास न केरन। 23 ते अगर कलीसिया एककी ठैरी अकोट्टी भोए, ते सब गैर भाषा केरन, त आम लोक जैना ई भाषा न समझन या गैर विश्वासी लोक अन्तर

एजन त कुन तैना इन न सोचेले कि तुस पागल आथ। 24 ते अगर सब भविष्यिवाणी केरन, ते आम लोक या गैर विश्वासी लोक अन्तर एजन, त तैन एसास भोलो कि तैना पापिन, ते जैन तैनेई ज़ोवं तैसेरे वजाई सेइं अपनि बत बदलेले। 25 ते परमेश्वरे सन्देशे सेइं तैन एसास भोलो कि तैनेई बुरु कियोरु तैन केरे मनेरे भेद बांदो भोइ गाले, ते तैन एसास भोलो कि तैना पापी आन त कने पापन करां मन फिराले। ते तैना मध्थो टेकतां परमेश्वरी आराधना केरेले, ते मनेले कि परमेश्वर तुसन मां आए। 26 हे दलाव ते बेइनव कुन कियोरु लोड्हूए? ज़ैखन तुस आराधना केरने लेइ अकोटु भोतथ, त किछ भजन ज़ोन, किछ उपदेश देन, ते किछ जैन प्रकाशन परमेश्वरे तरफां आए तैस देन, ते किछ गैर भाषाई मां गल्लां केरन ते किछ तैसेरो तरजमो केरन, तुस इन सब एल्हेरेलेइ केरा कि कलीसियारे लोकन विश्वासे मां मज़बूत भोनेरे लेइ मद्दत भोए। 27 अगर कोई गैर भाषाई मां ज़ोने लोरोए, त दूर्ड या ट्लाई ज़ने बैरी-बैरी सेइं ज़ोन, ते इन ज़रूरी कि अक मैन्हु तैस भाषारो मतलब ज़ोए। 28 पन अगर तरजमो केरनेबालो न भोए, ते गैर भाषा ज़ोने बालो कलीसियाई मां चुप राए, ते चुपचारे अपने मने सेइं परमेश्वरे सेइं गल्लां केरे। 29 नेबन मरां दूर्द या ट्लाई ज़ोन, इन ज़रूरी आए कि हर कोई शुने, ते सोचन ते परखन कि ज़ैन किछ ज़ोवं लोरु गाने सही आए या नई। 30 पन अगर कोई जै तैडी सभाई मां बिशोरोए, तैस परमेश्वरे तरफां सन्देश मैल्ले, त ज़ै ज़ोने लोरोए तै चुप भोए, ते तैस ज़ोने दे। 31 किजोकि तुस सब अक-अक भविष्यिवाणी केरि बटतथ, पन अक-अक भोइतां ताके सब शिखन, ते हिम्मत बद्वे। 32 जै नबी परमेश्वरो सन्देश शुनाते, तै अपने आपे वशे मां रखते। तै इस काबले कि अपने मेझी सेइं ज़ोई बटते ते चुप रेइ बटते। 33 किजोकि परमेश्वर गड्बड केरनेबालो नई, पन शान्ति देनेबालोए; ई तै कानूने ज़ैस परमेश्वरे सैरी कलीसियारे लोक मन्तन। 34 कुआन्शां कलीसियारे सभाई मां चुप रान, किजोकि तैन गल्लां केरनेरो हुक्म नई, ज़ेन्चरे कानूने मां लिखोरु भी आए। 35 ते अगर तैना किछ सवाल पुच्छ्ने चान, त सभाई मां न पुच्छन पन घरे अपने-अपने मुन्शन पुच्छन, किजोकि कलीसिया मां कुआन्शां केरि जादे गल्लां केरनि ठीक नई। 36 एरु किजो आए तुसन मरां किछ लोक पेइले ज़ोरे नियमन किजो न मनू चान? कुन तुस सोचतथ कि तुस पेइले

लोक आथ ज़ैनेई परमेश्वरु वचन दित्तू? या सिर्फ तुसन दित्तू? 37 अगर कोई मैन्हु अपनो आप नबी समझो, या इन समझो कि मीं पवित्र आत्मारे तरफां वरदान मैलोरुए, त इन समझो, कि जैना गल्लां अवं तुसन लिखताई, तैना प्रभुएर हुक्मन। 38 पन अगर कोई इन गल्लन न मन्ने, त तैन पुड़ विश्वास न केर। 39 एल्हेरेलेइ हे ढलाव ते बेइनव, भविष्यिवाणी केरनेरी बड़ी इच्छा रखा, ते गैर भाषाई केरनेरे लेइ न ठाका। 40 पन तैन सब किछ जैन तुस कलीसियाई मां केरतथ तरीके सेइं कियूं गाए।

15 हे ढलाव ते बेइनव, अवं तुसन तैए खुशखबरी याद कराताई जै मीं तुसन शुनावरी थी, ते जैस सन्देशो पुड़ तुसेई विश्वास कियोरो थियो, ते जैस पुड़ तुस तुसेई लगातार भरोसो रख्खोरोए। 2 अगर तुस तैस खुशखबरी पुड़ लगातार विश्वास केरते राले, जै मीं प्रचार की, त परमेश्वर तुसन बच्चालो। नई त तुश्शो विश्वास केरनो बेफैइदो भोव। 3 एल्हेरेलेइ मीं तुसन खास सन्देश दित्तो, जै मीं प्रभु यीशु मसीह करां मैल्लो। तै सन्देश ई आए, कि पवित्रशास्त्ररे मुताबिक यीशु मसीह इश्शो पापां केरे लेइ मरो 4 ते दबो जेव, ते पवित्रशास्त्ररे मुताबिक ट्लेइयोवं दिहड़े मुड़दन मरां ज़ींतो भोव। 5 ते कैफा (यानी पतरस) ते 12 चेलन लेइहोव। 6 फिरी 500 करां जादे चेलन एककी साथी लेइहोव, जैन मरां हेजू बड़े ज़ींतन ते किछ मेरि ज़ोरेन। 7 फिरी याकूबे लेइहोव फिरी सेब्बी प्रेरितन लेइहोव। 8 ते आखरी मां तैनी अपनो आप मीं पुड़ भी पुड़ बांदो कियो, अवं जै तैस बच्चेरे ज़ेरो आई जै ठीक वर्ते पुड़ नई ज़र्मोरु। 9 किजोकि अवं प्रेरितन मरां सेब्बना निकोड़ोई, बल्के प्रेरित जूवानेरे काबल भी नई, किजोकि अवं परमेश्वरे कलीसियारे विश्वासी लोकन सतातो थियो। 10 पन परमेश्वरे अनुग्रहे सेइं अवं प्रेरित आई। ते तैसेरो अनुग्रहेरो अस्सर ई भोव कि, मीं तैन होरि प्रेरितन करां बेद्धतां मेहनत भी की, ते ई मेहनत मीं अपने तरफां न की, बल्के परमेश्वरे मेरी मद्दत की, कि अवं इन केरि। 11 ते चाए अवं भोइ, चाए होरे प्रेरित भोन, अस तैस मसीहेरे बारे मां सन्देश प्रचार केरतम, ते इस्से पुड़ तुसेई भी विश्वास कियो। 12 एल्हेरेलेइ हुनी अवं पुछताई, जैखन मसीहेरो ई प्रचार कियो गाते, कि तै मुड़दन मरां ज़ींतो भोव, ते तुसन मरां किछ किजो ज़ोतन, कि मुड़दां केरु ज़ींतू भोनू अथ्थी नई? 13 अगर मुड़दां केरु ज़ींतू भोनू अथ्थी नई, ते फिरी मसीह भी

नई जींतो भोरो। 14 ते अगर मसीह भी मुङ्डन मरां जींतो नई भोरो, त फिरी इश्शो सन्देश प्रचार केरनो भी बे फैइदोए; ते तुश्शो मसीह पुङ् विश्वास केरनो भी बे फैइदोए। 15 अगर मुङ्डे जींते न भोन, त असेर्ह इन जोइतां परमेशरे बारे मां झूठ ज्ञोवं, कि परमेशरे मसीह जींतो कियो जैन तैनी हकीकति मां नई कियोरु। 16 अब दुबारां फिरी जोताई, अगर कोई मुङ्डन मरां जींतो न भोए, ते फिरी मसीह भी मुङ्डन मरां जींतो नई भोरो। 17 ते अगर मसीह मुङ्डन मरां जींतो नई भोरो, त तुश्शो मसीह पुङ् विश्वास भी बे फैइदोए, ते तुस हेजू तगर अपने पापन मां ज़ीने लोरेथ। 18 बल्के जैना मसीह पुङ् विश्वास केरनेबाले मर्न, तैना भी नाश भोए। 19 अगर अस सिर्फ इस ज़िन्दगी मां मसीह करां उमीद रखतम ते फिरी अस सेब्बी मैनन् करां नुभागम। 20 पन सच्च त इन आए कि परमेशरे मसीह मुङ्डन मरां इन साबत केरनेरे लेइ जींतो कियोरो, ते जैना मर्न, तैन मां पेइलो फल भोए। 21 किजोकि जैन पेइले मैने यानी आदमे कियूं, तैसेरे वजाई सेइं सब मैन्ह मरे, एन्चरे जैना विश्वासी लोक एजनेबाले वक्ते मां मुङ्डन मरां जींते किये गाले, तैन भी एककी मैनेरे केरनेरे वजाई सेइं आए, ते तै मैन्ह मसीह आए। 22 एल्हेरेलेइ एककी मैनेरे पापेरे यानी आदमेरे वजाई सेइं सब मैन्ह मरतन, तेन्चरे एककी मैनेरे केरनेरे सेइं यानी यीशु मसीहे वजाई सेइं सारे फिरी मुङ्डे जींते किये गाले। 23 पन हर कोई ठीक तरीके सेइं ज़िन्दगरे लेइ वापस एज्जेलो, पन मसीह मुङ्डन मरां जींतो भोनेबालो पेइलोए, फिरी जैन लोकां केरो रिश्तो तैस सेइं साथी आए, तैना भी जींते भोले। 24 एसेरां पत्ती, मसीह सैरी दुष्ट शेक्कि नाश केरेलो जैना परमेशरी खलाफत केरतिन। ते दुनियारो खातमों भोलो। तैखन मसीह, अपने बाजी परमेशर अपनू राज़, राज़ केरनेरे लेइ पूरे तरीके सेइं देलो। 25 मसीहे तेइस तगर राजेरु ज़ेरु राज़ केरनू ज़रुरीए, ज़ांतगर परमेशर तैसेरे सारे दुश्मन तैसेरे अधीन न केरे। 26 सेब्बना आखरी ज़े दुश्मन खतम कियो गालो तै मौते। 27 ज़ैखन पवित्रशास्त्र ज़ोते परमेशरे सब किछ तैसेरे अधीन मां केरेलो त इस मां परमेशर नई, किजोकि सब किछ मसीहेरे अधीन केरनेबालो परमेशरे। 28 ते सब किछ परमेशरेरे मट्टोरे अधिकारे मां केरनेरे बाद, तैखन तै अपनो आप रोडे चारे परमेशरेरे अधिकारे मां केरेलो, जैने तैस अधिकार दित्तो। सिर्फ परमेशर अकैल्लो प्रभुए तैए हर एककी मां, ते हर

गल्ली मां कम केरते। 29 हुनी तुस इस बारे मां सोचा, तुसन मां किछ एरे आन ज़ैना मर्दे लोकां केरे लेइ बपतिस्मो नेतन, ते कोई तैन बपतिस्मो देते, अगर ज़ेन्यरे किछ लोक ज़ोतन, विश्वासी लोक मुडन मरां ज़ीते नई भोने, त फिरी एन केरनेरी कोई कीमत नई ते फिरी एन केरनेरी वजा नई। 30 ते इश्शो लेइ, अगर मुडदे ज़ीते किये गान त अपनो आप खतरे मां रखनो बेवकूफी आए। 31 हे ढलाव ते बेइनव, इन पक्कू आए कि तुश्शो बारे मां घमण्ड केरताई, किजोकि तुस इश्शो प्रभु यीशु मसीह मां आथ, इन भी पक्कू आए कि अवं रोज़ मौतरे खतरे मां राताई। 32 मीं इफिसुस नगरे मां बेड़ि तैन केरे वजाई सेइं मुशकलां झैल्ली ज़ैना मेरी खलाफत केरते थिये, तैना जंगली जानवरां केरे ज़ेरे थिये। लोकां केरे खियाले सेइं मीं तैन मुशकलन सेइं कुन हासिल कियूं? किछ भी नई। एल्हेरेलेइ इन साफे कि मुडदे दुबारां ज़ीते न किये गान, त इन रोडूए ज़ैन लोक ज़ोने लोरेन, “एज्जा, खाम पीम, किजोकि असेई कालां मरनू आए ते इन सब खतम भोनू।” 33 ज़ैना एरी गल्लां ज़ोतन तैन केरे वजाई सेइं बेवकूफ न बना, “बुरी संगती रोड़े चाल-चलने बगाडतीए।” 34 तुस अपने सोचरे रोड़ी बत्तां वापस एज्जा ते पाप केरनो शारा। किजोकि तुसन मां किछ एरे आन ज़ैन केरो रिश्तो परमेशरे सेइं साथी नई। अवं तुसन छिथानेरे लेइ इन ज़ोताई। 35 पन किछ पुछतन, “कि मुडदे केन्यरे ज़ीते भोतन, ते केरहे जिसमे मां एइतन?” 36 हे बे समझाव, बीज़े पुड़ ध्यान देथ, ज़ैखन बीज़ बेवं गाते, त पोदो बन्ने करां पेइलू तैस मरनू पेते। 37 ते ज़ैन तू बेतस, चाए इन गेहुं भोन या होरू किछ। इन ज़ै भोनेबालो पोदोए एन तैसेरू ज़ेरू नई। 38 तैस बेनेरे पत्ती परमेशर तैस एपनी मेरज़रे मुताबिक बडाते ज़ांतगर गेहुं केरि या होरि आन्नेरे डाल बांदे न भोन। 39 इस दुनियाई मां हर ज़ींती चीज़ां अलग-अलग आन इन सेब्बी केरो जिसम अक्कां ज़ेरे नई। मैन्हु केरो जिसम केरो जिसम जानवरां केरो ज़ेरो नई। चलोडू केरो जिसम, मेछ़ली केरो जिसम करां अलगे। 40 ज़ेन्यरे इस धेरतली पुड़ बड़े किसमां केरे जिसम भोतन तेन्यरे अम्बरे मां भी दिहाड़ो चाँदनी, ते तारे आन, पन अम्बरेरी चीज़ां केरि शोभा होरि ज़ेरीए ते धेरतरे चीज़ां केरि शोभा होरि ज़ेरि आए। 41 ते दिहाड़ेरी शोभा होरीए, चेंदनरी शोभा होरीए, ते तारां केरि शोभा होरीए, किजोकि तारे-तारेरी शोभाई मां फर्के। 42 मुडदां

केरु जींतु भोनू भी एरु आए। जै जिसम नाश भोनेरे हालती मां दबो गते, पन
 जैखन जींतो कियो गालो त कथी नाश न भोलो। 43 जैखन अस मरतम
 (इश्शो जिसम) बदसूरत ते कमज़ोर भोतन। पन जैखन तै दुबारां जींतो भोतो
 त तै बडे खूबसूत ते मज़बूत भोते। 44 जेन्चरे इश्शो जिसमे मास ते खूने सेइं
 आन, एरे जिसम आन जैन परमेशररो आत्मा ज़िन्दगी देते। ते इश्शो जिसम
 जै मासे त कने खूनेरोए तैस जिसमे मां बेदलोलो, जै परमेशररो आत्मारे
 तरफां दितो गते। 45 पवित्रशास्त्रे मां इन भी लिखोरुए, “कि पेइलो मैन्हु,
 मतलब आदम, जींतो प्राणी बनो,” त आखरी आदम, यानी मसीह, हमेशारी
 ज़िन्दगी देनेबालो बनो। 46 मासे ते खूने सेइं साथी पेइले जिसम वजूदे मां
 आए फिरी तैना जिसम जैना परमेशररो आत्मा देते। 47 पेइलो मैन्हु ज़मीनरो
 मतलब मित्री सेइं बनोरो थियो, तेन्चरे दुइयोवं मैन्हु यानी मसीह, स्वर्गेरां
 ओरो थियो। 48 लोक जैना इस धेरतरेन तैना धेरतरे पेइले मैन्हु आदमेरे
 ज़ेरेन। पन जैना लोक स्वर्गेरेन तैना स्वर्गेर मैन्हु यानी मसीहेरे ज़ेरे आन।
 49 ते जेन्चरे असेई तैसेरु रूप जै मितारो थियूं धारण कियूं तेन्चरे तैस जै
 स्वर्गएरोए तैसेरु रूप धारण केरमेले। 50 हे ढलाव ते बेइनव, इश्शो जिसम
 इस धेरती पुड मास ते खूने सेइं बनोरो भोते, अस एरे ज़ेरे जिसमे सेइं साथी
 स्वर्गे मां परमेशररे राज्जे मां रानरे काबल न भोले। अस स्वर्गे मां अपने मरने
 बाले जिसमे सेइं साथी न रेड बटमेले, जै मरते, किजोकि तैड़ी कोई मौत नई।
 51 शुना, अवं तुसन सेइं भेदेरी गल ज़ोताई, अस सब नई मरने, पन जैखन
 आखरी नड़शिंगेरी आवाज़ भोली, त अस सब एककी पले मां बेदलोनेम, 52
 ते इन एककी पले मां, जेन्चरे कोई चिप केरते, जैखन आखरी नड़शिंगो बज़ाव
 गालो त जैना मरे थिये तैना जींते भोनेन ताके हमेशारे लेइ जींते रान, ते अस
 जैना जींतेम, इश्शो जिसम बेदलोनेन। 53 किजोकि इश्शो जिसम ऐसैनी सेइं
 मरते ते शडते, ते ई तैस जिसमे मां बेदलोई गालो जै कथे न मरे ते न शडे। 54
 जैखन इन भोलू, तैखन पवित्रशास्त्रे मां लिखोरु परमेशरेरु तैन वचन पूरु
 भोलू, जैन जोते, “मौत रोडे चारे हाराई गाली ते तैसेरु कोई वजूद न रालू।”
 55 एन्चरे जैन पवित्रशास्त्रे मां लिखोरु तैन पूरु भोलू, “हे मौत तेरी जींत
 कोड़ि राई? हे मौत तेरो डस कोड़ि राव?” (Hadēs g86) 56 मौती तकलीफ
 देनेरी शक्ति पापे करां मैलतीए, ते पापे कानूने करां शक्ति मैलतीए। 57 पन

परमेश्वरे शुक्र भोए, जै इश्शो प्रभु यीशु मसीहेरे ज़िरिये पापे ते मौत पुड़ जींत देते। ५८ हे मेरे ट्लारे ढ्लाव ते बेइनव, विश्वासे मां मज़बूत राथ ते गलत शिक्षाई सेइं न टेप्लोथ, ते हमेशा प्रभुएरु कम जोशे सेइं केरा, किजोकि तुस इन ज्ञानतथ, कि ज़ैन किछ तुसेई प्रभुएरे लेइ कियू तैन बेफैइटू नई।

16 हुनी तुश्शो तैस चन्द्रेरे सवालेरे बारे मां जै यरूशलेम नगरेरे परमेश्वरेरे लोकां केरे लेइ कियो गाते, तुसेई भी तेन्वरे कियोरु लोड़ ज़ेन्वरे मीं गलातियारे कलीसियान हुक्म दित्तो। २ हफ्तेरे पेइले दिहाड़े तुसन मरां हर कोई अपने आमदनेरे मुताबिक किछ एपू कां रखा, कि मेरे एजने पुड़ चन्दो अकोट्ठो न केरनो पे। ३ जैखन अवं तैड़ी भोई, अवं किछ लोकन भेजेलो ज़ैन तुस चुनेले कि एना भरोसेरे काबलन, चन्दो घिन्तां यरूशलेम नगरे जो गान। अवं तैन कां चिट्ठी भी भेजेलो ताके विश्वासी लोक तैन केरे बारे मां ज्ञानन्। ४ ते अगर मेरु भी गानू ज़रूरीए, त तैना मीं सेइं साथी गाले। ५ ते मकिदुनिया गानेरे बाद अवं तुसन कां एज्जी रावरोई, किजोकि मीं मकिदुनिया मेइं गानेरो बिस्तार बनोरोए। ६ भोइ सकते, अवं तुसन सेइं साथी किछ चिरे रुकेलो, शैइद पूरे हिवतड़ो, फिरी तुस ज़ेरां मीं गानू भोलू तेरहां मीं भेजां। ७ अगर ई परमेश्वरी मर्जी भोली, ते मीं उमीदे अवं बादे मां जादे चिरेरे लेइ तुसन कां एज्जेलो, न कि इस वक्ते थोड़े चिरेरे लेइ। ८ पन अवं पेन्तिकुसत तिहारे तगर इफिसुस नगरे मां रानोई। ९ किजोकि मीं बड़ो रोड़ो मौको मैलोरे ज़ैस सेइं अवं तैन कम केरि सकताई ज़ेसेरो अस्सर बड़ोए, चाए बड़े लोक मेरी खलाफत केरनेबाले आन। १० अगर तीमुथियुस एज्जे, त तैस कबूल केरा, तैसेरी रोड़े चारे आदर केरा, किजोकि तै मेरो ज़ेरो प्रभुएरु कम केरते। ११ एल्हेरेलेइ कोई तैस घटिया न समझे, पन तैन केरे सफरेरे लेइ जै ज़रूरते तैन खुशी सेइं देथ। ताके मीं कां एज्जन, किजोकि अवं तैस लोरोई बलगने, कि तै विश्वासी ढ्लान सेइं साथी एज्जे। १२ ते विश्वासी साथी अपुल्लोसे सेइं मीं बड़ी बिनती की, कि तुसन कां होरि विश्वासी मैनन् सेइं साथी गाए ज़ैना तुसन सेइं मिलने ओरेन। पन तैनी इस वक्ते गानू न चाव, पन जैखन ठीक वक्त भोलो, तैखन एज्जेलो। १३ खबरदार राथ, विश्वासे मां मज़बूत भोथ, हिम्मत रखा, मज़बूत भोथ। १४ ज़ैन किछ केरतथ तैन प्यारे सेइं केरा। १५ हे ढ्लाव ते बेइनव, तुस स्तिफनासेरे टब्बरे ज्ञानतथ, कि तैना अखाया इलाकेरे, पेइले मसीह पुड़

विश्वास केरनेबालेन, ते परमेशरेरे लोकां केरि मदत केरनेरे लेइ जैन किछ केरि
बटते थिये तैनेई तैन कियूं। 16 अवं तुसन कां बिनती केरताई कि एरे लोकां
केरे अधीन राथ, बल्के तैन केरे भी जैना इस कम्मे मां मेहनत केरतन ते मदत
केरनेबालन। 17 ते अस स्तिफनास ते फूरतूनातुस ते अखइकुसेरे एजने सेइं
खुश आई, किजोकि ज़ेइस तुस इडी न थिये, तैनेई मेरी ज़रुरतां पूरी केरनेरे
लेइ मेरी मदत की। 18 ज़ेन्चरे तुसेई अवं खुश कियो, तेन्चरे तैनेई भी अवं
खुश कियो, एल्हेरेलेइ एरे लोकां केरि तारीफ केरा। 19 आसिया इलाकेरे
कलीसियां केरे सारे विश्वासी लोकां केरे तरफां तुसन नमस्कार; अकिवला ते
तैसेरी कुआन्श प्रिस्कारे तरफां ते तैन केरे घरे कलीसियाई भी तुसन प्रभु मां
हछु-हछु नमस्कार। 20 इट्टेरे विश्वासी लोक तुसन नमस्कार ज़ोतन, मसीहेरे
प्यारे सेइं एककी होरि जो नमस्कार केरा। 21 अवं पौलुस अपने हथ्ये सेइं
नमस्कार लिखताई। 22 अगर कोई प्रभु सेइं प्यार न रखे तै लानती भोए, हे
इशो प्रभु एई! 23 प्रभु यीशुएरो अनुग्रह तुसन पुड़ भोतो राए। 24 अवं तुसन
सेब्बन सेइं प्यार केरताई जैन केरो रिश्तो यीशु मसीह सेइं साथीए। आमीन।

2 कुरिन्थियों

1 अबं पौलुस परमेशरेरे मेझीं सेइं यीशु मसीहेरो प्रेरिताई, मेरे त कने ढला तीमुथियुसेरे तरफां ई चिट्ठी परमेशरेरी तैस कलीसियारे नंव्हे, जै कुरिन्थुस माए, ते सारे अखाया इलाकेरे सब पवित्र लोकां केरे नंव्हे, 2 इश्शो बाजी परमेशर ते प्रभु यीशु मसीहेरे तरफां तुसन अनुग्रह ते शान्ति मैलती राए। 3 परमेशरेरु शुक्र भोए जै इश्शो प्रभु यीशु मसीहेरो बाजी, जै दया केरनेबालो बाजीए, ते जै असन हमेशा तसल्ली देनेबालो परमेशरे। 4 ते इश्शो सेष्वी मुसीबतन मां असन तसल्ली देते; ताके अस तैस तसेल्लरे वजाई सेइं जै परमेशर असन देते, तैन भी तसल्ली देइ बटम, जैना कोन्ची वजाई सेइं मुसीबतन मां आन। 5 किजोकि ज़ेन्नरे मसीहे दुःख झैलोरेन तेन्वरे अस भी दुःख झैल्लतम, एल्हेरेलेइ असन तसल्ली भी मसीहेरे जिरिये जादे भोतीए। 6 अगर अस दुःख झैल्लतम, ते ई तुश्शे तसल्लरे ते तुश्शे मुक्करे लेइए ते अगर असन तसल्ली मैलतीए, ते ई तुश्शे तसल्लरे लेइ आए; जैसेरे अस्सरे सेइं तुस सबरी सेइं तैना दुखन झैल्लतथ, जैना अस भी झैल्लतम। 7 ते इश्शी उमीद तुश्शे बारे मां पक्कीए, किजोकि अस ज्ञानतम, कि ज़ेरे दुःखन तुसेई असन सेइं साथी झैल्ले, तेरी तसल्ली तुसन भी असन सेइं साथी मैलेली, जै असन परमेशर देलो। 8 हे ढलाव ते बेइनव, अस न चाम कि तुस इश्शो तैस दुखे करां अनज्ञान राथ, जै आसिया इलाके मां असन पुड़ अब, कि एरो भारी बोझ असन पुड़ ओरोए थियो, जै इश्शो लेइ छूनो मुशकिल थियो, इडी तगर कि असन अग्रोवं जो ज़ीनेरी कोई उमीद न थी। 9 बल्के असेई अपने मने मां समझोरु थियूं कि अस मारे गानेम ते अस अपनो भरोसो न रखम, बल्के परमेशरे पुड़ भरोसो रखम जै मुड़दन ज़ींते केरते। 10 तैने अस एत्रे बडे मौतरे खतरे करां बच्चाए, ते बच्चालो; ते तैस करां इश्शी ई उमीदे, कि तै अग्रोवं भी बच्चातो रालो। 11 तुस भी मिलतां प्रार्थनाई सेइं इश्शी मद्दत केरेले, कि जैना बरकतां असन बड़ां लोकां केरे जिरिये मैली, किजोकि परमेशरे अनुग्रहे सेइं इश्शी हाफ़ज़तरे लेइ बेड़ि प्रार्थनां शुन्नी, तैल्हेरेलेइ बड़े लोक इश्शू भोतू परमेशरेरु शुक्र केरन। 12 किजोकि अस अपने इस ज़मीरे गुवैही पुड़ घमण्ड केरतम, कि दुनियाई मां, खास केरतां तुसन मां इश्शो चालचलन परमेशरे लायिक ते पवित्रतैई ते सचैई सेइं थियो। जै दुनियारे ज्ञाने

सेइं नई, बल्के परमेशरेरे अनुग्रह सेइं साथी थियो। 13 अस हमेशा तुसन
इन लिखतम ताके तुस पढ़थ ते समझाथ, ते मीं उमीदे, कि आखरी तगर
समझते भी राले। 14 ज़ेन्हरे तुसन मरां केट्रैई मन्नोरु भी आए, कि अस
तुश्शे धुमण्डेरी वजाम; तेन्हरे तुस भी प्रभु यीशुएरे वापस एजनेरे दिहाड़े इश्शे
लेइ घमण्डेरी वजा भोले। 15 ते इस भरोसे सेइं, अवं चातो थियो कि पेइलो
तुसन कां एज्जी; कि तुसन दुगानी बरकत मैल्ले। 16 ते तुसन मेइं निस्तां
मकिटुनिया इलाके जो गेई ते फिरी मकिटुनयारां तुसन कां एज्जी, ते तुस
मेरी सफरेरी ज़रूरतरे मुताबिक मद्दत केरतां यहूदिया इलाकेरे पासे किछ
दूर पुज्जाथ। 17 एल्हेरेलेइ मीं ज़ैने ई इच्छा कियोरी थी कुन मीं चंचलता
हिराई? या ज़ैन केरनू चाताई कुन दुनियारे लोकां केरे ज़ेरु केरनू चाताई,
कि अवं गल्ली मां हाँ, हाँ भी केरि; नई, नई भी केरि? 18 ज़ेन्हरे परमेशर
वफादारे, तेन्हरे कि इश्शे तैस वचने मां ज़ै तुसन सेइं ज़ोवं, “हाँ” ते “नई”
दुइये न मैल्ले। 19 किजोकि परमेशरेरू मटू यीशु मसीह ज़ेसेरो इश्शे ज़िरिये
मतलब मेरे ते सिलवानुस ते तीमुथियुसेरे ज़िरिये तुसन मां प्रचार भोव; तैस
मां “हाँ” ते “नई” दुइये न थी; पन तैस मां “हाँ” ए “हाँ” भोइ। 20 किजोकि
परमेशरेरे ज़ेत्रे वादेन, मसीह मां हांए सेइं आन, एल्हेरेलेइ मसीहेरे ज़िरिये
आमीन भी भोइ, कि इश्शे ज़िरिये परमेशरेरी महिमा भोए। 21 ते ज़ै असन
तुसन सेइं साथी मसीह मां मज़बूत केरते, ते ज़ैने इश्शू अभिषेक कियोरूए,
तैए परमेशरे। 22 ज़ैने असन पुड़ छाप भी की, ते ज़ेन्हरे कोन्वी चीज़रे लेइ
साई देतन तेन्हरे तैनी पेइली आत्मा इश्शे मने मां दित्ती। 23 परमेशर मेरे इस
सचैइयरो गवाहे कि अवं कुरिन्थुस नगरे मां दुबारां एल्हेरेलेइ नई ओरोए कि
अवं तुसन दुःख देनो चातो थियो। 24 इन नई, कि अस विश्वासेरे बारे मां
तुसन पुड़ राज केरनू चातम; पन तुश्शे आनन्दे मां तुश्शी मद्दत केरनेबाले
आम, किजोकि तुस विश्वासे सेइं मज़बूत रातथ।

2 मीं अपने मने मां इन थापेरु थियूं, कि फिरी तुसन कां एइतां तुसन दुख न
देई। 2 किजोकि अगर अवं तुसन दुखी केरि, त मीं आनन्द देनेबालो कौन
भोलो, सिर्फ तैए ज़ै मीं दुखी कियोरोए? 3 ते मीं ई गल तुसन एल्हेरेलेइ
लिखी, कि एरु न भोए, कि मेरे एजने पुड़ ज़ैन सेइं आनन्द मैल्लेरो लोड़तो
थियो, अवं तैन करां दुखी भोई; किजोकि मीं तुसन सेष्भन पुड़ इस गल्लरो

भरोसोए, कि जै मेरो आनन्दे, तैए तुश्शो सैरी केरो भी आए। 4 मीं बड़े दुःख, ते मनेरे कष्टे सेहं, बड़े ऐंखरन सेहं तुसन चिट्ठी लिखोरी थी, एल्हेरेलेइ नई, कि तुस दुखी भोथ, पन एल्हेरेलेइ कि तुस तैस बड़े प्यारे ज्ञानथ, जै मीं तुसन सेहं आए। 5 ते अगर केन्चे दुखी कियोरोई, त अवं नई बल्के (तैस सेहं बड़ी सखती न केरि) किछ-किछ तुस सब दुखी कियोरेथ। 6 एरे मैनेरे लेइ ई सज्जा जै विश्वासी ढलान मरां बड़ेई दित्ती, सुद्धी आए। 7 एल्हेरेलेइ इस करां इन रोड्हए कि तैसेरो पाप माफ केरा; ते तैस तसल्ली देथ, एरु न भोए कि एरो मैन्हु उदैसी मां डुबे। 8 एल्हेरेलेइ अवं तुसन कां बिनती केरताई, कि तैस अपने प्यारेउ सबूत देथ। 9 किजोकि मीं एल्हेरेलेइ भी लिखोरु थियूं, कि तुसन पेरखी, कि तुस मेरे सब गल्लां मन्हेरे लेइ तियार आथ या नई। 10 जैस तुस माफ केरतथ तैस अवं भी माफ केरताई, किजोकि मीं भी जैन किछ माफ कियोरुए, अगर कियेऱु भोए, त तुश्शे वजाई सेहं मसीहेरे ठैरी भोइतां कियोरुए। 11 कि शैतानेरो असन पुड़ दावो न चले, किजोकि अस तैसेरी चालन करां अनज्ञान नई। 12 ते जैखन अवं मसीहेरी खुशखबरी शुनाने त्रोआस नगरे मां अव, ते प्रभुए मेरे लेइ अक बत खोल्ली। 13 त मेरे मने मां चैन न भोइ, एल्हेरेलेइ कि मेरे विश्वासी ढला तीतुसे तुश्शे एट्टां कोई खबर घिन्तां न अव; ते अवं त्रोआसेरे विश्वासी लोकन करां अलग भोइतां अवं वापस मकिदुनिया इलाके मां अव। 14 परमेश्वरु शुक्र भोए, जै मसीह मां सदा असन ज़ीतारे जशने मां चलाते, ते अपने ज्ञानेरे खुशबू इश्शे जिरिये हर ठैरी फैलाते। 15 किजोकि अस परमेश्वरे कां मुक्ति मैलने बालां, ते नाश भोने बालन कां, दुइयां केरे लेइ मसीहेरी खुशबू आम। 16 केत्रा केरे लेइ त मरनेरे मुशक, ते केत्रन जो ज़िन्दगरे लेइ ज़िन्दगरी खुशबू, ते इन गल्लां केरे काबल कौने? 17 किजोकि अस तैन केरे ज़ेरे नई, जैना परमेश्वरु वचन पेइंसां केरे लेइ प्रचार केरतन, पन अस मनेरी सचैई सेहं, ते परमेश्वरेरे तरफां परमेश्वर हाजर सेमझतां मसीह मां जोतम।

3 कुन अस दुबारा फिरी अपनि बड़याई केरने लगम? या असेई केत्रा केरि जेरि सुपारशारी चिट्ठी तुसन कां ऐनिन या तुसन करां नेनिन? 2 तुस एप्पू इश्शी लेइ चिट्ठी केरे जेरेथ, जैना इश्शे लेइ सुपारश केरतिन, जैना इश्शे दिले पुड़ लिखोरिथ, तैन हर कोई पेढ़ी सकते ते जैना रोड़ां कम्मां असेई

कियोरन, तैन लोक पिशैनी सकतन। ३ इन बांदूए, कि तुस मसीहेरे चिठ्ठी केरे
 ज़ेरेथ, ज़ैना असेई सेवकां केरि ज़ेरि लिखी; ते ज़ैना शैही सेइं नई, पन ज़ीते
 परमेशरेरी आत्माई सेइं घोड़ां केरे तेख्ती पुड़ नई, बल्के दिलेरे मासेरे तेख्ती
 पुड़ लिखोरिन। ४ अस मसीहेरे ज़िरिये परमेशरे पुड़ एरु याकीन रखतम। ५
 इन नई, कि अस अपने आये सेइं इस काबलम, कि एप्पू कोन्धी गल्लरे बारे
 मां सोची बटम; पन इश्शी काबलीत परमेशरे तरफां आए। ६ ज़ैनी अस
 नंवे करारेरे सेवक भोनेरे काबल भी किये, मूसेरे कानूनेरे सेवक नई बल्के
 पवित्र आत्मा सेइं; किजोकि मूसेरो कानून न मन्नेरो नितीजो मौत भोते, पन
 पवित्र आत्मा हमेशारी ज़िन्दगी देते। ७ ज़ैखन मूसेरो कानून ज़ेसेरे ज़िरिये
 मौत एइती ज़ेसेरे लफस घोड़ां केरे तेखतिन पुड़ घेड़तां लिखोरे थिये, इड़ी
 तगर महिमा बाले भोए, कि इस्साएली लोक मूसेरे तुतरेण तेकि न थी बटते,
 पन तै जादे वक्ते तगर न राव, ८ ते आत्मारो करार होरो भी महिमा बालो
 किना भोलो? ९ किजोकि दोषी ठहराने बालो करार महिमा बालो थियो, ते
 धर्मी बाने बालो करार होरो भी महिमा बालो किना भोए! १० ते ज़ै पुरानो
 महिमा बालो करार थियो, तै नंवे करारे करां महिमा बालो न भोव। ११
 किजोकि मूसेरु कानूने ज़ेसेरी महिमा थोड़े वक्तेरे लेइ थी, महिमा बालो थियो,
 त तै नंवों करार ज़ै कायम रालो, होरु भी महिमा बालू किजो न भोलो! १२
 एल्हेरेलेइ एरी उमीद रेखतां अस दिलेरी सेइं ज़ोतम। १३ अस मूसेरे ज़ेरे नई,
 ज़ैने अपने तुतरे पुड़ पड़दो रखोरो थियो ताके इस्साएली लोक तैस घटने बैली
 महिमारो अन्त न लहन। १४ पन तैन केरे मन सखत भोए, किजोकि अज़
 तगर पुरानो नियम पढ़ते बार तैन केरे मन पुड़ तैए पड़दो रहते; पन पड़दो
 सिर्फ तै मसीह पुड़ विश्वास केरने सेइं उठते। १५ ते अज़ तगर ज़ैखन भी
 मूसेरो कानून पढ़ो गाते, ते तैन केरे मन पुड़ सदा पड़दो रहते ते तैन रोड़े चारे
 समझ न एज्जे। १६ पन ज़ैखन भी तैना प्रभु यीशु पुड़ विश्वास केरले, तैखन
 तै पड़दो दूर भोलो। १७ प्रभु त आत्मा आए, ते जैड़ी भी प्रभुएरो आत्माए
 तैड़ी कानूने करां आज़ादी आए। १८ पन ज़ैखन इश्शे सेब्भी केरे बगैर पड़दे
 तुतरन सेइं प्रभुएरु प्रकाश बांदू भोते, ज़ेन्चरे शीशे मां, ते प्रभुएरे ज़िरिये जै
 आत्माए, अस प्रभुएरे महिमा बाले रूपे मां थोड़े-थोड़े बदलते रातम।

4 एल्हेरेलेइ अगर असन पुङ् एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम। 2 पन असेई शरमराँ छ़पोरां कम्मां शारोन, ते न च्चलैकी सेइं च्चलते, ते न परमेश्वरे वचन मां मलावट केरम। पन परमेश्वर इश्शो गवाहे कि अस सच्च ज़ोतम, ते हर कोई गवाही देते कि इन सच्चे। 3 पन अगर इश्शो खुशखबरी पुङ् पड़दोए, त ई नाश भोने बालां केरे लेइ। 4 ते तैन विश्वास न केरनेबालां केरे लेइ, ज़ैन केरे अक्कल इस दुनियारे ईश्वर शैताने कानी कियोरीए, ताके मसीह जै परमेश्वरे रूपे, तैसेरी महिमा खुशखेबारी लौ तैन पुङ् न चमके। (aiōn g165) 5 किजोकि अस अपनो नई, बल्के यीशु मसीहेरो प्रचार केरतम, कि तै प्रभुए; अस यीशु मसीहेरे वजाई सेइं तुश्शे सेवकम। 6 एल्हेरेलेइ कि परमेश्वर तै आए ज़ैनी ज़ोवं, “कि आंधरे मरां लौ चमके,” ते परमेश्वरे इश्शो दिलन मां लोअरी ज़ेरि समझ दित्ती, कि अस परमेश्वरी महिमा पिशानम जै यीशु मसीह मां लेइहोई। 7 पन अस मितारे भांडां केरे ज़ेरेम ज़ैन मां धन रखेरुए, कि ई हछछी शक्ति इश्शो तरफां नई, बल्के परमेश्वरे तरफां भोए। 8 अस च़ेव्रे पासना दुःख त झाल्लतम, पन मुशकली मां न पेम; घबरातम, पन न उमीद न भोम। 9 सताए त गातम, पन शारे न गाम, बछोड़े त गातम पन नाश न भोम। 10 अस यीशु मसीहेरी मौत अपनि जानी मां हर वक्त च्चलातम; कि ज़ैन किछ अस केरतम तैसेरे ज़िरिये लोक यीशुएरी जिन्दगी हेरेले। 11 किजोकि इश्शो ज़ींते सांसेइं, सदा यीशुएरे वजाई सेइं असन मौतरे खतरो भोतो थियो, कि यीशुएरी जिन्दगी भी इश्शो नाश भोनेबाले जानी मां बांदी भोए। 12 अस त मौतरे खतरे मां ज़ीतम पन इसेरो नितीजो तुश्शे लेइ हमेशारी जिन्दगीए। 13 ते एल्हेरेलेइ कि असन मां तैए विश्वासेरी आत्माए, “ज़ेसेरे बारे मां पवित्रशास्त्रे मां लिखोरुए, कि मीं विश्वास कियो, एल्हेरेलेइ मीं ज़ोवं” एल्हेरेलेइ अस भी विश्वास केरतम ते ज़ोतम। 14 किजोकि अस ज़ानतम, ज़ैने प्रभु यीशु मुड़दन मरां ज़ींतो कियो, तैए असन भी यीशु मसीह मां हिसेदार सेमझतां ज़ींते केरेलो, ते तुसन सेइं साथी अपने सामने हाज़र केरेलो। 15 किजोकि सारे दुःख ज़ैना असन पुङ् आन, तुश्शे लेइ आन, ताके परमेश्वरे अनुग्रह जादे करां जादे लोकन मसीह कां आने, ते बड़े लोक परमेश्वरे शुक्र केरेले। 16 एल्हेरेलेइ अस दिलेरी न शारम; अगर इश्शी बेड़ीं इन्सानयत नाश भी भोए, त फिरी भी इश्शी एनत्रीं

इन्सानयत रोज़ा नव्वीं भोती रहतीए। 17 किजोकि इश्शो एककी पलेरो थोड़ो
ज़ेरो दुःख बड़ी ते हमेशारी महिमा पैदा केरते, ज़ेसेरी तुलना केन्ची सेइं न
केरोए। (aiōnios g166) 18 ते अस त लेवरी चीज़न नई पन अलैई चीज़न लाते
रातम, किजोकि लेवरी चीज़ां थोड़े दिहाड़ां केरे लोइ आन, पन अलैई चीज़ां
हमेशारे लेर्ई आन। (aiōnios g166)

5 किजोकि अस ज़ानतम, कि ज़ैखन इश्शो जिसम जै धेरतली पुड़े ते तेम्बेरो
ज़ेरो आए मेरतां नाश भोलो, त असन परमेशरेरी तरफां स्वर्गे मां अक भवन
मैलनोए, जै हथ्थां केरो बनावरो नई बल्के हमेशारोए। (aiōnios g166) 2
इस मां अस बढ़ु कर लातम, ते बड़ी इच्छा केरतम; कि असन एरो जिसम
मैले जै स्वर्गेरे घेररो ज़ेरो भोए। 3 कि ज़ैखन असन स्वर्गेरो जिसम मैल्ले
त अस नग्गे न लेइहोम। 4 ते अस इस तेम्बेरे ज़ेरे घेरे मां रेइतां बोझे सेइं
देबोइतां कर लाते रातम; किजोकि अस दुनियारो जिसम शारनो न चाम,
बल्के इन चातम कि परमेशर असन स्वर्गेरो जिसम दे, ताके जै मरने बालो
जिसमे तै न मरे बल्के हमेशारे ज़िन्दगी मां बेदलोए। 5 ते ज़ैनी अस इस नव्वे
जिसमेरे लेइ तियार कियोरेम जै असन मैलनोए, तै परमेशरे, ज़ैने असन
ज़ेन्चरे साई देतन तेन्चरे पवित्र आत्मा भी दित्तोरोए। 6 असन सदा पूरु
याकीने ते इन ज़ानतम; कि ज़ांतगर अस जिसमे मां रातम, तांतगर अस प्रभु
करां अलग आम जै स्वर्गे मां आए। 7 किजोकि अस शकल हेरतां नई, पन
विश्वासे सेइं ज़ीतम। 8 एल्हेरेलेइ अस हिम्मत केरते रातम, ते जिसमे करां
अलग भोइतां ज़ैखन अस मरमेले त प्रभु सेइं साथी रानू जादे रोड़ू समझतम।
9 एल्हेरेलेइ इश्शो मनेरी उमंग ईए, कि चाए अस स्वर्गे मां तैस सेइं साथी
रहम, चाए अलग इड़ी धेरती पुड़ रहम पन अस तैस पसंद एइते रहम। 10
किजोकि ज़रुरीए, कि इश्शो सेब्बी केरो हाल मसीहेरे आदालतरे तखतेरे
सामने खुल्ले, कि हर कोन्ची मैन्हु अपने रोड़ां बुरां कम्मां केरो बदलो मैल्ले
ज़ैना तैने जिसमे सेइं कियोरन। 11 अस प्रभुएरो डर मेन्तां लोकन कां बिनती
केरतम कि सच्चे पुड़ विश्वास केरन, ते परमेशर रोड़े चारे ज़ानते; ते मेरी
उमीद ईए, कि तुस भी अपने दिले मां असन रोड़े ज़ारे ज़ानथ। 12 अस फिरी
भी अपनि बड़याई तुश्शे सामने न केरम, बल्के अस अपने बारे मां तुसन
घमण्ड केरनेरो मौको देतम, कि तुस तैन जुवाब देइ बटतथ, ज़ैना मने पुड़

नई, बल्के दिखवटी गल्लन पुड़ घमण्ड केरतन। 13 अगर कोई ज़ोते कि अस पागलम, त परमेशरे लेइ अहम; ते अगर कोई ज़ोते कि अस रोड़ अहम त तुश्री लेइ आम। 14 किजोकि मसीहेरो प्यार असन मजबूर केरते; एल्हेरेलेइ कि असन याकीने कि ज़ैखन अक मैन्हु सेढ़भी केरे लेइ मरो जेव त सब मेरि जे। 15 ते मसीह एन्चरे सेढ़भी केरे लेइ मरो, कि जैना ज़ींते आन, तैना अग्रोवं जो अपने लेइ न ज़ीन पन तैसेरेलेइ ज़ै तैन केरे लेइ मरो ते फिरी ज़ींतो भोव। 16 एल्हेरेलेइ अज़ेरां पत्ती अस कोन्ची दुनियारे मुताबिक न समझाम, ते अगर असेई भी मसीह दुनियारे मुताबिक ज्ञानोरो थियो त फिरी भी अज़ेरे पत्ती फिरी एरु न ज्ञानम। 17 ते अगर कोई मसीह मां आए त तै नव्वीं स्थाइ आए, पुरैनी गल्लां बीती जेई; हेरा, तैना सब नेव्वीं भोइजेइ। 18 ते सब गल्लां परमेशरेरी तरफन, जैने मसीह भेज्तां फिरी इश्शो मेल मलाप एप्पू सेइं कराव, ते लोक तैस सेइं मेल मिलाप केरन ई सेवा परमेशरे असन सौंफोरीए। 19 मतलब परमेशरे मसीह मां भोइतां एप्पू सेइं साथी दुनियारो मेल मिलाप कियोरोए, ते लोकां केरे पापां केरो दोष तैन पुड़ नई लोरो, ते परमेशरे मेल मलापेरो बिस्तार असन सौंफोरोए। 20 अस मसीहेरे राजदूत अहम; मन्ना कि परमेशर इश्शो ज़िरिये बिनती केरते कि तुस तैसेरो सन्देश कबूल केरथ, अस मसीहेरे तरफां बिनती केरतम, कि परमेशरे सेइं साथी मेल मिलाप केरा। 21 मसीह पापे करां अनज़ान थियो, तैए परमेशरे इश्शो लेइ पापी ठहराव, कि अस परमेशरेरी नज़री मां धर्मी बन्म किजोकि मसीहे इश्शी पापां केरि सज्ञा भुगतोरीए।

6 अस जैना परमेशरे सेइं साथी कम केरनेबाले आम ई भी बिनती केरतम, कि परमेशरेरो अनुग्रह जै तुसन पुड़ भोरोए, ज़ैया न भोने देथ। 2 किजोकि परमेशर पवित्रशास्त्रे मां ज़ोते, “कबूल केरनेरे वक्ते मीं तेरी शुनी, ते मुक्तरे दिहाड़े मीं तेरी मद्दत की,” हेरा, हुना तै कबूल केरनेरो वक्ते, हरा, हुना तै मुक्तरी दिहाड़ीए। 3 अस परमेशरे सेइं साथी कम केरनेबाले केन्ची भी गल्ली मां कोई भी मौको न देम, कि इश्शी सेवाई पुड़ कोई दोष लाए। 4 पन हर गल्ली सेइं परमेशरेरे सेवकां केरे ज़ेरे अपने रोड़ गुन्न बादे केरतम, बड़े सबरी सेइं, दुःख सेइं, शारे गाने मां, मुशकलन सेइं। 5 कोड़े खाने सेइं, कैद भोने सेइं, हैल्लन सेइं मेहनती सेइं, बींझे बिशने सेइं, बरत रखने सेइं। 6 पवित्रतैई

सेइं, ज्ञाने सेइं, सबरी सेइं, दयाईं सेइं, पवित्र आत्मा सेइं। ७ सच्चे प्यारे सेइं, सच्चे वचने सेइं, परमेशरेरे शक्ति सेइं; अस धार्मिकतारे हथियारन इस्तेमाल केरतम, देइने हथ्ये सेइं हमलो केरनेरे लेइ ते खिशडे हथ्ये सेइं अपनो आप बच्चानेरे लेइ। ८ ते ज़ैखन लोक इश्शी इज्ज़त केरतन या असन बेइज्जत केरतन, ज़ैखन लोक जोतन अस रोड़ेम या बुरे मैनूम, अस ईमानदारम फिरी भी लोक झूठ जोतम। ९ अनज्ञाना केरे ज़ेरेम; फिरी भी मुशूरम, मरने बालां केरे ज़ेरेम पन हेरा ज़ींतेम, मार खाने बालां केरे ज़ेरेम, पन जानी सेइं न मैरोम। १० दुःख केरनेबालां केरे ज़ेरेम, पन सदा आनन्द केरतम, कंगालम, पन बड़े लोकन आत्मिक धनी केरतम; एरेम कि असन कां किछ भी नई फिरी भी सब किछ रखतम। ११ हे कुरिन्थिस नगरेरे विश्वास लोकव, असेई तुसन सेइं खुलतां गल्लां कमई, अस तुसन सेइं पूरे दिले सेइं प्यार केरतम। १२ इश्शो मने मां तुश्शो लेइ बड़ी ठारे, पन तुश्शो मन्न मां नई। १३ पन अवं बच्चे सेमझतां तुसन सेइं ज़ोताई, कि तुस भी तैसेरे बदले असन सेइं प्यार केरा। १४ गैर विश्वासी लोकां केरे सेंगती मां न गाथ, किजोकि धार्मिकता ते अधर्मेरो कुन मेल जोल? या लौ ते आंधरेरो कुन साथ? १५ ते मसीहे शैताने सेइं कुन लगाव? या विश्वास केरनेबालेरो विश्वास न केरनेबाले सेइं कुन तालमेल? १६ ते परमेशरे मन्दरेरे मां मूरती केरे लेइ कोई ठार नई, किजोकि अस त ज़ींते परमेशरेरां मन्दर अहम; ज़ेन्चरे परमेशरे पवित्रशास्त्रे ज़ोवं, “अवं तैन लोकन साथी रेह्लो ते तैन मां चलेलो फिरेलो; ते अवं तैन केरो परमेशर भोनोई, ते तैना मेरे लोक भोले।” १७ एल्हेरेलेइ प्रभु पवित्रशास्त्रेरे ज़िरिये ज़ोते, “विश्वास न केरनेबालन मरां निस्सा ते अलग राथ; ते अशुद्ध चीज़न करां दूर राथ; ते अवं तुसन कबूल केरेलो। १८ ते तुश्शो बाजी भोइलो, ते तुस मेरां मट्टां ते कुइयां भोलां, इन सर्वशक्तिमान प्रभु परमेशरेऱ वचने।”

७ किजोकि हे ट्लाराव परमेशरे वादो कियोरो कि तै असन अपने बच्चां केरे रूपे मां कबूल केरेलो, त एज्जा, अस अपने आपे ते जिसमेरी ते आत्मारी सब गंदगी शुद्ध केरम, ते परमेशरेरो डर मेन्तां ते इज्ज़त केरतां, ते परमेशरेरी बत्तां चलनेरे लेइ पूरे तरीके सेइं पवित्र ज़िन्दगी ज़ींम। २ असन अपने दिल मां ठार देथ, असेई केन्ची सेइं बेइन्साफी नई कियोरीए, न केन्चेरु किछ बिगड़ेरुए, ते न कोई ठगोरोए। ३ अवं तुसन दोषी बनानेरे लेइ इन नई

लग्गोरो ज़ोने, किजोकि मीं इन पेइलू ज़ोरूए, कि तुस इश्शो मने मां बसोरेथ
 कि अस तुसन साथी मरने ज़ीनेरे लेइ तियारम। 4 अवं तुसन सेइं बड़े दिलेरी
 सेइं ज़ोने लोरोई, मीं तुसन पुड़ बटू घमण्डे, अवं तसल्ली सेइं भेरोई जोरोई;
 अपने सारे दुखन मां अवं आनन्दे सेइं भरपूर राताई। 5 किजोकि ज़ैखन अस
 त्रअस शैरतां मकिटुनिया इलाके मां आए, तैखन भी इश्शो जानी चैन न भोइ,
 पन अस चेव्रे पासना दुःख झ़ाल्लते राए, बेइर लड़ैरी थी, अन्तर बेड़ि-बेड़ि
 गल्लां थी। 6 फिरी भी उदासन तसल्ली देनेबाले परमेशरे तीतुसेरे एजने
 सेइं असन तसल्ली दित्ती। 7 ते न सिर्फ तैसेरे एजने सेइं पन तैसेरी तैस
 तसल्ली सेइं, ज़ै तैस तुसन करां मैलती थी; ते तैनी तुश्शी इच्छा ते तुश्शे
 दुःख ते मीं सेइं मिलनेरे जोशेरी खबर असन शुनाई, ज़ैस सेइं होरो भी आनन्द
 भोव। 8 किजोकि अगर मीं एपनी चिट्ठी सेइं तुस दुखी किये, पन तैस करां
 पसतोई न, ज़ेन्हरे पेइलो पसतातो थियो, किजोकि अवं हेरताई तैस चिट्ठी सेइं
 तुसन दुःख त भोव पन तै थोड़े चिरेरे लेइ थियो। 9 हुनी अवं खुशी आई पन
 एल्हेरेलेइ नई कि तुसन दुःख पुज़ो, बल्के एल्हेरेलेइ कि तैस्से दुखेरे वजाई
 तुसेर्फ पापन करां मन फिराव। किजोकि तुश्शो दुःख परमेशरेरे मेर्जी सेइं
 थियो, कि इश्शो पासेरां तुसन कोई नुकसान न पुज़े। 10 किजोकि परमेशरेरे
 भेक्तरो दुःख एरी पसतावो पैदा केरते ज़ैस सेइं मुक्ति मैलतीए, फिरी तैस सेइं
 पसतानू न पे, पन दुनियारो दुःख हमेशारी मौत पैदा केरते। 11 ते हेरा, इस्से
 गल्ली सेइं तुसन परमेशरेरे भेक्तरो दुःख भोव, कि तुसन केत्रो जोश, उज़र,
 सरक, डर, इच्छा, मधन भोनू, ते सज़ा देनेरो खियाल पैदा भोव? तुसेर्फ
 सेब्भी तरीके सेइं इन सिद्ध कियूं कि तुस इस गल्ली मां बेकसूर आथ।
 12 फिरी मीं ज़ैन तुसन जो सेखती सेइं लिखोरु थियूं, तैन न तैसेरे वजाई
 सेइं लिखू, ज़ैने बेइन्साफी की, ते न तैसेरे वजाई सेइं ज़ैस सेइं बेइन्साफी
 भोइ, पन एल्हेरेलेइ कि तुश्शी सरगरमी ज़ै इश्शो लेइए, तै परमेशरेरे सामने
 तुसन पुड़ बांदी भोए। 13 एल्हेरेलेइ असन हिम्मत मैल्ली; ते इश्शी इस
 हिम्मती सेइं साथी तीतुसेरे आनन्द सेइं होरो भी आनन्द भोव किजोकि तैसेरो
 मन तुश्शे वजाई सेइं होरो भरोए। 14 किजोकि अगर मीं तैसेरे सामने तुश्शे
 बारे मां किछ घमण्ड हिराव, त छिथोव न, पन ज़ेन्हरे असेर्फ तुसन सेइं सब
 गल्लां सन्न-सन्न जोरी थी, तेन्हरे इश्शू घमण्ड हिरानू तीतुसेरे सामने भी सन्न

निस्सू। 15 ते जैखन तैस तुश्शो सेष्भी केरु हुक्मन मनेबाले भोनू याद एइते; किजोकि तुसेई थरकते-थरकते तैस सेइं मुलाकात की; तैसेरो प्यार तुश्शे पासेरां होरो भी बद्धतो गाते। 16 अवं खुश भोताई, किजोकि तुसन करां मीं हर गल्ली मां भरोसो भोते।

8 हुनी मेरे ढलाव बैइनव, अस तुसन परमेशरेरे अनुग्रहेरी खबर देतम, जैन मकिदुनिया इलाकेरे कलीसियारे लोकन पुड़ भोरोए। 2 कि जैखन बेड़ि मुसीबतां केरे जिरिये परखे जे, त तैना बड़े खुशी भोए, चाए तैना बड़े गरीब थिये फिरी भी होरि विश्वासी लोकां केरि मद्दत केरनेरे लेइ खुल्ले दिले सेइं पेइंसो दित्तो। 3 ते तैन केरे बारे मां मेरी ई गवाहीए, कि तैनेई अपने काबलीतरे मुताबिक बल्के अपने काबलीती करां भी जादे मने सेइं दित्तू। 4 ते इस दाने मां ते पवित्र लोकां जैना यहौदिया इलाके मां आन तैन केरे सेवाई मां मद्दत केरनेरे बारे मां असन सेइं बार-बार बड़ी बिनती की। 5 ते जेन्चरे असेई उमीद न थी कियोरी, कि तैनेई पेइलो अपनो आप प्रभुएरी सेवा केरनेरे लेइ समर्पण कियो, फिरी परमेशरेरी मेझीं सेइं असन पत्ती च्छलनेरे लेइ अपनो आप समर्पण कियो। 6 एल्हेरेलेइ असेई तीतुस समझव, कि जेन्चरे तैने पेइलू शुरु कियोरु थियूं, तेन्चरे इस दानेरे कम्मे पूरु भी केरे। 7 जेन्चरे हर गल्ली मां मतलब विश्वासे, वचन प्रचार केरनेरे काबलीत, ज्ञाने ते सेष्भी किसमेरे कोशिश मां, ते तैस प्यारे मां, जै तुस असन सेइं केरतथ, बद्धते गातथ, तेन्चरे विश्वासी लोकन दान देनेरे कम्मे मां बद्धते राथ। 8 अवं हुक्मरे तरीके पुड़ नई, पन होरि केरे हिम्मतरे लेइ ते तुश्शे प्यार ते सचैई परखनेरे लेइ जोताई। 9 तुस इश्शे प्रभु यीशु मसीहेरे अनुग्रह ज्ञानतथ, कि तै धनी भोइतां भी तुश्शे लेइ गरीब बनो ताके तैसेरे गरीब भोने सेइं तुस धनी भोथ। 10 ते इस गल्ली मां मेरो खियाल ईए, किजोकि तुश्शे लेइ रोड़ए; जै एककी साले करां न सिर्फ इस कम्मे केरने मां, बल्के इस गल्लरे चाने मां भी पेइले भोरे थी। 11 एल्हेरेलेइ हुनी इन कम पूरु केरा; जेन्चरे तुस इच्छा केरने तियार थिये, तेन्चरे अपने-अपने हैसियतरे मुताबिक पूरु भी केरा। 12 किजोकि अगर मनेरी तियारी भोए त दान तैसेरे मुताबिक कबूल भी भोते जैन तैस कां आए न कि तैसेरे मुताबिक जैन तैस कां अथ्थी नई। 13 अवं इन न चैई होरि केरि जिन्दगी आसान बनानेरे लेइ तुस अपने जिन्दगी मुशकिल बनाथ। 14

पन बराबर भोनेरे खियालन सेइं इस वक्ते तुश्शू जादे तैन केरि घाटे मां कम्मे
एज्जे, ताके तैन केरु जादे तुश्शे घाटे मां कम्मे एज्जे, कि बराबरी भोए। 15
ज़ेन्चरे पवित्रशास्त्रे मां लिखोरुए, “ज़ैनी बड़ू अकोटू कियूं तैसेरु जादे न
निससू, ते ज़ैने थोड़ू अकोटू कियूं तैसेरु घट न निस्सू।” 16 परमेशरेरु शुक्र
भोए, ज़ैने तुश्शे लेइ ज़ै सोच मेरे मने मां आए तैए जोश तीतुसेरे मने मां
छ़ड़ोरोए। 17 कि ज़ैखन असेई तैस तुसन कां एजनेरे लेइ मिनत की त तैनी
इश्शी गल मन्नी बल्के अपने मेर्जी सेइं ते बड़े जोशे सेइं तुसन कां अव। 18
ते अस तैस सेइं साथी अक होरो विश्वासी ढला भेज़ने लोरेम, ज़ेसेरु नवं
खुशखबरी शुनानेरे बारे मां कलीसियारे लोकन मां फैलोरुए। 19 ते एत्रु नई,
पन तै कलीसियां केरे लोकई ठहरावरो भी आए, कि इस दानेरे कम्मेरे लेइ
असन सेइं साथी गाए ते अस ई सेवा एल्हेरेलेइ केरतम, कि प्रभुएरी महिमा
भोए, ते इन हिरानेरे लेइ कि अस यरुशलेमेरे विश्वासी लोकां केरि मद्दत
चातम। 20 अस इस गल्ली मां हुशार रातम, ते तीतुसे सेइं साथी विश्वासी
लोक भेज़ने सेइं इस दान देनेबाले कम्मेरे बारे मां ज़ै सेवा अस केरतम,
ताके कोई असन पुड़ दोष न लेइ सख्ते। 21 किजोकि ज़ैना गल्लां सिफ
प्रभुएरे नज़र मां रोड़ी नई बल्के मैन्हु केरे नज़री मां रोड़ी आन, अस तैन
केरि फिक्र केरतम। 22 ते अस तैन सेइं साथी अक होरो विश्वासी ढला
भी भेज़ी राओरेम, ज़ै असेई बार-बार परखो ते बेड़ि गल्लन मां जोशे बालो
निस्सो; पन हुनी तुसन पुड़ तैस बड़ो भरोसोए एल्हेरेलेइ तै दिले सेइं जोशे
बालोए। 23 अगर कोई तीतुसेरे बारे मां पुछे, त तै मेरो साथीए, ते तुश्शे लेइ
मेरो मद्दतगार, ते अगर इश्शे विश्वासी ढलां केरे बारे मां कोई पुछे, त तैना
कलीसियां केरो भेज़ोरोए ते तैन केरि ज़िन्दगी सेइं मसीहेरी महिमा भोतीए।
24 एल्हेरेलेइ अपनो प्यार तैन हिराथ, सारे कलीसियां केरे विश्वासी लोकन
सबूत देथ कि इश्शू तैन घमण्ड ज़ैन तुश्शे बारे मांए सच्चे।

9 हुनी तैस सेवारे बारे मां ज़ै यरुशलेमेरे विश्वासी लोकन जो दान देनेरे
बारे मां की गातीए, मीं तुसन जो लिखनू ज़रुरीए नई। 2 किजोकि अवं
तुश्शे मनेरे तियेररे बारे मां ज़ानताई, ज़ेसेरे वजाई सेइं अवं तुश्शे बारे मां
मकिदुनिया इलाकेरे विश्वासी लोकां केरे सामने घमण्ड हिराताई, कि तुस
अखाया इलाकेरे लोक एककी साले करां तियार भोरेथ, ते तुश्शे जोशे होरन

भी जोश बनेवरोए। ३ पन मीं तीतुस ते दूर्ध होरे ढला तुसन कां एल्हेरेलेइ
 भेज़ो, कि असेई जैन घमण्ड तुशो बारे मां हिराव, तैन इस गल्ली मां बेफैइदे
 न भोए; पन जेन्चरे मीं जोवं; तेन्चरे तुस यस्शलेम नगरेरे विश्वासी लोकां केरे
 लेइ दान देने जो तियार राथ। ४ एरु न भोए, कि अगर किछ मकिदुनया
 इलाकेरे विश्वासी लोक मीं सेइं साथी एज्जन, ते तुशू दान तियार न भोए, त
 अस तुसन पुड़ भरोसेरे केरनेरे वजाई छिथोम, पन तुस असन करां भी जादे
 छिथोले। ५ एल्हेरेलेइ मीं विश्वासी ढलान सेइं ई बिनती केरनि ज़रूरी समझी,
 कि तैना पेइले तुसन कां गान, ते तुशो खुल्ले दिले सेइं दान देनेरे बारे मां,
 ज़ेसेरे बारे मां पेइलो वादो कियोरो थियो, तियार केरतां रखा, कि इन दबावे
 सेइं नई बल्के इच्छाई सेइं भोए। ६ पन गल त ईए, कि जै थोड़ू बेते तै कटेलो
 भी थोड़ू; ते जै हछु बेते तै हछु कटेलो। ७ हर अक मैन्हु जेन्चरे मने मां थापेरु
 भोते तेन्चरे दान दे, न कुड़-कुड़ केरतां, ते न दबावे सेइं, किजोकि परमेश्वर
 खुशी सेइं देने बालन पुड़ खुश भोते। ८ परमेश्वर जैन किछ तुसन ज़रूरते
 तैसेरो अनुग्रह देइ बटो, जैस सेइं हर गल्ली मां ते हर वक्त, सब किछ, ज़ेसेरी
 तुसन ज़रूरत भोए, तुसन कां राए, ते हर एककी रोड़े कम्मेरे लेइ तुसन कां
 बड़ू किछ भोए। ९ जेन्चरे पवित्रशास्त्रे मां लिखोरुए, “परमेश्वर जैन ज़रूरते
 तैन हच्छु देते, जैन तै केरते तैन ठीके ते तैन हमेशा रालू।” (aiōn g165) १०
 आखरी, जै बेनेबालो बीज़, ते खानेरे लेइ रोटी देते, तै तुसन बीज़ देलो, ते तैस
 सेइं फलवन्त केरेलो, ते तुशो धार्मिकतारो फल बधालो। ११ तुसन हर गल्ली
 मां बरकत मैलेली जैस सेइं तुस जादे दान देनेरे काबल बनेले, ते जैखन अस
 तुशो हछ्छे दाने तैन कां नेमेले जैन ज़रूरते त तैना लोक परमेश्वरू शुक्र
 केरेले। १२ किजोकि सेवारे पूरे केरने सेइं, न सिर्फ परमेश्वरेरे लोकां केरो घाटो
 पूरो भोते, पन लोकां केरे तरफां परमेश्वरू बड़ू शुक्र भोते। १३ किजोकि होरि
 लोकन दान देनेरी मद्दतरी सेवारू सबूत कबूल केरतां तैना परमेश्वरी महिमा
 बांदी केरतन, कि तुस मसीहेरी खुशखबरी मेन्तां तैसेरे अधीन रातथ, ते गरीब
 विश्वासी लोकां केरि, ते सेब्बी केरि मद्दत केरने मां हच्छु देनू बांदू केरतथ। १४
 ते तैना तुशो लेइ परमेश्वरे कां प्रार्थना केरेले; तैना तुसन सेइं प्यार केरतन,
 किजोकि परमेश्वरे तुसन पुड़ अनुग्रह कियोरोए। १५ परमेश्वरे तैसेरे तैस दानेरे
 लेइ जैन समझी करां बेइर शुक्र भोए।

10 अबं तैए पौलुस जै तुश्शो सामने दीन आई, पन तुसन करां दूर भोताईं सेखती सेइं ज़ोताई। अबं तुसन मसीहेरी नम्रता ते नरमी याद करेइतां तुसन कां मिनत केरताई। 2 अबं ई बिनती केरताई, कि तुश्शो सामने नझाक भोइतां दिलेर न भोनू पे; ज़ेन्वरे अबं केत्रन पुड़ ज़ैना असन दुनियारे लोकां केरे ज़ेरे च्छलने बाले समझातन, बहदरी हिरानेरी खियाल केरताई। 3 किजोकि अगर अस दुनियाई मां जीतम, पन फिरी भी अपने दुश्मन्न सेइं दुनियारे मुताबिक न लड़। 4 किजोकि इश्शी लड़ईर हथियार मैन्हु केरे नई, पन ग़ड़ बछोड़नेरे लेइ परमेशरेरी शक्ति। 5 ते अस खियालन, ते हर एक्की उच्ची गल्ली, ज़ैना परमेशरेरी पिशानरे खलाफ उटूतन, खतम केरतम; ते हर एक्की खियाले कब्जे मां केरतम, ते मसीहेरो हुक्म मन्ने बालो बनातम। 6 ते तियार रातम कि ज़ैखन तुस पूरे तरीके सेइं अपनो आप मसीहेरो हुक्म मन्नेबाले बनातथ, त अस मसीहेरे हुक्म न मन्ने बालन सज्जा देनेरे लेइ तियार रामेले। 7 तुस बेइर्यूं रूप हेरतथ, अगर केच्ची एप्पू पुड़ ई भरोसे, कि अबं मसीहेरोई, तै इन भी ज़ाने, कि ज़ेरो तै मसीहेरोए, तेन्वरे अस भी मसीहेरेम आम। 8 किजोकि अगर अबं तैस अधिकारेरे बारे मां होरू भी घमण्ड हिरेर्ई, जै प्रभुए तुश्शे विश्वास नाश केरनेरे लेइ नई बलके विश्वासे बद्धानेरे लेइ असन दित्तोरोए, त शरमिन्दे न भोलो। 9 इन अबं एल्हेरेलेइ ज़ोताई, कि चिट्ठी केरे ज़िरिये तुसन डराने बालो न भोई। 10 किजोकि किछ लोक ज़ोतन, “कि तैसेरी चिट्ठी त ज़रूरिन ते अस्सर केरने बैलिन; पन ज़ैखन हेरतन, त तै कमज़ोर मैन्हु आए, ते तैसेरां भाषाना बेकारन।” 11 ते जै एरु ज़ोते, तै ई समझ रखते, ज़ेन्वरे ठीक इश्शो चिट्ठुन मां इश्शो वचन आए, तेन्वरे तुश्शे सामने इश्शां कम्मां भी भोलां। 12 किजोकि असन ई दिलेरी नई कि अपनो आप तैन सेइं साथी गनम, या तैन सेइं अपनो आप मिलाम, ज़ैना अपनि तारीफ केरतन, ते अपनो आप एक्की होरि सेइं तुलोइतां बेवकूफ बन्तन। 13 अस परमेशरेरे दित्तोरे कम्मे करां बेइर घमण्ड कधी न केरमेले, पन तैस्से हदी तगर जै परमेशरे इश्शे लेइ बनोरीए, ते तैस मां तुस भी ओरेथ ते तैसेरे मुताबिक घमण्ड भी केरेले। 14 किजोकि अस एपनी हदी करां बेइर अपनो आप बधानो न चाम, ज़ेन्वरे कि तुसन तगर न पुज़नेरी हालती मां भोते, बलके अस पेइले थिये ज़ैना कुरिन्थुस नगरे मां मसीहेरी खुशखबरी शुनाते तुसन तगर पुजी जोरेम। 15 ते

अस हदी करां जादे होरि केरे मेहनती पुङ् घमण्ड न केरम; बल्के असन
उमीदे, ज़ेन्नरे-ज़ेन्नरे तुश्शो विश्वास बधेलो तेन्नरे-तेन्नरे अस एपनी हदारे
मुताबिक तुश्रो वर्जाई सेइं होरां भी बडां जादे कम्मां केरनेरे काबल भोले। 16
कि अस तुश्शो हदन करां सारे दूर-दूर इलाकन मां भी खुशखबरी शुनाम, इन
नई कि अस होरि केरे हदां केरे अन्तर बनोरे कम्मन पुङ् घमण्ड केरम। 17
पन ज़ेन्नरे पवित्रशास्त्र ज़ोते, ज़ै घमण्ड केरे तै प्रभु पुङ् केरे। 18 किजोकि ज़ै
अपनि बड़याई केरते, तै नई, पन ज़ेसेरी बड़याई प्रभु केरते, तैए परमेश्वरी
नज़री मां रोड़ोए।

11 तुस होरन कबूल केरतथ जैना अपनि बड़याई केरतन, ते एलहेरेलेइ अवं
उमीद केरतां, अगर अवं थोड़ी ज़ेरि बेवकूफी केरि त तुस झैल्ले। 2 किजोकि
अवं तुसन सेइं प्यार केरताई ते तुश्शो खियाल रखताई ठीक तेन्नरे, ज़ेन्नरे
परमेश्वर केरते, मीं वादो कियोरोए तुसन मसीह जो देनेरे लेइ, ज़ेन्नरे लोक पूरे
तरीके सेइं समर्पितन। 3 पन अवं डरताई कि ज़ेन्नरे शैताने सप्परे रूपे मां
एइतां अपनि चलैकी सेइं पेइली कुआन्श, हव्वा भटकवरी थी, तेन्नरे तुश्शो
मन तैसेरे सिध्यैई ते पवित्रतैई सेइं ज़ै मसीहे कबूल केरते भोरी लोड़े भ्रष्ट न
की गाए। 4 ज़ैखन भी कोई तुसन कां एइते ते तुसन तैस यीशुएरी ज़ैस
यीशुएरो असेई नई कियोरो एइतां, कोन्ची होरि यीशुएरो प्रचार केरते, ज़ेसेरो
प्रचार असेई नई कियोरो: या ज़ै आत्मा तुसन मैल्लोरी तैस करां अलग
किसमेरी आत्मा तुसन मैल्ले; या ज़ैस खुशखबरी पुङ् तुसेई विश्वास कियूं
तैस करां अलग किसमेरे खुशखबरी तुसन शुनाए, त तुस तैन शिक्षान कबूल
केरने मां गलतथ। 5 अवं समझताई, कि अवं कोन्ची गल्ली मां, जैना इस
तरीके सेइं बताव केरतन, कि तैना होरि सब प्रेरितन करां महान आन अवं भी
तैन केरो ज़ेरो रोड़ो प्रेरित आई। 6 अगर अवं भाषण देने मां माहिर नई, पन
मसीह ते खुशखबरारे बारे मां मीं कां ज्ञाने; बल्के मीं हर गल शिखालने मां
अपनू ज्ञान हिरावरूए। 7 कि मीं तुसन परमेश्वरी खुशखबरी मुखत शुनाई; ते
अपनो आप निकड़ो कियो, कि तुस उच्चे भोथ, कुन इस मां मीं किछ पाप
कियो? 8 मीं होरि कलीसियान करां दान कबूल कियूं, ताके तुश्शी सेवा
मुफते मां केरि बेटि, तैस जो लूट न ज़ोथ। 9 ते ज़ैखन तुसन सेइं साथी थियो,
ते मीं पेइसेरो घाटो भोव, ते मीं केन्ची पुङ् भार न छँड्हो, किजोकि विश्वासी

द्वलाएर्द्दि, मकिदुनिया इलाकेरां एइतां मेरो घाटो पूरो कियोः ते मीं हर गल्ली
 मां अपनो आप तुसन पुड भार भोने करां रोको, ते अग्रोवं जो भी रोकेलो। 10
 मसीहेरी सच्चाई मीं मां आए, मीं अखाया इलाके मां कोन्ची करां दान नई
 नेवरू, एल्हेरेलेइ अखाया इलाके मां इस घमण्डे केरने करां कोई मीं न रोकी
 बटे। 11 किजो मीं तुश्शो पेइंसो नई नेवरो? कुन मीं एन कियूं कि अवं तुसन
 सेइं प्यार न केरि? परमेश्वर ज्ञानते कि अवं तुसन सेइं प्यार केरताई। 12 पन
 ज्ञैन अवं केरताई, तैने अग्रोवं भी केरतो रेइलो; अवं तुसन करां मदत न नेइलो
 ज्ञैस सेइं अवं तैन ज्ञैना घमण्ड केरनेरो मौको चातन, कि ज़ेरु कम अस
 परमेश्वरे लेइ केरतम तेरहु कम तैना भी केरतन। 13 किजोकि एरे लोक झूठे
 प्रेरित आन, ते दगो केरतां कम केरनेबालन, ते मसीहेरे प्रेरितां केरु ज़ेरु रूप
 बनाने बालेन। 14 ते ई हैरान राने बाली गल नई किजोकि शैतान एप्पू भी
 महिमा बाले स्वर्गदूतां केरु रूप बनाते। 15 ते अगर तैसेरे सेवक भी धर्मी
 सेवकां केरु ज़ेरु रूप बनान, त कोई बडी गल नई पन तैन केरो अन्त तैन केरे
 कम्मां केरे मुताबिक भोनोए। 16 अवं फिरी ज़ोताई, कोई मीं बेवकूफ न
 समझे; नई बेवकूफ समझातां मीं कबूल केरे, ताके अवं थोड़ु ज़ेरु घमण्ड
 केरि। 17 ज्ञैन किछ अवं ज़ोताई ज़ेरु यीशु चाते तेरहु नई बल्के बेवकूफी
 सेइं ज़ोताई। 18 ज़ैखन कि बडे लोक इस दुनियारे लोकां केरु ज़ेरु घमण्ड
 केरतन, त अवं भी घमण्ड केरेलो। 19 तुस त समझदार भोइतां आनन्दे सेइं
 बेकूफां केरि झैलतथ। 20 किजोकि ज़ैखन तुसन कोई गुलाम बनातन, या
 ज्ञैन किछ तुसन कां आए नेते, या तुसन सेइं धोखो केरते, या सोचतन कि
 तैना तुसन करां बड्हेन, या तुश्शे तुतरे पुड थप्पड बातन, त तुस झाल्लतथ।
 21 एल्हेरेलेइ कुन तुस सोचतथ कि मीं छिथोरु लोडते किजोकि मीं तैन नई
 कियोरु; पन जै कोई कोन्ची गल्ली मां घमण्ड केरते, अवं बेवकूफी सेइं
 ज़ोताई, फिरी भी घमण्ड केरताई। 22 कुन तैना इब्रानी आन? अवं भी
 आई। कुन तैना इसाएली आन? अवं भी आई, कुन तैना अब्राहमेरे खानदाने
 मरां आन? अवं भी आई? 23 कुन तैना मसीहेरे सेवक आन? (अवं पागलेरो
 जेरो ज़ोताई) अवं तैन करां बेद्धतां आई! मीं तैन करां जादे मेहनत कियोरीए,
 तैन करां जादे बार अवं कैद कियोरोई, बडे बार मीं मार बज़ोरीए, हमेशा मेरी
 जान मुश्किली मां पेवरीए। 24 मीं यहूदन लीडरेई करां पंच बार 39 कोडे

खाए। 25 ट्लेइ बार मीं बेंतेहं खेइ; एककी बार मीं पुड़ घोड़ेव कियो जेव;
 ट्लेइ बार ज़िहाजे मां ज़ैन पुड़ अवं चढ़ेरो थियो, ट्लुटी जेआं, अक रात ते
 दिहाड़ी मीं समुन्द्रे मां कट्टी। 26 अवं बार-बार सफरे मां; दरियारे खतरन मां;
 डैकू केरे खतरन मां; अपने ज़ातरे खतरन मां; गैर कौमां केरे खतरन मां;
 नगरां केरे खतरन मां; जंगल्लेरे खतरन मां; झूठे विश्वासी लोकां केरे खतरन
 मां; 27 बड़े मेहनती मां ते तकलीफी मां; बार-बार बीझे बिशने मां; बार-बार
 बरत रखने मां; ढलुख ट्लिशी मां; हिवतड़े मां; ते नग्गे रानेरी हालती मां
 राहोरोइं। 28 ते होरि इना गल्लां केरे अलावा ज़ैन गल्लां केरे बारे मां अवं न
 ज़ोई सेभी कलीसिया केरे फिक्र मीं रोज़ दुबातीए। 29 ज़ैखन कोई कमज़ोर
 भोते अवं भी कमज़ोर भोताई। ज़ैखन कोई पापेरे पासे गाते त मेरो दिल बड़ो
 दुखी भोते? 30 अगर घमण्ड केरनू ज़रूरीए, त अवं एपनी कमज़ोरारी गल्लन
 पुड़ केरेलो। 31 परमेशर इश्शे प्रभु यीशुएरो बाजी ज़ै सदा धने, तै ज़ानते,
 कि अवं झूठ नई लोरो ज़ोने। (aiōn g165) 32 ज़ैखन अवं दमिश्क नगरे मां
 थियो त अरितास राज़ेरे हाकिमे अवं कैद केरनेरे मकसदे सेइं सारे नगरे मां
 पेरहो रखोरो थियो। 33 ते अवं टोकरे मां शहरपनाहेरे दैरारे बत्तां दुवारी उन्ढो
 औसालोरो थियो, ते अवं हाकिमेरे हथ्ये करां बच्चो।

12 अगर घमण्ड केरनू मेरे लेइ ठीक नई, फिरी भी केरनू पेते; अवं प्रभुएर
 दित्तोरे दर्शन ते प्रकाशेरे बारे मां ज़ोइएलो। 2 अवं मसीह मां च़ेवधे साल पेइले
 ट्लेइयोवं स्वर्गे पुड़ नीयो जेव, चाए अवं जिसमे मां थियो या जिसमे मरां
 बेइर, अवं न ज़ैनी सिर्फ परमेशर ज़ानते। 3 अवं फिरी ज़ोताई, कि ई मैन्हु
 स्वर्गे तगर अकदम नेव जेव (फिरी, अवं न ज़ैनी कि इन जिसमे मां भोवं या
 अक दर्शन थियूं, सिर्फ परमेशरे ज़ानते), तैड़ी तैनी तैना गल्लां शुनी ज़ैना
 लफसन मां न ज़ोइयोन, एरी गल्लां ज़ैना मैन्हु ओठन सेइं न ज़ोई बटन। 5 एरे
 मैन्हु पुड़ त अवं घमण्ड केरेलो, पन अपने कमज़ोरी केरे अलावा, अपने बारे
 मां घमण्ड न केरि। 6 किजोकि अगर अवं घमण्ड केरनू चैई भी त बेवकूफ न
 बेई, किजोकि अवं सच ज़ोइलो; पन अपने आपे एस किसमेरे घमण्डे करां
 रोकताई, एरु न भोए, कि ज़ेन्चरे कोई मीं लाते, या मीं शुन्ते, मीं तैस करां भी
 बेद्धतां न समझो। 7 पन ज़ैना अद्वबूद गल्लां परमेशरे मीं हेरेवरिन तैन केरे
 वजाई सेइं अवं बड़ो जादे घमण्डी न भोइ गेइ। एल्हेरेलेइ तैनी मीं अक बड़ो

मुशकिल मसलो तुसन सेइं बर्ताव केरनेरे लेइ दित्तोरोए (मेरी जानी मां अक कंटो)। शैतानेरे एककी दूते मीं महुनेरो इरादो कियोरोए ते अवं घमण्ड केरने करां रोकोरोई। ८ इसेरे बारे मां मीं प्रभु कां ट्लाई बार बिनती की, कि मीं करां दूर भोइ गाए। ९ ते तैने मीं सेइं ज़ोवं, “मेरो अनुग्रह तेरे लेइ सुधोए, किजोकि मेरी शक्ति कमज़ोरी मां सिद्ध भोतीए।” एल्हेरेलेइ अवं एपनी कमज़ोरी पुड घमण्ड केरेलो, कि मसीहेरी सामर्थ मीं पुड एंझी राए। १० इस वजाई सेइं अवं मसीहेरे लेइ कमज़ोरन मां, ते बेइज़तन मां, गरीबी मां, सताए गाने मां, ते मुशकलन मां खुश आई; किजोकि ज़ैखन अवं कमज़ोर भोताई, तैखन अवं मसीहेरी शक्ति सेइं ज़ोरे बालो भोताई। ११ अवं बेवकूफ त बनो, पन अवं एरु केरनेरे लेइ तुसेई अवं मजबूर कियो, तुसेई त मेरी बड़याई कियोरी लोड़ती थी, किजोकि अगर अवं किछ भी नई, फिरी भी होरे प्रेरित ज़ैना महान आन अवं तैन केरो ज़ेरो रोडो आई। १२ मीं रोडे प्रेरितेरी पिशान भी तुश्शे दरमयान हर किसमेरे सबर साथी ते निशान ते बडां-बडां कम्मां, ते सामर्थएरां कम्मां हिरां। १३ अक गल थी ज़ै मीं तुसन सेइं न की, ज़ै मीं होरि कलीसियान सेइं की, यानी अवं पेइंसां केरे बारे मां तुश्शे लेइ बोझ न बनो। कुन इन तुसन घटिया बनाते, एरु केरने सेइं मीं तुश्शे खलाफ गलत कियोरु ई तुश्शी सोच गलते। १४ हेरा, अवं ट्लेइयोवं बार एजनेरे लेइ तियाराई, ते अवं तुसन करां कोई पेइंसां केरि मांग न रेखेलो। किजोकि अवं तुश्शी जेइदाद नई, बल्के तुसन चाताई, किजोकि बच्चेइं अम्मा बाजी केरे लेइ धन अकोटू न लोडे कियेरु, पन अम्मा बाजेई बच्चां केरे लेइ कियेरु लोडे। १५ अवं तुश्शी लेइ बड़ी खुशी सेइं खर्च केरेलो, बल्के अवं अपनू सब किछ तुसन देइलो, अवं तुसन सेइं बड़ो प्यार केरताई पन एरु लगते कि तुस मीं सेइं घट प्यार केरतथ। १६ तुसन मरां किछ मन्तन कि मीं तुसन पुड भार नई छडोरो, पन किछ होरे सोचतन कि अवं चलाक आई ते मीं तुसन पूरे तरीके सेइं धोखो दित्तोरोए, ज़ैन कि ढूठ आए। १७ मीं अपने लेइ तुसन करां पेइंसे नेनेरे लेइ तीतुस या होरो कोई इस्तेमाल नई कियोरो। १८ मीं तीतुस समझेइतां तैस साथी तै ढला भेजो, त कुन तीतुसे धोखे सेइं किछ नेव? कुन अस एककी मकसदे सेइं न चले? कुन इश्शां कम्मां अक्कां ज़ेरां नई। १९ हे ट्लाराव, तुस हेजू तगर इन समझतथ कि अस तुश्शे सामने अपनो बचाव लोरेम केरने,

अस त परमेश्वरे हाज़र सेमझतां मसीह मां ज़ोतम, ते सब गल्लां एल्हेरेलेइ
ज़ोतम कि तुसन विश्वासे मां मज़बूत केरने लोरेम। 20 किजोकि मीं डरे, कि
एरु न भोए, कि अवं एज्जी ते ज़ेन्चरे अवं चाताई, तेन्चरे तुस न भोथ; ते मीं
भी ज़ेन्चरे तुस मीं चातथ तेरे लाथ, कि तुसन मां लड़ई, गर्म सुभाव, सरक,
खलाफत, जलन, चोगली, अभिमान ते फसाद भोन। 21 कि एरु न भोए कि
ज़ैखन अवं तुसन कां दुबारां एज्जी, त मेरो परमेश्वर मीं छिथाए। ते मीं दुःख
केरनो पे, किजोकि तुसन मरा बड़ई अपने पुराने पाप नई शारोरे। ते तैस गंदे
कम्मे, ते बदमाशी, ते लुचपने सेइं, जै तैनेई कियो, मन न फिराव।

13 पवित्रशास्त्रे मां इन लिखोरुए कि, “हर अक गल दूँ या ट्लेइ गवाहां
केरे गवाही केरे ज़िरिये सेइं पक्की की गाली।” मीं तैन लोकन हदैइयत
दित्तोरीए ज़ैना पाप केरते थिये, ज़ैखन अवं दुइयोवं बार ओरो थियो। हुनी अवं
फिरी तैन ते होरि सेब्भी लोकन हदैइयत देताई कि ठीक तेन्चरे ज़ेन्चरे मीं
पेइलू भी कियोरुए इस चिट्ठी मां खबरदार केरताई। हुनी अवं ट्लेइयोवं बार
एजनेबालो आई, ते अगर तैना हेजू भी पाप केरनो बंद नई कियोरो, तैन मरां
कोई भी सज्जाई करां न बङ्गेलो। 3 अवं ज़ोताई कि तुस इना गल्लां केरु सबूत
चातथ, कि मसीह मेरे ज़िरिये गल्लां केरते, पन ज़ैखन मसीह तुसन सेइं
बर्ताव केरते त तै कमज़ोर नई; पन तुसन मां सामर्थ आए। 4 तै कमज़ोरारे
वजाई सेइं कूसे पुड़ चाढ़ो त जेव, फिरी भी परमेश्वरे शक्ति सेइं ज़ींतोए।
अस भी कमज़ोरम, ठीक तेन्चरां, ज़ेन्चरे मसीह थियो; पन ज़ैखन अस तुसन
सेइं बर्ताव केरमेले अस भी तैस सेइं साथी ज़ींते भोमेले ते असन सेइं साथी
परमेश्वरी शक्ति भोली। 5 अपनो आप परखा, कि तुश्शो विश्वास सज्जो आए
कि नई; एप्पू परखा, कुन तुसन अपने बारे मां ई पतो नई, कि यीशु मसीह
तुसन मां आए, नई त तुस निकम्मे भोए। 6 पन मेरी उमीदे, कि तुस बुझेले,
कि अस निकम्मे नई निसोरे। 7 चाए अगर तुसन इन लेइहोते कि अस सज्जे
प्रेरित नई, अस तुश्शे लेइ परमेश्वरे कां प्रार्थना केरने लोरेम, कि गलती केरनेरे
बगैर सिर्फ रोड़ू केरा। 8 किजोकि अस सज्जेरे खलाफ किछ न केरि बटम,
पन सज्जेरे लेइ केरि बटम। 9 ज़ैखन अस कमज़ोरम, ते तुस ताकतबरथ,
अस खुशी रातम, ते ई प्रार्थना भी केरतम, कि तुस विश्वासे मां सिद्ध भोते
राथ। 10 एल्हेरेलेइ अवं तुश्शे पिठी पतर इना गल्लां लिखताई, कि मौजूद

भोइतां मीं तैस अधिकारेरे मुताबिक जै प्रभुए बिगाड़नेरे लेइ नईं पन बनानेरी
लेइ मीं दित्तोरोए, सेखती सेइं किछ न केरनू पे। 11 हे ढलाव ते बेइनव, खुश
राथ, सिद्ध बनते राथ; एककी होरि हिम्मत देथ; ते मेल मिलाये सेइं राथ, ते
प्यार केरनेबालो ते शान्ति देनेबालो परमेश्वर तुसन साथी भोलो। 12 मसीहेरे
प्यारे सेइं एककी होरि जो नमस्कार केरा। 13 सब पवित्र लोक तुसन जो
नमस्कार ज़ोतन। 14 प्रभु यीशु मसीहेरो अनुग्रह ते परमेश्वरो प्यार ते पवित्र
आत्मारी सन्नाती तुसन सेष्बन साथी भोए।

गलातियों

1 अवं पौलुस ई चिट्ठी तुसन लिखताई, अवं अक प्रेरिताई, अवं न मैन्हु केरे तरफां, ते न केन्ची मैनेरे ज़िरिये प्रेरित भोनेरे लेइ चुनोरोई, बल्के यीशु मसीह ते बाजी परमेशरे ज़िरिये, ज़ैनी यीशु मुङ्दन मरां ज़ींतो कियो। 2 ते सारे ढलां केरे तरफां, ज़ैना मीं सेइं साथिन; गलातिया इलाकेरे कलीसियां केरे लेइ ई चिट्ठी लिखताई। 3 बाजी परमेशर, ते इश्शे प्रभु यीशु मसीहेरे तरफां तुसन अनुग्रह ते शान्ति मैलती राए। 4 इश्शे परमेशर ते बाजी केरि मेझीं सेइं यीशु मसीहे अपनो आप इश्शे पापां केरे लेइ बलिदान कियो, ताके असन इस मौजूद बुरे दुनियाई करां छुटकारो दे। (aiōn g165) 5 तैसेरी महिमा हमेशा भोती राए। आमीन। (aiōn g165) 6 अवं हैरान भोताई, कि परमेशरे तुसन मसीहेरे अनुग्रहे मां ज़ींनेरे लेइ कुजाए; ते तुस तैस करां एत्रे जल्दी फिरतां होरि किसमेरी खुशखबरी मन्ने लाए। 7 पन सिर्फ एक्के सच्ची खुशखबरी आए, गल ईए, कि किछ लोक एरेन, ज़ैना तुसन धोखो देतन, ते मसीहेरी खुशखबरी बगाड़ने चातन। 8 पन अगर असन मरां कोई या कोई स्वर्गदूत भी तुसन कोई तैस खुशखेबरारे अलावा ज़ै असेई तुसन शुनोरी, शुनाए त लानती भोए। 9 ज़ेन्नरे असेई पेइलू ज़ोवरूए, तेन्नरे अवं हुना फिरी ज़ोताई, कि तैस खुशखेबरारे अलावा ज़ै तुसेई कबूल कियोरोए, अगर कोई होरो खुशखबरी शुनाए, त लानती भोए। 10 हुनी कुन अवं मैन्हु केरि मन्जूरी हासिल केरनेरी कोशिश केरताई या परमेशरेरी? कुन अवं लोकन खुश केरनेरी कोशिश केरने लोरोई? बिलकुल भी नई, अगर हेजू तगर लोकन खुश केरतो राताई, त मसीहेरो दास न भोथो। 11 हे ढलाव ते बेइनव, अवं तुसन ज़ोताई, कि ज़ै खुशखबरी मीं तुसन शुनाई, ई मैन्हु केरि बनोरी नई। 12 किजोकि तै मीं न केन्ची मैन्हु करां मैलोरी, ते न मीं कोन्ची उस्तादे करां शिखोरी, बल्के यीशु मसीहे मीं पुड़ बांदी की। 13 तुसेई शुनोरूए यहूदी धर्मे मां पेइलो ज़ै मेरो चालचलन थियो तै केरो थियो, कि अवं परमेशरेरी कलीसियाई बड़ी सतातो थियो, ते नाश केरनेरी कोशिश केरतो थियो। 14 ते अवं अपने धर्मे मां तैस वर्ते बड़े मेरे उमरारे यहूदन करां अग्रोवं थियो। ते अपने बुजुर्गा केरे रीतन मां जोशे मां थियो। 15 पन परमेशरेरी ज़ैखन इच्छा भोइ, तैनी अवं मेरे ज़रमने करां पेइलो चुनो ते अपने अनुग्रह सेइं कुजाव, 16 कि मीं मां अपने मटू बांदू

केरे कि अवं गैर कौमन मां तैसेरी खुशखबरी शुनेई; ते मीं समझनेरे लेइ होरि कोन्ची करां सलाह नी। 17 ते न यरुशलेम नगरे मां तैन कां जेव ज़ैना मीं करां पेइले प्रेरितन, पन अरब मुलखे जो चलो जेव, ते फिरी किछि चिरेरां बाद तैट्ठां दमिश्क नगरे जो वापस अव। 18 फिरी ट्लाई सालना पत्ती अवं कैफा (यानी पतरस प्रेरिते) सेइं मिलने यरुशलेम नगरे जो जेव, ते 15 दिहाड़े तैड़ी राव। 19 पन प्रेरितन मरां प्रभुएरे ढला याकूबेरे अलावा होरि कोन्ची सेइं न मिलो। 20 ज़ैना गल्लां अवं तुसन लिखताई, हेरा परमेशरे हाज़र सेमझतां ज़ोताई, कि तैना झूठी नई। 21 यरुशलेम नगर शारनेरां पत्ती, अवं सीरिया ते किलिकियारे मुलखे मां जेव। 22 पन यहूदिया इलाकेरे कलीसियां केरे लोक ज़ैना मसीह मां थिये, ज़ैना मीं सेइं कथे न थिये मिलोरे। 23 पन इन्ने शुन्ते रहते थिये, कि ज़ै असन पेइलो सतातो थियो, तैए तैसे विश्वासेरी खुशखबरी शुनाते, ज़ैस पेइलो नाश केरतो थियो। 24 ते ज़ैन परमेशरे मेरे ज़िन्दगी मां कियूं तैल्हेरेलेइ तैना परमेशरेरी बड़ीयाई केरते रहते थिये।

2 चेवधे सालना पत्ती अवं बरनबासे सेइं साथी यरुशलेम नगरे जो जेव, ते तीतुस भी मीं एप्पू सेइं साथी नीयो। 2 अवं एल्हेरेलेइ तैड़ी जेव किजोकि परमेशरे मीं गानेरे लेइ ज़ोरु थियूं, ज़ैखन अवं तैड़ी थियो, अवं अकैल्ले मां कलीसियारे खास बुजुर्गन सेइं मिलो ते तैन खुशखबरी समझाई, ज़ै अवं गैर कौमन मां प्रचार केरतो ओरो थियो, ताके एरु न भोए, कि ज़ैन किछि अवं केरतो ओरोई ते ज़ैन केरने लोरोई बेफैइटू भोए। 3 मेरो साथी तीतुस, ज़ै यूनानीए, ज़ैसेरो खतनो कधी न भोरो। पन ज़ैना यरुशलेम नगर कलीसियारे खास बुजुर्ग थिये तैनेई तै खतनो करानेरे लेइ मजबूर न कियो, बल्के तैनेई तै कबूल कियो। 4 ते ई गल तैन केरे लेइ परेशानी बनी, ई इन तैन झूठे ढलां केरे वर्जाई सेइं भोवं, ज़ैना छेपतां इश्शो टोली मां ओरे थी, कि तैस ऐज़ैदरी ज़ै मसीह यीशु मां असन मैलोरीए, भेद नेइतां फिरी असन यहूदी केरे कानूनेरे गुलाम बनान। 5 पन असेई एक्की पलेरे भी तैन केरि शुने करां इन्कार कियो, ताके ज़ै सन्देश असेई तुश्शे लेइ आनो तै सच्ची खुशखबरी बनोरी राए। 6 तैन यरुशलेम नगरेरे कलीसियारे खास लीडरोई मेरी शिक्षाई मां किछि न ज़ोड़ू, इस सेइं मीं किछि फर्क न पे, कि तैना केरहे बुजुर्ग आन, किजोकि परमेशर बेइरोवं रूप हेरतां फैसलो न केरे। 7 पन इसेरे उलट ज़ैखन तैन

बुजुर्गेई हेरु, कि ज़ेन्चरे परमेशरे यहूदी लोकां केरे लेइ खुशखेबरारु कम
 पतरसे सोंफू, तेन्हरे परमेशरे गैर कौमां केरे लोकन खुशखबरी शुनानेरु कम
 मीं सोंफू। ८ ज़ैने परमेशरे पतरस यहूदी केरो प्रेरित भोनेरे लेइ चुनो, तैन्हे अवं
 भी गैर कौमां केरो प्रेरित भोनेरे लेइ चुनो। ९ ज़ैना मैन्हु कलीसियारे खम्बे
 समझे गाते थिये (यानी खास लीडर) मतलब याकूब, कैफा (यानी पतरस)
 ते यूहन्ना तैनेई अनुग्रहेरु तैन वरदान पिशानू ज़ैन मीं मैलोरु थियू। तैनेई
 अवं ते बरनबास साथी सेमझतां ते असन सेइं हथ मिलेइतां राजी भोए।
 कि अस गैर कौमन मां खुशखबरी प्रचार केरम, ते तैना यहूदीन मां। १०
 तैनेई असन कां बिनती की, कि अस यरुशलेमेरे गरीब विश्वासी लोकां केरि
 मद्दत केरम, ज़ैन केरनेरी अवं बड़ी इच्छा केरतो थियो। ११ पन ज़ैखन कैफा
 (पतरस) अन्ताकिया नगरे मां अव, त मीं सेब्बी विश्वासी लोकां केरे सामने
 तैसेरी खलाफ की ते झाड़ दित्ती, किजोकि ज़ैन तैनी कियोरु थियू तैन गलत
 थियू। १२ एल्हेरेलेइ कि याकूबेरे पासेरां किछ मैन्हु केरे एजनेरे पेइले तै गैर
 कौमां केरे लोकन साथी खातो थियो, पन ज़ैखन तैना आए, त खतनो कियोरे
 लोकां केरे डरे सेइं तैन करां हटो ते अलग भोने लव। १३ ते तैस साथी बाकी
 यहूदी विश्वासी लोकेई भी पाखंड कियूं, इडी तगर कि बरनबास भी तैन केरे
 संगती मां शामल भोव। १४ पन ज़ैखन मीं तैन केरो बर्ताव हेरु, कि तैना
 खुशखेबरारे सँच्चेरे खलाफ चलतन, त मीं सेब्बी केरे सामने कैफा (पतरस)
 सेइं ज़ोवं, “कि ज़ैखन तू यहूदी भोइतां गैर कौमन केरि ज़ेरि चाल चलतस, न
 कि यहूदी केरि ज़ेरि, त तू गैर कौमन यहूदी केरे रसमन पुड़ चलनेरे लेइ किजो
 ज़ोतस?” १५ अस ज़ैना ज़र्मनेरे यहूदिम, ते पैपी गैर कौमां केरे ज़ेरे नई। १६
 फिरी भी इन सेमझतां कि मैन्हु मूसेरे कानूनेरे कम्मन सेइं नई, पन सिर्फ
 यीशु मसीह पुड़ विश्वास केरने सेइं धर्मी भोते, असेई एपू भी मसीह यीशु
 पुड़ विश्वास कियो, कि अस मूसेरे कानूनेरे कम्मन सेइं नई पन यीशु मसीह
 पुड़ विश्वास केरने सेइं धर्मी भोए, किजोकि मूसेरे कानूनेरे कम्मन सेइं कोई
 धर्मी न भोलो। १७ किछ यहूदी सोचतन कि असेई पाप कियो, किजोकि
 असेई धर्मी भोनेरे लेइ कानून मन्नेरे बदले सिर्फ मसीह पुड़ विश्वास कियोरो,
 त कुन मसीहे अस पापी बनाए, नई, कधी नई। १८ किजोकि ज़ैन किछ मीं
 बछोड़ू, अगर तैस फिरी बनेइं, त अपनो आप पापी बनाताई। १९ अवं त

कानूने सेइं कानूनेरे लेइ मेरि जेव, कि परमेशरेरे लेइ ज़ीई। 20 अवं मसीह सेइं साथी क्रूसे पुड़ चढ़ोरोई, ते हुनी ज़ींतो न राव, पन मसीह मीं मां ज़ींतोए, ते अवं जिसमे मां हुनी ज़ींतोई, त सिर्फ तैस विश्वासे सेइं ज़ींतोई, जै परमेशरेरे मट्ठे पुडे, जैने मीं सेइं प्यार कियो, ते मेरे लेइ अपनि जान दित्ती। 21 अवं इस गल्लरो इन्कार न केरि कि परमेशर अपने अनुग्रहे सेइं बचाते, किजोकि अगर कानून मन्ने सेइं लोक धर्मी भोथे, त मसीहे मरनेरी कोई ज़रूरत न थी।

3 हे बेसमझ गलातियारे लोकव, केने तुस टरे लाए? तुश्शे त मना तुश्शे सामने यीशु मसीह क्रूसे पुड़ चाढ़ो! 2 अवं तुसन सिर्फ ई सवाल पुछ्नो चाताई, कि तुसेई पवित्र आत्मा कुन कानून मन्ने सेइं हासिल कियो? बिलकुल भी नई, तुसेई खुशखबरी शुनी ते तैस पुड़ विश्वास कियूं ते पवित्र आत्मा हासिल की। 3 कुन तुस एरे बेसमझाथ, कि पवित्र आत्मारे रीति पुड़ शुरु केरतथ ते जिसमेरे रीति पुड़ खतम केरेले? 4 कुन तुसेई सब दुःख बैफैइदो झौल्ले? अवं उमीद केरताई बैफैइदो नई। 5 एल्हेरेलेइ जै तुसन पवित्र आत्मारु दान बडू जादे देते ते चमत्कार केरते, कुन तै कानून मन्नेरे वजाई सेइं एन केरते या तुसेई खुशखबरी शुनी ते तैस पुड़ विश्वास कियो? 6 हुनी अब्राहमेरे बारे मां सोचा “अब्राहमे परमेशरे पुड़ विश्वास कियो ते तै तैसेरेलेइ धार्मिकता गनो जेव।” 7 एल्हेरेलेइ तुसन एन ज़ान्नेरी ज़रूरते कि जैना अब्राहमेरो ज़ेरो परमेशरे पुड़ विश्वास केरनेबालेन तैन्ना हकीकति मां तैसेरी बच्येन। 8 पवित्रशास्त्रे मां बडू पेइलू इन लिखोरुए, कि परमेशर गैर कौमन विश्वासे सेइं धर्मी बनालो, पेइले अब्राहमे ई खुशखबरी शुनाई, “कि तेरे ज़िरिये सेब्बी कौमन बरकत मैलेली।” 9 ते जैना अब्राहमेरो ज़ेरो परमेशरे पुड़ विश्वास केरतन, परमेशर तैन सेब्बन बरकत देते जैना मसीह पुड़ विश्वास केरतन ज़ेन्हरे तैनी अब्राहमे बरकत दित्ती। 10 एल्हेरेलेइ जैना लोक सोचतन कि तैना मूसेरो कानून मेन्तां धर्मी बनाए गाले, तैन पुड़ परमेशरेरी लानते, किजोकि मूसेरे कानूने मां लिखोरुए, “कि जै कोई कानूने मां लिखोरे सब कानूनेरे मुताबिक न चले, तैस पुड़ परमेशरेरी लानते।” 11 ई गल साफे, कि मूसेरे कानून सेइं परमेशरे कां कोई मैन्ह धर्मी न भोए, “किजोकि जै मैन्ह परमेशरे पुड़ विश्वास केरते, परमेशर तैस धर्मी ठहराते ते तैस हमेशारी ज़िन्दगी मैलतीए।” 12 पन मूसेरे कानूनेरो विश्वासे सेइं कोई वासतो नई; पन

“जै तैन मन्नेलो, तै तैन मन्ने सेइं जींतो रालो।” 13 मसीहे जै इश्शे लेइ
 लानती बनो, तैने अस कीमत देइतां कानूनेरे लानती करां छुटाए किजोकि
 पवित्रशास्त्रे मां लिखोरुए, “जै कोई कूसे पुड़ टंगो गालो तै लानतीए।” 14
 मसीहे एन एल्हेरेलेइ कियूं, कि गैर कौमां तैसेरे ज़िरिये तैना सैरी बरकतां
 हासिल केरन, जैन केरो वादो परमेशरे अब्राहम सेइं कियोरो थियो, ते मसीह
 पुड़ विश्वास केरने सेइं अस पवित्र आत्मा हासिल केरम, ज़ेसेरो वादो तैने
 कियोरोए। 15 हे ढलाव ते बेइनव, अवं आम ज़िन्दगी मिसाल देने लोरोई,
 जैखन दूर्घ मैन्हु केरो करार जै पक्को भोते, त न कोई तैस टालते ते न
 तैस मां किछ बद्धाते। 16 ते सारे वादे परमेशरे अब्राहमे ते तैसेरे खानदाने
 दित्ते; पवित्रशास्त्र इन न जोए, “कि वंशां,” कि बडां केरे बारे मां ज़ोवं, पन
 एककी मैनेरे बारे मां ज़ोवं “कि तेरु वंश इने, ते तै मसीहे।” 17 मेरे ज़ोनेरो
 मतलब ई आए, परमेशरे अब्राहमे सेइं करार केरनेरां बाद 430 सालन पत्ती
 मूसे कानून दित्तो (ताके तैस करारे पक्को केरे), पन अस न ज़ोई बटन
 कि परमेशरेरो करार ट्लुटो, तैए करार पक्कोए, तैए तैस पूरो केरेलो। 18
 किजोकि परमेशरे असन अपनि बरकत एल्हेरेलेइ न दे कि अस मूसेरे कानूनेरे
 मुताबिक चलतम, पन तै एल्हेरेलेइ देते कि तैनी वादो कियोरोए, परमेशरे
 अपने अनुग्रहे सेइं अब्राहमे बरकत दित्ती, किजोकि तैनी पेइलो वादो कियोरो
 थियो। 19 तैखन, फिरी कानूनेरो कुन मकसद थियो? तैन त पापां केरे वजाई
 सेइं बादे मां दित्तू ताके तैसेरे वंश मसीहेरे एजने तगर राए, जैस सेइं वादो
 कियोरो थियो, परमेशरे स्वर्गदूतां केरे ज़िरिये मूसे कानून दित्तो, जै परमेशर ते
 लोकां केरि बिचवाई केरनेबालो थियो। 20 परमेशरे एप्पू अब्राहमे सेइं वादो
 कियो। एल्हेरेलेइ हुनी बिचवाई केरनेबालेरी कोई ज़रूरत नई। 21 कुन कानून
 परमेशरेरो वादां केरे खलाफे? नई, कधी नई! किजोकि अगर एरो कानून दित्तो
 गाथो जै हमेशारी ज़िन्दगी देइ बटेथो, त सच्चे धार्मिकता कानून मन्ने सेइं
 भोथी। 22 पन पवित्रशास्त्रे ज़ोते दुनियारे सब लोक पापेरे अधीन आन, ताके
 तै वादो ज़ेसेरी बुनीयाद यीशु मसीह पुड़ विश्वास केरनोए, तैस पुड़ विश्वास
 केरनेबालां केरे लेइ पूरो भोए। 23 पन इस करां पेइले कि लोक मसीह पुड़
 विश्वास केरन, मसीहेरे एजने करां पेइले अस यहूदी कैदे मां थिये कानून
 इश्शी रखवाली केरतो थियो। ते तैस विश्वासे एजने तगर जै बांदो भोनेबालो

थियो, अस तैसेरे बन्धने मां रहम। 24 एल्हेरेलेइ कानून मसीह तगर पुऱ्जानेरे लेइ असन बत हिरानेबालो ते स्मभालने बालो भोव, कि अस यीशु मसीह पुड विश्वासे केरने सेइं परमेशरेरे सामने धर्मी भोम। 25 पन जैखन मसीह अव ते असेई विश्वास कियूं, त असन ज़रूरत न पेर्द, कि कानून बत हिराए ते मद्दत केरे। 26 किजोकि तुस सब विश्वास केरने सेइं जै मसीह यीशु पुडे, परमेशरेरे बच्चेथ। 27 ते तुसन मरां ज़ेत्रेइं मसीह मां अक भोनेरे लेइ बपतिस्मो नीयो, तुसेई मसीहेरी नव्वी ज़िन्दगी तेन्वरे लाई ज़ेन्वरे लिगडां लातन। 28 हुनी मसीह मां कोई फर्क नई, चाए कोई यहूदीए या गैर यहूदीए, गुलामे या आजाद। कोई फर्क नई मङ्डे या कुआन्शो, अस यीशु मसीह मां सब बराबर आम। 29 किजोकि तुस मसीह सेइं साथी अक आथ, त अब्राहमेरे बच्चेथ, ते परमेशरेरे वाटेरे मुताबिक बरकतां केरे वारस भी आथ।

4 अवं मिसाल देइतां ज़ोताई, कि वारस ज़ांतगर बच्चोए, अगर तै सेब्बी चीज़ां केरो मालिके, फिरी भी तैस त कने गुलामे मां कोई फर्क नई। 2 पन बाजी केरे ठहरावरे वक्ते तगर सुमालने बालां ते भैन्डेरी केरे हेरगेशी मां रहते। 3 तेन्वरे अस भी जैखन बच्चां केरे ज़ेरे थिये, त दुनियारे रीति रुवाज़ां ते कानूनेरे गुलाम थिये। 4 पन जैखन ठीक वक्त अव, त परमेशरे अपनू मढू दुनिया मां भेजू, ज़ैस एककी कुआन्शां ज़र्म दितू, तैन यहूदन मां ज़र्मू ते तैनी कानून मन्नो। 5 ताके तैन छुटाए ज़ैना मूसेरे कानूनेरे अधीन्न थिये, ते असन तैसेरे बच्चे भोनेरो अधिकार मेल्लो। 6 ते तुस ज़ैना बच्चेथ, एल्हेरेलेइ परमेशरेरे मढूरी आत्मा इश्शो दिले मां भेज़ोरीए, जै आत्मा, “हे बैपू हे बाजी,” ज़ोती। 7 एल्हेरेलेइ हुनी तू गुलाम नई, पन परमेशरेरो बच्चोस, ते जैखन परमेशरेरो बच्चोस, त तीं तैन सब मैलेलू ज़ेसेरो वादो परमेशरे अपने बच्चन देनेरो वादो कियोरोए। 8 जैखन तुस परमेशर न थिये ज़ानते, त तुसन तैन केरे गुलाम थिये, जैना हकीकति मां ईश्वर अथ्थी नई। 9 पन हुनी तुश्शो रिश्तो परमेशर सेइं आए, ते तुसेई तै ज़ानो बल्के परमेशरे अस कबूल किये, ते तैन कमज़ोर ते निक्केमी पेइली गल्लां केरे पासे किजो गातथ, कुन तुस तैन केरे दुबारा गुलाम भोने चातथ? 10 मीं शुनेऱुए कि तुस गैर कौमां केरे विश्वासी, यहूदी केरे दिहाड़न ते महीन्न ते खास वक्ते ते सालां केरे तिहारन मन्तथ, इन सोचतां कि परमेशर खुश भोते। 11 अवं तुश्शू एन केरनेरे वजाई सेइं परेशान

आईं, कि एरु न भोए, कि ज़ै मेहनत मीं तुश्शे लेइ कियोरीए तै बेफैइदी भोए।

12 हे ढलाव ते बेइनव, अवं तुसन कां बिनती केरताईं, तुस अपने आपे यहूदी
केरे कानूने करां आज़ाद केरा, किजोकि मीं अपनो आप आज़ाद कियोरोए
ज़ेन्नरे तुस गैर कौमरे लोक पेइले आज़ाद थिये, तुस पेइले मेरे सामने बड़े रोड़े
थी। 13 तुसन याद भोलू, ज़ैखन अवं पेइली बार खुशबूबरी शुनाने तुसन कां
अव त अवं बिमार थियो। 14 ते मेरी जिसमानी हालत ज़ै तुश्शे आज़मैइशरी
वजा थी, तुसेईं अवं घटिया न समझो ते तुसेईं दूर न कढो बल्के एन्नरे कबूल
कियो ज़ेन्नरे परमेश्वरे दूत या यीशु मसीह एप्पू। 15 ते तुश्शी तै खुशी
मनानी कोरां जेर्ई? अवं सच्चे ज़ोई बटाईं, तुस मेरे लेइ सब किछ बलिदान
केरनेरे लेइ तियार थिये, इड़ी तगर कि अपनि एछ़ड़ी भी। 16 ते कुन तुसन
सेइं सच्चे ज़ोनेरे वजाई सेइं अवं तुश्शे बैरी भोरोई। 17 तैना झूठे उस्ताद तुसन
दोस्त बनानो त चातन, पन रोड़ी नीती सेइं नई; बल्के तुसन अलग केरने
चातन, कि तुस तैन केरे चेले बना। 18 जोशे मां भोनू रोड़ूए, कि रोड़ी गल्लन
मां हर वक्त दोस्त बनानेरी कोशिश की गाए, सिर्फ तैस वक्ते नई ज़ैखन अवं
तुसन सेइं साथी राताई। 19 हे मेरे बच्चव, जांतगर तुसन मां मसीहेरू रूप
न बने, तांतगर अवं तुश्शे लेइ ज़र्म देने बैली कुआन्शे ज़ेरे तकलीफी मां
राताई। 20 अवं त चाताई कि हुनी तुसन कां एइतां मिट्ठी ज़बाना गल केरि,
किजोकि मेरी समझी मां न एज्जे कि अवं तुसन सेइं कुन केरि। 21 तुस ज़ैना
मूसेरे कानूनेरे अधीन भोने चातथ, मीं ज़ोतथ, कुन कानूनेरी गल्लां शुन्नेरे
लेइ तियार नई? 22 तैस मां इन लिखोरूए, कि अब्राहमेरां दूर्द मट्टां थियां;
अक गुलाम कुआन्शरू, ते अक ज़ै आज़ाद थी तैसेरू। 23 पन ज़ैन गुलाम
कुआन्शरू भोव, तैन आम बच्चां केरू ज़ेरू ज़र्मू, ते ज़ैन आज़ाद कुआन्शरू
भोव, तैन परमेश्वरे वादेरे मुताबिक ज़र्मू। 24 इना दूर्द कुआन्शां परमेश्वरे दूर्द
करारां केरे रूपे मां कम केरतिन। पेइली कुआन्श हाजिरा सीनै पहाड़े हिराती
ज़ैड़ी लोकन कानून मैल्लो, ज़ैन तैन गुलाम बनातू थियूं। 25 हाजिरा मना
अरबेरू सीनै पहाड़ेरी ज़ेरि आए, ज़ेसेरी तुलना मौजूद यरूशलेम सेइं केरोतीए,
किजोकि तैन अज अपने बच्चन यानी अपने लोकन समेत गुलैमी मांए। 26
पन बेयूं यरूशलेम अब्राहमेरे कुआन्श सारारू ज़ेरूए, ते तैसेरे बच्चे गुलाम
नई। इन यरूशलेम इश्शे लेइ इश्शे अम्मारू ज़ेरू आए जैसां विश्वास कियो।

27 किंजोकि पवित्रशास्त्र ज़ोते, “हे बाँझा, तीं ज़ैसां कधे बच्चे नई ज़ावरे, खुश भो, तीं ज़ैस बच्चो जानेरी तकलीफ नई भोरी; आवाज़ उच्ची केर ते जयजयकार केर, किंजोकि शैरोरारी औलाद सुहागनी करां भी जादे।” 28 हे ढलाव ते बेइनव, तुस अब्राहमेरे मटु इसहाकेरे ज़ेरे आथ, ज़ैन परमेशरेरे वादेरे मुताबिक ज़र्मू, अस भी परमेशरेरे वादेरे मुताबिक तैसेरे बच्चे बने। 29 ते ज़ेन्वरे तैस वक्ते ज़ै बच्चो आम बच्चां केरो ज़ेरो ज़र्मोरो थियो, तैस सतातो थियो ज़ै परमेशरेरे आत्मारे मुताबिक ज़र्मोरो थियो, तेन्वरे अज़ भी अस तैन करां सताव झैल्लतम ज़ैना कानून मेन्तां परमेशरेरे सामने धर्मी भोनू चातन। 30 पन पवित्रशास्त्र कुन ज़ोते? “गुलाम कुआन्शी ते तैसेरे मटु कढ, किंजोकि गुलाम कुआन्शरु मटू आज़ादेरे मटु साथी वारस न भोलू।” 31 एल्हेरेलेइ हे ढलाव ते बेइनव, अस गुलाम कुआन्शरे बच्चे नई, ज़ै कानूने, बल्के आज़ाद कुआन्शरां बच्चेम, ज़ै विश्वासे।

5 मसीहे अस आज़ाद कियोरेम हुनी असन गुलामेरु ज़ेरु यहूदी केरु कानून मन्नेरी ज़रूरत नई, अपने एस ऐज़ैदी मां बनोरे राथ, ते दुबारा अपने आपे कानून मन्नेरे गुलाम भोनेरे लेइ न देथ। 2 हेरा, अवं पौलुस तुसन सेइं ज़ोताई, अगर परमेशरेरे सामने धर्मी भोनेरे लेइ खतनो कराले, फिरी ज़ैन मसीहे कियोरु तैसेरो तुसन कोई फैइदो न भोलो। 3 फिरी भी अवं हर एककी सेइं ज़ोताई ज़ै इस उमीदी सेइं खतनो कराते कि परमेशरेरे सामने धर्मी भोए, तैस कानूनेरो हर हुक्म मन्नो पेनोए। 4 तुस ज़ैना कानून मेन्तां धर्मी भोने चातथ, तुसेई अपनो आप मसीह करां अलग कियो ते परमेशरेरो अनुग्रह कबूल केरने करां इन्कार कियो। 5 अवं इन ज़ोई बटाई, किंजोकि असन पवित्र आत्मार तरफां पूरो भरोसो कि परमेशर असन धर्मी कबूल केरेलो किंजोकि अस मसीह पुड़ विश्वास केरतम। 6 ते मसीह यीशु मां न खतनो, न बगैर खतनो किछ कम्मेरोए, पन सिर्फ विश्वास ज़ै प्यारे सेइं अस्सर केरते। 7 तुस त रोड़ी दैड़ लोरे थिये दैड़ने, तुस केनि रोके, कि सच्चे न मन्नथ। 8 एरी शिखर तुसन परमेशरे नई दित्तोरी ज़ैने तुस अपने बच्चे भोनेरे लेइ कुजोरेथ। 9 झूठी शिक्षा थोड़े ज़ेरे खमीरेरी ज़ेरि ज़ैन सारे सोन्नोरे अट्टे खमीर केरते। 10 अवं प्रभु पुड़ भरोसो रखताई, कि तुसन झूठी शिक्षा पुड़ विश्वास केरने करां दूर रखे; पन ज़ै तुसन परेशान केरते, तै कोई कि न भोए परमेशर तैस सज़ा

देलो। 11 पन हे ढलाव ते बेइनव, अगर अंवं लोकन प्रचार केरतो भोथो कि खतनो केरनो ज़रूरीए, त स्ताव न गाथो। अगर अंवं ई प्रचार न केरतो राथो कि मुक्ति सिर्फ मसीहेरे क्रूसे सेइं, त फिरी केन्ची ठोकर न लगेथी। 12 रोडू भोथू कि जैना तुसन टपलातन, तैना अपनो अंग कटेथे! 13 हे ढलाव ते बेइनव, तुस आज्ञाद भोनेरे लेइ कुजोरेथ पन एरु न भोए, कि ई आज्ञादी जिसमानी कम्मां केरे लेइ मौको बने, बल्के प्यारे सेइं एककी होरेरे सेवक बना। 14 किजोकि सारो कानून इस्से एककी गल्ली मां पूरो भोइ गाते, “कि तू अपने पड़ोसी सेइं अपनो ज़ेरो प्यार केर।” 15 पन अगर तुस एककी होरि सेइं लट्टे ते तंग केरते राथ, त खबरदार राथ, एककी होरेरी बरबादी केरले। 16 पन अंवं ज़ोताईं, पवित्र आत्मारे चलाने सेइं चलले, त तुस जिसमेरी खुवैइशां कधी पूरी न केरले। 17 किजोकि जिसम पवित्र आत्मारे खलाफे, ते पवित्र आत्मा जिसमेरे खलाफ खुवैइश केरते, ते इना एककी होरेरे दुश्मन आन; एल्हेरेलेइ जैन तुस केरनू चातथ तैन न केरि बट्थ। 18 ते अगर तुस पवित्र आत्मारे चलाने सेइं चलतथ त कानूनेरे अधीन न राए। 19 जिसमेरां कम्मां बांदन, मतलब बदमाशी, गंदा कम्मां, चपलूसी। 20 मूरती केरि पूजा, टूनो, बैर, लड़ाई, जलन, सरक, खलाफत, फसाद, विधर्म। 21 नफरत, नशो केरनो, नाच, ते इन केरे ज़ेरां होरां भी कम्मां आन, जैन केरे बारे मां अंवं तुसन पेइलू ज़ोताईं, ज़ेन्चरे पेइलू भी ज़ोवर्सए, कि एरां कम्मां केरनेबाले परमेशरेरे राज्जेरे वारस नई भोने। 22 पन पवित्र आत्मारो फल प्यार, आनन्द, शान्ति, सबर, ते दया, भलाई, विश्वास, 23 नम्रता, ते बरदाश केरनूः एरां कम्मां केरे खलाफ कोई कानून नई। 24 ते जैना मसीह यीशु मां आन, तैनेई जिसम तैसेरे खुवैइशन सेइं साथी क्रूसे पुढ़ चाढ़ेरोए। 25 अगर पवित्र आत्मां असन नव्वी जिन्दगी दित्तोरीए, त पवित्र आत्मारे मुताबिक चलम भी। 26 अस घमण्ड न केरम, अस एककी होरि न सरकाम, ते एककी होरि सेइं न जलन केरम।

6 हे ढलाव ते बेइनव, अगर तुसन पतो चले कि केन्चे कोई पाप कियोरोए, त तुस जैना पवित्र आत्मारे चलाने सेइं चलतथ, तैस बडे नेरमी सेइं वापस धार्मिकतारे बत्तां वापस एजनेरी लेइ मद्दत केरा, ते अपनो भी खियाल रखा, कि तुस भी तैसे अज़मैइशी मां न पेथ। 2 तुस एककी होरेरी मुशकलन मां

मद्दत केरा, ते एन्चरे मसीहेरो कानून पूरो केरा। ३ अगर कोई अपने आपे
 खास मैन्हु समझे ते तै सङ्गे न भोए, त तै अपने आपे धोखो देते। ४ पन हर
 कोई अपने कम्मे परखे, ते तैखन तैस होरि केरे बारे मां नई पन अपने बारे मां
 घमण्ड केरनेरो मौको भोलो। ५ किजोकि हर कोई मैन्हु अपनो भार छूलो। ६
 जैन वचनेरी शिक्षा मैलतीए, तैना सब रोड़ी चीज़न मां शिखालनेबाले शामिल
 रखन। ७ धोखो न खाथ, परमेशर ठाठन मां न उड़ाव गाए, किजोकि मैन्हु जैन
 किछ बेते, तैन्ने कटेलो। ८ किजोकि जै अपने जिसमेरे लेइ बेते, तै जिसमे
 सेइं विनाशेरी फसल कटेलो; ते जै आत्मारे लेइ बेते, तै आत्मा सेइं हमेशारी
 जिन्दगरी फसल कटेलो। (aiōnios g166) ९ अस रोड़ां कम्मां केरने मां हिम्मत
 न हारम, किजोकि अगर अस हार न मनमेले त परमेशर अपने वक्ते पुड़
 असन इनाम देलो। १० एल्हेरेलेइ जैडी तगर मौको मल्ले सेब्भन सेइं भलाई
 केरा; खास केरतां मसीही लोकन सेइं। ११ हेरा, मीं केत्रे बडे-बडे लफसन मां
 तुसन अपने हथ्ये सेइं लिखोरुए। १२ ज़ेत्रे लोक यहूदन खुश केरने चातन
 तैना तुसन खतनो कराने लेइ ज़ोतन। तैना एन केरतन कि लोक प्रचार केरनेरे
 लेइ तैन न स्तान कि परमेशर लोकन सिर्फ एल्हेरेलेइ बचाते कि तैना विश्वास
 केरतन कि मसीह कूसे पुड़ मरोए। १३ किजोकि खतनो करानेबाले एप्पू भी
 सेब्भी कानूने पुड़ न चलन, पन तैना चातन तुस खतनो कराथ, ताके तैना
 होरि यहूदी केरे सामने घमण्ड केरनेरे काबल भोन, कि तुसेई तैन केरे वजाई
 सेइं खतनो कियोरोए। १४ पन मेरे लेइ इने, अगर अवं घमण्ड केरि त सिफ
 इश्शे प्रभु यीशु मसीह पुड़ जै इश्शे लेइ कूसे पुड़ मरो। किजोकि तैसेरे मरने
 सेइं अवं हुनी दुनियारे चीजां केरे इच्छां केरो गुलाम न राव, ते तैन मीं पुड़
 राज केरनेरी कोई शक्ति नई। १५ किजोकि न खतनो, ते न खतनो न भोनो
 ज़रूरीए, पन ज़रूरी इने, कि परमेशरे तुस पवित्र आत्मारे कम्मेरे ज़िरिये अक
 नव्वों इन्सान बनोरेथ। १६ परमेशर तैन सेब्भन अपनि शान्ति देलो ते तैन
 बरकत देलो जैना इस नियमें मन्तन, तैना परमेशरेरे लोक आन। १७ अग्रोवं
 जो कोई मीं दुख न दे, किजोकि मेरे जानी पुड़ जैना दाग आन तैना हिरातन
 कि अवं यीशु मसीहेरो दास आई। १८ हे ढलाव ते बेइनव, इश्शे प्रभु यीशु
 मसीहेरो अनुग्रह तुसन पुड़ भोए। आमीन।

इफिसियों

1 अवं पौलुस परमेश्वरे मेज्जी सेइं यीशु मसीहेरो प्रेरित आई। अवं तुसन जैना परमेश्वरे लोक आथ ते इफिसुस नगरे मां रातथ ई चिट्ठी लिखने लोरोई।
2 इश्शो बाजी परमेश्वर ते प्रभु यीशु मसीह करां तुसन अनुग्रह ते शान्ति मैलती राए। 3 इश्शो प्रभु यीशु मसीहेरे परमेश्वर ते कने बाजी केरि बड़याई भोए,
इश्शो रिश्तो मसीह सेइं भोनेरे वजाई सेइं तैने असन हर लिहाजे सेइं तैना आत्मिक बरकतां दित्तोरिन, जैना बरकतां स्वर्गेंरां एइतिन। 4 ज़ेन्वरे तैने अस दुनिया बनानेरे पेइली मसीह मां चुने, कि अस तैसेरी नज़री मां प्यारे मां पवित्र ते बेइलज्ञाम भोम। 5 किजोकि परमेश्वरे असन सेइं प्यार कियो,
तैनी बड़े पेइले ई फैसलो कियोरो थियो कि तै असन यीशु मसीहेरे ज़िरिये अपने बच्चा केरे रूपे मां गोद ने, किजोकि तै इन केरनू चातो थियो। 6 अस परमेश्वरे अनुग्रहेरे लेइ तैसेरी बड़याई केरतम, जै तैने असन मुफते मां दित्तो,
किजोकि इश्शो रिश्तो तैसेरे ट्लारे मट्टे सेइं आए। 7 परमेश्वरे बड़े अनुग्रहेरे मुताबिक मसीहेरे खूने बगाने सेइं असन छुटकारो मैल्लो, मतलब इश्शो पाप माफ़ भोए। 8 जै तैनी सारे ज्ञान ते समझ सेइं साथी असन पुड़ बड़ो जादे कियो। 9 कि तैने अपनि मेरज़रो भेद, अपने रोड़े इरादेरे मुताबिक असन पुड़ बांदो कियो, जै तैने पूरो केरनो थापोरो थियो। 10 परमेश्वरे ठहरावरे वक्ते पुड़ तै स्वर्ग ते धेरतरी चीज़न साथी आनेलो ते मसीह तैस पुड़ राज़ करालो। 11 मसीह सेइं इश्शो रिश्तो भोनेरे वजाई सेइं परमेश्वरे अस चुने, तैन हासिल केरनेरे लेइ ज़ेसेरो वादे तैने असन देनेरे लेइ कियोरो थियो। इन बिलकुल तेन्हरे भोव ज़ेन्वरे तैनी बड़े पेइलू पूरू केरनू थापेरु थियूं ते इच्छा कियोरी थी।
12 अस यहूदी पेइले लोक आम जैनेई मसीह पुड़ उमीद रखोरि थी, ते अस चुने जे, ताके परमेश्वरे महिमारी स्तुति केरि बटम। 13 ते तुस भी मसीह सेइं शामिल भोए ज़ैखन तुसेई सच्चू वचन शुनू, जै खुशखेबरां तुश्शे लेइ मुक्ति आनी, ज़ैखन तुसेई विश्वास कियो परमेश्वरे तुसन पुड़ अपनि छाप लाई, ई छाप पवित्र आत्मा आए, जै तैनी असन दित्तो, ज़ेसेरो वादो तैनी कियोरो थियो। 14 पवित्र आत्मा भी छुटकारेरे सैयरो ज़ेरो आए, जै पक्कू केरते कि परमेश्वरे असन तै विरासत देलो ज़ेसेरो तैनी वादो कियोरोए, ते तैनी अस अपने लोकां केरे रूपे मां घिनोरेम, ताके तैसेरे महिमारी बड़याई भोए। 15

एलहेरेलेइ, ज़ोइसेरु मीं शुनेरुए कि तुस प्रभु यीशु पुड़ विश्वास केरतथ ते परमेशरेरे सेब्ही लोकन सेइं प्यार केरतथ, 16 तुशो लेइ परमेशरेरु शुक्र केरनू न शैरी, ते अपने प्रार्थनान मां तुसन याद केरताई। 17 अवं प्रार्थना केरताई कि परमेशर, इशो प्रभु यीशु मसीहेरे महिमा बाले बाजी, तुसन पवित्र आत्मा दे, तै तुसन अक्लमन्द बनालो ते परमेशरे तुसन पुड़ बांदो केरेलो, ताके तुस तैस पिशैनी बटथ। 18 अवं ई भी प्रार्थना केरताई कि तै तुशो मने खोलेलो, कि तुस बुझथ कि इशो कुजानेरी कुन उमीद आए, ते केत्री महान ते महिमा बैली बरकतां केरे लेइ परमेशरे अपने लोकन जो वादो कियोरोए। 19 ते तैसेरी शक्ति इशो लेइ जैना अस विश्वास केरतम, केत्री महाने, तैसेरी शेक्तरे कम्मेरे मुताबिक, 20 जैन तैनी मसीहेरे बारे मां कियूं कि तैस मुड़दन मरां ज़ींते केरतां स्वर्गे मां अपने देइने पासे बिशालो। 21 तैड़ी तै हर किसमेरी हकौमत, ते अधिकार, ते शक्ति, ते प्रभुता, ते तैसेरी पदवी हर एकके अधिकैरी करां तै महान आए, जैना न सिर्फ इस जहानी मां, पन एजनेबाले जहानी मां भी आए। (aiōn g165) 22 ते परमेशरे सब किछ मसीहेरे अधिकारे मां कियूं तैनी सेब्ही चीज़न पुड़ अधिकारी बनेइतां कलीसिया दित्तो। 23 कलीसिया मसीहेरी जान आए, ते तैसेरी भरपूरी जै सेब्हन मां सब किछ पूरू केरतीए।

2 बीतोरे वक्ते मां परमेशरेरे तरफां तुसन कां नव्हीं ज़िन्दगी न थी; तुस अपने पाप ते बुरे कम्मां केरे वजाई मरोरे लोकां केरे ज़ेरे थिये। 2 तैस वक्ते तुस दुनियारे रीति पुड़ चलते थिये, ते तुस अम्बरेरे दुष्ट आत्मा केरे अधिकैरी मुताबिक चलते थी, ज़ेसेरी आत्मा हेजू भी परमेशरेरे हुक्म न मन्नेबाले लोकां केरे मन्न मां कम केरती। (aiōn g165) 3 एन मां अस भी सब पेइले अपने जिसमेरे खुवैइशन मां दिहाड़े कटते थी, ते जिसम, ते मनेरी मर्जी पूरी केरते थी, ते होरि लोकां केरे ज़ेरे स्भावे सेइं बुरे थिये ते परमेशरेरे सज्जारे अधीन थिये। 4 पन परमेशर जै बड़ो दया केरनेबालोए; अपने तैस बड़े प्यारे सेइं, जैस सेइं तैने असन सेइं प्यार कियो। 5 जैखन अस पापां केरे वजाई सेइं मरे लोकां केरे ज़ेरे थिये, तैनी असन ज़िन्दगी दित्ती जैखन तैनी मसीह मुड़दन मरां ज़ींतो कियो, परमेशरेरे अनुग्रहे सेइं तुसन मुक्ति मैलोरीए। 6 किजोकि तैनी अस मसीह सेइं साथी मुड़दन मरां ज़ींते किये, ते स्वर्गे ठैरन मां तैस सेइं साथी बिशाले। 7 परमेशरे एन कियूं कि एजनेबाले वक्ते मां दुनियारे लोकन

हिराए कि तैसेरो अनुग्रह केत्रो महान आए। ई अनुग्रह इश्शो लेइ हिराव,
तैने इश्शो लेइ एन कियूं ज़ैना अस यीशु मसीह मां आम। (aiōn g165) 8

किजोकि विश्वासेरे ज़िरिये परमेशरेरे अनुग्रहे सेइं तुसन मुक्ति मैलोरीए, ते
तुसेई अपनो आपे एप्पू नई बद्वावरो बल्के परमेशरेरे दाने सेइं तुस बज्जोरेथ। 9
ते भले कम्मन सेइं नई, एरु न भोए कि कोई घमण्ड केरे। 10 किजोकि अस
परमेशरेरे बनोरेम; ते मसीह यीशु मां तैन भले कम्मां केरे लेइ पैदा कियोरेम,
ज़ैना परमेशरे पेइले इश्शो केरनेरे लेइ तियार करां। 11 एल्हेरेलेइ याद केरा,
कि तुस ज़ैना ज़रमनेरे गैर कौमरेथ, ते खतनो कियो लोक तुसन जो बगैर
खतने बाले ज़ोतन। 12 तुस लोक तैस वक्ते मसीह न थिये ज्ञानते, ते तुस
परमेशरेरे चुनोरे इस्माएली लोक न थिये, ते तुस तैन रोड़ी चीज़न मां हिस्सेदार
न थिये ज़ैन केरो वादो परमेशरे यहूदी लोकन सेइं कियोरो थियो, ते न उमीद
ते दुनियाई मां परमेशरे करां दूर थिये। 13 पन अक वक्त थियो कि तुस
परमेशरे करां दूर थिये, पन हुनी यीशु मसीह मां तैसेरे खून सेइं नेड़े आनोरेथ।
14 किजोकि मसीहे इश्शो मेले कराव, तैन्ने यहूदी ते गैर यहूदी दुइये अक केरे,
ते अलग केरनेबाली दिवार ज़ै मङ्गाटे थी, डोली। 15 मसीहेरे क्रूसेरे मौतरी
वजाई सेइं, तैनी कानूनेरे सारे नियम पूरे तरीके सेइं खतम किये। मसीहेरो
एरो केरनेरो मकसद ई थियो कि दूर्ध टोली केरि अक नव्वी टोली बनाए, ज़ै
तैस सेइं जुड़ोरी भोए। 16 मसीहेरे क्रूसेरी मौतरे ज़िरिये, तैनी दूर्ध टोली अक
की, ते परमेशरे सेइं तैन केरो मेल कराव, एन्चरे यहूदी ते गैर यहूदी केरि
दुश्मनी खतम की। 17 ते मसीहे इइतां तुस गैर कौमरे लोक ज़ैना परमेशरे
करां दूर थिये, ते यहूदी ज़ैना तैसेरे नेड़े थिये, दुइयन मेल मिलापेरी खुशखबरी
शुनाई। 18 किजोकि मसीहेरे बदौलम अस सारे एककी पवित्र आत्मारे ज़िरिये
बाजी परमेशरे कां एज्जी बटतम। 19 एल्हेरेलेइ तुस गैर कौमां केरे लोक
परदेशी ते मुसाफर न राए, पन परमेशरेरे लोकां केरु झुण्ड, ते परमेशरेरे
घरानेरे भोए। 20 तुस इमारतरे ज़ेरेथ ज़ेसेरी बुनीयाद प्रेरित ते नेबी आन ते
यीशु मसीह एप्पू तैसेरे कूनेरो घोड़े। 21 ज़ैस मां सारी इमारत साथी मिलतां
प्रभु मां अक मन्दर बनती गातीए। 22 तुस गैर कौमरे विश्वासी लोक भी
परमेशरेरे होरि लोकन सेइं साथी शामिल किये जे, किजोकि तुस मसीह सेइं
साथी अक भोरेथ। ताके तुस अक घर बनथ जैड़ी परमेशरेरो आत्मा रहते।

3 किजोकि परमेश्वरे तुश्शे गैर कौमां केरे लेइ हन कियोरु, अवं पौलुस तुश्शे
 लेइ प्रार्थना केरताई, अवं कैदे मां आई, किजोकि अवं तुश्शे लेइ यीशु मसीहेरी
 सेवा केरताई। 2 पक्कू तुसेई शुनेरुप, परमेश्वरे अपने अनुग्रहेरे ज़िरिये तुसन
 खुशखबरी शुन्नेरी लेइ मीं ज़िमेवारी दित्तोरीए। 3 परमेश्वरेरो छ़प्पोरो मकसद
 बडो पेइलो छ़पोतो थियो, हालांकी तैनी मीं पुड बांदो कियो, किछ गल्लां आन
 ज़ैना अवं तुसन चिठ्ठेरे ज़िरिये समझानो चाताई। 4 जैस सेइं तुस पेढतां बुझी
 बटतथ, कि अवं मसीहेरो तै भेद कोडि तगर समझताई। 5 बीतोरे वर्ते मां
 परमेश्वरे ई भेद लोकन पुड बांदो नई कियोरो, पन हुनी पवित्र आत्मारे ज़िरिये
 अपने पवित्र प्रेरितन ते नेबन पुड बांदो कियो। 6 परमेश्वरेरो मकसद ई आए,
 खुशखेबरारे ज़िरिये यीशु मसीहे सेइं तैन केरो रिश्तो भोनेरे वजाई सेइं गैर
 कौमां केरे लोक तैस्से विरासती मां हिसेदार भोले, ते तैना तैस्से जानेरे अंग
 आन, ज़ेसेरो वादो परमेश्वरे यहूदन सेइं कियोरो। 7 परमेश्वरे अनुग्रह ते बेडि
 शेक्कि सेइं मीं तै खुशखेबरारी प्रचार केरनेरो लेइ सेवा केरनेरो खास अधिकार
 दित्तोरोए। 8 चाए अवं परमेश्वरेरे सेब्बी लोकन मरां निकडे करां निकोड़ोई।
 परमेश्वरे मीं पुड अनुग्रह कियो, कि अवं गैर कौमन खुशखबरी शुनेई बेटि कि
 मसीह हमेशारी बरकतां केरो देनेबालोए। 9 अवं इस भेदेरे मकसदेरे बारे
 ज़ोनेरे लेई चुनोरोई, ज़ै परमेश्वर हर चीज़ बनानेबालोए तैनी शुरु करां छ़प्पोरो
 रखोरो थियो। (aiōn g165) 10 ताके हुनी कलीसियारे ज़िरिये सेइं, परमेश्वरेरु
 बडु ज्ञान, अम्बरेरे तैन प्रधान्न ते अधिकैरन पुड बांदू कियूं गाए। 11 परमेश्वरे
 दुनिया बनानेरे पेइलो इन्ने थापेरु थियूं, ज़ैन तैने इश्शो प्रभु यीशु मसीह मां पूरु
 कियूं। (aiōn g165) 12 किजोकि मसीह पुड इश्शो विश्वासे, तैसेरे वजाई सेइं
 अस परमेश्वरेरी मौजूदगी मां हिम्मत ते भरोसे सेइं साथी एज्जी बटतम। 13
 एल्हेरेलेइ अवं बिनती केरताई कि ज़ैना दुःख तुश्शे लेइ मीं पुड लोरेन एजने,
 तैन केरे वजाई सेइं दिलेरी न शैरी, किजोकि इन सब तुश्शे फैइदेरे लेइ आए।
 14 एल्हेरेलेइ अवं तैस बाजी परमेश्वरेरे कां ज़ैधू केरे भारे प्रार्थना केरताई, 15
 तैए आए ज़ै स्वर्ग ते धेरती पुड रानेबाले विश्वासी लोकां केरो बाजी। 16 कि तै
 अपने महिमारे धनेरे मुताबिक तुसन इन दान दे, कि तुस तैसेरी आत्माई सेइं
 अपनो एनत्रीयों मैन्हु मां शक्ति हासिल केरतां मज़बूत भोते गाथ। 17 ते
 विश्वासे सेइं मसीह तुश्शे दिले मां राए, कि तुस प्यारे मां जील छेडतां ते

मुनीयाद छेडतां, 18 सब पवित्र लोकन सेइं रोडेच्चारे समझानेरी शक्ति हासिल केरा; कि तैसेरी चौडाई, ते लम्बाई, ते ऊँचाई, ते दुघार केत्रोए। 19 ते अवं प्रार्थना केरताई कि तुस मसीहेरे तैस प्यारे सेमझी बटतथ जै समझी करां बेइरे, कि तुस परमेश्वरेरी भरपूरी सेइं भेरोते गाथ। 20 हुनी जै एरो शक्ति बालोए, जै इश्शी बिनती ते समझी करां बढू जादे कम केरि बटते, ते तैस शेक्तेरे मुताबिक असन मां कम केरते, 21 कलीसिया मां, ते मसीह यीशु मां, तैसेरी महिमा पीडी करां पीडी तगर हमेशा भोती राए। आमीन। (aiōn g165)

4 अवं जै प्रभुएरी सेवा केरनेरे वजाई सेइं कैदे मां आई, तुसन कां बिनती केरताई, कि ज्ञेन्नरे परमेश्वरे तुस अपने लोक भोनेरे लेइ कुजेवरेथ, तैसेरे मुताबिक ज़िन्दगी भी ज़ीथ। 2 मतलब सैरी दीनतां ते नम्रता सेइं साथी, ते सबर केरतां प्यारे सेइं एककी होरेरी झाल्लां। 3 इस कम्मे मां अपनि पूरी कोशिश केरा ताके तुस मेल मिलापे सेइं राथ, किजोकि पवित्र आत्मारे ज़िरिये तुस अक कियोरेथ। 4 अस सारे विश्वासी एककी जानरे अंगां केरे ज़ेरे आम, ते असन सेब्बन अकके पवित्र आत्माए मैलोरोए; ते तुसन अकके उमीद दित्ती, जैखन तुस परमेश्वरे लोक भोनेरे लेइ चुने जे। 5 अकके प्रभुए जै यीशु मसीहे, जैस पुड़ अस सब विश्वास केरतम, ते असेई सेब्बन अकके बपतिस्मो मैल्लो। 6 ते अकके परमेश्वरे, जै सेब्बी केरो बाजीए, तैए सेब्बन पुड़ राज़ केरते ते इश्शे दरमियान कम केरते, ते असन सेब्बन मांए रहते। 7 पन मसीहे असन मरां हर एककी तैसेरु कम केरनेरे लेइ अलग-अलग किसमेरी काबलीत दित्तोरीए। 8 एल्हेरेलेइ पवित्रशास्त्र ज़ोते, “जैखन तै उच्चे पुड़ चाढ़ो, ते तैने बड़े कैदी एप्पू सेइं साथी ने, ते तैने लोकन बेड़ि बरकतां दित्ती।” 9 (तैसेरे उच्चे चाढ़नेरो साफ मतलबे ई आए, कि मसीह धेरतरे बुनीयें ठारन मां ओरो थियो। 10 एल्हेरेलेइ मसीह बुन ओरो थियो, तैए आए जै सैरी अम्बरे करां भी उबरो जेव, मसीहे एन एल्हेरेलेइ कियूं ताके सब किछ तैसेरे हजूरी सेइं भरपूर भोए) 11 ते तै मसीहे जैने (कलीसियाई) ज़िमेबारी दित्ती, तैने किछ प्रेरित किछ नबी, किछ खुशखबरी शुनाने बाले, किछ रखवाले ते किछ उस्ताद चुने। 12 मसीहे अपने लोकन इना ज़िमेदारी एल्हेरेलेइ दित्तोरिन, कि कलीसिया जै मसीहेरी जाने तरक्की केरे। 13 जैखन कि अस सब विश्वास, ते परमेश्वरेरे मट्टोरी पिशानी मां अक भोम, ते ज़ांतगर अक सिद्ध मैन्हु न भोम ते

मसीहेरे कदेरे अनदाजे तगर न पुजाम। 14 ताके अस अग्रोवं जो बच्चां केरे ज़ेरे न रहम, जैना मैन्हु केरि ठगनेरी गल्लां ते च्छलैकी सेइं तैन केरे कोशिशी सेइं खियालां केरि ते शिक्षारी हर एककी बयाने सेइं उछङ्गाए, ते इरां उरां घुमाए गाते भोन। 15 बल्के प्यारे सेइं सच ज़ोइतां, सेब्बी गल्लन मां मसीहेरे ज़ेरे सिद्ध भोथ ज़ै कलीसियारी क्रोडी। 16 जैस सेइं सारी जान सेब्बी जोड़ां केरि मद्दी सेइं साथी मिलतां, ते साथी जुड़तां तैस अस्सरेरे मुताबिक ज़ै सेब्बी हिसन सेइं भोइतां, अपने आपे बद्धाते, कि तै प्यारे मां तरक्की केरतो राए। 17 एल्हेरेलेइ अवं इन ज़ोताई, ते प्रभु मां खबरदार केरताई कि ज़ेन्नरे गैर विश्वासी लोकां केरे लोक अपने मनेरे बेकार खियालन पुड़ च्छलतन, तुस अज़ेरे बाद तैन केरे ज़ेरे न च्छला। 18 किजोकि तैना बेसमझ भोरेन, ते तै अज्ञानतारी वजाई सेइं ते सख्त मनेरे वजाई सेइं तैना तैस ज़िन्दगी करां दूर आन ज़ै परमेशर देते। 19 ते तैना बेशर्म भोइतां, एश मां लेगि जे, कि सेब्बी किसमेरां गन्दां कम्मां शोके सेइं केरन। 20 पन तुसन मसीहेरी एरी शिक्षा नई मैल्लोरी। 21 बल्के मीं पूरु याकीने कि ज़ैखन तुसेई यीशुएरे बारे मां अपने उस्तादन करां शुनू, त तुसेई तैन करां सच्ची शिक्षा शिख्खी। 22 कि तुस पेइले चाल चलनेरे पुरानी इन्सानयती ज़ै टपलाने बैली इच्छां केरे मुताबिक भ्रष्ट भोइ गातीए, खोल्ला। 23 इसेरे बदले पवित्र आत्मा तुश्शे खियालन ते नज़िरियो बदले। 24 परमेशरे तुसन नब्बों स्वभाव दित्तोरोए, ज़ै तैसेरे स्वभावेरे ज़ेरो आए। त तुस नब्बे स्वभावेरे ज़ेरे ज़ीथ। सच्चे तुस धर्मी ते पवित्र भोथ। 25 एल्हेरेलेइ झूठ ज़ोंनू शैरतां हर कोई अपने पड़ोसी सेइं सच ज़ोए, किजोकि अस एप्पू मामेइं एककी जानेरे अंग आम। 26 अगर तुस क्रोधे मां भोथ खबरदार राथ, कि पाप न केरथ, दिहाड़ो डुबने तगर तुश्शो क्रोध मुक्की गाए। 27 ते शैताने मौको न देथ कि तै तुश्शी अज़मैश केर। 28 चोरी केरनेबालो फिरी चोरी न केरे; बल्के इमानदेरी सेइं अपने हथ्थन सेइं मेहनत केरे; एल्हेरेलेइ जैस ज़रूरत भोए तैस देनेरे लेइ तैस कां किछ भोए। 29 कोई गन्दी गल तुश्शे ज़बाना न निस्से, पन ज़रूरतरे मुताबिक तैन्ने ज़ोथ, जैन होरि केरे लेइ विश्वासे मां मज़बूती सेइं बद्धनेरी वजा भोए। तैखन जैन तुसेई ज़ोवं तैन लोकां केरे लेइ रोड़ भोलू जैना तुश्शी शुन्तन। 30 ते जैन किछ तुस केरथ तैसेरे वजाई सेइं परमेशरेरे पवित्र आत्मा दुखी न केरा, जैस सेइं तुसन पुड़

छुटकारेरे दिहाड़ेरे लेइ छाप दित्तोरीए। 31 सेब्भी किसमेरी टलइठार ते प्रकोप,
ते क्रोध, सखत गल, ते तुहीन ते सारो बैर-भाव सेइं तुस दूर कियोरेथ। 32 ते
एक्की होरि पुड़ दया केरा, ते माफ़ केरनेबाले भोथ, ते ज़ेन्चरे परमेशरे मसीह
मां तुशें पाप माफ़ किये, तेन्चरे तुस भी एक्की होरेरे पाप माफ़ केरा।

5 एल्हेरेलेइ तुस परमेशरेरे बच्येथ ज़ैन सेइं तै प्यार केरते, तैसेरे ज़ेरे बन्नेरी
कोशिश केरा। 2 होरि केरे लेइ प्यारे सेइं भेरतां ज़िन्दगी ज़ीथ, ज़ेन्चरे मसीहे
भी तुसन सेइं प्यार कियो; ते इशें लेइ अपनो आप रोड़ी मुशकरे लेइ परमेशरे
कां चेढ़तां बलिदान केरो। 3 ते ज़ेरु परमेशरेरे लोकां केरे लेइ ज़रुरीए, तेन्चरे
तुसन मां भी बदमाशी, ते कोन्ची किसमेरु बुरु कम न भोए, या लालज़ेरे
बारे मां गल भी न भोए। 4 ते न बे शरमी, न बेंसरी गल्लां, न मेवजेरी
गल्लां, किजोकि इना गल्लां शोभन्न न, बल्के तुसेई परमेशरेरु शुक्र कियोरु
लोडे। 5 किजोकि तुस इन ज़ानतथ, कि कोन्ची बदमाश, या भिट्ठो मैन्हु, या
लालच़ी मैनेरो ज़ै मूरती पूजा केरनेबालोए, मसीह ते परमेशरेरे राज्जे मां
तैसेरो कोई हिस्सो नई। 6 कोई तुसन ई सल्लाह देइतां धोखो न दे, कि
परमेशरे हकीकति मां तैन सज्जा न देलो ज़ैना एरे पाप केरतन। 7 एल्हेरेलेइ
तैन केरु साथ न रखा। 8 किजोकि तुस त पेइले आंधरु थी, पन हुनी प्रभु
यीशु मां लोआथ, ते लोअरे बच्यां केरे ज़ेरे चला। 9 (किजोकि लोअरो फल
सेब्भी किसमेरी भलाई, ते धार्मिकता, ते सङ्घे)। 10 ते इन तोप्पां कि प्रभु
कुन रोड़ लगते। 11 ते आंधरेरां ते बेकार कम्मन मां शामिल न भोथ, बल्के
लोकन इन हिराथ कि इना कम्मां बुरन। 12 किजोकि गैर विश्वासी लोकां केरां
छ़ोरां कम्मां केरि गल केरनि भी शर्मारी गल आए। 13 ज़ैखन लौ कोन्ची
चीज़ी पुड़ चमकती त हर कोई लेई बटते कि इन केरु, किजोकि ज़ैखन
लौ किछ हिराती, त तै चीज़ एप्पू लौ भोइ गातीए। 14 एल्हेरेलेइ एन्चरे
ज़ोवं गाते, “हे झुलने बाला उठ ते मुड़दन मरां ज़ींतो भो, ते मसीहेरी लौ तीं
पुड़ चमकेली।” 15 एल्हेरेलेइ रोड़ चारे हेरा, कि केरि ज़िन्दगी ज़ींने लोरेथ।
बेअक्लां केरि ज़ेरि नई पन अक्लमन्दा केरि ज़ेरि ज़िन्दगी ज़ीथ। 16 ते मौको
कीमती समझा, किजोकि दिहाड़े बुरेन। 17 एल्हेरेलेइ बेअक्ल न बना, पन
ध्याने सेइं समझा, कि प्रभुएरी तुशें लेइ कुन मर्जी? 18 ते शराब पीने मां
मतवाले न भोथ, किजोकि एस सेइं बदचलनी भोतीए, पन पवित्र आत्मा सेइं

भेरोते राथ। 19 ते एप्पू मांमेइं परमेशरें भजन ते स्तुति केरते ते आत्मिक गीत ज़ोथ, ते अपने-अपने मने मां प्रभुएरे लेइ गीत ज़ोथ ते किरतन केरते राथ। 20 ते सदा सेढभी गल्लां केरे लेइ प्रभु यीशु मसीहेरे नंव्ये सेइं बाजी परमेशरेउ शुक केरते राथ। 21 ते मसीहेरे डरे सेइं एककी होरेरे अधीन राथ। 22 हे कुआन्शव, अपने-अपने मुन्शां केरे अधीन राथ, ज़ेन्चरे प्रभुएरे। 23 किजोकि मुन्श त कुआन्शरी क्रोडी ज़ेन्चरे मसीह कलीसियारी क्रोडी, ते मसीह कलीसियारो मुक्ति देनेबालोए ज़ै तैसेरी जाने। 24 ज़ेन्चरे कलीसिया मसीहेरे अधीने, तेन्हरे कुआन्शां भी हर गल्ली मां अपने-अपने मुन्शेरे अधीन रान। 25 हे मुन्शव, अपने-अपने कुआन्शन सेइं प्यार केरा, ज़ेन्चरे मसीहे भी कलीसिया सेइं प्यार केरतां अपनो आप तैसेरेलेइ दित्तो। 26 ताके तैस वचनेरे ज़िरिये पैनेरे निहाने सेइं शुद्ध केरतां पवित्र बनाए। 27 ते तैस अक एरी महिमा बाली कलीसिया बनेइतां एप्पू कां खडी केरे, ज़ैस मां न कोई दाग, न धबो, न कोई एरी चीज़ भोए, बल्के पवित्र ते बेइलज़ाम भोए। 28 एन्चरे मुन्श अपने कुआन्शी सेइं अपने जानी बराबर प्यार केरे। ज़ै अपने कुआन्शी सेइं प्यार केरते, तै एप्पू सेइं प्यार केरते। 29 किजोकि कोन्चे कधी अपने जानी सेइं बैर नई रखोरो, बल्के तैसेरी हेरगेश कियोरीए, ज़ेन्चरे मसीहे भी कलीसियाई सेइं केरते। 30 एल्हेरेलेइ अस मसीहेरे जानरे अंगां केरे ज़ेरे आम। 31 ज़ेन्चरे पवित्रशास्त्र ज़ोते “एल्हेरेलेइ मङ्ग अम्मा बाजी शैरतां अपने कुआन्शी सेइं मिलोरो रालो।” 32 ई भेद त बडोए; पन अवं मसीह ते कलीसियारे बारे मां ज़ोताई। 33 पन तुसन मरां हर कोई अपने कुआन्शी सेइं एप्पू बराबर प्यार केरे, ते कुआन्श भी अपने मुन्शेरो इज्जत केरे।

6 पवित्रशास्त्र ज़ोते, “अपने अम्मा ते बाजी केरि आदर केरा, तैखन तुश्शू भलू भोलू ते दुनियाई मां तुश्शी लम्मी उमर भोली।” ई पेइलो हुक्मे ज़ैस सेइं परमेशरे वादो कियोरोए, त बच्चव इन तुश्शे लेइ रोडू आए, तुस ज़ैना प्रभु यीशु पुड़ विश्वास केरतथ, अपने अम्मा बाजी केरु ज़ोनू मन्ना। 4 ते हे बच्चन बालव, अपने बच्चन न सरकाथ, पन प्रभुएरी शिक्षा ते खबरदारी देइतां, तैन केरि हेरगेश केरा। 5 हे गुलामाव, ज़ैने लोक दुनियारे मुताबिक तुश्शी मालिकन, अपने मनेरे सचैई सेइं डरते, ते थरकते, ते ज़ेन्चरे मसीहेरो तेन्हरे तैन केरो भी हुक्म मन्ना। 6 ते मैन्हु खुश केरेने बालां केरि ज़ेरे हिरानेरे

लेइ सेवा न केरा, पन मसीहेरे दासां केरे ज़ेरे मने सेइं परमेशरेरी मेझी पुड
 च्छला। 7 ते तै सेवा मैन्हु केरि नई, पन प्रभुएरी ज़ैनतां केरा। 8 किजोकि तुस
 ज्ञानतथ, कि ज़ै कोई ज़ेरु रोदू कम केरेलो, चाए गुलाम भोए, चाए आज़ाद;
 तैस प्रभु करां तेरहु इनाम मैलेलू। 9 एन्चरे हे मालिकव, तुस भी धेमकी
 शैरतां अपने नौकरन सेइं रोड़ो बर्ताव केरा, किजोकि तुस ज्ञानतथ, कि तैन
 केरो ते तुश्शो दुइयां केरो मालिक स्वर्गे मांए, ते तै केन्चेरी तरफदारी न केरे।
 10 आखरी मां तुस प्रभुएरी शक्ति बाले शक्ति मां मज़बूत बना। 11 परमेशरेरे
 सारे हथियार बन्धा; ताके तुस शैतानेरे सारे मन्सूबां केरो मुकाबलो केरि
 बटतथ। 12 किजोकि इश्शी ई लड़ाई, खूने या मांसे सेइं यानी मैन्हु केरे
 खलाफ नई, बल्के प्रधान्न सेइं, ते अधिकैरन सेइं, ते इस दुनियारे आंधरेरे
 हाकिमन सेइं ए, ते तैस दुष्टेरे आत्मिक फौजन सेइं ए ज़ैना आसमाने मां
 आन। (aiōn g165) 13 एल्हेरेलेइ परमेशरेरे सारे हथियार बन्धा, ताके तुस
 ज़ेइस बुरे दिहाड़न एजन त तुस सामनो केरि बटतथ, ते सब किछ पूरु केरतां
 मज़बूत राथ। 14 परमेशरेरे सच्चाई पटकेरी ज़ेरि अपने कमरी सेइं बन्धा, ते
 धार्मिकतारी झिलम लेइतां, 15 ते पवन्न मां मेलेरे खुशखबरी शुनानेरे तियैरारे
 बूट लाथ। 16 ते तैन सेव्भन सेइं साथी विश्वासेरी ढाल घिन्तां मज़बूत भोथ
 ज़ैस सेइं तुस तैस शैतानेरे सब ज़लते तीर हिशेर्ई बटथ। 17 ते मुक्करो टोप, ते
 आत्मारी तलवार ज़ैन परमेशरेरु वचने, नेथ। 18 ते हर वक्त ते हर किसमे सेइं
 ज़ै पवित्र आत्मा च्छलाने सेइं प्रार्थना ते बिनती केरते राथ, ते बींझे राथ, कि
 सब परमेशरेरे लोकां केरे लेइ लगातार बिनती केरा। 19 ते मेरे लेइ भी,
 कि मीं वचन शुनानेरे वक्त हिम्मत भोए, कि अवं दिलेरी सेइं खुशखेबरारो
 भेद ज़ोई बेटि। 20 एल्हेरेलेइ अवं शंगलन सेइं बन्धोरो राज़दूतेरो ज़ेरो सेवा
 केरनेबालोई। प्रार्थना केरा कि ज़ेन्चरे मीं शुनावरु लोडे, तेन्चरे अवं दिलेरी सेइं
 खुशखबरी शुनेर्ई बेटि। 21 तुस भी, अवं ज़ोई बटताई ते कुन केरने लोरोई,
 इस सेइं बुझा। तुखिकुस ज़ै तुसन सब किछ ज़ोलो। तै इश्शो ट्लारो साथीए,
 ते प्रभु मां वफादार सेवके। 22 तै मीं तुसन कां एल्हेरेलेइ भेज़ोरोए, कि तुस
 इश्शी हालती ज्ञानथ, ते तै तुश्शे मन्न मां हिम्मत दे। 23 अवं प्रार्थना केरताई
 कि इश्शो बाजी परमेशरे ते प्रभु यीशु मसीह तुसन विश्वासी लोकन शान्ति दे,
 ते तैना तुसन एककी होरि सेइं प्यारे मां ते मसीह पुड़ विश्वासे मां बनोरे रानेरे

वजा भोन। 24 जैना इश्शो प्रभु यीशु मसीह सेइं सच्चो प्यार केरतन, तैन
सेब्बन पुड़ अनुग्रह भोतो राए।

फिलिप्पियों

1 अबं पौलुस, त कने तीमुथियुस, यीशु मसीहेरे दास आम। इश्शो तरफां सेब्भी पवित्र लोकां केरां नंब्वा, ज़ैना मसीह यीशु मां भोइतां फिलिप्पी नगरे मां रातन, रखवालन ते सेवकन समेत, 2 इश्शो बाजी परमेश्वर ते प्रभु यीशु मसीहे करां तुसन अनुग्रह ते शान्ति मैलती राए। 3 अबं ज़ैखन-ज़ैखन तुसन याद केरताई, तैखन-तैखन अपने परमेश्वरू शुक्र केरताई। 4 ते ज़ैखन भी तुश्शी सेब्भी केरे लेइ बिनती केरताई, ते हमेशा आनन्दे सेइं प्रार्थना केरताई। 5 किजोकि तुस पेइले दिहडे करां अज़ तगर यीशु मसीहेरी खुशखबरी फैलाने मां मीं सेइं साथी शामिल रावरेथ। 6 ते मीं इस गल्लरो भरोसोए, कि परमेश्वरे तुसन मां रोडे कम्मेरी शुरुआत कियोरीए, तैए तैस कम्मे यीशु मसीहेरे वापस एजनेरे दिहडे तगर पूरू केरेलो। 7 इन जेझजे, कि अबं तुसन सेब्भी केरे लेइ एरु सोची, किजोकि तुस मेरे मने मां बस्सोरेथ, ते मेरे कैदे मां खुशखेबरारे लेइ जुवाब ते सबूत देने मां तुस सब मीं सेइं साथी अनुग्रहे मां मीं साथिथ, 8 इस मां परमेश्वर मेरो गवाहे, कि अबं यीशु मसीहेरो ज़ेरो प्यार केरतां तुश्शे सेब्भी केरु लालच केरताई। 9 ते अबं ई प्रार्थना केरताई, कि तुश्शो प्यार ज्ञान ते सेब्भी किसमेरो ज़मीर सेइं होरे भी बद्धते गाथ। 10 इडी तगर तुस रोडी करां रोडी गल्लां ट्लाएरी बुझा, ते मसीहेरे दिहडे तगर सञ्चे बनोरे राथ; ते ठोकर न खाथ। 11 ते तैस धार्मिकतारे फले सेइं ज़ै यीशु मसीहेरे ज़िरिये भोते, भेरोते गाथ जैस सेइं परमेश्वरी महिमा ते बड़याई भोती राए। 12 हे ढ्लाव ते बेइनव, अबं सञ्च ज़ोताई, कि तुस इन ज्ञाना, कि मीं पुड़ ज़ै बीतोरीए, तैस सेइं खुशखेबरारी बड़ोतरी भी भोइ। 13 इडी तगर कि महाराज़ेरी सारी फौज ते बाकी सारे लोकन मां इन बांदू भोव कि अबं मसीहेरे लेइ कैद मां आई। 14 ते प्रभु यीशु मां जैना ढ्ला आन, तैन मरां बड़े मेरे कैद भोनेरे वजाई सेइं आन, तैना हिम्मत केरतां परमेश्वरो वचन बेथड़क भोइतां ते दिलेरी सेइं शुनानेरी कोशिश केरतन। 15 किछ लोक त जलन ते लड़ई सेइं मसीहेरो प्रचार केरतन ते किछ लोक सञ्चे दिले सेइं। 16 किछ त इन सेमझतां कि अबं खुशखेबरारे लेइ जुवाब देनेरे लेइ ठेरावरोई प्यारे सेइं प्रचार केरताई। 17 पन तैना होरे लोक साफ दिले सेइं नई पन जलनी सेइं मसीहेरो प्रचार केरतन, इन सेमझतां कि मेरे कैद मां मेरे लेइ मुसीबत बधान। 18 त

कुन भोव? सिर्फ इन, कि हर बत्तां चाए बुरे खियाले सेइं, चाए सचैई सेइं, मसीहेरे बारे मां खुशखबरी प्रचार भोतीए, ते अवं इस सेइं खुश आई, ते खुश भी रेइलो। 19 किजोकि अवं ज्ञानताई, कि तुश्शी प्रार्थनाई सेइं, ते यीशु मसीहेरी आत्मारे दाने सेइं इसेरो नितीजो मेरी मुक्ति भोली। 20 अवं त दिले सेइं इन चाताई, ते ई उमीद रखताई, कि अवं कोन्ची गल्ली मां न छिथोई, बल्के ज़ेन्हरे मेरी बड़ी दिलेरी सेइं मसीहेरी बड़याई मेरे जिसमे सेइं भोती राई, तेन्हरे हुना भी भोए चाए अवं ज़ींतो रेइ या मेरी। 21 किजोकि मेरे लेइ ज़ींतू रानू मसीहे, ते मरनू फैइदोए। 22 पन अगर जिसमे मां ज़ींतू रानू मेरे कम्मेरे लेइ फैइटेमंदे त अवं न ज़ैनी, कि केस चुनी। 23 किजोकि मीं दुह्यां केरे मझाटे चुने मां मुश्किल भोने लोरीए। अवं मरनू चाताई ताके स्वर्गे मां मसीह साथी रेइ बेटि, किजोकि इन बड़ू ज़रूरीए। 24 पन तुश्शी मद्दत केरनेरे लेइ मेरू ज़ींतू रानू बड़ू ज़रूरीए। 25 एल्हेरेलेइ कि मीं इलहेरो भरोसोए ते अवं ज्ञानताई कि अवं ज़ींतो रानोई, बल्के तुसन सेल्भन सेइं साथी रानोई जैस सेइं अवं तुश्शी मद्दत केरि, कि विश्वासे मां मज़बूत भोथ, ते इस मां खुश राथ। 26 ज़ैखन अवं तुसन कां दुबारां एज्जी, तुसन कां जादे वजा भोली यीशु मसीह पुड़ घमण्ड केरनेरी एल्हेरेलेइ ज़ैन किछ तै मेरे ज़िरिये केरने लोरोए। 27 सिर्फ एत्रू केरा कि तुश्शो चालचलन मसीहेरे खुशखेबरारे काबल भोए। चाए अवं तुसन एइतां हेरी, चाए न एज्जी, तुश्शो बारे मां इन शुनी, कि तुस अक मन भोइतां बनोरे रातथ, ते अकोटु भोइतां खुशखेबरारे विश्वासेरे लेइ मेहनत केरते रातथ। 28 ते कोन्ची गल्ली मां खलाफत केरनेबालन करां न डराथ। ई तैन केरे लेइ बरबाद भोनेरो साफ निशाने, पन तुश्शे लेइ मुक्तरो, ते इन परमेशरेरे तरफां आए। 29 किजोकि मसीहेरे वजाई सेइं तुसन पुड़ ई अनुग्रह भोव कि न सिर्फ तैस पुड़ विश्वास केरा पन तैसेरेलेइ दुःख भी झैल्लां। 30 ते तुसन तेन्हरे मुसीबत केरनीए, ज़ेन्हरे तुसेई मीं करां केरते लोरीए, ते हुना भी शुन्तन, कि अवं तेन्हरे केरताई।

2 अगर मसीह मां किछ तसल्ली ते प्यारे सेइं हिम्मत ते आत्मारी मौजूदगी, ते किछ दर्द ते दयाए। 2 ते मेरो ई आनन्द पूरो केरा कि अकके मन राथ ते अकके प्यार, ते अकके खियाल, ते अकके सोच रखा। 3 खुदगरज़ या झूठी बड़यैयरे लेइ किछ न केरा पन नर्म भोइतां एककी होरि एप्पू करां रोड़ो

समझा। 4 तुसन मरां हर कोई सिर्फ अपने भलैइयरे लेइ न सोचे, बल्के होरि
 केरि भलैइयरे लेइ भी सोचे। 5 ज़ेन्चरे यीशु मसीहेरो सुभाव थियो तेन्हरे
 तुश्शो भी भोए। 6 ज़ैने परमेश्वरे बराबर भोइतां भी परमेश्वरे बराबर भोने
 अपने कब्जे मां रखनेरी चीज़ न समझू। 7 बल्के अपनो आप खाली केरो, ते
 गुलामेरु रूप धारण केरु, ते मैन्हु केरे ज़ेरो बनो। 8 ते मैनेरे रूपे मां बांदो
 केरतां दीन केरो, ते इड़ी तगर हुक्म मन्ने बालो राव, कि मौत, हाँ, कूसेरे मौत
 भी झैल्ली। 9 एल्हेरेलेइ परमेश्वरे तै बड़ो महान भी केरो, ते तैस तैन नवं दित्तू
 ज़ैन सेब्बी नंब्वन करां बड्हूए। 10 कि स्वर्गे मां ते धेरती पुड़ ते धेरतलरे बुने;
 तैना सब यीशुरे नंब्वे पुड़ ज़ैधूए टेकन। 11 ते बाजी परमेश्वरी महिमारे लेइ
 हर अक ज़िभ मन्ने कि यीशु मसीह प्रभुए। 12 ते हे मेरे ट्लारव, ज़ेन्चरे तुस
 सदा हुक्म मन्ते ओरेथ, तेन्हरे हुना भी न सिर्फ मीं सेइं साथी रेइतां पन खास
 केरतां ज़ैखन अवं दूर भोताई फिरी भी डरते राथ ते थरकते अपने मुक्तरु कम
 पूरु केरते गाथ। 13 किजोकि परमेश्वर ज़ै तुसन मां कम केरते, ते तुसन इच्छा
 ते शक्ति तैन केरनेरे लेइ देते, ज़ैस सेइं तै खुश भोते। 14 त सब कम्मां बगैर
 शकैइतां ते बगैर बेंसी सेइं केरा। 15 ताके तुस बेइलज़ाम ते शरीफ भोइतां
 टारे ते ढीठ लोकन मां परमेश्वरे बेइलज़ाम बच्चे बना, ज़ैन मां तुस ज़िन्दगरो
 वचन घिन्तां दुनियाई मां बलते दीयां केरे ज़ेरे लेइहोते रातथ, 16 कि मसीहेरे
 वापस एजनेरे दिहाड़े घमण्ड केरनेरी वजा भोए, कि न मेरी दौड़-धूप ते न मेरी
 मेहनत बेकार भोए। 17 अगर मीं तुश्शे विश्वासेरे बलिदाने या सेवारे लेइ
 अपनो खून भी बगानो पे, त फिरी भी अवं खुश आई, ते तुसन सेब्बी साथी
 खुश आई। 18 तेन्हरे तुस भी खुश भोथ, ते मीं साथी आनन्द केरा। 19 मीं
 प्रभु यीशु मां उमीदे, कि अवं तीमुथियुसे तुसन कां जल्दी भेजेलो, ताके
 तुश्शो हाल शुन्तां मीं शान्ति मैल्ले। 20 किजोकि मीं कां ऐरे ज़ेरे सुभावेरो
 कोई नई, ज़ै साफ दिले सेइं तुश्शी फिक्र केरे। 21 किजोकि सब अपने फैइदो
 तोपतन, न कि यीशु मसीहे। 22 पन तुसेई तै परखो ते पिशानो भी, कि
 ज़ेन्चरे मटू बाजी साथी केरते, तेन्हरे तैनी मीं सेइं साथी खुशखबरी फैलाने मां
 मीं सेइं साथी मेहनत केरि। 23 ते मीं उमीदे, कि जैखन मीं पतो चलेलो कि
 मेरी कुन हालत भोली, तैखन अवं तैस लूशी भेजेलो। 24 ते मीं प्रभु मां
 भरोसोए, कि अवं एप्पू भी जल्दी एज्जेलो। 25 पन मीं इपफ्रुदीतुस जै मेरो

द्वलाए, ते मदतगार, ते साथी योधो ते तुश्शो दूते, ते ज़रूरी गल्लन मां मेरी सेवा टेल केरनेबालोए, तुसन कां भेज्नो ज़रूरी समझो। 26 किजोकि तैसेरो मन तुसन सेब्बन मां लग्गोरो थियो। एल्हेरेलेइ बे चैन रातो थियो किजोकि तुसेई तैसेरे बिमैरारो हाल शुनोरो थियो। 27 ते तै सच्चे बिमार त भोरो थियो, इडी तगर कि मरने पुड़ थियो, परमेशरे तैस पुड़ दया की; ते सिर्फ तैसे पुड़ नई, पन मीं पुड़ भी, कि मीं दुःखे पुड़ दुख न भोए। 28 एल्हेरेलेइ अवं तैस भेज्नेरी होरि भी कोशिश केरि, तुस फिरी तैस सेइं मिलतां खुश भोइयथ ते मेरो भी दुःख घटे। 29 एल्हेरेलेइ तुस प्रभु मां बड़े आनन्दे सेइं तैस सेइं मुलाकात केरा, ते एरे ज़ेरे लोकां केरि आदर केरा। 30 किजोकि तैए मसीहेरे कम्मेरे लेइ अपनि जान खतरे मां छेडतां मौतरे नेड़ो पुज़ोरो थियो, ताके जै घाटो तुश्शे तरफां मेरी सेवा मां भोव, तैस तै पूरो केरे।

3 हे मेरे ढलाव ते बेइनव, प्रभु मां आनन्दित राथ, तैना गल्लां तुसन बार-बार लिखने मां मीं त कोई कष्ट न भोए, ते इस मां तुश्शी सलामतीए। 2 तैन बुरां कम्मां केरनेबालो लोकन करां हुशार राथ, ज़ैना खुवार कुतरां केरे ज़ेरे खाने बालां आन। 3 किजोकि खतने बाले त असां आम ज़ैना परमेशरेरे आत्मारे चलाने सेइं चलतम ते आराधना केरतम ते मसीह यीशु पुड़ घमण्ड केरतम ते जिसमे पुड़ भरोसो न रखम। 4 पन अवं त जिसमे पुड़ भरोसो रेख्खी बटताईं अगर कोन्ची होरि जिसमे पुड़ भरोसो रखनेरो वचार भोए, त अवं तैस करां भी जादे रेख्खी बटताई। 5 अठोवं दिहाड़े मेरो खतनो भोव, इसाएल केरे कुटमे ते बिन्यामीनेरे गोत्रे मरां आई; इबरैनी केरो इब्रानी; कानूनेरे बारे मां अगर कोई ज़ोए त फरीसी। 6 जोशेरे बारे मां अगर कोई ज़ोए त कलीसियाई सताने बालो; ते अगर कानूनेरे धार्मिकतारे बारे मां कोई ज़ोए त बेइलज़ाम। 7 पन ज़ैना-ज़ैना गल्लां मेरे फैइदेरी थी तैना मीं मसीहेरे खातर नुकसान सैमझोरिन। 8 बल्के मीं अपने प्रभु यीशु मसीहेरे पिशानारी बड़यैयरे वजाई सेइं अवं सब गल्लां नुकसान समझताई, ज़ेसेरे वजाई सेइं मीं बेड़ि चीज़ां केरो नुकसान उठाव, ते तैन कूड़ो समझताई, ज़ैस सेइं अवं मसीह हासिल केरि। 9 ते तैस मां भोइ, न कि एपनी तैस धार्मिता सेइं, ज़ै मूसेरे कानूने सेइं ए, बल्के तैस धार्मिकता सेइं ज़ै परमेशरेरे तरफां मसीह पुड़ विश्वास केरने सेइं भोतीए। 10 ते अवं तैस ते तैसेरे ज़ींती भोनेरी शक्ति, ते तैस साथी दुखन मां

शामिल भोई, ते तैसेरी मौतरी बराबरी हासिल केरि। 11 ताके अवं कोन्ची रीति सेइं मुङ्दन मरां ज़ीते भोनेरे पदे तगर पुज्जी। 12 ई मतलब नई, कि मीं हासिल केरू, या अवं सिद्ध भोइ जेव, पन तैस चीजी हासिल केरनेरे लेइ दौड़ने लोरोई, ज़ेसेरे लेइ मसीह यीशुए अवं ट्लावरो थियो। 13 हे ढ्लाव ते बेइनव, मेरू इन गुमान नई कि मीं ट्लाव, पन सिर्फ अक कम केरताई, कि जैना गल्लां पत्रोवं रेइ तैन बिसरतां, अग्री गल्लां केरे पासे गाताई। 14 निशानेरे पासे दौड़तो च्लताई, ताके मीं तैन इनाम मैल्ले, ज़ेसेरे लेइ परमेशरे अवं मसीह यीशु मां बा कुजेवरोई। 15 असन मरां ज़ेत्रे सिद्धन, ईए विचार रखा, ते अगर कोन्ची गल्ली मां तुश्शो होरो खियाल भोए त परमेशर तैस भी तुसन पुड़ बांदो केरेलो। 16 एल्हेरेलेइ ज़ैडी तगर पुजोरेम, तैसेरे मुताबिक च्लाम। 17 हे ढ्लाव ते बेइनव, तुस सब मिलतां मेरी ज़ेरि चाल च्लाल, ते तैन केरि पिशान रखा, जैना इस रीति पुड़ च्लतन ज़ेसेरी मिसाल तुस असन मां हेरतथ। 18 किजोकि बड़े एरी चाल च्लतन, जैन केरि चर्चा मीं तुसन सेइं बार-बार की ते अज़ भी लेरां देइ-देइ ज़ोताई, कि तैना अपने चालचलन सेइं मसीहेरे कूसेरे बैरिन। 19 तैन केरो अन्त विनाशे, तैन केरो ईश्वर पेटे, तैना एपनी शरमरी गल्लन पुड़ घमण्ड केरतन, ज़मीनारी गल्लन पुड़ मन लातन। 20 पन इश्शो मुलख स्वर्गे, ते अस एककी मुक्ति देनेबाले प्रभु यीशु मसीह स्वर्गों बलगने लोरेम। 21 तैए एपनी शेक्ति सेइं तैस अस्सेरे मुताबिक तैना सब चीज़न अपने वशे मां केरि बटते, इश्शो कमज़ोर जिसमेरू रूप बेदलतां, अपने महिमारो जिसमेरे मुताबिक बनालो।

4 एल्हेरेलेइ हे मेरे ट्लारे ढ्लाव ते बेइनव अवं तुसन सेइं प्यार केरताई, जैन मां मेरो दिल लग्गोरो रहते जै मेरो आनन्द ते ताज भोए, हे ट्लारे ढ्लाव ते बेइनव, प्रभु मां एन्जरे मज़बूत राथ। 2 अवं यूओदियारे छंदे केरताई, ते सुन्तुखेरे भी, कि तैना प्रभु मां अक मन रान। 3 ते हे सङ्घे मद्दतगार अवं तीं कां भी बिनती केरताई, कि तू तैन कुआन्शां केरि मद्दत केर, किजोकि तैनेई मीं सेइं साथी खुशखबरी फैलाने मां, क्लोमेंस ते मेरे तैन मद्दत केरनेबालन समेत मेहनत की, जैन करां नव्वां ज़िन्दगरे किताबी मां लिखोरन। 4 प्रभु मां सदा आनन्दित राथ; अवं फिरी ज़ोताई, आनन्दित राथ। 5 तुश्शी नरमी सेब्भी मैनन् पुड़ बांदी भोए, प्रभु नेड़ोए। 6 कोन्ची भी गल्लारी फिक्र न

केरा, पन हर एककी गल्ली मां तुश्शी दरखुवास, प्रार्थना बिनती सेइं शुक्रे
 साथी परमेशरे कां हाज़र भोन। 7 तैखन परमेशरेरी शान्ति, ज़ै समझी करां
 बिलकुल बेझे, तुश्शे दिलन ते तुश्शे खियालन मसीह यीशु मां बिलकुल
 मैफूज़ रखेली। 8 आखरी मां, हे मेरे ढलाव ते बेझनव, जैना-जैना गल्लां
 सच्चीन, ते जैना-जैना आदरारे काबलन, ते जैना-जैना गल्लां पवित्रन, ते
 जैना-जैना गल्लां रोड़िन, ते जैना-जैना गल्लां मने रोड़ी लेगतिन, ते जैना-
 जैना गुण ते जैना-जैना गल्लां तरीफेरी, तैन पुढ़ ध्यान केरा। 9 जैना गल्लां
 तुसेई मीं करां शिखी, ते कबूल की, ते शुनी ते मीं हेरी, तैन केरो हुक्म मन्ना
 तैखन परमेशर ज़ै शान्ति देनेबालोए तुसन साथी भोलो। 10 अवं प्रभु मां बड़ो
 खुश आई कि हुनी एत्रे दिहाड़न पत्ती तुसन मेरे बारे मां फिरी खियाल भोव;
 याकीन्न तुश्शे शुरुआती मां इस एरो खियाल थियो, पन तुसन मौको न
 मैल्लो। 11 इन नई कि अवं अपनि कम्मेरे वजाई सेइं ज़ोताई; किजोकि मीं
 इन्ने शिखोरुए कि ज़ैस हालती मां आई, तैस्से मां राजी भोई। 12 अवं निकड़ू
 भोनू भी ज़ानताई ते बड़ू भोनू भी ज़ानताई, ते मीं हर एककी गल्ली ते सेब्बी
 हालतन मां रज्जनू ढलुखू ते बधनू घटनू शिखोरुए। 13 ज़ै मीं ताकत देते
 तैस मां अवं सब किछ केरि बटताई। 14 फिरी भी तुसेई रोड़ू कियूं, कि मेरे
 दुखे मां मीं साथी भोए। 15 ते हे फिलिप्पियों, तुस एप्पू भी ज़ानतथ, कि
 खुशखबरी प्रचारेरे शुरुआती मां ज़ैखन अवं मकिदुनिया अग्रोवं जेव, तैखन मीं
 तुस शारे ते कोन्ची होरि मेनडलारे लोकेई लेने देनेरे बारे मां मद्दत न की। 16
 एन्हरे ज़ैखन अवं थिस्सलुनीके नगरे मां थियो; तैखन भी तुसेई मेरी घटी पूरी
 केरनेरे लेइ एककी बार नई बल्के काई बार किछ भेजेरु थियूं। 17 इन नई कि
 अवं दान चाताई पन अवं एरो फल चाताई, ज़ै तुश्शे फैइदेरे लेइ बड़तो गाए।
 18 मीं कां सब किछे, बल्के बड़ू जादे, जैन तुसेई इपप्रुदीतुसेरे हथ्ये भेजोरु
 थियूं, तैन मेलतां रजोरोई, तैन त खुशबू ते कबूल केरनेरे काबल बलिदाने,
 जैन परमेशरे पसंदे। 19 ते मेरो परमेशर भी अपने तैस धनेरे मुताबिक जैन
 महिमा सेइं यीशु मसीह मांए, तुश्शी हर अक ज़रूरत पूरी केरेलो। 20 इश्शो
 परमेशर ते बाजी एरी महिमा हमेशा भोती राए। आमीन। (aiōn g165) 21 हर
 अक पवित्र मैन्हु ज़ै यीशु मसीह मांए तैस जो नमस्कार ज़ोथ। ज़ै ढला मीं
 साथीए तुसन नमस्कार जोते। 22 सब पवित्र लोकन, खास केरतां जैना

महाराजेरे घरानेरेन तुसन नमस्कार ज्ञोतन। २३ इश्शो प्रभु यीशु मसीहेरो
अनुग्रह तुश्शी आत्माई सेइं साथी राए।

कुलस्सियों

१ अवं पौलुस ई चिट्ठी लिखने लोरोई, अवं परमेशरेरी मेज्जी सेइं मसीह यीशुएरो प्रेरित आई, ते विश्वासी ढला तीमुथियुस भी मां साथी आए। २ मसीह मां तैन पवित्र ते विश्वासी ढलां केरे नंवे ज़ैना कुल्लुसे नगरे मां रातन। इश्शो बाजी परमेशरे तुसन अनुग्रह ते शान्ति देतो राए। ३ अस ज़ैखन तुश्शे लेइ प्रार्थना केरतम त अपने प्रभु यीशु मसीहेरो बाजी, परमेशरेरू शुक्र केरतम। ४ किजोकि असेई शुनोरूए, कि मसीह यीशु पुड़ तुश्शो विश्वासे, ते तुस सेब्बी पवित्र लोकन सेइं तुस प्यार केरतथ। ५ तैस उमीद कियोरी चीज़ारे वजाई सेइं ज़ै तुश्शे लेइ स्वर्गे मां रखोरीए, ज़ेसेरे बारे मां तुसेई तैस खुशखेबरारे सच्चे वचने सेइं शुनोरूए, ज़ै तुसन कां पुज़ोरोए। ६ ते ज़ेन्चरे दुनियाई मां भी फल आनते, ते बद्धतो गाते; मतलब ज़ैस दिहैड़ी करा देंतू तुसेई तै शुनू ते सच्चैई सेइं परमेशरेरो अनुग्रह पिशानो, तुसन मां भी एरु केरि बटते। ७ तैसेरी शिक्षा तुसेई इश्शो ट्लारे मद्दतगार इपफ्रास करां हासिल की, ज़ै इश्शो लेइ मसीहेरो वफादार सेवके। ८ तैने तुश्शे प्यारेरे बारे ज़ोवं ज़ै होरि लोकां केरे लेइ आए, ज़ै पवित्र आत्मा मांए तुसन दित्तोरोए। ९ एल्हेरेलेइ ज़ैस दिहैड़ी करां इन शुनू त असेई हमेशा तुश्शे लेइ प्रार्थना की, कि परमेशरेरी आत्मा तुसन अक्ल ते मसझा दे ज़ैस सेइं तुस तैसेरी मर्जी पूरे तरीके सेइं सेमझी बटेले। १० ताके तुस तेरही ज़िन्दगी ज़ीथ ज़ेरि प्रभुएरे लोकन ज़ीयोरी लोडे, ते तुस प्रभुए हर बत्तां खुश केरथ, ताके तुस लगातार हर किसमेरी भलाई केरते राथ, ते परमेशरेरी पिशानी मां बद्धते गाथ। ११ अवं प्रार्थना केरताई कि परमेशर अपनि महिमारे शेक्करे इस्तेमाल केरनेरे ज़िरिये तुसन मज़बूत केरे, ताके तुस आनन्दे ते सबरी सेइं दुख झैल्ली बटतथ। १२ बाजी परमेशरेरू शुक्र केरते राथ, ज़ैने अस इस काबल बनाए कि स्वर्गेरे राज़जे मां तैसेरे अपने लोकन सेइं साथी विरासती मां हिसेदार भोम। १३ किजोकि तैने अस शैतानेरे राज़जे मरां छुटेइतां अपने ट्लारे मट्टेरे राज़जे मां आने १४ परमेशरेरे अपने मट्टेरे बलिदाने सेइं असन पापां केरि माफ़ी दित्ती (यानी शैतानेरे राज़जे करां आज़ाद किये)। १५ परमेशरे त कोई न लेई बटे, पन ज़ैखन तैसेरू मटू मैन्हु बनू त तैनी परमेशर लोकन पुड़ बांदो कियो, ज़ैन किछ परमेशरे बनाव तैस पुड़ तैस कां सेब्बना जादे अधिकार आए। १६ किजोकि ई तै (मसीह) थियो ज़ैने

सब किछ बनानेरे वक्ते परमेशरे सेइं कम कियूं चाए अम्बरे पुड़ भोन या
 धेरती पुड़ भोन, लेवरी भोन या आलई, कुन तखत भोन, या रियासतां, कुन
 हकौमतां भोन या अधिकार, सैरी चीज़ां तैस्से सेइं ते तैसेरेलेइ बनेइ। 17 ते
 मसीह सेब्बी चीज़ां बनाने करां पेइलो थियो, ते सब चीज़ां तैस मां बनोरी
 रैतन। 18 तैए कलीसियारो प्रधाने ज़ै तैसेरी जाने; तैए पेइलोए ते मुङ्दन मरां
 ज़ींतो भोने बालन मरां पेइलोए कि सेब्बी गल्लन मां तैए प्रधान भोए। 19
 किजोकि बाजी परमेशर इस्से मां खुश भोते कि मसीह मां तैसेरे सारे सुभाव
 वास केरतन। 20 परमेशरे फैसलो कियो कि अपने मटु भेजे, ज़ैने अपनो
 खून बगाव ते क्रूसे पुड़ अपनि जान दित्ती। परमेशरे सेब्बी चीज़न सेइं मेल
 मलाप केरनेरे लेइ एन कियूं। एन्हरे तैनी मसीहेरे ज़िरिये सेइं सेब्बी चीज़ां
 केरो मेल मिलाप एप्पू साथी कियो, चाए तैना धेरतरी भोन, चाए स्वर्गेरी
 भोन। 21 ते तुस ज़ैना पेइले परमेशरे करां दूर थिये, ते बुरे कम्मां सेइं मने
 सेइं बैरी थी। 22 फिरी भी परमेशर अपने मटु यीशुएरे मैन्हु बन्ने सेइं ते
 क्रूसे पुड़ मौतरे ज़ियरीए तुश्शो मेल कराव, ताके तुसन एप्पू कां पवित्र ते बे
 दाग ते बेइलज़ाम हज़ार केरे। 23 पन तुस मसीह पुड़ विश्वास केरनेरे मां
 बुनीयादरे ज़ेरे मज़बूत राथ, ते तैस खुशखेबरारे उमीद पुड़ ज़ै तुसेई शुनोरी एन
 शारथ, ज़ेसेरो प्रचार अम्बरे करां बुन सैरी सष्ठि मां कियो जेव; ते ज़ैस मां अवं
 पौलुस सेवक बनो। 24 हुनी अवं तैन दुखन सेइं खुश आई, ज़ैना तुश्शे लेइ
 झैल्लताई, ते मसीहेरी दुखां केरि घटी तैसेरे जानारे लेइ, मतलब कलीसियारे
 लेइ, अपने जिसमे मां पूरी केरताई। 25 ज़ेसेरो अवं परमेशरेरे इंतज़ामेरे
 मुताबिक सेवक बनो, ज़ै तुश्शे लेइ मीं सोंफो, ताके अवं परमेशरेरु वचन
 पूरो-पूरो प्रचार केरि। 26 मतलब तैस भेदे ज़ै ज़माना ते पीड़न करां छ़प्पोरो
 थियो, पन हुनी तैसेरे तैन पवित्र लोकन पुड़ बांदो भोरोए। (aiōn g165) 27
 ज़ैन पुड़ परमेशरे बांदो केरनो चाव, कि तैन ज्ञान भोए होरि कौमन मां तैस
 भेदेरी महिमारी कीमत कुने ते तै ईए, कि मसीह ज़ै महिमारी उमीदे तुसन मां
 रहते। 28 ज़ेसेरो प्रचार केरतां अस हर एककी मैन्हु ज़ोतम ते सारे ज्ञाने सेइं
 हर एककी मैन्हु शिखालतम, कि अस हर एककी मैन्हु मसीह कां सिद्ध केरतां
 पेश केरम। 29 ते एल्हेरेलेइ अवं तैसेरी शेक्करे मुताबिक ज़ै मीं मां शेक्कि सेइं
 साथी अस्सर केरतीए तन मन लेइतां मेहनत भी केरतम।

2 अवं चाताई कि तुस ज्ञानथ, कि तुशो ते तैन केरे जैना लौटीकिया नगरे मां
 आन, ते तैन सेव्ही केरे लेइ जैनेई अवं नई लोरोई कि अवं केन्नरे मेहनत
 केरताई। 2 ताके तैन केरे मन्न मां शान्ति भोए ते तैना प्यारे सेइं एपू मांमेइं
 बनोरे रान, ते तैस पूरी समझारु धन हासिल केरन, बाजी परमेशरेरे भेदे
 मतलब मसीह पिशानन्। 3 जैस मां समझारे ते ज्ञानेरे सारे भण्डार छपोरेन। 4
 इन अवं एल्हेरेलेइ ज़ोताई, कि कोई मैन्हु तुसन लालङ्ग देने बैली चीज़ी सेइं
 धोखो न दे। 5 किजोकि अवं अगर जिसमेरे लिहाजे सेइं दूराई, फिरी भी
 आत्मिक लिहाजे सेइं नेडो आई, ते तुशो रीति सेइं तुश्शी हालती ते तुशो
 विश्वासे जै मसीह यीशु मां मज़बूती हेरतां खुश भोव। 6 ते ज़ेन्नरे तुसेई
 मसीह यीशु अपनो प्रभु कबूल कियोरोए, तेन्नरे तैस मां चलते भी राथ। 7 ते
 तैस मां ज़ील छँडते राथ ते बद्धते राथ; ते ज़ेन्नरे तुस शिखालोरेथ तेन्नरे
 विश्वासे मां मज़बूत भोते गाथ, ते खूब शुक्र केरते राथ। 8 खबरदार राथ कि
 तुसन कोई तैसेरे ज्ञाने ते धोखे सेइं शिकार न केरे, जैन मैन्हु केरु रुवाज़ेरु ते
 दुनियारी पेइली शिक्षारे मुताबिके पन मसीहेरे नई। 9 किजोकि तैस मां
 ईश्वरत्वेरी सारी भरपूरी जानी मां इइतां वास केरती। 10 ते तुस तैस मां
 भेरोरेथ जै सैरी हकोमती ते अधिकारेरी क्रोडी। 11 तैस्से मां तुश्शो एरो
 खतनो भोरोए, जै हाथेरो नई, मतलब मसीहेरो खतनो, जैस सेइं तुश्शी
 पुरानी इन्सानयत अलग की गातीए। 12 ते तैस्से सेइं साथी बपतिस्मे मां दबे
 जे, ते तैस्से मां परमेशरेरी शेक्ति पुड़ विश्वास केरतां, जैने तै मुड़दन मरां ज़ींतो
 कियो, तुस भी तैस सेइं साथी ज़ींते किये। 13 ते तैने तुस भी, जैना अपने
 पापन, ते अपने जिसमेरे खतनेरे हालती मां फटरे थी, तैस सेइं साथी ज़ींते भी
 केरे, ते इश्शे सब पाप माफ़ केरे। 14 ते विधि केरो तै लेख जै इश्शे नंवे पुड़
 ते इश्शे खलाफ थियो मटाव; ते तैस क्रूसे पुड़ कील देइतां दूर केरो। 15 ते
 तैने प्रथान्न ते अधिकैरन हारेइतां तैन केरो खुल्लो मुखूल्लो तमाशो बनावं ते
 क्रूसे सेइं जयजयकार भी केरु। 16 एल्हेरेलेइ खान पीनू या तिहार या नव्वीं
 चाँदनी, या आरामेरे दिहाड़ां केरो बारे मां तुश्शो कोई फैसलो न केरो। 17
 किजोकि सब एजने बैली गल्लां केरि छावे, पन असली चीजां मसीहेरिन। 18
 कोई मैन्हु दीनता ते स्वर्गदूतां केरि पूजा पसंद केरतां तुश्शी दौड़े इनामे करां
 दूर न रखे। एरो मैन्हु लेवहरी गल्लां मां लग्गोरो रहते ते एपनी जिसमानी

समझी पुङ बैफैइदो फुलते। 19 ते तैस क्रोडी ट्लेइतां न रखन जै मसीह आए ते जैस सेइं सारो जिसम जोडन ते पठां केरे हफाजती सेइं ते एककी सेइं साथी जुडतां, परमेशरेरे तरफां बद्धतो गाते। 20 जैखन कि तुस मसीह सेइं साथी दुनियारे पेइली शिक्षाई सेइं मरोरेथ, त फिरी तैन केरे जेरे जैना दुनियाई मां जिन्दगी बीतातन मैन्हु केरे हुक्म ते शिक्षा सेइं, 21 ते एरी शिक्षा मां किजो राथ कि इस सेइं नई हुरनु, एन नई खानू, ते तैस सेइं हथ नई लानो? 22 (किजोकि इना सब चीजां कम्मे मां आनते-आनते नाश भोइ गैली)। 23 इन गल्लन मां एपनी मेर्जरी मुताबिक अपनि बनेवरी भेक्ति सेइं, ते दीनता, ते जिसमानी कोशिश सेइं ज्ञानेरु कम त आए, पन जिसमानी खुवैइशन रोकने मां इन सेइं किछ भी फैइदो न भोए।

3 ते जैखन तुस मसीह सेइं साथी जींतो किये, त स्वर्गेर चीजां केरे तोपी मां राथ, जैडी मसीह मौजूदे ते परमेशरेरे देइने पासे बिशोरोए। 2 धेरतरे नई पन स्वर्गेर चीजन पुङ ध्यान लाथ। 3 किजोकि तुस त मरे, ते तुश्शी जिन्दगी मसीह सेइं साथी परमेशरे मां छपोरुए। 4 जैखन मसीह जै इश्शी जिन्दगीए, बांदो भोलो, तैखन तुस भी तैस सेइं साथी महिमा साथी बांद किये गाले। 5 एल्हेरेलेइ अपने तैन अंगन मैरी देथ, जैना धेरती पुङ आन, मतलब बदमाशी, गन्दगी, बुरे खियाल, बुरी खुवैइश ते लालचे जैन मूरती पूजने बराबरे। 6 इन केरे वजाई सेइं परमेशरेरो क्रोध हुक्म न मन्ने बालन पुङ एइते। 7 ते तुस भी, जैखन इन बुरैइन मां जिन्दगी बीताते थी, त इन केरे मुताबिक चलते भी थी। 8 पन हुनी तुस भी इन सेब्बन मतलब क्रोध, सरक, बैर, तुहीन, गैई देनी इना सब गल्लां शारा। 9 एककी होरि सेइं झूठ न जोथ किजोकि तुसेई पुरानी इन्सानयत तैसेरे कम्मन समेत खोलोरीए। 10 ते नव्वी इन्सानयत लोरीए जै अपने बनाने बालेरे रूपेरे मुताबिक ज्ञान हासिल केरनेरे लेइ नव्वी बनातीए। 11 तैस मां न कोई यूनानी राव, न यहूदी, न बगैर खतने बालो, न जंगली, न स्कूती, न गुलाम न आज्ञाद, सिर्फ मसीह सब किछ ते सेब्बन मांए। 12 एल्हेरेलेइ परमेशरेरे चुनोरां केरे जेरे जैना पवित्र ते ट्लारेन, बडी, ते ढला, ते दीनता, ते नग्रता, ते बरदाशत धारण केरा। 13 ते अगर केन्ची, केन्ची पुङ दोष लानेरी वजा भोए, त एककी होरेरी झैल्ला, ते एककी होरेरे पाप माफ केरा, जेन्चरे प्रभुए तुश्शे पाप माफ केरे, तेन्चरे तुस भी केरा। 14 इन सेब्बन

करां बा प्यारे ज़ै सेब्भन सिद्धतारो पटकोए बंधा। 15 ते मसीहेरी शान्ति
ज़ेसेरे लेइ तुस अक जान भोनेरे लेइ कुजेवरे भी आथ, तुश्शे दिलन मां राज़
केरे, ते तुस शुक्र केरते राथ। 16 मसीहेरे वचन अपने दिलन मां रोड़ेचारे
बसने देथ; ते सारे ज्ञाने सेइं एककी होरि शिखाला, ते नसीहत देथ, ते अपने-
अपने मन्न मां अनुग्रहे साथी परमेशरेरे लेइ भजन ते स्तुति ते आत्मिक गीत
ज़ोते राथ। 17 ते वचन या कम ज़ैन किछ भी केरा सब प्रभु यीशुएरे नंवे
सेइं, ते तैसेरे ज़िरिये बाजी परमेशरेरु शुक्र केरा। 18 हे कुआन्शाव, ज़ेन्हरे
प्रभु मां जेइज़े, तेन्हरे अपने-अपने मुन्शां केरे अधीन राथ। 19 हे मुन्शाव,
एपनी-एपनी कुआन्शन सेइं प्यार रखा, ते तैन सेइं सखत बर्ताव न केरा।
20 हे बचाव, सेब्भी गल्लन मां अपने-अपने अम्मा बाजी केरो हुक्म मन्ना,
किजोकि प्रभु इस सेइं खुश भोते। 21 हे बच्चन बालव, अपने बच्चन तंग
न केरा, एरु न भोए कि तैन केरि हिम्मत न ट्लुटे। 22 हे सेवकाव, ज़ैना
जिसमेरे मुताबिक तुश्शे मालिकन, सेब्भी गल्लन मां अपने मालिकां केरो
हुक्म मन्ना, मैनन् खुश केरनेरे बालां केरे ज़ेरे हिरानेरे लेइ नई, पन सच्चे मने
सेइं ते परमेशरेरे डरे सेइं। 23 ते ज़ैन किछ तुस केरतथ, तैन मने सेइं केरा,
इन समझातां कि मैन्हु केरे लेइ नई पन प्रभुएरे लेइ केरतथ। 24 किजोकि तुस
ज़ानतथ कि तुसन एसेरे बदले प्रभु करां बदले मां मीरास मैल्लनीए, तुस प्रभु
यीशु मसीहेरी सेवा केरतथ। 25 किजोकि जै बुराई केरते, तैस एपनी बुरैइयरो
फल मैलनोए; तैड़ी केन्वरी तरफदारी नई।

4 हे मालिकव, अपने-अपने गुलामन सेइं साथी इन्साफ ते ठीक-ठीक बर्ताव
केरा, इन समझातां कि स्वर्गे मां तुश्शो भी अक मालिके। 2 प्रार्थना मां
लग्गोरो राथ, ते शुक्र सेइं साथी हुशार राथ। 3 साथी इश्शे लेइ भी प्रार्थना
केरते राथ, कि परमेशर इश्शे लेइ शुनानेरे लेइ एरी बत खोल्ले, कि अस
मसीहेरे तैस भेदेरे बारे मां ज़ोई बटम ज़ेसेरे लेइ अवं कैदे मां आई। 4 ते
तैस बांदो केरि, ज़ेन्हरे मीं कियो लोड़े। 5 वक्त कीमती सेमझातां बेइरन
साथी सैमझादैरी सेइं बर्ताव केरा। 6 तुश्शो वचन सदा अनुग्रहे सेइं ते एरो
लूनो भोए, कि तुसन हर एककी मैन्हु रोड़ेचारे जुवाब देनो एज्जे। 7 ट्लारे
द्ला ते वफादार सेवक, तुखिकुसे जै प्रभु मां मेरो महतगार, तै मेरी सेब्भी
गल्लन मां तुसन ज़ोलो। 8 तै मीं एल्हेरेलेइ तुसन कां भेजो, कि तुसन इश्शी

हालतरो पतो भोए ते तै तुश्शे दिलन शान्ति दे। ९ ते तैस सेइं साथी उनेसिमुस भी भेजो जै वफादार ते ट्लारो ढ्लाए ते तुसन मरांए, ते तुसन इडी तगर सैरी गल्लां ज़ोले। १० अरिस्तर्खुस जै मीं सेइं साथी कैदीए, ते मरकुस जै बरनबासेरो ढ्लाए लगते। (जेसेरे बारे मां तुसन हुक्म मैल्लोरो थियो कि अगर तै तुसन कां एज्जे, त तैस सेइं रोड़ेच्चारे बर्ताव केरथ) ११ ते यीशु जै जो यूस्तुस ज़ोतन, तै तुसन नमस्कार ज़ोते। खतनो केरे लोकन मां सिफ ईए परमेश्वरे राज्जे लेइ मद्दतगार ते मेरे शैनतरी वजा राए। १२ इपफ्रास जै तुसन मरांए, ते मसीह यीशुएरो दासे, तुसन जो नमस्कार ज़ोते ते सदा तुश्शे लेइ प्रार्थना केरते, ताके तुस सिद्ध भोइतां पूरे विश्वासे सेइं साथी परमेश्वरे मेझी पुड़ मज़बूत राथ। १३ अवं तैसेरो गवाह आई, कि तै तुश्शे लेइ ते लौदीकिया ते हियरापुलिस बालां केरे लेइ बडी कोशिश केरतो रहते। १४ ट्लारे तबीब लूका ते देमासेरु तुसन नमस्कार। १५ लौदीकिया नगरेरे ढ्लान ते नुमफास ते तैन केरे घरेरे कलीसियान जो नमस्कार ज़ोथ। १६ ते ज़ैखन ई चिट्ठी तुश्शे इडी पढ़ी गाए, त एरु केरनू कि लौदीकियारे कलीसिया मां भी पढ़ी गाए, ते तै चिट्ठी जै लौदीकियारां एज्जे तैस तुस भी पेड़थ। १७ फिरी अरखिप्पुसे सेइं ज़ोइयथ कि जै सेवा प्रभु मां तीं सोंफी, तैस बडे हुशैरी सेइं पूरी केरथ। १८ अवं पौलुस अपने हथ्थन सेइं नमस्कार लिखताई। मेरी शंगलन याद रखा; तुसन पुड़ अनुग्रह भोतो राए। आमीन।

1 थिस्सलुनीकियों

1 अबं पौलुस ई चिट्ठी लिखताई। सिलवानुस ते तीमुथियुस भी मीं सेइं साथी आन, थिस्सलुनीकि नगरेरे कलीसियारे विश्वासी लोकन, ज़ैना बाजी परमेश्वर ते प्रभु यीशु मसीह मां आन, तैन अनुग्रह ते शान्ति मैलती राए। 2 अस अपने प्रार्थनान मां तुसन याद केरतम, ते सदा तुश्शी सेब्बी केरे लेइ परमेश्वरू शुक्र केरतम। 3 ते अपने बाजी परमेश्वरेरे सामने तुश्शां कम्मां, ज़ैना तुस विश्वासेरे वजाई सेइं केरतथ, ते बड़ी मैहनतरां कम्मां ज़ैन सेइं पतो च्छलते तुस होरन सेइं प्यार केरतथ, ते इश्शे प्रभु यीशु मसीहेरे वापस एजनेरे उमीदरे लेइ मुसीबतन मां सबर केरतथ, अस लगातार याद केरतम। 4 ते हे ढ्लाव, ते परमेश्वरेरे ट्लारे लोकव, अस ज्ञानतम, कि तुस परमेश्वरे अपने लोक भोनेरे लेइ चुनोरेथ। 5 किजोकि यीशु मसीहेरे बारे मां खुशखबरी तुसन कां न सिर्फ लफसन मां पुजी बल्के पवित्र आत्मारे शक्ति सेइं, ते बडे याकीने सेइं साथी पुजी, ज़ेन्हरे तुस ज्ञानतथ, कि अस तुश्शे लेइ तुसन मां केरहे बनोरे थिये। 6 ते तुस बडे दुखे मां पवित्र आत्मारे आनन्दे सेइं साथी वचने मेन्तां इश्शे ते प्रभुएरी चाल झलने लाए। 7 इडी तगर कि मकिदुनिया ते अखाया इलाकां केरे सेब्बी विश्वासी लोकां केरे लेइ तुस अक नमूनो बने। 8 किजोकि तुश्शे इट्टां न सिर्फ मकिदुनिया ते अखाया इलाकन मां प्रभुएरु वचन शुनावं, पन तुश्शे विश्वासेरी ज़ै परमेश्वरे पुड़, हर ठैरी ज़ैडी अस जे चर्चा फेलोरीए, कि असन तुश्शे बारे मां ज़ोनेरी ज़रूरत नई। 9 किजोकि तैना एप्पू होरन ज़ोतन कि ज़ैखन अस तुसन कां आए त कुन भोवं। तुस मूरतन करां दूर भोइतां परमेश्वरेरे पासे फिरे, ताके ज़ींते ते सच्चे परमेश्वरी सेवा केरथ, 10 ते तैसेरु मटू स्वर्गेरां वापस एजने बलगते राथ, ज़ैन तैने मुड़दन मरां ज़ींतो कियूं, मतलब यीशुए, ज़ै असन एजनेबाले परमेश्वरेरे प्रकोपे करां बचाते।

2 हे ढ्लाव, तुस एप्पू ज्ञानतथ कि इश्शू तुसन कां एजनू बेफैइटू न भोवं। 2 बल्के तुस एप्पू ज्ञानतथ, कि असेई पेइले फिलिप्पी नगरे मां दुख झाल्लने ते मुसीबत झाल्लने पुड़ भी इश्शे परमेश्वरे असन दिलेरी दित्ती, कि अस परमेश्वरे खुशखबरी बड़ी खलाफत भोंते भी तुसन शुनाम। 3 किजोकि इश्शी शिक्षा न टपलाने सेइं ते न धोखे सेइं, ते न बुरे मकसदे सेइं आए। 4 पन ज़ेन्हरे परमेश्वरे अस इस काबल बनेइतां असन खुशखबरी सोंफी, अस

तेन्न्यरे वियांन केरतम, ते मैनन् नई, बल्के परमेशरे खुश केरनेरे लेइ शिक्षा
 देतम, जै इश्शो मन्न परखते। ५ तुस जानतथ, कि असेई कधी चपलूसारी
 गल्लां नई कियोरी, ते न लालङ्गरे लेइ बहानो केरते थी, परमेशर इस गल्लरो
 गवाहे। ६ ते असन मसीहेरे प्रेरित भोनेरे वजाई सेइं तुसन करां मदत नेनेरो
 अधिकार थियो। किर भी अस मैनन् करां आदर न थिये चाते, ते न तुसन
 करां, न होरि कोन्ची करां। ७ पन ज़ेन्न्यरे अम्मा अपने मटां केरि हेरगेश
 केरतीए, तेन्न्यरे असेई भी तुसन मां रेइतां नरमी हिराई। ८ ते तेन्न्यरे अस तुशू
 लालङ्ग केरते, न सिर्फ परमेशरेरी खुशखबरी, पन अपने-अपने प्राण भी
 तुसन देनेरे लेइ तियार थिये, एल्हेरेलेइ तुस इश्शो बड़े टलारे भोइ जोरे थिये।
 ९ किजोकि, हे ढलाव, तुस इश्शी मेहनत ते कष्टे याद रखतथ, कि असेई
 एल्हेरेलेइ रात दिहैडी कारोबार केरतां तुसन मां परमेशरेरी खुशखबरी प्रचार
 की, कि तुसन मरां कोन्ची पुड़ भार न भोए। १० तुस एप्पू गवाह आथ, ते
 परमेशर भी गवाहे, कि तुसन जैना विश्वास केरतथ, अस केरि पवित्रता, ते
 धार्मिकता ते बेइलज्ञामे सेइं राए। ११ तुसन पतोए, कि ज़ेन्न्यरे बाजी अपने
 बच्चन सेइं बर्ताव केरते, तेन्न्यरे अस भी तुसन मरां हर केन्ची शिक्षा देते, ते
 दिलासो देते, ते समझते थिये। १२ कि तुस एरी जिन्दगी जीथ जैस सेइं
 परमेशर खुश भोए, जै तुसन अपने राज्जे ते महिमा मां कुजाते। १३ अस
 भी परमेशरेरू शुक्र लगातार केरतम, कि ज़ैखन इश्शो ज़िरिये परमेशरेरी
 खुशखबरी तुसन कां पुज्जी जै असेई प्रचार की, त तुसेई तै मैन्हु केरि नई,
 बल्के परमेशरेरू वचन सेमझातां (ते सच्चे इन परमेशरेरू वचन आए) कबूल
 की, ते तै वचन तुसन मां जैना मसीह पुड़ विश्वास केरतथ कम केरते। १४
 एल्हेरेलेइ तुस, हे ढलाव, परमेशरेरी तैन कलीसियां केरि ज़ेरि चाल चलने
 लाए, जैना यहूदिया मां यीशु मसीह मां आन, किजोकि तुसन भी अपने
 लोकन करां एरो दुःख मैल्लो, ज़ेन्न्यरे तैन यहूदन करां मैल्लोरो थियो। १५
 जैनेई प्रभु यीशु ते नबी भी मारे, ते अस सताए, ते परमेशर तैन सेइं खुश नई,
 ते तैना सेब्बी मैन्हु केरि खलाफत केरतन। १६ ते तैना गैर कौमन सेइं तैन
 केरे मुक्करे लेइ गल्लां केरने लेइ असन रोकतन। तैना पापे पुड़ पाप केरतन
 जांतगर परमेशर तैन सज्जा न दे, ते हुनी परमेशरे तैन पक्को सज्जा देनेबालोए।
 १७ हे ढलाव, ज़ैखन अस थोड़े चिरेरे लेइ मने मां नई बल्के बांदे मां तुसन करां

अलग भोरे थी, ते असेर्ई बड़े लालचे सेइं तुसन हेरनेरी बड़ी जादे कोशिश की।

18 एल्हेरेलेइ (मतलब मीं पौलुसे) एककी बार नई बल्के बार-बार तुसन कां एजनू चाव, पन शैतान अस तुसन कां एजनेरे लेइ रोके। 19 भला इश्शी उमीद, या आनन्द, या बड़ीयैयरु ताज कौन आए? इन तुस भोले जैखन प्रभु यीशु वापस एजेलो 20 इश्शी बड़याई ते आनन्द तुस आथ।

3 एल्हेरेलेइ जैखन असेर्ई जादे न बेलगी बटु त असेर्ई इन ठहराव कि अस एथेंस नगरे मां अकैल्ले रेइ गाम। 2 ते असेर्ई तीमुथियुस जै मसीहेरे खुशखबरी मां इश्शो ढ्लाए, ते परमेश्वरो सेवके, एल्हेरेलेइ तुसन कां भेज़ो, कि तै तुसन विश्वासे मां मज़बूत केरे ते तुश्शी हिम्मत बधाए। 3 कि कोई इन दुखां केरे वजाई सेइं न घबराए, किजोकि तुस एप्पू रोड़े चारे ज्ञानतथ परमेश्वरे फैसलो कियोरोए, कि अस सताए गानेम। 4 किजोकि पेइले भी, जैखन अस तुसन कां थिये, त तुसन सेइं ज़ोते थी, कि अस सताए गानेम, ते तुस ज्ञानतथ एरु भोवं भी। 5 एल्हेरेलेइ जैखन मीं करां होरु न बेलगोव, त तुश्शे विश्वासेरो हाल ज्ञान्नेरे लेइ तीमुथियुस भेज़ो, किजोकि अवं डरों थियो कि एरु न भोए, कि अज़माने बाले (शैताने) तुस अज़माए त न, कि इश्शी मेहनत बेकार त न भोइ। 6 पन तीमुथियुसे जै तुसन करां इश्शो इड़ी अव, ते तुश्शे विश्वासेरे ते प्यारेरे बारे मां खुशखबरी शुनाई। ते ई गल भी शुनाई, कि तुस सदा प्यारे सेइं असन याद केरतथ, ते असन हेरनेरी इच्छा रखतथ, ज़ेन्नरे अस भी तुसन हेरनेरी इच्छा रखतम। 7 एल्हेरेलेइ हे ढ्लाव, अपनि सारी तंगी, ते मुसीबतन मां तुश्शे विश्वासे सेइं असन शान्ति मैल्ली। 8 तुश्शो प्रभु पुङ मज़बूत विश्वासे इश्शो लेइ अक नव्वे ज़िन्दगरे साँसेरो ज़ेरोए। 9 ते ज़ेरो आनन्द असन तुश्शे वजाई सेइं अपने परमेश्वरेरे सामने, तैसेरे बदले मां अस कोस तरीके सेइं परमेश्वरे शुक्र केरम! 10 अस रात दिहाड़ी बड़ी प्रार्थना केरते रातम, कि तुसन सेइं दुबारां मिलम, ते तुश्शी मद्दत केरम कि तुस होरि जादे मज़बूती सेइं प्रभु यीशु पुङ विश्वास केरथ। 11 ते अस प्रार्थना केरतम कि इश्शो बाजी परमेश्वर ते इश्शो प्रभु यीशु, बत खोल्ले कि अस तुसन कां एज्जी बटम। 12 ते प्रभु एरु केरे, कि ज़ेन्नरे अस तुसन सेइं प्यार केरतम; तेन्नरे तुश्शो प्यार एप्पू मांमेइं, ते सेब्बी मैनन् सेइं बधे, ते तरक्की केरतो राए। 13 ताके तै तुश्शे मन्न मज़बूत केरे, कि जैखन इश्शो प्रभु यीशु अपने

सब पवित्र लोकन सेइं साथी एज्जे, त तै इश्शो बाजी परमेश्वरे सामने तुश्शे
मन्न पवित्रता मां बेइलज्जाम ठहरालो।

4 आखर, हे ढलाव अस तुसन कां बिनती केरतम, ते तुसन प्रभु यीशु मां
समझातम, कि जेन्चरे तुसेई इश्शो जेरो चाल चलन रख्खो, ते परमेश्वर खुश
केरनो शिखोरोए, ते जेन्चरे तुस चलतथ भी, तेन्चरे तुस अग्रोवं बद्धते राथ। 2
किजोकि तुस ज्ञानतथ, कि इना हदायतां असन प्रभु यीशु करां मैलोरिन।
3 परमेश्वर चाते, कि तुस पवित्र बना, मतलब बदमाशी केरने करां बच्चोरे
राथ। 4 ते तुसन मरां हर केन्वे ज्ञानेरु लोडे कि केन्वरां अपने कुआन्शी सेइं
पवित्रता ते आदरी सेइं जिन्दगी जीयोरी लोडे। 5 ते इन कम खुवैइशी सेइं
नई, ते न गैर कौमां केरे जेरे, जैना परमेश्वरे न पिशानन्। 6 कि इस गल्ली मां
कोई अपने विश्वासी ढलाए न ठगे, ते न तैस पुड़ हकोमत चलाए; किजोकि
प्रभु इन सब गल्लां केरि सज्जा देलो, जेन्चरे कि असेई पेइलू तुसन सेइं ज्ञोरु
थियूं, ते खबरदारी भी दित्तोरी थी। 7 किजोकि परमेश्वरे अस अशुद्ध जिन्दगी
जीनेरे लेइ नई, पन पवित्र जिन्दगी जीनेरे लेइ कुजवरेम। 8 एल्हेरेलेइ जै कोई
इना हदायतां केरो इन्कार केरते, तै मैन्हु केरो नई, पन परमेश्वरेरो इन्कार
केरते, जै अपनो पवित्र आत्मा तुसन देते। 9 पन विश्वासी भाईचारेरे प्यारेरे
बारे मां तुसन किछ लिखनेरी ज़रूरत नई, एप्पू मांमेइ प्यार रखनो तुसेई
परमेश्वरे करां एप्पू शिखोरोए। 10 ते सारे मकिदुनिया इलाकेरे सेब्भी ढलान
सेइं साथी एरु केरतथ भी, पन हे ढलाव, अस तुसन कां छन्दे केरतम कि होरे
भी बद्धते गाथ। 11 ते जेन्चरे असेई तुसन हुक्म दित्तो, तेन्चरे तुस होरन
सेइं लड़ाई न केरा, ते अपनू कम केरा त कने अपने लेइ कमाई केरा। 12
ते एन्चरां तैना भी तुश्शी आदर केरेले जैना विश्वासी नई, ते तुसन कोन्ची
चीज्जारो घाटो न भोलो। 13 हे ढलाव, अस न चातम, कि तुस तैन केरे बारे मां
अनज्ञान राथ जैना विश्वासी मर्नेन अनज्ञान राथ, एरु न भोए, कि तुस होरि
केरे जेरे शोग केरथ, जैन मरनेरां पत्ती उमीद नई। 14 किजोकि अगर अस
विश्वास केरतम, कि यीशु मरो, ते जींतो भोव, त तेन्चरे परमेश्वर तैन भी जैना
यीशु पुड़ विश्वास केरतां मरे, परमेश्वर तैन भी यीशु सेइं साथी वापस आनेलो।
15 किजोकि अस प्रभु यीशुएरे वचनेरे मुताबिक तुसन सेइं इन ज्ञोतम, कि
अस जैना जींतेम, ते प्रभुएरे वापस एजने तगर बंचोरे रामेले, त जैना विश्वासी

मरोरेन पेइले तैस सेइं मिलमेले, फिरी अस मिलमेले। 16 किजोकि प्रभु यीशु एप्पू स्वर्गेरां एजजेलो; ते ज़ोरे सेइं हुक्म देलो, तैस वक्ते प्रधान दूतेरी आवाज़ शुनोली, ते परमेश्वरी महिमारो नड़शिनगो बजो गालो, ते जैना मसीह पुड़ विश्वास केरनेबाले मां मरन, तैना पेइले ज़ीते भोनेन। 17 तैखन अस जैना ज़ीते बचोरे रहमेले, ते तैन सेइं साथी बिदलारी पुड़ निये गानेम, कि अम्बरे मां प्रभु सेइं मिलमेले, ते तेइसेरां बाद अस सदा प्रभु सेइं साथी रानेम। 18 एल्हेरेलेइ इन्ने गल्लन सेइं एककी होरि तस्सली देते राथ।

5 हे ढ्लाव ते बेइनव, इसेरी ज़रूरत नई, कि वक्तन ते कालां केरे बारे ज़ेइस प्रभु यीशु वापस एजजेलो तुसन किछ लिखू गाए। 2 किजोकि तुस एप्पू रोड़े चारे ज्ञानतथ, ते ज़ेन्वरे चोर राती एइते, तेन्वरे प्रभुएरु दुबारां एजनू भोलू। 3 जैखन लोक ज़ोले, “कि शान्तिए, ते कोई डर नई,” त तैन पुड़ अकदम विनाश एजनोए, ज़ेन्वरे दोज़ींती पुड़ तकलीफ; ते तैन तैस मुसीबती करां न बच्वेलो। 4 पन हे ढ्लाव ते बेइनव, तुस त (आत्मिक) आंधरे मां नई, कि तै दिहाड़ी पुसन पुड़ चोरेरी ज़ेरि एज्जे। 5 किजोकि तुस सब लोअरे बच्वे आथ, ते दीसारे बच्वे आथ, अस न रातेरम, न आंथारेरेम। 6 एल्हेरेलेइ अस होरि केरे ज़ेरे झुलोरे न रहम, पन बींझो रहम ते हुशार रहम। 7 किजोकि जैना झुलोरे रातन, तैना राती झुलतन, ते जैना नशे मां रातन, तैना राती नशे मां भोतन। 8 पन अस त दीसेरेम, विश्वास ते प्यार लेइतां कि इश्शी हिफाज़त भोए ज़ेन्वरे झिलम सिपाहेरी हिफाज़त केरतीए, ते मुक्तरे उमीद लेइतां ज़ेन्वरे सिपाही टोप लाते, खबरदार रहम। 9 किजोकि परमेश्वरे अस सज्जारे ते क्रोधेरे लेइ नई, पन एल्हेरेलेइ चुनोरेम कि अस अपने प्रभु यीशु मसीहेरे ज़िरिये सेइं मुक्ति हासिल केरम। 10 यीशु मसीह इश्शो लेइ एल्हेरेलेइ मरो, कि अस चाए बींझो भोम, या झुलोरे भोम, सब मिलतां तैस सेइं साथी ज़ींम। 11 एल्हेरेलेइ एककी होरि हिम्मत देथ, ते एककी होरेरी तरक्की भोनेरी ज़िरियो बना, लगातार, तुस एरु केरतथ भी। 12 ते ढ्लाव, अस तुसन सेइं बिनती केरतम, कि जैना तुश्शे लेइ बड़ी मेहनत केरतन, ते प्रभु मां तुश्शी अगवाई केरनेबाले आम, ते जैना तुसन सलाह देतन, तैन केरि आदर केरा। 13 ते जैना कमां तैनेई तुश्शे लेइ कियां तैन केरे वजाई सेइं तैन केरि आदर ते तैन सेइं बड़ो प्यार केरा, ते एप्पू मांमेइं मेल मालपे सेइं राथ। 14 हे ढ्लाव ते बेइनव,

अस तुसन कां मिनत केरतम्, कि ज़ैना आलसी आन, तैन खबरदार केरा,
ज़ैन केरि हिम्मत घटे तैन हिम्मत देथ, तैन केरि मद्दत केरा ज़ैना (आत्मिकता)
मां कमज़ोरन, सेब्भी केरे लेइ बरदाशत केरनू हिराथ। 15 इस गल्लारु ध्यान
रख्खा, कि कोई कोन्ची सेइं बुरीयीयेरे बदले बुराई न केरे, पन सदा भलाई
केरनेरे लेइ तियार राथ, एप्पू मांगेइ ते सेब्भन सेइं भी भलाई केरनेरी कोशिश
केरा। 16 सदा खुश राथ। 17 लगातार प्रार्थना केरते राथ। 18 हर हाले मां
शुक्र केरा, किजोकि तुश्शे लेइ मसीह यीशु मां परमेश्वरी ईए मर्जीए। 19
पवित्र आत्मारे कम्मन ज़ैना लोकां केरे ज़िन्दगी मां भोतन तैन न रोका। 20
भविष्यवैनी केरो इन्कार न केरा। 21 सब गल्लां परखा, ज़ैना रोड़ी भोन तैन
अपनाथ। 22 सेब्भी किसमेरी बुरैइ करां बच्चोरे राथ। 23 शान्ति देनेबालो
परमेश्वरे एप्पू तुसन पूरे तरीके सेइं पवित्र केरे; ते तुश्शी आत्मा ते प्राण
ते जिसम इश्शे प्रभु यीशु मसीहेरे दुबारां एजने तगर पूरे, ते बेइलज़ाम ते
सुरक्षित रान। 24 तुश्शो कुजाने बालो वफादारे, तै एरु केरेलो। 25 हे ढलाव,
इश्शे लेइ प्रार्थना केरा। 26 सेब्भी विश्वासी ढलान मसीहेरे प्यारे सेइं नमस्कार
केरा। 27 अवं तुसन प्रभुएरी कसम देताई, कि ई चिट्ठी सेब्भी विश्वासी ढलान
पेढतां शुनाई गाए। 28 इश्शे प्रभु यीशु मसीहेरो अनुग्रह तुसन पुड़ भोतो
राए।

2 थिस्सलुनीकियों

1 अबं पौलुस ई चिट्ठी लिखने लोरोई। सिलवानुस ते तीमुथियुस भी मीं सेइं साथी आन। थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, 2 अस प्रार्थना केरतम कि इश्शे बाजी परमेशर ते प्रभु यीशु मसीह तुसन अनुग्रह ते शान्ति दे। 3 हे ढ्लाव ते बेइनव, तुश्शे बारे मां असेई हर वक्त परमेशरेरु शुक्र कियेरु लोडे, ते इन इश्शे लेइ ठीक भी आए। एल्हेरेलेइ कि तुश्शो यीशु मसीह पुङ् विश्वास बड़ो बद्धतो गाते, त कने तुश्शो एककी होरि सेइं प्यार केरनो भी बड़ो बद्धने लोरोए। 4 ई वजा आए, कि अस एप्पू परमेशरेरे कलीसियान मां, तुश्शे बारे मां घमण्ड केरतम, चाए तुसन पुङ् मुसीबत या दुःख भी एज्जन, फिरी भी तुस सबरी सेइं झैलतथ, ते तुस यीशु मसीह पुङ् विश्वास केरते रातथ। 5 परमेशर अपनो इन्साफ हिरानेरे लेइ ई स्ताव इस्तेमाल केरेलो, कि तुस परमेशरेरे राज्जेरे काबल भोथ, जैसेरे लेइ तुस दुःख भी झैलतथ। 6 परमेशरे हमेशा ठीक तरीके सेइं इन्साफे केरते, कि जैना तुसन दुःख देतन, तैन बदले मां दुःख दे। 7 तुस जैना दुःख झैलतथ, परमेशर तुसन आराम देलो ते असन भी। इन तेइस भोलू जैइस प्रभु यीशु अपने शेक्किबाले स्वर्गदूतन सेइं साथी बेलति अगारे लप्पी सेइं साथी स्वर्गरां एज्जेलो। 8 ते जैना लोक परमेशरे न पिशानन् त कने इश्शे प्रभु यीशुएरे खुशखेबरी न मन्न, तैन तै सज्जा देलो। 9 तैना प्रभुए करां हमेशारे लेइ अलग भोले, ते तैसेरे महान शेक्करे हिस्सेदार न भोले। तै तैन हमेशारी सज्जा देइतां नाश केरेलो। (aiōnios g166) 10 इना गल्लां तेइस भोली जैइस यीशु अपने लोकन करां आदर हासिल केरनेरे लेइ वापस एज्जेलो, ते जैना लोक तैस पुङ् विश्वास केरतन तैना हैरान भोले। तुस भी तैन्ने लोकन मरां भोले, किजोकि जै सन्देश असेई तैसेरे बारे मां तुसन शुनव तुसेई तैस पुङ् विश्वास कियो। 11 एल्हेरेलेइ अस लगातार तुश्शे लेइ प्रार्थना भी केरतम, कि परमेशर तुसन इस काबल बनाए, जेरि जिन्दगी जींनेरे लेइ तुस कुजवरे तेन्हरे तुस जीथ। ते तै तुसन अपने शेक्कि सेइं इस काबल बनालो कि तुस जैना रोडू केरथ ते जैन तुस केरनू चाथ, ते जैन कम तुस अपने विश्वासे सेइं केरतथ पूरू केरथ। 12 एन्वरे इश्शे प्रभु यीशु मसीहेरे नव्वेरी तुश्शे जिरिये

बड़ीयाई भोली। ते तैसेरे जिरिये तुसन आदर मैलेली। इन सब किछ इश्शे परमेश्वर त कने प्रभु यीशु मसीहेरे अनुग्रहे सेइं भोलू।

2 हे ढ्लाव ते बेइनव, असन कां प्रभु यीशु मसीहेरे वापस एजनेरे बारे मां ज़ोनेरे लेइ किछ आए। तै वक्त एज्जेलो ज़ेइस अस तैस सेइं साथी मिलमेले। 2 इन सोचतां तुस परेशान न भोथ या तुश्शो दिल न घबराए कि प्रभुएरी दिहाड़ी पेइली ओरिए। किछ ज़ोई बटतन कि इन भविष्यिवाणी मां या सन्देशे मां या चिट्ठी मां तैन कां ओरु थियूं। 3 लोक ज़ैना इस बारे मां झूठी गल्लां ज़ोतन तैन पुड़ विश्वास न केरा। किजोकि यीशु मसीहेरे वापस एजनेरे पेइले, तै वक्त एज्जेलो ज़ेइस बड़े लोक परमेश्वरे खलाफ भोले, ते फिरी अर्धर्म मैन्हु बांदो भोलो। तै, तै आए ज़ै नाश भोनेरे लेइ ठहरावरोए। 4 तै अर्धर्म मैन्हु परमेश्वरी खलाफत केरेलो, ते तैन सब किछ ज़ैन लोक देबते सेमझतां आराधना केरतन, तै इन ज़ोलो ई अवं इन सेब्बन करां महान आई। इडी तगर कि तै परमेश्वरे मन्दरे मां बिश्तां अपनो आपे जो परमेश्वर ज़ोलो। 5 इन न बिसरा, कि मीं बड़े बार इन गल्लां केरे बारे मां ज़ोरुए, ज़ैखन अवं तुसन सेइं साथी थियो। 6 हुन्ना तै अर्धर्मी मैन्हु बांदो नई भोरो किजोकि कोई आए ज़ैने तै रोकोरोए, कि तै अपने वक्ते पुड़ बांदो भोए। 7 किजोकि अर्धर्मी चीज़ां केरि शक्ति इस दुनियाई मां पेइली छेपतां कम केरने लोरीए, पन अक आए ज़ै तैस रोकते। ते तै तैस रोकतो रालो ज़ां तगर तै दूर न कियो गाए। 8 तैटुं बाद तै दुष्ट मैन्हु एज्जेलो, पन बादे मां ज़ैखन प्रभु यीशु एज्जेलो, ते तैस दुष्ट मैन्हु अपने ऐरीरे फुकी सेइं ते एजनेरी महिमाई सेइं मारेलो। 9 तै दुष्ट मैन्हु, शैतानेरे शक्ति सेइं एज्जेलो। तै हर किसमेरे झूठे चमत्कार ते निशान, ते बडां-बडां कम्मां केरेलो, ताके लोक सोचन कि तै परमेश्वरे ज़ै एन केरते। 10 ते तै हर किसमेरां बुरां कम्मां केरेलो, ते तैन धोखो देलो ज़ैना परमेश्वरे नाश केरनेन। किजोकि तैनेई तैस सच्चे पुड़ विश्वास केरने करां इन्कार कियो, ज़ैस सेइं तैन मुक्ति मैल्लेथी। 11 एल्हेरेलेइ परमेश्वर तैन मां अक धोखो देनेबाली आत्मा भेजेलो ज़ै तैन सच्चे करां दूर केरेली, ताके तैना झूठे पुड़ विश्वास केरन ज़ैन तै दुष्ट मैन्हु तैन सेइं ज़ोलो। 12 परमेश्वर तैन सेब्बी लोकन सज्जा देलो ज़ैनेई यीशु मसीहेरे सच्चे सन्देशे पुड़ विश्वास न कियो, पन पाप केरने सेइं खुश भोए। 13 हे ढ्लाव ते बेइनव, असेई तुश्शो लेइ परमेश्वरे शुक्र कियोरु लोडे।

किंजोकि परमेश्वर तुसन सेइं प्यार केरते, तैने तुस दुनिया बनाने करां पेइलो चुने, कि पवित्र आत्मारे पवित्र बनाते, ते यीशु मसीहेरे बारे मां जै सच्चां
सन्देशो तैस पुड़ विश्वास केरतां परमेश्वर तुसन मुक्ति दे। 14 जै खुशखबरी
असेई प्रचार की परमेश्वरे तै इस्तेमाल की, कि तुसन बच्चानेरे लेइ कुजाए, तुस
इशो प्रभु यीशु मसीहेरी महिमाई मां शामिल भोथ। 15 एल्हेरेलेइ, ढलाव ते
बेइनव, जै शिक्षा असेई तुसन दित्ती, जैखन असेई तुसन सेइं गल्लां की त
कने चिठ्ठी केरे जिरिये, तैस पुड़ तुस लगातार विश्वास केरते राथ। 16 अस
प्रार्थना केरतम इशो प्रभु यीशु मसीह एप्पू, ते इशो बाजी परमेश्वर जैने
असन सेइं प्यार कियो, ते जैने अपने अनुग्रहे सेइं असन हमेशारो होसलो ते
पक्की उमीद दित्ती, (aiōnios g166) 17 तैना तुसन होसलो देन, ते तुसन
मज़बूत केरन ताके तुस लगातार भलाई केरथ ते जैन जोथ तैन रोड़ भोए।

3 आखरी मां हे ढलाव ते बेइनव, इशो लेइ प्रार्थना केरते राथ, कि अस प्रभु
यीशुएरु वचन होरि भी बड़े ठैरन शुनेई बटम, ते जैना शुन्न त तैना तेन्नरे
मनन जेन्नरे तुसेई मन्नू। 2 ते ई भी प्रार्थना केरा कि परमेश्वर असन बुरे ते
दुष्ट लोकां केरे जिरिये नुकसान पुज्ञाने करां बचेइतां रख्खे, किंजोकि बड़े
लोक जैनेई प्रभु यीशुएरी खुशखबरी शुनी, ते तैनेई इस पुड़ विश्वास न कियो।
3 पन तुस प्रभु पुड़ पूरो भरोसो केरि बटतथ, तैए तुसन मज़बूत केरेलो, ते दुष्टे
करां यानी शैताने करां बच्चालो, ताके तै तुसन कोई नुकसान न पुज्ञेई बटे। 4
ते असन प्रभु मां तुसन पुड़ भरोसोए, कि जैन किछ असेई तुसन केरनेरे लेइ
जोर्सए, तुस तेन्नरे केरते ओरेथ ते एजनेबाले वक्ते मां केरते राले। 5 अस
प्रार्थना केरतम, कि प्रभु यीशु मसीह तुसन इन समझानेरे काबल बनाए कि
परमेश्वर तुस सेइं केत्रो प्यार केरते, ते बरदाश केरा जेन्नरे मसीहे बरदाश
कियू। 6 हे ढलाव ते बेइनव, अस प्रभु यीशु मसीहेरे दित्तोरे अधिकार सेइं
तुसन ई हुक्म देतम, कि तुसन मरां हर कोई एरे ढलान ते बेइनन सेइं साथ न
रख्खे, जैना आलसी आन त कने जै शिक्षा असेई तुसन दित्ती तैस न मन्न। 7
किंजोकि तुस एप्पू रोड़े चारे ज्ञानतथ, कि तुसेई तेन्नरे जिन्दगी जीयोरी लोड़े
जेन्नरे असेई जी, जैखन अस तुसन सेइं साथी थिये, अस आलसी न थिये
पन कम केरते थिये। 8 असेई कोन्चेरी रोट्टी मुफ्त न खाइ, पन अस मेहनत
ते कष्टे सेइं रात दिहैड़ी कारोबार केरते थिये, कि अस अपने ज़रूरतां केरे लेइ

तुसन पुड़ निर्भर न भोम। ९ असेर्ई बड़ी मेहनत की, एल्हेरेलेइ नई कि असन अधिकार नई, कि तुसन हुक्म देम कि तुस इश्शी ज़रूरतां पूरी केरा। पन एल्हेरेलेइ कि असेर्ई अपनो आप तुश्शे लेइ मिसाल बनाई ताके तुस इश्शे ज़ेरि ज़िन्दगी ज़ीथ। १० ज़ैखन अस तुसन सेइं साथी थिये तैखन असेर्ई तुसन हुक्म दित्तोरो थियो, कि अगर कोई कम केरने करां इन्कार केरे त तैस रोट्टी भी न देथ। ११ इश्शे शुन्ने मां ओरु आए कि तुसन मां बड़े लोक ऐरे आन जैना आलसी ज़िन्दगी ज़ीतन। तैना एप्पू कम न केरन, पन होरि केरे कम्मन मां दखल देतन। १२ ऐरे लोकन अस प्रभु यीशु मसीहेरे दित्तोरे अधिकारे सेइं हुक्म देतम ते समझातम, कि चुपचाप कम केरतां अपनि ज़िन्दगी ज़ीनेरे लेइ कमाई केरन। १३ ते तुस, ढलाव ते बेइनव, भलाई केरने मां हिम्मत न हारा। १४ अगर कोई इश्शी इस चिट्ठेरे सन्देशे न मन्ने, त सेब्बी केरे सामने तैसेरी पिशान केरा, ते तैस सेइं साथ न रख्खा, ताके तै छिथोए; १५ फिरी भी तैस सेइं दुश्मनेरो ज़ेरो बर्ताव न केरा, पन तैस सेइं विश्वासी सैथेरो ज़ेरो बर्ताव केरतां तैस खबरदार केरा, कि ज़ेरु तैने कियूं तैन न केरे। १६ हुनी अवं प्रार्थना केरताई प्रभु जै शान्ति देनेबालोए, तुसन हर वक्त हर किसमे सेइं शान्ति देतो राए, ते प्रभु लगातार तुसन सेब्बन सेइं साथी भोए। १७ अवं पौलुस अपने हथ्ये सेइं नमस्कार लिखताई, इन मेरु सबूते, अवं चिट्ठी केरे आखरी मां एन्हरे लिखताई, ताके हर एककी पतो च़ले कि ई चिट्ठी मेरे तरफां आए। १८ इश्शे प्रभु यीशु मसीहेरो अनुग्रह तुसन सेब्बन पुड़ भोतो राए।

1 तीमुथियुस

1 अवं पौलुस ई चिट्ठी लिखने लोरोई। अवं इश्शो मुक्ति देनेबाले परमेश्वरे ते यीशु मसीहेरे अधिकारे सेइ प्रेरित आई, जैस पुड़ इश्शी उमीदे। 2 अवं ई चिट्ठी तीमुथियुसे जो लिखने लोरोई। हे तीमुथियुस तू मेरे मटु जेरु आस, किजोकि जेन्वरे अवं विश्वास केरताई तेन्वरे तू भी विश्वास केरतस। अवं प्रार्थना केरताई इश्शो बाजी परमेश्वर ते प्रभु यीशु मसीह तीं अनुग्रह, दया त कने शान्ति देतो राए। 3 हे तीमुथियुस जेन्वरे तू ज्ञानतस, इफिसुस नगरे मां किछ एरे लोक आन जैना गलत शिक्षा देतन। तैना लगातार झूठी कहैनी शिखालतन ते पूर्वजां केरे नव्वां केरे बारे मां शिखालतन। जैखन अवं इफिसुस नगरेरां मकिदुनिया इलाके जो गानेरे लेइ तियार थियो, त माँ तीं ज़ोरु थियू कि इफिसुस नगरे मां रा ते तैन जो, कि एरी ज़ेरि शिक्षा न देतन, जैखन तैन एरी ज़ेरि शिक्षा देतन त लोक तैन केरे बारे मां बेंस केरतन। नितीजो ई आए, जैन कम परमेश्वरे दित्तोरुए, शिखालनेबाले तैन नई लौ केरने जैन सिर्फ परमेश्वरे पुड़ रेखतां भोइ सकते। 5 मेरो हुक्म देनेरो मकसद ई आए, कि तुस एककी होरि सेइं साफ दिलो ते रोड़े ज़मीरे, ते सच्चे विश्वासे सेइं प्यार केरा। 6 झूठी शिक्षा देनेबालोई इन सैरी गल्लां केरनि बंद की ते सिर्फ बेकार बेंस केरतन। 7 ते शास्त्री बनू चातन, पन जैना गल्लां तैना होरन शिखालतन ते जैन केरो दावो केरतन तैन एप्पू भी न समझन। 8 अस ज्ञानतम, कि अगर लोक मूसेरे कानूने सही तरीके सेइं शिखालन त तैन रोड़ु आए। 9 तुस ज्ञानतथ मूसेरो कानून धर्मी मैनेरे लेइ नई। पन तैन केरे लेइ आए, जैना परमेश्वरेरो कानूनेरो इन्कार केरन ते तैस न मनन, ते जैना परमेश्वरी आराधना न केरन ते जैना लगातार पाप केरतन, ते जैना अशुद्ध आन, ते परमेश्वरी आदर न केरन, ते जैना अपने अम्मा बाजी ते होरि केरे कातलिन। 10 ते कने बदमाशी केरनेबालां, मड़द मड़दन सेइं जिसमानी रिश्तो रखनेबालां, नौकर बेचबालां, झूठ जोने बालां, ते झूठी कसम खाने बालां, ते इन केरे अलावा रोड़ी शिक्षारी खलाफ कम केरनेबालां केरे लेइ आए। 11 ई शिक्षा महान परमेश्वरी महिमारे खुशखेबरारे मुताबिके, ई परमेश्वर माँ होरन शुनानेरे लेइ दित्तोरीए। 12 अवं अपने प्रभु मसीह यीशुएरु शुक्र केरताई जैने माँ शक्ति दित्ती, तैने अवं वफादार सेमझतां माँ अपनि सेवा दित्ती। 13 विश्वासी बन्ने करां पेइलो अवं यीशुएर बारे मां

तुहीन केरनेबालो ते विश्वासी लोकन सताने बालो, ते तैन नुकसान पुजाने बालो थियो। पन परमेशरे मीं पुड़ अपनि दया हिराई, किजोकि मीं हेजू यीशु पुड़ विश्वास न थियो कियोरो ते अवं न थियो ज्ञानतो कि कुन लोरोई केरने।

14 ते इशो प्रभुए अपनो बड़ो अनुग्रह लगातार हिराव। ते तैनी विश्वास ते प्यार दित्तो, किजोकि अवं तैस सेइं साथी अक भोरो थियो। **15** ई गल सञ्चे, ते हर किसमे सेइं मन्ने काबल, कि मसीह यीशु असन पापी लोकन मुक्ति देने इस दुनियाई मां अव, जैन मरां सेब्भना जादे पापी अवं आई। **16** पन परमेशरे मीं पुड़ दया की, एन तैने एल्हेरेलेइ कियूं, कि मेरे ज़िरिये, जैने मैने होरन करां जादे बुराई की, यीशु मसीह तैस पुड़ अपनि पूरी बरदाशत हिरेई बटे, चाए मीं जैन भी कियोरु थियूं। तैने एन कियूं ताके बादे मां होरे लोक विश्वास केरन ते हमेशारी जिन्दगी हासिल केरन। (aiōnios g166) **17** हुनी हमेशारो राजो, जै सदा ज़ींतोए ते आलाए महान परमेशरेरी आदर, ते महिमा सदा भोती राए। आमीन। (aiōn g165) **18** हे मटां तीमुथियुस, अवं इन्ना हदायतां देने लोरोईः अवं तीं तैना गल्लां याद कराताई जैना बीतोरे वक्ते मां नेबेई तीं ज़ोरी थी। तू तैन गल्लां केरो इस्तेमाल हथियारां केरो ज़ेरो तैन केरे खलाफ लड़नेरे लेइ केर, जैना झूठी शिक्षा देतन। **19** तू मसीह पुड़ लगातार विश्वास केर ते अपनो ज़मीर भी साफ रख। किछ लोकेई अपने साफ ज़मीररो इन्कार कियोरोए तैसेरो नितीजो ई भोव कि तैनेई यीशु पुड़ विश्वास केरनो शारो। **20** तैन्ने मां हुमिनयुस ते सिकन्दरे, जैना मीं शैतानेरी शेक्ति मां देइतां तैन सज्जा दित्तोरीए, एस सेइं तैना इन शिखेले कि परमेशरेरी तुहीन केरनि बंद केरन।

2 हुनी अवं सेब्भन करां बेद्धतां इन ज़ोताई, कि बिनती, ते प्रार्थनां, ते दरखुवासां, सेब्भी मैन्हु केरे लेइ की गान। **2** राजां ते सेब्भी उच्चे पदे बालां केरा लेइ प्रार्थना केरा, ताके तैना असन सुखे ते बगैर खतरे सेइं ज़ीने देन ते अस परमेशरेरी आराधना केरि बटतम ते होरि लोकन सेइं रोड़ो बर्ताव केरि बटम। **3** इन इशो मुक्ति देनेबाले परमेशरे रोड़ु लगते ते पसंद एइते। **4** तै इन चाते, कि सेब्भी मैनन् मुक्ति मैल्ले; ते तैना सञ्चेरे ज्ञाने ज्ञानन। **5** किजोकि सिर्फ अकके परमेशरे, ते अक मैन्हु आए जै परमेशर ते लोकां केरो बिचवाई कराने बालो, ते तै मैन्हु यीशु मसीह आए। **6** सेब्भी लोकन पाप ते मौतरी शेक्ति करां छुटकारो देनेरे लेइ मसीहे अपनो आप बलिदान कियो। तैसेरे

मौतरे ज़िरिये परमेशरे ठीक वक्ते पुड़ सबूत दिन्तु कि तै सेब्भी लोकन बचानो चाते। 7 ई वजा आए, परमेशरे अवं खुशखबरी प्रचार केरनेबालो ते प्रेरित भोनेरे लेइ चुनो। तैने अवं गैर कौमन विश्वासेरो सच्चो सन्देश शिखालनेरे लेइ चुनो। अवं झूठ नई लोरो ज़ोने बलके सच्च ज़ोने लोरोई। 8 अवं चाताई, कि हर ठैरी सभान मां मढ़द परमेशरेरे लेइ समर्पित हथ खड़ केरतां बगैर सरकां ते बगैर बेंसी सेइं प्रार्थना केरन। 9 तेन्हरे मसीही कुआन्शां भी इज़्जतदार लिगड़ां लेइतां, ते अपनो आप रोड़ेचारे सज़ेइतां, न कि अलग-अलग किसमे सेइं दोग बनाने, ते सोन्ने, ते मोती, ते कीमती लिगड़न सेइं। 10 बलके इसेरे बदले तैनई होरि केरे लेइ रोड़ां कम्मां केरतां अपनो आप खूबसूत लोड़ बनावरो, किजोकि परमेशरेरी भक्ति केरनेबैली कुआन्शन इन शोभा देते। 11 ज़ैखन होरे लोक विश्वासी लोकन शिखालन त सेब्भी कुआन्शोई चुपचाप ते आदरी सेइं शुन्तां शिखोरु लोड़े। 12 अवं अज़ाज़त न देई कि कुआन्शां मढ़दन शिखालन ते तैन पुड़ अधिकार रखन। ज़ैखन तुस आराधना केरनेरे लेइ अकोटु भोथ त कुआन्शोई चुप लोड़े रावरु। 13 अवं इन एल्हेरेलेइ ज़ोताई किजोकि परमेशरे पेइलो आदम बनाव, तैसेरे पत्ती हव्वा बनाई। 14 होरि वजा ई आए कि कुआन्शां सप्पे करां धोखो खाव न कि आदमे, एन्हरां हव्वा परमेशरेरो हुक्म टलोड़ो। 15 फिरी भी कुआन्श बच्चे ज़रमने सेइं परमेशरेरे करां मुक्ति हासिल केरेली, अगर मसीह पुड़ लगातार विश्वास केरती राए, ते होरि लोकन सेइं प्यार केरती राए, ते शुद्ध त कने रोड़े तरीके सेइं बर्ताव केरे।

3 ई गल सच्चे, कि ज़ै कलीसियाई मां अगवो भोनो चाते, तै आदरारे पदेरी इच्छा रखते। 2 ते इन ज़रूरीए कि अगवो बेइलज़ाम भोए, ते तैसेरी अक कुआन्शा लोड़े, ते तै अपने आपे पुड़ कैबू केरनेबालो, समझदैरी सेइं ज़ीनेबालो भोए, इज़्जतदार भोए, ते ट्लाहना केरि आदर केरनेरे लेइ तियार रानेबालो भोए, ते होरि लोकन परमेशरेरो सन्देश रोड़े चारे शिखालनेरे काबल भोए। 3 तै शराबी या मार-पीट केरनेबालो न लोड़े, बल्के दया केरनेबालो लोड़े, ते लड़ाई न केरनेबालो लोड़े ते पेइंसां केरे लालची न भोए। 4 तै अपने घररो रोड़े चारे चलानेबालो ते बन्दो बसत केरनेबालो लोड़े, ते तैनी अपने बच्चन शिखालोरु लोड़े कि तैना हर गल्ली मां इज़्जती सेइं तैसेरी मनन। 5 ज़ैखन अगर कोई अपने घररो बन्दो बसत केरनो न ज़ानतो भोए, तै

परमेश्वरेरी कलीसियारी हेरगेश केन्चरे केरेलो? ६ तै नंबो विश्वासी न लोड़े,
एरु न भोए अभिमान केरे ते तैस शैतानेरी ज़ेरि तैस सज्ञा मैल्ले। ७ ते ज़ैना
लोक विश्वासी नई तैनेई भी तैसेरे बारे मां इन ज़ोरु लोड़े कि ए रोड़ो मैन्हु
आए। ताके एरु न भोए कि तै घटिया भोए ते शैतानेरे ज़ाले मां फंसे। ८ तेन्हरे
सेवक भी तेरहे लोड़न ज़ैन केरि लोक आदर केरन। ईमानदार लोड़न, ते पीने
बाले न भोन, ते ऐरे मैन्हु न भोन ज़ैना पेइंसां केरे लेइ किछ भी केरि बटतन।
९ पन तैन केरे ज़मीर साफ लोड़न ते ज़ै शिक्षा परमेश्वरे बांटी कियोरीए, तैस
पुड़ लगातार विश्वास केरनेबाले लोड़न। १० ज़ैखन कलीसियारे सेवक चुने
गान त पेइलू तैन केरु चालचलन परखू गाए, कि तैन मां रोड़े गुण आन, ते
केन्ची तैन मां कोई गलती न लेइहोए, त फिरी सेवकेरु कम केरन। ११ एन्हरे
कलीसियाई मां सेवा केरनेबालां केरि कुआन्शां भी आदरारे काबल भोन,
होरन बदनाम केरनेबैली न लोड़न, पन शांत सुभावे बैली, ते सेब्भी गल्लन मां
ईमानदार भोन। १२ कलीसियारो सेवक अपने कुआन्शरे लेइ वफादार लोड़े,
ते बच्चां ते अपने घरेरे सारे लोकां केरो रोड़ो चारे हेरगेश केरनेबालो लोड़े। १३
किजोकि ज़ैना सेवकेरु कम रोड़े चारे केरतन, तैना लोकां केरि नज़री मां
इज़ज़तदार भोतन। ते तैना अपने तैस विश्वासेरे बारे मां ज़ै यीशु मसीहे पुड़े बड़े
दिलेरी सेइं ज़ोतन। १४ अवं तीं कां जल्दी एजनेरी उमीद रखने पुड़ भी इना
गल्लां एल्हेरेलेइ लिखताई। १५ अगर मीं एजने मां चिर लगे, त तू ज़ानस,
कि लोकेई परमेश्वरेरे टब्बरेरे होरि लोकन सेइं केन्हरे बर्ताव कियोरो लोड़े।
इन टब्बर तैना लोकन सेइं बनोरु, ज़ैना यीशु पुड़ विश्वास केरतन ते ज़ीते
परमेश्वरेरे कलीसियारेन। इना विश्वासी सच्ची शिक्षाई मज़बूती सेइं मन्तन
ते सम्भालतन ज़ेन्हरे बुनीयाद ते खम्मबे इमारती सम्भालतन ते मज़बूत
केरते। १६ ते इस मां शक नई, अस पूरे याकीन सेइं ज़ोई बटतम, ज़ैना शिक्षां
परमेश्वरे बैंदी की एना बिलकुल सच्ची आन, मतलब, मसीह मैनेरे रूपे मां
बांदो भोव, पवित्र आत्मा तै हर कम्मे मां धर्मी ठहराव, स्वर्गदूतेई तै लाव,
लोकेई तैसेरे बारे मां कौमन मां प्रचार कियो, सारे दुनियाई मरां लोकेई तैस
पुड़ विश्वास कियो, परमेश्वरे तै उबरे स्वर्गे जो नीयो।

४ पन पवित्र आत्मा साफ ज़ोते, कि आखरी वक्ते मां किछ लोक मसीही
शिक्षाई पुड़ विश्वास केरनो बन्द केरेलो। तैना दुष्ट आत्मान कबूल केरेले, तैना

तैन बुरी बत्ती चलैली, त कने तैना लोक दुष्ट आत्मां केरि झूठी शिक्षाई पुड़ विश्वास केरेले। २ इन तैना झूठे पाखंडी लोक आन, ज़ैना इन झूठी शिक्षान शिखालतन, तैन केरो ज़मीर ज़ै रोड़े ते बुरे मां फैसलो केरते मरो आए ते ज़ेन्चरे तात्ते लोंहे सेइं तै फुकोरोए। ३ एरे लोक इन शिखालतन कि डला नई बनानो ते खानेरी किछ चीज़ां न लोड़न खेवरी, पन परमेशरे इन खानेरी चीज़ां विश्वासी लोकां केरे खानेरे लेइ बनोरिन ज़ैना सच्ची शिक्षा ज्ञानतन कि प्रार्थना केरतां खावरू लोड़े। ४ किजोकि परमेशरेरी बनेवरी हर चीज़ रोड़ीए। अस परमेशरेरु शुक्र केरतां सब किछ खेइ बटतम। ५ किजोकि परमेशरेरे वचने, ते प्रार्थनाई सेइं शुद्ध भोते। ६ अगर तू ढलान ते बेइनन लगातार इन्ना गल्लां याद करातो रालो, ज़ैन केरि हदायत मीं तीं दित्तोरीए त कने विश्वासेरे सन्देशो ते तैस रोड़ी शिक्षाई सेइं ज़ैस मां तू मज़बूत बनावरोस ज़ै तू मन्तो ओरोस। त तू यीशु मसीहेरो रोड़ो सेवक भोलो। ७ पन बनेवरी कहैनी ते बेकार कहैनी केरे वजाई सेइं वक्त बरबाद न केर ज़ैन सेइं परमेशरेरी आदर न भोए। पन तू लगातार परमेशरेरी आदर केरनेबाली ज़िन्दगी ज़ीनी शिखाल। ८ किजोकि जिसमानी वर्जिशी सेइं जानी फैइदो भोते, पन भेक्तरे लेइ तियारी बड़ी रोड़ीए किजोकि इस वक्तेरी ते एजनेबाले वक्तेरी ज़िन्दगरो फैइदो इस्से मां आए ज़ेसेरो वादो परमेशरे कियोरोए। ९ ते ई गल सच, ते हर तरीके सेइं मन्नेरे काबल। १० किजोकि अस मेहनत ते कोशिश एल्हेरेलेइ केरतम, किजोकि इश्शी उमीद तैस ज़ीते परमेशरे पुड़े। ज़ै सेब्बी लोकां केरो, ते खास केरतां विश्वास केरनेबालन मुक्ति देनेबालोए। ११ विश्वासी लोकन इना गल्लां शिखाल ते तैन ई हुक्म दे कि तैना इन मनन। १२ तू एन्चरे बर्ताव केर कि कोई भी तेरी अनादर न केरे किजोकि तू जवान आस। पन तू विश्वासी लोकां केरे लेइ इन सैरी गल्लन मां अक मिसाल बन, गलबाती मां, होरन सेइं बर्ताव केरने मां, ते होरन सेइं प्यार केरने मां, ते यीशु मसीह पुड़ विश्वास केरने मां, ते बेइलज़ाम ज़िन्दगी ज़ीने मां ताके लोक भी एन्चरां केरन। १३ ज़ांतगर अवं न एज्जी, तांतगर ज़ैखन विश्वासी लोक अकोटे भोतन ज़ोरे सेइं पढ़ने मां, ते तैन केरो होसलो बद्धा ते पवित्रशास्त्रेरो मतलब शिखाल। १४ इस गल्ली याद रख ज़ैखन बुजुर्गा केरे एककी टोलां तीं पुड़ हथ रखोरे थिये, परमेशरे तैन अक सन्देश दित्तो कि तैस वरदानेरे बरे मां जोन जै तैने तीं दित्तोरी। तैस वरदानेरे

नज़र अनदाज़ न केर। 15 तैन गल्लन सोचतो रा, ते तैन मां अपनू ध्यान
लेइतां रख, एन्चरे हर कोई हेरी बटेलो कि तू विश्वासे मां बद्धने लोरोस। 16
इस गल्लरु ध्यान रख कि तू केन्चरे जीतस ते केन्चरे शिखालतस। इसेरो
नितीजो ई भोलो कि परमेशरे इन्साफे मां तेरे ज़िरिये तीं ते तेरे शुन्नेबालन
बच्चालो।

5 बुढे मैन्हु न डिङ्क पन तैस एन्चरे आदरी सेइं सल्लाह दे ज़ेन्चरे अपने
बाजी, एप्पू करां निकडे मैन्हु एन्चरे सल्लाह दे ज़ेन्चरे अपने निकडे ढ्लाए। 2
बुढी कुआन्शन सेइं एन्चरे बर्ताव केर ज़ेन्चरे अम्मा सेइं, ते जवान कुआन्शन
सेइं एन्चरे बर्ताव केर ज़ेन्चरे अपने बेइनी सेइं। इन साफ दिले सेइं केर। 3
तैन विधवां केरि आदर केरा, ज़ैन केरो कोई हेरगोश केरनेबालो नई तैन केरु
ध्यान रख्खा। 4 ते अगर कोन्वी विधवारां मट्ठां या पोटलडां या थियोडां
भोन, ते तैन पेइलू अपने घरेरे लोकां केरु ध्यान रेखतां परमेशरेरी भक्ति
केरनि शिखोरी लोडे। ते तैना एन केरतां अपने अम्मा-बाजी ते दादा देदी केरु
हक देन, किजोकि इन परमेशरे पसंद एइते। 5 ज़ै विधवा आए ते तैसेरो
ध्यान रखनेबालो कोई नई, तै परमेशरे पुढ उमीद रखतीए, ते रात दिहैडी
बिनती ते प्रार्थनाई मां परमेशरे करां मद्दत मगतीए। 6 पन ज़ैना विधवां अपनो
सारो वक्त एशो मां बितैतिन तैना जिसमानी रूपे सेइं त ज़ीतिन पन आत्मिक
रूपे सेइं मेर्रिन। 7 इन गल्लां केरो भी हुक्म दे कि तैना बेइलज़ाम रान। 8
पन अगर कोई अपने रिशतेदारां केरि ते खास केरतां अपने घरानेरु ध्यान
न रख्खे, ते तै विश्वासे करां मुकरोरोए, ते ज़ै विश्वास न केरे तैस करां बुरो
बनोरोए। 9 तैस्से विधवारू नवे लिखू गाए, ज़ै शठ सालन करां घट न भोए,
ते अपने मुन्शो सेइं वफादार रावरी भोए। 10 ते होरे लोक तैसेरे बारे मां ज्ञानते
भोन कि तैसां हमेशा रोडां कम्मां कियोरन। ज़ेन्चरे कि, तैसां बच्चे रोडे चारे
पाले, ते तैना विश्वासी लोक अपने घरे मां आने, ज़ैना सफरे मां थिये, ज़ेन्चरे
होरि लोकां केरि सेवा कियोरी भोए, ते तैन लोकां केरि मद्दत कियोरी भोए
ज़ैना मुसीबती मां थिये, ते ज़ैसां हर किसमेरां रोडां कम्मां कियोरां भोन। 11
पन जवान विधवां केरां नंवां न लिख, किजोकि ज़ैखन तैन केरि जिसमानी
इच्छा तैस वादे करां शेक्ति बाली भोती, ज़ै तैनेई विधवा रेइतां मसीहेरी सेवा
केरनेरे लेइ कियोरोए, त तैना ड्ला बनानो चैतिन। 12 दुबारां ड्ला केरतां तैना

दोषी भोतिन, किजोकि तैनेई अपनो पेइलो वादो बरकरार नई रखोरो। 13
 एन्हरे तैना घरे-घरे फिरतां आलसी भोनू शिखतिन, ते सिर्फ आलसी नई, पन
 होरि केरे खलाफ गल्लां केरतिन, ते होरि केरे कम्मन मां दखल देतिन, ते तैना
 गल्लां ज़ोतिन ज़ैना न लोड़न ज़ोरी। 14 एल्हेरेलोइ अवं इन चाताई, कि जवान
 विधवां इला बनान; ते तैन बच्चे भोन ते घरबार सुमालन, ते दुश्मन्न बदनाम
 केरनेरो मौको न देन। 15 किजोकि किछ जवान विधवां कुआन्शोई परमेशरे
 करां दूर भोइतां शैताने पत्ती चलनू शुरू कियोरु। 16 अगर कोन्ची विश्वास
 केरनेबालेरी टब्बरे मां विधवां भोन, त तैए तैन केरि मद्दत केरे न तैन केरि
 ज़िमेवारी कलीसियाई पुड़ भोए। 17 ज़ै बुजुर्ग रोड़े चारे कम केरते तै आदर हासिल
 केरनेरे ते बराबर तनखाएरे काबले, खास केरतां तैना ज़ैना परमेशरेरु वचन
 शुनाने, ते शिखालने मां बड़ी मेहनत केरतन। 18 किजोकि पवित्रशास्त्र मां
 इन लिखोरुए, “कि तू जोट्लोरे दांतेरु आशी न बेन्धाँ,” किजोकि, “मज़दूर
 अपने मज़दूरारो हकदारे।” 19 कोई दोष कोन्ची बुजुर्ग लव गाए, त ज़ांतगर
 दूर्य या जादे लोक न ज़ोन कि असेई ए पाप केरतो लाकरोए, तांतगर न शुन।
 20 ज़ैना लोक पाप केरतन तैन सेब्भी विश्वासी लोकां केरे सामने ड्विड़क,
 ताके होरे विश्वासी लोक भी डरन। 21 परमेशर ते मसीह यीशु, ते चुनोरे
 स्वर्गदूत हाज़र सेमझतां अवं तीं हादयत देताई, ध्यान राए कि तू केन्चेरो
 इन्साफ जल्दी न केरस, ते कोन्चेरी तरफदारी न केर। 22 कलीसियारो बुजुर्ग
 चुनोरे बारे मां जल्दी कधे नई केरनि। ते होरि केरे पापन मां शामिल न भो,
 अपनो आप पवित्र बनोरो रख। 23 अग्रोवं जो पानी न पी, पन अपने पेटेरे ते
 अपने बार-बार बिमार भोनेरे लेइ थोड़ो-थोड़ो दाढ़ारो रस भी कम्मे मां आन।
 24 अवं ज़ोताई कि जल्दी बुजुर्ग नई चुन्ने, किजोकि किछ लोक खुले आम
 पाप केरतन, इन्साफे करां पेइले भी तैना विश्वासी लोकां केरे सामने दोषी
 आन। हांलाकि होरि लोकां केरे पाप बांदे न भोन पन बादे मां पिशाने गातन।
 25 एन्हरे ज़ैखन लोक रोड़ां कम्मां केरतन, त तैन होरि विश्वासी केरे ज़िरिये
 हेरु गाते। अगर तैना तैन एककी बारे साफ चारे लेई बटन, आखर तैना तैन
 पिशानेले।

6 जैना विश्वासी लोक गुलाम आन, तैनेई हर तरीके सेइं अपने मालिकां केरि
आदर कियोरी लोडे ताके होरे लोक परमेश्वरी ते इश्शो शिक्षारी तुहीन न
केरन। 2 ते जैना मालिक विश्वासी भोन, त तैन केरु मसीह पुड़ विश्वास
केरनेरे वजाई सेइं तैन केरि बराबर इज्जत की गाए, बल्के तैन केरे लेइ होरु
भी जादे कम कियोरु लोडे। किजोकि इस सेइं फैइदो नेनेबाले विश्वासी आन
ते तैना गुलाम तैन सेइं प्यार केरतन, इन गल्लां केरि शिक्षा दे ते इन होसलो
दे कि तैना इन सब केरन। 3 किछ लोक इश्शो शिक्षारी खलाफत केरि
बटन, पन इना यीशु मसीहरी रोड़ी शिक्षां आन। इना शिक्षां भेक्तरी जिन्दगी
बद्धेतिन। 4 जै कोई अलग शिखालते तै अभिमानी ते तै किछ न समझो। एरे
ज़ेरे मैन्हु गैर ज़रुरी मुद्दां ते लफसां केरो मतलब ज़ान्नेरे लेइ होरन सेइं बेंस ते
तर्क केरतन। जैन केरो नितीजो जलन, ते लड़ाई ते तुहीनरी गल्लां, ते बुरी-
बुरी शक, 5 ते मैनन् मां बैफैइदी लड़ैई पैदा भोतिन, ते जैन केरे मन बुरे
शक्की सेइं भेरोरेन, ते तैना लगातार होरन सेइं बेंस केरतन, ते तैना सेझी न
बटथ कि सङ्घ कुने, तैना समझतन परमेश्वरे बारे मां शिक्षा देनी कमाई
केरनेरो जिरियोए। 6 पन इश्रो इन लेइ इन रोड़ु कि अस तैन केरम जैस सेइं
परमेश्वर खुश भोए ते जैन परमेश्वर असन देते तैस सेइं अस राजी भोम। 7 ते
न असेई दुनियाई मां किछ आनोरु, ते न किछ नेही बटम। 8 ते अगर असन
कां किछ खाने पीने ते लाने जो भोए, ते इस्से मां खुश रहम। 9 पन जै धनी
भोनो चाए, तैना इन सब पाप केरतां बडे आसान तरीके सेइं धोखो खातन,
ज़ेन्वरे जानवर ज़ाले मां फसतन तेन्वरे तैना फसतन। तैना इन केरनू चातन
जैन तैन केरे लेइ बेवकूफी ते खतरोए, ते एरी इच्छां तैन बरबाद ते नाश
केरनेरे पासे नेतिन। 10 किजोकि पेइंसां केरु लालच सेब्बी किसमेरे बुरैइअरु
वजाए, किछ लोकेई बले-बले मसीह पुड़ विश्वास केरनो शारो किजोकि तैना
धनी भोनू चाते थिये, ते तैनेई तैस मैनेरो ज़ेरो बडे तरीकन सेइं दुःख झैल्लो जै
अपने आपे कोन्ची हथियारे सेइं ज़खमी केरते। 11 पन हे तीमुथियुस, तू
परमेश्वरो मैनूस, तीं इन गल्लां न लोडन कियोरी, सिर्फ जैन ठीके तैन केरनेरे
लेइ हर किसमे सेइं कोशिश केर। एरी जिन्दगी जी जैस सेइं परमेश्वरी आदर
भोती, मसीह पुड़ भरोसो केर, होरि लोकन सेइं प्यार केर, मुश्किल वक्ते मां
हिमत रख, ते होरि लोकन सेइं नेरमी सेइं बर्ताव केर। 12 ज़ेन्वरे अक रोड़ो

सिपाई जंगी मां लड़ैई मां हार न मन्ने, तेन्हरे तू भी परमेशरे पुड़ भरोसो रखने
मां ते तैसेरी गल मन्ने मां हार न मन्न। ते तैस हमेशारी जिन्दगी मज़बूती सेइं
ठेमतां रख, ज़ेसेरे लेइ तू परमेशरे कुजावरोस, ते ज़ेसेरे बारे मां तीं बड़े लोकां
केरे सामने दिलेरी सेइं ज़ोरु थियूं कि तू मसीह पुड़ विश्वास केरतस। (aiōnios

g166) 13 अवं तीं परमेशरे सामने ज़ै सेब्भन जिन्दगी देते, ते मसीह यीशुएरे

सामने ज़ोताई, ज़ैने पुनियुस पिलातुसेरे सामने रोड़ी गवाही दित्ती, ई हुक्म
देताई। 14 ज़ैन किछ परमेशरे तीं केरनेरे लेइ हुक्म दित्तोरो तैन सब किछ पूरु

केर, ताके यीशु मसीह ज़ांतगर वापस न एज्जे तीं पुड़ कोई दोष न लेई बटे तू
कुन गलत केरने लोरोस। 15 सिर्फ परमेशर तै राज्ञोए ज़ै बड़यैयरे काबले, तै

महान राज्ञो ते महान प्रभुए, तैए मसीहे सही वक्ते पुड़ बांदो केरेलो। 16 सिर्फ

तैए हमेशा ज़ींतो रहते, ते तै तैस महिमा बैली लोई मां रहते ज़ैस कां कोई न
एज्जी बटे। तैसेरी आदर ते शक्ति हमेशा राली। आमीन। (aiōnios g166) 17

इस दुनियारे दौलतमंदन हुक्म दे, कि तैना घमण्डी न भोन ते चंचल धने पुड़
उमीद न रखन, पन परमेशरे पुड़ ज़ै इश्शे सुखेरे लेइ बड़ु हछछू देते। (aiōn

g165) 18 ते तैन ज़ो कि तैना अपने पेइंसे रोड़े कम्मां केरे लेइ इस्तेमाल केरन
ते भलाई केरने मां दौलतमंद बनन ते हमेशा तियार रान होरन खुल्ले दिले सेइं

देनेरे लेइ ज़ो। 19 एन्हरे केरने सेइं तैना अपना रोड़ां कम्मां खजानेरे ज़ेरे जमा
केरेले, ज़ैना तैन केरे लेइ एजनेबाले वक्ते स्वर्गे मां मज़बूत मुनीयादरां ज़ेरां
भोलां। ते तैना तै सच्ची जिन्दगी हासिल केरेले ज़ै हमेशारे लेइ आए। 20 हे

तीमुथियुस इस गल्ली पुड़ ध्यान दे कि ज़ैन परमेशरे तीं केरनेरे लेइ दित्तोरुए
तैन्ने केर। दुष्ट ते बेकार गल्लन करां ते तैन शिक्षान करां बेंचता रा, ज़ैना

परमेशरी सच्ची शिक्षां केरि खलाफत केरतन, तैस तैना ज्ञान ज़ोतन पन तैन
गलते। 21 किछ लोकेई इन झूठु ज्ञान कबूल कियोरुए, एन्हरे केरनेरे सेइं

तैनेई मसीहेरे सच्ची शिक्षान पुड़ विश्वास केरनो शारो। परमेशरो अनुग्रह
तुसन सेब्भन पुड़ भोतो राए।

2 तीमुथियुस

1 अवं पौलुस ई चिट्ठी लिखने लोरोई। परमेशरे अवं यीशु मसीहेरो प्रेरित भोनेरे लेइ चुनो, ताके अवं इस सन्देशेरो प्रचार केरि कि परमेशरे यीशु मसीह पुड़ विश्वास केरनेरे ज़िरिये वादो कियो कि हमेशारी ज़िन्दगी देलो। 2 अवं ई चिट्ठी तीमुथियुसे लिखने लोरोई, जैन मेरे मठेरू ज़ेरूए, हे तीमुथियुस अवं प्रार्थना केरताई बाजी परमेशर ते इश्शे प्रभु यीशु मसीह तीं अनुग्रह ते दया ते शान्ति देतो राए। 3 ज़ैस परमेशरेरी सेवा अवं अपने दादे पड़दादां केरे रीति पुड़ शुद्ध ज़मीरे सेइं केरताई, तैसेरु शुक्र भोए, कि अवं एपनी प्रार्थनान मां तीं रात दिहैड़ी याद रखताई। 4 मीं यादे ज़ैखन अस अलग भोने लोरे थिये तैखन तू केन्चरे लेरां देने लोरो थियो, ते तीं सेइं मिलनेरी बड़ी इच्छा रखताई कि ज़ैखन मिली त अवं आनन्दे सेइं भरी गेइ। 5 ते अवं तेरे अम्मा यूनीके ते तेरी नानी लोइसेरो तै सज्जे विश्वास याद केरताई। तेरो विश्वास भी तेरहो आए, ते मीं याकिने तीं मां भी आए। 6 एल्हेरेलेइ अवं तीं याद कराताई, कि तू परमेशरेरे तैस वरदाने जैन मेरे हथ रखने सेइं तीं मैल्लोरु थियूं चमका। 7 किजोकि परमेशर अस डरपोक नई बनावरे बल्के तैसेरो आत्मा इश्शे दिलन मज़बूत केरते, ते मद्दत केरते कि अस होरि लोकन सेइं प्यार केरम ते ताके आपे कैबू मां रखम। 8 एल्हेरेलेइ होरि लोकन प्रभु यीशुएरे बारे मां ज़ोने करां शरमा ते एल्हेरेलेइ शरमा कि अवं प्रभुएरी सेवा केरनेरे लेइ कैदे मां आई। बल्के तू परमेशरेरे तैस शक्ति इस्तेमाल केर ते मीं सेइं साथी खुशखेबरारे लेइ दुःख झ़लने मां शामिल भो। 9 परमेशरे असन मुक्ति दित्ती, ते अस पवित्र ज़िन्दगी ज़ीनेरे लेइ कुजाए, तैने अस एल्हेरेलेइ नई कुजवरे कि असेई रोडां कम्मां कियां, किजोकि दुनिया बनाने करां पेइलो परमेशरेरो ई मकसद थियो कि तै यीशु मसीह इश्शे लेइ इस दुनिया मां भेजतां असन पुड़ अनुग्रह हिराए। (altonios g166) 10 पन हुनी इश्शे मुक्ति देनेबाले यीशु मसीह ओरोए ते तैनी अपनो अनुग्रह हिरावरोए। तैने मौतरी शक्ति नाश की, तैने असन खुशखेबरारे ज़िरिये हमेशारे ज़िन्दगारी बत हिराई। 11 इस खुशखेबरारे लेइ परमेशरे अवं प्रचारक ते प्रेरित ते शिक्षा देनेबालो चुनो। 12 एल्हेरेलेइ अवं कैदखाने मां दुःख भी झैल्लने लोरोई, पन शरमेई न, किजोकि अवं मसीहे ज़ानताई ज़ैस पुड़ मीं विश्वास कियोरोए, ते मीं याकिने, कि जैन मसीहे दितोरु ज़ान्तगर तै

वापस न एज्जे तांतगर तै तैसेरी रखवाली केरि बटते। 13 ज़ैना रोड़ी शिक्षां तीं मीं करां शुनोरिन तैन तू मिसालरे रूपे मां रख, इन तू विश्वासे ते प्यारे सेइं साथी केर, किजोकि तू मसीह यीशु सेइं साथी अक भोरोस। 14 ते तैस सच्चेरी रखवाली केर, ज़ैन पवित्र आत्मारे ज़िरिये सेइं तीं सोफेरू, ज़ै असन मां रहते। 15 तू ज्ञानतस, कि आसिया इलाकेरे बड़े विश्वासी लोक ज़ैनेई अवं शारोरोई, ज़ैन मां फूगिलुस ते हिरमुगिनेसे भी अवं शारो। 16 उनेसिफुरुसेरे घराने पुड़ प्रभु दया केरे, किजोकि तै बड़े बार मीं कां अव ते मीं होसलो दित्तो, ते मीं सेइं कैदखाने मां एजनेरे लेइ न शरमाव। 17 पन ज़ैखन तै रोम नगरे मां अव, त बड़े कोशिश सेइं तोप्तां मीं सेइं मुलाकात केरि। 18 प्रभु इन्साफेरे दिहाड़े अपनि महान दया उनेसिफुरुसे पुड़ हिराए। तू एप्पू रोड़े चारे ज्ञानतस कि इफिसुस नगरे मां तैनी मेरी केत्री मद्दत की।

2 एल्हेरेलेइ हे मेरे मट्ठां तीमुथियुस, तू अपने आपे मज़बूत केर इन ज़ैनतां कि परमेशरे तीं अनुग्रह दित्तोरो, ज़ै सिर्फ यीशु मसीह सेइं अक भोइतां मैलते। 2 तीं बड़े लोकां केरे सामने ज़ै मसीहेरे सन्देशी शिक्षा मीं करां शुनोरिन। एल्हेरेलेइ अवं चाताई कि तैए सन्देश तू होरि विश्वासी लोकन शिखाल, ज़ैना वफादार भोन ते होरन शिखालनेरे काबल भोन। 3 बिलकुल तेन्चरे ज़ेन्चरे अक सिपाही जंगरे मैदाने मुश्किल हालातन मां सबरी सेइं झैल्लते, तेन्चरे तू भी मुश्किल हालातन मां सबरी सेइं दुःख झैल्ल ज़ेन्चरे अस यीशु मसीहेरे लेइ झैल्लतम। 4 अक सिपाही ज़ैखन फोजी मां नौकरी केरते त तै होरि किसमेरू कम न केरे, किजोकि तै अपने भरती केरनेबाले खुश केरनू चाते। 5 फिरी आखाड़े मां घुल्लने बालो अगर कानूनेरे मुताबिक न घुल्ले त तैस ताज न मैल्ले। 6 ज़ै ज़मीनदार मेहनत केरते, फसलरे पेइले हिस्सेरो हकदार तैए भोते। 7 जैन अवं जोताई, तैस पुड़ ध्यान दे, ते प्रभु तीं सेब्बी गल्ला केरि समझ देलो। 8 लगातार याद रख कि यीशु मसीह कौने, तै दाऊदेरे खानदेनी मरां आए, ते परमेशरे तै मुड़दन मरां ज़ींतो कियो ते ईए खुशखबरी अवं लोकन शुनाताई। 9 अवं खुशखबरी शुनाताई एल्हेरेलेइ अवं मुजरामेरो ज़ेरो दुःख झैल्लताई, इडी तगर कि कैदे मां आई, पन कोई भी लोकन परमेशरे वचन प्रचार केरने करां न रोकी बटे। 10 एल्हेरेलेइ अवं तैन लोकां केरे फैइदेरे लेइ दुःख झैल्लताई ज़ैना परमेशरे चुनोरेन, ताके तैना भी यीशु मसीह पुड़

विश्वास केरतां मुक्ति हासिल केरन ते हमेशारी महिमा हासिल केरन। (aiōnios g166) 11 ई गल सच्चे, कि अगर अस तैस सेइं साथी मरे त तैस साथी जीते भी भोमेले। 12 अगर अस तैसेरे वजाई सेइं दुःख झैल्लते रहले, त तैस सेइं साथी राजां केरु ज़ेरु अस भी राज़ केरमेले, अगर अस तैसेरो इन्कार केरमेले कि अस तैस न जानम, त तै भी इश्शो इन्कार केरेलो। 13 अगर अस मसीह सेइं साथी वफादार न भोम, त तै फिरी भी वफादार बनोरो रालो, किजोकि तै अपने स्भावेरे खलाफ न गेइ बटे। 14 जैना गल्लां मीं तीं सेइं ज़ोरिन तैन तू अपने लोकन बिसरने न दे, ते प्रभुए गवाह रेखतां तैन खबरदार केर, कि लफसन पुड बेस न केरन, जैस सेइं किछ फैइदो न भोए, बल्के शुन्ने बालां केरो बड़ो नुकसान भोते। 15 बड़ी मेहनत केर ताके तू परमेशरेरे सामने कबूल भोनेरे काबल भोस, तू ऐरे मैनेरो ज़ेरो भोनेरी कोशिश केर जै अपने कम्मे सेइं वजाई सेइं शरमिनदा न भोए, ते जै सच्चो सन्देश ठीक तरीके सेइं शिखालतो भोए। 16 पन बेकार ते बेवकूफ गल्लन करां दूर राए, किजोकि एरी गल्लां परमेशरे करां दूर केरतिन। 17 ते तैन केरि गल्लां मैनेरे शड़ेरे ज़खेमेरी ज़ेरि फैलतां लोकां केरे विश्वासे नाश केरतिन। ते हुमिनयुस ते फिलेतुस तैन केरे ज़ेरे आन। 18 तैनेई सच्च पुड विश्वास केरनो बंद कियो। तैना ज़ोतन परमेशरे पेइले मर्रे विश्वासी लोक हमेशारे ज़िन्दगरे लेइ जीते कियोरेन। एसेरो नितीजो ई भोते कि किछ लोक मसीहेरी शिक्षाई पुड विश्वास केरनो बंद केरतन। 19 परमेशरेरे लोक पक्की मुनीयादरे ज़ेरे आन जै हिल्ले न। इस मुनीयादी पुड ऐरे लफस लिखोरेन: “प्रभु ज़ानते तैसेरे लोक कौन आन, ते इन भी कि जैना प्रभुएरी आराधना केरतन तैनेई बुरां कम्मां केरनां बंद कियोरां लोड़न।” 20 एककी अमीर घरे मां किछ सोन्नेरे ते चैदां भांडां भोतन ते लेकड़ारां ते मितरां भोतन। माधां भांडां खास मौके पुड इस्तेमाल केरनेरे लेइ भोतन ते सस्तां रोज़ इस्तेमाल केरनेरे लेइ भोतन। 21 तेन्चरे विश्वासी लोक जैना अपनो आप एन सैरी बुरी चीज़न करां अलग केरे त तै कीमती भांडेरो ज़ेरो भोलो जैन खास मौके पुड इस्तेमाल कियूं गाते, ज़ेसेरी ज़िन्दगी पवित्र भोली त तै अपने मालिकेरे इस्तेमाल भोनेरे काबल भोलो। 22 जवैनरी खुवैइशन करां दूर रा, ते जैना मैन्हु शुद्ध मने सेइं प्रभुएरु नवं धिन्तन, तैन सेइं साथी धार्मिकता, प्यार, ते मेल मलापेरो पीछो केर। 23 अवं फिरी जोताई तू अपनो आप बेवकूफी,

ते बैफैइटी गल्लन करां दूर रा, किजोकि तू ज्ञानतस, कि तैन सेइं लडाई भोतिन। 24 ते परमेश्वरो दास लडाको न लोडे, पन सेब्भन दया केरनेबालो ते परमेश्वरे वचनेरी रोडे चारे शिक्षा देनेबालो, ते ज़ैना लोक तैसेरे खलाफ भोन तैन सेइं सबर केरनेबालो लोडे। 25 ते ज़ैना लोक तैसेरी खलाफत केरन तैन बडे नेरमी सेइं शिखालेनेबालो लोडे, भोइ सकते परमेश्वर तैन लोकां केरि मद्दत केरे कि तैना मन फिरान, ते मसीहेरी सच्चाई पिशानन 26 ते एरे लोक दुबारां फिरी साफ तरीके सेइं सोचनेरे काबल भोले ते शैतानेरे धोखे करां जै ज्ञालेरे ज़ेरोए बच्चेले। शैताने तैना फासवरे थिये कि ज़ैन तै चाते तैना तैन करां कराए।

3 ध्यान दे अवं हुन्ना कुन ज्ञोने लोरोई, कि दुनियारे आखरी दिहाड़न मां बुरा वक्त एजनोए। 2 किजोकि लोक सिर्फ अपने आपे सेइं प्यार केरेल, दौलतरे लालची, बड़कां मारनेबाले, अभिमानी, होरन बेइज्ज केरनेबाले, अम्मा-बैपू केरु ज़ोनू न शुन्ने बाले, होरि केरु शुक्र न केरनेबाले, अपवित्र, 3 होरन सेइं प्यार न केरनेबाले, माफ न केरनेबाले, दोष लाने बाले, अपनि इच्छान पुड कैबू न केरनेबाले, सखत, सच्चे सेइं नफरत केरनेबाले। 4 धोखो देनेबाले, ढीठ, ते अभिमानी ते परमेश्वरे नई बल्के एशेरे चानेबाले भोले 5 तैना भेक्तरु रूप त बनाले पन तैस शेक्ति न मन्नेले जै तैन भक्त बनाथी, एरे ज़ेरे लोकन सेइं संगती न रेखां। 6 एन्ने मां तैना लोकन, ज़ैना लोकां केरे घरन मां गेहतां बेवकूफ कुआन्शन अपने वरो मां केरतन, ज़ैन केरे मन पापे सेइं देबोइतां हर किसमेरी खुवैइशन मां आन। 7 ते हमेशा नव्वी-नव्वी गल्लां त शिखती रैतिन, पन तैना मसीहेरी सच्ची शिक्षाई कधे न सेमझी बटन। 8 इना झूठे उस्ताद मसीहेरे सच्चे सन्देशेरे खलाफत केरतन ज़ेन्चरे यन्नेस ते यम्ब्रेस मूसेरी खलाफत कियोरी थी। तैन केरे मन बुरेन ते तैन केरो मसीह पुड विश्वास सच्चो नई। 9 तैन केरि कामयाबी सिर्फ थोडे वक्तेरीए, किजोकि ज़ेन्चरे लोकेई यन्नेस ते यम्ब्रेस पिशानेरे थिये कि तैना बेवकूफन। तेन्चरे हर कोई इन भी पिशानेलो कि इना भी बेवकूफन। 10 पन हे तीमुथियुस तू एप्प रोडे चारे ज्ञान कि अवं शिखालताई, ते अवं केन्चरे ज़ीताई, ते मेरो कुन मकसदे, ते अवं कुन विश्वास केरताई। तू ज्ञानतस अवं सबर केरतो ओरोई ते सेब्भी किसमेरे लोकन सेइं प्यार केरतो ओरोई, मर्म मुसीबतां झैल्ली ते

लोकेई अवं स्तव कि मीं बड़ो दुःख भोए, 11 तू तैन भयानक गल्लां केरे बारे
मां ज्ञानतस ज़ैना लोकेई मीं सेइं अन्ताकिया ते इकुनियुम ते लुस्त्रा नगरन मां
की, ते मीं तैड़ी केरो स्तव झैल्लो। पन प्रभुए अवं तैन सेभन मरां छुटव। 12
ज़ै कोई तैन केरनू चाते जैस सेइं परमेशरे खुश भोते ते यीशु मसीह पुड
विश्वास केरते तै स्तव गानोए। 13 पन दुष्ट लोक ते तैना धोखो देनेबाले होरि
भी बुरी चीजां केरेले। तैना लोकन धोखो देले ते एप्पू भी होरन करां धोखो
खाले। 14 पन ज़ैन तीं असन करां शिखोरुए तैस पुड लगातार विश्वास केर,
ते तीं पूरू याकीन किजोकि तू असन ज्ञानतस ते असन पुड भरोसो केरि
बटस ज़ैनेई तीं इना सैरी गल्लां शिखैली। 15 ते बचपनेरो तू पवित्रशास्त्रेरो
ज़ान्ने बालोस, ज़ैन तेरी इन समझानेरे लेइ मद्दत केरते, कि ज़ैखन तू यीशु
मसीह पुड विश्वास केरतस परमेशर तीं मुक्ति देते। 16 सारू पवित्रशास्त्र
परमेशरेरे अगवैई सेइं लिखोरु, ते इन लोकन शिखालने लेइ मद्दतगारे, तैन
ज़ोनेरे लेइ कि ज़ैन तैनेई कियूं तैन गलते, तैन केरि गेलती सुधारनेरे लेइ, ते
तैन केरनेरे लेइ शिखालनेरे लेइ ज़ैन सही आए। 17 ताके परमेशरेरो मैन्हु हर
किसमेरां रोड़ां कम्मां केरनेरे लेइ तियार भोए।

4 ज़ैखन मसीह यीशु राजेरो ज़ेरो राज केरने एज्जेलो त तै ज़ींते ते ज़ैना
मरेन, लोकां केरो इन्साफ केरेलो, अवं तीं परमेशरे ते मसीहे गवाह रेखतां
हुक्म देताई। 2 कि तू परमेशरेरु वचन प्रचार केर, वक्त बे वक्ते तियार रा, तू
लोकन ज़ैना बुरां कम्मां तैनेई कियां हिरा, तैन केरे पापां केरे लेइ तैन झिङ्क
पन तैन होसलो भी दे ते तैन सबरी सेइं शिखाल। 3 किजोकि एरो वक्त
एजनोए, कि लोक रोड़ी शिक्षा न शुन्नी चाले, पन तैना अपने मेर्जी पुड चलनू
चाले ते तैना अपने लेइ बड़े उस्ताद तोप्पेरे ज़ैना तैन सेइं तैन ज़ोन ज़ैन तैना
शुन्न चातन। 4 तैना तैन करां शुन्नू न चाले ज़ैना परमेशरेरु सञ्चू वचन
शुनातन पन तैना झूठी कहैनी शुन्नी चाले (ज़ैना मैन्हु केरि बनेवरिन)। 5 पन
तू अपनो आप कैबू मां रख चाए किछ भी की न भोए, इस मां तीं ज़ैना भी
दुःख भी झैल्लने पेन त झ़ाल, खुशखबरी शुनानेरे लेइ बड़ी प्रचार केर, ते ज़ैन
कम परमेशरे तीं केरनेरे लेइ दितोरु तैन पूरे केर। 6 अवं इना हुक्म तीं देताई
किजोकि मेरी ज़िन्दगी ते परमेशरेरे लेइ कम खतम भोवरुए किजोकि अवं
ज्ञानताई अवं जल्दी मरेलो। 7 मीं जंगी मां रोड़ो सिपेहोरे ज़ेरे ज़ै लड़ाई केरने

मां कथी हार न मन्ने, तू भी मसीहेरे लेइ बड़ी मेहनत केरनि कथे हिम्मत न हार, मीं तैन कम पूरु कियूं ज़ैन मसीह यीशुए मीं केरनेरे लेइ दितोरु थियूं मीं वफादैरी सेइं खुशखबरी प्रचार की। ४ हुनी, प्रभुएरे मेरे लेइ स्वर्गे मां इनाम रखेरु किजोकि मीं तैस खुश केरनेबाली ज़िन्दगी ज़ीयोरीए। प्रभु ज़ै धर्मी इन्साफ केरनेबालोए मीं इन इनाम तेइस देलो ज़ेइस तै वापस इन्साफ केरनेरे लेइ एज्जेलो। पन इन इनाम सिर्फ मेरे लेइ नई, पन तैन सेब्भी केरे लेइ भी आए, जैना तैसेरे एजनेरी बड़ी इच्छा रखतन। ९ मीं कां जल्दी एजनेरी कोशिश केर। १० किजोकि देमासे इस दुनियारी चीज़न सेइं प्यार केरतां अवं शारो, ते तै थिस्सलुनीके नगरे जो च्छलो जेव, ते क्रेसकेंस गलातिया इलाके जो जेव ते तीतुस दलमतिया इलाके जो च्छलो जेव। (aiōn g165) ११ सिर्फ लूका मीं सेइं साथीए, जैखन तू एजस त मरकुसे भी एप्पू सेइं साथी एना, किजोकि तै इड़ी मेरे मद्दत केरनेरे काबले। १२ तुखिकुस मीं इफिसुस नगरे जो भेज़ोरोए। १३ जैखन तू एजस त तै चोगो एना ज़ै मीं त्रोआस नगरे मां मरकुसेरे घरे रख्खोरोए। ते मेरे चर्मपत्र भी एना, खास केरतां तै जै छेल्ली केरे खेड़ू सेइं बनोरोए। १४ सिकन्दर ताम्बेरु कम केरनेबाले मीं बड़े बारे दुःख दित्तोरोए, प्रभु तैस तैसेरे बुरे कम्मां केरे मुताबिक बदलो देलो। १५ तू भी तैस करां खबरदार रा, किजोकि तैने इश्शे शिक्षारी बड़ी खलाफत की जै मसीहेरे बारे मां आए। १६ जैखन पेइले बार अवं आदालती मां अपनो आप बचाव केरनेरे लेइ जोरो थियो त कोई भी मीं सेइं साथी न थियो। पन तैना सारे मीं शैरतां च्छले जे, परमेश्वर इन तैन केरे खलाफ न गने। अवं प्रार्थना केरताईं परमेश्वर तैन हछु माफ केरे। १७ पन प्रभु मेरो मद्दतगार राव, तैने मीं हिम्मत दित्ती, ते अवं यीशु मसीहेरी खुशखबरी शुनानेरे काबल भोव कि सारे गैर कौमां केरे लोक शुन्न, ते तैने अवं मौती करां एन्चरे बचाव ज़ेन्चरे शेरे करां। १८ ते प्रभु मीं हर एककी बुरे हमले करां बचालो ते अपने स्वर्गेर राज़जे मां हफाज़ती सेइं पुजालो, सारे महिमा हमेशा-हमेशा परमेश्वरेरी भोती राए। आमीन। (aiōn g165) १९ मेरु नमस्कार प्रिस्का ते तैसेरे घरे बाले अकिवला ते कने उनेसिफुरुसेरे घराने दे। २० इरास्तुस कुरिन्धुस नगरे मां रावरोए, ते त्रुफिमुस मीं मीलेतुस नगरे मां बिमार शारोरोए। २१ हीवतडेरे पेइले एजनेरी कोशिश केर, ते यूबूलुस ते पूदेंस ते लीनुस ते क्लौदिया, ते इठेरे सारे विश्वासी

लोकेई नमस्कार भेजेऱु आए। २२ अवं प्रार्थना केरताई प्रभु तीं सेइं साथी
भोए, ते तैसेरो अनुग्रह तुसन सेब्बन पुङ भोतो राए।

तीतुस

१ अवं पौलुस ई चिट्ठी लिखने लोरोई। अवं परमेशरेरो दास ते यीशु मसीहेरो प्रेरित आई। अवं परमेशरेरे चुनोरे लोकां केरे विश्वासे मज़बूत केरनेरे लेइ ते तैन केरि मद्दत केरनेरे लेइ चुनोरोई, कि तैना यीशु मसीहेरी सङ्गी शिक्षा ज्ञानन ताके तैना एरी ज़िन्दगी ज़ीन ज़ैस सेइं परमेशर खुश भोए। **२** तैसेरो नितीजो ई भोए कि तैना परमेशरेरे सेइं हमेशा रानेरी उमीद रखन, परमेशर ज़ै कद्दे झूठ न ज़ोए, तैने दुनिया बनाने करां पेइलो वादो कियोरो थियो, कि तैसेरे लोक हमेशारे लेइ ज़ीयेले। (aiōnios g166) **३** ते हुनी परमेशरे ठीक वक्ते पुङ् ई खुशखबरी असन पुङ् बांदी की जै अस सोब्बन प्रचार केरतम। इश्शो मुक्ति देनेबाले परमेशरे ई ज़िमेवारी मीं दित्तोरीए ते तैसेरेलेइ इन कम केरनेरे लेइ मीं हुक्म दित्तोरोए। **४** अवं ई चिट्ठी तीतुसे जो लिखने लोरोई। तू मेरे मट्ठे ज़ेरु आस, किजोकि ज़ेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इश्शो बाजी परमेशर ते इश्शो मुक्ति देनेबालो प्रभु यीशु मसीह तीं अनुग्रह त कने शान्ति देतो राए। **५** मीं तू एल्हेरेलेइ क्रेते टैपू मां शारोरो थियो, ताके तू तैड़ी इश्शू कम पूरु केरस, ते होरि नगरन मां बुजुर्ग चुन ज़ेन्चरे तीं केरनेरो हुक्म दित्तोरो थियो। **६** लीडर बेइलज़ाम लोड़े ते अपने कुआन्शी सेइं वफादार लोड़े, ज़ैन केरे बच्चे विश्वासी भोन ते बुरो बर्ताव केरनेबाले न भोन ते तैना अपने अम्मा बाजी केरो हुक्म मन्नेबाले भोन। **७** किजोकि रखवालो परमेशरेरो भण्डारी भोने वजाई सेइं बेइलज़ाम लोड़े, न अपनि च़लानेबालो, न सेरकलो, न शराबी, न लड़ाको, ते न पेइसां केरो लालची लोड़े। **८** पन मेहमानां केरि आदर केरनेबालो, होरि केरि भलाई केरनेबालो, अपने आपे पुङ् कैबू केरनेबालो, धरमात्मा, पवित्र ते अपने इच्छान कैबू केरनेबालो लोड़े। **९** ते तै यीशु मसीहेरे तैस सन्देशे पुङ् जै भरोसेरे काबले मज़बूती सेइं विश्वास केरनेबालो लोड़े, जै असेई तैस शिखालोरोए। ताके तै होरन सही शिक्षाई मन्नेरे लेइ होसलो देइ बटे ते ज़ैना गलत भोन तैन सुधैरी बटे। **१०** अवं इन एल्हेरेलेइ ज़ोताई, किजोकि बड़े लोक सही शिक्षारी खलाफ केरेले, ज़ैना बेकार गल्लां शिखालतन ते होरन धोखो देतन। इन खास केरतां किछ यहूदी केरे लेइ सच आए ज़ैना विश्वासी बनोरेन (इना तैना लोकन ज़ैना चातन कि सारे मसीही लोक यहूदी केरे कानूने मनन,

खास केरतां खतनेरे कानूने)। 11 एन लोकन शिखालनेरी अज्ञाज्ञत न दे, किजोकि ज़ैखन तैना इन गल्लन शिखालतन, ज़ैना तैनेई शिखैलोरी लोडन, त तै सारे टब्बरां केरे विश्वासे बरबाद केरतन। तैना इन एल्हेरेलेइ केरतन कि पेइंसो कमई बटन। 12 अक मैन्हु क्रेत टैपेरो आए ज़ैस जो तैना अक्लमन्द ज़ोतन तैने ज़ोरुए, “क्रेतेरे लोक हमेशा झूठे, जंगली जानवरां केरो ज़ेरो बर्ताव केरनेबाले, तैना आलसी ते हमेशा अढंगू खानेबाले भोतन।” 13 इन गल्लां क्रेतेरे लोकां केरे बारे मां सच्ची आन। एल्हेरेलेइ तैन खबरदार केर, कि तैना यीशु मसीहेरी शिक्षाई पुड़ विश्वास केरन। 14 ते यहूदी केरि बनोवरी कहैनी ते ज़ैना लोक सच्चे करां दूर भोरेन तैन केरे हुक्म शुन्ने बंद केरा। 15 ज़ैन लोकां केरे मने मां पापी खियाल नई तैन केरे लेइ रीतरे मुताबिक सब किछ शुद्धे। पन तैन लोकां केरे लेइ ज़ैना बुरेन ते यीशु मसीह पुड़ विश्वास न केरन तैन केरे लेइ किछ भी शुद्ध नई ज़ैन तैना केरतन। 16 तैना झूठे उस्ताद ज़ोतन कि अस परमेशरे ज्ञानतम, पन तैन केरां कम्मां साफ तरीके सेइं हिरातन कि तैना तैस न ज्ञानन, किजोकि परमेशर तैन सेइं नफरत केरते ते तैना हुक्म न मन्नेबालेन, ते किछ भी रोड़ु केरनेरे काबल नई।

2 पन हे तीतुस तू विश्वासी लोकन तैन शिखाल ज़ैन यीशु मसीहेरे बारे मां सही शिक्षरे मुताबिक ठीके। 2 बुड़े मड़दन शिखाल कि अपने आपे पुड़ कैबू केरनेबाले बनन, ते तैनेई एरो बर्ताव केरन कि लोक तैन केरि आदर केरन, ते समझदैरी सेइं बर्ताव केरनेबाले भोन। ते तैना परमेशरे पुड़ मज़बूती सेइं विश्वास केरनेबाले बनन, होरन सेइं प्यार केरनेबाले ते सबर केरनेबाले बनन। 3 एन्वरे बुड्डी कुआन्शन शिखाल कि एरी जिन्दगी ज़ीन ज़ैस सेइं परमेशरेरी आदर भोए। तैना होरन पुड़ दोष लाने बैली, ते पीने बैली नई, पन ते तैन ज़ो कि तैन होरन तैन शिखालन जैन रोड़ए। 4 ताके तैना जवान कुआन्शां केरे लेइ मिसाल भोन ते तैन शिखालनेरे काबल भोन कि अपने मुन्शन ते बच्चन सेइं केन्वरे प्यार केरन। 5 ते तैना अपने आपे कैबू केरनेबैली, अपने मुन्शां केरे लेइ वफादार, ते घेरो कारोबार केरनेबैली, भलाई केरनेबैली ते अपने-अपने मुन्शां केरे अधीन राने बैली भोन, ताके परमेशरे वचनेरी तुहीन न भोए। 6 एन्वरे जवान मड़दन भी अक्लमन्द भोइतां ज़ीनेरे लेइ समझा। 7 हर गल्ली मां तू हमेशा अपनो आप अक मिसाल बना, ताके तैन भी एन्वरे केरन।

जैखन तू परमेशरे बारे मां शिखालस त रोड़े मक्सदे सेइं शिखाल। एन्नरे
लोक तेरी आदर केरेले। ८ ते जैन सच्चे तैन शिखाल ते ज़ेसेरी आलोचना न
भोए, ताके तेरे दुश्मन छिथोन, किजोकि फिरी कोई बुराई नई भोनी ज़ेसेरी
तैना खलाफ केरि बटन। ९ जैना विश्वासी गुलाम आन तैन शिखाल कि हमेशा
अपने मालिकां केरि गल मनन। तैन ज़ो कि तैन केरन जैस सेइं तैन केरे
मालिक खुश भोन ते कम्मेरे बारे मां शिकायत न केरन। १० चोरी न केरन, पन
इन साबत केरन कि तैना हमेशा ईमानदारन, ताके लोक तैन केरे रोड़े बर्तवि
हेरन ते जैन तैना केरतन तैन लोकां केरे लेइ, इश्शे मुक्ति देनेबाले परमेशरेरो
सन्देश शुन्नेरी वजा भोली। ११ किजोकि परमेशरे सेढ़भी लोकन मुक्ति देनेरे
लेइ अक बत देइतां अपनो अनुग्रह हिराव। १२ परमेशर अपने अनुग्रहेरे ज़िरिये
असन शिखालते, परमेशर असन शिखालते कि अस तेरहो बर्तव न केरम
जैस सेइं तै खुश भोए। जैन्नरे गैर विश्वासी चीज़ां केरु लालच़ केरतन तुस एरु
न केरा, तुस जांतगर इस दुनियाई मां आथ, अक्लमन्द ते धर्मी लोकां केरो
ज़ेरो ते एरो ज़ेरो बर्तव केरा जैस सेइं परमेशर खुश भोतो। (aiōn g165) १३
अस तैस अनोखी दिहैरी उमीदी मां रातम, कि ज़ेइस इश्शो महान परमेशर
ते मुक्ति देनेबाले यीशु मसीह महिमाई सेइं साथी वापस एज्जेलो। १४ एने
यीशु मसीहे अपनो आप इश्शे लेइ बलिदान कियो ताके असन पापेरे शेक्ति
करा छुटकारो दे, ताके अस शुद्ध भोम ते तैसेरे अपने लोक बनम जैना रोड़ां
केरतन। १५ इना गल्लां शिखाल ते अपनो पूरो अधिकार इस्तेमाल केर, ते
अपने शुन्नेबालन होसलो दे ते झिड़क दे। कोई तीं घटया न समझो।

३ विश्वासी लोकन याद करा, कि हाकिमां ते अधिकैरी केरे अधीन रान, ते
तैन केरो हुक्म मन्न, ते हमेशा रोड़ो केरनेरे लेइ तियार रान। २ कोन्वी बदनाम
न केरन, लड़ाके न भोन, पन नर्म सुभावेरे भोन, ते सेढ़भी मैनन् सेइं साथी
बेड़ि नेरमी सेइं रान। ३ किजोकि अस भी पेइले बेअक्ल ते हुक्म न मन्नेबाले
थिये ते लोकेई असन धोखो दित्तोरो थियो। बड़े खुवैइशा ते एशेरे केरनेरे
गुलाम थिये, इश्शी ज़िन्दगी दुष्टे ते जलनी सेइं भेरोरी थी ते एककी होरि सेइं
नफरत केरते थिये। ४ पन फिर भी इश्शे मुक्ति देनेबाले परमेशरेरे असन
लोकन पुड़ दया ते प्यार हिराव। ५ तैने अस इश्शे पापां केरि सज्जाई करां
बच्चाए एल्हेरेलेइ नई कि असोई रोड़ां कम्मां कियोरां थियां, पन तैसेरे दयारे

वजाई सेइं। तैन इश्शो पाप धोइतां असन नंबू जर्म दित्तू ते पवित्र आत्मा देनेरे
ज़िरिये असन नव्वीं ज़िन्दगी दित्ती। 6 परमेशर पवित्र असन मुफते मां दित्तो
कि इश्शो ज़िन्दगी मां शेक्ति सेइं कम केरे, किजोकि यीशु मसीह इश्शो मुक्ति
देनेबालो बन्नेरे लेइ इश्शो पापां केरे लेइ मरो। 7 परमेशरे इन कियूं ताके तै
अपने अनुग्रहे सेइं अपने नज़री मां धर्मी बनाए, ताके अस तैसेरे बच्चे बनम ते
पूरे तरीके सेइं हमेशा तैस सेइं साथी रानेरे उमीदी सेइं केरम। (aiōnios g166)

8 ई गल सच्चे, अवं चाताई कि तू इन शिक्षान पुड़ ज़ोर दे ताके सब ज़ैना
परमेशरे पुड़ भरोसो रखतन तै अपनो आप रोडू केरनेरे लेइ सोंफेले, इना
शिक्षां सेब्ही केरे लेइ रोड़ी ते फैइदामंद आन। 9 पन बेवकूफी बेंस ते पूर्वजां
केरे नव्वां केरे बारे मां, ते लड़ाई ते तैन ते मूसेरे कानूनेरे बारे मां लड़ाई करां
दूर रा, किजोकि तैन सब बेकार ते बेफैइटू आए। 10 ज़ैना लोक कलीसियाई
मां फिरके बनानेरी वजा बनतन, कम से कम दूई बार तैन खबरदार केर कि
तैना एन न केरन, तैटुं बाद अपनो वक्त तैन पत्ती बर्बाद न केर। 11 तुस
ज़रुर ज़ैनी बटतथ एरो ज़ेरो मैन्हु ज़ैनी बुज़झतां गलत बत्तां चलते, ते तैन
अपना बुरां कम्मां इन साबत केरतन कि तैना पापिन। 12 अवं अरतिमास या
तुखिकुसे तुसन कां भेज़नेरे लेइ बिस्तार बनाने लोरोई, ज़ैखन तैन मरां अक
तीं कां पुज़ते त निकुपुलिस नगरे मां मीं सेइं मिलनेरी पूरी कोशिश केर,
किजोकि मीं तैड़ीए हिवतड़ो कटनो थापोरोए। 13 ज़ैखन जेनास शास्त्री
ते अपुल्लोस तैटुं गानेरे लेइ तियार भोन त ज़ेत्रू भोइ बटे तैन केरि मद्दत
केर, ताके तैन कोन्ची भी चीज़री घटी न भोए। 14 सिर्फ इन नई, बल्के तू
विश्वासी लोकन शिक्षा देतो रा, कि तैना रोड़ां कम्मां केरन ताके तैन लोकां
केरि मद्दत केरन जैन ज़रुरत आए। इस सेइं तैन केरि मद्दत भोली कि तैना
एककी मकसदे सेइं ज़िन्दगी ज़ीन। 15 सरे विश्वासी लोक जैना मीं सेइं साथी
आन तींजो नमस्कार ज़ोतन। इश्शो विश्वासी सैथी लोकन जैना असन सेइं
प्यार केरतन तैन नमस्कार। अवं प्रार्थना केरताई प्रभु तुसन सेब्हन पुड़
अनुग्रह केरतो राए।

फिलेमोन

1 अवं पौलुस ई चिट्ठी लिखने लोरोई। अवं कैदे मां आई किजोकि अवं यीशु मसीहेरे बारे मां प्रचार केरताई। हे फिलेमोन तीं इशो ढला तीमुथियुस ते मेरे तरफां नमस्कार। तू इशो ट्लारो दोस्तस आस ते ज़ेन्वरे अस मसीहेरे लेइ कम केरतम तेन्वरे तू भी केरतस। 2 अवं इशरी विश्वासी बेइन अफफिया ते इशो सैथी अखिप्पुस ज़ै सिपेहेरे ज़ेरो प्रभुएरी सेवा केरते, ते तैन कलीसियारे लोक ज़ैना तेरे घरे मां अकोटु भोतन, तैन भी लिखने लोरोई, 3 अवं प्रार्थना केरताई, इशो बाजी परमेश्वर ते प्रभु यीशु मसीह तुसन पुड़ अनुग्रह केरे ते तुसन शान्ति दे। 4 अवं ज़ैखन भी तेरे लेइ प्रार्थना केरताई, तेरे लेइ अवं परमेश्वरे शुक्र केरताई। 5 किजोकि मीं प्रभु यीशु मां तेरे विश्वासेरे बारे मां ते परमेश्वरे लोकां केरे लेइ तेरे प्यारे बारे मां शुनू। 6 अवं प्रार्थना केरताई तेरी संगती ज़ै विश्वासी लोकन सेइं साथीए, तुशो तैन रोड़ि चीज़ां केरे ज़ान्नेरे ज़िरिये ज़ैना परमेश्वरे दित्तोरिन बद्धती गाए। इन मसीहेरे महिमारे लेइ भोतू राए। 7 किजोकि हे ढला, अवं तेरे प्यारे सेइं ज़ै तू मीं केरतस बड़ो खुश आई, ते मीं बड़ो होसलो भोव, एल्हेरेलेइ कि तेरे प्यारेरे ज़िरिये होरि परमेश्वरे लोकन भी होसलो मैल्लो। 8 अवं तीं किछ केरनेरे लेइ पुछताई ज़ैन तीं कियोरु लोड़। अवं मसीहेरो दित्तोरे अधिकारे इस्तेमाल केरतां इन केरनेरे लेइ हुक्म देइ बटो थियो, पन अवं न केरेलो। इसेरे बदले मां, अवं बल्हे चारे ज़ोताई कि तू इन केर, किजोकि अस एक्की होरि सेइं ते परमेश्वरे लोकन सेइं प्यार केरतम। अवं पौलुस हुनी सियाने मैनेरे रूपे मां तीं पुछताई, अवं लोकई कैदे मां बंद कियोरोई किजोकि अवं यीशु मसीहेरी सेवा केरताई। 10 अवं उनेसिमुसेरे लेइ मिनत केरताई ज़ैन मेरे लेइ मट्टरु ज़ेरुए। तैन मसीह मां मेरु मट्टु इड़ी कैदखाने मां बनू। 11 तै बीतोरे वक्ते मां तेरे लेइ केन्ची कम्मेरो न थियो, पन हुनी तेरे त कने मेरे दुइयां केरे बड़े कम्मेरोए। 12 अवं उनेसिमुसे तीं कां वापस भेज्ने लोरोई, तैस सेइं अवं पूरे दिले सेइं प्यार केरताई। 13 अवं ज़ान्तगर खुशखबरी प्रचार केरनेरे वजाई कैदखाने मां आई तांतगर तैस अपनि मद्दत केरनेरे लेइ इड़ी एप्पू सेइं साथी रख्नो चातो थियो। ताके तै तेरे ठैरी मेरी मद्दत केरे, किजोकि अवं ज़ानताई तू मेरी मद्दत केरनि चातस। 14 पन मीं तेरी मेर्जी बगैर किछ भी केरनू न चाव, अवं चाताई तू ई मेरी मद्दत

केर, किजोकि तू इन केरनेरे लेइ खुश आस ते एल्हेरेलेइ नई कि अवं इन केरनेरे लेइ दबाव बनाने लोरोई। 15 शैइद परमेशरे उनेसिमुस एल्हेरेलेइ तीं करां नशने दित्तो, ताके तै मसीह पुड़ विश्वास केरे, ते तैसेरो नितीजो ई भोए कि तै हमेशा तीं सेइं साथी राए। (aiōnios g166) 16 पन हुनी तै तेरो गुलाम नई, बल्के गुलामे करां भी बेढतां आए। तै हुनी तेरो ट्लारो विश्वासी ढला आए। अवं तैस सेइं बड़ो प्यार केरताई, पन तीं तैस अपने गुलामेरे रूपे मां होरो भी प्यार कियोरो लोड़े किजोकि तै मसीह मां अक ढलाए। 17 अगर तू मीं शामिल समझतस, त ज़ैखन उनेसिमुस वापस तीं कां एज्जे त तैस एन्नरे कबूल केर ज़ेन्नरे मीं। 18 ते अगर तैने किछ तेरो नुकसान कियोरोए, या तेरे किछ पेइंसां केरो कर्ज़ो भोए त अवं तैसेरे बदले देइलो। 19 अवं पौलुस अपने हथ्थन सेइं लिखताई, कि अवं तीं एप्पू वापस देइलो, तू इन पेइलू ज्ञानतस, अगर मीं तेरी मद्दत न भोथी कियोरी त तीं अपने आपे सेइं न भोथू मैलोरु, मेरो कर्ज़ो ज़ै तीं पुड़े तै तेरी अपनि ज़िन्दगी आए। 20 हे मेरे ट्लारे दोस्त, साथी विश्वासी भोनेरे वजाई सेइं इन मेरे लेइ केर ते मसीह मां मीं खुश केर। 21 मीं ई चिट्ठी लिखोरीए, किजोकि मीं याकीन कि ज़ैन केरनेरे लेइ ज़ोरू तैन तू केरेलो। हकीकति मां अवं ज्ञानताई तू तैस करां भी बड़ जादे केरेलो, ज़ैन केरनेरे लेइ मीं ज़ोरुए। 22 ते अक होरि गल, तू अपने घरे मां मेरे लेइ अक कमरो तियार केर। किजोकि मीं उमीदे परमेशर तुश्शे प्रार्थनां केरो जुवाब देलो ते तीं कां फिरी एजने देलो। 23 इपफ्रास, ज़ै यीशु मसीहेरी खुशखबरी प्रचार केरनेरे वजाई सेइं मीं साथी कैदीए तै तीं नमस्कार ज़ोते। 24 ते मरकुस ते अरिस्तर्खुस ते देमास ते लूका ज़ैना प्रभुएरु कम मीं सेइं साथी केरतन तींजो नमस्कार ज़ोतन। 25 इश्शे प्रभु यीशु मसीहेरो अनुग्रह तुसन पुड़ भोतो राए। आमीन।

इब्रानियों

1 परमेश्वरे बड़े पेइले इश्शो दादे पड़दादन सेइं बड़े बारे ते अलग-अलग किसमे सेइं नेबी केरे ज़िरिये गल्लां की। 2 पन इन आखरी दिहाड़न मां परमेश्वरे असन सेइं अपने मट्टेरे ज़िरिये गल्लां की, जैन तैनी सैरी चीज़ां केरु बारस ठहराव ते तैसरे ज़िरिये परमेश्वरे सारी स्थाइ बनाई। (aiōn g165) 3 मटू परमेश्वरी महिमारु प्रकाश आए, ते तैन हर किसमे सेइं परमेश्वरु ज़ेरु आए, तैन्ने सैरी चीज़न अपने शेक्करे वचनेरे ज़िरिये सेइं संभालते, तैन्ने लोकन पापन करां शुद्ध केरतां स्वर्गे मां परमेश्वरे महिमा मां देइने पासे बिश्शू। 4 एन केरने सेइं परमेश्वरे मटू, स्वर्गदूतन करां महान कियूं, ते जैन नवं तैस दितू जेवं तैन स्वर्गदूतन करां महान आए। 5 किजोकि परमेश्वरे स्वर्गदूतन मरां कोन्ची सेइं कथे नई ज़ोरु, “तू मेरु मटू आस; अज़ अवं इन बांदू केरताईं तू मेरु मटू आस” ते फिरी परमेश्वरे केन्ची स्वर्गदूते सेइं इन नई ज़ोरु, “अवं तैसरो बाजी भोइलो, ते तैन मेरु मटू भोलू” 6 ते फिरी परमेश्वरे अपने पेइले मट्टे दुनियाई मां भेज्जने करां पेइलू, इन ज़ोवं, “परमेश्वरे सब स्वर्गदूत तैस कां मथ्थो टेकन।” 7 परमेश्वर स्वर्गदूतां केरे बारे मां इन ज़ोते, “तै अपने स्वर्गदूतन हवारे ज़ेरे बनाते, ते अपने सेवकन अगारे लपारे ज़ेरे बनाते।” 8 पन परमेश्वरे अपने मट्टेरे बारे मां ज़ोते, ‘हे परमेश्वर तेरु राज़ सदा रालू, ते तू इन्साफे सेइं राज़ केरेलो। (aiōn g165) 9 जैन रोड़ूए तैस केरने सेइं तू प्यार केरतस ते जैन गलते तैन केरने सेइं नफरत केरतस; एल्हेरेलेइ तेरे परमेश्वरे तू चुनोरोस ते तेरे सैथन करां जादे तीं आदर ते आनन्द दित्तोरोए।’ 10 ते पवित्रशास्त्र इन भी ज़ोते, ‘हे प्रभु, तीं शुरु मां दुनियारी रङ्गना की,’ ते जैन किछ अम्बरे मां आए तैन तीं बनावं। 11 तैन सब किछ खतम भोइ गानूए; पन तू हमेशा रालो; ते तैन सब किछ लिगड़ां केरु ज़ेरु पुरानू भोइ गालू। 12 ते तू तैन चादरारु ज़ेरो बनालो, ते तैन लिगड़ां केरु ज़ेरु बेदलोई गालू; पन तू कथे न बेदलोस; ते तेरी ज़िन्दगी कधी खतम न भोली। 13 ते परमेश्वरे स्वर्गदूतन मरां केस सेइं किताली ज़ोवं, ‘तू मेरे देइने पासे आदरारे ठैरी बिश,’ ते अवं तेरे दुश्मन तेरे अधीन केरेलो।’ 14 तैना सब स्वर्गदूत सिर्फ परमेश्वरे सेवक आन; परमेश्वरे तैना तैन लोकां केरि हिफाज़त केरनेरे लेइ भेज्जोरेन जैन मुक्ति मैलोरीए।

2 एल्हेरेलेइ, जैना गल्लां असेर्ई शुनोरिन, तैन पुङ् असेर्ई होरो भी मन लेइतां ध्यान कियेऱ लोडे, कोस्कोई एरु न भोए, कि असां टेपलोइतां तैन करां दूर घ्ले गाम। **2** किजोकि जैन वचन परमेशरे स्वर्गदूतां केरे ज़िरिये ज़ोरु थियूं, तैन सऱ्चू साबत भोवं, ते हर एककी पाप केरनेबाले ते हुक्म न मन्नेबाले सजा मैल्ली। **3** त असन भी सजा मैलेली, अगर अस एत्री महान मुक्ति करां बे खबर राए त। ज़ेसेरे बारे मां पेइले प्रभुए एप्पू ज़ोरुए, ते जैन चेलेई एन प्रभु करां शुनोरु थियूं तैन केरे ज़िरिये असन याकीन भोवं कि एन सऱ्च आए। **4** परमेशरे भी निशान ते चमत्कार ते बड्हां-बड्हां कम्मां केरे ज़िरिये ते अपने मेरज़ेरे मुताबिक लोकन पवित्र आत्मारे ज़िरिये वरदान देइतां इन साबत कियूं। **5** परमेशरे एजने बैली दुनिया ज़ेसेरे बारे मां अस ज़ोने लोरेम, स्वर्गदूत केरे अधीन मां न की पन प्रभु यीशुए अधीन की। **6** बल्के पवित्रशास्त्रे मां कोस्कोई केन्चे परमेशरे सेइं एन ज़ोरुए, “मैन्हु कुन चीजे, ज़ेसेरे बारे मां तू सोचतस? या इन्सान कौने, कि तू तैसेरी फिक्र केरतस? **7** तीं तै शेक्ति मां किछ वक्तेरे लेइ स्वर्गदूतन करां थोडो ज़ेरो घट कियो, ते तीं तैस राजेरी ज़ेरि महिमा ते आदर दित्तोरीए, ते तैस अपने हृथ्यां केरे कम्मन पुङ् अधिकार दित्तोरोए,” जैखन सब किछ तैसेरे अधिकारे मां कियूं, ते किछ भी बाकी न रख्वू, जैन तैसेरे अधीन न भोए। पन असां हुन्ना तगर सैरी चीजां तैसेरे अधिकारे मां न लहम। **9** पन असां यीशु लहतम, जै स्वर्गदूतन करां किछ वक्तेरे लेइ निकडो कियोरो थियो, ताके तै परमेशरेरे अनुग्रहे सेइं सेब्भी केरे लेइ अपनि जान दे। किजोकि यीशुए दुख बरदाश कियो ते मरो, ते हुनी अस ज्ञानतम कि तैस महिमा ते आदर दित्तोरीए। **10** परमेशरे सब किछ बनाव, ते तै सब किछ अपने लेइ सुमैलतां रखते। परमेशरे ठीक कियूं जैन तैनी दुखेरे ज़िरिये यीशु सिद्ध कियो, ताके तै बडे लोकन महिमा मां पुजाए। किजोकि यीशु ही आए जै असन मुक्तरे पासे नेते। **11** किजोकि पवित्र केरनेबालेरो ते पवित्र भोने बालां केरो बाजी अक्के, एल्हेरेलेइ यीशु तैन जो ढ्ला बेइन ज़ोने करां न शरमाए। **12** पन मसीह परमेशरे सेइं जोते, “अवं अपने लोकन इन जोएलो कि तीं मेरे लेइ इन कियोरुए ते तैन केरे सभाई मां तेरे नव्वेंरु गीत ज़ोइलो।” **13** ते फिरी तै जोते, “अवं तैस पुङ् भरोसो रेखेलो।” ते फिरी तै जोते, “अवं तैन लोकन सेइं

साथी भोनोई, जैना परमेश्वरे मीं दित्तोरेन।” 14 किंजोकि ज़ेन्चरे परमेश्वरे
बच्चे, मैन्हु आन, तेन्नरे यीशु भी तैन केरो ज़ेरो मैन्हु बनो। परमेश्वरे एन
एल्हेरेलेइ कियू ताके तैसेरे मौतरे ज़िरिये शैताने बरबाद केरे जैस कां मौतरो
अधिकार थियो। 15 ते एन्चरे तैनी तैना आज्ञाद किये जैना मौतरे डरे सेइं सैरी
उमरी गुलामेरे ज़ेरे ज़ीते थिये। 16 किंजोकि प्रभु यीशु स्वर्गदूतां केरि नईं
बल्के अब्राहमेरे वंशेरी मद्दत केरते। 17 एल्हेरेलेइ यीशु मसीहे हर गल्ली मां
मैन्हु केरो ज़ेरो बन्नू ज़रुरी थियूं, ताके सेढ़भी केरे पापां केरे बलिदानेरे लेइ
परमेश्वरे सामने दया केरनेबालो ते ईमानदार महायाजक बने। 18 किंजोकि
यीशुएरी अज़मैइश कीजई ते तैनी एप्पू दुःख झैल्लोरोए, एल्हेरेलेइ तै तैन
लोकां केरि मद्दत केरि बटते, जैना आज़मैइशरो सामनो केरतन।

3 एल्हेरेलेइ हे विश्वासी ढलाव ते बेइनव, तुस परमेश्वरे स्वर्गे मां तैस सेइं
शामिल भोनेरे लेइ कुजोरेथ। एल्हेरेलेइ प्रभु यीशुएरे बारे मां ध्यान देथ जै
इश्शे लेइ परमेश्वरो बिस्तार आन्ने बालो दूत ते महायाजक आए ज़ेसेरो अस
इकरार केरतम। 2 यीशु परमेश्वरे लेइ वफादार थियो, जैनी तै ठहरावरो
थियो, ज़ेन्चरे मूसा भी परमेश्वरे लोकां केरि सेवाई मां वफादार थियो। 3
किंजोकि घर बनानेबालो घरे करां जादे इज़ज़तरे काबल समझो गाते, तेन्नरे
यीशु भी मूसा करां जादे इज़ज़तरे काबल समझो जेव। 4 किंजोकि हर घरेरो
कोई न कोई बनानेबालो ज़रूर भोते, पन जैनी सब किछ बनाव तै परमेश्वरे।
5 मूसा त परमेश्वरो सेवक भोने सेइं परमेश्वरे घरेरे लोकन मां वफादार राव।
ताके तैना गल्लां केरि बटे, जैना परमेश्वर एजनेबाले वक्ते मां ज़ोनेबालो थियो।
6 पन मसीह मटू भोनेरे वजाई सेइं परमेश्वरे लोकां केरु मुखतियार, ते असां
तैसेरे लोकम, शर्त एने कि असां तैस दिलेरी ते उमीदी मज़बूत रखम, जैस
पुड़ असां भरोसो केरतम। 7 बस्सा पवित्र आत्मा ज़ोते, “अगर अज़ तुस
परमेश्वरेरी आवाज़ शुनथ। 8 त अपने दादे पड़दादां केरे ज़ेरे तैसेरो हुक्म मन्ने
करां इन्कार न केरथ, ज़ैखन तैनेई परमेश्वरे खलाफ खलाफत की, ते ज़ेन्चरे
तैस दिहाड़े तुश्शे दादे पड़दादेई ज़ेइस तैना सुनसान ठैरी मां थिये, तैनेई
परमेश्वरेरी अज़मैइश की। 9 तैड़ी तुश्शे दादे-पड़दादे 40 सालन तगर मेरां
महान कम्मां हेरनेरे बाद भी, अवं चनोती देइतां अज़माव। 10 एल्हेरेलेइ
अवं तैस वक्तेरे लोकन पुड़ क्रोधे भोव, ते मीं ज़ोवं, तैना हमेशा मेरो इन्कार

केरतन, ते ज्ञैन केरनेरो मीं हुक्म दित्तोरोए तैन केरने करां इन्कार केरतन। 11
 एल्हेरेलेइ मीं एपनी सरकी मां कसम खाइ, कि तैना तैस ठैरी कधे दाखल न
 भोले जैडी अवं तैन आराम देथो।” 12 हे ढ्लाव ते बेइनव खबरदार राथ,
 तुसन मरां केन्चेरो दिल एत्रो बुरो ते बेर्इमान न भोए, कि ज़ै तैस ज़ींते परमेशरे
 करां दूर केरे। 13 पन ज़ांतगर तै दिहाड़ी जैस जो अज़ा ज़ोतन, रोज़ एक्की
 होरि हिम्मत देते राथ, एरु न भोए कि तुसन मरां कोई पापेरे धोखे मां इटां
 परमेशरेरे लेइ सखत दिल न भोइ गाए। 14 किजोकि अगर असां अपने पेइले
 विश्वासे पुड़ अपने मौती तगर लगातार मज़बूत रातम, त अस अकोटू कम
 केरने मां मसीह सेइं साथी जुडतम। 15 जेन्चरे पवित्रशास्त्रे मां लिखोरूए,
 “अगर अज़ा तुस तैसेरी आवाज़ शुनथ त तुस अपने दिले सखत न केरा, त
 अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ, जैखन
 तैनेईं परमेशरेरे खलाफ खलाफत की।” 16 तैना लोक कौन थिये, ज़ैनेईं
 परमेशरेरी आवाज़ शुन्तां भी तैसेरे खलाफ खलाफत की? तैना सब लोक
 तैना थिये ज़ैना मूसेरे ज़िरिये मिस मुलखे मरां निसेरे थिये। 17 तैना कौन
 लोक थिये, ज़ैन सेइं परमेशर 40 सालन तगर क्रोधे राव? तैना लोक तैना
 थिये, ज़ैनेईं पाप कियो ते मेरतां तैन केरि लाशां सुनसान ठैरी मां रेइ जेरै। 18
 जैखन परमेशरे क्रोधे मां कसम खाइ, कि तैना तैस ठैरी कधे दाखल न भोले
 जैडी अवं तैन आराम देथो, हकीक्ति मां तै तैन केरे बारे मां ज़ोतो थियो ज़ैनेईं
 हुक्म न थियो मन्नोरो। 19 बस्सा, असन हुनी पतो लगो, कि तैना विश्वास न
 केरनेरी वजाई सेइं तैडी दाखल न भोइ सके।

4 एल्हेरेलेइ जैखन परमेशरेरो ए वादोए कि असां तैस आरामे मां दाखल
 भोइ सकतम, ते असेईं खबरदार राहेरु लोइते, ताके कोस्कोई एरु न भोए,
 कि तुसन मरां कोई तैस मां दाखल भोने करां एरो रेइ गाए। 2 किजोकि
 जेन्चरे असेईं यीशु मसीहेरी खुशखबरी शुनी, तेन्नरे इसाएली लोकेईं भी
 आरामेरे ठैरी दाखल भोनेरी खुशखबरी शुनोरी थी। पन तैनेईं तैस पुड़ विश्वास
 न कियो, एल्हेरेलेइ तै सन्देश तैन केरे लेइ बेफैइदो भोव। 3 पन असेईं ज़ैनेईं
 विश्वास कियो, परमेशरेरे तैस वादो कियोरे आरामे मां दाखल भोतम, जेन्चरे
 परमेशरे ज़ोरु थियूं “मीं अपने क्रोधे मां कसम खाइ, कि तैना तैस ठैरी कधे
 दाखल न भोले जैडी अवं तैन आराम देथो।” परमेशरे एन एल्हेरेलेइ नईं

ज़ोरू, किजोकि हेजू तगर आरामेरी ठार तियार न थी, पन तै ठार दुनिया
 बनानेरे वक्ते करां तै तियार आए। 4 किजोकि परमेशरे सत्तोवं दिहैड़ारे बारे
 मां पवित्रशास्त्रे मां एन्चरे ज़ोरू आए, “परमेशरे अपना सब कम्मां खतम
 केरतां सत्तोवं दिहाड़े आराम कियो।” 5 ते अस भी इन पढ़तम कि तैनी बादे
 मां ज़ोवं, “एना मेरे आरामेरे ठैरी कथी दाखल न भोले।” 6 तैना इसाएलेरे
 लोक ज़ैनेई पेइली ई खुशखबरी त शुनी, पन आरामेरे ठैरी दाखल भोने मां
 कामयाब न भोए, किजोकि तैनेई परमेशरेरे हुक्म न मन्ने। पन हुन्ना भी किछ
 लोकां केरे लेइ आरामेरे ठैरी दाखल भोनेरे लेइ मौको आए। 7 एल्हेरेलेइ
 परमेशरे कोई होरो वक्ते अपने आरामेरे ठैरी मां दाखल भोनेरे लेइ ठहरावरो, तै
 वक्त अज्ञ आए, इश्शे दादे पडदादेई खलाफ केरनेरे बड़े सालना बाद परमेशरे
 दाउदेरे ज़िरिये ज़ोवं, ज़ेन्चरे तैने ज़ोवं “अगर अज्ञ तुस तैसेरी आवाज़ शुनथ,
 त अपनो दिल सखत न केरा।” 8 अगर यहोशूए तैना लोक आरामे मां दाखल
 करावरे भोथे त बादे मां परमेशरे होरि दिहैड़ेरे बारे मां गल न थी केरनि। 9
 एल्हेरेलेइ परमेशरे लोकां केरे लेइ एरी ठार तियार आए ज़ैड़ी तैना पूरे तरीके
 सेइं आराम केरि बटतन। तैना तेन्चरे आराम केरेले ज़ेन्चरे परमेशरे सत्तोवं
 दिहाड़े आराम कियोरो थियो। 10 किजोकि ज़ै कोई परमेशरेरे आरामे मां
 दाखल भोते त तै परमेशरेरो ज़ेरो अपने कम्मन पूरे केरतां आराम केरते। 11
 एल्हेरेलेइ एज्जा अस भी तैस आरामेरी ठैरी मां दाखल भोनेरी कोशिश केरम,
 ताके कोई भी मैन्हु इसाएली लोकां केरे ज़ेरो हुक्म न मेन्तां तैस आरामेरी ठैरी
 दाखल भोने करां रेइ न गाए। 12 किजोकि परमेशरेरु वचन ज़ींतू ते शेक्ति
 बालू आए, ते हर दूर्ध धारण बैली तलवारी करां भी जादे तिख्खू आए। ते तैन
 प्राण ते आत्माई गहराई तगर चीरते, ज़ेन्चरे तिख्खी तलवार जोड़न ते हेडी
 केरे अन्त्रीयों मासे वारां पार चिरतां निसतीए ते दिलेरे खियाल ते मैनेरो इरादो
 भी ज़ानते। 13 दुनियारी कोई भी चीज़ परमेशरेरी नज़री करां छ़प्पोरी नई,
 बल्के तैसेरे सामने सब चीज़ां खुल्ली ते बेंदिन, ते असेई तैस, ज़ैन किछ
 भी अपने पूरे ज़िन्दगी मां कियोरु तैसेरो हिसाब देनो पेनोए। 14 बस्सा,
 एज्जा अस अपने विश्वासे पुड़ मज़बूत रहम। किजोकि इश्शो अक महान
 महायाजके, ज़ै स्वर्ग मां जोरोए, यानी परमेशरेरु मटू यीशु। 15 किजोकि
 इश्शो महायाजक इश्शी सैरी कमज़ोरी समझते। किजोकि शैताने तै सेब्बी

गल्लन मां इश्शो ज़ेरो अज़माव, पन तैनी कोई पाप न कियो। 16 एल्हेरेलेइ
एज्जा असां दिलेरी सेइं, अनुग्रह देनेबालो परमेशरेरे तखतेरे सामने च्चलम,
ताके तै असन पुडु अनुग्रह ते दया केरे ते ज़रूरतरे मौके तै इश्शो मदत केरे।

5 परमेशरे हर महायाजक इसाएली लोकन मरां चुनो, ते परमेशरे महायाजक,
लोकां केरि तरफां अपनि सेवा केराने लेइ ठहराए, ताके तैना लोकां केरे मैफरे
लेइ च्छतल ते पापां केरु बलिदान च्छाढ़न। 2 किजोकि अक याजक एप्पू बेडि
गल्लन मां कमज़ोरे, एल्हेरेलेइ तै बेसमझा, ते टेपलोरे लोकन नेरमी सेइं बर्ताव
केरि बटते। 3 किजोकि तै एप्पू कमज़ोरे, एल्हेरेलेइ तैस न सिर्फ लोकां
केरे पापां केरे लेइ, बल्के अपने पापां केरे लेइ भी बलिदान च्छाढ़नेरि ज़रूरत
भोतीए। 4 कोई मैन्हु अपने लेइ महायाजकेरी पदवी अपने आपे सेइं हासिल
न केरि सखे, ज़ांतगर तै हास्नेरो ज़ेरो परमेशरेरी तरफां कुजाव न गाए। 5
तेन्हरे मसीहे भी महायाजक बेनतां अपनि आदर न की, बल्के परमेशरे तैस
आदर दित्ती ज़ैखन तैने ज़ोवं, “तू मेरु मटू आस, अज़ अवं इन बांदू केरताई तू
मेरु मटू आस।” 6 एल्हेरेलेइ परमेशर फिरी एककी होरि ठैरी ज़ोते, “तू
मेलिकिसिदकेरो ज़ेरो हमेशारे लेइ याजक आस।” (aiōn g165) 7 यीशुए
एककी मैनेरी ज़ेरि ज़िन्दगी गुज़ारनेरे दिहाड़न मां फुकैरी-फुकैरी ते लेरां देइ-
देइ परमेशरे कां प्रार्थना ते बिनती की, ज़ै तैस मौती करां बचेइ सकतो थियो,
ते परमेशरेरे लेइ तैसेरे भेक्तरे वजाई सेइं परमेशरे तैसेरी फरयाद शुनी। 8 ते
परमेशरेरु मटू भोइतां भी तैनी दुख झ्लिलतां हुक्म मन्नो शिखो। 9 ज़ैखन
तैनी तैन सब कियूं ज़ैन तैनी कियेरु लोड़तू थियूं, त तै तैन केरे लेइ हमेशारे
लेइ मुक्तरो ज़िरयो बनो, ज़ैना तैसेरे हुक्म मन्तन। (aiōnios g166) 10 ते तैस
परमेशरेरी तरफां मेलिकिसिदकेरी ज़ेरि महायाजकेरी पदवी मैल्ली। 11 असन
कां इस बारे मां ज़ोनेरे लेइ बडु किछ आए, पन तुसन समझानू मुश्किले,
किजोकि तुस समझाने मां सुसतथ। 12 द्रासले मां अज़ तगर तुस गुरु बनोरे
लोडते थिये, किजोकि तुसन विश्वास कियोरे बडु घिर भोरुए। पन हुन्ना त
ज़रूरत इस गल्लरीए कि कोई मैन्हु तुसन परमेशरेरे वचनेरी शुरुआतरी गल्लां
दुवारां शिखाले। तुस तैन बच्चां केरे ज़ेरेथ ज़ैन हेजू दुद्ध पीतन ते शुरी रोट्टी न
खेइ बटन। 13 ज़ै दुद्ध पीते, तै हेजू बच्चो भोते, किजोकि तैस नई पतो सही
कुने ते गलत कुने। 14 पन शुरी रोट्टी तैन केरे लेइ भोचे ज़ैना विश्वासे मां

बहुन, ते अपने तजरबे सेइं इस काबल भोरेन, कि रोड़े ते बुरे मां प्रक सेमझी
सखन।

6 एल्हेरेलेइ एज्जा अस मसीहेरे बारे मां शुरुआतरी शिक्षारी गल्लां बार-बार
दोरहानेरे बगैर अस सिधतारे पासे चलते रहम। ते मौतरे पासे नेनेबाले कम्मन
करां मन फिराम ते परमेशरे पुढ़ विश्वास केरनो, **2** बपतिस्मे ते हथ रखनेरी
शिक्षारे बारे मां, ते मुळदां केरे ज़ीते भोनेरे बारे, ते हमेशारे इन्साफेरे बारे
मां दुबारा गल न केरम। (aiōnios g166) **3** एज्जा अस परिपक्व विश्वासी
बनम! अगर परमेशर अज्ञाज्ञत दे त असां इन केरमेले। **4** ज़ैना लोक अपने
विश्वास शारतन तैन फिरी मनफिरानेरे पासे केन्वरे आने गान? तैनी एककी
बारे परमेशरेरी सच्चाई पिशानोरी थी, ते तैन स्वर्गेंरां वरदाना मैलोरां थियां ते
तैनेई होरन सेइं साथी पवित्र आत्मा हासिल कियोरो थियो। **5** तैनेई मैसूस
कियोरु थियूं कि परमेशरेरु वचन रोङ्गु आए, ते तैनेई एजनेबाले ज़मानेरी
शक्ति मैसूस कियोरी थी। (aiōn g165) **6** ते हुनी तैनेई अपनो विश्वासे शारोरो!
एल्हेरेलेइ तैन मनफिरानेरे पासे आनू मुशकिले, किजोकि तैना एप्पू परमेशरेरे
मट्ठे फिरी कूसे पुढ़ चाढ़ने लोरेन! ते लोकां केरे सामने तैसेरी बेइङ्गी केरने
लोरेन। **7** ज़ैन लोकन रोड़ी शिक्षा मैलोरीए तैना तैस ज़मीनेरे ज़ेरे आन ज़ैस
पुढ़ झैड़ी लग्गती रातीए। अगर ज़मीन रोड़ीए त ज़िमदारेरे लेइ रोड़ी फसल
देचे, ते तैस परमेशरेरी तरफां बरकत मैलचे। **8** होरे लोक तैस ज़मीनेरे ज़ेरे
आन ज़ैस मां कंटे ते झोल्लां लगतन ते तै कोन्वी कम्मेरी नई। ते परमेशर तैस
ज़मीनी फिटकार देनेबालोए ते आखरी मां तैस अग्गी मां बरबाद केरेलो। **9** हे
मेरे ट्लारे ढ्लाव ते बेइनव, हालांकी असां एरी गल्लां ज़ोतम फिर भी अस
विश्वास केरतम कि एन तुश्शे लेइ नई। इश्शो भरोसोए कि तुस रोड़ी गल्लां
केरे लेइ आथ ज़ैना मुक्करे ज़िरिये एइतिन। **10** किजोकि परमेशर बेइनसाफ
नई कि ज़ै तुश्शू कम ते प्यार बिसरी गाए, ज़ै तुसेई तैसेरे लोकां केरि सेवा
केरनेरे ज़िरिये तैसेरेलेइ हिरावरोए। ते परमेशर याद केरेलो कि तुस हेजू भी
तैन केरि मद्दत केरने लोरेथ। **11** इश्शी इच्छा ई आए कि तुस ज़ांतगर ज़ीतेथ
रोड़ो बर्ताव केरते राथ, इन पक्कू केरनेरे लेइ कि तुश्शी उमीद सच्च भोली।
12 तैखन तुस आलसी न बनेले। पन तुस तैन केरे ज़ेरे चलेले ज़ैना अपने
विश्वास ते सबरारे वजाई सेइं परमेशरेरे वादां केरे बारस भोले। **13** ज़ैखन

परमेशरे अब्राहम सेइं वादो कियोरो थियो त कसम केरनेरे लेर्ड तैस करां बहु
 कोई न थियो, एल्हेरेलेइ तैनी अपनि ही कसम कमाइतां जोवं, 14 “अवं तीं
 सच्चे बरकत देइलो, ते तेरु वंश बेशुमार बेधेइलो।” 15 एल्हेरेलेइ अब्राहम
 तैन वादन हासिल केरनेरे लेइ सबरी सेइं इंतज़ार केरतो राव। 16 मैनु त एप्पू
 करां बडां केरे नव्वेरी कसम केरतन ते एन्चरे तैन हर मसलेरो हल कसम
 केरतां खतम भोते। 17 एल्हेरेलेइ परमेशरे भी कसम खाइ, एन केरने सेइं
 तैनी तैन लोकन जैन सेइं वादो कियोरो थियो, इन दिग्नू चाऊ कि जै वादो
 तैनी कियोरोए तै पूरो केरेलो। 18 त इडी दूर्घ गल्लां आन तैसेरो वादो ते तैसेरी
 कसम, जैना कथे न बेदलोने ते तैन केरे बारे मां परमेशर कथे झूठ न जोए।
 एल्हेरेलेइ अस जैना तैसेरे सहारे मां ओरेम त जै उमीद असन दित्तोरीए, तैस
 मां अस बनोरे रहम, ते अस बडे जादे जोशे मां आम। 19 इश्शी उमीद प्राणा
 केरे लेइ पक्की आए तै टेली न बटे ते ई असन परमेशरे करां भटकने न दे,
 बल्के ई असन परमेशरेरे मन्दरे मां महा पवित्र ठैरी पुजातीए। 20 जैडी यीशु
 इश्शे लेइ मेलिकिसिदक महायाजकेरो ज़ेरो हमेशारो महायाजक बेनतां इश्शे
 लेइ बत हिराने बालेरो ज़ेरो दाखल भोव। (aiōn g165)

7 ई मेलिकिसिदक शालेमेरो राज्ञो ते परमप्रधान परमेशरेरो याजक थियो,
 ज़ैखन अब्राहम राज्ञ मैरतां वापस ओरो थियो, त मेलिकिसिदके तैस सेइं
 मिलतां तैसेरी बडी आदर की ते तैस बरकत दित्ती। 2 अब्राहमे तैस तैन
 सेब्मी चीजां केरे दशोवं हिस्सो दित्तो जैना तैनी कब्जो केरतां ऐनोरी थी।
 मेलिकिसिदकेरो नव्वेरो मतलब धार्मिकतारो राज्ञो आए, ते शालेमेरो मतलब
 शैन्तरो राज्ञो। 3 तैसेरो न कोई बाजी, न अम्मा, न तैसेरु कोई वंशे, न
 तैसेरी ज़रमनेरे बारे मां न तैसेरे मरनेरे बारे मां लिखोरुए। तै परमेशरेरे मट्टरो
 ज़ेरोए तै हमेशारे लेइ याजक बनोरो रहते। 4 पन हुनी इस पुढ़ ध्यान देथ
 मेलिकिसिदक केत्रो महान थियो। जैस पूर्वज अब्राहमे कब्जो कियोरी चीजां
 केरो दशोवं हिस्सो दित्तो। 5 मूसेरे कानूनेरे मुताबिक जैना लेवेरे खानदाने
 मरां थिये यानी जैना याजक ठहराए गातन, तैन हुक्म दित्तो जोरोए कि तैना
 इसाएली लोकन यानी अपने लोकन करां दशोवं हिस्सो नेन, हालांकि तैना
 भी अब्राहमेरी वंशे मरां आन। 6 पन मेलिकिसिदके जै लेवी केरे वंशे मरां न
 थियो फिरी भी अब्राहमे करां दशोवं हिस्सो नीयो, ते तैस बरकत दित्ती जैस

सेइं परमेश्वरे वादो कियो थियो। 7 अस पक्क ज्ञानतम कि जै बरकत देते तै बरकत मैलने बाले करां महान आए। 8 ते याजक जैना दशोवं हिस्सो नेतन तैना तैन मैन्हु आन जैना मरतन, पन मेलिकिसिदक एन करां भी महान आए, किजोकि पवित्रशास्त्र ज़ोते कि तै ज़ीतो आए। 9 बल्के अस ज़ोई सकतम कि लेवी भी जै दशोवं हिस्सो नेते, अब्राहमेरे ज़िरिये मेलिकिसिदक जो दशोवं हिस्सो दित्तो। 10 एल्टेरेलेइ कि जैस मौके मेलिकिसिदके लेवेरे पूर्वज अब्राहमे सेइं मुलाकत की, तैस मौके लेवी ज़रमोरो भी न थियो। 11 इना लेवी याजकेरे आधारे पुड़ कानून इसाएली लोकन दित्तोरो थियो, अगर लेवी ते याजकेरु कम ठीक थियूं, त अलग किसमेरे याजकेरु बांदू भोनू ज़रुरी न थियूं, जै मेलिकिसिदकेरो ज़ेरो आए। पन हारूनेरो ज़ेरो नई। 12 किजोकि जैखन याजकेरी पदवी बेदलोतीए त कानूनेरु बेदलोनू भी ज़रुरीए। 13 असां इना सैरी गल्लां मसीहेरे बारे मां ज़ोने लोरेम जै होरि गोत्रे मरां आए, ते तैस गोत्रे मरां केन्चे बलिदान केरनेरे ठैरी याजकेरी सेवा नई कियोरी। 14 किजोकि इन अस ज्ञानतम, कि इश्शो प्रभु यहूदारे गोत्रे मरां थियो। ते मूसा एस गोत्रे मरां याजकेरे पेदवरे बारे मां कोई गल नई कियोरी। 15 मेलिकिसिदकेरो ज़ेरो अक होरो भी याजक एजने सेइं इन होरु भी साफ भोते। 16 किजोकि यीशु कानूनेरे हुक्मेरे मुताबिक याजक लोडतो थियो, पन तै नाश न भोनेबैली ज़िन्दगेरे शेक्करे ज़िरिये महायाजक बनो। 17 किजोकि तैसेरे बारे मां परमेश्वर पवित्रशास्त्रे मां ई गवाही देते, “कि तू मेलिकिसिदकेरे ज़ेरो हमेशारे लेइ याजक आस।” (aiōn g165) 18 एन्हरे मूसेरो कानून कमज़ोर ते बेफल भोनेरे वजाई सेइं हुनी कम न केरि बटे। 19 (किजोकि मूसेरे कानूने कोई गल्ली सिद्ध न केरि बटी) पन हुनी असन कां अक रोड़ी उमीदे ज़ेसेरे ज़िरिये सेइं असां परमेश्वरेरे सामने एज्जी बटतम। 20 ते परमेश्वरे भी तैस वक्ते कसम खाइ जैखन तैनी यीशु महायाजक बनाव। 21 किजोकि होरे याजक त बगैर कसमा याजक बनाए, पन जैखन यीशु, परमेश्वरी तरफां याजक बनाव त तैनी ज़ोवं, “अवं, प्रभु कसम खाताई, कि तू हमेशा याजक रालो ते अवं अपने मने कथी न बेदलेलो।” (aiōn g165) 22 एल्टेरेलेइ यीशु ज़मानत देते कि पुरानो करार नव्वे करारे करां रोड़े भोलो। 23 ते अक फर्के, किजोकि पेइले बड़े याजक बेनतां आए, पन तैना सब मरे ते तैनेई लगातार याजकेरु कम न

केरि बटु। 24 पन यीशु आखरी तगर रानेबालो याजके ते एल्हेरेलेइ तैसेरी

ठैरी होरो कोई याजक न रख्खो गाए। (aiōn g165) 25 एल्हेरेलेइ ज़ैना लोक

यीशुएरे जिरिये सेइं परमेशरे कां एइतन, यीशु तैन पूरी-पूरी मुक्ति देइ बटते,

किजोकि तै तैन केरे लेइ बिनती केरनेरे लेइ हमेशा ज़ींतोए। 26 एल्हेरेलेइ

असन ऐरे ज़ेरो महायाजक ज़रुरी थी, जै इशो ज़रुरतन पूरी केरे, जै पवित्र,

निष्कपट ते शुद्ध, ते पैपन करां अलग भोए ते जै परमेशरे स्वर्गे जो नेवरो

भोए। 27 ते होरि महायाजक केरु ज़ेरु यीशु ज़रुरी नई, कि पेइते अपने

पापां केरे लेइ ते फिरी अपने लोकां केरे पापां केरे लेइ रोज़ बलिदानां चाढ़े,

किजोकि यीशुए सेभ्भी लोकां केरे पापां केरे लेइ एककी बार अपनो आप

बलिदान केरतां एरु बलिदान चाढ़ू ज़ैन हमेशारे लेइ आए। 28 किजोकि

मूसेरो कानून त तैन मैनन् महायाजक भोनेरे लेइ ठहराते ज़ैना सिद्ध नई, पन

मूसेरो कानूनेरे बाद परमेशरे कसम खेइतां अपनू मटू ठहराव ते तैसेरू मटू

हमेशारे लेइ सिद्ध महायाजक बनोरोए। (aiōn g165)

8 ज़ैना गल्लां हुन्ना अस ज़ोने लोरेम तैन मरां सेभना बड्ही गल ई आए कि इशो एरो महायाजक, जै स्वर्गे मां परमेशरेरे महिमा बाले तखतेरे देइने पासे बिशोरोए। 2 ते जै तैस महा पवित्र ठैरी ते तैस सञ्च्चे तेम्बु मां सेवा केरते, जै केन्चे मैने नई बल्के परमेशरे खड़ो कियोरोए। 3 किजोकि हर महायाजक पापां केरे मैफरे लेइ चढ़तल ते बलिदान चाढ़नेरे लेइ ठहराव गाते, एल्हेरेलेइ ज़रुरी आए, कि इशो महायाजके (यीशु) कां भी किछ चाढ़नेरे लेइ भोए। 4 ते अगर यीशु दुनियाई मां भोथो त कथे कोई याजक न थियो भोनो, किजोकि इडी मूसेरे कानूनेरे मुताबिक चढ़तल चाढ़नेरे लेइ याजक आन। 5 इना याजक ज़ैना कम केरतन, तैना सिर्फ स्वर्गेरे चीज़ां केरि नकल ते सैयोए, पन जैना चीज़ां स्वर्गे मां आन। एल्हेरेलेइ ज़ैखन मूसा तेम्बु बनानेरी तियेरी मां थियो, त परमेशरे तैस हैदैयत दित्ती, “हेर जै नमूनो मीं तीं पहाड़े पुड़ हिरावरो थियो तैसेरे हिसाबे सेइं तू सैरी चीज़ां बना।” 6 पन हुनी जै महायाजकेरी सेवा यीशु दित्तोरी तै पुराने याजकेरे सेवाई करां बड़ी बड्हीए, किजोकि तै ज़ैना गल्लां केरि बिचवाई केरते तैना पुराने करारे करां भी उच्ची आन, ते वादन पुड़ तैसेरी बुनियादे। 7 किजोकि अगर पेइले करारे मां कोई खांमी न भोथी त होरो करार केरनेरी कोई ज़रुरत न थी भोनी। 8 पन परमेशर लोकन पुड़ दोष लेइतां

ज्ञोते, “तक्का प्रभु ज्ञोते कि तै दिहाड़ी एज्जी राहोरीए, इसाएलेरे लोक ते यहूदारे लोकन सेइं साथी नंब्बो करार केरेलो। ९ ए तैस करारेरो ज़ेरो न भोलो ज़ै मीं तैन केरे दादे पड़दादन सेइं तैस दिहाड़े कियोरो थियो। ज़ैखन मीं मिसे मरां तैन कढनेरे लेइ तैन केरो हथ ठमोरो थियो, किजोकि प्रभु ज्ञोते कि तैना मेरे तैस करारेरे मुताबिक वफादार न राए, एल्हेरेलेइ मीं भी तैन केरे पासे कोई ध्यान न दितू। १० प्रभु ज्ञोते कि ज़ै करार अवं इसाएलेरे लोकन सेइं तैस मौके केरेलो तै ईए, कि अवं अपने कानून तैन केरे मन्न मां छडेलो, ते तैन केरे दिलन मां लिखेलो, ते अवं तैन केरो परमेश्वर भोलो ते तैना मेरे लोक भोले। ११ ते केन्वी ए ज़रूरत न भोली कि अपने पुडोसन, या अपने रिशतेदारन ए शिक्षा दे कि प्रभु पिशाना, किजोकि निकडे करां बड़े तगर सब मीं पिशानेले। १२ एल्हेरेलेइ अवं तैन केरे अधर्म माफ़ केरेलो, ते तैन केरे पापन फिरी कधे याद न केरेलो।” १३ ज़ैखन परमेश्वरे नंब्बो करारे कमाव त पेइलो करारे पुरानो बनाव, ते ज़ै चीज़ पुरानी ते कमज़ोर भोती तै जल्दी खतम भोतीए।

९ पेइले करारेरे मुताबिक भी परमेश्वरी आराधना केरनेरे नियम थिये; ते आराधना केरनेरे लेइ मैन्हु केरि बनोरी अक ठार थी। २ यानी अक तेम्बु बनोरो थियो, ते तैसेरे दूर्व्ह हिस्से थिये, पेइले हिस्से मां अक दीवट (दीयो), मेज़ ते चैढ़ोरी रोटी रेखोरी भोती थी, तैस हिस्से जो पवित्र ठार ज्ञोते थिये। ३ ते होरि हिस्से मां पड़दे पतोरां तै ठार थी, तैस हिस्से जो परमपवित्र ठार ज्ञोते थिये। ४ एसमां सोन्नेरी तै बलिदान केरनेरी ठार थी ज़ैस पुड़ खुशबूदार चीज़ां बालते थिये, ते चेव्रे पासन सोन्ने सेइं पलेटोरो करारेरो सुंदुख थियो। ते तैस सुंदुखे मां मन्ने सेइं भेरतां अक सोन्नरु भांड थियूं, ते कने हारूनेरी तै सोटी थी ज़ैस पुड़ पट्टां लगोरां थियां ते दूर्व्ह घोड़ां केरि सलेटां थी, जैन पुड़ दश हुक्म लिखोरे थिये। ५ एस सुंदुखेरे बेइयें पासे माहिमा बाले करूब बनोरे थिये, जैना परमेश्वरी मौजूदगी हिराते थिये। तैना अपने-अपने फंगन सेइं तैस ठैरी सैयो केरि रावरे थिये, ज़ैड़ी पाप माफ़ कियोरे थिये। पन हुनी इन गल्लन रोड़ चारे ज़ोनेरो वक्त नई। ६ एना सब चीज़ां एस तरीके सेइं तियार केरनेरे बाद, याजक तेम्बेरे तैस पेइले हिस्से मां रोज़ गाते, ताके सेवारु कम पूरु केरन। ७ पन परमपवित्र ठैरी मां सिर्फ़ महायाजक साले मां सिर्फ़ एककी बार गाते। ते तै भी खून धिन्तां ताके अपनि ते अपने लोकां केरे पापां केरे लेइ बलिदान

चाढ़े, जैना तैनेईं अनज्ञाने मां किये। 8 एस नियमें सेइं पवित्र आत्मा इन हिराते, कि ज्ञांतगर पेइलो तेम्बु आए, तांतगर परमपवित्र ठैरी गानेरी बत बंदे। 9 ते इन सब किछ इस वक्ते लेइ अक मसाले, एस सेइं एन बांटू भोते कि जै चङ्घङ्गतल ते बलिदान याजक परमेशरे जो चाढ़ते थिये, तैस सेइं आराधना केरनेबालां केरो ज़मीर रोड़ेचारे शुद्ध न भोए। 10 तैन केरो तलक सिर्फ खाने पीनेरे चीज़ ते अलग-अलग शुद्ध भोनेरे रसमन सेइं भोतो थियो। इन सिर्फ जिसमानी रसमां आन, इन तैखन तगर लागू भोतन ज्ञांतगर परमेशरे नव्वों नियाम न बनाए। 11 पन जैखन मसीह इश्शो महायाजक बेनतां अव, त तै रोड़ी चीज़ां घिन्तां अव जैना हुन्ना मौजूद आन। तै स्वर्गे मांजो परमेशरे हजूरी मां जेव। ते तै हजूरी एककी महान ते सिद्ध तेम्बेरो ज़ेरि आए, जै मैन्हु केरे हथ्थां केरे ज़िरिये सेइं नई बनोरो ते न दुनियारो। 12 जैखन मसीह तैस तेम्बु मांमेइं भोइतां पवित्र ठैरी दाखल भोव, त तैनी थावां ते बछड़ां केरो खून नई, बल्के अपनो खूनेरे ज़िरिये एककी फेरे पवित्र ठैरी दाखल भोव ते असन इश्शो पापन करां हमेशारे लेइ छुटकारो दित्तो। (aiōnios g166) 13 किजोकि जैखन थावां ते दांतां केरो खून ते बेछड़ी केरि मांजन अपवित्र लोकन पुड़ छक्के गाने सेइं तैना लोक जिसमानी तरीके पवित्र मन्ने गाते थिये, 14 त मसीहे सनातन आत्मारे ज़िरिये सेइं अपनो आप परमेशरे कां बगैर पापेरु बलिदान केरतां चाढ़ु, ते तैसेरो खून असन इश्शो ज़मीरेरे तैन कम्मन करां होरो भी जादे पवित्र केरेलो, जैन केरो तलक मौती सेइं ए, ताके अस ज़ीते परमेशरेरी आराधना केरम। (aiōnios g166) 15 एहे वजा आए कि परमेशरे अपने ते दुनिया मझाटे मसीह बिचवाई बनेइतां तैसेरे ज़िरिये सेइं अक नव्वो करार बनावरोए, ताके जैना परमेशरेरे कुजोरेन तैना हमेशारी बरकत हासिल केरन ज़ेसेरे लेइ परमेशरे तैना कुजोरेन। किजोकि पेइले दित्तोरे करारेरे अधीन कियोरे पापन करां तैन आजाद केरनेरे बदले मां मसीह मरोए। (aiōnios g166)

16 किजोकि वसीयतरे सिल्सले मां वसीयत देनेबालेरी मौत साबत भोनी ज़रुरीए। 17 एलहेरेलेइ वसीयत देनेबालेरे ज़ीते दम्मे तगर वसीयत कम्मेरी न भोए, पन तैसेरे मरनेरे बाद तै वसीयत पक्की भोतीए। 18 एहे वजा आए कि पेइलो करार भी खूनेरे बगैर नई कियोरो। 19 एन्चरां जैखन मूसा सैरी लोकन कानूनेरो अक-अक हुक्म शुनाव, त तैनी थावां ते बछड़ां केरो खून पैनी मां

मिलाव, ते फिरी लाल उन्ना ते जूफा सेइं एन्तां कानूनेरी किताबी ते सैरी
लोकन पुड़ छिड़को। 20 ते ज्ञोवं कि, “ए तैस कराररो खूने ज़ेसेरो हुक्म
परमेशरे तुश्रे लेइ दित्तोरोए।” 21 एन्हरे तैनी तेम्बु पुड़ ते आराधना केरनेरी
सैरी चीज़न पुड़ खून छिड़को। 22 किजोकि मूसे कानूनेरे मुताबिक लगभग
सैरी चीज़ां खूने सेइं पवित्र की गेइचन, ते ज़ांतगर खून न बगाव गाए, तांतगर
पाप भी माफ़ न भोन। 23 त फिरी ए ज़रुरते कि तैना चीज़ां ज़ैना स्वर्गेरी
नकल आन, तैना जानवरां केरे बलिदाने सेइं शुद्ध की गान। पन स्वर्गेरी चीज़न
इन करां भी जादे रोड़े बलिदाने सेइं शुद्ध भोनेरी ज़रुरते। 24 किजोकि मसीह
मैन्हु केरे बनेवरे घरे मां ज़ैन सञ्चे पवित्र ठारारी नकले, दाखल नई भोरे,
बल्के स्वर्गे मां दाखल भोव ज़ैड़ी तै इश्शे लेइ परमेशरे कां हाज़रे। 25 यहूदी
केरो महायाजक पवित्र घरे मां हर साल होरि केरो यानी जानवरां केरो खून
नेइतां गाते, पन मसीह अपने आपे बार-बार बलिदान केरनेरे लेइ न गाए। 26
वरना दुनियारे शुरु करां लेइतां हुन्ना तगर तैस बार-बार दुख झैलनो पेथो; पन
हुनी जुगेरे आखरी मां तै बांदो भोवं, ताके अपने बलिदाने सेइं पाप दूर केरे।

(aiōn g165) 27 ते ज़ेन्चरे सेइं मैनेरु मरनू ते एककी बार इन्साफेरु भोनू
पक्कुए। 28 तेन्चरे सेइं मसीहे भी बड़े लोकां केरे पाप सैल्तां गानेरे लेइ
एककी बार बलिदान भोव, ते दुबारां पापां केरु बलिदान देनेरे लेइ नई, बल्के
तैन मुक्ति देनेरे लेइ एज्जेलो, ज़ैना तैसेरे इंतज़ारे मां आन।

10 मूसेरो कानून एजने बैली रोड़ी चीज़ां केरो सिर्फ अक सैयोए, न कि
असली रूपे। एल्हेरेलेइ एककी किसमेरां बलिदानां ज़ैना हर साल चाढ़ां गातन,
तैना परमेशरे कां एजने बालन कधे भी सिद्ध न केरि सखन। 2 अगर केरि
सखेथां, त कुन तैन केरु चाढ़नू बंद न भोथू? एल्हेरेलेइ अगर आराधना
केरनेबाले एककी बारे हमेशारे लेइ पवित्र भोइ गाथे, त तैन केरो ज़मीर तैन
पापी न बनाथो। 3 पन तैना बलिदानां तैन लोकन हर साल याद करातन कि
तैना पापिन। 4 किजोकि मुमकिन नई, कि दांतां केरो ते थावां केरो खून पापे
दूर केरि सके। 5 एल्हेरेलेइ ज़ैखन मसीह दुनियाई मां ओरो थियो, त तैनी
परमेशर सेइं ज़ोरु थियूं, “तीं बलिदान ते चढ़तल न चाई, बल्के तीं मेरे लेइ
अक जान तियार की। 6 तू न भस्म भोनेबाले बलिदाने सेइं, ते न पापेरे
बलिदाने सेइं खुश भोव।” 7 तैखन मसीहे ज़ोवं, “हे परमेशर, हेर, अवं तेरी

इच्छा पूरी केरनेरे लेइ ओरोई, ज़ेन्हरे मेरे बारे मां पवित्रशास्त्रे मां लिखोरुए।”

8 पेइले त तै ज़ोते, न तीं कोई बलिदान ते न कोई चढ़तल चाई, ते न भस्म भोनेबालू बलिदान ते न पापेरु बलिदान चाव, ते न तैन सेइं तू खुशी भोव, हालांकि एना बलिदानां मूसेरे कानूनेरे मुताबिक दित्तां गातन। 9 फिरी तै एन ज़ोते, “हेर, अवं तेरी मर्जीं पूरी केरनेरे लेइ ओरोई,” एन्हरे तै पेइले सारे बलिदान्न हटाते ताके तैन केरे ठैरी मसीहेरे बलिदाने रख्खे। 10 परमेश्वरी मर्जीं ई थी, कि यीशु मसीहेरे जिसम एक्की बार बलिदान भोने सेइं अस हमेशारे लेइ पवित्र भोम। 11 पेइले करारेरे मुताबिक हर याजक बलिदान केरनेरे ठैरी खड़े भोइतां रोज़ सेवा केरतन, ते एक्की किसमेरां बलिदानां बार-बार चाढ़तन, जैना पापे कधी भी दूर न केरि सखन। 12 पन मसीह जै इश्शो महायाजके, इश्शो पापां केरे लेइ एक्की बार बलिदान भोइतां परमेश्वरे देइने पासे गेइतां बिश्शी जेव। 13 तैड़ी तै तैस वक्तेरो इंतज़ार केरने लोरोए, कि परमेश्वर तैसेरे दुश्मन पूरे तरीके सेइं हाराए। 14 तैनी एक्की बलिदाने सेइं जैना लोक पवित्र कियोरेन, तैना हमेशारे लेइ सिद्ध कियोरेन। 15 पवित्र आत्मा भी एस गल्लरी गवाही देते। पेइलू त एन ज़ोते कि 16 “प्रभु ज़ोते, कि जै करार अवं तैन दिहैड़ना बाद अपने लोकन सेइं केरेलो तै ईए, अवं अपने कानून तैन केरे मन्न मां छडेलो ते तैन केरे दिलन मां लिखेलो।” 17 ते फिरी एन भी ज़ोते कि, “अवं तैन केरे पाप ते बुरां कम्मां माफ़ केरेलो, ते फिरी कधी याद न केरेलो।” 18 बस्सा, ज़ैख्न तैन केरे पापां केरि माफ़ी भोइजेइ, त फिरी पापां केरे लेइ बलिदानेरी ज़रूरत नई। 19 एल्हेरेलेइ ढ़लाव ते बेइनव, असन यीशुएरे खूनेरे जिरिये सेइं मन्दरेरे परमपवित्र ठारी मां दाखल भोनेरी दिलेरी भोरीए। 20 यीशुए इश्शो लेइ अक नब्बीं ते ज़िन्दगी देनेबाली बत खोलरोरीए, जै तैनी पड़दे मां यानी अपने जिसमे मां मौतरे जिरिये इश्शो लेइ बनाई। 21 ते एल्हेरेलेइ इश्शो एत्रो महान याजक जै परमेश्वरे घरेरो मुखतियारे। 22 त एज्जा अस सच्चे दिले सेइं ते पूरे विश्वासे सेइं, ते एरो ज़मीर जै खूनेरे तेप्पेइं सेइं पापेरे एसासे करां पवित्र कियोरे, ते एरो जिसम नेइतां जै साफ पैनी सेइं धोवरोए, परमेश्वरे कां नेम। 23 ते अस एपनी उमीदरो इकरार रोड़ेचारे ट्लेइतां रखम, किजोकि जैनी असन सेइं वादो कियोरोए तै सञ्च्चोए। 24 ते असेई इस गल्लारु ध्यान लोडे रखोरु कि अस केन्हरे प्यार ते

रोड़ां कम्मां केरे लेइ एककी होरेरी हिम्मत बधाम। 25 ते एककी ठैरी अकोटू
 भोनू न शारम, ज़ेन्चरे होरे लोक केरतन बल्के अस एककी होरि हिम्मत
 देथ, तुस जैस हिसाबे सेइं परमेशरे दुबारे एजनेरी दिहैड़ी नेड़ोंते लातथ तैस्से
 हिसाबे सेइं जादे एन गल्लन पुड़ चलते भी राथ। 26 किजोकि अगर अस सच्च
 पिशानेरां बाद, ज़ैनी बुझातां पाप केरम त पापां केरे लेइ कोई बलिदान बाकी
 नई रावरु। 27 हाँ, परमेशरे इन्साफ ते भयानक अग ज़ै परमेशरे दुश्मन्न
 भस्म केरेली तै बाकी आए। 28 ज़ैखन मूसेरे कानून न मन्नेबाले, टूई या
 द्लाई मैन्हु केरे गवाही देने सेइं तैस मैन्हु बगैर दया केरतां मौतरी सज्ञा दित्ती
 गातीए। 29 त तै मैन्हु केत्री सज्ञारो लैईक भोलो, ज़ैनी परमेशरे मटू पावन
 हैठ ढलेन्हू ते करारेरो खून जैस सेइं तै पवित्र ठहरावरो थियो, तै अपवित्र
 समझो। ते पवित्र आत्मारी बेइज्जती की, ज़ेसेरे ज़िरिये असन अनुग्रह मैलते।
 30 किजोकि अस ज्ञानतम, तैनी ज़ोरु थियूं, “बदलो घिन्नो मेरु कम्मे, अवं
 एप्पु बदलो देइलो।” ते फिरी तैनी एन भी ज़ोवं, “प्रभु अपने लोकां केरि
 इन्साफ केरेलो।” 31 ज़ींते परमेशरे हथ्थन मां गानू बड़ी खतरनाक गल्ले।
 32 पन तैना पेइले दिहाड़े याद केरा, ज़ैखन तुसन मसीह पिशानेरी लौ मैल्ली,
 ते तैसेरे बाद तुसेई बेड़ि मुशकलातां केरो दैटां मुकाबलोइ कियो। 33 यानी
 कथे त तुस लोकां केरे तुहीन केरने सेइं ते मुसीबती सेइं तुस तमाशो बने,
 ते कथी तुसेई होरे मुसीबत बरदाशत केरते लाए ते तुसेई तैन केरु साथ
 दित्तू। 34 किजोकि तुसेई कैदन सेइं हमदरदी की, ते अपनो माल भी लुटानो
 खुशी सेइं कबूल कियो। किजोकि तुस ज्ञानते थिये कि अक बड़ी बड़ी खास
 मलकियत तुसन कां आए ज़ै हमेशारे लेई आए। 35 एल्लेरेलेइ तुस हिम्मत न
 हरा, किजोकि तैसेरो फल बड़ो बड़ोए। 36 तुसेई बेड़ि सब्री सेइं कम कियेरु
 लोइते, ताके तुस परमेशरेरी मर्जी पूरी केरतां तै चीज़ हासिल केरि सख्थ
 ज़ेसेरो तैनी वादो कियोरोए। 37 किजोकि ज़ेन्चरे पवित्रशास्त्रे मां लिखोरु
 आए, “हुनी थोड़ु चिर बाकी आए, कि एजनेबालो एज्जेलो ते चिर न लाएलो।”
 38 पन मेरे धर्मी लोक मीं पुड़ विश्वासे रखने सेइं ज़ींते राले, अगर तैना मीं पुड़
 विश्वास केरने करां पत्रोवं हटन त मेरो दिल तैन पुड़ खुश न भोलो।” 39 पन
 अस हटने बाले नई, कि परमेशरे पुड़ विश्वास केरने करां पत्रोवं हटम ते नाश
 भोम, बल्के अस विश्वास केरनेबाले आम, ताके इश्शे प्राण बचाए गान।

11 हुनी विश्वास उमीद कियोरी चीज़ां केरु याकीन, ते अलैई चीज़ां केरु सबूते। 2 इश्शो दादे पङ्ददादन भी एरो विश्वास थियो। एल्हेरेलेइ परमेशर तैन पुड़ खुश भोव। 3 विश्वासे सेइं असन पतो लगते कि दुनियारी हर चीज़ परमेशरेरे वचने सेइं बनोरीए। एल्हेरेलेइ ज़ैन किछ अस लहतम, तैन लेइहोने बैली चीज़न सेइं नई बनोरोए। (aiōn g165) 4 विश्वासे सेइं आदमेरे मटु हाबिले अपने बडु ढला कैने केरां रोडु बलिदान परमेशरेरे लेइ चाढु। ज़ेसेरी वजाई सेइं परमेशरे तैसेरु बलिदान कबूल कियूं, ते तैसेरे बारे मां गवाही दित्ती, कि हाबिल धर्मी मैन्हु आए। हालांकि हाबिल मेरि जोरोए, फिरी भी अस तैसेरे विश्वासेरे ज़िरिये परमेशरे पुड़ भरोसो केरनो शिखतम। 5 विश्वासे सेइं हनोक नव्वंरो मैन्हु मौती करां पेइलो ज़ींतो स्वर्गे जो नीयो, ते तैसेरो पतो न चलो, किजोकि परमेशरे तै स्वर्गे जो नीयोरो थियो, तैसेरे उबरे गाने करां पेइले तैसेरे हके मां गवाही दित्तोरी थी, कि तैनी परमेशर खुश कियो। 6 किजोकि विश्वासेरे बगैर परमेशर खुश केरनो नामुमकिने, बस्सा रोडु एने कि परमेशरे कां एजने बालन विश्वास कियोरो लोडे कि परमेशर आए, परमेशर तैन ज़ैना तैस सच्चैई सेइं तोपतन फल देते। 7 विश्वासे सेइं नूहे तैन गल्लां केरे बारे मां ज़ैना एजनेबाले वक्ते मां भोनी बैली थी, परमेशरेरे तरफां हुक्म मैलतां परमेशरेरे प्यारे सेइं तैस पुड़ अमल कियूं, ते अक किश्ती बनाई ज़ैस मां तैसेरु सारू टब्बर बचू, एन केरने सेइं तैनी सारी दुनिया मुर्जम बनाई ते एप्पू तैस धार्मिकतारो बारस बनो ज़ै विश्वासे सेइं हासिल भोचे। 8 विश्वासे सेइं ज़ैखन परमेशरे अब्राहम, ज़ैस जगाई गाने जो परमेशरे तै कुजोरो थियो, त तै हुक्म मेन्तां तैस जगाई चलो जेव, ज़ै जगाई बादे मां परमेशर तैस विरासतरो ज़ेरो देनेबालो थियो। हालांकि तै एन भी न थियो ज़ानतो कि अवं कोरां चलोरोई, फिरी भी चलो जेव। 9 विश्वासेरे ज़िरिये सेइं तै परमेशरेरे कियोरे वादेरे मुताबिक तैस मुलखे मां परदेशी केरो ज़ेरो तेम्बन मां गेइतां बस्सो। ते तैस सेइं साथी तैसेरु मटु इसहाक ते तैसेरु पोटलडु याकूब भी राए, तैन भी परमेशरे करां तैए वादो मैलो ते तैना भी तेम्बन राए। 10 किजोकि अब्राहम तैस नगरेरे इंतजारे मां थियो (ज़ैन स्वर्गे मांए) ज़ेसेरी मुनीयाद सदारे लेइ आए, ज़ेसेरो तियार केरनेबालो ते बनानेबालो परमेशरे। 11 विश्वासे सेइं सारा दोजींती भोनेरी ताकत हासिल की, हालांकि तै उमरारे हिसाबे सेइं बच्च्यो

ज़ानेरे काबल न थी राहोरी, सारा एन याकीन थियूं कि वादो केरनेबालो
 परमेश्वर अपनो वादो पूरो केरेलो। 12 ज़ेइस अब्राहम बड़ो बुद्धो थियो ते बच्चे
 पैदा केरनेरे काबल न थियो, अम्बरेरे तारां केरे ते समुदरेरी रेतरे बराबर एन्हूं
 हछुं वंश पैदा भोव। 13 एन सेव्ही लोकेई परमेश्वरे पुड़ भरोसो कियो ते मेरि
 जे, ते तैन तै कोई चीज़ न मैल्ली ज़ेसेरो वादो परमेश्वरे कियोरो थियो, तैनेई
 समझूं कि परमेश्वर एन एजनेबाले वक्ते मां केरेलो, ते तैना इन भी समझाते
 थिये, कि तैना ज़मीनी पुड़ परदेशी ते मुसाफर आन। 14 ज़ैना एरी गल्लां
 ज़ोतन तैन सेइं एन साबत भोते, कि तैना अज़ तगर अपने मुलखेरी तलाशी
 मां आन। 15 अगर तैना तैस मुलखेरो खियाल रखते भोथे ज़ैस मरां तैना ओरे
 थिये, त तैना वापस गेइ बटते थिये। 16 पन असलीती मां तैना एककी रोड़े
 स्वर्गेर मुलखेरे उमीदी मां थिये, एल्हेरेलेइ परमेश्वर तैन केरो परमेश्वर ज़ुवाने
 सेइं खुश भोव, एल्हेरेलेइ तैनी तैन केरे लेइ अक नगर तियार कियोरोए। 17
 विश्वासे सेइं अब्राहमे अपने इम्तिहानेरे मौके अपने मटु इसहाकेरु बलिदान
 देने करां न टलो, ज़ैन तैस परमेश्वरे वादे कबूल केरने बद मैलोरो थियूं, तैस्से
 अकैल्ले मटु बलिदान केरने जो तियार भोइ जेव। 18 हालांकी परमेश्वरे तैस
 सेइं ज़ोरु थियूं, “कि इसहाकेरे वंशे सेइं तेरे वंशेरु नवं रालू।” 19 किजोकि
 अब्राहमे याकीन थियूं, कि परमेश्वरे कां मुड़दन ज़ींते केरनेरी शक्ति आए,
 एल्हेरेलेइ लेइ ज़ेन्चरे परमेश्वरे इसहाक मुड़दन मरां फिरी वापस आनो। 20
 विश्वासे सेइं इसहाके अपने दुझ्ये मटुन याकूबे ते एसावे आशिवाद दित्तो,
 कि एजनेबाले वक्ते मां तैना वादे पूरे भोले। 21 विश्वासे सेइं याकूबे मरते
 वक्ते यूसुफेरे दुझ्ये मटुन बरकत दित्ती ते अपने सोटरे सहारे सेइं परमेश्वरेरी
 आराधना की। 22 विश्वासे सेइं यूसुफे मरते बार पूरे याकीन सेइं ज़ोरु थियूं,
 इस्माएली लोक मिस मुलख शारेले। ते तैन हुक्म दित्तोरो थियो कि ज़ेइस तैना
 मिस मुलखे मरां निसेले त तैना तैसेरी हेड़ी साथी नेन। 23 विश्वासे सेइं
 मूसेरे हाज बव्वेई तैसेरे जरमनेरां पत्ती ट्लाई महीन्न तगर छ़पेइतां रख्खो,
 किजोकि तैनेई हेरु कि तै बच्चो खासे, ते तैना राज़ेरो हुक्म ट्लोड़ने करां
 न डेर। 24 विश्वासे सेइं मूसा बड़े भोइतां फिरैनेरे कुइयरु मटू बन्ने करां
 इन्कार कमाव। 25 पापेरे थोड़े दिहाड़े आनन्देरी ज़िन्दगी गुज़ारनेरे बजाहे तैनी
 परमेश्वरेरे लोकन सेइं साथी मिलतां दुख झैलनो चुनो। 26 तैनी मसीहेरे लेइ

दुख झैलनो मिस्वेरे खजानन् करां जादे दौलत समझी, किजोकि तै ज्ञानतो
 थियो कि तैस स्वर्गे मां इनाम मैलनूए। 27 विश्वासे सेइं तैनी राज्ञेरे सरकरो डर
 न कियो, बल्के मिस्व मुलख छैडी दित्तो, एल्हेरेलेइ तैनी समझोरु थियूं जेन्नरे
 तैनी न लेइहोने बाले परमेश्वरे लाहू। 28 विश्वासे सेइं मूसे इस्वाएली लोकन
 हुक्म दित्तो कि तैना फ़सह तिहारेरी दिहाड़ी बनानी ते गबड़ेरो खून दारन
 छिड़कन, ताके मौतरो स्वर्गदूत जै परमेश्वरेरी तरफां भेज्ञोरोए इस्वाएलेरे पेइले
 मट्ठन न मैरी बटे। 29 विश्वासे सेइं इस्वाएली लोक लाल समुन्द्र मांमेइं एन्नरे
 लंघे जेन्नरे शुक्कोरी ज़मीनी पुड़मेइं पार निस्से, पन ज़ैखन मिस्वेइं तैट्ठां
 पार लंघनेरी कोशिश की त तैना डुबतां मेरि जे। 30 किजोकि इस्वाएली
 लोकेई परमेश्वरे पुड़ विश्वास कियो, ते सत दिहैङ्न तगर यरीहो नगरेरे चक्कर
 लाए (जेन्नरे परमेश्वरे ज़ोरु थियूं) ते दिवार डुल्ली। 31 विश्वासे सेइं राहाब
 वेश्या परमेश्वरेरे हुक्म न मन्ने बालन साथी नाश न भोइ; एल्हेरेलेइ कि तैसां
 इस्वाएली जासूस शैन्ति सेइं अपने घरे मां आने जैना छेपतां यरूहो नगरे
 हेरने ओरे थिये। 32 हुनी होरु किछ ज़ोनेरी ज़रूरत नई। हुनी मीं कां वक्त
 नई कि एरे ज़ेरे लोकां केरे बारे मां ज़ोई, जेन्नरे गिदोन, बाराक, शिमशोन,
 यिफतह, दाऊद, ते शमूएल ते होरे नबी। 33 तैनई विश्वासे सेइं राज्ञां ज़ींतां,
 ते धार्मिकतारां कम्मां कियां ते वादो कियोरी चीज़ां हासिल की, ते शेरई तैना
 न खाए। 34 अगां तैना न फुके, ते तलवारी सेइं तैना न मारे जे, ज़ैखन तैना
 कमज़ोर थिये तैखन तैन ताकतबर बनाए, ते ज़ंगी मां भी बहादर निस्से, ते
 तैनेई दुश्मना केरि फौज निशानी। 35 विश्वासे सेइं किछ कुआन्शन अपने
 मुओरे लोक ज़ींतो मैल्ले, किछ मार खांते-खांते मेरि जे। ते तैनेई अपनो
 विश्वास शारनो न चाव, तैसेरे बदले मां तैनई कैद रानू मन्जूर कियूं एल्हेरेलेइ
 तैना मरनेरां बाद फिरी ज़ींते भोन, ते तैन रोड़ी जिन्दगी मैल्ले। 36 किछ
 लोकां केरे मज़ाक बनाव जेव, किछ लोकन कोडे बाए, ते किछ शंगलन
 सेइं बंधे ते कैदखाने मां छेडे। 37 ते किछन घोड़ेई बेई; ते आरे सेइं चिरे, ते
 तलवारी सेइं मारे जे। तैना गरीब थिये, तैन दुःख दित्तो जेव ते तैन सेइं बुरो
 बर्ताव कियो जेव। तैना भैट्ठां छैल्ली केरि खाड़ी लेइतां इरां उरां नशते थिये।
 38 तैना जंगलन ते पहाड़न ते कुठन मां ते धेरतरे खडन मांमेइं हंठते थिये।
 39 इन बुरु संसार तैन विश्वासी लोकां केरे काबल न थियूं, तैन सेब्भी केरे

विश्वासेरे वजाई सेइं परमेशर तैन पुड़ खुश भोव, पन तैन, तैन मैल्लू ज़ेसेरो
वादो परमेशरे कियोरो थियो। 40 किजोकि परमेशरे कां न सिर्फ तैन केरे लेइ
बल्के इश्शे लेइ रोड़ी योजनाए। परमेशरे तैन शुद्ध बनानो चाते, पन सिर्फ
असन सेइं साथी।

12 एल्हेरेलेइ ज़ैखन गवाहां केरे एत्रो बहौ घाने असां धेरोरेम, त अस भी
सैरी रकावटां ते तैस पापे दूर केरम ज़ै असन उलझाते, ते तैस दौड़ी ज़ै असेईं
दौवड़नीए बल्हे सेइं दौवड़म। 2 एज्जा अस विश्वासे मां पवित्र केरनेबाले यीशु
पुड़ नज़र रखम, ज़ैनी तैस खुशारे लेइ ज़ै तैसेरी नज़री मां थियो, बेइज़तरी
परवाह न की, बल्के क्रूसेरो दुख झैल्लो ते परमेशरेरे तखतेरे देइने पासे गेइतां
बिश्शो। 3 तुस एस गल्ली पुड़ खियाल केरा, कि अपने खलाफत केरनेबाले
ज़ैनी पैपी केरि तरफां केत्रो दुख झैलो, ताके बेदिल भोइतां हिम्मत न हैरी। 4
तुसेईं पापे सेइं लड़ते-लड़ते हेजू तगर एत्रो मुकाबलो नई कियोरो कि तुसेईं
अपनो खून बगावरो भोए। 5 ते तुसेईं तैन समझानू बिसरी छँडू, कि ज़ैस मां
तुसन जो मट्ठां ज़ोवं, “कि हे मेरे बच्चव परमेशरेरे हुक्मे एरे न समझा। ते
ज़ैखन प्रभु तीं डिङ्के त शारनेरे ज़ेरे मैसूस न केर। 6 किजोकि ज़ैस सेइं
परमेशर प्यार केरते तैस डिङ्के भी, ते ज़ैस तै अपनू मट्ठू बनाते तैस सोटेईं
भी बाते।” 7 ए हैदैत तुश्शे समझानेरे लेइए, एस बल्हे सेइं बरदाशत केरा,
परमेशर तुसन अपना मट्ठां सेमझातां बर्ताव केरते, किजोकि तैन कौन ज़ेरु
मट्ठूए ज़ैस तैसेरो बाजी समझाए नन्ना? 8 पन अगर तुसन सुधारे न गाथ
ज़ैस शामिल त तुस न गैर औलाद भोनेथ न की अपना मट्ठां। 9 एसेरे अलावा
ज़ैखन इश्शे जिसमानी बाजी सुधारते रहते थिये ते अस तैन केरि इज़ज़त
केरते राए, त कुन आत्मां केरो बाजी यानी परमेशरेरी जादे इज़ज़त न केरम
ताके ज़ींते राम। 10 इश्शे जिसमानी बाजी त थोड़े दिहाड़ां केरे लेइ एपनी
समझरे मुताबिक असन सुधारते रहते थिये, पन परमेशर इश्शे फैइदरे लेइ
असन सुधारते ताके असां तैसेरी पवित्रतैई मां शामिल भोंम। 11 एसमां शक
नई कि ज़ैखन केन्ची हैदैत की गाचे त तै खुशी नई, बल्के बढ़ू बुरु बुझते,
पन ज़ैखन तै बले-बले पक्को भोइ गाते त तैस बादे मां धर्मी बेनतां चेनरो
फल मैलते। 12 बस्सा एपनी कमज़ोर पैखड़न ते कमज़ोर ज़ैन्धु मज़बूत
केरा। 13 ते अपने पावन सिधी बत्तां चलाथ ताके टोंटे टेपलोए न ते तैना

बेझोन। 14 सेव्हन सेइं मेल मिलापे सेइं राथ, ते तै पवित्रताई हासिल केरनेरी
 हर वक्त कोशिश केरा ज़ेसेरे बगैर कोई प्रभु न लेर्ई सके। 15 खबरदार एरु न
 भोए कि कोई मैन्हु परमेशरेरे अनुग्रह करां रेइ गाए, एरु न भोए कि कोई
 टलिठू ज़ील लग्गे ते तुसन परेशान केरे ते होरे लोक भी भिटे भोइ गान। 16
 ते न कोई मैन्हु तुसन मां बदमाशी केरनेबालो भोए, या एसावेरो ज़ेरो अधर्मी
 न बने, ज़ैनी एककी बार रोट्टी खानेरे लेइ अपने बड्डे भोनेरु हक बेचतां छऱ्हू।
 17 किजोकि तुस ज्ञानतथ कि बादे मां ज़ैखन तैनी तै बरकत हासिल केरनेरी
 कोशिश की, त तैस न मैल्ली, तैस अपनि नियत बदलनेरो मौको न मैलो
 हालांकी तै लेरां देइ-देइ तैस तोपनेरी कोशिश केरतो राव। 18 तुस तैस पहाडे
 कां नेडे नई ओरे, ज़ैस सेइं तुस हुरी सकते थिए, तैन पहाड़ अग्गी सेइं फुकोतू
 थियूं ते अंधगुबारी ते बड्डो तूफान थियो। 19 तैडी नडशिंगेरी शोर ते ज़ोने
 शुनाने बालेरी एरी आवाज़ शुनोती थी, कि ज़ैखन लोकेई तै आवाज़ शुनी त
 मिनत केरने लगे, कि असन सेइं होरि गल्लां न केर। 20 एल्हेरेलेइ कि तैनेई
 तै हुक्म बरदाशत न केरि बटो, “अगर कोई ज्ञानवर भी एस पहाडे सेइं हुरेलो
 तै घोड़ेई बैइतां मारो गालो।” 21 तै नज़ारो एत्रो खतरनाक थियो कि मूसे
 ज़ोवं, “अवं डरने ते थरकने लोरोई।” 22 बल्के तुस सिय्योनेरे पहाडे ते ज़ीते
 परमेशरेरे नगर यानी स्वर्गेरे यरूशलेमे मां लखेइं स्वर्गदूतन कां खुशी मनाने
 ओरेथ। 23 ते तुस परमेशरेरी पेइले बच्चां केरि सभाई मां ते कलीसियाई मां
 ओरेथ, एना तैना लोकन ज़ैन केरां नव्वा स्वर्गे मां लिखोरेन, तुस इन्साफ
 केरनेबाले परमेशरे कां ओरेथ, ते धेरमी केरि आत्मन कां ओरेथ, यानी तैन
 कां ज़ैना सिद्ध कियोरेन। 24 तुस नंवे करारे बिचवाई केरनेबाले यीशु ते
 तैसेरे छिड़कोरे खूने कां ओरेथ, ज़ै हाबिलेरे खूने करां रोडी गल्लां ज़ोते। 25
 खबरदार राथ, तुस परमेशर ज़ै तुसन सेइं गल्लां केरते तैसेरो इन्कार न केरथ,
 किजोकि ज़ैनेई ज़मीनी पुड़ हैदैत केरनेबालेरो इन्कार कियो त तैना न बंचे,
 त अगर अस स्वर्गे हैदैत केरनेबालेरो इन्कार केरमेले त केन्चरे बंचमेले? 26
 तैखन तैसेरी आवाज़ी सेइं धरती हिली जेर्ई पन तैनी ई वादो कियोरोए कि,
 “एककी फेरे फिरी अवं सिर्फ ज़मीन नई बल्के अम्बरे भी हिलेइलो।” 27
 तैसेरू “एककी फेरे फिरी” ज़ोने सेइं साफ पतो लगते की पैदा कियोरी चीज़ां
 ज़ैना हिलचन तैना खतम भोनिन ताके ज़ैना हिलन नन्ना तैना रैनिन। 28 जैडी

असन तैन राज मैलने लोरुए जैन हिलनेरु नई त एज्जा अस तैसेरु शुक्र केरम
ते हिम्मत केरम कि, अस परमेशरेरी आराधना परमेशरेरे डरे सेइं केरि बटम
जैस सेइं तै खुश भोए। 29 किजोकि इश्शो परमेशर भस्म केरनेबैली अगारो
ज़ेरोए।

13 एककी होरि सेइं ढला ते बेइनां केरो ज़ेरो प्यार केरते राथ। 2 बखले
लोकां केरि खातरदारी केरा, किजोकि एरु केरने सेइं किछेई अनज्ञाने मां
स्वर्गदूतां केरि खातरदारी कियोरीए। 3 कैदन याद रखा, मन्ना कि ज़ेन्नरे
तुस एप्पू भी तैन सेइं साथी कैद आथ, ते जैन सेइं बुरो बर्ताव भोते तैन भी
याद रखा, इन सेमझतां मन्ना कि ज़ेन्नरे तुसन सेइं बुरो बर्ताव भोव। 4
इला बनानो सेब्ही लोकन मां इज्ज़तरी गल समझी गाए, ते कुआन्श ते
मङ्ग एककी होरेरे लेइ वफादार रान, किजोकि परमेशर बदमाशी केरने ते
नाजाइज़ रिशते रखनेबालां केरो इन्साफ केरेलो। 5 अपने आपे दौलतरे
लालचे करां दूर रखा, ते ज़ेत्रु तुसन कां आए तैस्से मां राजी राथ, किजोकि
परमेशरे एप्पू एन ज़ोरुए, “अवं तीं करां कधे भी दूर न भोइलो, ते न कधे तीं
शैरेलो।” 6 एल्हेरेलेइ अस दिलेरी सेइं ज़ोई सकतम कि, “प्रभु मेरो मद्दत
केरनेबालोए, अवं डेरि नन्ना इन्सान मेरु कुन बगैडी सकते?” 7 जैना तुश्शे
अगुवे थिये, तैन याद रखा, ज़ैनेई तुसन परमेशरेरु बच्चन शुनावरु थियूं, इस
गल्ली पुड़ ध्यान देथ, कि तैना केरी ज़िन्दगी गुज़ेरतां चले जे, ते ज़ेरो विश्वास
तैन थियो तुस भी तैन केरो ज़ेरो विश्वास केरा। 8 यीशु मसीह हीज ते अज़
बल्के हमेशारे लेइ अककां ज़ेरोए। (aiōn g165) 9 अलग-अलग किसमां केरि
शिक्षाई सेइं न टेपलोथ, रोड़ु एन्ने कि तुश्शो दिल परमेशरेरे अनुग्रहे सेइं
मज़बूत राए, न कि एरो परहेज़ेरे खाने सेइं, ज़ेसेरे खाने बालन कोई फैइदो न
मैलो। 10 इश्शी अक एरी बलिदान केरनेरी ठारे, तैस मरां तैन खानेरी कोई
अज्ञाज़त नई जैना तेम्बु मां सेवा केरतन। 11 किजोकि महायाजक जैन
जानवरां केरो खून मन्दरे मां परमपवित्र ठैरी मां पापेरे बलिदानेरे लेइ नेतो
थियो, तैन केरो बाकी जिसम ज़ैडी इस्साएली लोक रहते थिये तैटुं बेइर
फुकते थिये। 12 एल्हेरेलेइ, यीशुए भी लोक एप्पू अपने खूने सेइं पवित्र
केरनेरे लेइ यरुशलेम नगरे करां बेइर दुःख झैल्लो ते मरो। 13 एल्हेरेलेइ,
एज्जा अस भी यहूदी केरि रसमन शैरतां यीशु पुड़ विश्वास केरम ते तैसेरो

ज़ेरो दुःख ते निन्दा झैल्लम। 14 किजोकि ई दुनिया इश्शू हमेशारू घर नई,
 पन अस एजनेबाले घेरे इंतज़ारे मां आम ज़ैन एजनेबाले वक्ते मां इश्शू भोलू।
 15 एल्हेरेलेइ असां यीशुएरे ज़िरिये परमेशरेरे लेइ तारीफरू बलिदान चाढ़म,
 यानी ज़ैखन अस अपने शब्दन सेइं इकरार केरतम कि यीशु इश्शो प्रभु आए।
 16 पन भलाई केरनि ते ज़ैन ज़रूरते तैन केरि मदत केरा, किजोकि परमेशर
 एरे ज़ेरे बलिदान्न सेइं खुश भोते। 17 अपने अगुवां केरो हुक्म मन्ना, ते तैन
 केरे अधीन राथ, किजोकि तैन केरे ज़िमेदारी कि तैना प्राणा केरि रखवाली
 केरन, ते एस कम्मेरो तैनेई परमेशरे हिसाब भी देने पेनोए। अगर तुस तैन
 केरो हुक्म मन्नेले त तैना अपनू कम खुशी सेइं केरेले त तुसन फैइदो भोलो,
 पन अगर तैस कम तकलीफ बुझेले त तुसन कोई फैइदो न भोलो। 18
 इश्शो लेइ प्रार्थना केरते राथ, असन याकीने इश्शो ज़मीर साफे, ते अस
 हर हिसाबे सेइं नेक नीती सेइं ज़िन्दगी गुज़ारनी चातम। 19 अवं तुसन कां
 बिन्ती केरताई कि मेरे लेइ प्रार्थना केरा, कि अवं फिरी लूशी तुसन कां एज्जी
 सेखी। 20 हुनी शान्ति देनेबालो परमेशर, ज़ैनी भैडुं केरो महान रखवालो
 मतलब प्रभु यीशु मसीहे, इश्शो प्रभु हमेशारे करारेरे खूने सेइं मुङ्दन मरां
 ज़ींतो कियो, (aiōnios g166) 21 तुसन हर रोडे कम्मे मां सिद्ध केरे, ज़ैस सेइं
 तुस तैसेरी मर्जी पूरी केरथ, ते ज़ैन किछ परमेशरे पसंद एइते तैस यीशु
 मसीहेरे ज़िरिये असन मां केरे, ते मसीहेरी बड़याई हमेशा-हमेशा भोती राए,
 आमीन। (aiōn g165) 22 हे ढलाव ते बेइनव, अवं तुसन कां बिन्ती केरताई
 कि मेरी तुस तैना गल्लां सबरी सेइं शुना, ज़ैना मीं तुश्शे हिम्मत बद्धनेरे लेइ
 लिखोरिन, किजोकि ई चिट्ठी जै मीं तुसन लिखी बड़ी नई। 23 ताके तुसन
 पतो लगे कि इश्शो विश्वासी ढ़ला तीमुथियुस कैदेरां छुटोरोए, ते अगर तै
 जल्दी अव, त अस दुइये तुसन सेइं मिलमेले। 24 अपने सेब्भी विश्वासी
 लोकन ते सेब्भी पवित्र लोकन जो इश्शू नमस्कार ज़ोथ। इतालिया मुलखेरे
 विश्वासी लोकेई तुसन जो नमस्कार ज़ोरुए। 25 तुसन सेब्भन पुड़ परमेशरेरो
 अनुग्रह भोतो राए, आमीन।

याकूब

1 अवं याकूब, जै परमेश्वर ते प्रभु यीशु मसीहेरे दास आई। अवं तैन 12 यहूदी गोत्रां केरे विश्वासी लोकन जैना तितर बितर भोइतां सारे दुनियाई मां रातन, तैन जो नमस्कार लिखताई। 2 हे मेरे ढलाव ते बेइनव, जैखन तुसन पुड़ अलग-अलग किसमां केरि अज्ञमैइशां एज्जन, त एस खुशारी गल समझा, 3 किजोकि तुस ज्ञानतथ, तुश्शे विश्वासेरे परखे गाने सेइं इन साबत भोते, कि तुस हेजू तगर भी परमेश्वरे पुड़ भरोसो रखतथ, ते तुस मुशकलन सबरी सेइं झाल्लेले। 4 पन मुशकलन मां सबर केरनि शिख्खा, कि तुस आत्मिकता मां मज्जबूत ते सिद्ध भोते गाथ, ते तुसन मां कोन्ची रोड़ी गल्लरी घटी न भोए। 5 पन अगर तुसन मरां कोन्ची अकलारी घटी भोए, त तै परमेश्वरे करां मग्गे, जै बगैर दोष लेइतां सेब्बन खुशी सेइं देते, त मगने बाले दित्ती गाली। 6 पन विश्वासे सेइं मग्गे, ते शक न केरे। किजोकि शक केरनेबालो समुन्द्रेरी छेल्ली केरो जेरोए, जैना हवाई सेइं चेलतिन ते उछङ्गतिन। 7 एरो मैन्हु इन न समझे, कि मीं प्रभु करां किछ मैलेलू। 8 ई मैन्हु दूमन्नोए ते एपनी सैरी गल्लन मां चंचल आए। 9 गरीब विश्वासी ढला खुश भोए, किजोकि परमेश्वरे तैसेरी आदर कियोरीए। 10 ते धनी विश्वासी अपने घटिया हालती पुड़ खुश भोए, किजोकि घासेरे फूड़ेवेंरो जेरो मिटी गातो। 11 दिहाड़ी निसते बड़ी धुप पेतीए, ते घासे शुकाते, ते तैसेरू फूड़ोंव झैड़ी गाते, ते तैसेरी शोभा गाती रहतीए; तेन्हरे दौलतमन्द ढला भी अपने कम्मन मां मैरी गानेन। 12 धने तै मैन्हु, जै अज्ञमैइशी मां मज्जबूत रहते; किजोकि तै अपनो विश्वास साबत केरतां जिन्दगारू तैन इनाम हासिल केरेलो, जैसेरो वादो प्रभुए तैन सेइं कियोरोए, जैना तैस सेइं प्यार केरतन। 13 जैखन कोन्चेरी अज्ञमैइश भोए, त तै इन न जोए, कि मेरी अज्ञमैइश परमेश्वरेरी तरफां भोतीए। न बुरी गल्लन सेइं परमेश्वरेरी अज्ञमैइश भोइ बटतीए, ते न तै बुरी गल्लन सेइं केन्चेरी अज्ञमैइश केरते। 14 पन हर कोई अपने खुवैइशन मां खिचोइतां, ते फेसतां अज्ञमैइशी मां गाते। 15 ते फिरी बुरू केरनेरी खुवैइशरो नितीजो ई भोते, कि मैन्हु बुरी चीजां केरतन, ते आखरी मां तैन हमेशारी सज्जा मैलतीए। 16 हे मेरे ढलारे ढलाव ते बेइनव, धोखो न खाथ। 17 किजोकि हर रोडू वरदान, ते हर रोडू दान इश्शो बाजी परमेश्वरेरे तरफां आए, जैनी सैरी लोआं (यानी दिहाड़ी

चाँदनी, तारे) बनेहं। परमेशर हमेशा अक्कां ज़ेरो आए, तै छावरो ज़ेरो न बेदलो। 18 तैने अपने मेझी सेइं असन सच्चेरे वचने ज़िरिये सेइं नव्हीं ज़िन्दगी दित्ती, ताके अस तैसेरी सच्चनाई मरां फसलारे ज़ेरे पेइले फल भोम। 19 मेरे ट्लारे ढ्लाव ते बेइनव, ई गल तुस ज्ञानतथ, एलहेरेलेइ हर कोई मैन्हु शुन्नेरे लेइ हुशार ते ज़ोने मां पत्रोवं भोए, ते सरकी मां ढिल्लो भोए। 20 किजोकि ज़ैखन मैन्हु सरकी मां भोए त तै धार्मिकतारू कम न केरि बटे ज़ैस सेइं परमेशर खुश भोए। 21 एलहेरेलेइ सारी गंदगी ते दुष्ट दूर केरतां, तैन परमेशरेरु वचन नेरमी सेइं कबूल केरे, ज़ैन दिले मां छहु जेव, ज़ैन तुश्शे प्राणन मुक्ति देइ बटते। 22 पन परमेशरेरे वचने पुड़ चलनेबाला बना, ते सिर्फ शुन्ने बाले नई, ज़ैना अपने आपे धोखो देतन। 23 किजोकि ज़ै परमेशरेरु वचन शुन्ने बालो भोए, ते तैस पुड़ चलने बालो न भोए, त तै तैस मैनेरो ज़ेरोए, ज़ै अपनू तुतर शीशे मां हेरते। 24 ते तै अपनो आप हेरतां चलो गाते, ते तैखने बिसरते कि अवं केरो थियो। 25 पन ज़ै मैन्हु कानूने ध्यान सेइं पढ़ते, ज़ै पूरे तरीके सेइं असन आज़ादी देते, सिर्फ शुने न पन तेन्हरे कम केरते, तै अपने कम्मे मां बरकत हासिल केरेलो। 26 अगर कोई अपनो आप भक्त समझे, ते अपनि ज़िभी कैबू मां न रख्खे, तै अपने आपे धोखो देते, ते तैसेरी भक्ति बैफैइदी आए। 27 इश्शो बाजी परमेशरेरे नेडे शुद्ध ते रोड़ी भक्ति ई आए, कि बे सहारां ते विधवां केरे मुसीबती मां खबर नी गाए, ते अपनो आप दुनियारे बुरे सुभावेरे अस्सरे करां दूर रख्खम।

2 हे मेरे ढ्लाव ते बेइनव, इश्शो महिमा बालो प्रभु यीशु मसीहेरो विश्वास तुसन मां तरफदैरी सेइं न भोए। 2 अगर अक मैन्हु सोन्नेरे छल्लो ते रोड़ां लिगड़ां लेइतां तुश्शे झुण्डे मां एज्जे ते अक गरीब भी मेलां लिगड़ां लेइतां एज्जे। 3 ते तुस तैस रोड़े लिगड़न बालेऱु तुतर हेरतां ज़ोथ, “तू इड़ी रोड़ी ठैरी बिश,” ते तैस गरीबे सेइं ज़ोथ, “कि तू इड़ी खड़ो रा, या इड़ी तल्ले बिश।” 4 त कुन तुसेई भेद भाव न कियो, ते बुरे खियाले सेइं इन्साफ केरनेबाले न भोए? 5 हे मेरे ट्लारे ढ्लाव ते बेइनव शुना, कुन परमेशरे दुनियारे गरीब न चुने, कि विश्वासे मां धनी भोन, ते तैस राज़ेरे बारस भोन, ज़ेसेरो वादो तैने तैन सेइं कियोरोए ज़ैना तैस सेइं प्यार केरतन। 6 पन तुसेई तैस गरीबेरी बैइज़ती की, कुन धनी लोक तुसन पुड़ जुलम न केरन? ते कुन तैना तुसन

आदालतन मां घसीटी-घसीटी न नेन? ७ कुन तैना तैस रोडे नंब्वेरी तुहीन न केरन ज़ेसेरे तुसन ज़ो ज़ोतन? ८ फिरी भी तुस पवित्रशास्त्रेरे इस वचनेरे मुताबिक, कि “तू अपने पढ़ोसी सेइं अपनो ज़ेरो प्यार केर,” सच्चे तैस राज़-कानून पूरो केरतथ, त रोडू केरतथ। ९ पन अगर तुस तरफदारी केरतथ, त पाप केरतथ; ते मूसेरो कानून तुसन पापी ठहराते। १० किजोकि अगर कोई मूसेरे सारे कानूने पुड़ चलते, ते एककी गल्ली पुड़ न चेलि बटो त तै सेब्ही गल्लन मां दोषी भोते। ११ एल्हेरेलेइ कि ज़ैने इन ज़ोवं, कि “तू बदमाशी न केरां,” तैने इन भी ज़ोवं, “तू खून न केरां” एल्हेरेलेइ अगर तीं बदमाशी न की, पन खून कियो फिरी भी तू मूसेरे कानूने पुड़ चलने बालो न भोव। १२ तुश्शी गल्लां ते बर्ताव तैन लोकां केरे ज़ेरो भोए, ज़ैन केरो इन्साफ आजादी देनेबाले कानूनेरे मुताबिक भोलो। १३ किजोकि ज़ैने दया न की तैसेरो इन्साफ बगैर दयाई सेइं भोलो। दया इन्साफे करां भारी भोतीए। १४ हे मेरे ढलाव ते बेझनव, अगर कोई ज़ोए कि मीं यीशु मसीह पुड़ विश्वासे, पन होरि केरे लेइ रोड़ां कम्मां न केरतो भोए, त तैस सेइं कुन फैइदो? कुन एरो विश्वास तैस मुक्ति देइ बटे? १५ अगर कोई विश्वासी ढला या बेझन भोए ज़ैन लिगड़ा केरि ज़रूरत भोए, ते तैन रोज़ खाने जो न भोए। १६ ते तुसन मरां कोई तैन सेइं ज़ोए, “खुशी सेइं गाथ परमेशर तुसन बरकत दे,” तुस गर्म राथ, ते रज्ज़ा; पन ज़ैना चीज़ां जानरे लेइ ज़रूरिन तैना तैन न दे, त कुन फैइदो? १७ तेन्चेरे विश्वास भी, अगर रोडे कम्मन सेइं न भोए, त अपने सुभावे मां मर्होए। १८ बल्के कोई ज़ोई बटे कि, “तीं विश्वासे, ते अवं रोड़ां कम्मां केरताई!” पन अवं ज़ोताई तू अपनो विश्वास मीं रोड़ां कम्मां केरे बगैर हिरा, ते अवं अपनो विश्वास रोडे कम्मन सेइं तीं हिरालो। १९ तीं विश्वासे कि अक्के परमेशरे, तू रोडू केरतस, भूतां भी विश्वास केरतन, ते थरकतन। २० पन हे निकम्मे मैन्हु तू इन न ज़ानस, कि रोडे कम्मन बगैर विश्वास मर्होए। २१ ज़ैखन इश्शे पूर्वज अब्राहमे अपनू मदू इसहाक बलिदान केरनेरे ठैरी पुड़ चाढ़ू, त कुन तै कम्मन सेइं धर्मी न भोव? २२ तीं हेरु कि विश्वासे तैसेरे कम्मन सेइं साथी अस्सर कियोरोए, ते कम्मन सेइं विश्वास सिद्ध भोव। २३ ते पवित्रशास्त्रेरो ई वचन पूरो भोव, “कि अब्राहमे परमेशरे पुड़ विश्वास कियो, ते तै तैसेरेलेइ धार्मिकता गनो जेव,” ते तै परमेशरेरो दोस्त भोव। २४ ते तुसेई

हेरु कि मैन्हु सिर्फ विश्वासे सेइं नई, बल्के कम्मन सेइं भी धर्मी भोते। 25
 तेन्नरे राहाब वेश्यां भी ज़ैखन तैसां बिस्तार देनेबाले लोक अपने घरे मां रखे,
 ते होरि बत्तां वापस भेज़े, त कुन कम्मन सेइं धर्मी न भोइ? 26 ते ज़ेन्नरे जान
 आत्मा बगैर मर्ही आए, तेन्नरे विश्वास भी रोड़े कम्मन बगैर मरोए।

3 हे मेरे ढलाव ते बेइनव, तुसन मरां बड़े परमेश्वरे वचनेरे उस्ताद न भोन,
 किजोकि तुसन पतोए, कि इश्शो उस्तादां केरो इन्साफ जादे सेखती सेइं
 भोलो। 2 अस बड़े बार गेलती केरतम, ज़े ज़ोने मां गलती न केरे, तैए सिद्ध
 मैनूए, ते सारे जानी कैबू केरते। 3 ज़ैखन अस अपने कैबू मां केरनेरे लेइ
 घोड़ां केरे ऐशी मां लगाम लातम, त अस तैन केरि सारी जानी भी फेरी
 सखम। 4 हेरा, पैनेरां ज़िहाजां भी, अगर बडां भोतन, ते तेज़ हवाई सेइं च्छलां
 गातन, फिरी भी एककी निकड़ी पतवारी सेइं च्छलानेबालो अपने मेझीं सेइं
 फिराते। 5 तेन्वरे ज़िभ भी, अगर अक निकड़ो अंगे, ते बेड़ि-बेड़ि घमण्डेरी
 गल्लां केरती, तक्का, थोड़ी ज़ेरि अग्गी सेइं केत्रे बड़े-बड़े जंगले मां अग लाई
 गातीए। 6 ज़िभ भी अक अगारी ज़ेरीए, ज़िभ इश्शो जानी मां अक बुरो
 हिस्सो आए, ते सैरी जानी पुड़ कलंक लातीए, ते ज़िन्दगारी दुनियाई मां अग
 लातीए, ते नरकेरी अग्गी सेइं बलती रहतीए। (Geenna g1067) 7 हर किसमां
 केरे जंगली जानवर, चुड़ोलू, ते पेटेरे भारे बाले जीप जन्तू ते दारियारे जानवर
 त इन्सानेरे हथ्ये एज्जी बटतन ते ओरे भी आन। 8 पन ज़िभी मैनन् मरां कोई
 भी कैबू मां न केरि सके, तै अक एरी बलाए ज़ै कथे रुके न, तै सप्पेरे ज़ेहरेरे
 ज़ेरीए नुकसान देने बालीए। 9 इस्से ज़िभी सेइं अस प्रभु ते बाजी परमेश्वरेरी
 तारीफ केरतम, ते इस्से सेइं मैन्हु, ज़ै परमेश्वरेरे रूपे मां बनोरोए श्राप देतम।
 10 एककी ऐशी सेइं शुक्र ते श्राप निसतन। हे मेरे ढलाव ते बेइनव एरु न
 लोडे भोरु। 11 कुन एककी नागे मरां मिठू ते लूनू पानी निस्सी बटते? 12 हे
 मेरे ढलाव ते बेइनव, कुन फेगेरो बुटे पुड़ ज़ैतून, या दाढ़ी पुड़ फैगू लेगि
 बटतन? तेन्वरे लूनो नाग भी मिठू पानी न निस्सी बटे। 13 तुसन मरां जानी ते
 समझदार कौने? ज़ै एरो भोए तै अपने कम्मन रोड़े चाल चलने सेइं तैस
 नम्रता सेइं साथी बांदो केरे ज़ै ज्ञाने सेइं पैदा भोतीए। 14 पन अगर तुस
 अपने-अपने मने मां सखत जलन, ते खुदगरज़ी रखतथ, त बेड़ि-बेड़ि गल्लां
 न केरथ ते सच्चेरे खलाफ झूठ न ज़ोइयथ। 15 इन ज्ञान तैन नई, ज़ैन स्वर्गों

ओरुए बल्के दुनियारू, ते जिसमानी, ते शैतानीए। 16 एल्हेरेलेइ कि ज़ैडी जलन, ते खुदगरज़ी भोतीए, तैडी फसाद ते हर बुरू कम भोते। 17 पन जैन ज्ञान स्वर्गों एइते तैन पेइलू त पवित्र भोते, फिरी मिलनसार, हलीम ते शिखालने बालू, ते दया ते रोडे कम्मन सेइं ते बगैर तरफदारी ते पाखंडे बगैर भोते। 18 ते मिलाप केराने बालां केरे लेइ धार्मिकतरो फल मेल मलापे सेइं साथी बेव गाते।

4 तुसन मां लड़ई ते झागडे कोट्ठां एइतन? कुन तैन खुवैइशन सेइं नई जैना तुश्शे अंगन मां लेडतिन? 2 तुस खुवैइश रखतथ, पन तुसन मैल्ले न, एल्हेरेलेइ तुस खून ते जलन केरतथ, ते किछ हासिल न केरि बटथ तुस झागड़तथ ते लड़तथ; तुसन एल्हेरेलेइ न मैल्ले, कि तुस मगथ न। 3 तुस मगतथ ते मैल्ले न, किजोकि बुरी इच्छा सेइं मगतथ, ताके अपने एशो मां खर्च केरथ। 4 हे बेर्इमान लोकव, कुन तुस न ज्ञानथ, कि दुनियारी चीज़न सेइं दोस्ती रखनी परमेशरे सेइं बैर केरनोए, ज़ै कोई दुनियारो दोस्त भोनो चाते, तै अपनो आप परमेशरेरो दुश्मन बनाते। 5 कुन तुस इन समझतथ, कि पवित्रशास्त्र बेफैइदू ज़ोते कि, “ज़ै आत्मा तैने असन मां छडी, कुन तै एरी इच्छा केरती, ज़ेसेरो फल जलन भोए?” 6 पन ज़ै अनुग्रह परमेशर देते तै बडो मज़बूते, एल्हेरेलेइ पवित्रशास्त्रे मां इन लिखोरुए, “कि परमेशर अभिमान केरनेबालां केरो मुकाबलो केरते, पन दीनन् पुड़ अनुग्रह केरते।” 7 एल्हेरेलेइ परमेशरेरे अधीन भोथ, ते जैन शैतान तुसन करां करानू चाते तैन न केरा, त तै तुसन करां दूर नश्शेलो। 8 परमेशरेरे नेडे एज्जा, त तै तुश्शे नेडे एज्जेलो, हे पापी लोकव, अपने ज़िन्दगी करां पाप दूर केरा, ते हे दुमने बाले लोकव अपने मन्न पवित्र केरा। 9 अपने पापां केरे वजाई सेइं दुखी भोथ, ते शोग केरा, ते लेरां देथ, तुश्शी हासी शोगे मां, ते तुश्शी खुशी उद्देसी मां बेदलोए। 10 प्रभुएरे सामने नप्र बना, त तै तुसन इज्जत देइतां उच्चे केरेलो। 11 हे ढ्लाव ते बेइनव, एककी होरेरी तुहीन न केरा, ज़ै अपने ढ्लाएरी तुहीन केरते, या अपने ढ्लाए पुड़ दोष लाते, तै मूसेरे कानूनेरी भी तुहीन केरते, ते मूसेरे कानूने पुड़ दोष लाते, ते अगर तू कानूने पुड़ दोष लातस, त तू कानूने पुड़ चलने बालो न भोव, पन तैसेरो हाकिम भोव। 12 मूसेरो कानून देनेबालो ते हाकिम त अवके, तै परमेशर आए, ज़ैस कां बचाने ते नाश केरनेरी शक्ति

आए, तू कौन आस, जै अपने पड़ोसी पुढ़ दोष लातस? 13 तुस ज़ैना इन ज़ोतथ, “कि अज़ या कालां अस कोन्ची होरि नगर मां गेझतां अक साल बीतामेले, ते बुपार केरतां फैइदो उठामेले।” 14 ते इन न ज्ञानथ कि कालां कुन भोलू, शुना, तुश्शी ज़िन्दगी आए कुन? तुस त भाख्वेरे ज़ेरेथ, जै थोड़े फ़िरे लेइहोते, ते फिरी गैइब भोते। 15 एल्हेरेलेइ तुसेई इन ज़ोरू लोड़े, “अगर प्रभु चाए, त अस ज़ींते रहमेले, ते इन या तैन कम भी केरमेले।” 16 पन हुनी तुस अपने अभिमाने पुढ़ घमण्ड केरतथ, एरु सब घमण्ड बुरू भोते। 17 एल्हेरेलेइ जै कोई भलाई केरनि ज़ानते ते न केरे, तैसेरेलेइ ई पापे।

5 हे दौलतमंदव विश्वासी लोकव, शुना, तुस अपने एजनेबाले दुख्वेरे लेइ ज़ोरे-ज़ोरे लेरां देथ। 2 तुश्शू धन नाश भोवं ते तुश्शे लिगड़न खर लग्गे। 3 तुश्शे सोन्ने चैंदी मोरच्चो लगो, ज़ेइस परमेश्वरे तुश्शो इन्साफ केरेलो त ई मोरच्चो तुश्शे खलाफ गवाहेरो ज़ेरो भोलो, ते अग्गारो ज़ेरो तुश्शू मास फुकेलो, तुसेई आखरी युगे मां धन अकोटू कियूं। 4 तक्का, ज़ैन मज़दूरेई तुश्शां ऊडारां कट्टां, तैन केरि तै मज़दूरी जै तुसेई तैन न दित्ती, चिन्डां मारने लोरीए, ते फसल कटने बालां केरि फरयाद फौजरे परमेश्वरे शुनोरीए। 5 तुस धेरती पुढ़ एश केरने मां लग्गोरो राए, तुसेई सिर्फ अपने सुख्वेरे लेइ ज़िन्दगी ज़ी, एल्हेरेलेइ तुसेई अपनो आप तैस दिहाड़े लेइ तियार कियोरोए ज़ेइस परमेश्वर तुश्शो इन्साफ केरेलो। 6 तुसेई धर्मी दोषी बनेझतां मारो, तै तुश्शे सामनो न केरे। 7 ते हे ढलाव ते बेइनव, प्रभुएरे एजने तगर सबरी सेइं बलगा, हेरा, ज़मीनदार कीमती फसलरे कीमती फलेरे उमीदरो पेइली ते आखरी झैड़ी भोने तगर सबरी सेइं बलगते। 8 तुस भी तेन्वरे सबरी सेइं बलगा, ते अपने दिले मज़बूत केरा, किजोकि प्रभुएरु एजनू नेड़ाए। 9 हे ढलाव ते बेइनव, एककी होरि पुढ़ दोष न लाथ ताके तुसन पुढ़ भी दोष न लाव गाए, हेरा, हाकिम नेड़े ते एजनेरे लेइ तियारे। 10 हे ढलाव ते बेइनव, ज़ैन नेबैई प्रभुएरे नंवे सेइं गल्लां की, तैन सबर केरनेरो अक नमूनो समझा। 11 हेरा, अस बलगने बालन जो धन ज़ोतम, तुसेई अय्यूबेरे सबरारे बारे मां शुनोरुए, ते प्रभु करां तैसेरो जै प्रतिफल भोव तैने भी बुझू, ज़ैस सेइं प्रभुएरी बड़ी महरबानी ते दया बांदी भोतीए 12 पन हे मेरे ढलाव ते बेइनव, सेब्भन करां बहुगल ईए, कि कसम न खाथ, न स्वर्गी न धेरतरी, न होरि कोन्ची चीज़री, पन

तुश्शी गल हांएरी हाँ, ते न एरी नां भोए, फिरी परमेश्वर तुसन सज्जा न देलो।

13 अगर तुसन मां कोई दुखी भोए त तै प्रार्थना केरे, अगर खुश भोए, त परमेश्वरां भजना ज़ोए। 14 अगर तुसन मां कोई रोगी भोए, त कलीसियारे बुजुर्गन कुजाए, ते तैना प्रभुएरे नंवे सेइं तैस पुड़ तेल मेलतां तैसेरेलेइ प्रार्थना केरन। 15 ते विश्वासेरी प्रार्थनाई सेइं रोगी बचेलो ते प्रभु तैस बज़्जालो, ते अगर तैने पाप कियोरे भोले त परमेश्वर तैस माफ़ केरेलो। 16 एल्हेरेलेइ तुस एककी होरेरे सामने अपने-अपने पाप मन्ना, ते एककी होरेरे लेइ प्रार्थना केरा, जैस सेइं तुस बेज़्जोथ, धर्मी मैनेरे प्रार्थनारे अस्सरे सेइं बड़ु किछ भोइ बटते। 17 एलिय्याह भी इश्शो ज़ेरो दुःख सुख झैल्लने बालो मैन्हु थियो, तैने दिले सेइं प्रार्थना की, कि झैड़ी न भोए, ते सड़े टलाई साल झैड़ी न भोइ। 18 फिरी तैने प्रार्थना की, त अम्बरेरां झैड़ी भोइ, ते धेरती पुड़ फसल भोइ। 19 हे मेरे ढलाव ते बेइनव, अगर कोई विश्वासी परमेश्वरी सच्ची शिक्षा मन्नी शारे, ते कोई तैस मनफिरानेरे लेइ मद्दत केरे, 20 त तै इन बुझो, कि जै कोई कोन्ची भटकोरे पैपी मनफिरानेरे लेइ मद्दत केरे, त तै एककी प्राणे (मैन्हु) मौती करां बज़्जालो, ते परमेश्वर तैसेरे बड़े पाप भी माफ़ केरेलो।

1 पतरस

1 अवं पतरस यीशु मसीहेरो प्रेरित आई, अवं ई चिट्ठी परमेशरे चुनोरे लोकां केरे लेइ लिखने लोरोई, ज़ैना परदेशी केरे ज़ेरे पुन्तुस, गलातिया, कप्पदूकिया, आसिया ते बितूनिया इलाकां केरे अलग-अलग नगरन मां तितर-बितर भोइतां रातन। 2 बाजी परमेशरे बड़ो पैइलो ई फैसलो कियोरो थियो कि तुस तैसेरे लोक भोथ त कने तै तुसन पवित्र आत्मारे कम्मेरे ज़िरिये पवित्र बनाए। तैने एन एल्हेरेलेइ कियूं ताके तुस यीशु मसीहेरी मन्नथ ते तैसेरे खूनेरे ज़िरिये सेइं शुद्ध भोथ। अवं प्रार्थना केरताई कि परमेशर तुसन अनुग्रह ते शान्ति जादे करां जादे दे। 3 इश्शो प्रभु यीशु मसीहेरे बाजी ते परमेशरे शुक्र भोए, परमेशरे असन पुड महान दया केरतां असन नव्वी जिन्दगी दित्ती। किजोकि परमेशरे यीशु मसीह मुडदन मरां ज़ींतो कियो त कने तैने अस पूरी उमीदी सेइं ज़ीनेरे काबल बनोरेम, मतलब असन तैन चीजां हासिल केरनेरी पूरी उमीदे, ज़ैन केरो देनेरो वादो परमेशरे असन सेइं कियोरोए। 4 अस तैस विरासती हासिल केरनेरो इंतज़ार केरने लोरेम ज़ै परमेशरे इश्शो लेइ तियार कियोरीए। कोई भी तैन चीज़न कधी बरबाद न केरि बटे। किछ भी तैस खराब केरि बटे। तैना चीजां कधी भी पुरैनी न भोली ते तैन केरि खूबसूरती कधे न घटेली। परमेशरे इना चीजां तुश्शो लेइ स्वर्गे मां रेखोरिन। 5 परमेशर तुसन अपने महान शेक्करे ज़िरिये सेइं सम्भाले, किजोकि तुस यीशु पुड विश्वास केरतथ। तै तुसन यीशु मसीहेरे वापस एजने तगर सम्भैलतां रखेलो। तेइस तुस ज़ानेले कि परमेशरे तुस पापे करां ते मौती करां पूरे तरीके सेइं बचावरेथ। 6 तुसेई इन सेब्बी चीजां केरे बारे मां खुश भोरु लोडे, चाए हुना किछ वक्तेरे लेइ अलग-अलग किसमेरी मुसीबतां तुसन दुखी केरतिन। 7 इन मुसीबतां केरो मकसद ई आए कि इन बांदू भोए कि तुस सञ्चे परमेशरे पुड विश्वास केरतथ। तुश्शो यीशु मसीह पुड विश्वास केरनो सोन्ने करां भी जादे कीमतीए। ज़ेन्चरे नाश भोनेबालू सोन्नू अग्गी सेइं परखू ते शुद्ध कियूं गाते, तेन्चरे अगर तुश्शो विश्वास अगारे ज़ेरे अज़मैइशन सेइं परखनेरे बाद भी मज़बूत रहते त ज़ेइस यीशु मसीह फिरी एज्जेलो, परमेशर तुसन जो शाबाश ज़ोलो, महिमा ते आदर देलो। 8 तुसेई यीशु मसीह कधे नई लवरो, पन फिरी भी तुस तैस सेइं प्यार केरतथ। तुस हुना तैस न लाथ पन तुस तैस पुड

विश्वास केरतथ । एसेरो निरीजो ई आए, कि तुस बड़े खुश आथ । तुस एत्रे खुश आथ कि लफ़ज़न मां बियांन न केरोए । ९ तुस एल्हेरेलेइ खुश आथ किजोकि परमेशर तुश्शे प्राण पापेरे सज्जाई करां बचाने लोरोए । इन यीशु मसीह मां तुश्शे विश्वासेरु इनामे । १० ई मुक्ति किछ एरी थी ज़ेसेरे बारे मां नबी बड़ू ज्ञानू चाते थिये । तैनेई ज़ोवं केन्चरे परमेशर तुसन पुड़ अनुग्रह केरतां बचालो ज़ेसेरे काबल तुस न थिये, तैनेई बड़ी जांच पड़ताल की, कि तैन जुवाब मैल्ले । ११ मसीहेरो आत्मा तैन मां थियो ते तैन सेइं ज़ोने लोरो थियो कि मसीहे केन्चरे दुःख झैल्लेलो ते तैटुं बाद तैस महान आदर दित्ती गाली । एल्हेरेलेइ तैना इन खोज केरतां तोपने लगे कि सज्जे मसीह कैन भोलो ते इन केइस भोलू । १२ पन परमेशरे इन अपने गल्लां ज़ोनेबालन सेइं ज़ोवं, कि तैन केरो सन्देश तैन केरे अपने आपेरे लेइ नई, पन तुश्शे लेइ आए । तै सन्देश यीशु मसीहेरे बारे मां खुशखबरी आए, जै तुसेई इस वक्त शुनी । परमेशरे स्वर्गेरां पवित्र आत्मा भेजो कि लोकां केरि मद्दत केरे कि तैना तुसन खुशखबरी शुनान । इन सब एत्रू हैरान केरनेबालू ए कि स्वर्गदूत भी इन हेरनेरी बड़ी इच्छा रखतन । १३ एल्हेरेलेइ अपने मने तियार केरा ते अपने आपे कैबू मां रख्खा । तैस मुक्तरी उमीद रख्खा जै तुसन अनुग्रहे सेइं तेइस मैलनी ज़ेइस यीशु मसीह दुबारा इस दुनियाई मां एजनोए । १४ परमेशरे मन्ना किजोकि तुस तैसेरे बच्चेथ । बुरां कम्मां न केरा जैना तुस बुरी इच्छाई सेइं केरते थिये ज़ेइस तुस परमेशरेरे सज्जाई न थिये ज्ञानते । १५ पन हुनी तुस जैन किछ केरतथ तैस मां पवित्र भोथ, ज़ेन्चरे परमेशर पवित्रे ज़ैने तुस अपने बच्चे भोनेरे लेइ चुनोरेथ । १६ किजोकि पवित्रशास्त्रे मां परमेशरे ज़ोवरु ए “पवित्र बना, किजोकि अवं पवित्र आई” । १७ जैखन तुस प्रार्थना केरतथ तुस परमेशरे जो बाजी जोतथ । पन याद रख्खा तै तरफदारी न केरे । एल्हेरेलेइ जैखन तुस इस दुनियाई मां परदेशी केरे ज़ेरे रातथ त तुसेई तैसेरी बड़ी इज्जत कियोरी लोडे । १८ किजोकि तुस ज्ञानतथ, बीतोरे वक्ते मां तुस बेकार तरीके सेइं ज़ीते थिये ज़ेन्चरे तुश्शे दादे-पड़दादे ज़ीते थिये । पन हुनी तुस बेकार ज़िन्दगी करां छुटावरेथ, तुस नाश भोनेबाले सोन्ने चैंदी सेइं नई घिन्नोरे, १९ पन मसीहेरे कीमती खूने सेइं घिन्नोरेथ, मसीह जै शुद्ध ते सिद्ध गबड़ेरो ज़ेरोए । २० दुनिया बनाने करां पेइले परमेशरे इन ठहरावरु थियूं कि यीशु मसीह मुक्ति देनेबालो

भोलो। पन तै इन आखरी दिहाड़न मां इस दुनियाई मां अव ताके तुश्शी
मद्दत केरे। 21 यीशु मसीहे जैन कियूं तैसेरे वजाई सेइं तुस हुनी परमेशरे पुड
विश्वास केरथ, तैए आए जैने यीशु मसीह मुड्दन मरां जींतो कियो ते तैस
आदर दित्ती ताके तुश्शो विश्वास ते उमीद परमेशरे पुड भोए। 22 किजोकि
तुस सच मन्नेरे ज़िरिये शुद्ध कियोरेथ, ते हुनी तुसेई विश्वासी सैथन सेइं
इमानदेरी सेइं प्यार कियोरो लोडे। तुसेई एककी होरि सेइं गहराई ते पूरे दिले
सेइं प्यार कियोरो लोडे। 23 किजोकि तुसन परमेशरेरी तरफां नब्बी ज़िन्दगी
मैलोरी। तुसेई ई ज़िन्दगी एरी चीज़ी सेइं नई हासिल कियोरी जै नाश भोली।
पन तैस सेइं जैन हमेशा रालू। मतलब परमेशरेरे जींते ते हमेशा रानेबाले वचने
सेइं मैलोरीए। (aiōn g165) 24 किजोकि पवित्रशास्त्र ज़ोते “सारे लोक घासेरे
ज़ेरे आन ते तैन केरि शोभा जंगली फूड़ोंवेरी ज़ेरीए। घास शुक्की गालो ते
फूड़ोंव झेड़ी गालू। 25 पन प्रभुएरु वचन सदा बनोरु रालू, ते वचन मसीहेरे
बारे मां खुशखबरी जैन तुसन शुनव जेवं।” (aiōn g165)

2 एल्हेरेलेइ सब किसमेरो बुरो सलूख केरनो शारा। होरन धोखो न देथ,
पाखंड न केरा। ते होरन सेइं जलन न केरा। होरि केरे बारे मां बुरी गल्लां न
ज़ोथ। 2 ज़ेन्वरे नंवे ज़मरे बच्चे अपने अम्मारे खालिस दुद्देरी इच्छा रखतन,
तेन्वरे तुस भी परमेशरेरु वचन शिखनेरे लेइ इच्छा रख्खा जैस सेइं तुस
आत्मिक तरीके सेइं मज़बूत बनेले। फिरी आखरी मां परमेशर तुसन दुनियारी
बुरी चीज़न करां पूरे तरीके सेइं बच्चालो। 3 ज़ेन्वरे पवित्रशास्त्र ज़ोते, “तुसेई
तजरबे सेइं ज़ानेरुए कि प्रभु भलो आए।” 4 तुस प्रभु यीशु कां ओरेथ। तै
खास घोड़ेरे ज़ेरोए जै घरेरे बुनियादी मां लोरोए, पन तै जींतो घोड़े। बड़े लोकेई
तै रद कियो, पन परमेशरे तै चुनो ते बड़े कीमती मन्नो। ज़ेन्वरे लोक घोड़न
सेइं घर बनातन, तेन्वरे परमेशर तुसन एककी एरे द्युण्डे मां शामिल भोनेरी
वजा बनाने लोरोए, जैस मां परमेशरेरो आत्मा रहते, ताके तुस जैन यीशु
मसीहे इश्शो लेइ कियोरुए तैसेरे वजाई सेइं याजक बना, जैना बलिदाना
चाढतन, तुस भी तैन केरां ज़ेरां रोड़ां कम्मां केरथ जैन सेइं परमेशर खुश
भोते। 6 एल्हेरेलेइ ज़ेन्वरे परमेशर पवित्रशास्त्रे मां ज़ोते, “तक्का, अवं अक
मैन्हु सिय्योन नगरे मां रखने लोरोई। जै कूनेरो खास ते चुनोरो घोड़े, तै अक
कीमती घोड़ेरो ज़ेरो जै मुनीयादी मां रख्खोरोए। ते जै तैस पुड़ विश्वास केरेलो

तै कोन्ची भी तरीके सेइं शरमिनदो न भोलो।” 7 तुस ज़ैना यीशु मसीह पुड विश्वास केरतथ ई घोड़ तुश्शे लेइ बड़ो कीमतीए। पन पवित्रशास्त्र तैन लोकां केरे बारे मां ज़ोते ज़ैना विश्वास न केरन, “ज़ै घोड़ राज़ मिस्ट्रैइ इस्तेमाल केरनो न चाव, तैए घरेरे मुनीयादरो खास घोड़ भोव,” 8 ते पवित्रशास्त्र फिरी ज़ोते, “ई घोड़ लोकां केरे बिछङ्गनेरी वजा भोलो। ई अक चटूने ज़ै तैन बिछङ्गेली।” तैना एन्नरे बिछङ्गतन किजोकि तैना परमेशरेरे सन्देश मन्ने करां इन्कार केरतन। तैन सेइं इन भोनेरे लेइ परमेशर इन थापेरु थियू। 9 पन तुस तैन केरे ज़ेरे नई किजोकि तुस परमेशरेरे चुनोरे लोक आथ, परमेशर ज़ै राज़ोए, तुस तैसेरे याजक आथ, तुस एरे लोक आथ ज़ैनई अपनो आप परमेशरे सोंफोरोए, ते परमेशरेरे अपने लोक आथ। तैने तुस आंधरे मरां बड़े लोई मां कुजावरेथ, ताके तुस परमेशरेरे महान कम्मां केरे बारे मां एलान केरथ। 10 तुश्शे बारे मां होशे नेबे ज़ैन ज़ोरू तैन सच्चे, “तुस पेइले परमेशरेरे लोक न थिये पन हुनी तुस परमेशरेरे लोक आथ। तुस पुड़ पेइले परमेशरेरी दयाई न थिये ज़ानते पन हुनी ज़ानतथ, किजोकि तैने तुसन पुड़ अपनि दया हिरावरीए।” 11 हे ट्लाराव, तुस इस दुनियाई मां परदेशी ते मुसाफरां केरे ज़ेरे ज़ीने लोरेथ, अवं तुसन खबरदार केरताई, कि तुस जिसमेरी सैरी पापी खुवैइशन करां दूर राथ, किजोकि तैना हमेशा तुश्शे आत्मारे खलाफ लेडतिन। 12 ज़ैना लोक परमेशरे पुड़ विश्वास न केरन तैना तुश्शे चेव्रे पासन रहतन, तैना ज़ोले तुस गलत केरने लोरेथ। तुस एरी रोड़ी ज़िन्दगी ज़ीथ कि लोक तुश्शां रोड़ां कम्मां हेरतां तैस दिहाड़े ज़ेइस यीशु मसीह दुबारा एजनो परमेशरेरी बडयाई केरेले। 13 प्रभुएरे इज्जातरे खातर, मैन्हु केरे ठहरावरे हर एककी अधिकारेरे अधीन राथ, किजोकि ई प्रभुएरी इच्छा आए, हकोमत केरनेबालेरे अधीन एल्हेरेलेइ राथ किजोकि तै बड़ो खास अधिकारी आए। 14 ते हाकिमेरे भी अधीन भोथ, किजोकि राजो तैस बुरां कम्मां केरनेबालन सज़ा देने लेइ ते रोड़ां कम्मां केरनेबालां केरि तारीफ केरनेरे लेइ इस्तेमाल केरते। 15 किजोकि परमेशरेरी मर्जी ईए, कि तुस रोड़ां कम्मां केरतां तैना बेवकूफ लोकन ज़ैना परमेशरे न ज़ानन, तुश्शे खलाफ दोष लाने करां रोकथ। 16 हुनी तुस पापेरे गुलाम नई किजोकि तुस इश्शे प्रभु यीशु मसीहेरे ज़िरिये आजाद कियोरेथ। पन अपनि ई आजादी बुरे कम्मां केरे लेइ इस्तेमाल न केरा, पन तुस भला

कम्मां केरे ज़िरिये इन हिराथ कि तुस सच्चै परमेशरे दास आथ। 17 सेव्ही
केरि आदर केरा, अपने विश्वासी साथी लोकन सेइं प्यार केरा, परमेशरे
करां डरा, हकोमत केरनेबालेरी इज्जत केरा। 18 हे घरन मां कम केरनेबाले
सेवकव, तुस जैना विश्वासी आथ अपने मालिकां केरे हुक्म मन्ना ते हमेशा
तैन केरि आदर केरा। इन न सिर्फ दया केरनेबालन सेइं केरा, बल्के जैना
दया न केरन तैन सेइं भी। 19 किजोकि अगर अस बगैर गलती केरतां दुःख
झैलतम त अस ज्ञानतम कि परमेशरे सब किछ ज्ञानते ते परमेशर असन
सेइं खुश भोते। 20 किजोकि अगर तुसेई पाप केरतां मार खाइ त तुश्शी कोई
बढ़ाई नई कि तुसेई सज्जाई मां सबर की। पन अगर भलाई केरतां दुःख
झैलतथ ते सबर केरथ त इस सेइं परमेशर खुश भोते। 21 परमेशरे तुसन
कुजानेरी अक वजा ई भी आए कि तुस तैसेरेलेइ दुःख झैल्ला, मसीह भी
तुश्शे लेइ दुःख झैल्लातं तुसन अक मिसाल दित्ती। तुसेई भी तेन्हरे कियोरु
लोडे ज़ेन्वरे मसीहे कियूं। 22 पवित्रशास्त्र ज़ोते, तैने कधी पाप नई कियोरो।
तैने कधी झूठ नई ज़ोवरू। 23 ज़ैखन लोकेई यीशु बेइज्जत कियो, त तैने
तैसेरे बदले मां तैना बेइज्जत न किये। ज़ैखन लोकेई तैस दुःख दित्तो त तैने
बदले मां तैन दुख न दित्तो, बल्के तैने परमेशरे पुड़ भरोसो कियो कि तै तैसेरी
मद्दत केरे। तै ज्ञानतो थियो कि परमेशर हमेशा धार्मिकताई सेइं लोकां केरो
इन्साफ केरते। 24 ज़ैखन मसीह मरो, त तैसेरे जानी पुड़ इश्शे पापां केरे लेइ
तैस क्रूसे पुड़ सज्जा दित्ती। तैने एन कियूं कि अस पाप केरनो बंद केरम ते
धार्मिकतारी ज़िन्दगी ज़ीनी शुरू केरम। तैसेरे ज़खम जैना तैनी झैल्ले तैन केरे
वजाई सेइं अस बेज़ोए। 25 तुस पेइले टेपलोरी भैड़ां केरे ज़ेरे थिये, पन हुनी
तुस मसीह कां वापस ओरेथ जै तुश्शे प्राणा केरो पुहाल ते रखवालोए।

3 हे कुआन्शव, तुस भी अपने मुन्शां केरे अधीन राथ। एल्हेरेलेइ अगर इन
मां कोई एरो भोए जै परमेशरे वचने न मनतो भोए, तुश्शे ज़ीनेरे तरीके सेइं
तुश्शे बगैर ज़ोने तैन केरे विश्वास केरनेरी वजा भोली। तैना तुश्शे रोडे ते पवित्र
बर्ताव हेरतां मसीह पुड़ विश्वास केरेले। 3 ते तुश्शी सजावट दिखावेरी न
भोए, मतलब अलग-अलग किसमे दोग बनानो, ते सोन्नेरे गेहने, या किसमा-
किसमां केरां लिगड़ां लाना। 4 बल्के तुस अपने गुना केरे ज़िरिये अपनो आप
खूबसूरत बनाथ जै तुसन करां दूर न गाए, मतलब नेरमी ते शांत स्मावे सेइं

जै परमेश्वरे लेइ बडो कीमती आए। ५ ते पेइले जुमाने मां पवित्र कुआन्शां
 भी, जैना परमेश्वरे पुङ् उमीद रेखती थी, तैना अपनो आप इस तरीके सेइं
 सज्जैती ते अपने-अपने मुन्शां केरे अधीन रैती थी। ६ ज्ञेन्हरे सारा अब्राहमेरे
 अधीन रहती थी ते तैस ज्ञो मालिक ज्ञोती थी, ते तुस भी अगर भलाई केरथ,
 ते केन्ची किसमेरे फिक्रन सेइं न डरथ त सारारे कुइयां केरि ज़ेरि भोली। ७
 तेन्हरे हे मुन्शव, तुस भी समझदैरी सेइं कुआन्शन सेइं ज़िन्दगी बीताथ ते इन
 याद रख्खा कि तैना तुसन करां कमज़ोरन, एल्हेरे तुसेई तैन केरि आदर
 कियोरी लोडे, किजोकि तुस दुइये तैस वरदानेरे हिसेदार आथ जैन परमेश्वर
 तुसन अनुग्रहे सेइं दितोरु आए, तै हमेशारी ज़िन्दगी आए। एरु केरा ताके
 ज़ैखन तुस प्रार्थना केरथ त परमेश्वर तुशी प्रार्थना शुने। ८ आखरी मां अवं
 तुसन इन ज्ञोताई, तुसेई सैभई अक मन भोवरु लोडे ते एक्की होरि सेइं
 हमदेरदी केरा ते एक्की होरि सेइं ढला बेइनां केरो ज़ेरो प्यार केरा, ते एक्की
 होरि पुङ् दया केरा, एक्की होरेरे लेइ नर्म बना। ९ बुरैझेरे बदले बुराई न केरा,
 गैई केरे बदले गैई न देथ, पन इसेरे बदले बरकत देथ, किजोकि परमेश्वरे तुस
 होरन बरकतां देनेरे लेइ कुजावरेथ। अगर तुस इन केरतथ, त परमेश्वर तुसन
 भी बरकतां देलो १० किजोकि पवित्रशास्त्र ज्ञोते, “अगर कोई मैन्हु ज़िन्दगरो
 आनन्द नेनो चाते, ते रोडे दिहाडे हेरने चाते त तैनी ध्यान लोडे दित्तोरु कि बुरी
 गल्लां न ज़ोए। ते तैनी होरन धोखो न लोडे दित्तोरो। ११ ते बुरू केरनू बंद
 कियोरी लोडे बल्के तैनी रोडु कियोरु लोडे। होरन सेइं मेल मिलापे सेइं ज़ीनेरे
 लेइ मेहनत कियोरी लोडे। १२ किजोकि प्रभु तैन लोकां केरु ध्यान रखते जैना
 तैन्ने केरतन जैन सही आए, ते तै हमेशा तैन केरि प्रार्थना शुन्नेरे लेइ तियार
 रहते। पन परमेश्वर तैन केरे खलाफ कम केरते जैना बुरू केरतन।” १३ अगर
 तुस हमेशा भलू केरनेरी कोशिश केरथ, त फिरी कोई भी तुसन हकीकति
 मां नुकसान न पुज़ेई बटे। १४ अगर अस धार्मिकतारे स्भावेरे वजाई सेइं
 दुःख झैल्लम, त अस सच्चे धन भोले, पन अगर कोई असन डराते त तैस
 करां डरू न लोडे ते न घबरावरु लोडे। १५ पन इसेरे बदले, तुसेई मसीहेरी
 आराधना अपने ज़िन्दगरे प्रभुएरे रूपे मां कियोरी लोडे ते जै कोई तुसन तुश्शे
 उमीदरे बारे मां किछ पुँछे जैस मां सारे विश्वासी शामिल आन, त तैस जुवाब
 देनेरे लेइ हमेशा तियार राथ, पन नेरमी ते आदरी सेइं। १६ हमेशा तैन्ने केरा

जैन सही भोए। तैखन अगर लोक तुश्शो लेइ बुरु ज़ोले त तैना मसीह सेइं
तुश्शो रिश्तो भोनेरे वजाई सेइं तुश्शो रोडो बर्ताव हेरेले त तैना छिथोले। 17
किजोकि इन रोडू आए अगर इशां रोडां कम्मां केरे वजाई सेइं अस दुःख
झैल्लम, अगर इश्शो लेइ परमेश्वरी इच्छा ई आए। इन इश्शो बुरां कम्मां केरे
वजाई सेइं दुःख झैल्लने करां बडू रोडूए। 18 अवं इन ज़ोताई, मसीहे भी
इश्शो पापां केरे लेइ दुःख झैल्लो ते मरो। तै एककी बारे मरो ते तैस दुबारा
मरनेरी ज़रूरत नई। तै अक धर्मी मैन्हु थियो जै पापी लोकां केरे लेइ मरो
ताके तै असन परमेश्वरे कां आने। तैनेई तैसेरो जिसम मारो पन तै पवित्र
आत्मारे शेक्करे जिरिये ज़ींतो कियो 19 तैटुं बाद तैसेरी आत्मा तैन आत्मान
खुशखबरी शुनाने जेर्ई, जैना परमेश्वरे तैस ठैरी कैद कियोरिन ज़ैडी मर्ने लोकां
केरि आत्मा रैती थी। 20 इन तैन मैन्हु केरि आत्मा आन जैनेई बड़े पेइले
परमेश्वरो हुक्म न थियो मन्नोरो। जैखन नूह किश्ती बनाने लोरो थियो, त
परमेश्वरे बड़े सबरी सेइं बलगू कि तैना पापन करां मन फिरान। पन सिर्फ अठ
तैस भयानक तूफाने करां बचे। 21 पुराने वक्ते मां तैन केरि मुक्ति हुना इश्शो
लेइ जैखन अस बपतिस्मो नेतम मिसाले। जैस पैनी मां अस बपतिस्मो नेतम
तैन इश्शो जानरो मैल दूर न केरे, पन ई अक निशान आए कि असेई परमेश्वरे
करां माफी मगोरीए ताके इश्शो मन असन परेशान न केरे। असन माफी
मैल्ली बट्टीए किजोकि यीशु मसीह मेरतां ज़ींतो भोवरोए, 22 ते तै स्वर्गे जो
जोवरो। तैडी हुनी तै परमेश्वरे देइने पासे खास ठैरी, तैडी तै सारे स्वर्गदूतन ते
अधिकैरन ते शेक्कन पुड़ राज्ञ केरने लोरोए।

4 एल्हेरेलेइ जैखन मसीहे जिसमे मां भोइतां दुःख झैल्लो, त ज़ेन्चरे तैसेरो
स्भाव थियो तेन्नरे तुस भी दुःख झैल्लनेरे लेइ तियार भोथ। किजोकि अगर
तुस मसीहेरे लेइ दुःख झैल्लनो चातथ त तुसेई पाप न केरनेरो फैसलो कियो।
2 नितीजो ई भोलो, कि तै मैन्हु बाकी अपनि ज़िन्दगी मैन्हु केरे पापी खुवैइशां
केरे मुताबिक इस दुनियाई मां न ज़ीयोले पन तै तैने केरेलो जैन परमेश्वर तैस
करां करानो चाते। 3 किजोकि बीतोरे वक्ते मां तुस गैर विश्वासी लोकां केरे
ज़ेरे आनन्द केरने मां वक्त बर्बाद केरते थिये, ते तुस अपनि ज़िन्दगी एश केरने
मां, बुरी खुवैइशन मां, ते तैन केरे तिहारन मां, शराब पीने मां ते नाचे मां, ते
तैन केरि मूरती केरि पूजाई मां जैन सेइं परमेश्वर नफरत केरते बीताते थिये।

4 एल्हेरेलेइ तुश्शो पुराने दोस्त हैरान भोतन, जैखन तुस तैन केरे बुरी गल्लन
 मां ज़ैना तैन केरतन शामिल न भोथ, तांए तैना तुश्शो बारे बुरू-भलू ज़ोतन।
 5 पन एककी दिहाड़े तैनेई झ़रूर परमेशरेरे सामने इन्साफेरे लेइ ख़ड़ू भोनू
 पेनूए। ते परमेशर तैन मरां हर एककी ज़ैन तैनेई इस धेतली पुड़ कियोरु तैसेरे
 बारे मां पुछेलो। परमेशर ज़ींते ते मुड़दां केरो इन्साफ केरेलो। 6 ईए वजा
 आए कि मुड़दन भी मसीहेरे बारे मां खुशखबरी शुनाई। तैन केरे जिसम भी
 एन्घरे मरे ज़ेन्घरे सारे मैन्हु मरतन। पन हुनी तैना आत्माई मां परमेशरेरे
 सेइं साथी हमेशा ज़ीइले। 7 सेब्बी गल्लां केरो अन्त जल्दी भोने बालोए,
 एल्हेरेलेइ साफ तरीके सेइं सोचा ते अपने आपे पुड़ कैबू केरा ताके तुस
 प्रार्थना केरी सकतथ। 8 सेब्बन करां रोड़ी गल ईए, कि एककी होरि सेइं
 ईमादैरी सेइं प्यार केरा, किजोकि अगर तुस लोकन सेइं प्यार केरेले त तुस
 तैन केरि गेलती भी माफ़ केरनेरे लेइ तियार भोले। 9 जैखन लोक तुश्शे घरन
 मां एजन त बगैर कोन्ची शिकायतां तैन केरु स्वागत केरा। 10 हर एककी
 परमेशरे करां वरदान मैलोरुए ते तैनी तैन वरदान होरि केरि मद्दत केरनेरे लेइ
 इस्तेमाल कियोरु लोड़े। तैनेई तैना काई किसमां केरां वरदानां इस्तेमाल
 कियोरां लोड़न ज़ैना परमेशरेरे अपने अनुग्रहे सेइं दित्तोरन। 11 अगर तुसन
 कां प्रचार केरनेरु वरदाने त तुसेई परमेशरेरु वचन प्रचार कियोरु लोड़े। अगर
 तुसन कां होरि लोकां केरि मद्दत केरनेरु वरदाने त तैस शेक्कि सेइं केरा ज़ै
 परमेशरे तुसन दित्तोरीए। फिरी सब किछ जैन तुस केरेले तैस सेइं यीशु
 मसीहेरे ज़िरिये परमेशरेरी महिमा भोली। सारी महिमा ते शक्कि हमेशा-हमेशा
 तैसेरीए। आमीन। (aiōn g165) 12 ट्लारव, ज़ैना दुःख तुस झैल्लने लोरेथ तैन
 केरे बारे मां हैरान न भोथ किजोकि तुस मसीहेरे आथ। पन इना चीज़ां इन
 हिरानेरे लेइ भोनेरे लोरिन कि तुस सच्चे परमेशरे पुड़ विश्वास केरतथ की
 नई। एल्हेरेलेइ इन न सोचा कि तुसन सेइं नव्वीं गल भोने लोरीए। 13 पन
 इसेरे बारे मां खुश भोथ, कि जैना दुःख मसीहे मैल्ले तुस भी तैन मां शामिल
 भोए। एल्हेरेलेइ जैखन मसीह दुबारा एज्जेलो त सेब्बी लोकन पुड़ अपनि
 महिमा बांदी केरेलो, त तुस बड़े खुश भोले। 14 फिरी अगर मसीहेरे नंव्वेरे
 लेइ तुश्शी तुहीन भोतीए, त तुस धन आथ। किजोकि परमेशरेरे महिमा बालो
 आत्मा तुसन मां रहते। 15 तुसन मरां कोई मैन्हु खूनी ते चोर, या कुकर्म

भोने, या होरि केरे कम्मन मां दखल देनेरे वजाई सेइं दुख न झैल्लो। 16 पन अगर मसीही भोने सेइं दुःख झैल्लथ त शरमाए न, पन इस गल्लरे लेइ परमेश्वरी बडीयाई केरे किजोकि तुस विश्वासी आथ। 17 किजोकि इन्साफेरो वक्त ओरोए, ते तै इश्शो विश्वासी लोकां केरो इन्साफ पेइलो केरेलो, तैन डरानेबैली गल्लां केरे बारे मां सोचा जैना तैन सेइं भोनिन, जैना खुशखेबरी पुड़ विश्वास न केरन ज़ै परमेश्वरे तरफां एइतीए। 18 ज़ेन्चरे पवित्रशास्त्र ज़ोते, “अगर धर्मी मैनेरे लेइ मुक्ति हासिल केरनि बड़ी मुशकलीए, त बुरे ते पापी मैन्हु पक्के नाश भोनेन!” 19 एल्हेरेलेइ जैना परमेश्वरी मेरज़रे मुताबिक दुःख झैल्लतन, तैनेईं तैस पुड़ लगातार भरोसो कियोरो लोडे जैने तैना बनाए। परमेश्वर हमेशा तैन केरते जैन केरनेरो वादो तैनी कियोरोए ते तै लगातार तैन केरेलो जैन रोड़ूए।

5 अवं साथी बुजुर्णन सेइं इन ज़ोनू चाताई किजोकि अवं तुश्शो ज़ेरो आई। मीं एप्पू तैना दुःख हेरोरेन जैना मसीहे बड़े पेइले झैल्ले। ज़ैखन तै दुबारां एज्जेलो, त अवं तैसेरे महिमा मां शामिल भोनोई। अवं तुश्शो साथी बुजुर्ग भोने सेइं तुसन कां ई बिनती केरताई, 2 ज़ेन्चरे पुहाल अपनि भैझां हेरतन, तुस भी तेन्चरे हर एककेरी हेरगेश केरा, जैना परमेश्वरे तुश्शे रखवैली मां रखोरेन। इन अपने मेज़ीं सेइं केरा किजोकि परमेश्वर इन चाते। तुस इन एल्हेरेलेइ न केरा कि तुसन पुड़ दबाव बनाव गाते। ते इन कम एल्हेरेलेइ न केरा कि तुस कमाई केरनि चाथ, पन इस इच्छाई सेइं केरा कि तुस परमेश्वरी ते लोकां केरि सेवा केरनि चातथ। 3 ते जैना लोक तुसन सोंफे तैन पुड़ हकोमत न केरा, बल्के तैन केरे लेइ रोड़ी मिसालां बना। 4 ते ज़ैखन यीशु मसीह ज़ै इश्शो प्रधान पुहालेरो ज़ेरोए, वापस एज्जेलो त तै तुसन तैन इनाम देलो ज़ेसेरी शोभा कधे खतम न भोली। 5 तेन्चरे हे जवान लोकव, तुस भी बुजुर्गा केरे अधीन राथ, तुस सारे एककी होरेरी मद्दत बड़े नर्म स्भावे सेइं केरा। किजोकि कोई पवित्रशास्त्रे मां पेढ़ी बटते “परमेश्वर घमण्ड केरनेबालां केरि खलाफ केरते, पन तै तैन केरे लेइ रोड़ो आए जैना दीन आन।” 6 एल्हेरेलेइ अपनो आप परमेश्वरे कां दीन बनाथ तै तुश्शी हफाज़त केरनेरे लेइ शेक्ति बालोए, जैस सेइं तै तुसन ठीक वक्ते पुड़ आदर दे। 7 परमेश्वरे अपने परेशैनी ते फिकरां केरे बारे मां ज़ोथ, किजोकि तैस तुश्शू ध्यान आए। 8 खबरदार राथ, ते बींझे राथ,

किजोकि तुश्शो दुश्मन शैतान तुसन पुङ् हमलो केरनेरे लेइ तियारे, कि तुस परमेशरे मनू शारा। तै गज्जनेबाले शेरे ज़ेरो तोपने लोरो कि केस मारे ते खाए। 9 तुस विश्वासे मां मज्जबूत भोइतां तैसेरो मुकाबलो केरा, तैन विश्वासी लोकन याद रख्खा ज़ैना दुनियारे अलग-अलग ठैरन मां आन, तैना भी तुश्शो ज़ेरो दुःख झैल्लने लोरेन। 10 हुनी परमेशर ज़ै सारे अनुग्रहे सेइं भेरतां, तैने अस हमेशारी महिमा मां शामिल भोनेरे लेइ चुनोरेम किजोकि इश्शो रिश्तो यीशु मसीह सेइं आए। थोडे वक्तेरे दुःख झैल्लनेरे बाद परमेशर तुसन सही बनालो ताके तुसन मां कोई गलती न राए, तै तुश्शे दिलन मज्जबूत केरेलो ताके तुस मज्जबूती सेइं तैस पुङ् विश्वास केरथ। (aiōnios g166) 11 तै शेक्कि सेइं हमेशा राज्ञ केरेलो। आमीन। (aiōn g165) 12 मीं सिलवानुसेरे मद्दती सेइं ई निकड़ी ज़ेरि चिट्ठी लिखी ते तुसन जो भेजी, अवं तैस ज्ञानताई तै मसीह मां वफादार ढूला आए, मेरे लिखनेरो मकसद ई आए कि तुश्शो होसलो बधेई ते याकीन दूवेई कि ज़ै तजरबो तुस केरने लोरोरेथ तै सच्चे परमेशरेरे अनुग्रहेरो अक हिस्सो ए, इस अनुग्रहे मां मज्जबूती सेइं बनोरे राथ। 13 बाबेल नगरेरे विश्वासी ज़ैना परमेशरे चुनोरेन ठीक तेन्हरे ज़ेन्हरे तुस चुनोरेथ, तैना तुसन जो नमस्कार ज़ोतन। मरकुस ज़ै मेरे मट्टोरो ज़ेरोए तुसन जो नमस्कार ज़ोते। 14 मसीहेरे प्यारे सेइं एककी होरि जो नमस्कार केरा। अवं प्रार्थना केरताई परमेशर तुसन सेव्हन ज़ैन केरो रिश्तो मसीह सेइं साथी शान्ति दे।

2 पतरस

1 अवं शमौन पतरस, यीशु मसीहेरो दास ते प्रेरित आई, अवं तुश्शे सेब्भी केरे लेइ लिखने लोरोई, तुस भी तैस कीमती विश्वासे मां शामलथ ज़ै अस केरतम, ई विश्वास असन यीशु मसीह, इश्शे परमेश्वर ते मुक्ति देनेबाले ज़िरिये दित्तो जेव, ज़ै असन धर्मी बनाते। 2 अवं प्रार्थना केरताई ज़ेन्वरे तुस परमेश्वरे ते प्रभु यीशुपे ज्ञाने मां बद्धते गाथ, परमेश्वरे तुसन अनुग्रह ते शान्ति जादे करां जादे दे। 3 परमेश्वर अपने शैक्षि सेइं असन तैन सब दितोरु ज़ैन असन परमेश्वरे खुश केरनेरी ज़िन्दगी ज़ीनेरे लेइ लोडते। इन भोइ बटते किजोकि अस परमेश्वरे ज्ञानतम कि तैने अस अपने महिमा ते अपने रोडे गुना केरे मुताबिक तैसेरे लोक भोनेरे लेइ कुजोरेम। 4 इन सेब्भी केरे ज़िरिये परमेश्वरे असन महान ते कीमती वरदानां दितोरन ज़ैन केरो तैनी वादो कियोरो थियो, इन वरदानां इस्तेमाल केरतां अस दुनियारी बुरी इच्छान करां बेच्ची बटतम, ज़ैना लोकन नाश केरतिन, ते अस परमेश्वरे स्भावे मां शामिल भोइ बटतम। 5 एल्हेरेलेइ तुसेई न सिर्फ यीशु पुड विश्वास कियोरो लोडे, बल्के होरि केरे लेइ भलाई केरनेरे लेइ सखत मेहनत भी कियोरी लोडे, तुसेई न सिर्फ तैन कियोरु लोडे ज़ैन रोडु भोए, बल्के तुसेई एरे लोक बनोरु लोडे ज़ैना ज्ञान समझदैरी सेइं केन्चरे बर्ताव केरतन, 6 तुसेई सिर्फ इन न लोडे ज़ानोरु कि समझदैरी सेइं केन्चरे बर्ताव केरतन, पन तुसेई अपनो आप कैबू भी कियोरो लोडे, तुसेई न सिर्फ अपनो आप कैबू मां लोडे कियोरो, बल्के मुसीबत मां सबर भी कियोरी लोडे, तुसेई न सिर्फ मुसीबत मां सबर कियोरी लोडे बल्के तुसेई एरी ज़िन्दगी भी ज़ीयोरी लोडे ज़ैस सेइं परमेश्वर खुश भोए। 7 तुसेई न सिर्फ एरी ज़िन्दगी ज़ीयोरी लोडे ज़ैस सेइं परमेश्वर खुश भोए, बल्के तुसेई एककी होरि विश्वासी लोकन सेइं अपने टब्बरेरे लोकां केरो ज़ेरो प्यार भी कियोरो लोडे, तुसेई एककी होरि सेइं न सिर्फ अपने टब्बरेरे लोकां केरो ज़ेरो प्यार कियोरो लोडे बलके तुसेई सैरी लोकन सेइं प्यार कियोरो लोडे। 8 अगर तुस एन्वरे ज़ीले त तुस इश्शे प्रभु यीशु मसीह ज्ञानेले ते तुस इस्तेमाल भोनेबाले ते फलदार भोले। 9 पन अगर कोन्ची मां इना गुण न भोन त तै एरे मैनेरो ज़ेरोए ज़ै कानोए, ते तैने बिसरोरुए कि परमेश्वरे तै तैसेरे पुराने पापन करां साफ कियोरोए। 10 एल्हेरेलेइ हे ढ़लाव ते बेइनव, एन्चरे कम

केरनेरे लेइ होरि जादे मेहनत केरा, जैस सेइं तुस अपनो आप साबत केरा कि
 परमेशरे तुस हकीकति मां तैस पत्ती च्छलनेरे लेइ चुनोरेथ ते तैसेरे लोक भोनेरे
 लेइ चुनोरेथ। अगर तुस इना गुणा केरे मुताबिक केरेले त तुस कधी मसीह
 पुड़ भरोसो केरनो न शारेले। 11 ते परमेशर भी तुसन तैस राज्जे मां बड़े जोशे
 सेइं कबूल केरेलो ज़ौड़ी यीशु मसीहे, जै इश्शो प्रभु ते इश्शो मुक्ति देनेबालोए,
 तै राज्जेरो ज़ेरो हमेशा राज्ज केरेलो। (aiōnios g166) 12 चाए तुस इना सैरी
 गल्लां ज्ञानतथ, ते सच्ची शिक्षा तैस मां तुस मज़बूती सेइं बनोरे रातथ, जै
 लोकेई तुसन शिखालोरी, अवं तैन केरे बारे मां लगातार याद किरेइलो। 13
 अवं ज्ञानताई ज्ञांतगर अवं जींतोई, तैन केरे बारे मां लगातार तुसन ज़ोनू सही
 आए, ताके तुस तैन न बिसरथ। 14 किजोकि अवं ज्ञानताई, अवं जल्दी
 मरनोई, किजोकि इश्शो प्रभु यीशु मसीहे मीं एल्हेरे बारे मां साफ ज़ोवरुए।
 15 एल्हेरेलेइ अवं इना गल्लां केरे बारे मां ज़ोनेरी बड़ी कोशिश केरताई, ताके
 तुस मेरे मरनेरां पत्ती इना सैरी गल्लां याद केरि बटथ। 16 जैखन असेई
 प्रेरितोई तुसन अपने प्रभु यीशु मसीहेरी शक्ति ते एजनेरी खबर शुनावरी थी, त
 असेई च्छलैकी सेइं बनेवरी कहैनी न ज़ोई बल्के असेई मसीहेरी तैस महिमारे
 बारे मां ज़ोवं जै असेई अपने एछ़छेई सेइं लाई। 17 जैखन अस तैस सेइं
 साथी पवित्र पहाड़े पुड़ थिये जैखन बाजी परमेशरे तैस आदर ते महिमा
 दित्ती। तैस वक्ते परमेशरे करां तैस महान महिमाई मरां आवाज़ आई, “इन
 मेरु ट्लारु मटूए जैस सेइं अवं खुश आई।” असेई एप्पू ई आवाज़ स्वर्गरां
 शुनी। 18 अस नेबी केरु वचन भी ज्ञानतम, जैन तैनोई मसीहेरे बारे मां ज़ोवं
 तैन बिलकुल सच्चे, तैना इस बारे मां पक्कू केरतन जैन असेई तुसन तैसेरे
 वापस एजनेरे बारे मां शिखालू। तुसेई तैना गल्लां ध्याने सेइं शुनोरी लोडन,
 ज़ेन्घरे दीयो आंधरे मां बलते ते लोकन सही बत्तां गानेरे लेइ मद्दत केरते, इन
 वचन तुश्शी इन ज़ान्नेरे लेइ मद्दत केरेलू कि सच कुने। 19 तुसेई तैन वचन
 रोड़े चारे शुनोरे लोडन ज़ांतगर इश्शो प्रभु यीशु मसीह वापस न एज्जे। तैसेरु
 एजनू एरु भोलू ज़ेन्घरे नन्वे दिहैड़री लौ भोली, ते तै झेझेरे तारेरो ज़ेरो भोलो।
 तैस वक्त तैसेरी लौ तुश्शे दिलन मां चमकेली त कने तुसन पुड़ परमेशरे बांदी
 केरेली। 20 पन इन ज़रुरी कि तुस नेबी केरु वचन जैन तुस पवित्रशास्त्रे
 मां पढ़तथ, तैन वचन तैन केरे अपने खियाल नई। 21 किजोकि कोई भी

भविष्यवाणी मैन्हु केरे मेर्जी सेइं न भोइ, पन भक्त लोक पवित्र आत्मा
अगवैई सेइं परमेशरेरे तरफां सन्देश ज़ोते थिये।

2 ते ज़ेन्चरे बड़े पेइले इसाएली लोकन मां झूठे नबी थिये, तेन्चरे तुसन मां
भी झूठे उस्ताद भोले। तैना बल्हे चारे तुसन मां एज्जेले ते परमेशरेरे बारे मां
नाश केरनेबालू झूठ ज़ोले। इडी तगर तैना मसीहेरो इन्कार केरेले कि तै प्रभु
नई ज़ैने तैना पापन करां आज़ाद किये। एन्चरे केरने सेइं तैना एप्पू पुड़
विनाश आनेले। 2 परमेशरेरे बड़े लोक तैन इन झूठे उस्तादां केरे बुरे कम्मां
केरि नकल केरेले, ते तैन बुरां कम्मां केरे वजाई सेइं सच्चे बतारे खलाफ बुरी
गल्लां ज़ोले। 3 इना उस्ताद बड़े लालची भोले ते तैना तुसन बनेवरी कहैनी
शुनेइतां तुसन धोखो देले, ताके तुसन करां पेइंसो हासिल केरन। परमेशरे बड़े
पेइले ई फैसलो कियोरो कि तैन सज़ा दे ते तै इन केरनेरे लेइ तियार भी आए,
तैसेरे एजने मां किछ भी चिर नई, ते तैन केरो विनाश बलगतोए। तै पक्को
तैन नाश केरेलो। 4 तुस ज़ानतथ बड़े पेइले किछ स्वर्गदूतई परमेशरेरो हुक्म
न मन्नो, ज़ैन तैनेई कियूं तैसेरेलेइ परमेशरे तैन सज़ा दित्ती। तैने तैना नरके
मां छँट्हे, ते तैस दिहैडी तगर आधरे मां कैद किये ज़ान्तगर तै तैन केरो इन्साफ
न केरे ते तैन सज़ा न दे। (Tartaroō g5020) 5 तुस इन भी ज़ानतथ ज़ैना लोक
बड़े पेइले इस दुनियाई मां ज़ीते थिये तैनेई परमेशरेरो डर न मन्नो, परमेशरे
तैन केरां बुरां कम्मां नज़रानदाज़ न कियां। बल्के तैनी पानी भेज्जतां तैन सज़ा
दित्ती ज़ैस मां सारी धरती छँप्ही ते तैना सारे नाश भोए। पन तैने तैन मरां नूहे
समेत अठ लोक बच्चाए, ज़ैने धार्मिकतारो प्रचार कियो। 6 परमेशरे सदोम ते
अमोरा नगरन सज़ा दित्ती, तैना भस्म भोइतां माज़न बना, एन केरतां परमेशरे
लोक खबरदार किये, कि ज़ैना तैसेरे हुक्म न मनन तैन सेइं भी एरु भोलू। 7
पन सदोम ते अमोरा नगरन नाश केरने करां पेइले तैने धर्मी लूत नगरे करां
बेइर कढो ते बच्चाव। लूत तैन लोकन सेइं खुश न थियो किजोकि तैना कोई
भी कानून न थिये मन्ते ते बेशर्म कम्मां केरते थिये। 8 (लूत धर्मी मैन्हु थियो,
पन तै रोज़ तैन बुरे लोकन मां रातो थियो, एल्हेरेलेइ ज़ैन बुरी गल्लां तै शुनतो
थियो ते हेरतो थियो तैन सेइं तैसेरो रोड़ो दिल बड़ो दुखी भोतो थियो)। 9 इन
सैरी गल्लां ज़ैना परमेशरे कियोरिन इन हिरैतिन कि प्रभु परमेशर अपने धर्मी
लोकन तैन केरे मुसीबतरे वक्त तैन सम्भालेलो, ते इन्साफेरे दिहाड़े तगर बुरे

लोकन सज्जा देतो रालो। 10 परमेश्वर तैन झूठे उस्तादन पक्की सज्जा देलो,
जैना इना गल्लां अपने गलत ते बुरी खवैइशन सेइं केरतन, ते तैना परमेश्वरे
अधिकारे जै तैन पुड़े घटया समझतन, ते तैना ढीठ ते घमण्डी आन। तैना
स्वगेरे प्राणेरी केरे बारे मां बुरु ज़ोने करां न डरन। 11 स्वर्गदूतां केरे बारे मां
सोचा, तैना तैन झूठे उस्तादन करां बड़े शोक्ति बालेन। तैना जैखन इन झूठे
उस्तादन पुड़ परमेश्वरी हज़ूरी मां दोष लातन, त गलत ज़बान इस्तेमाल न
केरतन। 12 पन इना झूठे उस्ताद जंगली जानवरां केरे ज़ेरन, इना जानवर न
ज़ानन केन्चरे सोघोरु लोड़े तैन केरो मकसद सिर्फ ट्लानू ते मारनू भोते। इन
लोक भी जैन तैन केरे मने मां एइते तैन केरतन, ते जैन गल्लन न समझन
तैन केरे बारे मां बुरु ज़ोतन, तैना पक्के नाश भोनेन। 13 तैन नाश भोनू
तैन केरे कियोरे नुकसानेरो इनामे। तैन भर दूपार्न एश केरनो रोड़ो लगते,
तैना तुसन मां कलंक ते दाग आन। इडी तगर कि तैना तुसन सेइं धामन मां
खातन-पीतन फिरी भी धोखो देने मां खुश भोतन। 14 तैना जैस कुआन्शी भी
लातन तैस सेइं बदमाशी केरनि चातन। तैना पाप केरने लेइ मौके तोपने कथी
न शारन। तैना तैन लोकन धोखो देतन जैना मसीह पुड़ मज़बूती सेइं विश्वास
न केरन ते तैन पापे मां नेतन। तैन केरि जादे करां जादे बुरी इच्छां केरे वजाई
सेइं परमेश्वर तैन सज्जा देलो। 15 तैनेई सही केरनू बंद कियोरुए, ते तैनेई
तेन्हरे बुरां कम्मा केरनां शुरु कियां जेन्हरे बड़े पेइले बओरेरे मट्टे बिलामे
कियोरां थियां। तैनेई बुरी चीजां केरतां पेइंसे कमाने पसंद किये। 16 परमेश्वरे
तै तैसेरे बुरैइरे लेइ डांटो जै तैनी कियोरी थी, तैसेरे गेधां मैन्हु केरि भाषाई
मां गल की ते नबी गलत केरने करां रोको। 17 इन झूठे उस्ताद शुक्कोरे
खूआं केरे ज़ेरे बेकार आन, ते तैना बेफैदी बिदलारे ज़ेरे आन, जैस झड़ी
भोने करां पेइले हवा दूर उडारती। परमेश्वरे तैन केरे लेइ एरी ठार तियार
कियोरी जै बिलकुल आंधरीए। 18 जैखन तैना लोकन शिखालतन त तैना
बेकार ते घमण्डी लफज़ इस्तेमाल केरतन, तैना लोकन ज़ोतन कि तैना
बेइज्जत चीजां केरि बटतन जैना तैन केरे जिसम केरने चातन, तैना लोकन
धोखो देइतां पाप करातन जैना इस किसमेरी बुरी जिन्दगी करां बचोरेन।
19 तैना तैन लोकन सेइं ई वादो केरतन अगर तैना तैन केरि मनन, त तैना
जैन चातन तैन केरि बटतन, किजोकि तैन केरो कोई मालिक नई। पन इन

सच्चे, तैन एप्पू भी अपने बुरे रूवाजां केरे गुलामन, किजोकि ज़ै कोई चीज़ केरनेरो आदी त तै तैस केरनेरो गुलाम बनते। 20 ज़ैखन लोकेई यीशु मसीह तैन केरो प्रभु ते मुक्ति देनेबालोए पिशानो, त तैना दुनियारे बुरैई करां छुटोरे थिये। पन तैना फिरी तैन बुरी चीजां केरने मां शामिल भोए ते तैना बुरी चीजां तैन कैबू केरतिन, ते तैन केरि आखरी हालत पेइली हालती करां भी बुरी भोइ। 21 ज़ोनेरो मतलब ई आए, किजोकि ज़ैन लोकेई मसीहे पुड़ विश्वास केरनो शारो, परमेश्वर तैन, तैन लोकन करां जादे सज्जा देलो, ज़ैनेई कधे विश्वास नई कियोरो, तैन लोकां केरे लेइ रोड़ू भोथू कि तैना कधी न ज़ानेथे कि धार्मिकतारी ज़िन्दगी केन्द्रे ज़ीतन। हुनी तैना ज्ञानतन कि सही कुन आए, पन तैना परमेश्वरे हुकमन न मनन ज़ैना असेई प्रेरितेई शिखालोरेन। 22 ज़ैन तैनेई कियूं तैन केरे लेइ इना दूर्द कहावत ठीक आन, “तैना कुत्रां केरे ज़ेरे आन ज़ैना उलटी केरतां फिरी खातन, ते तैना निहावरे सूरां केरे ज़ेरे आन ज़ैना फिरी चिकरी मां गातन।”

3 हे ट्लारव, अवं दुइयोवं चिट्ठी लिखने लोरोई, अवं दुइये चिट्ठन मां तुसन किछ गल्लां याद करेइतां होसलो देनेरी कोशिश केरने लोरोई। ज़ैना तुसेई पेइली शिखोरिन ताके तुस सही तरीके सेइं सोचथ। 2 अवं इन एल्हेरेलेइ लोरोई केरने, कि अवं तुसन तैना गल्लां याद करैनी चाताई ज़ैना बड़े पेइले नेबेई ज़ोरिन ते इश्शे प्रभु ते मुक्ति देनेबाले यीशु मसीहेरी शिक्षा आन। ज़ैना प्रेरित तुसन कां आए तैनेई तुसन शिखैलोरिन। 3 सेब्बन करां खास गल ई आए, कि तुस ज्ञानथ, कि आखरी दिहाड़न मां मसीहेरे वापस एजने करां पेइले, लोक तुश्शो मज़ाक बनाने कि तुस विश्वास केरतथ कि मसीह दुबारा वापस एजनोए, तैना आदी भोनेरे वजाई सेइं एना बुरी चीजां केरेले ज़ैन सेइं तैना खुश भोतन। 4 तैना ज़ोले, “तैसेरो एजनेरो वादो सच्च नई, तै बिलकुल भी नई एजनो! किजोकि ज़ैना शुरुआती मां इश्शे मसीही बुजुर्ग थिये तैना सब मरे, पन किछ भी बेदलोवं। सब किछ तेरहु आए, ज़ेन्द्रे दुनिया बनानेरे वक्ते करां थियूं।” 5 तैना एन एल्हेरेलेइ ज़ोतन किजोकि तैना इन बिस्सरनू चातन, कि बड़े पेइले अम्बर ते धरती परमेश्वरे हुकमे सेइं बनाव जेव। तैने धरती पैनी मरां कढी ते पैनी करां अलग की। 6 फिरी तैनी पैनेरो इस्तेमाल कियो कि पुरानी दुनिया बड़े तूफाने सेइं नाश केरे। 7 पन परमेश्वर अम्बर ते

धरती तैसरे हुक्मेरे ज़िरिये रखोरेन, ताके तैन अग्गी सेइं नाश केरे। तै तैन तैस
 दिहैड़ी तगर रखेलो ज़ेइस तै तैन लोकां केरो इन्साफ केरेलो ते नाश केरेलो
 ज़ैना तैसेरी आदर न केरन। 8 हे ट्लारव, ज़ैना गल्लां अवं हुन्ना ज़ोने लोरोई
 तैन नज़रानदाज़ न केरा, कि प्रभुएरी नज़री मां अक दिहाड़ी हज़ार सालन
 बराबरे ते हज़ार साल एककी दिहैड़े बराबर आन (तैना तैसेरेलेइ अक्कां ज़ेरे
 आन)। 9 किछ लोक सोचतन कि प्रभु अपनो वापस एजनेरो वादे पूरे केरने
 मां चिर लोरो लाने। पन परमेश्वर एन्चरे चिर नई लाने लोरो, बल्के इसेरे बदले
 तै तुसन सेइं सब्र लोरो केरने। किजोकि तै न चाए कोई भी नाश भोए। पन
 तै चाते कि हर कोई अपनो मन बदले त कने गलत केरनू शारे ते तैस कां
 एज्जे। 10 पन मसीह पक्को वापस एज्जेलो, तै अचानक एज्जेलो ज़ेन्चरे
 च़ोर अचानक एइते। तैस वक्त अम्बर मां गज़नीरी ज़ेरि शोर भोली, ते अम्बर
 गायब भोइ गालू। सब किछ ज़ैन अम्बरे मां आए, दिहाड़ो, चाँदनी, तारे सब
 अग्गी सेइं बिलकुल नाश भोलू, तैस दिहाड़े परमेश्वर इन्साफ केरनेरे लेइ तैन
 सब किछ बांटू केरेलो ज़ैन लोकेई इस दुनियाई मां कियोरूए। 11 एल्हेरेलेइ
 कि परमेश्वर इना सैरी चीज़ां पेक्की नाश केरेलो ज़ेन्चरे मीं ज़ोवं, एल्हेरेलेइ
 तुसेई पवित्र ज़िन्दगी ज़ीयोरी लोड़े ते अपनो आप परमेश्वरे सोंफोरो लोड़े। 12
 ज़ेन्चरे तुस तैस दिहैड़ी बलगने लोरेथ ज़ेइस परमेश्वर दुनियारो इन्साफ केरने
 एज्जेलो, ते बड़ी कोशिश केरा कि तै दिहाड़ी जल्दी एजनेरे लेइ। तैस दिहाड़े
 परमेश्वर अम्बरे अग्गी सेइं फुकेलो ते नाश केरेलो त कने अम्बरेरी सैरी चीज़ां
 अगारे गेरमी सेइं गेलेली। 13 पन अस विश्वासी नंवे अम्बरे ते नंवे धेरती
 बलगने लोरेम ज़ेसेरो वादो परमेश्वरे कियोरो, ज़ेड़ी लोक परमेश्वरेरे इच्छाई सेइं
 ज़ीयेले। 14 एल्हेरेलेइ, हे ट्लारव, ज़ेन्चरे तुस तैस दिहैड़ी बलगने लोरेथ
 ज़ेइस परमेश्वर इस दुनियारो इन्साफ केरेलो, त तुस पूरी कोशिश केरा कि
 तुस शैन्ति सेइं परमेश्वरेरे नज़री मां शुद्ध ते बेइलज़ाम भोथ। 15 ते इश्शे
 प्रभुएरे सबरारे बारे मां सोचा तैने तुसन मौको दित्तो, कि तुस एजनेबाले
 इन्साफे करां बचथ। इन इश्शे ट्लारे विश्वासी सैथे पौलुसे भी तुश्शे लेइ तैस
 समझारे मुताबिक अपने चिट्ठी मां लिखोरू जै परमेश्वरे तैस दित्तोरीए। 16 तैने
 अपने सैरी चिट्ठन मां ज़ैना तैने विश्वासी लोकन जो लिखी, इना सैरी गल्लां
 तुसन लिखी। पन किछ तैसेरी लिखोरी गल्लां समझानी मुश्किल आन। तैन

लोकां केरे लेइ जैनेईं रोडे चारे नई पढ़ोरु जैन इस बारे मां पक्को पतो नई कि
तैना कुन विश्वास केरतन, तैना गलत तरीके सेइं इन मुश्किल गल्लां केरे
मतलब कठतन, जेन्द्रेरे तैना पवित्रशास्त्रेरी किछ गल्लां केरो गलत तरीके
मतलब समझातन। एन्हरे केरने सेइं तैना अपनो आप इस काबल बनातन
कि परमेशर तैन नाश केरे। 17 एल्हेरेलेइ, हे ट्लारव तुस पेइले ज्ञानतथ कि
इना गल्लां भोनिन, एल्हेरेलेइ तुस हुशार राथ ताके जैना लोक कानूने न मनन
तैना तुसन झूठ ज़ोइतां धोखो न देन, ते तुस सेच्ची गल्लन विश्वास केरनो
शारथ। 18 पन तुस इश्शे प्रभु ते मुक्ति देनेबाले यीशु मसीहेरे अनुग्रह ते ज्ञाने

मां बद्धते गाथ। तैसेरी महिमा हुन्ना भी भोए, ते हमेशा भोती राए। आमीन।

(aiōn g165)

1 यूहन्ना

1 अस तैस एककी वचनेरे (मैनेरे) बारे मां लिखने लोरेम ज़ै ज़िन्दगरो वचन आए, ज़ै शुरू करां थियो, ज़ै असेईं शुनो, ते ज़ै अपनि एछ़छेईं सेइं लाव, बल्के ज़ै असेईं ध्याने सेइं लाव, ते तैस सेइं अपने हथ लाए। 2 (ई ज़िन्दगी बांदी भोइ, ते असेईं लाई, ते अस तैसेरी गवाही देतम, ते तुसन तैस हमेशारी ज़िन्दगरी खबर शुनातम, ज़ै बाजी सेइं साथी थी, ते असन पुड़ बांदी भोइ)। (aiōnios g166) 3 ज़ैन किछ असेईं यीशुएरे बारे हेरू ते शुनू तैसेरी खबर तुसन भी देतम, एल्हेरेलेइ कि तुस भी असन सेइं साथी शामलथ, ते इश्शी ई शामलीत बाजी सेइं साथी, ते तैसेरे मटु यीशु मसीह सेइं साथीए। 4 ते इना गल्लां अस एल्हेरेलेइ लिखतम, कि इश्शी खुशी पूरी भोए। 5 ज़ै खबर असेईं प्रभु यीशु करां शुनी, ते तुसन शुनातम, तै ईए; कि परमेशर लोअरो ज़ेरो शुद्ध, ते तैस मां किछ भी आंधरू (बुराई) नई। 6 अगर अस ज़ोम, कि तैस सेइं साथी इश्शी शामलीते, ते फिरी आंधरे मां चलतम, त अस झूठेम, ते सच्चे पुड़ न चलम। 7 पन अगर ज़ेन्वरे परमेशर लोई माए, तेन्वरे अस भी लोई मां ज़ींम, त एककी होरि सेइं शामिल रातम ते तैसेरे मटु यीशु मसीहेरो खून असन सेब्भी पापन करां शुद्ध केरते। 8 अगर अस ज़ोम, कि असन मां कोई पाप नई, त अपने आपे धोखो देतम, ते असन मां सच्चे नई। 9 अगर अस अपने पाप मन्तम, त तै इश्शो पाप माफ़ केरने, ते असन सेब्भी अधर्मे करां शुद्ध केरने मां वफादार ते धर्मीए। 10 अगर अस ज़ोम कि असेईं पाप नई कियोरो, त परमेशरे झूठो ठहरातम, ते तैसेरे वचन असेईं कथी कबूल नई कियोरु।

2 हे मेरे ट्लारे बच्चव, अवं इना गल्लां तुसन एल्हेरेलेइ लिखताईं, कि तुस पाप न केरा, ते अगर कोई पाप केरे, त बाजी परमेशरे कां इश्शो अक मद्दतगारे, मतलब धर्मी यीशु मसीह। 2 तै इश्शो पापां केरो छुटकारेरे लेइ बलिदान भोव, ते सिर्फ इश्शो लेइ नई, बल्के सैरी दुनियारे पापां केरे लेइ भी। 3 अगर अस तैसेरे हुक्मन मन्नम, त इस सेइं अस समझो गाले कि अस तैस ज़ानतम। 4 ज़ै कोई इन ज़ोते, “कि अवं तैस ज़ानताईं,” ते तैसेरे हुक्मन न मन्ने, तै झूठोए, ते तैस मां सच नई। 5 पन ज़ै कोई तैसेरे वचने पुड़ चलते, त तैस मां सच्चे परमेशरेरो प्यार सिद्ध भोरोए, असन इस सेइं पतो चलते, कि

अस तैस मां आम। 6 जै कोई इन ज़ोते, कि अवं तैस मां बनोरो राताई, त
 तैनी तेन्नरे ज़ीयोरु लोड़े ज़ेन्नरे यीशु मसीहे ज़ीयोरुए। 7 ट्लारव, अवं तुसन
 कोई नंब्वो हुक्म न लिखी, पन तैए पुरानो हुक्म जै पेइलो तुसन मैल्लो; ई
 पुरानो हुक्म तैन वचने, ज़ैखन तुसेई मसीह पुड़ विश्वास कियूं। 8 फिरी भी
 अवं तुश्शे लेइ नंब्वो हुक्म लिखताई, किजोकि एन सच्च आए, ज़ैन मसीह मां
 ते तुसन मां भी लेइहोवं, किजोकि अन्धकार मिट्टो गाते ते सच्चेरी लौ हुनी
 चमकने लोरीए। 9 जै इन ज़ोते, कि अवं लोई मां आई ते विश्वासी ढ्लाए सेइं
 बैर रखते, तै हेजू तगर आंधरे मां आए। 10 जै कोई अपने ढ्लाए सेइं प्यार
 केरते, तै लोई मांए, तैसेलेइ पाप केरनेरे लेइ कोई वजा नई। 11 पन जै कोई
 अपने ढ्लाए सेइं बैर रखते, तै आंधरे मांए, ते तै आंधरे मां च्छलते; ते न जाने,
 कि कोरां गाते, किजोकि आंधरे तैसेरी एछळी कैनी केररिन। 12 हे बच्चाव
 अवं तुसन एल्हेरेलेइ लिखताई, कि यीशु मसीहेरे नंब्वे सेइं तुश्शे पाप माफ
 भोए। 13 हे बुजुर्गव अवं तुसन एल्हेरेलेइ लिखताई, कि जै शुरू करां आए
 तुस तैस ज़ानथ, हे जवानव, अवं तुसन एल्हेरेलेइ लिखताई कि तुसेई तैस
 शैताने पुड़ ज़ींत हासिल केरीए, हे बच्चाव अवं तुसन एल्हेरेलेइ लिखताई कि
 तुसेई बाजी परमेश्वर पिशानो। 14 हे बाजव, अवं तुसन एल्हेरेलेइ लिखताई,
 कि जै पेइलोए तुसेई पिशानो, हे जवानव, अवं तुसन एल्हेरेलेइ लिखताई, कि
 तुस मज़बूतथ, ते परमेश्वरे वचन तुसन मां बनोरु रहते, ते तुस शैताने करां
 ज़ींतोरेथ। 15 तुस न दुनियाई सेइं ते न दुनियारी चीज़न सेइं प्यार केरा,
 अगर कोई दुनियाई सेइं प्यार केरते, त तैस मां बाजी परमेश्वरो प्यार नई।
 16 किजोकि ज़ैन किछ दुनियाई मां आए, मतलब जिसमेरी खुवैइश, ते
 एछळी केरि खुवैइश ते ज़िन्दगरु घमण्ड, तैन बाजी परमेश्वरे तरफां नई पन
 दुनियारे तरफांए। 17 दुनिया ते तैसेरी खुवैइश दुइये मिट्टी गैतिन, पन जै
 परमेश्वरे मेर्ज़ी पुड़ च्छलते, तै सदा बनोरो रालो। (aiōn g165) 18 हे बच्चव, ई
 आखरी वक्ते कि मसीह वापस एजनोए, ते ज़ेन्वरे तुसेई शुनोरूए, कि मसीहेरी
 खलाफत केरनेबालो एजनेबालोए, तैसेरे मुताबिक हुना भी बड़े मसीहेरी
 खलाफत केरनेबाले उठोरेन, इस सेइं अस ज़ानतम, कि ई आखरी वक्ते
 कि मसीह वापस एजनोए। 19 तैना मसीहेरी खलाफत केरनेबाले लोक
 निस्से त असने मरां, पन तैना असन मरां न थिये, किजोकि अगर असन

मरां भोथे, त असन सेइं साथी राथे, पन निस्से एल्हेरेलेइ कि इन बांदू भोए कि तैना सब असन मरां नई। 20 पन मसीहेरे ज़िरिये तुसन पवित्र आत्मा दित्तोरोए, तैसेरे वजाई सेइं तुस सब सच्च ज्ञानतथ। 21 मीं तुसन एल्हेरेलेइ नई लिखोरू, कि तुस सच्चे न ज्ञानथ, पन एल्हेरेलेइ, कि तैस ज्ञानतथ, ते एल्हेरेलेइ कोई झूठ, सच्चेरे पासेरा नई। 22 झूठो कौनेः? सिर्फ तै, जै यीशुएरु मसीह भोनेरो इन्कार केरते, ते मसीहेरी खलाफत केरनेबालो तैए आए, जै बाजी परमेश्वरी ते कने मटुरो यानी यीशुएरो इन्कार केरते। 23 जै मटुरो इन्कार केरते तैस कां बाजी परमेश्वर भी नई, जै मटु मन्ते, तैस कां बाजी परमेश्वर भी आए। 24 जैखन तुसेई यीशु मसीह पुड विश्वास कियूं तुसेई जै सच्ची शिक्षा शुरु करां शुनोरोए, तैए तुसन मां बनोरी राए, त तुस भी मटु मां, ते बाजी परमेश्वरे मां बनोरे राले। 25 ते ज़ेसेरो वादो परमेश्वरे कियोरोए, तै हमेशारी ज़िन्दगीए। (aiōnios g166) 26 मीं इना गल्लां तुसन तैन करां खबरदार रानेरे लेइ लिखी, जैना लोक तुसन झूठी शिक्षारे ज़िरिये टपलातन। 27 ते तुशू तैन अभिषेक, जैन तैसेरे तरफां केर्लए, तुसन मां बनोरु रहते; ते तुसन एल्हेरी ज़रूरत नई, कि कोई तुसन शिखाले। बल्के ज़ेन्चरे तैन अभिषेक जैन तैसेरे तरफां कियोरुए, तुसन सब गल्लां शिखालते, ते इन सच्चे, ते झूठ नई, ते ज़ेन्चरे तैने तुसन शिखालोरुए, तेन्चरे तुस तैस मां बनोरे रातथ। 28 हे बच्चव, तैस मां बनोरे राथ, कि जैखन इन बांदू भोए, त असन दिलेरी भोए ते अस तैसेरे एजने पुड तैसेरे सामने शरमिनदे न भोंम। 29 अगर तुस ज्ञानतथ, कि मसीह धर्मीए, त इन भी ज्ञानतथ, कि जैना धार्मिकतारां कम्मां केरतन, तैना परमेश्वरे बच्चेन।

3 हेरा बाजे परमेश्वरे असन सेइं केरो प्यार कियो, कि असन जो परमेश्वरे बच्चे ज़ोन, ते अस अहम भी, एल्हेरेलेइ दुनियारे लोकेई अस न पिशाने कि अस परमेश्वरे बच्चेम, किजोकि तैनेई बाजी परमेश्वर भी न पिशानो। 2 हे ट्लारव, हुनी अस परमेश्वरे बच्चेम, ते हेजू तगर इन बांदू नई भोरु, कि अस केरे भोनेम! इन ज्ञानतम, कि जैखन यीशु मसीह बांदो भोलो त अस भी तैसेरे ज़ेरे भोमेले, किजोकि तैस तेरहे लहमेले ज़ेरो तै आए। 3 ते जै कोई भी मसीह पुड ई उमीद रखते, तै अपनो आप तेरहो पवित्र केरते, ज़ेरो मसीह पवित्र आए। 4 जै लगातार पाप केरतो रहते, तै मूसेरे कानूनेरो

इन्कार केरते, ते पाप त कानूनेरो इन्कार केरनो। 5 ते तुस ज्ञानतथ, कि यीशु मसीह एल्हेरेलेइ अव, कि पापन दूर केरे, ते तैस मां पाप नई। 6 ज़ै तैस मां बनोरो रहते, तै लगातार पाप न केरे, ज़ै लगातार पाप केरते, तै न समझे कि मसीह कौन आए, ते न तैसेरो तैस सेइं रिशतोए। 7 ट्लारे बच्चव, केन्चेरे धोखे मां न एजाथ, ज़ै धार्मिकारां कम्मां केरते, तैए मसीहेरो ज़ेरो धर्मीए। 8 ज़ै कोई लगातार पाप केरते, तै शैतानेरे तरफांए, किजोकि शैतान शुरुआती करां पाप केरतो ओरोए, परमेशरेरु मटू एल्हेरेलेइ अव, कि शैतानेरे कम्मन खतम केरे। 9 ज़ैना परमेशरेरे बच्चेन तैना लगातार पाप न केरन, किजोकि परमेशरेरो सुभाव तैन मां बनोरु रहते, ते तैना पाप केरि न सकन, किजोकि तैना परमेशरेरे बच्चेन। 10 इस्से सेइं परमेशरेरे बच्चे, ते शैतानेरे बच्चे पिशैनोतन, ज़ैना धार्मिकता कम्मां न केरन, तैना परमेशरे सेइं नई, ते न तै ज़ै अपने ढ्लाए सेइं प्यार न केरे। 11 ज़ै खबर तुसेई पेइली शुनी, तै ईए, कि अस एक्की होरि सेइं प्यार रखम। 12 ते आदमेरे मट्टेरे कैनेरे ज़ेरे न बनम, ज़ै तैस शैताने सेइं थियो, ते ज़ैने अपनो ढ्ला मारो, ते तै कोस वजाई सेइं मारो! एल्हेरेलेइ कि तैसेरां कम्मां बुरां थियां, ते तैसेरे ढ्लाएरां कम्मां रोड़ां थियां। 13 हे ढ्लाव, अगर दुनियारे लोक तुसन सेइं बैर केरते त हैरान न भोथ। 14 अस ज्ञानतम, कि अस मौती करां पार भोइतां ज़िन्दगी मां पुज़ोरेम, किजोकि अस ढ्लान सेइं प्यार रखतम। ज़ै प्यार न रखे, तै मौतरे हालती मांए। 15 ज़ै अपने ढ्लाए सेइं बैर केरते, तै खूनी आए, ते तुस ज्ञानतथ, कि कोन्ची खूनी मां हमेशारी ज़िन्दगी न राए। (aiōnios g166) 16 असेई प्यार इस्से सेइं जानो, कि यीशु मसीहे इश्शो लेइ अपने प्राण दित्ते, एल्हेरेलेइ इश्शो भी ढ्लां केरे लेइ प्राण देने फर्जें। 17 पन ज़ैस कां दुनियारी जेइदाद भोए, त तै अपने ढ्लाए ज़ैस ज़रूरत भोए, तैस हेरतां तैस पुड़ तरस खानो न चाए, त तैस मां परमेशरेरो प्यार केन्चरे बनोरो रेइ बटते? 18 हे ट्लारे बच्चव, अस सिर्फ वचन ते जुबानी सेइं नई, पन कम्मन ते सच्चे सेइं भी प्यार केरम। 19 ज़ैखन अस होरन सेइं प्यार केरमेले एस्से सेइं अस ज्ञानमेले, कि अस सच्चेरेम, ते ज़ैस गल्ली मां इश्शो ज़मीर असन दोष लाए, तैसेरे बारे मां अस तैसेरे सामने अपने-अपने मने याकीन देइ बटमेले। 20 किजोकि परमेशर इश्शो मने करां बहुए, ते सब किछ जानते। 21 हे ट्लारव,

अगर इश्शो मन असन दोष न दे, त असन परमेशरे सामने दिलेरी भोतीए।

22 ते ज़ैन किछ अस मगतम, तैन असन तैस करां मैलते, किजोकि अस तैसेरे हुक्म मन्तम, ते ज़ैन तैस पसंदे तैन केरतम। 23 ते तैसेरो हुक्म ईए कि अस तैसेरे मट्ठे यीशु मसीहेरे नंवे पुड़ विश्वास केरम ते ज़ेन्हरे तैने असन हुक्म दित्तो तैसेरे मुताबिक एककी होरि सेइं प्यार केरम। 24 ते ज़ैना परमेशरेरो हुक्म मन्तन, तैना परमेशरे मां, ते परमेशर तैन मां बनोरो रहते, ते इस्से सेइं, मतलब तैस पवित्र आत्मा सेइं ज़ै तैने असन दित्तोरोए, अस ज्ञानतम, कि तै असन मां बनोरो रहते।

4 हे ट्लारव, हर एककी मैनेरु याकीन न केरा ज़ै दावो केरते कि परमेशरी आत्मा तैस मां आए, बल्के आत्मां अज़माथ कि तै परमेशरी तरफांए कि नई, किजोकि बडे झूठे नबी दुनियाई मां निसोरेन। 2 परमेशरी आत्मा तुस इस रीति सेइं पिशैनी बटथ, कि ज़ै आत्मा इन मन्ने, कि यीशु मसीह जिसमे मां ओरोए तै परमेशरेरे तरफांए। 3 ते ज़ै आत्मा यीशु न मन्ने, तै परमेशरेरे तरफां नई, ते तैए मसीहेरी खलाफत केरनेबाली आत्माए, ज़ेसेरे बारे मां तुसेई शुनोरु, कि तै एजने बालीए, ते अज़ भी दुनियाई मां आए। 4 हे ट्लारे बच्चव, तुस परमेशरेरे लोक आथ, ते तुसेई तैन झूठन पुड़ ज़ींत हासिल कियोरीए, किजोकि पवित्र आत्मारी शक्ति ज़ै तुसन माए तै शैतानेरे शक्ति करां बहु, ज़ै दुनियाई पुड़ राज़ केरते। 5 तैना झूठे नबी दुनियारेन, एल्हेरेलेइ तैना दुनियारी गल्लां ज़ोतन, ते दुनियारे लोक तैन केरि शुन्तन। 6 अस परमेशरेरेम, ज़ै परमेशरे ज्ञानते, तै इश्शी शुन्ते, ज़ै परमेशरे न ज़ाने तै इश्शी न शुने, एल्हेरेलेइ अस तैस आत्माई ज़ै सज्ज ज़ोतीए ते ज़ै आत्मा झूठ ज़ोतीए पिशानतम। 7 हे ट्लारव, अस एककी होरि सेइं प्यार केरम; किजोकि प्यार परमेशरे करां आए, ज़ै कोई प्यार केरते, तै परमेशरेरो बच्चोए, ते परमेशरे ज्ञानते। 8 ज़ै होरन सेइं प्यार न केरे, तै परमेशरे न ज़ाने, किजोकि परमेशर प्यारे। 9 ज़ै प्यार परमेशरे असन सेइं केरते, तै इस सेइं बांदो भोव, कि परमेशरे अपनू अकैल्लू मट्ठू दुनियाई मां भेजू, कि तैस पुड़ विश्वास केरने सेइं असन हमेशारी ज़िन्दगी मैल्ले। 10 प्यार इस सेइं नई कि असेई परमेशरे सेइं प्यार कियो, पन इस मां आए, कि तैने असन सेइं प्यार केरो, ते इश्शो पापां केरे छुटकारेरे लेइ अपनू मट्ठू भेजू। 11 हे ट्लारव, ज़ैखन परमेशरे असन सेइं एरो प्यार

कियो, त असेई भी एककी होरि सेइं प्यार कियोरो लोडे। 12 परमेशर कथी केन्चे नई लवरो; अगर अस एप्पू मांमेइं प्यार रखम, त परमेशर असन मां बनो रहते; ते तैसेरो प्यार असन मां सिद्ध भोरोए। 13 इस सेइं अस ज्ञानतम, कि अस परमेशरे मां बनो रातम, ते परमेशर असन मां, किजोकि तैने असन अपने आत्माई मरां दित्ती। 14 ते असेई हेरु भी, ते गवाही भी देतम, कि बाजी परमेशरे, मटू दुनियाई मां मुक्ति देनेबालो केरतां भेजोरोए। 15 जै इन मन्ते, कि यीशु परमेशरेरु मटूए, परमेशर तैस मां बनोरो रहते, ते तै परमेशरे मांए। 16 ते जै प्यार परमेशर असन सेइं केरते, तै असेई ज्ञानो, ते असन तैस पुड़ विश्वासे, परमेशर प्यारे, जै प्यारे मां बनोरो रहते, ते परमेशर तैस मां बनोरो रहते। 17 इस सेइं प्यार असन मां सिद्ध भोव, कि असन इन्साफेरे दिहैड़ी दिलेरी भोए, किजोकि ज़ेरो तै आए, तेरे अस भी दुनिया मां अहम। 18 प्यारे मां डर न भोए, बल्के सिद्ध प्यार डरे दूर केरते, किजोकि डरोरो रिश्तो सज्जाई सेइं भोते, ते जै डरते, तै प्यार मां सिद्ध नई। 19 अस परमेशरे सेइं ते होरन सेइं एल्हेरेलेइ प्यार केरतम, कि पेइलो परमेशरे असन सेइं प्यार कियो। 20 अगर कोई ज़ोए कि, “अवं परमेशरे सेइं प्यार केरताई,” पन अपने ढलाए सेइं बैर रखे, तै झूठोए, किजोकि जै विश्वासी ढलाए सेइं जै तैने लोरोए प्यार न केरे, त परमेशरे सेइं भी जै तैने लवरो नई, प्यार न केरि सके। 21 ते तैस करां असन ई हुक्म मैलते, कि जै अपने परमेशरे सेइं प्यार केरते, तै विश्वासी ढलाए सेइं भी प्यार केरते।

5 ज़ेसेरो ई विश्वासे कि यीशु ही मसीहे, तै परमेशरेरो बच्चोए, ते जै परमेशरे सेइं प्यार केरते, तै तैस सेइं भी प्यार केरते, ज़ैना परमेशरेरे बच्चेन। 2 जैखन अस परमेशरे सेइं प्यार केरतम, ते तैसेरे हुक्मन मन्तम, त इस सेइं अस ज्ञानतम, कि अस परमेशरेरे बच्चन सेइं प्यार केरतम। 3 अस परमेशरेरे हुक्म मेन्तां तैस प्यार हिरातम, ते तैसेरे हुक्म मुशकलन नई। 4 किजोकि जै परमेशरेरो बच्चोए, तै दुनियाई पुड़ ज़ींत हासिल केरते, ते तै ज़ींत जैस सेइं दुनियाई पुड़ ज़ींत हासिल केरतम तै इश्शो विश्वासे। 5 दुनियाई पुड़ ज़ींत हासिल केरनेबालो कौने, सिर्फ तै ज़ेसेरो ई विश्वासे, कि यीशु, परमेशरेरु मटूए। 6 ईए तैए, जै पैनी ते खूनेरे ज़िरिये ओरो थियो; मतलब यीशु मसीह, तै न सिर्फ पैनी सेइं, बल्के पैनी ते खूने दुइयां केरे ज़िरिये ओरो थियो। ते ई

आत्मा जै गवाही देतीए, किजोकि तै सङ्घे। 7 ते गवाही देनेबाले ट्लाई आन
8 आत्मा, ते पानी, ते खून, ते ट्लेइयां केरि एककी गल्ली पुडे गवाही देतन। 9
जैखन अस मैन्तु केरि गवाही मन्तम, त परमेशरेरी गवाही त तैस करां भी
बहुणीए, कि तैने अपने मट्टोरे बारे मां गवाही दित्ती। 10 जै परमेशरे मट्टो पुड
विश्वास केरते, तै अपने आपे मां ई गवाही रखते, जैने परमेशरे पुड विश्वास न
कियूं, तैने तै झूठो ठहराव, किजोकि तैने तैस गवाही पुड विश्वास न कियो, जै
परमेशरे अपने मट्टोरे बारे मां दित्तोरीए। 11 ते तै गवाही ईए, कि परमेशरे
असन हमेशारी ज़िन्दगी दित्ती, ते ई ज़िन्दगी तैसेरे मट्टो माण। (aiōnios g166)
12 ज़ेसेरो रिश्तो मट्टो सेइं आए तैस कां ज़िन्दगीए, ते ज़ेसेरो रिश्तो परमेशरेरे
मट्टो सेइं नई, तैस कां हमेशारी ज़िन्दगी भी नई। 13 मीं तुसन, जै परमेशरेरे
मट्टोरे नंवे पुड विश्वास केरतो भोए, एल्हेरेलेइ लिखताई, कि तुसन पतो लग्गे,
कि हमेशारी ज़िन्दगी तुश्शीए। (aiōnios g166) 14 ते असन परमेशरेरे सामने
ई दिलेरी भोतीए, तै ईए; कि अगर अस तैसेरे मेर्जी सेइं किछ मगतम, त तै
इश्शी शुनते। 15 ते अगर अस ज्ञानतम, कि जैन किछ अस परमेशरे करां
मगतम, तैन असन मैलते। 16 अगर कोई विश्वासी ढलाए कोई एरो पाप
केरतो लाए, ज़ेसेरो नितीजो मौत न भोए, त बिनती केरे, ते परमेशर तैसेरेलेइ,
जैने एरो पाप कियोरोए ज़ेसेरो नितीजो मौत नई, ज़िन्दगी देलो। पाप एरो भी
भोतेए ज़ेसेरो नितीजो मौते, एसेरे बारे मां अवं प्रार्थना केरनेरे बारे मां न ज़ोई।
17 सेब्ही किसमेरी बुराई त पापे पन एरो भी पापे, ज़ेरो नितीजो मौत नई।
18 अस ज्ञानतम, कि जैना परमेशरेरे बच्चेन, तैना लगातार पाप न केरन, पन
परमेशरेरू मटू यीशु तैस बचाते, ते शैतान तैसेरु किछ न केरि सके। 19 अस
ज्ञानतम, कि अस परमेशरे सेइं अहम, ते सारी दुनिया तैस शैतानेरे कब्जे मां
आए। 20 ते इन भी ज्ञानतम, कि परमेशरेरू मटू यीशु मसीह इस दुनियाई मां
ओरूए, ते तैने असन समझ दित्तोरीए, कि अस सच्चे परमेशरे पिशानम, ते
अस तैस मां जै सच्चे मां आए, मतलब तैसेरे मट्टो यीशु मसीह मां बनोरे
रातम, सच्चो परमेशर ते हमेशारी ज़िन्दगी ईए। (aiōnios g166) 21 हे बच्चव,
हर अक तैस चीजी करां दूर राथ, जै तुशो दिले मां परमेशरेरी ठार नेतीए।

2 यूहन्ना

1 अवं यूहन्ना कलीसियारो बुजुर्ग, तैस बेइन ते तैसेरे बच्चन ज़ैना परमेशरे चुनोरेन ई चिट्ठी लिखने लोरोई। ज़ैन सेइं अवं सच्चो प्यार केरताई। सिर्फ अवं नईं पन तैना सारे ज़ैना सच्चे ज़ानतन तुसन सेइं प्यार केरतन। 2 अस तुसन सेइं प्यार केरतम किजोकि अस सच्ची शिक्षाई पुड़ विश्वास केरतम, ते अस तैस शिक्षाई हमेशारे लेइ मन्ते राले। (aiōn g165) 3 बाजी परमेशर ते तैसेरे मटू यीशु मसीह असन अनुग्रह, दया, शान्ति देन। इना सब इश्शो लेइ आए अस ज़ैना सच्चे मन्तम ते एककी होरि सेइं प्यारे केरतम। 4 अवं बड़ो खुश भोव, ज़ैखन मीं तेरे किछ बच्चां केरे बारे मां शुनू कि तैना परमेशरे बत्तां चलने लोरेन, तैना तैन्ने केरने लोरेन ज़ैन इश्शो बाजी परमेशरे असन केरनेरे लेइ ज़ोरुए। 5 हुनी हे बेइन, अवं तीं कां मिनत केरताई, असेई एककी होरि सेइं प्यार कियोरो लोड़े, ई अक नंब्वो हुक्म नईं पन अक आदेशे ज़ै अस तैस वर्के करां ज़ानतम, ज़ेइसेरु असेई यीशु मसीह पत्ती चलनू शुरु कियोरुए। 6 सच्चो प्यार ई आए ज़ैखन अस परमेशरे हुक्म मन्तम। ज़ेइसेरु तुसेई यीशु मसीह पत्ती चलनू शुरु कियोरु तेइसेरु तुसेई शुनेरु कि परमेशरे हुक्म दित्तोरो, कि हमेशा एककी होरि सेइं प्यार कियो लोड़े। 7 अवं इन एल्हेरेलेइ ज़ोताई, किजोकि बड़े लोक ज़ैना होरि लोकन झूठी शिक्षार ज़िरिये धोखो देतन। तैना दुनियारे अलग-अलग ठैरन मां जोरेन। तैना ज़ोतन यीशु मसीह मैनेरे रूपे मां नईं ओरो, अगर कोई मैन्हु एन्हरे ज़ोते, त तै मसीहेरो खलाफत केरनेबालोए ज़ै हमेशा लोकन धोखो देते। 8 एल्हेरेलेइ तू अपने बारे मां खबरदार रा कि तैना लोक तीं धोखो न देन। ज़ै मेहनत परमेशरे सेवारे लेइ तीं की तै बेफैइदी न भोए, पन तुस तैना सैरी बरकतां हासिल केरेलो ज़ैना देनरो वादो परमेशरे तुसन सेइं कियोरोए। 9 अगर कोई मैन्हु मसीहेरी शिक्षाई पुड़ लगातार न चले पन तैस मां होरु किछ ज़ोडते त तैसेरो रिश्तो परमेशरे सेइं साथी नईं, तैस कां परमेशर नईं। पन अगर कोई मसीहेरी शिक्षाई मां बनोरो रहते, तैसेरो रिश्तो बाजी परमेशर ते तैसेरे मट्टे यीशु मसीह सेइं भी आए। 10 अगर कोई तुश्शो सभाई कां एजे, ते मसीहेरे बारे मां ईए शिक्षा न दे, त तैस न अपने घरे मां एजने देथ, ते न तैस नमस्कार केरतां होसलो न देथ। 11 किजोकि ज़ै कोई ऐरे मैन्हु जो नमस्कार केरते, तै तैसेरे बुरे कम्मन

ਮਾਂ ਸ਼ਾਮਿਲ ਭੋਤੇ। 12 ਬੇਡ਼ਿ ਗਲਲਾਂ ਆਨ ਜੈਨਾ ਅਵਂ ਤੁਸਨ ਸੇਇਂ ਜੋਨੀ ਚਾਰਾਈ, ਪਨ
ਅਵਂ ਤੈਨਾ ਏਨ੍ਹਰੇ ਚਿਟ੍ਠੀ ਮਾਂ ਲਿਖਨੀ ਨ ਚੈਈ। ਪਨ ਮੰਿਉਮੀਦੇ ਕਿ ਅਵਂ ਤੁਸਨ ਕਾਂ
ਏਜਜ਼ਲੋ ਤੇ ਅਸ ਆਮਨੇ-ਸਾਮਨੇ ਭੋਇਤਾਂ ਗਲਲਾਂ ਕੇਰਮੇਲੇ, ਤੈਖਨ ਅਸ ਪ੍ਰੇਰ ਤਰੀਕੇ
ਸੇਇਂ ਖੁਸ਼ ਭੋਲੇ। 13 ਤੇਰੀ ਚੁਨੌਰੀ ਬੇਝਨਾਰੇ ਬਚਚੇ ਝੜੀ ਜੈਨਾ ਪਰਮੇਸ਼ਰੇ ਚੁਨੌਰੇਨ
ਨਮਸਕਾਰ ਜੋਤਨ।

3 यूहन्ना

1 अबं यूहन्ना कलीसियारो बुजुर्ग आई, हे ट्लारे गयुसे अबं तींजो ई चिट्ठी लिखने लोरोई। अबं सच्चे तीं सेइं प्यार केरताई। 2 मेरे ट्लारे दोस्त, मेरी प्रार्थना ई आए, कि ज़ेन्वरे तू आत्मिक तरक्की केरि रवरोस, तेन्वरे तू सेब्बी गल्लन मां तरक्की केरतो रास, ते तेरी जान भी राज़ी राए। 3 किजोकि किछ विश्वासी लोकेई मीं सेइं एइतां ज़ोवं, कि तू केन्वरे सच्चेरे मुताबिक ज़ीने लोरोस त अबं बड़ो खुश भोव। 4 ज़ैखन भी अबं शुनताई कि तैना, ज़ैना मेरे बच्चां केरे ज़ेरे आन तैना सच्चेरे मुताबिक ज़ीतन, तैखन अबं बड़ो खुश भोताई। 5 हे ट्लारा, तीं इश्शो विश्वासी सैथी केरि मद्दत केरनेरे लेइ वफादैरी सेइं बदू किछ कियोरुए, इडी तगर ज़ैन तू ज़ानस भी न तैन केरि भी मद्दत केरतस। 6 इन मरां किछ लोकेई इट्टेरी कलीसियारे विश्वासी लोकन सेइं ज़ोवं, कि तुस अपने मसीही लोकन सेइं केत्रो जादे प्यार केरतथ। हुनी अबं तीं ज़ोताई ज़ैना इना लोक तीं करां गान त तीं तैन केरि मद्दत केरती रावरी लोडे किजोकि एस सेइं परमेशर खुश भोते। 7 किजोकि इना लोक मसीहेरु वचन प्रचार केरनेरे लेइ सफर केरतन, ते गैर विश्वासी लोकन करां किछ मद्दत न नेन। 8 एल्हेरेलेइ असेई तैन केरि आदर-खातर कियोरी लोडे, ताके अस भी तैन सेइं साथी सऱ्ह प्रचार केरनेरे कम्मे मां शामिल भोम। 9 मीं तुश्शो नगरेरे कलीसियारे लोकन पेइले चिट्ठी लिखोरी थी, पन दियुत्रिफेस मेरे हदायतन कबूल केरने करां इन्कार केरते, किजोकि तै हमेशा अपनो आप कलीसियारो लीडर बनानो चाते। 10 एल्हेरेलेइ अगर अबं एज्जेलो, त कलीसियारे लोकां केरे सामने ज़ैन तै केरि रावरोए ज़ोइलो। तै इश्शो खलाफ बुरी-बुरी गल्लां ज़ोइतां झूठे दोष लाते, ते एत्रू नई तै एप्पू प्रचार केरनेबालन कबूल न केरे, ते ज़ैना तैन कबूल केरने चातन, तैन भी ठाकते ते कलीसिया मरां कढतन। 11 हे ट्लारा, तैन लोकां केरि नकल न केरा ज़ैना बुरां कम्मां केरन, पन तैन लोकां केरु ज़ेरु बन्नेरी कोशिश केरा ज़ैना भला कम्मां केरतन। ज़ैखन कोई भला कम्मां केरते तैस सेइं साबत भोते कि तै परमेशरे बच्चोए, अगर कोई बुराई केरते तैस सेइं साबत भोते कि तै परमेशर न ज़ाने। 12 कलीसियारो सारे मैन्हु दिमेत्रियुसेरे बारे मां ज़ोतन कि तै रोडो मैन्हु आए, किजोकि तै सच्चेरे मुताबिक ज़ीते ते अस भी ज़ोतम कि तै अक रोडो मैन्हु आए, ते तू ज़ानतस

अस सच्च ज्ञोतम। 13 बेड़ि गल्लां आन जैना अवं तीं सेइं ज्ञोनी चाताई, पन
अवं तैना एन्नरे चिट्ठेरे ज़िरिये न लिखनी चैई। 14 पन मीं उमीदे कि अवं तीं
सेइं जल्दी मुलाकत केरेलो, तैखन अस आमने-सामने गल्लां केरमेले। अवं
प्रार्थना केरताई परमेश्वर तीं शान्ति दे, इट्टेरे मसीही दोस्त तींजो नमस्कार
ज्ञोतन, एट्टेरे दोस्तन अकैल्ले-अकैल्ले मां गेइतां मेरु नमस्कार ज्ञोइयां।

यहूदा

1 अवं यहूदा यीशु मसीहेरो सेवक ते कने याकूबेरो निकड़ो ढला आई। अवं यहूदा ई चिट्ठी तुसन लोकन लिखने लोरोई, जैना परमेश्वरे कुजवरेथ कि तैस पुड़ विश्वास केरथ। बाजी परमेश्वर तुसन सेइं प्यार केरते ते यीशु मसीहेरे ज़िरिये तुस सुरक्षित आथ। 2 अवं प्रार्थना केरताई कि परमेश्वर तुसन दया ते शान्ति ते प्यार जादे करां जादे दे। 3 हे ट्लारव, अवं लिखनेरे लेइ हर मुमकिन कोशिश केरि रावरो थियो तैस (मुक्तरे) नंवे ज़िन्दगरे बारे मां ज़े यीशु मसीहेरे ज़िरिये परमेश्वरे तरफां मैलतीए, जैस मां अस शामिल आम। पन हुना अवं इन ज़स्ती समझाताई कि तुसन इस चिट्ठेरे ज़िरिये होलसो देई, ताके तुस मसीही विश्वास बनोरो रखनेरे लेइ बड़ी मेहनत केरि बटथ, परमेश्वरे ई विश्वास अपने सेब्भी लोकां केरे लेइ एककी बार दित्तोरोए, ते ई न बेदलोए। 4 किछ लोक जैना यीशु मसीह पुड़ विश्वास केरनेरो दिखावो केरतन तैना तुश्शे कलीसियान मां शामिल भोरेन। तैना परमेश्वरी आदर न केरन ते तैना ई गलत शिक्षा देतन, कि परमेश्वरे इश्शो पाप माफ़ कियोरेन ते अस अधर्म ज़िन्दगी ज़ी बटतम। तैना यीशु मसीहेरो इन्कार केरतन, ज़ै इश्शो अकके मालिक ते प्रभुए। बड़े पेइले पवित्रशास्त्र ज़ोते, परमेश्वरे एरे ज़ेरे लोकन सज्ञा देलो। 5 पन अगर तुसेई सब गल्लां एककी बार जैनोरिन, फिरी भी अवं तुसन इना गल्लां याद करैनी चाताई, कि प्रभुए इस्साएली लोक गुलैमी मरां आज्ञाद किये, ते मिस्र मुलखे मरां कढे पन बादे मां तैने तैना मारे जैनेई सुनसान ठारी मां तैस पुड़ विश्वास न कियो। 6 तुसेई तैन स्वर्गदूतां केरे बारे मां सोचोरु लोडे जैना अपने पदे पुड़ खुश न थिये, ज़ै परमेश्वरे तैन दित्तोरो थियो, पन तैनेई स्वर्गेरु घर शारु; परमेश्वरे तैना कधी न ट्लुटने बैली शंगलन सेइं बेंधतां बुन आंधरे मां तैस महान दिहड़ी तगर रखोरेन, ज़ेइस तै तैन दोषी बनालो। (aidios g126) 7 इना इस्साएली ते स्वर्गदूतां केरु ज़ेरु इन भी याद रख्खा कि सदोम ते अमोरा नगरां ते कने आसेपासेरे नगरां केरे रानेबाले लोकन सेइं कुन भोवं। लोक अधर्म भोए ते हर किसमेरी बदमाशी केरनेबाले थिये। एल्हेरेलेइ परमेश्वरे तैना अगारे ज़िरिये भस्म किये। ज़ैन तैन सेइं भोवं ई तैन झूठे उस्तादां केरे लेइ खबरदारी आए कि तैन भी हमेशारे अगारे ज़िरिये सज्ञा मैल्लनीए। (aiōnios g166) 8 तेन्चरे इना अधर्म लोक ई दावो केरतन कि

परमेश्वरे दर्शने मां ज्ञोवरु अधर्मी जिन्दगी जीतां तैना अपनो जिसम अशुद्ध
 केरि बटतन, ते कोन्ची भी एप्पू पुड़ अधिकार रखनेरी अज्ञाज्ञत न देन ते
 तैना महिमा बाले स्वर्गदूतां केरे बारे मां बुरी गल्लां ज्ञोतन। 9 पन इडी तगर
 कि प्रथान स्वर्गदूत मीकाईले इन अधर्मी लोकां केरु ज़ेरु न कियूं। ज़ैखन
 शैतान ते मीकाईल मूसा नेबेरी लाश दबनेरे अधिकारेरे बारे मां बेंस भोइ, त
 मीकाईल स्वर्गदूते कां इन लोकन करां जादे अधिकार भोनेरे बावजूद भी तैने
 शैताने बुरी गल्लां ज्ञोइतां दोषी न ठहराव, इसेरे बदले तैने इन ज्ञोवं, कि
 “प्रभु तीं डॉटे!” 10 पन इना लोक तैन चीज़ां केरे खलाफ गलत ज़बान
 इस्तेमाल केरतन ज़ैन तैना न समझन। ते जैन चीज़न तैना समझातन तैन लैटे
 जानवरां केरे ज़ेरे केरतन, एना चीज़ां केरतां तैना अपनो आप नाश केरतन।
 11 तैन पुड़ अफसोस! किजोकि तैना आदमेरे मटु कैनेरो ज़ेरो बुरो सलूख
 केरतन, ज़ैने अपनो ढला मारो। तैना जल्दी ज़ेन्चरे बिलामे पेइंसो कमानेरे लेइ
 लोकन करां पाप कराव तैनेई भी तैए गलती की, ते ज़ेन्चरे करोह नाश कियो
 किजोकि तैने (मूसेरे खलाफ) खलाफत की, तेन्चरे तैना लोक भी नाश किये
 गाले किजोकि तैना भी प्रभुएरे खलाफ खलाफत केरने लोरेन। 12 ज़ैखन
 इना लोक धामन मां खातन ज़ैना तुस प्रभुएरो प्यार याद केरनेरे लेइ बनातथ,
 त तैना समुन्द्रेरी छेपोरी शफ़डां केरे ज़ेरे खतरनाक आन, ज़ैना तुसन डोबनेरी
 वजा बेनि बटतन। तैना तैन बेशर्म पुहालां केरे ज़ेरे आन ज़ैना सिर्फ अपनो
 खियाल रखतन। तैना बगैर पैने बिदलारारे ज़ेरेन ज़ैन हवा उडारतीए, तैना
 शेरारे बेफल बुटां केरे ज़ेरे आन। ज़ैना ज़ीलना उखड़ेरेन ते दुइये तरीकेई सेइं
 मरेन। 13 ज़ेन्चरे समुन्द्रेरी मज़बूत छेल्ली गंदी शैमफ एनतिन, तेन्चरे इना
 लोक बेशर्म कम्मां केरतन। तैना किछ तारां केरे ज़ेरे आन ज़ैना सिद्धे बत्तां न
 चलन, तैना सही बत न हिरान। प्रभुए तैन केरे लेइ अक ठार रखोरि जै पूरे
 तरीके सेइं आंधरीए ज़ैडी तैनेई हमेशारे लेइ रानू पेनू। (aiōn g165) 14 ते
 हनोक जै आदमेरे सतोवं पीड़ी मरां थियो, तैने इन अधर्मी लोकां केरे बारे मां
 भविष्यद्वाणी की। तैने ज़ोवं “हेरा, प्रभु अपने बेशुमार पवित्र स्वर्गदूतन सेइं
 साथी एज्जेलो। 15 कि सेब्ही लोकां केरो इन्साफ केरे, ते तैन केरे सेब्ही बुरां
 कम्मां केरे बारे मां जैना तैनेई परमेश्वरे खलाफ कियोरन ते सैरी बुरी गल्लां
 जैना तैनेई तैसेरे खलाफ कियोरिन तैन केरे बारे मां तैन दोषी बनालो।” 16

इना लोक हमेशा परमेश्वरे खलाफ ज़ोतन ते होरि केरि गेलती कढतन। तैना अपने मनेरे मेरज़रे मुताबिक लगातार बुरां कम्मां केरतन। तैना अपने बारे मां घमण्ड केरतन ते अपने फैइदेरे लेइ होरि केरि चापलूसी केरतन। 17 पन हे ट्लारव, तुस तैन गल्लन याद रखा; जैना गल्लां इश्शो प्रभु यीशु मसीहेरे प्रेरितेई पैइली ज़ोरिन। 18 तैना तुसन सेइं ज़ोते थिये, “कि आखरी दिहाड़न मां ऐ लोक भोले जैना प्रभु ते तैसेरे लोकां केरो मज़ाक बनाले। इना तैना लोक आन जैन केरि ज़िन्दगी तैन केरे बुरी इच्छा केरे कैबू मां आए।” 19 इना तैना लोक आन जैना तुसन अलग-अलग टोलन मां बंटतन, तैन केरि बुरी इच्छां तैन च़लैतिन ते तैन कां परमेश्वरो आत्मा नई। 20 पन हे ट्लारव, तुस एककी होरेरी मद्दत केरते राथ कि बड़े पवित्र सच्चे मां बद्धथ जैन तुस विश्वास केरतथ। तुसेई पवित्र आत्मारे शेक्करे अगवैई सेइं प्रार्थना कियोरो लोड़े। 21 तुसेई लगातार इन जैनतां ज़ीयोरु लोड़े कि परमेश्वर तुसन सेइं प्यार केरते, ज़ेन्धरे तुस बलगने लोरेथ ज़ेइस इश्शो प्रभु यीशु मसीह अपने दयाई मां तुसन हमेशारी ज़िन्दगी देलो। (aiōnios g166) 22 तैन लोकन पुड़ दया केरा जैन नई पतो कि तैना कोस शिक्षाई पुड़ विश्वास केरन। 23 किछ होरे लोक जैन तुस ज़ानतथ कि नरके मां चलोरेन। तैन जल्दी खिचतां हमेशारी अग्गी मरां बचाथ। हेजू भी होरन पुड़ दया केरा। हांलाकि, ध्यान देथ तैस्से पापे दुबारा न केरा। तुस तैन केरे पापन सेइं अज़मैइशी मां न पेथ, ते तैना पाप केरनेरे ज़िरिये अपनो आप दागदार न केरा। 24 परमेश्वर तुश्शी हफाज़त केरनेरे बाले ताके तुस पापेरी ज़िन्दगी ज़ीतां धोखो न खाथ। तै महिमा बालो परमेश्वर तुसन एप्पू कां आन्नेरे ते तुसन बेकसूर ते खुशी सेइं भरनेरे काबले। 25 तैए अक परमेश्वरे जैने यीशु मसीहेरे ज़िरिये असन मुक्ति दित्ती, इश्शो प्रभु यीशु लोकन परमेश्वरी आदर केरने ते तैसेरी बड़याई केरनेरी वजा बनाते। ताके तैना इस गल्ली पिशानन कि तैस कां शुरू करां हुन्ना ते हमेशारे लेइ शक्ति ते अधिकार आए। आमीन। (aiōn g165)

प्रकाशित वाक्य

1 यीशु मसीहेरो प्रकाशितवाक्य, जै परमेशरे तैस एल्हेरेलेइ दित्तो कि तै अपने सेवकन तैना गल्लां हिराए, ज़ैन केरु जल्दी भोनू ज़रूरीए। यीशु मसीहे अपनो स्वर्गदूत भेज्तां तैसेरे ज़िरिये अपने दास यूहन्ना इना गल्लां ज़ोई, 2 अबं यूहन्ना तैन सब लिखने लोरोई ज़ैन मीं लवं, अबं इस मां परमेशरेऱु वचन ते यीशु मसीहेरी सज्जी शिक्षारी गल्लां लिखने लोरोई ज़ैना तैनी मीं सेइं ज़ोई। 3 परमेशर तैन सेढ्बी लोकन बरकत देलो ज़ैना इस भविष्यिवेनरे वचने पढ़तन, ते कने ज़ैना शुन्तन ते इस मां लिखोरी गल्लन मन्तन, किजोकि इन गल्लां पूरी भोनेरो वक्त नेड़ो ओरोए। 4 अबं यूहन्ना आसिया इलाकेरे सत कलीसियान जो लिखने लोरोई। परमेशरे जै आए ते जै हमेशा थियो, ते जै एजनेबालो आए; ते तैन सत आत्मां केरे तरफां ज़ैना तैसेरे तखतेरे सामनेन तुसन अनुग्रह ते शान्ति मैलती राए। 5 ते यीशु मसीहेरे तरफां, जै वफादार गवाह ते मुडदन मरा ज़ींतो भोने बालन मरा पेइलोए त कने धेरतरे राज्ञा केरो प्रधाने तुसन अनुग्रह ते शान्ति मैलती राए। यीशु मसीहे असन सेइं प्यार कियो, त कने तैने अपने खूने सेइं अस पापन करां छुटाए। 6 तैने अस अक राज्ञ ते अपने बाजी परमेशरेरी सेवा केरनेरे लेइ याजक भी बनाए; तैसेरी महिमा ते हकोमत हमेशा भोती राए। आमीन। (aiōn g165) 7 हेरा, मसीह बिदलारी सेइं साथी एजनेबालोए, ते हर कोई तैस लाएलो, बल्के ज़ैना लोक तैसेरे मौतरे लेइ ज़िमेवार थिये, तैना भी तैस लाएले, ते धेरतरे सारे लोक ज़ोरे-ज़ोरे सेइं लेरां देले। हाँ इन भोलू। आमीन। 8 प्रभु-परमेशर ज़ोते, “अब्वें अलाफा ते ओमेगा आई, (मतलब पेइलो ते आखर) अबं तै आई, जै आए, जै हमेशा थियो, ते जै एजने बालोई, ते बड़ो शक्ति बालोई।” तै इन ज़ोते, 9 अबं यूहन्ना तुश्शो विश्वासी ढला, ते कने यीशु मसीहेरे लेइ दुःखन मां, परमेशरेरे राज्ञे मां, ते सबरी मां तुसन सेइं साथी शामलाई। अबं पतमुस नंव्वेरे टैपू पुड़ परमेशरेऱु वचन शुनानेरे त कने यीशुएरी गवाही देनेरे वजाई सेइं कैद थियो। 10 हफतेरे पेइले दिहाड़े पवित्र आत्मां अबं अपने कैबू मां कियो, मीं एप्पू पत्र अक आवाज़ इन ज़ोते शुनी। तै आवाज़ नड़शिगेरी उच्ची आवज़री ज़ेरि थी। 11 “ज़ैन किछ तू लातस, तैस किताबी मां लिखतां सत नगरां केरे कलीसियान कां भेज, मतलब इफिसुस, स्मुरना, पिरगमुन, थुआतीरा,

सरदीस, फिलदिलफिया ते लौदीकिया नगरन मां आन।” 12 तैखन ज़ै मीं सेइं गल्लां केरने लोरो थियो तैस हेरनेरे लेइ तक्कू; ते पत्रोवं फिरतां मीं सोन्नेरे सत दीवट लाए। 13 ते तैन दीवटां केरे मझाटे मुडदेरो ज़ेरो कोई लाव, तैने पवन तगर लम्मो चोगो लोरो थियो, ते तैसेरे छैती पुङ् सोन्नेरो पटको बंधोरो थियो। 14 तैसेरे दोग्गे पुङ् तैसेरे बाल छिती उन्नी या हिवेरे ज़ेरे थिये। तैसेरी एछळी अगारे लपारी ज़ेरि बेलती थी। 15 ते तैसेरे पाव भेट्टी मां गर्म कियोरे पितलरे ज़ेरे चमकते थिये, ते ज़ैखन तैने गल की तैसेरी आवाज बड़े ज़ोरे सेइं थी, ज़ेन्नरे बड़े दरियां केरि ज़ेरि ज़ैना बड़े ज़ोरे सेइं चलतन। 16 ते तै अपने देइने हथ्ये मां सत तारे घिन्तां थियो, ते तैसेरे मुखे सेइं दूर्ध धारण बाली तलवार निसती थी, तैसेरु तुतर एरु चमकतू थियूं ज़ेन्नरे दिहाड़ो भर-दुपारेई चमकते। 17 ज़ैखन मीं तै लव, त तैसेरे पावन पुङ् मुडदेरो ज़ेरो पेव, ते तैने मीं पुङ् अपनो देइने हथ रखतां इन ज़ोवं, “डर न, अवं पेइलो त कने आखरी आई। 18 ते ज़ींतो भी अवं आई, अवं एक्की बार मरो थियो, पन हुनी अवं ज़ींतोई ते अवं हमेशा ज़ींतो रानोई। मीं मौती पुङ् ते पाताले पुङ् ज़ै मरे लोकां केरि ठारे अधिकारे। (aiōn g165, Hadēs g86) 19 एल्लेरेलेइ ज़ैना गल्लां तीं हेरी ते ज़ैना गल्लां भोइ रेविन, ते ज़ैना इट्टां बाद भोने बैलिन, तैना सब लिख।” 20 मतलब तैन सत तारां केरो भेद ज़ैना तीं मेरे देइने हथ्ये मां लोरे थिये, ते तैन सत सोन्नेरे दीवटां केरो भेद, ते सत तारे सत कलीसियां केरे स्वर्गदूतन, ते तैना सत दीवट सत कलीसियान।

2 तैने मीं सेइं इन भी ज़ोवं: “इफिसुस नगरेरे कलीसियारे स्वर्गदूते जो ई सन्देश लिख कि, ‘अवं तै आई ज़ै सते तारे अपने देइने हथ्ये मां घिन्तां फिरताई, ते सोन्नेरे सत दीवटां केरे मझाटे फिरताई, अवं इन ज़ोताईः 2 अवं तेरां कम्मां, तेरी मेहनत, ते तेरु सबर ज़ानताई। ते इन भी, कि तू बुरे लोकन बर्दाश न केरि बटस; त कने तैन ज़ैना अपनो आप प्रेरित ज़ोतन पन आन नई, तैना तीं परखे ते तैना झूठे निस्से। 3 अवं इन भी ज़ानताई मेरे नंब्वेरे खातर तीं सबरी सेइं दुःख झैल्ले ते तीं मेरी सेवा केरनि न शारी। 4 पन मीं तेरे खलाफ इन ज़ोनूए कि ज़ेरो प्यार तीं मीं सेइं विश्वास केरनेरे वक्ते मां कियोरो थियो इस वक्ते मां न केरस। 5 याद रख तू बिछड़ने करां पेइलो कोडि थियो। तू पाप केरने करां मनफिरा ते तेरही ज़िन्दगी ज़ी ज़ेरि पेइलो विश्वास केरनेरे

वक्ते जीतो थियो। अगर तू मन न फिरालो त अवं तीं कां एइतां तेरु दीवट तैस
 ठारां पुटेलो। 6 पन हाँ तीं मां ई गल त आए, कि तू नीकुलइयां केरे कम्मन
 सेइं नफरत केरतस, जैन सेइं अवं भी नफरत केरताई। 7 जै समझनू चाते तै
 ध्याने सेइं शुने कि परमेशरेरो आत्मा कलीसियान सेइं कुन ज़ोते, जै जींत
 हासिल केरे, अवं तैस, ज़िन्दगरे बुटे मरां फल खानेरे लेइ देइलो जै ज़िन्दगी
 देते, जै परमेशरेरे स्वर्ग लोके मांए।” 8 तैने मीं सेइं इन भी ज़ोवं, “स्मुरना
 नारेरे कलीसियारे स्वर्गदूते जो ई सन्देश लिख, ‘जै पेइलो ते आखरीए; जै
 मरों थियो ते हुनी जींतो भोरोए, तै इन ज़ोतेः 9 अवं ज़ानताई कि तू स्तव
 गातस ते तू गरीब आस, पन आत्मिक गल्लन मां तू धनी आस। अवं इन भी
 ज़ानताई कि जैना लोक ज़ोतन कि तैना परमेशरेरे चुनोरे (यहूदी) लोकन, पन
 तैना असलीती मां नई। तैना तुश्शे बारे मां बुरी गल्लां ज़ोतन, पन हकीकति
 मां तैन केरो रिश्तो एरे टोली सेइं आए जै शैतानेरी। 10 जैना दुःख तीं झैल्लने
 पेनेन तैन करां न डर। शैतान तुसन मरां किछ लोकन टलुइतां कैद करालो
 ताके तैन परखे गान। ते तुसन दश दिहाड़न तगर बड़ो दुःख झैल्लनो भोलो।
 पन मीं पुड़ विश्वास केरनो न शार, चाए जान भी देनी पे, किजोकि अवं तेरे
 जींतरे लेइ हमेशारे ज़िन्दगरु इनाम देइलो। 11 जै समझनू चाते तै ध्याने सेइं
 शुने कि परमेशरेरो आत्मा कलीसियान सेइं कुन ज़ोते, जै जींते, तैस दुइयोवं
 मौती सेइं नुकसान न पुज़ेलो।” 12 तैने मीं सेइं इन भी ज़ोवं, “पिरगमुन
 नगरेरे कलीसियारे स्वर्गदूते जो ई सन्देश लिख, ‘अवं तै आई जैस कां दूई
 धारण बाली तिख्खी तलवारे, अवं इन ज़ोताईः 13 अवं इन ज़ानताई, कि तू
 तैड़ी रातस जैड़ी शैतान राज़ केरते, तू मीं सेइं साथी ईमानदार राव, त कने तू
 मीं पुड़ विश्वास केरनो कधे न शारस। तीं इड़ी तगर विश्वास कियो ज़ेइस मेरो
 वफादार गवाह अन्तिपास तैनेई तैस ठैरी मारो, जैड़ी शैतान राज़ केरते। 14
 पन मीं तेरे खलाफ किछ गल्लां ज़ोनिन, किजोकि तू तैन केरि खलाफत
 न केरस जैना तुश्शे कलीसियाई मां झूठी शिक्षा देतन तेन्चरे जैन बिलामे
 बीतोरे वक्ते मां शिखालू। बिलामे बालाक राजे शिखालू कि इसाएली लोकां
 केरि अज्ञैइश केरे ताके तैना पाप केरन। तैने शिखालू कि तैना मूरतन पुड़
 बलिदान कियोरी चीज़ां खान ते बदमाशी केरन। 15 तेन्चरे तुसन मां किछ
 लोक एरे आन जैना नीकुलइयां केरि शिक्षा मन्तन। 16 ते मनफिरा, नई

त अवं तीं कां जल्दी एजतां तैन लोकन सेइं तैस तलवारी सेइं लेडेलो ज़ै
 मेरे ऐशेरां निसतीए। 17 ज़ै समझनू चाते तै ध्याने सेइं शुने कि परमेश्वरो
 आत्मा कलीसियान सेइं कुन ज़ोते; जैना लोक ज़ींत हासिल केरन, तैन अवं
 छ़प्पोरो मन्ने मरां देइलो, त कने अवं तैन अक छिंतो घोड़ भी देइलो; तैस
 घोड़े पुड़ अक नवं लिखोरु भोलू, जैस तैसेरे हासिल केरनेबालेरी अलावा
 होरो कोई न ज़ानेलो।” 18 तैने मीं सेइं इन भी ज़ोवं, “थुआतीरा नगरेरे
 कलीसियारे स्वर्गटूते जो ई सन्देश लिख कि, ‘अवं परमेश्वरु मटू ज़ेसेरी
 एछ़छी अगारी ज़ेरिन, त कने ज़ेसेरे पाव कीमती पीतलारे ज़ेरेन, अवं इन
 ज़ोताईः 19 अवं तेरे कम्मन, तेरे प्यारे, विश्वास, सेवा त कने सबरी ज़ानताईः,
 ते इन भी ज़ानताईः, कि तेरां आखरी कम्मां पैइले कम्मन करां बेद्रुतन। 20
 पन मीं तेरे खलाफ इन ज़ोनूए, कि तू तै कुआन्श इजेबेल राने देतस; जै
 अपनो आप नविन ज़ोतीए, ते मेरे दासन बदमाशी केरने त कने मूरतन कां
 चाढ़ोरु खानू शिखैलतां टपलातीए। 21 मीं तैस मनफिरानेरे लेइ मौको दित्तो,
 पन तैसा अपने बदमाशी केरने करां मन न फिरानो चाव। 22 हेरा, एल्हेरेलेइ
 अवं तैस बिमार केरेलो; ते ज़ै तैस सेइं बदमाशी केरेलो अगर तैना भी तैन
 कम्मन करां मन न फिराले, त तैन बड़े मुसीबती मां छेडेलो। 23 ते अवं तैसेरे
 बच्चन मैरेलो; ते तैखन सब कलीसियां बुझेली कि दिल त कने मनेरो परखने
 बालो अवं आईः ते अवं तुसन मां हर एककी तैसेरे कम्मां केरे मुताबिक बदलो
 देइलो। 24 पन तुस थुआतीरा नगरेरे बाकी लोकन सेइं, जैना तैस शिक्षाई न
 मन्न, जैन गल्लन जो तैना शैतानेरी दुग्गी गल्लां ज़ोतन न ज़ानन्, इन ज़ोताईः,
 कि अवं तुसन पुड़ होरो बोझ न रेख्खी। 25 पन हाँ, जैन तींकांए तैस मेरे
 एजने तर ठेमतां रख। 26 जैना लोक ज़ींत हासिल केरन, ते ज़ै मेरे इच्छारे
 मुताबिक आखरी तगर केरतो राए, अवं तैस सैरी कौमां केरे लोकन पुड़
 अधिकार देइलो। 27 अवं तैस तेरहो अधिकार राज केरनेरे लेइ देइलो ज़ेरो मेरे
 बाजे मीं दित्तोरोए। तैन केरु राज लोहेरु ज़ेरु मज़बूत भोलू जैन ट्लुटे न, ते
 तैन केरे दुश्मन मित्तरे भांण्डां केरे ज़ेरे चूर-चूर भोले। 28 अवं तैन केरि ज़ींत
 हिरानेरे लेइ तैन झेंझेरो तारो भी देइलो। 29 ज़ै समझनू चाते तै ध्याने सेइं शुने
 कि परमेश्वरो आत्मा कलीसियान सेइं कुन ज़ोते।”

3 तैने मीं सेइं इन भी ज़ोवं, “सरदीस नगरेरे कलीसियारे स्वर्गदूते जो ई
 सन्देश लिख कि, ‘जैस कां परमेशरेरी सत आत्मान ते सत तारेन, तै इन ज़ोते
 कि अवं तेरे कम्मन ज्ञानताई, कि तीझो ज़ींतो ज़ोतन, पन तू आस मरो। 2
 एल्हेरेलेइ बीझो रा, ते तैन चीज़न जैना रेवरिन, ते जैना मिटने बैलिन, तैन
 मज़बूत केर; किजोकि मीं तू केन्ची चीज़ी मां अपने परमेशरे कां पूरो न लव।
 3 याद केर, कि तीं केरि शिक्षा मैलोरी थी तीं ते शुनोरी थी, ते तैस मनतो रा ते
 कने मनफिरा, ते अगर तू बीझो न रालो, त अवं चोरेरो ज़ेरो एज्जेलो ते तू
 कधे न ज़ानेलो, कि अवं कोस घेड़ी तीं पुड़ एज्जेलो। 4 पन सरदीस नगरे
 मां तुसन मां किछ लोक एरे आन, जैनेई अपनो आप पापे सेइं अशुद्ध नई
 कियोरो, तैना छितां लिगड़ां लेइतां मीं सेइं साथी च़लेले किजोकि तैना इस
 काबलन। 5 जैना ज़ींत हासिल केरेले तैन इस्से तरीके सेइं तैन केरां ज़ेरां
 छितां लिगड़ां लुवां गालां। अवं तैन केरु नवं तैस किताबी मरां हटेलो जैस
 मां परमेशरे तैन केरां नंवां लिखोरन जैना हमेशारी ज़िन्दगी हासिल केरेले।
 अवं तैन केरु नवं अपने बाजी ते अपने स्वर्गदूतां केरे सामने एलान केरेलो। 6
 जै समझानू चाते तै ध्याने सेइं शुने कि परमेशरेरो आत्मा कलीसियान सेइं कुन
 ज़ोते।” 7 तैने मीं सेइं इन भी ज़ोवं, “फिलदिलफिया नगरेरे कलीसियारे
 स्वर्गदूते जो इन लिख, ‘अवं तै आई जै पवित्र ते सच्चे, ते जैस कां दाऊदेरी
 चाबीए, ज़ेसेरे खोल्लेरे कोई बंद न केरि सके ते ज़ेसेरे बंद केरे कोई खोल्लेरे
 न सके, तै इन ज़ोतेः 8 अवं तेरे कम्मन ज्ञानताई, हेर, मीं तेरे सामने अक बत
 खोलरोरीए, जैस कोई बंद न केरि सके कि तेरी शक्ति थोड़ीए, ते तीं मेरु
 वचन मनोरुए, ते मेरे नंवेरो इन्कार नई कियोरो। 9 हेर, जैन लोकां केरो
 रिश्तो शैतानेरी टोली सेइं आए, तैना ज़ोतन कि तैना यहूदी आन, पन आन
 नई, बल्के झूठ ज़ोतन हेर, अवं एरु केरेलो, तैना तीं कां एइतां झुकेले, ते इन
 ज़ानेले, कि अवं तीं सेइं प्यार केरताई। 10 जैखन तू दुःख झैल्लतो थियो तीं
 सबरी सेइं मेरो सन्देश मन्नो। एल्हेरेलेइ अवं भी तीं बड़े अज़मैइशरे वक्ते
 बचेइलो, जै धेरतली पुड़ रानेबालन पुड़ परखनेरे लेइ सारे दुनियाई पुड़ एजने
 बालीए। 11 अवं जल्दी एजने बालोई; जैन किछ तींकांए, तैस ठेमतां रख, कि
 कोई तेरु ताज न थसोडे। 12 जै ज़ींत हासिल केरे, तै ज़ेन्चरे अक खम्भो
 घरे मज़बूत रखते, तेन्चरे तै भी परमेशरेरे मन्दरे मां हमेशा रालो; ते अवं

अपने परमेश्वरे नवं, ते अपने परमेश्वरे नगर, मतलब नंवे यस्तश्लेष्मे नवं, जैन नगर स्वर्गे पुड़ां एजने बालूए ते अपनू नंवू नवं तैस पुड़ लिखेलो। 13 जै समझनू चाते तै ध्याने सेइं शुने कि परमेश्वरो आत्मा कलीसियान सेइं कुन ज़ोते।” 14 तैने मीं सेइं इन भी ज़ोव “लौटीकिया नगरे कलीसियारे स्वर्गदूते जो ई सन्देश लिख कि, ‘जै आमीन, वफादारे, ते सच्चो गवाह आए, ते परमेश्वरी सष्टिरी वजाए, तै इन ज़ोते। 15 कि अवं तेरे कम्मन ज्ञानताई, कि तू तैस पैनेरो ज्ञेरोस जैन न ठंडू ए ते न गर्म, रोडू भोथू कि तू ठंडो भोथो या फिरी गर्म, यानी तू मीं पूरो विश्वास केरेथो या बिलकुल न केरेथो। 16 एल्हेरेलेइ तू निघोस, ते न ठंडोस ते न त्तओस, पन तू अध्ये मने सेइं मीं पुड विश्वास केरतस, एल्हेरेलेइ अवं तीं रद केरनेबालो आई। 17 तू जैन ज़ोतस, कि अवं धनी, ते धनी भोरोई, ते मीं केन्ची चीज़री घटी नई, ते इन न ज्ञानस, कि तू बदकिसमत ते तुच्छ ते कंगाल ते कानो, ते नगोस। 18 एल्हेरेलेइ अवं तीं सलाह देताई, कि अगगी मां तौरु सोन्नू मीं करां ने, कि धनी भोस; ते छिंतां लिंगां ने, कि तीं अपने नगे पनेरी शर्म न भोए; ते अपने एछळी केरे लानेरे लेइ कजल ने, कि तू लास। 19 अवं जैन-जैन सेइं प्यार केरताई, तैन शिखालताई ते सज्जा देताई ताके तैना रोड़े बनन। एल्हेरेलेइ भलाई केरने मां लग्गोरो रा, ते पापन करां मनफिरा। 20 हेर, तेरे दिले मां एजनेरे लेइ अवं ज़ेन्चरे कोई घरेरु दार गुड़काते अवं तेन्चरे आई; अगर तू मेरी आवाज़ शुन्तां अपनो दिल खोल्लस, त अवं अन्तर एज्जेलो ते अस एप्पू मांमेइं संगती केरमेले। 21 जै ज़ींते, अवं तैस एप्पू सेइं साथी अपने तखते पुड़ बिशौलेलो, ज़ेन्चरे अवं भी ज़ींत हासिल केरतां अपने बाजी केरे तखते पुड़ बिशौरोई। 22 जै समझनू चाते तै ध्याने सेइं शुने कि परमेश्वरो आत्मा कलीसियान सेइं कुन ज़ोते।”

4 इना गल्लां हेरनेरां पत्ती, मीं स्वर्गे मां अक दार खुल्लोरु लाव। ते मीं सेइं कोई गल्लां केरने लाव ई तैए थियो जैने मीं सेइं पेइली गल्लां की, तैसेरी आवाज़ नड़शिनगेरे ज़ेरि थी। तैने मीं सेइं ज़ोव, “इडी बा एई: अवं तीं तैना गल्लां हिरेइलो, जैन केरु इन गल्लां केरे पत्ती पूरु भोनू ज़रूरीए।” 2 अकदम पवित्र आत्मां अवं अपने कैबू मां कियो; ते मीं स्वर्गे मां अक तखत लाव ते तैस तखते पुड़ कोई बिशौरो लाव। 3 ते जै तैस तखते पुड़ बिशौरो थियो, तै

यशब ते मानिक कीमती घोड़ां केरो ज़ेरो लेइहोतो थियो। ते तैस तखते चेव्रे पासन भुञ्जल्लैठ थी, जै मरकत घोड़ेरी ज़ेरि लेइहोती थी। 4 तैस तखतेरे चेव्रे पासन चोब्ही तखत थिये; ते तैन तखतन पुड़ चोब्ही बुजुर्ग छिंतां लिगड़ां लेइतां बिश्शोरे थिये, ते तैन केरे दोगन पुड़ सोन्नेरां ताजां थियां। 5 ते तैस तखते मां बिजली ते गुड़ने ते तखतेरे सामने अगारे सत दीवट बलने लोरे थिये, इन परमेशरे सत आत्मा आन। 6 ते तैस तखतेरे सामने शीशोरो साफ समुन्द्र थियो जै बरफारो ज़ेरो थियो, ते तखतेरे मझाटे ते तखतेरे चेव्रे पासन प्राणी थिये, तैन केरे सैरे जानी पुड़ एछळी-एछळी थी। 7 पेइलो प्राणी शेररो ज़ेरो थियो, ते दुह्योवं प्राणी दाँतेरो ज़ेरो, ट्लेइयोवं प्राणी मैनेरो ज़ेरो थियो, ते चेवरोवं प्राणी उडरने बाले उकाबेरो ज़ेरो थियो। 8 ते चेव्रे परैणी केरां शा-शा फंगां थियां ते तैन पुड़ एछळी थी इडी तगर कि फंगन अन्तर भी एछळी थी, तैना रात दिहाड़ी बगैर आरामे इन ज़ोते रातन, “पवित्र, पवित्र, प्रभु-परमेशर, सर्वशक्तिमान, जै थियो, जै आए, ते जै एजनेबालोए।” 9 जै तखते पुड़ बिश्शोरो जै हमेशा-हमेशा ज़ींतोए, तैना प्राणी तैसेरी महिमा ते आदर ते शुक्र केरेले, (aiōn g165) 10 जैखन चोब्ही बुजुर्ग तखतन पुड़ बिशने बाले कां मथ्थो टेकेले, ते तैसेरी आराधना केरेले। ते तैना अपना-अपना ताजां तखतेरे सामने इन ज़ोइतां रखेले: (aiōn g165) 11 “हे इशो प्रभु-परमेशर, तींए सैरी चीज़ां बनेइ। तेरे मेर्जीं सेइं सब चीज़ां बनेइ जेर्हे ते वजूदे मां एई। एल्हेरेलेइ तूए महिमा, आदर ते शेत्करे काबलस।”

5 जै तखते पुड़ बिश्शोरो थियो, मीं तैसेरे देइने हथ्थे मां अक किताब लाई, जै अन्तर्मेई त कने बेइरमेई लिखोरी थी, ते तै सत मोहरां लेइतां बन्द कियोरी थी। 2 फिरी मीं अक ताकतबर स्वर्गदूत लाव, जै ज़ोरे ज़ोरे सेइं ई प्रचार केरतो थियो। “इस किताबारो खोल्लने ते इसेरी मोहरां ट्लोड़नेरे काबल कौनेत?” 3 पन न स्वर्गे मां, न धेरती पुड़ न धेरतारे बुन कोई तैस किताबी खोल्लने या तैस पुड़ नज़र केरनेरे काबल मैलो। 4 ते अवं ज़ोरे-ज़ोरे सेइं लेरां देने लव, किजोकि तैस किताबरे खोल्लनेरे या तैस पुड़ नज़र केरनेरे काबल कोई न मैलो। 5 तैखन तैन बुजुर्गन मरां एकके मीं सेइं ज़ोवं, “लेरां न दे, तक, तै जैस जो यहूदारे गोत्रेरो शेर ज़ोतन, जै दाऊद राज़ेरे खानदाने मरांए तैने तै किताबी खोल्लनेरे ते सत्ते मोहरां ट्लोड़नेरे लेइ शैतान हारावरोए।” 6 तैखन

मीं तखत ते चेव्रे प्राणी त कने तैन बुजुर्गा केरे मझाटे अक मारोरु गबडू लाव।
 तैसेरां सत शिनाँ ते सत एछ़्छी थी; इना परमेशरेरी सते आत्मान, जैना सैरी
 धेरतली पुड़ भेजोरिन। 7 गबड़े अगर एइतां जै तखते पुड़ बिशोरो थियो तैसेरे
 देहने हथ्ये मरां तै किताब नेही। 8 ते जैखन तैने किताब नेही, त तै चेव्रे प्राणी
 ते चोब्ही बुजुर्ग तैस गबडेरे सामने झुके; ते हर केन्चेरे हथ्ये मां बर्बत ते धूपे
 सेइं भरोरे सोन्नेरे कटोरे थिये, इना पवित्र लोकां केरि प्रार्थनान। 9 त तैना इन
 नन्वू गीत ज़ोने लगे, “तीं कां अधिकारे कि तू मोहरन ट्लोड्स ते इस किताबी
 खोल्लस, किजोकि तीं मेरतां अपने खूने सेइं परमेशरेरे लेइ हर एककी कुले
 मरां, हर भाषाई मरां, हर लोकन मरां, ते कौमी मरां लोक घिन्नोरेन।” 10
 “तीं तैना राजे बनाए, तीं तैना याजक बनाए जैना इश्शे प्रभु परमेशरेरे लेइ
 सेवारु कम केरन, ते तैना धेरती पुड़ राजां केरु ज़ेरु राजे केरतन।” 11 मीं
 दुबारा तक्कू, त मीं बेशुमार स्वर्गदूतां त चेव्रे प्रणी ते बुजुर्गा केरि आवाज़ शुनी
 जैना तखतेरे चेव्रे पासन थिये। 12 तैना ज़ोरे सेइं ज़ोते थी, “मारोरु गबडू
 समर्थ, धन, ज्ञान, शेक्षि, आदर, महिमा, ते कने शुक्रेरे काबले।” 13 फिरी मीं
 स्वर्गे मां ते धेरतली पुड़ त कने धेरतलरे बुन, ते समुन्दरेरी सब चीजां, ते सब
 किछ जैन तैन मांए, इन ज़ोते शुनू कि, “जै तखते पुड़ बिशोरोए तैसेरु त कने
 गबड़ेरु शुक्र, आदर, महिमा ते राजे, हमेशा राए!” (aiōn g165) 14 ते चेव्रे
 प्रेणोई आमीन ज़ोवं, ते बुजुर्गोई मथ्थो टेको।

6 फिरी मीं लाव, कि गबड़े तैन सत मोहरन मरां अक खोल्ली; ते तैन चेव्रे
 प्रैणन मरां एककेरी गुडनेरी जेरि आवाज़ शुनी कि, “एई।” 2 ते मीं नज़र की,
 ते अक छितो घोड़ोए, ते तैसेरे सुवारे कां धनक थियूं, ते तैस अक ताज दितू,
 ते तै ज़ींतो निस्सो कि होरि भी ज़ीत हासिल केरे। 3 जैखन गबड़े दुइयोवं
 मोहर खोल्ली, त मीं होरो प्राणी इन ज़ोते शुनू कि, “एई।” 4 फिरी अक होरो
 घोड़ो निस्सो, जै लाल रंगेरो थियो; ते तैसेरे सुवारे ई अधिकार दितो, कि
 धेरतली पुड़ां मेल-मिलाप सल्ले, ताके लोक एककी होरि मारन; ते तैस
 अक बड़ी तलवार दिती। 5 ते जैखन गबड़े ट्लेइयोवं मोहर खोल्ली, त मीं
 ट्लेइयोवं प्राणी इन ज़ोते शुनू कि, “एई।” जैखन मीं तक्कू त अक कालो
 घोड़ो निस्सो; 6 ते मीं तैन चेव्रे प्रैणन मरां मैनेरी जेरि ई गल ज़ोते शुनी, कि
 दीनारो गेहुं, “ते दीनारेरे ट्लाई सेर जौ, तेल, ते कने दाढ़ोरो रसेरो नुकसान न

केरथ।” ७ ज़ैखन तैने चेवरोंवं मोहर खोल्ली, त मीं चेवरोंवं प्राणी इन ज़ोते शुनो कि, “एई।” ८ ते मीं नज़र की, ते हेरा, अक हेइद्द्लो घोड़ोए; तैसेरे सूवारेरु नवं मौते, ते पाताल तैस पत्ती-पत्तीए, ते तैन ई अधिकार मैल्लो कि धेरती पुड़ रानेबाले लोकन मरां हर चेवरो मैन्हु मारन, कि तैना तैन तलवारी सेइं मारन, ते ढलुखी सेइं मारन, ते बुरी बिमैरी सेइं मारन, ते तैन जंगली जानवरन सेइं भी मारन। (Hadēs g86) ९ ज़ैखन गबड़े पंचोंव मोहर खोल्ली, त मीं बलिदान केरनेरी ठारी करां बुन आत्मा लेई, ज़ैना परमेशरे वचनरेरे वजाई सेइं, ते तैस गवाहेरी वजाई सेइं ज़ै तैनेई दित्तोरी थी, कि यीशु मसीह तैन केरो प्रभुए मारोरो थियो। १० ते तैनेई बड़े ज़ोरे सेइं हक देइतां ज़ोवं, “हे पवित्र, ते सच्चे प्रभु; तू केइस तगर इश्शो इन्साफ न केरेलो? ते धेरतलरे रानेबालन सेइं इश्शो खूनेरो बदलो केइस नेलो?” ११ ते तैन सेब्भन छित्तां लिगडां दित्तां, ते तैन सेइं ज़ोवं, कि थोड़े चिरेरे लेइ आराम केरा, ज़ांतगर तुश्शे संगी दास, ते विश्वासी साथी, ज़ैना तुश्शे ज़ेरे मारे गानेन, तैन केरि भी गिनती पूरी न भोए। १२ ज़ैखन गबड़े शेइयोंव मोहर खोल्ली, त मीं हेरु, कि अक बड़ो भुंज़ल अव; ते दिहडो कमलेरो ज़ेरो भोव, ते चाँदनी पूरी खूनेरी ज़ेरि भोइ। १३ ते अम्बरेरे तारे धेरतली पुडां झाड़े ज़ेन्चरे बड़े तूफाने सेइं फ़ेगेरे बुटे मरां कच्चे फल झ़इतन। १४ ते अम्बर एरु घिश्कू, ज़ेन्चरे बरको पलेटोते ते हर अक पहाड़, ते टैपू, अपने-अपने ठारारां घिशके। १५ ते धेरतलरे राज़े, प्रधान, सरदार, धनी ते समर्थि लोक, ते हर अक दास, ते हर अक आजाद पहाड़ां केरे कुढन मां, ते शफ़डन मां छ़प्पे। १६ ते पहाड़न, ते शफ़डन सेइं ज़ोने लाए, “कि असन पुड़ झ़ड़ा; ते असन तैसेरे ऐशी सेइं ज़ै तखते पुड़ बिशोरोए ते गबड़ेरे सरकी करां छुपा। १७ किजोकि तै खतरनाक दिहाड़ी एज्जेली ज़ेइस परमेशर ते गबडू हर एककी सज्जा देले, ते कोई भी तैस झैल्लनेरे काबल नई।”

७ इसेरां पत्ती मीं दुनियारे चेव्रे कूनन पुड़ चेव्र स्वर्गदूत खड़े लाए। तैन स्वर्गदूतन दुनियाई मां आफत फैलेइतां नुकसान पुजानेरे लेइ परमेशरे करां अधिकार हासिल कियोरो थियो, चाए धेरती पुड़ या समुन्द्रे पुड़। तैनेई दुनियारे चेव्रे कूनन करां हवान ठेमतां रखखी ताके धेरतली, या समुद्र, या कोन्ची बुटे पुड़, हवां न चले। ते मीं अक होरो स्वर्गदूत पूर्वेरां एइतो लाव। तैस कां अक

महोर थी जै हमेशा ज़ींते परमेशरेरे तरफां थी। तैने चेव्रे स्वर्गदूतन सेइं ज़ोरे
 सेइं ज़ोवं: ३ “ज़ांतगर अस अपने परमेशरेरे दासां केरे कुपाए पुड़ मोहर न
 लाम तांतगर तैना आफां तैन पुड़ न एजन, ते धेरतली, समुन्द्र ते कने बुटन
 नुकसान न पुजान।” ४ ते जैन पुड़ मोहर कीजई, मीं तैन केरि गिनती शुनी,
 कि इस्त्राएलेरी खानदानेरे गोट्लन मरां अक लख चुरतैली हज़ारन पुड़ महोर
 कीजई। ५ यहूदारे गोट्लन मरां १२ हज़ारन पुड़ मोहर लाई, रुबेनेरे गोत्रे मरां
 १२ हज़ारन पुड़; गाटेरे गोत्रे मरां १२ हज़ारन पुड़। ६ अशेरेरे गोट्लेरे मरां १२
 हज़ारन पुड़; नप्तालेरे गोत्रे मरां १२ हज़ारन पुड़; मनश्शेरे गोत्रे मरां १२
 हज़ारन पुड़। ७ शमैनेरे गोत्रे मरां १२ हज़ारन पुड़; लेवेरे गोत्रे मरां १२
 हज़ारन पुड़; इस्साकारेरे गोत्रे मरां १२ हज़ारन पुड़। ८ जबूलनेरे गोत्रे मरां
 १२ हज़ारन पुड़; यूसुफेरे गोत्रे मरां १२ हज़ारन पुड़, बिन्यामीनेरे गोत्रे मरां
 १२ हज़ारन पुड़ मोहर लाई जेई। ९ इसेरां पत्ती मीं मैन्ह केरि भीड़ लाई जैस
 कोई गेनि न थियो बटतो। तैना हर कुले मरां, हर कौमी मरां, ते हर भाषाई
 मरां ओरे थिये। तैना तखतेरे ते गबड़ेरे सामने खड़े थिये। तैनेई छित्तां लिगड़ां
 लोरो थियां, ते सैधेई अपने हथ्थन मां तैसेरे आदरारे निशानेरे रूपां मां खजूरेरी
 डैलड़ी घिन्तां थिये। १० ते तैना लोक बड़े ज़ोरे सेइं ज़ोती थिये, “मुक्तरे लेइ
 इशो परमेशरेरू जै तखते पुड़ बिशोरोए, ते गबड़ेरू जयजयकार भोए।” ११ ते
 सारे स्वर्गदूत जैना तखतेरे चेव्रे पासन ते बुजुर्गा केरे चेव्रे पासन थिये ते चेव्रे
 प्रेणोई तैनेई मथ्थो टेको, ते परमेशरे कां मथ्थो टेकतां ज़ोवं, १२ “आमीन,
 इशो परमेशरेरी स्तुति, ते महिमा, ते ज्ञान, ते शुक्र ते आदर, ते समर्थ, ते
 शक्ति हमेशा बनोरी राए। आमीन।” (aiōn g165) १३ इन गल्लन पुड़ बुजुर्गन
 मरां एकके मीं सेइं ज़ोवं; “इना छित्तां लिगड़ां लेइतां कौन? ते कोट्ठां ओरेन?”
 १४ मीं तैस सेइं ज़ोवं; “हे मालिक, तूए जानतस।” तैने मीं सेइं ज़ोवं; “इना
 तैना आन, जैना तैस बड़े मुसीबती मरां निसोरेन; तैनेई अपना लिगड़ां गबड़ेरे
 खूने सेइं धोइतां छित्तां केरन, जेसेरो मतलब तैन केरे पाप दूर किये।” १५
 “एल्हेरेलेइ तैना परमेशरेरे तखतेरे सामनेन, ते तैसेरे मन्दरे मां रात दिहाड़ी
 तैसेरी सेवा केरतन; ते जै तखते पुड़ बिशोरोए, तै तैन मां रालो ते तैन केरि
 रक्षा केरेलो। १६ ते तैना फिरी ढलुखोरे ते ट्लिशोरे न भोले: ते तैना दिहाड़े
 सेइं ते कोन्ची भी गेरमी सेइं न फुकोले। १७ किजोकि गबू जैन तखतेरे

मझाटे, तैन केरि रखवाली केरेलू; ते तैन लोकन जिन्दगरे पैनी कां नेलू, ते
परमेशर तैन केरे एछळी केरां सब ऐंखरु पुछेलो।”

8 जैखन गबड़े सतोवं मोहर खोल्ली, त सर्वे मां अध्ये घंटे तगर खामोशी
राई। 2 मीं तैन सत स्वर्गदूत जैना परमेशरे सामने खड़े रहतन, लाए, ते तैन
सत नड़शिंगे दित्ते जे। 3 फिरी अक होरो स्वर्गदूत सोन्नेरु धूपदान घिन्तां
अव, ते बलिदान केरनेरी ठारी कां जेव; ते तैस बड़ो धूप दित्तो, कि सेब्बी
पवित्र लोकां केरि प्रार्थनान सेइं साथी तैस सोन्नेरे बलिदान केरनेरी ठारी पुड़
जै तखतेरे सामने चाढे। 4 ते तैस धूपेरो तू परमेशरे लोकां केरि प्रार्थनान सेइं
साथी स्वर्गदूतां केरे जिरिये परमेशरे सामने पुज़ो। 5 तैखन स्वर्गदूत धूपदान
नेइतां तैस मां बलिदान केरनेरी ठारारी अग भरी, ते धेरतली पुड़ छङ्गी, ते
गुड़नेरी आवाज ते बिजली ते भुंज़ल भोने लाए। 6 ते तैना सते स्वर्गदूत
जैन कां सत नड़शिंगे थिये, बजानेरे लेइ तियार भोए। 7 पेइले स्वर्गदूत
नड़शिंगों बजाव, ते खूने सेइं मिलोरी आण ते अग धेरतली पुड़ शारी; ते
धेरतली ट्लेइन मरां अक हिस्सो फुकोई, ते बुट भी अक तीयाही फुकोए, ते
सब नीलो घास भी फुकोव। 8 दुइयोवं स्वर्गदूते नड़शिंगों बजाव, त किछ
जेन्चरे बड्हे पहाड़ेरु ज़ेरु अग्गी सेइं फुकोतू समुन्द्रे मां शारू; ते समुन्द्र अक
तीहाई खून भोव। 9 ते अक तीहाई जानवर जैना समुन्द्रे मां रहते थिये मेरि
जे, ते समुन्दरेरेरां अक तीहाई ज़िहाज्ञां तुबा भुआं। 10 ट्लेइयोवं स्वर्गदूते
नड़शिंगों बजाव, ते अक बड्हो तारो जै दीयेरो ज़ेरो बलतो थियो, स्वर्गेरां
ट्लुटो, ते दरियां केरे एककी तीहाई पुड़, ते पैन्न पुड़ पेव। 11 ते तैस तारेरु
नवं नागदौनाए, ते अक तीहाई पानी नागदौनारु ज़ेरु ट्लिठू भोवं, ते बड़े मैन्हु
तैस पैनेरे ट्लिठू भोने सेइं मेरि जे। 12 चेवरोवं स्वर्गदूते नड़शिंगों बजाव, ते
दिहाड़ो अक तीहाई, ते चेंदनरी अक तीहाई ते तारा केरि एककी तीहाई पुड़
हलचल पेई, इडी तगर कि तैन केरो अक तीहाई हिस्सो आंधरो भोव ते
दिहैड़री एककी तीहाई मां लौ न राई, ते तेन्चरे राती मां भी। 13 जैखन मीं
हेरु, त अम्बरेरे मझामेर्ई अक उकाब उडरते ते ज़ोरे सेइं इन ज़ोते शुनू “कि
तैन ट्लाई स्वर्गदूतां केरे नड़शिंगोरे आवाजारे वजाई सेइं जैना बजाने हेजू
बाकिन, धेरतली रानेबालन पुड अफसोस! अफसोस! अफसोस!”

9 जैखन पंचोंव स्वर्गदूते नड़शिनगो बजाव, त मीं स्वर्गोंध धेरतली पुड़ अक
तारो झाड़तो लाव, ते तैस अथाह कुण्डेरी चाबी दित्ती। (Abyssos g12) 2 तैने
अथाह कुण्ड खोल्लू ते कुण्डे मरां एककी भेट्यारो ज़ेरो तू निस्सो, ते कुण्डेरे
तूए सेइं दिहाड़ो ते अम्बर आंध्रू भोइ जेव। (Abyssos g12) 3 ते तैस तूए
मरां धेरतली पुड़ टिट्यां निस्सां, ते तैन धेरतलरे बिच्छू केरि ज़ेरि ताकत दित्ती
जेर्ई। 4 ते तैन सेइं ज़ोवं, कि न धेरतलरे घासे, न केन्ची नीलारे, न केन्ची बुटे
नुकसान पुजान, सिर्फ तैन मैनन् जैन केरे कुपाए पुड़ परमेश्वरी मोहर नई। 5
ते तैन मारनेरे लेइ नई, पन पंच महीन्न तगर लोकन दुःख देनेरो अधिकार
दित्तो, ते तैन केरो दुःख एरो थियो, ज़ेन्चरे बिच्छू केरे डस मारने सेइं मैनन्
भोते। 6 तैन पंच महीन्न मां मैन्हु मरनू चाएले, पन तैना न मेरि बटेले। तैना
मरनेरी इच्छा रखेले पन तैना कोन्ची भी तरीके सेइं मरनेरी बत न मैलेली। 7
तैना टिट्यां जंग केरनेरे लेइ तियार घोड़ां केरे ज़ेरां लेइहोतां थियां, तैन केरे
दोगन पुड़ सोत्रां ताजां केरु ज़ेरु किछ लेइहोतु थियूँ; तैन केरां तुत्रां मैन्हु केरे
तुत्रां केरां ज़ेरां थियां। 8 ते तैन केरे बाल कुआन्शां केरे ज़ेरे लम्मे थिये, ते तैन
केरे दंत शेरां केरे ज़ेरे मज़बूत थिये। 9 ते तैने लोहेरी ज़ेरि द्विलम लोरी थी,
ते तैन केरे फंगां केरि आवाज़ एरी थी ज़ेन्चरे रथाँ केरि ते लड़ैइ मां दौड़ते
बड़े घोड़ां केरि। 10 तैन केरां पूछड़ां बिच्छू केरां ज़ेरां थियां, ते तैन मां डस
थियो, ते तैन पंच महीन्न तगर मैनन् दुःख पुजानेरी ताकत थी, तै तातक
तैन केरे पूछड़न मां थी। 11 अथाह कुण्डेरो दूत तैन पुड़ राज़ो थियो, तैसेरु
नवं इब्रानी भाषाई मां अबद्वोन, ते यूनानी भाषाई मां अपुल्लहोने, ज़ेसेरो
मतलब नाश केरनेबालो। (Abyssos g12) 12 पंच महिन्ना बाद पेइली आफत
बीती जेर्ई, ते इट्यां पत्ती दूर्घ बल्के दूर्घ करां जादे आफतां एजने बैलिन। 13
जैखन शेइयोवं स्वर्गदूते नड़शिनगो बज़व ते जै सोन्नेरे बलिदान केरनेरी ठार
परमेश्वरे सामने, तैसेरे चेत्रे कूनन मरां मीं एरी आवाज़ शुनी। 14 ज़ेन्चरे कोई
शेइयोवं स्वर्गदूत सेइं ज़ोने लोरोए ज़ैस कां नड़शिनगो थियो, “कि तैन चेत्रे
दूत जैना बडे दरियाए फराते कां बन्दोरोए, तैन खोल्ला।” 15 तैखन तैना चेत्रे
दूत खोल्ले, तैना पेइले तियार भोरे थिये, त इस घेड़ी, ते दिहाड़े, ते महीने, ते
सालेरे लेइ तैन बलगनेरे लेइ ज़ोरु थियूँ, ते हुनी ई वक्त अव, कि तैना दुनियारे
लोकन मरां अक तीहाई लोक मारन। 16 ते तैन केरे फौजरी गिनती बी करोड़

थी जैना घोड़न पुड़ सुवार थिये, मीं तैन केरि गिनती शुनी। 17 ते मीं इस दर्शनि मां घोड़े ते तैन केरे एरे सुवार लेइहोए, जैन केरि डिल्लमां अगारे ज़ेरि लाल, ते नीले ते हेड़ले रंगेरे ज़ेरे थी, ते तैन घोड़ां केरि क्रोड़ी शेरां केरे क्रोड़ी केरि ज़ेरि थी, ते तैन केरे ऐशेरां अग ते तू ते गन्धक निसती थी। 18 इन ट्लेइ आफतन सेइं जैना इना आन, अग, तू, ते कने गन्धक, जै तैन घोड़ां केरे ऐशी मरां निसती थी; तैन सेइं अक तीहाई लोक मेरि जे। 19 तैन घोड़ां केरि ताकत तैन केरे ऐशी, ते कने तैन केरे पूछड़न मां थी, किजोकि तैन केरां पूछड़ां सप्पां केरां ज़ेरां थियां, ते तैन केरे पूछड़ां केरि क्रोड़ी भी थी, ते तैने सेइं तैना दुःख भी पुजाते थिये। 20 ते होरे मैन्ह जैना तैन आफतन सेइं न थी मरे, ते तैनेई मूरती केरि पुजा केरनि न शारी, जैना तैनेई सोन्ने, पितल, ते कन्ने घोड़, लेकड़े बनेइं। तैना मूरती न लहन, न शुन्न, न चेलि बटन, ते तैनेई भूतां केरि आराधना केरनि भी न शारी। 21 ते तैनेई, खून, टूनो, बदमाशी, ते कने चोरी केरने करां मन न फिराव।

10 फिरी मीं अक होरो ताकतबर स्वर्गदूत बिदलार पलेटतां स्वर्गेरां एइतो लाव, तैसरे दोगो पुड़ भुन्जल्लैठ थी, ते तैसेरु आशी दिहाड़ेरु ज़ेरु ते तैसरे पाव अगारे खम्मबेरे ज़ेरे थिये। 2 तैने अपनो देइने पाव समुन्द्रे पुड़ रख्खो, ते खिशड़ो धेरतली पुड़ रख्खो, ते तैसरे हथ्थे मां अक निकड़ी किताब खोलोरी थी। 3 तैनी स्वर्गदूते बडे ज़ोरे सेइं ज़ोवं, तैसेरी आवाज़ शेरेरे गज़नीरी ज़ेरि थी। ते ज़ैखन तैने ज़ोरे सेइं चिन्ड मारी, त सत आवाज़ेई जुवाब दित्तो, जैन केरि आवाज़ गुड़नेरी ज़ेरि थी। 4 ते ज़ैखन मीं सत्ते गुड़नेरी आवाज़ शुनी, त अवं लिखनेबालो थियो, त मीं स्वर्गेरां ई आवाज़ शुनी, “कि जैना गल्लां तीं गुड़नेरी ज़ेरि शुनोरिन, तैन छेपोरी रख, ते तैन न लिख।” 5 ते जै स्वर्गदूत मीं समुन्द्र ते जैन किछ तैन माए बनोरुए, तैनी तैसेरी कसम खेइतां ज़ोवं, “हुनी होरि कोन्ची चीज़रो इंतज़ार नई। हुनी सब पूरु कियूं गालू।” (aiōn g165) 7 बल्के ज़ैखन सतोवं स्वर्गदूत नड़शिनगो बज़ालो, त परमेशरेरो तै मकसद पूरो भोलो जै तैसेरे नेबेई ज़ोरोए, जैनेई तैसेरी सेवा की, पन तैने होरि लोकन तैसेरो पतो लगने न दित्तो। 8 मीं फिरी दुबारां स्वर्गेरां तैए आवाज़ शुनी। तैस आवाज़ां मीं सेइं

ज्ञोवं, तैए फिरी मीं सेइं गल्लां केरने लाव; “कि गा, जै स्वर्गदूत समुन्द्र ते धेरतली पुड़ खड़ोए, तैसेरे हथ्थे मरां खुलोरी किताब ने।” ९ ते मीं स्वर्गदूत कां गेइतां ज्ञोवं, “ई निकड़ी किताब मीं दे।” तैने मीं सेइं ज्ञोवं, “यां इस खा, ते ई तेरे पेटे ट्लइट्टी त केरेली, पन तेरे ऐशी मैछी करां भी जादे मिट्टी लगेली।” १० ते मीं तै निकड़ी किताब तैस स्वर्गदूत करां नेइतां खाइ, तै मेरे ऐशी मां मैछेरी ज़ेरि मिट्टी लग्गी, पन ज़ैखन मीं तै खाइ, ते तैस सेइं मेरू पेट ट्लिठू भोवं। ११ तैखन मीं सेइं इन ज्ञोवं, “तीं बड़े लोकन, कौमन, भाषान, ते कने राज्जन पुड़, फिरी दुबारां भविष्यिवाणी केरनि भोली।”

११ फिरी मीं नापनेरे लेइ अक निराठी दिती, ते तैने मीं सेइं ज्ञोवं, “उठ परमेशरेरे मन्दरे ते बलिदान केरनेरी ठार नाप, ते जैना लोक तैड़ी मेरी आराधना केरने लोरेन तैन गन। २ पन मन्दरेरे बेइरयों अंगन न नाप, किजोकि एन तैन लोकां केरे लेइ आए जैना मीं पुड़ विश्वास न केरन, ते तैना तैस पवित्र नगर यरूशलेमे ४२ महीन्न तगर तुबा केरेले। ३ तैस वक्ते अवं अपने दुइये गवाहन ई अधिकार देइलो, तैना टाट यानी मातमेरां लिगड़ां लेइतां १२६० दिहाड़न तगर मेरे सन्देशीरु एलान केरन।” ४ तैना दूर्झ गवाह, जैन केरे बारे मां बड़े पेइले केन्चे जैतूनेरे दूर्झ बुट ते दूर्झ दीवट केरि मिसाल दित्तोरी थी जैना परमेशरेरे सामने रहतन ज़े धेरतरे लोकां केरो प्रभुए। ५ ते अगर कोई तैन नुकसान पुजानो चाए, त तैन केरे ऐशी मरां अग निस्तां तैन केरे दुश्मन भस्म केरतीए, ते अगर कोई तैन नुकसान पुजानो चाए, त ज़रुर तै इस्से तरीके सेइं मारे गाले। ६ परमेशरे तैन अधिकार दित्तोरो, कि तैना सन्देश एलान केरनेरे दौरान अम्बर बंद केरन (यानी झ़ाड़ी रोकन)। तैन ई भी अधिकार मैल्लो पानी खूनेरु ज़ेरु लाल बनान, ते इन भी कि ज़ैखन तैना चान धेरतली पुड़ हर किसमेरी आफत एनी बटतन। ७ ते ज़ैखन तैना दूर्झ गवाह परमेशरेरे सन्देशेरु एलान केरतां झ़ाड़ेले, त तैए हैवान ज़े अथाह कुण्डे मरां निसेलो, तैन सेइं लेड़तां तैन करां ज़ीतेलो ते तैन मारेलो। (Abyssos g12) ८ ते तैन केरि लाशां तैस महान नगर यरूशलेमे सड़की मां राली ज़ैड़ी तैन केरो प्रभु कूस पुड़ ज़ाढ़ोरो थियो, ज़ेसेरी तुलना सदोम नगर ते कने मिसे मुल्खे सेइं कियोरीए। ९ ते सब लोकन, कुलन, भाषान ते कने कौमन मरां लोक तैन गवाहां केरि लाशां सड़े ट्लार्ड दिहाड़न तगर हेरते राले। ते तैना लोक तैन केरि लाशन

कोन्ची भी दबने न देले। 10 ते धेरतलरे रानेबाले, तैन केरे मारने सेइं खुश ते
मघन भोले, ते तैन केरे हेरने बालन बड़े डरेले। 11 ते सडे ट्लाई दिहाड़ना
पत्ती परमेशरेरे तरफां जिन्दगी सांस तैन मां आई, ते तैना खड़े भोए, ते ज़ैनेई
तैना दुबारां ज़ीते लाए तैना बड़े डेरि जे। 12 एसेरां बाद, तैन दूझ मैनेई स्वर्गेरां
अक ज़ोनेबालो उच्ची आवाज़ी मां ज़ोते शुनो, “कि इड़ी बा एज्जा!” ज़ैखन
तैन केरे दुश्मन हेरनेरे लोरे थिये तैना तैने केरे सामने बिदलारी पलेटां स्वर्गे
मांजो ज़ले जे। 13 फिरी तैसे वक्ते यरुशलेम नगरे मां अक बड़ो भुंजल अव,
ते नगरेरे इमारतां केरो दशोवं हिस्सो झ़ाड़ो; ते तैस भुंजले सेइं 7000 मरे, ते
होरे ज़ैना बच्चेरे थिये तैना बड़े डरे, ते तैनेई स्वर्गेरे परमेशरी बड़ीयाई की। 14
दुझ्योवं आफत बीती जेर्ई, हेरा, ट्लेइयोवं आफत एजने बालीए। 15 ज़ैखन
सतोवं स्वर्गदूते नड़शिनो बज़व, त मीं स्वर्गे मां बड़ी ज़ोरे सेइं आवाज़ शुनी,
“हुनी इस दुनियाई मां कोई राज़ केरनेबालो नई सिर्फ इश्शो प्रभु-परमेशर ते
तैसेरो चुनोरो मसीह, ते तै हमेशारे लेझ राज़ केरेलो।” (aiōn g165) 16 ते चोब्ही
बुजुर्ग ज़ैना परमेशरेरे सामने अपने-अपने तखते पुङ बिश्शोरे थिये, परमेशरे
कां मथ्थो टेकतां, 17 इन ज़ोने लाएः “हे सर्वशक्तिमान प्रभु-परमेशर, तू ज़ै
आस, ते ज़ै थियो, अस तेरु शुक्र केरतम, कि तीं हुन्ना महान शक्ति हिराई, ते
तीं धेरती पुङ राज़ केरनू शुरु कियोरुए। 18 होरि कौमां केरे लोकेई तीं पुङ
क्रोध कियो, ते तेरो प्रकोप अव, ते तै वक्त ओरोए कि मर्रा केरो इन्साफ
कियो गाए, ते ई वक्त भी आए, कि तेरे दास नेबन ते सारे लोकन ज़ैना तेरे
आदर केरतन ज़ैना कमज़ोरन ते ज़ैना ताकतबरन तैन तू इनाम देस, ते तैसे
वक्ते तैन नाश केरस ज़ैना धेरतरे नाश भोनेरी वजा थियो।” 19 परमेशरेऱ ज़ैन
मन्दर स्वर्गे मांए, तैन खोल्लू, ते तैसेरे मन्दरे मां कररेरो सन्दूख लेइहोव, ते
बिजली ते आवाज़ ते गुडने ते भुंजल आए, ते बड़ी-बड़ी आण पेर्ई।

12 ज़ैखन तैन बीती जेव, त फिरी अम्बरे मां अक बड़ो आजीब निशान
लेइहोव। मतलब अक कुआन्श ज़ै चाँदनी पुङ खड़ी आए ते तैसां ज़ैना लिगड़ां
लोरन तैना दिहाड़ेरे ज़ेरां लेइहोतन। ते तैसेरे अपने दोग्गे पुङ ताज लोरु थियूं
ज़ैस पुङ 12 तारे थिये। 2 तै दोज़ींती भोइ, ते चिन्दां मारती थी; किजोकि
तैस बच्चो ज़ानेरी तकलीफ थी। 3 ते अक होरो निशान अम्बरे मां लेइहोव, ते
हेरा; अक बड़ो लाल अजगर (यानी शैतान) थियो, तैसेरी सत क्रोड़ी ते दश

शिन्गाँ थियां, ते तैसेरे दोगन पुड़ सत ताजां थियां। 4 ते तैसेरे पूछडां अम्बरेरे
 तारां केरि अक तीहाई ज़मीनी पुड़ आनी, ते तै अजगर तैस कुआन्शरे सामने
 खड़ो भोव जै दोज़ीती थी, कि ज़ैखन तै बच्चो ज़ाए त तै बच्चे तैस खाए। 5
 तैखन तैस कुआन्शां मटू ज़ाऊं, तैन अजगरे न खेइ बटु किजोकि तैन अकदम
 परमेशरे ते तैसेरे तखते कां आनू जेव। तैन मटू सारी कौमन पुड़ लोहेरे डण्डे
 सेइं राज़ केरेलू। 6 ते ई कुआन्श जंगले जो नश्शी, ज़ैडी परमेशरेरे तरफां
 तैसेरेलैइ अक ठार तियार कोयोरी थी, कि तैडी 1260 दिहाड़न तगर तैसेरी
 हेरगेश की गाए। 7 फिरी स्वर्गे पुड़ लड़ाई भोइ, मीकाईल ते तैसेरे स्वर्गदूत
 अजगरे सेइं लड़ने लेइ निस्सो, ते अजगर ते तैसेरे दूतन सेइं लड़े। 8 अजगरे
 लड़ाई हारी, ते फिरी तैना स्वर्गे मां न रेइ बटे। 9 एल्हेरेलैइ तै त तैसेरे दूत
 धेरती पुड़ शारे, तैए बड़ो अजगर, ई तैए जै बड़े पेइले सपेरे रुपे मां बांदो भोरो
 थियो, ज़ेसेरू नवं शैतान या दोष लानेबालोए। तैए आए जै दुनियारे लोकन
 धोखे देने लोरोए। 10 फिरी मीं स्वर्गेरां ई बड़ी आवाज़ एइती शुनी, “कि हुनी
 परमेशर अपने लोकन बचालो! हुनी तै अपनि शक्ति इस्तेमाल केरेलो ते
 राज़ेरु ज़ेरु राज़ केरेलो! हुनी तैसेरो मसीह दुनियाई पुड़ अधिकार रखेलो!
 किजोकि हुनी शैतान इश्शो परमेशरेरे हज़ूरी मां खड़ो न रेइ बटेले कि इश्शो
 साथी सेवकन पुड़ रात दिहाड़ी दोष लाए। तै स्वर्गे मरां शारो जोरोए। 11 ते
 तैनेई गबड़ेरे खूनेरे वजाई सेइं ते अपने गवाहेरे वचनेरे वजाई सेइं, तैस पुड़
 ज़ींत हासिल की, ते तैनेई अपने प्राण ट्लारे न समझे, इडी तगर की मौतरी
 भी परवाह न की। 12 ‘एल्हेरेलैइ तुस बब जैना इडी स्वर्गे मां रहने बालेथ
 खुश भोथ। पन हे धेरतली ते कने समुन्द्रे मां रानेबालव तुसन पुड़ अफसोस!
 किजोकि शैतान बड़े क्रोधे सेइं तुसन कां एजनेबालोए, किजोकि तै जानते
 कि तैसेरो आखरी वक्त एजनेबालो।’’ 13 ते ज़ैखन अजगरे समझू, कि
 अवं ज़मीनी पुड़ जो शारोरो, त तैस कुआन्शी पत्ती दौड़ो जैसां मटू ज़ावरु
 थियूं। 14 पन परमेशरे तैस कुआन्शी उकाबेरां दूर्द बडुं फंगां दित्तां, कि
 अजगरे करां उडरतां जंगले मां तैस ठैरी पुजे, ज़ैडी सड़े ट्लाई सालन तगर
 तैसेरी हेरगेश भोरी थी, ताके तैडी अजगर न पुजी बटे। 15 फिरी अजगरे तैस
 कुआन्शी पत्ती अपने ऐशी सेइं दरियारू ज़ेरु पानी शारु, कि तैस इस दरियाए
 सेइं रुड़ए। 16 तैस कुआन्शरी मद्दत केरनेरे लेइ ज़मीना तैन पानी पियूं जैन

तैस अजगरेरे ऐशी मरां निसोरु थियूं। 17 ते अजगर कुआन्शी जो सेरकोव।
एल्हेरेलेइ तैने कुआन्शरे औलादी सेइं लड़ाई केरनेऱ एलान कियूं। तैना लोक
जैन परमेशरे हुक्मन मन्तन, ते यीशुएरी दित्तोरी शिक्षाई पुढ़ चलतन।

13 तैखन अजगर जेव, ते समुन्दरेरे बन्ने पुढ़ खड़ो भोव। मीं अक हैवान
समुन्द्रे मरां निसतो लाव, तैसेरां दश शिनाँ ते सत क्रोड़ी थी; तैने शिनान
पुढ़ दश राजमुकट ते तैसेरे दोगन पुढ़ परमेशरेरी तुहीनरां नंब्वां लिखोरां
थियां। 2 जै मीं हैवान लाव, तै डलाघेरो जेरो थियो; ते तैसेरे पाव इछेरे पावां
केरे जेरे थिये; ते तैसेरु आशी शेरेरे एशेरु जेरु थियूं, ते अजगरे तैस हैवाने
अपनि शेक्कि दित्ती ते राज्ञ केरनेरे लेइ तैस अधिकार दित्तो। 3 मीं तैस हैवानेरे
करोड़न मरां एक्की पुढ़ अक एरो ज़खम लाव, ज़ेन्चरे तै मरने पुढ़े; फिरी
तैसेरो मारनेबालो ज़खम रोड़ो भोव, ते सारे धेरतलरे लोक हैरान भोए, ते तैस
हैवाने पत्ती च़लने लगे। 4 ते तैन सेब्भी लोकेर्इ तैस अजगरेरी पूजा की,
किजोकि तैने हैवाने अपनो अधिकार दित्तोरो थियो। ते इन ज़ोइतां कि, “इस
हैवानेरो जेरो कौने? हैवाने सेइं कौने लेडि बटते?” 5 परमेशरे तैस हैवाने
अज़ाज़त दित्तोरी थी कि अपने अधिकारे पुढ़ घमण्ड केरे ते एन्चरे परमेशरेरी
तुहीन केरे। परमेशरे तैस 42 महीन्न तगर ई अधिकार रखनेरे लेइ अज़ाज़त
दित्ती। 6 तै हैवान परमेशरेरी तुहीन केरने लगो, कि तैसेरे नंब्वेरे खलाफ, ते
ज़ैड़ी परमेशर रहते ते स्वर्ग मां रानेबाले सेब्भी लोकां केरे खलाफ तुहीन केरने
लगो। 7 परमेशरे तैस हैवाने अज़ाज़त दित्तोरी थी, कि परमेशरेरे लोकन सेइं
लड़े, ते तैन करां ज़ींते, ते तैस हर कुले, सारे लोकन, भाषान, त कने कौमन
पुढ़ अधिकार दित्तो जेव। 8 ते धेरती पुढ़ रानेबाले सेब्भी लोकेर्इ तैसेरी पूजा
की। सिर्फ तैनेर्इ न की जैन केरां नंब्वां ज़िन्दगरे किताबी मां दुनिया बनाने
करां पेहले लिखोरां थियां। तै किताब गबड़ेरी ज़िन्दगरी किताबे जैन बलिदानेरे
लेइ मारू ज़ोवं। 9 जै समझानू चाते तै ध्याने सेइं शुने। 10 जैना कैद भोनेन,
तैना कैद भोले, जैना तलवारी सेइं मरेलो, ज़रुरीए तैना तलवारी सेइं मरेले,
परमेशरेरे लोकां केरि सबर ते विश्वास इस्से मांए। 11 फिरी मीं अक होरो
हैवान धेरतली पुड़ां निसतो लाव, तैस गबड़ेरे ज़ेरां दूई शिनाँ थियां, पन
ज़ैखन तैने ज़ोवं त तैसेरी आवाज़ अजगरेरे जेरि थी। 12 ई दुइयोवं हैवान
पेहले हैवानेरो सारो अधिकार इस्तेमाल केरते। दुइयोवं हैवाने धेरती ते तैस

ਪੁੜ ਰਾਨੇਬਾਲਨ ਕਰਾਂ ਪੇਇਲੇ ਹੈਵਾਨੇਰੀ ਪ੍ਰੂਜ਼ਾ ਕਰਾਤੇ ਜੇਸੇਰੋ ਮਾਰਨੇਬਾਲੋ ਜ਼ਰਖਮ ਠੀਕ ਭੋਰੋ ਥਿਥੋ। 13 ਦੁਇਧੋਵਾਂ ਹੈਵਾਨ ਬਡੇ-ਬਡੇ ਨਿਸ਼ਾਨ ਹਿਰਾਤੋ ਥਿਥੋ, ਇੱਡੀ ਤਗਰ ਕਿ ਮੈਨ੍ਹੁ ਕੇਰੇ ਸਾਮਨੇ ਅੰਮ੍ਰਿਤਾਂ ਜ਼ਮੀਨੀ ਪੁੜ ਅਗ ਭੇਜਤੀ ਥਿਥੋ। 14 ਦੁਇਧੋਵਾਂ ਹੈਵਾਨੇ ਪਰਮੇਸ਼ਰੇ ਅਜ਼ਾਜ਼ਤ ਦਿੱਤੀ ਕਿ ਤੈ ਪੇਇਲੇ ਹੈਵਾਨੇਰੇ ਸਾਮਨੇ ਚਮਤਕਾਰ ਹਿਰਾਏ। ਇਨ ਚਮਤਕਾਰਾਂ ਕੇਰੇ ਜ਼ਿਹਿਯੇ ਤੈਨੀ ਦੁਨਿਧਾਰੇ ਸਾਰੇ ਲੋਕ ਟਪਲਾਏ। ਤੈਨੇ ਤੈਨ ਪੇਇਲੇ ਹੈਵਾਨੇਰੀ ਮੂਰਤੀ ਬਨਾਨੇਰੋ ਹੁਕਮ ਦਿੱਤੀ, ਜੈ ਤਲਵਾਰੀ ਸੇਇ ਮਾਰੇਰੋ ਥਿਥੋ ਪਨ ਫਿਰੀ ਜ਼ੀਂਤੀ ਭੋਗੇਏ। 15 ਦੁਇਧੋਵਾਂ ਹੈਵਾਨੇ ਪਰਮੇਸ਼ਰੇ ਅਜ਼ਾਜ਼ਤ ਦਿੱਤੀ ਥੀ ਕਿ ਤੈ ਪੇਇਲੇ ਹੈਵਾਨੇਰੀ ਮੂਰਤੀ ਬਨਾਏ ਤੇ ਤੈ ਜ਼ੀਂਤੀਏ, ਤਾਕੇ ਤੈਸ ਹੈਵਾਨੇਰੀ ਮੂਰਤੀ ਗਲਲਾਂ ਕੇਰਿ ਬਟੇ ਤੇ ਜੈਨਾ ਤੈਸ ਹੈਵਾਨੇਰੀ ਪ੍ਰੂਜ਼ਾ ਨ ਕੇਰਨੇ ਤੈਨਾ ਮਾਰੇ ਗਾਨ। 16 ਦੁਇਧੋਵਾਂ ਹੈਵਾਨੇ ਸਾਰੇ ਲੋਕਨ ਸੇਇ ਜ਼ਬਰਦਸ਼ੀ ਕੀ, ਜੈਨਾ ਖਾਸ ਆਨ ਤੇ ਜੈਨਾ ਖਾਸ ਨਈ, ਅਮੀਰ, ਗਰੀਬ, ਆਜ਼ਾਦ, ਗੁਲਾਮ ਆਨ, ਕਿ ਤੈਨਾ ਪੇਇਲੇ ਹੈਵਾਨੇਰੇ ਨਵੇਰੀ ਮੋਹਰ ਦੇਣੇ ਹਥਥੇ ਧਾ ਕੁਪਾਏ ਪੁੜ ਲਾਨ। 17 ਜੈਸ ਪੁੜ ਛਾਪ ਮਤਲਬ ਤੈਸ ਹੈਵਾਨੇਰੂ ਨਵਾਂ ਧਾ ਤੈਸੇਰੋ ਨਵੇਰੋ ਅਂਕ ਭੋਏ, ਤ ਤੈਸੇਰੇ ਅਲਾਵਾ ਹੋਰੋ ਕੋਈ ਲੇਨ ਦੇਨ ਨ ਕੇਰਿ ਸਕੇ। 18 ਇਸ ਸਮਝਨੇਰੇ ਲੇਇ ਅਕਲ ਜ਼ਰੂਰੀਏ। ਜੈਸ ਅਕਲ ਭੋਏ, ਤੈ ਇਸ ਹੈਵਾਨੇਰੋ ਅਂਕ ਜਮਾ ਕੇਰੇ, ਕਿਜੋਕਿ ਤੈ ਮੈਨੇਰੋ ਅਂਕੇ, ਤੇ ਤੈਸੇਰੋ ਅਂਕ 666 ਆਏ।

14 ਏਸੇਰੇ ਬਾਦ, ਮੰਂ ਕਿਛ ਲਾਊ, ਮੰਂ ਗਬੂ ਸਿਧ੍ਯੋਨ ਪਹਾਡੇ ਪੁੜ ਖੱਡੂ ਲਾਊ। ਤੇ ਤੈਸ ਸੇਇ ਸਾਥੀ 144000 ਲੋਕ ਥਿਥੇ, ਜੈਨ ਕੇਰੇ ਕੁਪਾਏ ਪੁੜ ਤੈਸੇਰੂ ਤੇ ਕਨੇ ਤੈਸੇਰੇ ਬਾਜੇਰੂ ਨਵਾਂ ਲਿਖੋਰੂ ਥਿਥ੍ਯੂ। 2 ਤੇ ਸਵੰਗਰਾਂ ਏਰੀ ਆਵਾਜ਼ ਸ਼ੁਨੋਈ, ਜੈ ਬਡੇ ਪੈਨੇਰੀ ਤੇ ਬਡੇ ਗੁੜੁਨੇਰੀ ਜੇਰਿ ਆਵਾਜ਼ ਥੀ, ਤੇ ਜੈ ਆਵਾਜ਼ ਮੰਂ ਸ਼ੁਨੀ; ਤੈ ਏਰੀ ਥੀ ਜੇਨ੍ਘੇ ਕੋਈ ਸਾਰਾਂਗੀ ਬਾਜ਼ਾਨੇ ਬਾਲੋ ਸਾਰਾਂਗੀ ਬਜਾਨੇ ਲੋਰੋਏ। 3 144000 ਲੋਕ ਤਖਤੇਰੇ ਸਾਮਨੇ, ਤੇ ਪ੍ਰਾਣੀ ਤੇ ਕਨੇ ਬੁਜੁਗੀ ਕੇਰੇ ਸਾਮਨੇ ਖਡੇ ਥਿਥੇ; ਤੈਨਾ ਅਕ ਨਵ੍ਯੂ ਗੀਤ ਜ਼ੋਨੇ ਲੋਰੇ ਥਿਥੇ, ਤੈਨ ਗੀਤ ਸਿਰਫ ਤੈਨ ਲੋਕੇਈ ਸ਼ਿਖੋਰੂ ਥਿਥ੍ਯੂ। ਤੈਨਾ ਲੋਕ ਇਨਾ ਆਨ ਜੈਨਾ ਸਿਰਫ ਇਸ ਦੁਨਿਆਈ ਮਾਂ ਰਾਨੇਬਾਲੇ ਲੋਕਨ ਮਰਾਂ ਪਰਮੇਸ਼ਰੇ ਛੁਟੋਰੇ ਥਿਥੇ। 4 ਇਨਾ ਤੈਨਾ ਲੋਕ ਆਨ, ਜੈਨਾ ਕੁਆਨਸ਼ਨ ਸੇਇ ਅਸ਼ੁਦ੍ਧ ਨਈ ਭੋਰੇ, ਪਨ ਕੁਵਾਰੇਨ, ਇਨਾ ਤੈਨਾ ਆਨ, ਜੇਰਾਂ ਭੀ ਗਬੂ ਗਾਤੇ ਤੈਨਾ ਭੀ ਤੈਸ ਪਤੀ ਚਲਤਨ, ਇਨਾ ਤ ਪਰਮੇਸ਼ਰੇਰੇ ਲੇਇ ਪੇਇਲੇ ਫਲ ਭੋਨੇਰੇ ਲੇਇ ਮੈਨਨ ਮਰਾਂ ਧਿਨੇ ਜੋਰੇਨ। 5 ਤੈਨੇਈ ਕਥੀ ਝੂਠ ਨਈ ਜੋਝ, ਤੇ ਤੈਨਾ ਬੇਇਲਜ਼ਾਮਨ। 6 ਫਿਰੀ ਮੰਂ ਅਕ ਹੋਰੇ ਸਵਗਦੂਤ ਅੰਮ੍ਰਿਤ ਮਝਾਮੇਈ ਤਡਰਤੋ ਲਾਵ ਜੈਸ ਕਾਂ ਥੇਰਤਲੀ ਪੁੜ ਰਾਨੇਬਾਲਾਂ ਕੇਰਿ ਹਰ ਅਕ ਕੌਮ, ਕੁਲ, ਤੇ ਕਨੇ ਭਾ਷ਾਰੇ ਲੋਕਨ ਸ਼ੁਨਾਨੇਰੇ ਲੇਇ ਹਮੇਸ਼ਾਰੀ ਖੁਸ਼ਖਬਰੀ ਥੀ ਜੈ ਕਥੇ ਨ

बेदलोए। (aiōnios g166) 7 तैने बड़े ज़ोरे सेइं ज़ोवं, “परमेशरे करां डरा; ते तैसेरी बड़याई केरा; किजोकि तैसेरो इन्साफ केरनेरो वक्त पुज़ोरोए, ते तैसेरी आराधना केरा, ज़ैने स्वर्ग, धरती, समुन्द्र, पैनेरे नाग बनोरेन।” 8 फिरी तैसेरां पत्ती अक होरो स्वर्गदूत इन ज़ोतो अव, “कि झङ्गु, तैन बाबेल नगर झङ्गु, तैने सारे कौमन अपनि शराबी पियाई, ज़ेसेरो मतलब ई आए कि तैने सैरी लोकन मूरती केरि पूज़ा केरनि शिखाली।” 9 फिरी एसेरां पत्ती अक होरो स्वर्गदूत बड़े आवाज़ी सेइं इन ज़ोतो अव, “कि ज़ै कोई इस हैवाने ते तैसेरी मूरतरी पूज़ा केरे, ते अपने कुपाए या अपने हथ्ये पुड़ तैसेरो छाप लाए। 10 परमेशर तैन टलिठी शराबी पियालो ज़ैस मां पानी न भोए मिलावरु ज़ेसेरो मतलब परमेशरे तैन सेइं बड़ो क्रोधे मां आए ते तैन पुड़ दया न केरेलो, तैना लोक अग ते गन्धकेरे दुखे मां छड़े गाले, ज़ैखन परमेशर तैन सज्जा देतो भोलो त पवित्र स्वर्गदूत गबड़ु लालू। 11 ते तैन केरे दुखेरो तू सदा उठतो रालो, ते ज़ैना तैस हैवाने ते तैसेरे मूरतरी पूज़ा केरेले, ते ज़ैना तैसेरे नंब्वेरी छाप नेतन, तैन रात दिहाड़ी चैन न मैलेलो।” (aiōn g165) 12 एलहेरेलेइ परमेशरेरे लोकां केरे लेइ ज़रुरी आए कि ज़ैना भी दुःख तैन पुड़ एज्जन तैन सबरी सेइं झैल्लन, परमेशर ज़ैन केरनेरो हुक्म तैन दे तैनेई तैन कियोरु लोडे, ते तैनेई यीशु पुड़ विश्वास केरनो न लोडे शारोरो। 13 मीं स्वर्गेरां ई आवाज़ शुनी, “लिख; ज़ैना मुड़दे प्रभु मां मरतन, तैना धन आन।” पवित्र आत्मा पक्कू केरते, “तै ज़ोते, तैन सच्चे। हाँ किजोकि तैना अपने मेहनती करां आराम हासिल केरेले, ते ज़ैन तैनेई कियू तैसेरे बदले तैन इनाम मैलेलू।” 14 फिरी मीं अक छिती बिदलार लाई, ते तैस बिदलारी पुड़ मैनेरु ज़ेरो कोई बिशोरो लाव, तैसेरे दोगो पुड़ सोन्नेरु ताज ते हथ्ये मां तिखी ड्लातीए। 15 फिरी अक होरो स्वर्गदूत मन्दरे मरां निस्तां, तैने ज़ै बिदलारी पुड़ बिशोरो थियो, तैस बड़े ज़ोरे सेइं ज़ोवं, “कि अपनि ड्लाती ढ़ला किजोकि कटनेरो वक्त ओरोए।” 16 ते ज़ै बिदलारी पुड़ बिशोरो थियो, तैने धेरतली पुड़ अपनि ड्लाती लाई, ते धेरतलरी फसल केटोई। 17 फिरी अक होरो स्वर्गदूत तैस मन्दरे मरां निस्सो, ज़ै स्वर्ग मांए, ते तैस कां भी तिखी ड्लाती थी। 18 फिरी एककी होरे स्वर्गदूत जैस अग्गी पुड़ अधिकार थियो, बलिदान केरनेरी ठारी मरां निस्सो, ते जैस कां तिखी ड्लाती थी, तैस सेइं ज़ोरे सेइं ज़ोवं; “अपने तिखे ड्लैइती लेइतां

धेरतलरी दाढ़ कटी; किजोकि तैसेरी दाढ़ पकोरीए।” 19 ते तैने स्वर्गदूत धेरतली पुड़ अपनि इलाती रख्खी, ते धेरतलरे दाढ़रे फल केटां, अपने परमेश्वरे परकोपेरे बड़े रसेरे कुण्ड मां छुडी। 20 ते नगरेरे बेझर तैस रसेरे कुण्डे मां दाढ़ ढलेन्ची, ते रस कुण्ड मरां एत्रो खून निस्सो कि घोड़ां केरे लगामी तगर पुजो, ते 100 कोसे तगर रुडो।

15 फिरी मीं स्वर्गे मां अक बहु ते आजीब निशान लाव, मतलब सत स्वर्गदूत जैन कां आखरी सत आफतां थी, किजोकि तैन केरे भोने पुड़ परमेश्वरो क्रोध मुकेलो। 2 तैखन मीं समुन्द्रेउ ज़ेरु किछ लाव जैन शीशेरु ज़ेरु चमकतू थियू ते अग भी तैस मां मिलोरी थी। मीं तैना लोक भी लाए जैना हैवाने न थिये हैरेई बटोरो, तैन लोकेई हैवान ते तैसेरे मूरतरी पूजा न थी कियोरी। ते तैन पुड़ तैस हैवानेरे नंव्हेरे अंकेरी महोर न थी लोरोरी। तैना तैस शीशेरे समुन्दरेरे बन्ने पुड़ तै सारंगी घिन्तां खडे भोए जै परमेश्वरे तैन दित्तोरी थी। 3 तैना परमेश्वरेरे दास मूसेरु गीत, ते गबड़ेरु गीत ज़ोते थी, “हे सर्वशक्तिमान प्रभु-परमेश्वर, जैना कम्मां तीं कियां तैना बड़ा महान ते आजीब आन, तू सेब्भी कौमां केरो राज्ञोस, तैन सब जैन तीं कियू तैन सही ते धर्मी आए।” 4 “हे प्रभु, सेब्भी लोकेई तेरी आदर की, ते तैना सारे तेरे नंव्हेरी इज्ज़त केरतन, किजोकि तूए सिर्फ पवित्रस। सैरी कौमां केरे लोक हर राज्ञन मरां तीं कां एज्जेले, तैना तेरी आराधना केरेले किजोकि तेरे धर्मी कम्मां बड़ां मशूर आन।” 5 जैखन तैन लोकेई गीत ज़ोताई खतम कियां, त मीं स्वर्गे मां मन्दर खोलोरु लाव। तैन एरु थियूं ज़ेन्चरे तेम्बु। 6 ते तैना सत स्वर्गदूत जैन कां सत आखरी आफतां थी, तैना तैस मन्दरे मरां निस्से। तैनेई छित्तां चमकतां लिगड़ां लोरां थियां ते तैनेई अपने छैती पुड़ सोन्नेरी पेट्टी बेन्धोरी थी। 7 ते तैन चेव्रे प्रैणन मरां एकके सत्ते स्वर्गदूतन हमेशा ज़ीते रानेबाले परमेश्वरेरे प्रकोपे सेइं भरोरे सत सोन्नेरे कटोरे दित्ते। (aiōn g165) 8 ते परमेश्वरी महिमा, ते तैसेरे शेक्तरे वजाई सेइं मन्दर तूए सेइं भरोई जेव, ते ज़ां तगर तैन सत्ते स्वर्गदूतैर्स सते आफतां खतम की, तांतगर कोई मन्दरे मां न गेइ बटो।

16 तैठुं पत्ती मीं मन्दरे मां कोई ज़ोरे सेइं तैन सत स्वर्गदूतन सेइं ज़ोतो शुनो कि, “गाथ, परमेश्वरेरे सज्जारे सते कटोरे दुनियारे लोकन पुड़ उलटाथ।”

2 ते पेइले गोइतां अपनो कटोरे धेरतली पुङ उलटव। ते तैन मैन्हु केरे ज़ैन
 पुङ हैवानेरी छाप थी, ते जैना लोकेई तैसेरी मूरतरी पूजा केरते थी, एककी
 किसमेरे बुरे ते दुःख देनेबालो फोड़े निस्से। 3 ते दुइयोवें अपनो कटोरो समुन्द्रे
 पुङ उलटव, ते तै मुङ्डां केरे खूनेरो ज़ेरो बनो, ते समुन्दरेरे सारे जानदार मरे।
 4 ते ट्लेइयोवं स्वर्गदूते अपनो कटोरो दरियान ते पैनेरे नागन पुङ उलटव, ते
 सारु पानी खून बन्नू। 5 ते ज़ैस स्वर्गदूते पैनी पुङ अधिकारे मीं तै परमेशरे
 सेइं इन ज़ोते शुनो कि, “हे पवित्र परमेशर, तू ज़ै आस, ते हमेशा करां थियो,
 तीं कां एन्हरे इन्साफ केरनेरु हक्के। 6 किजोकि तैनेई तेरे लोक ते तेरे
 नबी मारे ते तैन केरो खून बगोरो थियो, एल्हेरेलेइ तीं हुना तैन खून पीने जो
 दित्तो। इन इनामेरे रूपे मां तैन केरे लेइ ठीक आए।” 7 फिरी मीं बलिदान
 केरनेरी ठारी मरां ई आवाज़ शुनी कि, “हाँ सर्वशक्तिमान प्रभु-परमेशर, तेरो
 इन्साफ सही ते कने सच्चो आए।” 8 ते चेवरोवें स्वर्गदूते अपनो कटोरो
 दिहाडे पुङ उलटव, ते दिहाडे जादे गर्म भोनेरी अज्ञाज्ञत दित्ती कि तैस सेइं
 लोक फुकोन। 9 ते लोक तैस बड़े सेके सेइं फुकोए, ते तैना लोक परमेशरेरी
 तुहीन केरने लाए, किजोकि तैए आए ज़ैस कां सैरी आफतन पुङ अधिकारे।
 फिरी भी तैन लोकेई अपने पापन करां मन न फिराव, ते फिरी भी तैनेई
 परमेशरेरे महिमारो इकरार न कियो। 10 ते पंचोवें स्वर्गदूते अपनो कटोरो तैस
 हैवानेरे तखते पुङ उलटव ते तैसेरे सारे राज्जे मां आंधरु भोवं। ते लोक दुखे
 सेइं मरे ते अपनि-अपनि ज़िभ चापने लाए। 11 ते अपने दुखे ते फोड़ां केरे
 वजाई सेइं स्वर्गेर परमेशरेरी तुहीन की; ते अपने-अपने कम्मन करां मन न
 फिरव। 12 शेइयोवं स्वर्गदूते अपनो कटोरो बडे दरिया फराते पुङ उलटव ते
 तैसेरु पानी शुककी जेव एसेरो नितीजो ई भोव कि पूरबेरे राजे अपनि फौज
 घिन्तां पार जे। 13 एसेरां पत्ती मीं ट्लाई भूतां मैन्हु केरे रूपे मां लाए। अक
 अजगरेरे ऐशी मरां निस्सू, ते अक पेइले हैवानेरे ऐशी मरां निस्सू, ते अक
 दुइयोवं हैवानेरे ऐशी मरां निस्सू, जै जो झूठो सन्देश ज़ोते। 14 इन भूतन
 कां चमत्कार केरनेरी काबलीत थी ते तैना दुनियारे सारे मुलखां केरे राज़
 केरनेबालन अकोटु केरने चले ताके तैना परमेशरे सेइं लङ्न, ई तै दिहाडी
 आए ज़ेइस परमेशर भूतन नाश केरेलो ते अपने लोकन मुक्ति देलो। 15 तैन
 भूतेई हकोमत केरनेबाले ते तैन केरि फौज एककी ठैरी अकोट्टी की ज़ैस

जो इब्रानी भाषाई मां हर-मगिदोन ज़ोतन। एल्हेरेलेइ यीशुए ज़ोरूए, “इस शुना। मेरु एजनू अचानक च्वोरेरु ज़ेरुए। धने तै मैन्हु ज़ैखन अवं एज्जी तै तै बींझो रहते, ते अपने लिगडन तियार रखते। फिरी तै नग्गो न भोलो, ते फिरी तैस लोकन मां गाने सेइं शर्म न भोली।” 17 ते सतोवंए स्वर्गदूते अपनो कटोरो हवाई पुड़ उलटव, ते मीं स्वर्गे मां मन्दरे मरां परमेशरे तखते पुड़ां ई बड़ी आवाज़ शुनी कि कोई ज़ोने लोरोए, “सब किछ पूरू भोवं।” 18 फिरी बिजली, ते आवाज़, ते गुड़ने लाव, ते अक एत्रो बहु भुंजल अव, कि ज़ोइसेरे मैन्हु इस धेरतली पुड़ पैदा भोरोरेन, तेइसेरो अज़ तगर एरो भुंजल कधी नई ओरो। 19 ते तैस महान बाबेल नगरेरे ट्लाई टुकडे भोए, ते दुनियारे कौमां-कौमां केरे सारे नगर बर्बाद भोए। ताके परमेशर तै वादो पूरो केरे ज़ै तैने बाबेल नगरेरे लोकन सज्जा देनेरे लेइ कियोरो थियो। ई सज्जा परमेशर पक्की देलो। परमेशर तैन ट्लिठी शराबी पियालो ज़ैस मां पानी न भोए मिलावरु ज़ेसेरो मतलब परमेशरे तैन सेइं बड़ो क्रोधे मां आए ते तैन पुड़ दया न केरेलो। 20 तैस वक्ते हर अक टैपू समुन्दरे मां डुबो; ते कोई भी पहाड़ न राऊं। 21 ते अम्बरेरां मैनन् पुड़ मन-मन आण पेर्ई, ते एल्हेरेलेइ कि ई आफत बड़ी भारी थी, लोकेई आनहरी आफतरे वजाई सेइं परमेशरेरी तुहीन की।

17 जैन सत स्वर्गदूतन कां तैना सत कटोरे थिये, तैन मरां एइतां एकके मीं सेइं ज़ोवं, “इरां ईई, अवं तीं तैस बडे वेश्यारी सज्जा हिराताई, ज़ै बडे पैन्न पुड बिशोरीए। 2 जैस सेइं धेरतलरे राज्जैई बदमाशी की, ते धेरतली पुड़ रानेबाले तैसेरे बदमैशरे शराबी सेइं मसत भोरे थिये।” 3 तैखन आत्मा अवं अपने कैबू मां कियो ते स्वर्गदूते अवं सुनसान ठैरी मांजो नेव। तैड़ी मीं अक कुआन्श हैवाने पुड़ सुवार लाई, ज़ेसेरी सत क्रोड़ी ते दश शिंगाँ थियां, तैसेरे जान परमेशरेरी तुहीन केरनेरे नंब्वन सेइं ढकोरी थी। 4 तैस कुआन्शां बैंगनी ते लाल लिगड़ां लोरो थियां, ते सोन्नेरे ते कीमती मेनी ते मोतन सेइं सज़ोरी थी, ते तैसेरे हथ्ये मां अक सोन्नेरो कटोरे शराबी सेइं भेरतां थियो, ज़ै भिट्टे कम्मन ते बदमैशरे कम्मन हिराते। 5 ते तैसेरे कुपाए पुड़ इन नवं लिखोरु थियूं “भेद-बड़ो बाबेल धेरतलरी वेश्यां ते भिट्टी चीज़ां केरि अम्मा।” 6 ते मीं तै कुआन्श परमेशरेरे लोकां केरो खून ते यीशुएरे गुवाहां केरो खून पीने सेइं मसत भोती लाई, ते अवं तैन लेइतां हैरान भोव। 7 तैने स्वर्गदूते मीं सेइं

ज्ञोवं; “तू किजो हैरान भोव? अवं तीं सेइं इस कुआन्शारो, ते तैस हैवानेरो भेद
ज़ोताई, ज़ैस पुड़ तै सुवारे, ते ज़ेसेरी सत क्रोड़ी ते दश शिनगन। 8 ज़ै हैवान
तीं लाव, ई पेइलो थियो, पन हुनी नई रानो, ते अथाह कुण्डेरां निसेलो ते
परमेश्वर तैस पूरे तरीके सेइं नाश केरेलो, ते ज़ैना लोक इस दुनियाई मां जीने
लोरेन जैन केरां नंब्वा परमेश्वरे दुनिया बनाने करां पेइले ज़िन्दगरे किताबी मां
नई लिखोरां, तैना इस हैवान हेरतां हैरान भोले, ई हैवान पेइलो ज़ींतो थियो ते
हुनी ज़ींतो नई पन फिरी एज्जेलो। (Abyssos g12) 9 इन समझानेरे लेइ ज्ञानी
मन ज़रुरीए, तैना सत पहाड़न, ज़ैन पुड़ तै कुआन्श राज केरतीए। 10 ते तैना
सत राजे भी आन, पञ्च त मेरि जोरेन, ते अक हेजू ए; ते अक आखरी हेजू नई
ओरो, पन ज़ैखन तै एज्जेलो त थोड़े चिरेरे लेइ राज केरेलो। 11 ते ज़ै हैवान
पेइलो थियो, ते हुना नई, तै एप्पू अठोवं राजोए; ते तैन सत्तन मरां पैदा भोव,
ते आखरी मां तैस राजे हमेशारी सज्जा मैलेली। 12 ते ज़ैना दश शिन्माँ तीं
पेइलां लां, तैना दश राजेन, ज़ैनेई हेजू तगर राज शुरू नई कियोरू। तैन दश
राजन हैवाने सेइं साथी राज केरनेरो अधिकार दित्तो जेव, पन तैन राज केरनेरे
लेइ थोड़ो वक्त दित्तो। 13 इना सब अक मन भोले, ते तैना अपनि-अपनि
शक्ति ते अधिकार तैस हैवान देले। 14 इना गबड़े सेइं लड़ेले, ते गबड़ू तैन पुड़
ज़ींत हासिल केरेलूः किजोकि तै राजां केरो राजो ते प्रभुं केरो प्रभु आए। तैस
पत्ती चलने बाले तैना आन ज़ैना परमेश्वरे कुजोरेन ते चुनोरेन, ते ज़ैना तैस सेइं
साथी ईमानदार आन।” 15 फिरी तैने स्वर्गदूते मीं सेइं ज़ोवं, “कि ज़ैन पानी
तीं पेइलू लोरो थियूं, ज़ैस पुड़ तै वेश्या बिशोरी थी, ए दुनियारे सारे कौमन
हिराती, ज़ैना बड़े मुलखन मरां ते भाषान मरां आन। 16 तै वक्त एज्जेलो
ज़ेइस हैवान दश राजन सेइं ज़ैना तैस सेइं साथी आन, तैस वेश्याई सेइं बैर
रखेले, तैना तैस पुड़ हमलो केरेले ते तैस नग्नी केरेले तैसेरु किछ मास खाले,
ते बाकी फुकेले। 17 किजोकि परमेश्वर तैन केरे मन्न मां इन छडेलो, कि तैना
तैसेरी मर्जीं पूरी केरेले; ते जांतगर परमेश्वरे वचन पूरू न भोए, तांतगर अक
मन भोइतां अपनू राज हैवाने देन। 18 ते तै कुआन्श, ज़ै तीं लोरीए तैन बडू
नगरे, जैन धेरतलरे राजन पुड़ राज केरते।”

18 इट्टां पत्ती मीं अक स्वर्गदूत स्वर्गे मरां एइतो लाव। तैस कां बड़ो अधिकार
थियो, ते एल्हेरेलेइ तैसेरे बड़े चमकने बाले महिमा सेइं सारी धरतली लौ

बनी। २ तैने ज़ोरे सेइं ज़ोवं, “कि डुल्ली बाबेल नगरी डुल्ली, ते भूतां केरे
 रानेरी ठार, ते हर एककी भूतेरो अहो, ते हर एककी दुष्ट ते भिट्टे चड़ोलोवेरो
 अहो बीती जेव। ३ किजोकि तैसेरे बदमैशरे शराबी सेइं सब कौमां मसत
 भोइ, ते धेरतलरे राज़ेई तैस सेइं बदमाशी की, ते धेरतलरे बुपारी तैसेरे एशेरे
 वजाई सेइं अमीर भोइ जे।” ४ फिरी मीं स्वर्गेरां अक होरि आवाज़ शुनी, “हे
 मेरे लोकव तुस तैस मरां निस्सा ताके तुस तैसेरे पापन मां शामिल न भोथ, ते
 तैसेरी आफतन मरां कोई भी तुसन पुड़ न एज्जो। ५ किजोकि तैसारे पाप
 बड़े आन ज़ेन्वरे कि अगर ढेर लाव गाए त अम्बरे तगर पुज़ोरेन, ते परमेशरे
 तैसेरी बुराई नई बिसरोरी जै तैसां कियोरी आए। ६ ज़ेन्वरे तैसां लोकन सेइं
 कियूं तेन्वरे तैस सेइं भी केरा। तैना दुःख ज़ैना तैसां लोकन दिते तैस दुगने
 देथ, तैसां लोक अपने बुरां कम्मां केरो स्वाद चँखनेरे लेइ प्रभावित किये, तै
 परमेशरेरी दुगनी सरक मैसूस केरनेरे लेइ भी बनाई जेरी। ७ ज़ेत्री तैसां अपनि
 बड़याई की, ते एश किये, तेतरी तैस तकलीफ ते दुःख देथ, किजोकि तै अपने
 मने मां ज़ोतीए, अवं रानई, विधवा नई; अवं विधवारे दुखे मां कधे न गेइली।
 ८ एल्हेरेलेइ तैसेरे घमण्डेरे वजाई सेइं तैस पुड़ अचानक आफतां एज्जेली।
 अचानक तैस पुड़ बिमारी, दुःख ते कने काल साथी एज्जेलो। ते तै अग्गी मां
 भस्म की गाली, किजोकि प्रभु-परमेशर शक्तिमाने ते तै तैस सज्जा देलो।” ९
 ते दुनियारे राजे ज़ैनेरी तैस सेइं बदमाशी ते एश कियोरे थिये, ज़ैखन तैना
 तैसेरे फुकोनेरो तू लाएले त तैसेरेलेइ ढा छँडेले, ते छाती कुटेले। १० ते तैना
 डेरले कि तैना भी तैसेरे सज्जाई मां ट्लेइयोनेन, ते दूर खड़े भोइतां ज़ोले, “हे
 महान नगरी, बाबेल! हे मजबूत नगरी, हाय! हाय! एककी सैइती मां तीं सज्जा
 मैल्ली।” ११ “ते धेरतलरे बुपारी तैसेरेलेइ लेरां देले ते मिनत केरेले किजोकि
 हुनी कोई तैन सेइं लेन देन न केरेलो। १२ तैन केरु सामान बड़े किसमां
 केरु थियूं। सोन्नू चाँदी, जुवाहर, मोती। ते मलमल, बैजनी, रेशमी, ते लाल
 लिंगड़ां थियां, ते कने किसमां-किसमां केरि खुशबूदार लकड़ी, ते हथीदंतेरी
 हर किसमेरी चीज़ां, ते कीमती लकड़ी, पितल, लूहाँ, संगमरमरेरे किसमां-
 किसमां केरि चीज़ां, १३ ते दालचीनी, मसाले, धूप, गन्धरस, लोबान, मदिरा,
 तेल, मैदो, गेहूं, बेछी-दांत, भैंडां-छेल्ली, घोड़े, रथ, गुलाम, ते कने मैन्हु केरे
 प्राण। १४ ते बुपारी तैस सेइं ज़ोले, जैना चीज़ां तीं चैई तैना हुनी न रैली, जैना

खुशबूदार चीजां तीं पसंद की, तैना सैरी चीजां ज़ैना तीं अपनो जिसम खूबसूत
बनानेरे लेइ इस्तेमाल की, तैना सैरी तीं गवई ते हुनी तैना न मैल्लन। 15 इन
चीजन सेइं बुपारी ज़ैना तैसेरे वजाई सेइं अमीर भोरे थी, तैसेरे दुखेरे डरे सेइं
दूर खड़े भोले, ते लेरां देइतां ते तड़फते ज़ोले, 16 ‘अफ़सोस! अफ़सोस! ई
बड़ी नगरी ज़ै मलमल, बैंगनी, लाल लिंगड़ां लेइतां थी, ते सोन्नू, ते जुवाहर ते
मोतन सेइं सज़ोरी थी, 17 एककी सैइती मां तैसेरु एरु धन बरबाद भोवं, ते
सब मांझी, ते मुसाफर, ते मल्लाह, ते ज़ेत्रे समुन्द्रे मरां कमाई कमातन तैना
सारे दूर खड़े भोए।” 18 ज़ैखन तैना तैस नेगरारे फुकोनेरो तू लाएते त ज़ोरे
सेइं ज़ोले, इस महान नेगरारी ज़ेरि कोई नगरी नई। 19 ते अपने-अपने दोगे
पुड़ धूड़ मलेले, ते लेरां देते ते कर लाते चिन्डां मैरतां ज़ोले, “अफ़सोस!
अफ़सोस! ई बड़ी नगरी ज़ेसेरी दौलती सेइं समुन्दरेरेरां सब ज़िहाज्जन बाले
धनी भोरे थी, एककी सैइती मां उज़डे। 20 तुस ज़ैना स्वर्गे मां रातथ, ते
परमेशरेरे लोकव, ते प्रेरितव, ते कने नेबव, ज़ैन तैस सेइं भोवं तैसेरे वजाई
सेइं खुश भोथ, किजोकि परमेशरे तैस नेगरारो इन्साफ कियोरो किजोकि
तैसां तुसन सेइं बुरु कियोरु थियूं।” 21 फिरी एककी ताकतबर स्वर्गदूते बड़े
चेकारे पाठेरो ज़ेरो अक घोड़ छूवो, ते इन ज़ोइतां समुन्द्रे मां शारो, कि बड़ी
नगरी बाबेल एन्हरे बछोड़ी गाली, ते फिरी कधे तैसेरो पतो न मैलेलो। 22 ते
सारंगी बज़ानेबाले, ते गीतां ज़ोनेबाले, ते बेइशोई बज़ानेबाले, ते नड़शिनगों
बज़ानेबालां केरि आवाज़ फिरी तीं मां कधी न शुनोली, ते फिरी केन्ची पेशेरो
करीगिर तीं मां न मैलेलो; ते चककी चलनेरी आवाज़ तीं कधे न शुनोली। 23
ते लोक दीयेरी लौ फिरी तीं मां न बालेले, ते लाङेरी ते लैड़री आवाज़ कधे तीं
मां न शुनोली; किजोकि तेरे बुपारी धेरतली पुड़ प्रथान थिये, ते तेरे टूने सेइं
सब कौमां टेपलोवरी थी। 24 परमेशर बाबेले सज़ा देलो किजोकि सारे नेबी
ते परमेशरेरे लोकां, ते धेरतली पुड़ सब मारोरां केरो खून तैस्से मांए।

19 ताकतबर स्वर्गदूतेरे ज़ोइतां झाड़नेरां बाद, मीं स्वर्गे मां बड़े लोकां केरि
भीड़ उच्चे आवाज़ी मां इन ज़ोते शुनी, “हल्लिलूय्याह! मुक्ति, महिमा, शक्ति
इश्शे परमेशरोरीए। 2 तैसेरी बड़याई भोए किजोकि तैसेरे सारे फैसले सही
ते ठीक आन। तैने मशूर वेश्यारो इन्साफ कियो तैसां दुनियारे लोक पाप
केरनेरे लेइ प्रभावित किये। परमेशर तैस बदलो देलो किजोकि तैसारे ज़िरिये

परमेश्वरे दास मारोरेन।” ३ फिरी दुझोंवं बार तैनेहृं ज़ोवं, “हल्लिलूय्याह! ते
 तैसेरे फुकोनेरो तू सदा च्छलतो रालो।” (aiōn g165) ४ ते चोब्ही बुजुर्गेहृं ते
 चेन्ने प्रेणेहृं परमेश्वरे कां मथ्थो टेको; ज़ै तखते पुड़ बिशोरो थियो, ते ज़ोवं,
 “आमीन! हल्लिलूय्याह!” ५ ते तैखन मीं ज़ोते शुनो, ते परमेश्वरे तखते मरां
 अक आवाज़ आई, तैने ज़ोवं, “तुस इश्शो परमेश्वरे दास आथ जैना तैसेरी
 आदर केरतथ, कुन निकड़े, कुन बड़े, तुस सब तैसेरी तारीफ़ केरा।” ६
 फिरी मीं बड़ी भीड़ारी, ते बड़े पैनेरी आवाज़ शुनी, ते गुड़नेरी ज़ेरि आवाज़
 शुनी, “हल्लिलूय्याह! कि प्रभु इश्शो परमेश्वर, सर्वशक्तिमान राज़ केरते। ७
 एज्जा अस खुश ते मगन भोम, ते तैसेरी बढ़याई केरम; किजोकि गबड़ेरो
 ड्ला पुज़ोरोए, ते तैसेरे लैड़ां अपनो आप तियार केरोए। ८ ते तैस साफ ते
 चमकदार महीन मतलब मलमल लानेरो अधिकार दित्तो,” किजोकि तैस
 महीन मलमलेरो मतलब परमेश्वरे लोकां केरां धर्मेरां कम्मन। ९ ते स्वर्गदूते
 मीं सेइं ज़ोवं, “इन लिख, कि धन आन तैना, जैना गबड़ेरे ड्लाएरे धामी मां
 कुजोरेन।” फिरी तैने मीं सेइं ज़ोवं, “इना गल्लां जैना परमेश्वरे ज़ोई सच्च
 आन।” १० ज़ैखन मीं शुनू अवं ज़ै मीं सेइं गल्लां लोरो थियो केरने तैसेरी
 आराधना केरनेरे लेइ तैस कां झुको तैने मीं सेइं ज़ोवं, “मेरी आराधना न केर,
 तै परमेश्वरे ज़ेसेरी आराधना कियोरी लोडे। अवं भी परमेश्वरो दास आई,
 ज़ेन्चरे तू त तेरे विश्वासी साथी आन जैना यीशुएरो अपने प्रभुएरे रूपे मां
 इकरार केरतन।” ई सच्चाई यीशुए बांदी कियोरी ज़ै लोकन शक्ति देती कि
 परमेश्वरे वचनेरू एलान केरन। ११ फिरी मीं स्वर्ग खुल्लू लाव; तैड़ी मेरे
 सामने छितो घोड़ो थियो; ते तैस पुड़ अक सुवार थियो, ज़ै वफादार, ते झूठ
 न ज़ोए; ते ज़ैन परमेश्वरी नज़री मां सही आए तैसेरे मुताबिक इन्साफ ते
 परमेश्वरे दुश्मन्न सेइं लड़ाई केरते। १२ तैसेरे एछछी अगारे लपारी ज़ेरि थी,
 ते तैने बड़ां ताजां लोरो थियां; ते तैसेरु नवं तैस पुड़ लिखोरूए, तैसेरो मतलब
 सिफ तैए जानतो थियो। १३ तैनी खूने मां डुबोरु लिगड़ लोरो थियूं तैसेरु नवं
 परमेश्वरे वचने। १४ ते स्वर्गेरी फौज छिते घोड़न पुड़ सुवारे; ते तैना छिते ते
 साफ मलमल लेइतां तैस पत्ती पत्तीन। १५ ते कौमी-कौमी मारनेरे लेइ तैसेरे
 ऐशी मरां अक तिखी तलवार निसतीए, ते तै लोहेरे सोटे सेइं तैन पुड़ राज़
 केरेलो, ते तै सर्वशक्तिमान परमेश्वरे बड़े प्रकोपेरी खालिस शराबी सेइं दाछ़

द्वलेन्चेलो। 16 ते तैसेरां लिगड़न ते जंधी पुढ़ इन नवं लिखोरुए, “राज्ञा केरो राज्ञो ते प्रभुं केरो प्रभु।” 17 फिरी मीं अक स्वर्गदूत दिहाडे पुढ़ खडो लाव, ते तैने बेडि आवाजी सेइं अम्बरे मां उडने बाले चङ्गोलन सेइं ज्ञोवं, “एज्जा परमेश्वरे बडे धामी मां शामिल भोनेरे लेइ अकोटु भोथ। 18 ज़ैस सेइं तुस राज्ञा, प्रधानां, ताकतबर लोकां, घोडां ते कने तैन केरे सवारां, आजादां, गुलामां, निकडे, बडे, सेढ्भी लोकां केरु मास खाथ।” 19 फिरी मीं हैवान लाव जै समन्दरे मरां ओरो थियो, ते धेरतलरे राज्ञे ते कने तैन केरि फौज तैस घोडेरे सुवार ते तैसेरी फौजी सेइं लङ्नेरे लेइ अकोटु लाई। 20 ते तै पेइलो हैवान ते तैस सेइं साथी तै झूठो नबी ट्लाव, जैने तैसेरे सामने एरे निशान हिरावरो थियो, ज़ेसेरे ज़िरिये तैने तैना सारे लोक टपलाए, जैनेई तैस हैवानेरी छाप नेवरी थी, ते जैना तैसेरी मूरती पूजा केरते थिये, इन दुइये जीते तैस अगारे झीली मां छडे जे, जै गन्धके सेइं बलतीए। (Limnē Pyr g3041 g4442)

21 ते बाकी लोक तैस घोडेरे सवारेरी तलवारी सेइं जै तैसेरे ऐशी मरां निस्सती थी मारे जे; ते चुडोलू तैसेरे मासे सेइं रेज़ी जेआं।

20 फिरी मीं अक स्वर्गदूत स्वर्गेरां एइतो लाव; ज़ेसेरे हथ्ये मां अथाह कुण्डेरी चाबी ते कने अक बड्ही शंगल थी। (Abyssos g12) 2 तैने तै अजगर ट्लाव जै बडे पेइले सप्पेरे रूपे मां लेइहोरो थियो ज़ेसेरू नवं शैतान भी आए। तैने तै ट्लेइतां हज़ार सालेरे लेइ बन्धो। 3 ते तै अथाह कुण्डे मां शैरतां बन्द कियो ते तैस पुढ़ मोहर लई; कि तै हज़ार साल पूरे भोने तगर कोमां-कोमां केरे लोकन फिरी न भटकाए; इसेरां पत्ती ज़रूरे, कि थोडे चिरेरे लेइ खोल्लो गाए। (Abyssos g12) 4 फिरी मीं किछ तखत लाए ते जैना लोक तैन पुढ़ बिश्शोरे थिये ते तैन राज केरनेरो अधिकार दित्तो; ते तैन केरि आत्मा भी लेई, जैन केरि क्रोडी एल्हेरेलेइ केटोरी थी कि तैना यीशु मसीह अपनो प्रभु मन्तन ते परमेश्वरे वचने पुढ़ विश्वास केरतन, ते जैनेई तैस हैवानेरी, ते तैसेरे मूरती पूजा न थी कियोरी, ते तैसेरी महोर अपने कुपाए ते हथ्थन पुढ़ न थी। तैना ज़ीते भोइतां मसीह सेइं साथी हज़ार सालन तगर राज केरेले। 5 इना लोक पेइले आन जैना ज़ीते किये गाले ते तैना धन ते पवित्र आन। दुइयोवं मौतरी तैन पुढ़ कोई शक्ति न भोली। तैना परमेश्वरे लेइ याजक भोले ते मसीह तैन सेइं साथी हज़ार साल राज केरेलो, जांतगर तैना हज़ार साल पूरे

न भोन तांतगर होरे मर्मे लोक ज़ींते न किये गाले। 7 ज़ैखन हज़ार साल
 खतम भोनेबाले भोले त स्वर्गदूत शैताने तैस ठैरारा हथरां छुडेलो ज़ैडी तै
 बन्धोरो थियो। 8 ते तैन कौमन ज़ैना सैरी दुनियाई मां आन धोखो देनेरे लेइ
 निस्सेलो। तैन कौमन जो गोग ते मागोग ज़ोतन। शैतान तैन तैस ठैरी आनेलो
 ज़ैडी तै तैन सेइं लडेलो। तैन केरि गिनती समुन्दरेरे रेती बराबर भोली। 9
 शैतानेरी फौज सारे दुनियाई मां गाली, तैना तैस नगरे घेरेले ज़ैस सेइं परमेश्वर
 प्यार केरते ते ज़ैडी तैसेरे लोक रहतन, परमेश्वरेरे तरफां स्वर्गरां अग तैन
 सेब्बन भस्म केरेली। 10 ते तैन केरो गुमरा केरनेबालो शैतान अग ते गन्धकेरे
 समुन्दरे मां शारो गालो, ज़ैस मां तै हैवान ते कने झूठो नबी भी भोलो, तैना
 रात दिहाड़ी हमेशा दुखे मां राले। (aiōn g165, Limnē Pyr g3041 g4442) 11
 फिरी मीं अक बड्हो छितो तखत ते ज़ै तैस पुड़ बिशोरो थियो लाव, ज़ेसेरे
 सामनेरां धरती ते अम्बर नश्शू, ते तैन केरे लेइ ठार न मैल्ली। 12 फिरी मीं
 निकड़े बडे ज़ैना मर्मे थिये तखतेरे सामने खड़े लाए, ते किताबां खोल्ली जेई;
 ते फिरी अक होरि किताब खोल्ली; मतलब ज़िन्दगरी किताब खोल्ली; ते
 ज़ेन्चरे तैन किताबन मां लिखोरु थियूं, तैन केरे कम्मां केरे मुताबिक मुड़दां
 केरो इन्साफ कियो। 13 ते समुन्द्रे तैना मर्मे मैन्हु दिते ज़ैना तैस मां थी, ते
 मौतां ते पाताले ज़ैना तैस मां मर्मे थिये दिते; ते तैन मरां हर एक्केरो तैन केरे
 कम्मां केरे मुताबिक इन्साफ कियो। (Hadēs g86) 14 ते मौत ते पाताल भी
 अगारे समुन्दरे मां शारू, ई अग्गारो समुन्दरे त दुइयोवं मौते। (Hadēs g86,
 Limnē Pyr g3041 g4442) 15 ते ज़ेसेरु भी नवं ज़िन्दगरे किताबी मां लिखोरु
 न मैल्लू, तै अगारे समुन्दरे मां शारो जेव। (Limnē Pyr g3041 g4442)


21 फिरी मीं नंवू अम्बर ते नंवी धेरतली लाई, किजोकि पेइलू अम्बर, ते
 पेइली धेरतली न थी रावरी, ते समुन्दर भी न राव। 2 फिरी मीं पवित्र नगर
 नंवू यरुशलेम स्वर्गरां परमेश्वरे करां एइतू लाव, ते तैन तैस लैडारू ज़ेरु थियूं,
 ज़ै अपने लाडेरे लेइ तियार भोरी भोए। 3 फिरी मीं परमेश्वरे तखते मरां कोई
 उच्ची आवाज़ी सेइं इन ज़ोते शुनो, “अज़ेरां बाद परमेश्वर मैनन् सेइं साथी
 रालो, ते तैसेरु घर तैन लोकन मां भोलू, ते तैना तैसेरे लोक भोले, ते परमेश्वर
 एप्पू तैन, अपने लोकां केरे रूपे मां कबूल केरेलो ते तैना लोक तैस अपनो
 परमेश्वर कबूल केरेले। 4 ते तै तैन लोकां केरे एछ़छी केरां सब ऐंखरु पुछेलो;

ते तैटुं पर्ती मौत न राली, ते न दुःख, न मातम, न मुसीबत राली; पेइली
 गल्लां बीती जेर्ई।” ५ जै तखते पुड़ बिशोरो थियो तैने ज़ोवं, “कि तक, अवं
 सब किछ नंवू केरताई।” फिरी तैने ज़ोवं, “कि लिख, किजोकि इना वचन
 विश्वासेरे काबल ते सज्जे आन।” ६ फिरी तैने मीं सेइं ज़ोवं, “सब किछ पूरु
 भोवं, अवं अलफा ते ओमेगा, पेइलो ते आखरी आई, अवं टलिशोरे जिन्दगरे
 पैनेरे नागन मरां मुखत देइलो। ७ जै ज़ींत हासिल केरे, तैए इन चीजां केरो
 बारस भोलो; ते अवं तैसेरो परमेश्वर भोलो, ते तैन मेरु मट्ठू भोलू। ८ पन
 डरपोक, विश्वास न केरनेबाले, भिटे, खूनी, बदमाशी केरनेबाले, जैदू केरने
 बाले, मूरती केरि पूजा केरनेबाले ते सब झूठां केरो हिस्सो तैस समन्दरे मां
 मैलेलो जै अग्गी ते गन्धकी सेइं बलतो रहते, ई दुइयोवं मौते।” (Limnē Pyr
 g3041 g4442) ९ फिरी तैन सत स्वर्गदूतेर्ई जैनेर्ई सत आखरी आफतन सेइं
 भरोरे कटोरे मैनन् पुड़ उलटावरे थिये, तैन मरां एकके मीं कां एइतां ज़ोवं,
 “इरां एई, तीं अवं लैडे जै जल्दी गबड़े सेइं ढला बनाली हिराताई।” १०
 परमेश्वरे आत्मा अवं अपने कैबू मां कियो ते स्वर्गदूते अवं एककी बहु ते
 उच्चे पहाड़े पुड़ नेव, ते पवित्र नगर यरुशलेम स्वर्गोरां मरां परमेश्वरे करां
 एइतो हिरव। ११ परमेश्वरी महिमा तैस मां थी, ते तैसेरी लौ बड़े कीमती
 घोड़ां, मतलब बिल्लौरेरे ज़ेरे यशबे बराबर साफ थी। १२ तैस नगरेरे चेवे
 पासन बड़ी उच्ची दिवार थी, ते तैसेरां १२ दारां ते दारन पुड़ १२ स्वर्गदूत
 थिये; ते तैन पुड़ इसाएली केरे १२ गोत्रां केरां नंवां लिखोरां थियां। १३
 पूर्वे पासे ट्लाई दारां, उत्तरे पासे ट्लाई दारां, दखिनेरे पासे ट्लाई दारां,
 ते पश्चिमेरे पासे ट्लाई दारां थियां। १४ ते नगरेरे दिवारारी १२ मुनीयादां
 थी, ते तैन पुड़ गबड़ेरे १२ प्रेरितां केरां १२ नंवां लिखोरां थियां। १५ ते जै
 मीं सेइं गल्लां केरतो थियो, तैस कां नगर, ते तैसेरे दारन ते तैसेरे दिवारन
 नापनेरे लेइ अक सोन्नेरो गज थियो। १६ ते तैस नगरेरे चेव पासे थिये, ते
 तैसेरी लमबाई चोड़ाइअरे बराबर थी, ते तैने तैस गजे सेइं नगर नापू, त सड़े
 ७५० कोस निस्सी, ते तैसेरी लमबाई, ते चौड़ाई, ते ऊँचाई बराबर थी। १७
 तैसेरां बाद स्वर्गदूते दिवारारी ऊँचाई नापी। तैने एन्चरे नापी जेन्वरे मैन्हु चीजां
 नापतन, तै दिवार ६६ मीटर उच्ची निस्सी। १८ ते तै दिवार कीमती घोड़न
 सेइं बनोरी थी जैस जो यशब जोतन, नगर खालिस सोन्ने सेइं बनोरु थियूं,

जैन साफ चमकते शीशेरु ज़ेरु भोए। 19 ते तैस नगरेरी मुनीयादारे घोड़ हर किसमेरी कीमती घोड़न सेइं सज्जावरी थी, पेइली मुनीयाद यशबेरी दुइयोवं नीलमणेरी ट्लेड्योवं लालडी, च्वेरोवं मरकते, 20 पंचोव गोदेक, शेइयोवं माणिक्ये, सतोवं पीतमणि, अठोवं पेरोजे, नावोवं पुखराजे, दशोवं लहसनिए, यारोवं धूम्रकान्त, बारोवं याकूतेरी थी। 21 ते 12 दारां, 12 मोती केरां थियां, अक-अक दार, एककी-एककी मोती सेइं बनोरु थियूं ते नगरेरी सड़क साफ शीशेरी ज़ेरि खालिस सोन्नेरी थी। 22 मीं कोई मन्दर न लाव, किजोकि सर्वशक्तिमान प्रभु-परमेश्वर, ते गबडू तैड़ी नगरे मां आए। एल्हेरेलेइ मन्दरेरी कोई ज़रूरत नई। 23 ते तैस नगर मां दिहाडो ते चैंदनेरे लोअरी ज़रूरत नई, किजोकि परमेश्वरे महिमा सेइं तैस मां लौ भोइ रावरीए, ते कने गबडू तैसेरो दीयोए। 24 ते कौमां-कौमां केरे लोक तैसेरी लोई मां राले, ते धेरतलरे राजे अपनि-अपनि धन दौलत तैस नगरे मां आनेले। 25 तैस नगरेरां दारां सारे दिहैड़ी खुल्लां भोलो ते कधी बंद न भोलां। किजोकि तैड़ी कोई रात न भोली। 26 दुनियारे लोक दुनियारे कौमां केरि सैरी खूबसूत चीजां ते धन दौलत तैस नगरे मां आनेले। 27 ते तैस मां कोई भिट्टी चीज़ या गन्दु कम केरनेबालो या झूठ बनानेबालो, केन्ची भी तरीके सेइं अन्तर न गालो; पन सिर्फ तैना लोक जैन केरां नंवां गबड़ेरे ज़िन्दगरे किताबी मां लिखोरां भोलां।

22 फिरी तैने मीं बिल्लोरे ज़ेरो अक चमकतो ज़िन्दगरे पैनेरो दरिया हिराव, ज़े परमेश्वरे ते गबड़ेरे तखते करां निस्तां तैस नगरेरी सड़की तगर मझामई निस्तो थियो। 2 ते दरियारे इस पासे ते उस पासे, ज़िन्दगरो बुट थियो, तैस मां 12 किसमां केरे फल लगते थिये, ते तै हर महीने फलतो थियो; ते तैस बुटेरे पट्लान सेइं कौमां-कौमां केरे लोक बेज़्जोते थी। 3 फिरी तैड़ी लानत न भोली ते परमेश्वर ते गबड़ेरो तखत तैस नगर मां भोलो, ते तैसेरे दास तैसेरी सेवा केरेले। 4 ते तैना परमेश्वरे आमने सामने लाएले, ते परमेश्वरे नवं तैन केरे कुपाए पुड़ लिखोरु भोलू। 5 ते फिरी रात न भोली, ते तैन दीयो ते दिहड़ेरी ज़रूरत न भोली, किजोकि प्रभु-परमेश्वर तैन लौ देलो, ते तैन हमेशा राज केरेले। (aiōn g165) 6 फिरी स्वर्गदूते मीं सेइं ज़ोवं, “इना गल्लां विश्वासेरे काबल ते सञ्चीन, ते प्रभु ज़ै नेबी केरे आत्मा केरो परमेश्वरे, तैने अपने स्वर्गदूत एल्हेरेलेइ भेजो, कि अपने दासन तैना गल्लां जैन केरु जल्दी

भोनू ज़रुरीए हिराए।” 7 “हेर, अवं जल्दी एजने बालोई, परमेशर तैन सेव्हन
 बरकत देते ज़ैना इस किताबरे सन्देशे पुड़ ध्यान देतन।” 8 अवं तैए यूहन्ना
 आई, जै इना गल्लां शुन्तो, ते लहतो थियो, ते ज़ैखन मीं शुनू ते लाऊं, त जै
 स्वर्गदूत मीं इना गल्लां हिरातो थियो, अवं तैस कां मथ्थो टेकने लाव। 9 ते
 तैने मीं सेइं ज़ोवं, “हेर, एरु न केर; किजोकि अवं तेरो, ते तेरे विश्वासी सैथी
 नेबी ते इस किताबरी गल्लां केरे मन्ने बालां केरो संगी दासाई; परमेशरे कां
 मथ्थो टेक।” 10 फिरी तैने मीं सेइं ज़ोवं, “इस किताबरे भविष्यवैनरे गल्लन
 केरो भेद छुपेइतां न रख, किजोकि वक्त नेड़ोए। 11 जै बुरू केरते, तै बुरू
 केरतो राए; ते जै भिट्ठो, तै भिट्ठो बनोरो राए; ते जै धर्मी, तै धर्मी बनोरो राए;
 ते जै पवित्रे तै पवित्र बनोरो राए।” 12 फिरी प्रभु यीशुए ज़ोवं, “अवं जल्दी
 एज्जेलो। अवं एज्जी रावरोई जैन लोकेई कियूं तैसेरे मुताबिक इनाम देनेरे
 लेइ या सज्जा देनेरे लेइ। 13 ‘अवं अलफा ते ओमेगाई, पेइलो ते आखरी,
 शुरुआत ते अन्त आई।’” 14 थने तै, जै अपना लिगड़ा धोते, किजोकि तैस
 जिन्दगरे बुटे कां एजनेरो अधिकार मैलनोए, ते तै दारां केरे बत्तां गेइतां नगर
 मां दाखल भोलो। 15 पन कुतरां, जैदू केरनेबाले, बदमाशी केरनेबाले, खून
 केरनेबाले, मूरती केरि पूजा केरनेबाले, हर कोई झूठेरो चाने बालो, ते कने
 झूठ बनानेबालो बेइर राले। 16 “मीं यीशुए अपने स्वर्गदूत एल्हेरेलेइ भेजो,
 कि तुसन अगर कलीसिया मां इन गल्लां केरे बारे मां गवाही दे, अवं दाऊदेऱु
 ज़ील, वंश, ते झेझ्झरो चमकतो तारोई।” 17 परमेशरेरी आत्मा ते गबड़ेरी
 लाडी यीशु सेइं ज़ोतिन, “तू ज़रूर एई!” ते शुने बाले भी ज़ोन, “एई!” जै
 टलिशोरो भोए, तै एज्जे ते जै कोई चाए पानी ने जैन मुफ्ते मां जिन्दगी
 देते। 18 अवं हेर एक्की जै इस किताबरी भविष्यवैनरी गल्लां शुनते गवाही
 देताई, कि अगर कोई मैन्हु इन गल्लन मरां किछ बधाए, त परमेशर तैना
 आफतन जैना इस किताबी मां लिखोरिन, तैस देलो। 19 ते अगर कोई इस
 भविष्यवैनरी किताबरी किछ गल्लां कढे, त परमेशर तैस जिन्दगरे बुटे ते
 पवित्र नगर मरां ज़ेसेरे बारे मां इस किताबी माए, तैसेरो हिस्सो कढेलो। 20
 जै इन गल्लां केरि गवाही देते, तै इन जोते, “हाँ अवं जल्दी एजने बालोई।”
 आमीन। हे प्रभु यीशु एई! 21 प्रभु यीशुएरो अनुग्रह परमेशरेरे लोकन सेइं
 साथी राए। आमीन।



फिरी मीं पवित्र नगर नंव्य यस्तलेम स्वर्गों परमेशरे करां एङ्डू लाव, ते तैन तैस लैडारु जेरु थियूं, जै अपने लाडेर लेड तियार भोरी भोए। फिरी मीं परमेशरे तखते मरां कोई उच्ची आवाज़ी सेइं इन जोते शुगो, “अज़ेरां बाद परमेशर मैनन् सेइं साथी रालो, ते तैसेऱु घर तैन लोकन मां भोलू, ते तैना तैसेरे लोक भोले, ते परमेशर एप्पू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेले।”

प्रकाशित वाक्य 21:2-3

Reader's Guide

भद्रवाही at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, “*As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him.*” Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, “*And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned.*” So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, “*Do your best to present yourself approved by God, a worker who does not need to be ashamed, properly handling the word of truth.*” 2 Timothy 2:15. “*God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,*” 2 Peter 1:4-8.

Glossary

भद्रवाही at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonomous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bhadrawahi---Bhadrawahi-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियो 10:7
प्रकाशित वाक्य 9:1
प्रकाशित वाक्य 9:2
प्रकाशित वाक्य 9:11
प्रकाशित वाक्य 11:7
प्रकाशित वाक्य 17:8
प्रकाशित वाक्य 20:1
प्रकाशित वाक्य 20:3

प्रेरितों के काम 3:21
प्रेरितों के काम 15:18
रोमियो 1:25
रोमियो 9:5
रोमियो 11:36
रोमियो 12:2
रोमियो 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलुसियों 1:26
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

1 पतरस 1:25
1 पतरस 4:11
1 पतरस 5:11
2 पतरस 3:18
1 यूहन्ना 2:17
2 यूहन्ना 1:2
यहूदा 1:13
यहूदा 1:25
प्रकाशित वाक्य 1:6
प्रकाशित वाक्य 1:18
प्रकाशित वाक्य 4:9
प्रकाशित वाक्य 4:10
प्रकाशित वाक्य 5:13
प्रकाशित वाक्य 7:12
प्रकाशित वाक्य 10:6
प्रकाशित वाक्य 11:15
प्रकाशित वाक्य 14:11
प्रकाशित वाक्य 15:7
प्रकाशित वाक्य 19:3
प्रकाशित वाक्य 20:10
प्रकाशित वाक्य 22:5

aīdios

रोमियो 1:20
यहूदा 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यूहन्ना 3:15
यूहन्ना 3:16
यूहन्ना 3:36
यूहन्ना 4:14
यूहन्ना 4:36
यूहन्ना 5:24
यूहन्ना 5:39
यूहन्ना 6:27
यूहन्ना 6:40
यूहन्ना 6:47
यूहन्ना 6:54
यूहन्ना 6:68

1 पतरस 1:23

यूहन्ना 10:28
यूहन्ना 12:25
यूहन्ना 12:50
यूहन्ना 17:2
यूहन्ना 17:3
प्रेरितों के काम 13:46
प्रेरितों के काम 13:48
रोमियो 2:7
रोमियो 5:21
रोमियो 6:22
रोमियो 6:23
रोमियो 16:25
रोमियो 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानियों 5:9
इब्रानियों 6:2
इब्रानियों 9:12
इब्रानियों 9:14
इब्रानियों 9:15
इब्रानियों 13:20
1 पतरस 5:10
2 पतरस 1:11
1 यूहन्ना 1:2
1 यूहन्ना 2:25
1 यूहन्ना 3:15
1 यूहन्ना 5:11
1 यूहन्ना 5:13
1 यूहन्ना 5:20
यूदा 1:7
यूदा 1:21
प्रकाशित वाक्य 14:6

eleēsē

रोमियो 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लूका 12:5
याकूब 3:6
Hades
मत्ती 11:23
मत्ती 16:18
लूका 10:15
लूका 16:23
प्रेरितों के काम 2:27
प्रेरितों के काम 2:31
1 कुरिन्थियों 15:55
प्रकाशित वाक्य 1:18
प्रकाशित वाक्य 6:8
प्रकाशित वाक्य 20:13
प्रकाशित वाक्य 20:14
Limnē Pyr
प्रकाशित वाक्य 19:20
प्रकाशित वाक्य 20:10
प्रकाशित वाक्य 20:14
प्रकाशित वाक्य 20:15
प्रकाशित वाक्य 21:8
Sheol
उत्पत्ति 37:35
उत्पत्ति 42:38
उत्पत्ति 44:29
उत्पत्ति 44:31
गिनती 16:30
गिनती 16:33
व्यवस्था विवरण 32:22
1 शमूएल 2:6
2 शमूएल 22:6
1 राजा 2:6
1 राजा 2:9
अच्यूत 7:9
अच्यूत 11:8
अच्यूत 14:13
अच्यूत 17:13
अच्यूत 17:16
अच्यूत 21:13
अच्यूत 24:19
अच्यूत 26:6
भजन संहिता 6:5
भजन संहिता 9:17
भजन संहिता 16:10
भजन संहिता 18:5
भजन संहिता 30:3
भजन संहिता 31:17
भजन संहिता 49:14
भजन संहिता 49:15
भजन संहिता 55:15
भजन संहिता 86:13
भजन संहिता 88:3
भजन संहिता 89:48


भजन संहिता 116:3
भजन संहिता 139:8
भजन संहिता 141:7
नीतिवचन 1:12
नीतिवचन 5:5
नीतिवचन 7:27
नीतिवचन 9:18
नीतिवचन 15:11
नीतिवचन 15:24
नीतिवचन 23:14
नीतिवचन 27:20
नीतिवचन 30:16
सभोपदेशक 9:10
श्रेष्ठीत 8:6
यशायाह 5:14
यशायाह 7:11
यशायाह 14:9
यशायाह 14:11
यशायाह 14:15
यशायाह 28:15
यशायाह 28:18
यशायाह 38:10
यशायाह 38:18
यशायाह 57:9
यहेजकेल 31:15
यहेजकेल 31:16
यहेजकेल 31:17
यहेजकेल 32:21
यहेजकेल 32:27
होशे 13:14
आमोस 9:2
योना 2:2
हबक्कूक 2:5

Tartaroō

2 पतरस 2:4

Questioned

None yet noted




Abraham's Journey

विश्वसे सेइ जैखन परमेश्वर अब्राहम, जैस जार्गा गने जो परमेश्वर तै कुजारो थियो, ततै हुक्म मेन्ता तैस जार्गा चलो जेव, जै जार्गा बढे मां परमेश्वर तैस विरासतरो जेव देनेबालो थियो।

हालाकिं तै एन भी न थियो जानन्तो कि अब कोरां चलोरहै, मिसी भी चलो जेव। - इत्तिहास 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



किंजोकि मैनेह मध्य, यानी अब एस दुनियाई मां पलहेलै नई ओरो कि कोई मेरी सेवा केरे, पन एल्टरेलै ओरोई कि अब होरि लोकां केरि सेवा केरि त कने बडे लोकां केरे लेइ अपनि जान बलिदान केरि,
ताके तेन अपने पाणा केरि सजाई केरां छुटकारो मैल्लो - मरकुस 10:45



अब पौलस यीशु मसीहों दास आई, ते प्रेरित भोने लेइ पस्सेशे चुनारेहै, ते परमेश्वरी खुशखबरी प्रवार केनेरे लेइ ठस्सावरो आई। - रोमियों 1:1

Creation 4004 B.C.

- Adam and Eve created
Tubal-cain forges metal
- Enoch walks with God
- Methuselah dies at age 969
- God floods the Earth
- Tower of Babel thwarted
- Abraham sojourns to Canaan
- Jacob moves to Egypt
- Moses leads Exodus from Egypt
- Gideon judges Israel
- Ruth embraces the God of Israel
- David installed as King
- King Solomon builds the Temple
- Elijah defeats Baal's prophets
- Jonah preaches to Nineveh
- Assyrians conquer Israelites
- King Josiah reforms Judah
- Babylonians capture Judah
- Persians conquer Babylonians
- Cyrus frees Jews, rebuilds Temple
- Nehemiah rebuilds the wall
- Malachi prophesies the Messiah
- Greeks conquer Persians
- Seleucids conquer Greeks
- Hebrew Bible translated to Greek
- Maccabees defeat Seleucids
- Romans subject Judea
- Herod the Great rules Judea**

New Heavens and Earth

- Christ returns for his people
- Jim Elliot martyrdom in Ecuador
- John Williams reaches Polynesia
- Zinzendorf leads Moravian mission
- Japanese kill 40,000 Christians
- Jesuits reach Mexico
- Martin Luther leads Reformation
- Gutenberg prints first Bible
- Franciscans reach Sumatra
- Ramon Llull trains missionaries
- Crusades tarnish the church
- The Great Schism
- Adalbert martyrdom in Prussia
- Bulgarian Prince Boris converts
- Boniface reaches Germany
- Alopen reaches China
- Longinus reaches Alodia / Sudan
- Saint Patrick reaches Ireland
- Carthage ratifies Bible Canon
- Ulfilas reaches Goth / Romania
- Nicæa proclaims God is Trinity
- Denis reaches Paris, France
- Tertullian writes Christian literature
- Titus destroys the Jewish Temple
- Paul imprisoned in Rome, Italy
- Thomas reaches Malabar, India
- Peter reaches Gentile Cornelius
- Holy Spirit empowers the Church**

Jesus Christ born 4 B.C.
(The Annals of the World, James Usher)

(Wikipedia, Timeline of Christian missions)

Resurrected 33 A.D.

Where?

ՀՕԿՄ

Where?		When?		Who?	
Innocence		Fallen		Glory	
Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age
God	Father	God's Perfect Fellowship	God's Perfect Fellowship with Adam in the Garden of Eden	Living in Unapproachable Light, 1 Timothy 6:16	Great White Throne
	Son	Pre-Incarnate, John 8:58	Incarnate, John 1:14	Paradise, Luke 23:43	New Heaven and Earth
	Holy Spirit	Everywhere, Psalm 139:7	Indwelling Believers, John 14:17	All Restored	
Mankind	Living Mankind		Serving the Savior or Satan on Earth, Ephesians 2:1-5	All Mankind in the Holy City	
	Deceased Believing Mankind		Blessed in Paradise, Luke 16:22	No Hades	
	Deceased Unbelieving Mankind		Punished in Hades until the final judgment, Luke 16:23 and Rev 20:13	No Dead	
	Holy Angels	No people	Serving Mankind at God's Command, Hebrews 1:14	Rev 20:3	
Angels	Imprisoned Angels	Gen 1:1	Imprisoned in Tartarus, 2 Peter 2:4 and Jude 6	Lake of Fire Prepared for the Devil and his Angels	Fallen Angels Forgiven?
	Fugitive Angels	No Fall	Thalassa, Rev 20:13	Col 1:20 Yes?	
	First Beast Demon	No Unholy Angels	Rebellious Against Christ	Heb 2:16 No?	
	False Prophet Demon	Gen 1:31	Accusing Mankind	Mat 25:41 Rev 20:10	
	Satan		1 Peter 5:8 and Revelation 12:10	Abyss Revelation 20:22	

Destiny

भद्रवाही at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'*" Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the lump*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Disciple All Nations

एल्फ्रेड तुस गाथ ते सैरी कौमां केरे लोकन चेले बनाथ, ते तैन बाजी, ते मध्दे, ते पवित्र आत्मारे नंबे सेँव वापतिस्मा देश। - मर्ती 28:9